

---

BUK  
BLONG  
MOMON

---

WAN NARAFALA TESTEMAN  
BLONG JISAS KRAES

---

# BUK BLONG MOMON

WAN NARAFALA

TESTEMAN

BLONG

JISAS KRAES

---

Copyright © 2004 tru Intellectual Reserve, Inc.

Kampani ia i holem evri raet

Oli bin printim buk ia long Amerika 7/2010

19932004

Translation of the Book of Mormon

Bislama

ISBN 978-1-59297-526-6 Hardcover (35606 852)

ISBN 978-1-59297-527-3 Softcover (35607 852)

---

# BUK BLONG MOMON

WAN HISTRI WE MOMON I BIN RAETEM

WETEM HAN BLONG HEM

LONG OL BUK

WE I BIN TEKEM LONG OL BUK BLONG NIFAE

From samting ia, buk ia i holem samfala pat nomo blong ol histri long saed blong ol pipol blong Nifae, mo tu blong ol man blong Leman—Oli bin raetem i go long ol man blong Leman, we oli smol haf nomo blong laen blong Isrel; mo tu long ol Jiu mo Jentael—Oli bin raetem folem komanmen, mo tu tru long spirit blong profesi mo blong revelesen—Oli bin raetem mo lokem, mo oli bin haedem wetem Lod, blong mekem se oli no save lus—Blong kamaot tru long presen mo paoa blong God blong tanem toktok blong hem—I bin lokem wetem han blong Moronae, mo i bin haedem wetem Lod, blong kamaot long raet taem tru long wei blong ol Jentael—Tanem toktok blong buk ia tru long presen blong God.

Samfala pat i bin kamaot long Buk blong Ita tu, we i wan histri blong ol pipol blong Jared, we oli bin seraot olbaot long taem we Lod i bin jenisim ol lanwis blong ol pipol, taem we oli bin stap bildim wan taoa blong go long heven—We i blong soemaot long ol smol haf nomo blong laen blong Isrel wanem ol gudfala samting we Lod i bin mekem long ol bubu blong olgeta; mo blong oli save gat save long saed blong ol kavenan blong Lod, blong hem i no sakemaot olgeta blong oltaem—Mo tu blong winim tingting blong ol Jiu mo Jentael we JISAS hem i KRAES, GOD WE I NO SAVE FINIS, we i soemaot hemwan long evri kantri—Mo nao, sapos i gat sam samting we i no stret oli ol mistek blong ol man; from samting ia, no toktok agensem ol samting blong God, blong mekem se yufala i stap klin gud long fored blong jea blong jajmen blong Kraes.

---

Fasfala translesen aot long ol buk ia i go long Inglis,  
tru long Josef Smit, Junia

Fastaem we oli printim buk long Inglis hem i  
long Palmaera, Niu Yok, USA, long 1830

---

Buk ia i bin kamaot tru long  
Jos blong Jisas Kraes blong ol Lata-dei Sent  
Sol Lek Siti, Yuta, USA



---

 FAS TOKTOK
 

---

**B**uk blong Momon i wan buk blong tabu skripja olsem long Baebol. Hem i wan histri blong ol wok blong God wetem ol man Amerika blong bifo mo i holem gospel we i fulwan ia we i no gat en.

Plante profet blong bifo i bin raetem buk ia tru long spirit blong profesi mo revelesen. Ol toktok blong olgeta, we oli bin raetem long ol buk we oli mekem wetem gol, wan profet-mo wan man blong histri we nem blong hem i Momon i bin raetem ol toktok blong ol profet ia mo i bin mekem i kam smol. Histri ia i givim wan histri blong tu bigfala grup blong pipol. Wan i bin kamaot long Jerusalem 600 yia bifo Jisas Kraes i bon, mo afta hem i bin seraotem i go long tu grup we oli save olgeta olsem ol man blong Nifae mo ol man blong Lemana. Narafala wan i bin kam fastaem long taem we Lod i bin jenisim ol lanwis long Taa blong Babilon. Grup ia, oli save olsem ol man blong Jared. Afta plante taosen yia, olgeta eniwan i bin ded be ol man blong Lemana nomo i bin stap laef, mo oli ol stret bubu blong ol Indian blong Amerika.

Bigfala stori we i stap insaed long Buk blong Momon hem i ministri blong Lod Jisas Kraes long medel blong ol man blong Nifae klosap afta hem i bin laef bakegen. I soemaot ol doktrin blong gospel, i soem plan blong fasin blong sevem ol man, mo i talem ol man wanem oli mas mekem blong kasem pis long laef ia mo fasin blong sevem ol man we i no save finis long laef we bae i kam.

Afta Momon i bin finisim ol raeting blong hem, hem i bin givim histri ia long boe blong hem Moronae, we i bin raetem smol moa toktok blong hemwan mo i bin haedem ol buk ia long hil Kumora. Long Septemba 21, 1823, semfala Moronae, long taem ia hem i stap saen, mo i bin kasem laef bakegen, i bin kamaot long Profet Josef Smit, mo i bin tijim hem long saed blong histri ia blong bifo we bae i mas transletem i kam long Inglis lanwis.

Afta, hemi bin givim ol buk ia long Josef Smit, we i bin transletem olgeta tru long presen mo paoa blong God. Nao oli printim histri ia long plante lanwis olsem wan niu mo narafala witnes we Jisas Kraes i Pikinini blong God we i stap laef mo we olgeta we bae i kam long hem mo obei ol loa mo ol odinens blong gospel blong hem i save sev.

Long saed blong histri ia Profet Josef Smit i bin talem: “Mi bin talem long ol brata se Buk blong Momon i moa stret long eni narafala buk long wol, mo i ki ston blong bilif long God blong yumi, mo wan man bae i kam moa klosap long God sapos hem i folem ol tijing blong hem, bitim eni narafala buk.”

---

Wetem Josef Smit, Lod i bin jusum leven narafala man blong lukim ol buk we oli mekem wetem gol, blong olgeta bakegen mo blong kam ol spesel witnes se Buk blong Momon i tru mo i bin kam long God. Ol testemoni blong olgeta we oli bin raetem i stap insaed long buk ia olsem “Testemoni blong ol Tri Witnes” mo “Testemoni blong ol Eit Witnes.”

Mifala i askem evri man long evri ples blong ridim Buk blong Momon, blong tingting hevi long ol hat blong olgeta mesej we i holem, mo afta blong askem God, Papa we i no Save Finis, long nem blong Kraes sapos buk ia i tru. Olgeta we oli folem stamba tingting ia, mo askem wetem fet bae oli kasem testemoni se hem i tru mo i bin kam long God tru long paoa blong Tabu Spirit. (Luk Moronae 10:3–5.)

Olgeta we i kasem tabu witnes ia tru long Tabu Spirit, bae oli kam blong save tu tru long sem paoa, se Jisas Kraes i Sevyia blong wol, se Josef Smit i man blong revelesen blong hem mo profet long ol las dei ia, mo se Jos blong Jisas Kraes blong ol Lata-dei Sent i kingdom blong Lod we wan taem bakegen i stanap long wol, blong mekem rere long taem we Mesaea bae i kambak bakegen.

---

 TESTEMONI BLONG OL TRI WITNES
 

---

TOK SAVE i go long evri kantri, famle, lanwis, mo pipol, we bae ol wok ia bae i go long olgeta: Se mifala tru long gladhat blong God Papa, mo Lod blong yumi Jisas Kraes, i bin luk ol buk we i holem ol histri ia, we i wan histri blong ol pipol blong Nifae, mo tu blong ol man blong Leman, ol brata blong olgeta, mo tu blong ol pipol blong Jared, we i bin kam long taoa we oli bin tokbaot. Mo mifala i save tu se hem i bin transletem olgeta tru long presen mo paoa blong God, from voes blong hem i bin talemaot samting ia long mifala; from samting ia, mifala i save gud se wok i tru. Mo mifala i testifae tu se mifala i bin luk ol raeting we i stap long ol buk; mo hem i bin soemaot samting ia tru long paoa blong God, mo i no blong man. Mo mifala i talemaot wetem tru toktok, se wan enjel blong God i bin kamdaon long heven, mo hem i bin karem mo putum long fored blong ol ae blong mifala we mifala i bin luk mo lukim ol buk ia mo ol raeting we i stap long hem; mo mifala i save se i tru long gladhat blong God, Papa mo Lod blong yumi Jisas Kraes, we mifala i bin luk mo talemaot se ol samting ia i tru. Mo samting ia i gud tumas long ol ae blong mifala. Be, voes blong Lod i bin givim oda long mifala se mifala i mas talemaot samting ia. From samting ia, blong obei ol komanmen blong God, mifala i talemaot testemoni long saed blong samting ia. Mo mifala i save se sapos mifala i holem taet fet long Kraes, bae mifala i wasemaot blad blong ol man long ol klos blong mifala, mo stanap klin long fored blong jea blong jajmen blong Kraes, mo bae mifala i stap wetem hem long heven kasem taem we i no save finis. Mo ol ona i go long Papa, mo long Pikinini, mo long Tabu Spirit, we i wan God. Amen.

OLIVA KOWDRI  
 DEVED WITMA  
 MARTIN HARIS



---

## TESTEMONI BLONG OL EIT WITNES

---

TOK SAVE i go long evri kantri, famle, lanwis, mo pipol, we bae ol wok ia bae i go long olgeta: Se Josef Smit, Junia, man we i bin transletem wok ia, i bin soemaot long mifala ol buk we i bin tokbaot, we i luk olsem gol; mo ol pat blong buk we Smit ia i bin transletem, mifala i bin tajem wetem ol han blong mifala; mo tu mifala i bin lukim ol raeting long hem, ol raeting ia i luk olsem ol raeting blong bifo, mo fasin blong raeting we i stap long hem i defren tumas. Mo hemia mifala i talemaot wetem ol tru toktok, se Smith ia bin soemaot long mifala, from mifala i bin luk mo bin leftemap, mo i save gud se Josef Smit ia i holem ol buk ia we mifala i bin tokbaot. Mo mifala i givim ol nem blong mifala long wol, blong witnes long wol ol samting we mifala i bin luk. Mo mifala i no giaman, God i witnes long samting ia.

KRISTIAN WITMA  
JEKOB WITMA  
PITA WITMA, JUNIA  
JON WITMA

HAERAM PEJ  
JOSEF SMIT, SENIA  
HAERAM SMIT  
SAMUEL H. SMIT

---

 TESTEMONI BLONG PROFET JOSEF SMIT
 

---

Ol stret toktok blong Profet Josef Smit long saed blong hao nao Buk blong Momon i bin kamaot:

“Long naet blong . . . namba twenti-wan blong Septemba [1823] . . . mi bin go askem mo prea long God we i gat Bigfala Paoa mo askem hem. . . .

“Taem we mi bin stap rere blong mekem prea long God, mi bin luk wan laet i stap kamaot long rum blong mi, we i bin gohed blong gru kasem taem we rum blong mi i laet moa, bitim medel dei, we wan taem nomo, wan enjel i bin kamaot klosap long bed blong mi, mo hem i stanap nomo long ea, from ol leg blong hem i no bin tajem graon.

“Hem i bin werem wan longfala klos we i slak long bodi blong hem mo waet kala blong hem i naes tumas. Waet kala ia i bin bitim evri samting we i waet long wol ia, we mi bin luk bifo; mo mi no bilivim se i gat eni samting long wol ia, oli save mekem i luk waet mo saen olsem. Ol han blong hem i neked, mo ol han blong hem tu, smol antap long joen blong han; tu, olsem, ol leg blong hem i bin neked smol antap long ol angkol. Hed mo nek blong hem i bin neked tu. Mi bin save faenemaot se hem i no bin werem eni narafala klos be longfala klos ia nomo, from i bin open we mi save luk jes blong hem.

“I no longfala klos blong hem nomo we i stap waet tumas, be ful bodi blong hem i saen, mi no save olsem wanem blong tokbaot samting ia, mo fes blong hem i saen olsem laetning. Rum blong mi tu i bin laet olgeta, be i no saen bigwan olsem laet raonabaot long bodi blong hem. Taem we mi bin luk long hem fastaem, mi bin fraet; be afta smol taem nomo, fraet blong mi i bin lus.

“Hem i bin singaotem mi long nem blong mi, mo i bin talem long mi se hem i wan mesenja we God i bin sendem hem i aot long fes blong hem i kam long mi, mo we nem blong hem i Moronae, we God i gat wan wok we hem i wantem mi blong mekem. Mo plante man bae oli laekem nem blong mi, mo plante bae i no laekem nem blong mi, long medel blong evri kantri, famle, mo ol lanwis, o se nem blong mi bae oli tokbaot gud o nogud long medel blong evri pipol.

“Hem i bin talem se i bin gat wan buk we oli bin berem, we oli bin raetem long ol buk we oli mekem wetem gol, oli givim wan histri blong ol man bifo we i bin stap long kantri ia, mo ples we oli bin kamaot. Hem i talem tu se gospel we i fulwan we i no gat en, i bin stap insaed long hem, olsem we Sevyia i bin givim long ol man we i bin stap bifo;

“Mo tu, se i bin gat tu ston insaed long ol silva bonara — mo tufala ston ia, i joen wetem wan plet blong kavremap jes, i bin mekem wanem oli singaotem Yurim mo Tumim — oli bin berem wetem ol buk ia; mo ol man we i holem mo yusum ol ston ia, i samting we i bin mekem *ol Sia* long olfala taem; mo we God i bin mekem rere olgeta from stamba tingting blong transletem buk ia.

“Bakegen, hem i bin talem long mi, se taem we mi kasem ol buk ia, we hem i bin tokbaot—from taem we mi mas kasem olgeta i no hapen yet—mi no mas soemaot olgeta long eni man; mo tu plet blong kavremap jes, wetem Yurim mo Tumim; long olgeta nomo we God i givim oda long mi, blong soem olgeta; sapos mi mekem olsem bae mi kasem panis. Long taem we hem i stap toktok wetem mi long saed blong ol buk ia, visen i bin open long tingting blong mi we mi save luk ples ia we oli bin berem ol buk ia long hem. Mo we i klia gud mo i stret, mekem se mi bin save ples ia bakegen taem mi bin visitim ples ia.

“Afta mi bin finis toktok wetem enjel ia, mi bin luk laet long rum i stat blong kam raonem man ia we i bin toktok long mi, mo i bin gohed blong mekem olsem kasem taem we rum i bin stap tudak bakegen be raonem hem nomo. Nao long stret taem we samting ia i kamaot, mi bin luk wan bigfala hol, olsem wan bigfala paep i go stret antap long heven, mo hem i bin go antap kasem taem we hem i bin lus eni man, mo rum i bin stap olsem we i bin stap bifo we laet ia blong heven i bin kamaot.

“Mi stap ledaon mo mi stap tingbaot spesel samting ia we i jes kamaot long mi, mo mi tingting hevi tumas long saed blong wanem we enjel ia i bin talem long mi; long sem taem long medel blong tingting hevi blong mi, mi bin faenem kwik taem se laet i stap kamaot bakegen long rum blong mi, mo long wan kwiktaem nomo, olsem we i bin stap, semfala mesenja ia blong heven i bin stap long saed blong bed blong mi bakegen.

“Hem i bin stat, mo bakegen i bin talemaot ol semfala samting we hem i bin mekem long nambawan taem we hem i bin kam. Evri toktok i semak nomo, we afta hem i bin mekem samting ia, hem i bin talemaot long mi ol bigfala jajmen we bae i kam long wol, wetem bigfala hadtaem blong kasem kakae, naef blong faet, mo sik; mo se ol rabis jajmen ia bae i kam long wol long jeneresen ia. Afta hem i bin talemaot ol samting ia, hem i bin gobak antap olsem we hem i bin mekem bifo.

“Afta samting ia, ol tingting i bin go dip insaed long maen blong mi, i mekem se slip i bin ronwe long ol ae blong mi, mo mi ledaon wetem sapraes tumas long ol samting we mi bin luk tugeta wetem we mi bin harem. Be wanem bigfala sapraes blong mi long taem we mi bin luk semfala mesenja klosap long bed blong mi, hem i bin talem o talemaot bakegen long mi ol samting olsem bifo; mo i bin ademap wan woning long mi, i talem long mi se Setan bae i traem blong temptem mi (from we famle blong papa blong mi i no gat plante mane), blong mi kasem ol buk ia, blong stamba tingting blong kam rij. Samting ia hem i bin blokem mi, i se mi no mas gat eni narafala tingting long ae blong mi hemia nomo blong leftemap God, mo mi no mas folem eni narafala tingting be blong stanemap kingdom blong Hem nomo; sapos no, bae mi no save kasem olgeta.

“Afta nambatri visit ia, hem i bin gobak antap long heven olsem bifo. Mo mi bin stap bakegen blong tingting hevi long olgeta defren kaen samting we i jes kamaot long mi; kwiktaem nomo olsem stret

taem afta we mesenja blong heven i bin go antap aot long mi blong namba tri taem, faol i bin singaot, mo mi bin faenem se deilaet i stap kam, i minim se ol storian blong mitufala i bin tekem klosap ful naet ia.

“I no long taem afta mi bin girap aot long bed blong mi, mo bin gohed olsem evri taem blong mekem ol wok blong dei; be, long taem mi bin traem blong wok olsem ol narafala taem, mi bin faenem se bodi blong mi i slak we i mekem se mi no save mekem wok. Papa blong mi, we i bin stap wok wetem mi, i bin faenem se wan samting i no stret wetem mi, mo i bin talem mi blong go long haos. Mi bin stat wetem stamba tingting blong go bak long haos; be, long taem we mi bin traem blong klaem ova long fanis aot long fil we mifala i bin stap long hem, paoa blong mi i bin lus eni man, mo mi bin foldaon long graon olsem se mi ded, mo blong wan taem mi no bin save eni samting.

“Fasfala samting we mi save tingbaot, i wan voes we i stap toktok long mi, i singaotem mi long nem blong mi. Mi bin lukluk i go antap, mo mi bin lukim semfala mesenja ia, i stanap klosap long hed blong mi, laet i roanem hem olsem bifo. Afta hem i bin talemaot bakegen long mi evri samting we hem i bin talemaot long mi long naet bifo, mo i bin givim oda long mi blong go long papa blong mi mo talem long hem long saed blong visen mo ol komanmen we mi bin kasem.

“Mi bin obei; mi bin gobak long papa blong mi long fil, mo bin talemaot evri samting long hem. Hem i bin talem se samting ia i wan samting blong God, mo i bin talem long mi blong go mo mekem ol samting we mesenja i bin talemaot long mi. Mi bin livim fil mo mi bin go long ples ia we mesenja i bin talem long mi se ol buk ia i stap long hem, mo from visen we mi bin kasem i klia gud long saed blong samting ia, mi bin save ples ia long stret taem we mi bin kasem ples ia.

“Klosap long vilej blong Manjesta, Ontario distrik, Niu Yok, i gat wan bigfala hil we i bigwan, we i moa hae long eni narafala hil long ples ia. Long wes saed blong hil ia, i no longwe long antap blong hem, andanit long wan ston we i bigwan ol buk ia i stap long wan ston bokis. Ston ia i bigwan, mo saed antap i raon long medel, mo i smol long ol saed, mekem se medel pat blong hem i save luk antap long graon, be saedsaed blong hem graon i bin kavremap.

“Afta mi bin tekemaot ol graon, mi bin tekem wan wud, we mi bin pusum lelebet andanit long saed blong ston ia, mo wetem smol paoa mi bin leftemap ston ia. Mi bin lukluk insaed mo i tru, long ples ia mi bin luk ol buk ia, Yurim mo Tumim, mo plet blong kavremap jes, olsem we mesenja i bin talem. Bokis we oli stap slip long hem, oli bin mekem wetem ol ston we i fas tugeta long wan kaen simen. Long botom blong bokis oli bin putum tu ston we oli krosem bokis ia, mo long tufala ston ia oli bin putum ol buk ia, mo ol narafala samting wetem olgeta.

“Mi bin traem blong tekemaot olgeta, be mesenja i bin blokem mi, mo i talem bakegen long mi se taem blong tekemaot olgeta i no bin kam, mo tu bae i no kam, kasem fo moa yia stat long taem ia, be hem

i bin talem long mi se mi mas kam long ples ia stret long wan yia long taem ia, mo we bae hem i mitim mi long ples ia, mo se mi mas gohed blong mekem olsem kasem taem we bae i kam blong kasem ol buk ia.

“Folem, olsem we hem i bin givim oda long mi, mi bin go long en blong evri yia, mo evri taem mi bin luk semfala mesenja mo bin kasem plante tijng mo save long hem, long evri storian blong mitufala, long saed blong ol samting we Lod bae i mekem mo olsem wanem mo long wanem fasin hem i wantem olgeta blong lidim kingdom blong Hem long ol las dei.

\* \* \* \* \*

“Ale, taem i bin kam blong kasem ol buk ia, Yurim mo Tumim, mo plet blong kavremap jes. Long twenti-tu dei blong Septemba, wan taosen eit handred mo twenti seven, mi bin go olsem evri taem long en blong wan narafala yia long ples ia we oli bin putum olgeta, semfala mesenja blong heven i bin givim olgeta long mi wetem toktok ia: Se mi mas lukaotem olgeta; se sapos mi kam slak mo mi lusum olgeta, o tru long eni mistek blong mi, bae God i mas katemaot mi; be se sapos bae mi yusum evri wei blong mi blong sevem olgeta, kasem taem we hem, mesenja ia, bae i askem ol samting ia, God bae i lukaotem gud olgeta.

“I no longtaem mi bin faenemaot stamba tingting from wanem mi bin kasem strongfala toktok olsem blong holem olgeta i sef, mo from wanem hem i bin olsem we mesenja i bin talemaot se afta we mi bin mekem wanem mi mas mekem wetem han blong mi, bae hem i askem ol samting ia. From afta we olgeta i bin faenemaot se mi holem ol samting ia, oli bin traem strong tumas long ol wei blong stilim ol samting ia long mi. Oli yusum evri defren trik we oli save tingbaot from stamba tingting ia. Ol fasin blong givim hadtaem we oli bin mekem long mi i bin kam moa konkon mo strong bitim bifo. Mo plante grup blong ol pipol i bin stap rere oltaem blong kasem ol samting ia long mi sapos i save hapen. Be tru long waes tingting blong God, oli bin stap sef long ol han blong mi, kasem taem we mi bin mekem tru long ol samting ia wanem we mi mas mekem. Long taem we, folem wanem we mesenja i bin talemaot, mesenja i bin askem ol samting ia. Mi bin givim ol samting ia long hem; mo hem i holem ol samting ia long kontrol blong hem kasem dei ia, we i nambatu dei blong Mei, wan taosen eit handred mo teti-eit.”

Blong ful histri, luk Josef Smit—Histri, long Perel blong Bigfala Praes, mo *History of The Church of Jesus Christ of Latter-day Saints* (Histri blong Jos blong Jisas Kraes blong ol Lata-dei Sent), buk 1, japta 1 kasem 6.

Olfala histri ia, olsem ia nao i bin kamaot long graon olsem wan voes blong wan pipol we i stap toktok aot long das, mo i bin transletem i kam long lanwis blong yumi tede, tru long presen mo paoa blong God, olsem we God i talemaot, fassala buk we oli bin mekem i bin kamaot long wol long Inglis long yia 1830 olsem THE BOOK OF MORMON.

## BUK BLONG MOMON

Buk blong Momon i wan tabu histri blong ol pipol long Amerika blong bifo, mo oli bin raetendaon long ol buk we oli mekem wetem aean. Oli tokbaot fo defren kaen buk we oli mekem wetem aean long buk ia:

1. *Ol Buk blong Nifae*, we i bin gat tu defren kaen: Ol Smolfala Buk mo Ol Bigfala Buk. Faswan i bin tokbaot moa ol samting long saed blong ol samting we i bin kamaot long ol pipol ia long saed blong spirit, mo ministri mo ol tijing blong ol profet, be laswan i bin holem moa ol samting we i bin kamaot long ol pipol ia long saed blong laef blong olgeta (1 Nifae 9:2–4). Stat long taem blong Mosaea, be, ol bigfala buk i bin holem tu ol samting we oli blong spirit we i impoten tumas.
2. *Ol Buk blong Momon*, we i wan smol pat nomo we Momon i bin tekemaot long Ol Bigfala Buk blong Nifae, wetem plante sofala toktok blong hem. Ol buk ia tu i bin holem histri we i gohed we Momon i bin raetem, mo sam narafala moa we boe blong hem Moronae, i bin raetem.
3. *Ol Buk blong Ita*, we i givim wan histri blong ol man blong Jared. Moronae i bin mekem histri ia i kam smol, we i bin putum sam toktok blong hemwan mo i bin joenem histri ia wetem ol stamba histri anda long nem “Buk blong Ita.”
4. *Ol Buk we oli mekem wetem Bras*, ol pipol blong Lihae i bin karemaot long Jerusalem 600 yia bifo Kraes i bon. Olgeta ia i bin gat “ol faef Buk blong Moses, . . . Mo tu wan histri blong ol Jiu stat long stat, . . . go kasem stat blong taem we Sedekia i rul, king blong Juda; Mo tu ol profesi blong ol tabu profet” (1 Nifae 5:11–13). Plante toktok we i kamaot long ol buk ia, oli ol toktok blong Aesea mo sam narafala profet blong Baebol mo tu ol profet we i no blong Baebol, i kamaot long Buk blong Momon.

Buk blong Momon i gat fiftin stamba pat o divisen, we oli singaotem ol buk, be wan nomo i no olsem ia, oli singaotem eni man long nem blong stamba man we i raetem. Fas pat (ol fasfala sikis buk, endem long Omnae) i wan translesen we i kamaot long ol Smolfala Buk blong Nifae. Bitwin long buk blong Omnae mo Mosaea, i gat wan ples we oli singaotem Ol Toktok blong Momon. Hem i bin joenem stori blong Nifae olsem we i stap long ol Smolfala Buk blong Nifae wetem samfala pat nomo we Momon i bin tekemaot long ol Bigfala Buk.

Longfala pat, stat long Mosaea go kasem Momon, japta 7, nomo,

---

hem i wan translesen blong smol toktok we Momon i bin tekemaot long ol Bigfala Buk blong Nifae. Las pat, stat long Momon, japta 8, go kasem en blong buk, i bin kamaot tru long boe blong Momon, Moronae, we, afta hem i bin finisim histri blong laef blong papa blong hem, i bin mekem histri blong ol man Jared i kam smol (olsem Buk blong Ita) mo biaen i bin joenem ol pat we oli save olgeta olsem Buk blong Moronae.

Long o klosap long yia 421 afta Kraes i bon, Moronae, laswan long ol profet blong histri blong ol man blong Nifae, i bin lokem tabu histri ia mo i bin haedem histri ia wetem Lod, blong hem i karem olgeta i kamaot long ol lata dei, olsem we voes blong God i bin talemaot tru long ol profet blong hem blong bifo. Long yia 1823 afta Kraes i bon, semfala Moronae ia, long taem ia i bin wan man we i laef bakegen, i bin visitim Profet Josef Smit mo afta i bin givim ol buk ia we oli bin raet long olgeta, long hem.

---

OL NEM MO ODA BLONG OL BUK  
WE I STAP INSAED LONG

---

## BUK BLONG MOMON

<i>Nem</i>	<i>Pej</i>
Fas Buk blong Nifae .....	1
Nambatu Buk blong Nifae .....	62
Buk blong Jakob .....	137
Buk blong Inos .....	161
Buk blong Jerom .....	164
Buk blong Omnae .....	166
Ol Toktok blong Momon .....	169
Buk blong Mosaea .....	172
Buk blong Alma .....	252
Buk blong Hileman .....	471
Nambatri Nifae .....	522
Nambafo Nifae .....	594
Buk blong Momon .....	599
Buk blong Ita .....	623
Buk blong Moronae .....	663




---

## OL PIKJA

---

1. *Lod Jisas Kraes*  
Pikja blong Heinrich Hofmann
2. *Profet Josef Smit*  
Pikja blong Alvin Gittins  
Luk long "Testimoni blong Profet Josef Smit" pej ix kasem xii
3. *Lihae i faenem Liahona*  
Pikja blong Arnold Friberg  
Luk long 1 Nifae 16, pej 38 kasem 42
4. *Lihae mo ol pipol blong hem i kam long graon blong promes*  
Pikja blong Arnold Friberg  
Luk long 1 Nifae 18, pej 48 kasem 51
5. *Alma i baptaesem ol man long ol Wota blong Momon*  
Pikja blong Arnold Friberg  
Luk long Mosaea 18, pej 217 kasem 220
6. *Samuel, man blong Leman i stap profesae*  
Pikja blong Arnold Friberg  
Luk long Hileman 16, pej 519 kasem 522
7. *Jisas Kraes i visitim ol man Amerika*  
Pikja blong John Scott  
Luk long 3 Nifae 11, pej 549 kasem 552
8. *Moronae i berem ol histri blong ol man blong Nifae*  
Pikja blong Tom Lovell  
Luk long Momon 8, pej 614 kasem 619



















# FAS BUK BLONG NIFAE

TAEM BLONG RUL MO MINISTRI BLONG HEM

**W**an histri blong Lihae mo woman blong hem Saraea, mo fo boe blong hem, we oli singaotem, (stat long fasbon) Leman, Lemyul, Sam, mo Nifae. Lod i wonem Lihae blong aot blong graon blong Jerusalem, from we hem i profesae long ol pipol long saed blong ol rabis fasin blong olgeta mo oli wantem kilim hem i ded. Hem i wokbaot tri dei long ples we i no gat man long hem, wetem famle blong hem. Nifae i tekem ol brata blong hem mo i gobak long graon blong Jerusalem blong tekem histri blong ol Jiu. Histri blong ol trabol blong olgeta. Ol boe blong Lihae i maredem ol gel blong Ismael. Oli tekem ol famle blong olgeta mo go long ples we i no gat man long hem. Ol safa mo hadtaem blong olgeta long ples we i no gat man long hem. Ol rod blong olgeta. Oli kam long ol bigfala solwota. Ol brata blong Nifae i faet agensem hem. Hem i mekem tingting blong olgeta i kamdaon, mo bildim wan sip. Oli singaotem ples ia Plante. Oli krosem ol bigfala solwota blong go long promes graon, mo samfala moa. Nifae i raetem histri ia; mi minim se, mi, Nifae, mi bin raetem histri ia.

## JAPTA 1

*Nifae i stat blong raetem histri blong ol pipol blong hem—Lihae i luk long wan visen wan longfala faea we i go antap, mo hem i ridim wan buk blong profesi—Hem i preseem God, talemaot se Mesaea bae i kam, mo i profesae se God bae i mas smasem gud Jerusalem—Ol Jiu i stap givim hadtaem long hem. Raonabaot 600 yia bifo Kraes i bon.*

**M**I, Nifae, from we mi bin bon long wan gudfala mama mo papa, taswe, tufala i bin tijim mi plante samting long saed blong save blong papa blong mi; mo long laef blong mi, mi bin luk plante hadtaem, be, Lod i blesem mi bigwan oltaem long ol dei blong mi; yes, from

mi bin kasem plante save long saed blong ol gud samting mo ol sikret blong God, taswe mi raetem wan histri long saed blong ol samting we mi mekem long ol dei blong mi.

2 Yes, mi raetem wan histri long lanwis blong papa blong mi, we i folem kastom mo ol samting we ol Jiu i save mo long lanwis blong ol man Ijip.

3 Mo mi save se histri ia we mi raetem i tru; mo mi raetem hem wetem han blong mi; mo mi mekem folem save blong mi.

4 From i bin hapen se long stat blong fas yia blong rul blong Sedekaea, we hem i king blong Juda, (papa blong mi, Lihae, hem i bin stap long Jerusalem long ol dei blong hem); mo long sem yia, plante profet i bin

kam, oli bin profesae long ol pipol we oli mas sakem sin, sapos no, bigtaon Jerusalem bae i mas smas gud.

5 From samting ia, i bin hapen se papa blong mi, Lihae, taem we hem i bin go fored hem i bin prea long Lod, yes, wetem evri hat blong hem tu, from ol pipol blong hem.

6 Mo i bin hapen se long taem we hem i stap prea long Lod, wan longfala faea we i go antap i bin kam mo i stap antap long wan ston long fored blong hem; mo hem i bin luk mo bin harem plante samting; mo from ol samting we hem i bin luk mo i bin harem, hem i bin seksek mo i bin seksek tumas from fraet.

7 Mo i bin hapen se, hem i bin gobak long haos blong hem long Jerusalem; mo hem i bin foldaon long bed blong hem, from bodi blong hem i nomo gat paoa from we Spirit i kam fulap long hem mo from ol samting we hem i bin luk.

8 Mo from Spirit i strong tumas long hem olsem ia nao, hem i bin gowe tru long wan visen. Mo hem i bin luk ol heven i open, mo hem i bin ting se hem i bin luk God i sidaon long jea blong hem, ol grup blong enjel we i plante tumas blong kaontem i stap raonem God blong olgeta, mo oli stap singsing mo presem hem.

9 Mo i bin hapen se, hem i bin luk Wan Man i kamaot long medel blong heven. Mo hem i bin luk se laet blong hem i bitim hemia blong san long medel dei.

10 Mo tu hem i bin luk twelef

narafala we i stap folem hem, mo saen blong olgeta i bin bitim ol sta long skae.

11 Mo olgeta ia i bin kamdaon mo go fored long fes blong wol; mo faswan i bin kam mo i bin stanap long fored blong papa blong mi, mo bin givim long hem wan buk, mo hem i talem long hem se i mas ridim.

12 Mo i bin hapen se taem we hem i stap ridim, hem i bin kam fulap long Spirit blong Lod.

13 Mo hem i bin ridim, i talem se: Sore tumas, sore tumas, long Jerusalem, from mi bin luk ol fasin nogud blong yu! Yes, mo plante samting papa blong mi i bin ridim long saed blong Jerusalem—we Jerusalem mo ol man blong hem bae i mas smas gud; plante pipol bae i ded long naef blong faet, mo plante bae i go prisena long Babilonia.

14 Mo i bin hapen se afta we papa blong mi i bin ridim mo bin luk plante bigfala mo gudfala samting, hem i bin singaot bigwan long plante samting long Lod, olsem: Ol wok blong yu oli ol bigfala mo ol gudfala wok, O Lod, God yu we yu gat Bigfala Paoa! Jea blong yu i hae tumas long ol heven, mo ol paoa blong yu mo gudfasin blong yu, mo sore oli ova long evri man long wol; mo, from we yu gat sore, yu bae yu no save letem olgeta we i kam long yu blong oli ded!

15 Mo long fasin blong toktok ia, papa blong mi i bin presem God blong hem; from sol blong hem i bin glad, mo ful hat blong hem i bin fulap from ol samting

we hem i bin luk, yes, we Lod i bin soemaot long hem.

16 Mo nao mi, Nifae, mi no mekem wan ful histri blong ol samting we papa blong mi i bin raetemdaon, from hem i bin raetem plante samting we hem i bin luk long ol visen mo ol drim; mo hem i bin raetem tu plante samting we hem i bin profesae mo i bin talem long ol pikinini blong hem, be bae mi no mekem wan ful histri blong evri samting ia.

17 Be bae mi mekem wan histri blong ol samting we i bin hapen long ol dei blong mi. Luk, mi mekem histri blong papa blong mi i kam smol long ol buk we mi bin mekem wetem han blong mi; from samting ia, afta we mi bin mekem histri blong papa blong mi i kam smol, afta bae mi mekem wan histri blong laef blong mi.

18 Taswe, mi wantem se yufala i save se afta Lod i bin soemaot plante gudfala samting long papa blong mi, Lihae, yes, long saed blong taem we Jerusalem bae i mas finis, luk, hem i bin go fored long medel blong ol pipol, mo i bin stat blong profesae mo talem long olgeta long saed blong ol samting we hem i bin luk mo harem.

19 Mo i bin hapen se ol Jiu i bin jikim hem from ol samting we hem i bin testifae long olgeta; from i tru we hem i bin testifae long saed blong ol fasin nogud mo rabis sin blong olgeta; mo hem i bin testifae se ol samting we hem i bin luk mo harem, mo tu ol samting we hem i bin ridim

insaed long buk, i bin soemaot klia gud we Mesaea bae i kam, mo tu we hem i pemaot wol.

20 Mo taem we ol Jiu i bin harem ol samting ia, oli bin kros long hem; yes, i olsem long ol profet blong bifo, we oli bin sakemaot, mo stonem, mo kilim ded, mo oli bin lukaotem laef blong hem blong oli save tekemaot laef blong hem. Be luk, mi, Nifae, bae mi soemaot long yufala se Lod i gat fulap sore long olgeta we hem i bin jusum, from ol fet blong olgeta, blong mekem olgeta i strong mo gat paoa tu we i save sevem olgeta bakegen.

---

## JAPTA 2

---

*Lihae i tekem famle blong hem i go long ples we i no gat man long hem klosap long Red Si—Oli lego ol samting blong olgeta—Lihae i givim wan sakrifaes long Lod, mo hem i tijim ol boe blong hem blong holem ol komanmen—Leman mo Lemyul i stap toktok agensem papa blong tufala—Nifae i obei mo i prea wetem fet—Lod i toktok long hem, mo hem i bin jusum hem blong rulum ol brata blong hem. Raonabaot 600 yia bifo Kraes i bon.*

FROM luk, i bin hapen se Lod i bin toktok long papa blong mi, yes, long wan drim, mo i bin talem long hem se: Mi blesem yu Lihae, from ol samting we yu bin mekem; mo from yu bin holem taet fet mo yu bin talem-aot long ol pipol ia ol samting we mi bin talem long yu,

luk, oli wantem tekemaot laef blong yu.

2 Mo i bin hapen se Lod i bin givim oda long papa blong mi, long wan drim tu, blong hem i mas tekem famle blong hem mo go aot long ples we i no gat man long hem.

3 Mo i bin hapen se hem i bin obei long toktok blong Lod, from samting ia hem i bin mekem olsem we Lod i bin givim oda long hem.

4 Mo i bin hapen se hem i bin aot i go long ples we i no gat man long hem. Mo hem i bin livim haos blong hem, mo graon blong hem we i kam long ol papa blong hem, mo ol gol blong hem, mo silva blong hem, mo ol gudgudfala samting blong hem, mo hem i no bin tekem wan samting wetem hem, be famle blong hem nomo, mo ol kakae, mo ol tenet, mo i bin aot i go long ples we i no gat man long hem.

5 Mo hem i go daon long ol boda klosap long so blong Red Si, mo hem i bin wokbaot long ples we i no gat man long hem long ol boda we i moa klosap long Red Si; mo hem i bin wokbaot long ples we i no gat man long hem wetem famle blong hem we i bin gat mama blong mi, Saraea, mo ol fasbon brata blong mi, Leman, Lemyul, mo Sam.

6 Mo i bin hapen se afta we hem i bin wokbaot tri dei long ples we i no gat man long hem, hem i bin stanemap tenet blong hem long wan vale long saed blong wan reva blong wota.

7 Mo i bin hapen se hem i bin bildim wan olta wetem ston, mo i bin mekem wan ofring long Lod, mo i bin talem tangkyu long Lod, God blong mifala.

8 Mo i bin hapen se hem i bin singaotem nem blong reva ia, Leman, mo riva ia i bin ron aot i go long Red Si; mo vale ia i bin stap long ol boda klosap long maot blong reva ia.

9 Mo taem we papa blong mi i bin luk se ol wota blong reva i bin ron aot i go long ples blong Red Si, hem i bin toktok long Leman se: O mi wantem se yu save kam olsem reva ia, olsem we yu stap ron aot oltaem long springwota blong evri stret fasin!

10 Mo hem i toktok long Lemyul tu se: O mi wantem se yu save kam olsem vale ia, strong mo semak, mo yu no stap muvmuv blong holem taet ol komanmen blong Lod!

11 Nao hemia, hem i bin talem from we Leman mo Lemyul tufala i stronghed; from luk oli bin komplem long saed blong plante samting agensem papa blong tufala, from hem i bin wan man blong luk visen, mo i bin lidim olgeta aot long graon blong Jerusalem, blong livim ol graon blong olgeta we i kam long ol papa blong olgeta, mo ol gol blong olgeta, mo ol silva blong olgeta, mo ol gudgudfala samting blong olgeta, blong oli go ded long ples we i no gat man long hem. Mo hemia oli bin talem se hem i bin mekem from ol krangke tingting blong hat blong hem.

12 Mo olsem ia nao Leman mo Lemyul, from oli fasbon, tufala i bin komplem agensem papa blong tufala. Mo tufala i bin komplem from we tufala i no bin save fasin blong God ia we i bin mekem tufala.

13 Mo tu tufala i no bin bilivim se Jerusalem, bigfala bigtaon ia, i save smas gud folem ol toktok blong ol profet. Mo tufala i olsem ol Jiu we i bin stap long Jerusalem, we i bin wantem blong tekemaot laef blong papa blong mi.

14 Mo i bin hapen se papa blong mi i bin toktok long tufala long vale blong Lemyul, wetem paoa, from hem i bin fulap long Spirit, kasem taem we bodi blong tufala i bin sek-sek long fored blong hem. Mo hem i bin blokem tufala, mekem se tufala i bin fraet blong toktok agensem hem; from samting ia, tufala i bin mekem olsem we hem i bin givim oda long tufala.

15 Mo papa blong mi i bin stap long wan tenet.

16 Mo i bin hapen se mi Nifae, from mi yang tumas, be bodi blong mi i strong mo i bigfala, mo tu mi bin gat strong tingting tumas blong save ol sikret blong God, from samting ia, mi bin prea long Lod; mo luk hem i bin visitim mi, mo i bin mekem hat blong mi i kam sofsof, mekem se mi bin bilivim evri toktok we papa blong mi i bin talemaot; from samting ia, mi no bin go agensem hem olsem ol brata blong mi.

17 Mo mi bin toktok long Sam,

mi bin talemaot ol samting we Lod i bin soem long mi tru long Tabu Spirit blong hem. Mo i bin hapen se hem i bin biliv long ol toktok blong mi.

18 Be, luk, Leman mo Lemyul tufala i no bin wantem lisin long ol toktok blong mi; mo from mi bin harem nogud from hat blong tufala i strong, mi bin prea long Lod from tufala.

19 Mo i bin hapen se Lod i bin toktok long mi, i se: Mi mi blesem yu, Nifae, from fet blong yu from yu bin lukaotem mi oltaem, wetem wan hat we i stap daon.

20 Mo i semak olsem we yu holem ol komanmen blong mi, bae yu kam antap gud, mo bae mi lidim yu i go long wan graon blong promes; yes, hem i wan graon we mi bin mekem rere blong yu; yes, wan graon we i moa gud bitim ol narafala graon.

21 Mo i semak olsem we tufala brata blong yu bae oli go agensem yu, bae mi katemaot tufala long fes blong Lod.

22 Mo i semak olsem we yu holem ol komanmen blong mi, bae yu kam wan man blong rul mo wan tija ova long ol brata blong yu.

23 From luk, long dei ia we bae oli go agensem mi, bae mi panisim olgeta, we i wetem wan bigfala panis, mo bae oli no gat paoa ova long ol laen blong yu, sapos oli tanem olgeta agensem mi tu.

24 Mo sapos i olsem se oli go agensem mi, bae oli stap olsem wan wip long ol laen blong

yu, blong mekem olgeta blong tingbaot Lod.

---

JAPTA 3

---

*Ol boe blong Lihae i gobak long Jerusalem blong karem ol buk we oli bin mekem wetem bras—Leban i no wantem givim ol buk—Nifae i askem strong mo i leftemap tingting blong ol brata blong hem—Leban i stilim ol samting blong olgeta, mo traem blong kilim olgeta i ded—Leman mo Lemyul i kilim Nifae mo Sam, mo wan enjel i toktok strong long tufala. Raonabaot 600–592 yia bifo Kraes i bon.*

Mo i bin hapen se mi, Nifae, i bin gobak afta we mi bin toktok wetem Lod, long tenet blong papa blong mi.

2 Mo i bin hapen se hem i bin toktok long mi, i se: Luk mi bin drim long wan drim, long drim ia Lod i bin givim oda long mi se yu mo ol brata blong yu i mas gobak long Jerusalem.

3 From luk, Leban i holem histri blong ol Jiu mo tu wan laen blong famle blong ol bubu blong mi, mo oli bin raetem ol samting ia long ol buk we oli bin mekem wetem bras.

4 From samting ia, Lod i bin givim oda long mi se yu mo ol brata blong yu i mas go long haos blong Leban, mo lukaotem ol buk ia, mo karem olgeta i kamdaon long ples ia we i no gat man long hem.

5 Mo nao, luk ol brata blong yu i komplem, oli talem se hem i wan had samting we mi bin

talem long olgeta blong mekem; be luk mi no bin talem long olgeta blong mekem samting ia, be hem i wan komanmen blong Lod.

6 Taswe go, boe blong mi, mo Lod bae i lukaot gud long yu, from yu no bin komplem.

7 Mo i bin hapen se mi, Nifae, mi bin talem long papa blong mi: Bae mi go mo mekem ol samting we Lod i bin talem, from mi save se Lod i no givim wan komanmen long ol pikinini blong ol man, sapos hem i no mekem rere wan rod blong olgeta, blong oli save mekem samting ia we hem i talem long olgeta.

8 Mo i bin hapen se taem we papa blong mi i bin harem ol toktok ia hem i bin glad tumas, from hem i bin save se Lod i bin blesem mi.

9 Mo mi, Nifae, mo ol brata blong mi i bin wokbaot i go long ples we i no gat man long hem, wetem ol tenet blong mifala, blong go antap long graon blong Jerusalem.

10 Mo i bin hapen se taem we mifala i bin go antap long graon blong Jerusalem, mi mo ol brata blong mi i bin tokbaot samting ia wetem mifala bakegen.

11 Mo mifala i bin sakem daes—blong jusum huia long mifala bae i mas go insaed long haos blong Leban. Mo i bin hapen se daes i bin jusum Leman; Leman i bin go insaed long haos blong Leban, mo hem i bin toktok wetem hem taem we hem i bin sidaon long haos blong hem.

12 Mo hem i bin askem Leban long histri ia we oli bin raetem long ol buk we oli bin mekem wetem bras, we i bin holem ol laen blong famle blong papa blong mi.

13 Mo luk, i bin hapen se Leban i bin kros, mo hem i bin sakem hem aot long fes blong hem; mo hem i no bin wantem se hem bae i gat ol histri ia. From samting ia, hem i bin talem long hem: Luk yu yu wan man blong stil, mo bae mi kilim ded yu.

14 Be Leman i bin ronwe aot long fes blong hem, mo i bin talemaot ol samting we Leban i bin mekem long mifala. Mo mifala i bin stat blong kam sore tumas, mo ol brata blong mi i bin rere blong gobak long papa blong mi long ples we i no gat man long hem.

15 Be luk mi bin talem long olgeta se: Olsem we Lod i stap laef, mo olsem we yumi stap laef, bae yumi no gobak long papa blong yumi long ples we i no gat man long hem, kasem taem we yumi finisim samting ia we Lod i bin talem long yumi.

16 From samting ia, bae yumi yusum fet blong holem ol komanmen blong Lod; taswe, bae yumi go daon long graon blong papa blong yumi we hem i bin kasem long ol papa blong hem, from luk hem i bin livim ol gol mo ol silva, mo evri kaen blong ol rij samting. Mo evri samting ia hem i bin mekem from ol komanmen blong Lod.

17 From hem i bin save se Jerusalem bae i mas smas gud,

from ol fasin nogud blong ol pipol.

18 From luk, oli bin sakem ol toktok blong ol profet. From samting ia, sapos papa blong mi bae i stap long graon ia, afta we Lod i bin givim oda long hem blong ronwe aot graon ia, luk, bae hem tu i ded. From samting ia, i mas nid i stap se hem i ronwe aot long graon ia.

19 Mo luk, hem i waes tingting long God, se yumi mas kasem ol histri ia, blong mekem se yumi save sevem, long ol pikinini blong yumi, lanwis blong ol bubu blong yumi.

20 Mo tu blong yumi save sevem ol toktok we i bin kamaot long maot blong ol tabu profet, we i bin kam long olgeta tru long Spirit mo paoa blong God, stat long taem we wol ia i bin stat, kasem taem ia naoia.

21 Mo i bin hapen se folem fasin blong toktok olsem, mi bin winim tingting blong ol brata blong mi blong oli save yusum fet blong holem ol komanmen blong God.

22 Mo i bin hapen se mifala i bin go daon long graon blong mifala we i kam long ol papa blong mifala, mo mifala i bin karem i kam tugeta ol gol blong mifala, mo ol silva blong mifala, mo ol gudgudfala samting blong mifala.

23 Mo afta we mifala i bin karem ol samting ia i kam tugeta, mifala i bin go antap bakegen long kaos blong Leban.

24 Mo i bin hapen se mifala i go insaed kasem Leban, mo i bin askem hem blong givim long



mifala ol histri we oli bin raetem long ol buk we oli bin mekem wetem bras, from samting ia bae mifala i givim long hem ol gol blong mifala, mo ol silva blong mifala, mo ol gudgudfala samting blong mifala.

25 Mo i bin hapen se taem we Leban i bin luk ol samting blong mifala, mo we i bin gud tumas, hem i bin kavetem ol samting ia tumas, inaf blong mekem se hem i bin sakemaot mifala, mo i bin sendem ol wokman blong hem blong kilim mifala i ded, blong hem i save kasem ol samting blong mifala.

26 Mo i bin hapen se mifala i bin ronwe long fored blong ol wokman blong Leban, mo mifala i mas livim ol samting blong mifala i stap mo i bin go long ol han blong Leban.

27 Mo i bin hapen se mifala i bin ronwe i go long ples we i no gat man long hem, mo ol wokman blong Leban i no bin kasem mifala, mo mifala i bin haedem mifala bakegen long wan hol blong wan ston.

28 Mo i bin hapen se Lemana i bin kros long mi, mo tu long papa blong mi; mo Lemyul i kros tu from hem i bin lisiin long toktok blong Lemana. From samting ia, Lemana mo Lemyul i bin talem plante strong toktok tumas long mitufala, ol yangfala brata blong tufala, mo tufala i bin kilim mitufala wetem wan stik tu.

29 Mo i bin hapen se long taem we oli stap kilim mitufala wetem wan stik, luk, wan enjel blong Lod i bin kam mo stanap

long fored blong yutufala, mo i bin toktok long tufala, se: From wanem yutufala i stap kilim yangfala brata blong yutufala wetem wan stik? Yutufala i no save se Lod i bin jusum hem blong kam wan man blong rul ova long yufala, mo hemia from ol rabis sin blong yutufala? Luk yufala i mas go antap long Jerusalem bakegen, mo Lod bae i putum Leban long ol han blong yufala.

30 Mo afta we enjel i bin toktok long mifala, hem i bin aot.

31 Mo afta we enjel i bin aot, Lemana mo Lemyul bakegen i bin stat blong komplek, i se: Olsem wanem i save hapen se Lod bae i putum Leban long ol han blong yumi? Luk, hem i wan strong man, mo hem i save givim oda long fifti, yes, hem i save kilim ded fifti; ale, from wanem hem i no save kilim ded yumi?

---

#### JAPTA 4

---

*Nifae i kilim ded Leban folem oda blong Lod mo afta hem i kasem ol buk we oli bin mekem wetem bras folem waes plan blong hem— Soram i jusum blong joenem famle blong Lihae long ples we i no gat man long hem. Raonabaot 600–592 yia bifo Kraes i bon.*

Mo i bin hapen se mi bin toktok long ol brata blong mi, se: Bae yumi go antap bakegen long Jerusalem, mo bae yumi yusum fet blong holem ol komanmen blong Lod; from luk hem i moa strong bitim ful wol, ale, from

wanem hem i no strong moa bitim Leban mo ol fifti blong hem, yes, o tu ol ten taosen blong hem?

2 Taswe bae yumi go antap; bae yumi stap strong olsem Moses; from i tru tumas we hem i bin toktok long ol wota blong Red Si, mo oli bin seraot i go long ples ia mo long ples ia, mo ol bubu blong yumi i bin kam tru i kamaot long kalabus, long drae graon, mo ol ami blong King blong Ijip i bin folem olgeta mo oli bin draon long ol wota blong Red Si.

3 Nao luk yutufala i save se samting ia i tru; mo tu yutufala i save se wan enjel i bin toktok long yutufala; from samting ia yutufala i save no bilif strong? Bae yumi go antap; Lod i save lukaotem gud yumi olsem we hem i bin lukaotem gud ol bubu blong yumi, mo blong kilim ded Leban, olsem ol man Ijip.

4 Nao taem we mi bin talem ol toktok ia, oli bin kros yet, mo oli bin gohed blong komplek; be oli bin folem mi i go antap kasem taem we mifala i bin kam aotsaed long ol wol blong Jerusalem.

5 Mo i bin long naet; mo mi bin mekem se oli mas haedem olgeta bakegen aotsaed long ol wol. Mo afta oli bin haedem olgeta, mi, Nifae, mi bin wokbaot haed i go insaed long bigtaon mo mi bin go fored long haos blong Leban.

6 Mo Spirit i bin lidim mi, mi no bin save yet wanem ol samting we bae mi mas mekem.

7 Be mi bin go fored, mo taem

we mi kam klosap long haos blong Leban mi bin luk wan man, mo hem i bin foldaon long graon long fored blong mi, from hem i bin drong long waen.

8 Mo taem we mi bin kam long hem mi bin faenemaot se hem i Leban.

9 Mo mi bin luk naef blong faet blong hem, mo mi bin pulum naef ia i kamaot long poket blong naef; mo handel blong naef ia i bin stret gol, mo fasin blong wok blong hem i bin naes tumas, mo mi bin luk se bled blong naef ia oli bin mekem wetem gudgudfala aean.

10 Mo i bin hapen se Spirit i bin talem long mi se mi mas kilim Leban i ded; be mi bin talem long hat blong mi: Neva long eni taem mi bin mekem blad blong wan man i ron. Mo mi bin muv lelebet mo mi no bin wantem blong kilim hem i ded.

11 Mo Spirit i bin talem long mi bakegen: Luk Lod i bin putum hem long ol han blong yu. Yes, mo mi bin save tu se hem i bin lukaotem blong tekemaot laef blong mi; yes, mo hem i no bin wantem lisen long ol komanmen blong Lod; mo tu hem i bin tekemaot ol samting blong mifala.

12 Mo i bin hapen se Spirit i bin talem long mi bakegen: Kilim hem i ded, from Lod i bin putum hem long ol han blong yu;

13 Luk, Lod i kilim ded ol nogud man blong karemaot ol stamba tingting blong hem we i stret. I moa gud se wan man

nomo bae i ded bitim we wan kantri bae i kam slak mo ded from i lusum bilif.

14 Mo nao, taem we mi, Nifae, i bin harem ol toktok ia, mi bin tingbaot ol toktok blong Lod we hem i bin talem long mi long ples we i no gat man long hem, hem i talem se: I semak olsem we ol laen blong yu bae i holem ol komanmen blong mi, bae oli kam antap gud long graon blong promes.

15 Yes, mo mi bin ting se oli no save holem ol komanmen blong Lod folem loa blong Moses, sapos oli no gat loa ia.

16 Mo mi bin save tu se loa ia oli bin raetem long ol buk we oli bin mekem wetem bras.

17 Mo bakegen, mi bin save se Lod i bin putum Leban long ol han blong mi from stamba tingting ia—blong mi save kasem ol histri folem ol komanmen blong hem.

18 Taswe, mi bin folem voes blong Spirit, mo mi bin holem hea long hed blong Leban, mo mi bin katemaot hed blong hem wetem naef blong faet blong hemwan.

19 Mo afta mi bin katemaot hed blong hem wetem naef blong hemwan, mi bin tekem ol klos blong Leban mo mi bin putum olgeta long bodi blong mi; yes, evri klos tu; mo mi bin fasem klos blong faet blong hem long wes blong mi.

20 Mo afta we mi bin mekem samting ia, mi bin go aot i go long ples blong mane blong Leban. Mo taem we mi bin go aot i go long ples blong mane blong

Leban, luk, mi bin luk wokman blong Leban we i bin holem ol ki blong ples blong mane. Mo mi bin givim oda long hem wetem voes olsem blong Leban, se hem i mas go wetem mi insaed long ples blong mane.

21 Mo hem i bin ting se mi mi masta blong hem, Leban, from hem i bin luk ol klos mo tu naef blong faet we mi bin fasem long wes blong mi.

22 Mo hem i bin toktok long mi long saed blong ol elda blong ol Jiu, from hem i save se masta blong hem, Leban, i bin go aot long naet long medel blong olgeta.

23 Mo mi bin toktok long hem olsem we mi mi Leban.

24 Mo tu mi bin talem long hem se mi mas karem ol raeting, we i stap long ol buk we oli bin mekem wetem bras, i go long ol bigfala brata blong mi, we oli bin stap aotsaed long ol wol.

25 Mo tu mi bin givim oda long hem blong folem mi.

26 Mo hem i bin ting se mi bin tokbaot ol brata blong jos, mo we i tru we mi Leban, man ia we mi bin kilim i ded, from samting ia hem i bin folem mi.

27 Mo hem i bin toktok long mi plante taem long saed blong ol elda blong ol Jiu, taem we mi bin go fored long ol brata blong mi, we i bin stap aotsaed long ol wol.

28 Mo i bin hapen se taem we Leman i bin luk mi hem i bin fraet tumas, mo tu Lemyul mo Sam. Mo oli bin ronwe long fes blong mi; from oli bin ting se hem i Leban, mo we hem

i bin kilim ded mi mo hem i lukaotem blong tekem ol laef blong olgeta tu.

29 Mo i bin hapen se mi bin singaotem olgeta, mo oli bin harem mi; from samting ia, oli bin stop blong ronwe long fes blong mi.

30 Mo i bin hapen se taem we wokman blong Leban i bin luk ol brata blong mi hem i bin stat blong seksek, mo i bin rere blong ronwe long fored blong mi mo gobak long bigtaon blong Jerusalem.

31 Mo nao mi, Nifae, from mi mi wan bigfala man, mo tu Lod i bin mekem bodi blong mi i strong, taswe, mi bin holem wokman blong Leban, mo mi bin holem taet hem, blong mekem se bae hem i no ronwe.

32 Mo i bin hapen se mi bin toktok long hem se, sapos hem i lisin long ol toktok blong mi, olsem we Lod i stap laef, mo olsem we mi stap laef, olsem ia sapos hem i lisin long ol toktok blong mifala, bae mifala i no kilim hem i ded.

33 Mo mi bin toktok long hem, we i wetem wan strongfala promes, se hem i no nid blong fraet; se bae hem i wan fri man olsem mifala sapos hem i go daon long ples we i no gat man long hem wetem mifala.

34 Mo tu mi bin toktok long hem, se: I tru tumas we Lod i bin talem long mifala blong mekem samting ia; Mo bae yumi no wok had oltaem blong holem ol komanmen blong Lod? Taswe, sapos yu go daon long ples we i no gat man long hem

long papa blong mi, bae yu gat ples wetem mifala.

35 Mo i bin hapen se Soram i bin harem gud long ol toktok we mi bin talem. Nao Soram i bin nem ia blong wokman; mo hem i bin promes se bae hem i go daon long ples we i no gat man long hem long papa blong mifala. Yes, mo tu hem i bin mekem wan strongfala promes long mifala se bae hem i stap wetem mifala stat long taem ia i go.

36 Nao mifala i bin wantem se hem i stap wetem mifala from stamba tingting ia, se ol Jiu bae oli no save se mifala i bin go long ples we i no gat man long hem, from mifala i fraet se bae oli folem mifala mo kilim mifala i ded.

37 Mo i bin hapen se afta we Soram i bin mekem wan strongfala promes long mifala, ol fraet blong mifala i bin stop long saed blong hem.

38 Mo i bin hapen se mifala i bin tekem ol buk we oli bin mekem wetem bras mo wokman blong Leban, mo mifala i bin aot i go long ples we i no gat man long hem, mo mifala i bin wokbaot i go long tenet blong papa blong mifala.

---

## JAPTA 5

---

*Saraea i komplem agensem Lihae—Tufala tugeta i hapi tumas from ol boe blong tufala i kambak—Oli mekem ol sakrifaes—Ol buk we oli bin mekem wetem bras i gat ol raeting blong Moses mo ol profet—*

*Ol buk i soemaot we Lihae i olsem wan laen blong Josef—Lihae i profesae long saed blong ol laen blong hem, mo olsem wanem ol buk ia bae oli sef. Raonabaot 600-592 yia bifo Kraes i bon.*

Mo i bin hapen se afta we mifala i bin kam daon long ples we i no gat man long hem long papa blong mifala, luk, hem i bin fulap wetem glad, mo tu mama blong mi, Saraea, i bin glad tumas, from i tru we hem i bin krae from mifala.

2 From hem i bin ting se mifala i bin ded long ples we i no gat man long hem; mo tu hem i bin komplem agensem papa blong mi, hem i talem hem se hem i wan man blong luk ol visen, i se: Luk yu bin lidim mifala aot long graon blong mifala we mifala i bin kasem long ol papa blong mifala, mo ol boe blong mi oli nomo stap, mo bae yumi evriwan i ded long ples we i no gat man long hem.

3 Mo long kaen toktok ia mama blong mi i bin komplem agensem papa blong mi.

4 Mo i bin hapen se papa blong mi i bin toktok long hem, se: Mi save se mi mi wan man blong luk ol visen; from sapos mi no bin luk ol samting blong God long wan visen bae mi no save gat save long gudfala fasin blong God, be mi bin stap long Jerusalem mo bin ded wetem ol brata blong mi.

5 Be luk, mi bin kasem wan graon blong promes, long ol samting ia mi mi glad tumas; yes, mo mi save se Lod bae i

sevem ol boe blong mi aot long ol han blong Leban, mo karem olgeta daon bakegen long yumi long ples we i no gat man long hem.

6 Mo long kaen toktok ia papa blong mi, Lihae, i bin leftemap tingting blong mama blong mi, Saraea, long saed blong mifala, long taem we mifala i stap wokbaot long ples we i no gat man long hem i go antap long graon blong Jerusalem blong kasem histri blong ol Jiu.

7 Mo taem we mifala i bin kambak long tenet blong papa blong mi, luk glad blong olgeta i bin fulap, mo mama blong mi i bin leftemap tingting blong hem.

8 Mo hem i bin toktok, i se: Nao mi save tru we Lod i bin givim oda long man blong mi blong ronwe i go long ples we i no gat man long hem; yes, mo tu mi save tru we Lod i bin lukaot gud long ol boe blong mi, mo i bin sevem olgeta aot long ol han blong Leban, mo i bin givim paoa long olgeta blong oli save finisim samting we Lod i bin talem long olgeta. Mo long kaen toktok ia hem i bin toktok.

9 Mo i bin hapen se oli bin hapi tumas, mo oli bin mekem sakrifaes mo bonem ol ofring i go long Lod; mo oli bin talem tangkyu long God blong Isrel.

10 Mo afta we oli bin talem tangkyu long God blong Isrel, papa blong mi, Lihae, i bin tekem ol histri we oli bin raetem long ol buk we oli bin mekem wetem bras, mo hem i bin stadi olgeta stat long stat blong olgeta.

11 Mo hem i bin luk se oli bin

holem ol faef buk blong Moses, we i bin talem wan histri blong taem we God i bin mekem wol ia, mo tu blong Adam mo Iv, we oli bin fas papa mo mama blong yumi;

12 Mo tu wan histri blong ol Jiu stat long stat, go kasem stat blong taem we Sedekaea, king blong Juda i bin rul long hem;

13 Mo tu ol profesi blong ol tabu profet, stat long stat, go kasem stat blong taem we Sedekaea i stat blong kam king; mo tu plante profesi we i bin kamaot long maot blong Jeremaea.

14 Mo i bin hapen se papa blong mi, Lihae, tu i bin faenem long ol buk we oli bin mekem wetem bras wan laen blong famle blong bubu blong hem; from samting ia hem i bin save se hem i bin kamaot long laen blong Josef; yes, hem i semfala Josef we i bin boe blong Jakob, we oli bin salem hem i go long Ijip, mo we han blong Lod i bin sevem hem, blong hem i save sevem papa blong hem, Jakob, mo ol famle blong hem blong oli no ded from ol hadtaem blong kasem kakae.

15 Oli bin kamaot long kalabus mo aot long graon blong Ijip, tru long sem God we i bin sevem olgeta.

16 Mo olsem ia nao papa blong mi, Lihae, i bin faenem laen blong famle blong bubu blong hem. Mo Leban tu i bin kamaot long laen blong Josef, from samting ia, hem mo ol bubu blong hem i bin kipim ol histri ia.

17 Nao taem we papa blong mi i bin luk ol samting ia, hem i bin fulap long Spirit, mo i bin stat blong profesae long saed blong ol laen blong hem—

18 Se ol buk ia we oli bin mekem wetem bras, bae oli go aot long evri kantri, famle, lanwis, mo pipol we oli blong ol laen blong hem.

19 From samting ia, hem i bin talem se ol buk ia we oli bin mekem wetem bras bae oli neva save lus; mo tu bae oli no lusum saen blong olgeta tru long taem. Mo hem i bin profesae plante samting long saed blong ol laen blong hem.

20 Mo i bin hapen se kasem taem ia nao mi wetem papa blong mi i bin holem ol komanmen we Lod i bin givim long mifala.

21 Mo mifala i bin kasem ol histri ia olsem Lod i bin givim oda long mifala, mo mifala i bin stadi gud histri ia, mo faenemaot se hemia ol samting we mifala i wantem tumas; yes, we i gat bigfala yus long mifala, inaf blong mekem se mifala i save sevem ol komanmen blong Lod long ol pikinini blong mifala.

22 From samting ia, hem i bin waes tingting long Lod we mifala i mas karem ol histri ia wetem mifala, long taem we mifala i bin wokbaot tru long ples we i no gat man long hem i go long graon blong promes.

---

## JAPTA 6

---

*Nifae i raetem long saed blong*

*ol samting blong God—Nifae i mekem samting ia from we hem i wantem ol man blong kam long God blong Ebrahim mo sev. Raonabaot 600–592 yia bifo Kraes i bon.*

Mo nao mi, Nifae, mi no raetem laen blong famle blong ol bubu blong mi long pat blong histri ia blong mi; mo tu bae mi no raetem long eni taem long ol buk ia we mi stap raetem; from samting ia i stap long histri we papa blong mi i bin kipim; from samting ia mi no raetem samting ia long wok ia.

2 From hem i naf blong mi talem we mifala i kamaot long laen blong Josef.

3 Mo mi no wari tumas sapos mi no raetem evri histri blong papa blong mi, from mi no save raetem olgeta long ol buk ia, from mi wantem ol spes blong mi save raetem ol samting blong God.

4 From evri pat blong plan blong mi, hem i blong bae mi winim tingting blong ol man blong kam long God blong Ebrahim, mo God blong Aesak, mo God blong Jakob, mo blong hem i save sevem olgeta.

5 From samting ia, ol samting we i gud long ae blong wol mi no raetem, be ol samting we i gud long ae blong God mo long olgeta we oli no blong wol.

6 From samting ia, bae mi givim komanmen long ol pikinini blong mi, blong oli no mas fulumap buk ia wetem ol samting we i no gat yus long ol pikinini blong ol man.

---

 JAPTA 7
 

---

*Ol boe blong Lihae i gobak long Jerusalem mo askem Ismael mo famle blong hem blong joenem olgeta long wokbaot blong olgeta—Leman mo sam narafala i go agensem Lod—Nifae i askem strong long ol brata blong hem blong gat fet long Lod—Oli fasem taet hem wetem ol rop mo oli plan blong kilim hem i ded—Hem i kam fri tru long paoa blong fet—Ol brata blong hem i askem hem blong fogivim olgeta—Lihae mo kampani blong hem i mekem sakrifaes mo oli bonem ol ofring. Raonabaot 600–592 yia bifo Kraes i bon.*

Mo nao mi wantem se yufala i save se afta papa blong mi, Lihae, i bin mekem wan en blong ol profesi long saed blong ol laen blong hem, i bin hapen se Lod i bin toktok long hem bakegen, hem i talemaot se i nogud blong hem, Lihae, se bae hem i tekem famle blong hem i go long ples we i no gat man long hem olgeta nomo; be we ol boe blong hem i mas mared wetem gel blong narafala man blong oli save gat sam pikinini long Lod long graon blong promes.

2 Mo i bin hapen se Lod i bin talem long hem se mi, Nifae, mo ol brata blong mi, mifala i mas gobak bakegen long graon blong Jerusalem, mo karem daon Ismael mo famle blong hem blong oli kam long ples we i no gat man long hem.

3 Mo i bin hapen se mi, Nifae, bakegen wetem ol brata blong

mi, i bin go aot long ples we i no gat man long hem blong go antap long Jerusalem.

4 Mo i bin hapen se mifala i bin go antap long haos blong Ismael, mo mifala i bin kam gud long ae blong Ismael, inaf blong mekem se mifala i talemaot long hem ol toktok blong Lod.

5 Mo i bin hapen se Lod i bin mekem hat blong Ismael i kam sofsof, mo tu famle blong hem, inaf blong mekem se oli bin tekem wokbaot blong olgeta wetem mifala i go daon long ples we i no gat man long hem long tenet blong papa blong mifala.

6 Mo i bin hapen se long taem we mifala i stap wokbaot long ples we i no gat man long hem, luk Lemam mo Lemyul, mo tu long ol gel blong Ismael, mo tufala boe blong Ismael mo ol famle blong tufala, oli bin go agensem mifala; yes, agensem mi, Nifae, mo Sam, mo papa blong olgeta, Ismael, mo woman blong hem, mo tri narafala gel blong hem.

7 Mo i bin hapen se long rao ia, oli bin wantem gobak long graon blong Jerusalem.

8 Mo nao mi, Nifae, from mi bin harem nogud from we ol hat blong olgeta i strong, taswe mi bin toktok long olgeta se, yes, long Lemam mo Lemyul se: Luk, yutufala i ol brata blong mi we yutufala i bon bifo mi, mo olsem wanem nao yufala i strong long ol hat blong yufala, mo blaen long ol tingting blong yufala, we yufala i gat nid se mi, yangfala brata blong yufala, i

mas toktok long yufala, yes, mo soem wan eksampol long yufala?

9 Hao nao yufala i no bin lisiin long toktok blong Lod?

10 Hao nao yufala i bin fogetem we yufala i bin luk wan enjel blong Lod?

11 Yes, mo hao nao yufala i bin fogetem ol gudfala samting we Lod i bin mekem blong yumi, long taem we hem i sev-em yumi aot long ol han blong Leban, mo tu se yumi save kasem histri ia?

12 Yes, mo hao nao yufala i bin fogetem se Lod i save mekem evri samting we hem i wantem mekem, long ol pikinini blong ol man, sapos i olsem se oli soemaot fet long hem? From samting ia, bae yumi holem taet fet long hem.

13 Mo sapos i olsem se yumi holem fet long hem, bae yumi kasem graon blong promes; mo bae yufala i save long sam taem long fiuja we ol toktok blong Lod bae i hapen long saed blong smas gud blong Jerusalem; from evri samting we Lod i bin talem long saed blong smas gud blong Jerusalem i mas hapen.

14 From luk, Spirit blong Lod klosap bae i stop blong wok wetem olgeta; from luk, oli bin sakemaot ol profet, mo Jeremaea oli bin sakem long kalabus; mo oli bin lukaotem blong tekemaot laef blong papa blong mi, inaf blong mekem se oli bin ronemaot hem long graon.

15 Nao luk, mi talem long yufala se sapos yufala i gobak



long Jerusalem bae yufala tu i ded wetem olgeta. Mo nao, sapos yufala i gat jus, go antap long graon, mo tingbaot ol toktok we mi talemaot long yufala, se sapos yufala i go bae yufala tu i mas ded; from olsem ia nao Spirit blong Lod i mekem mi blong talem samting ia.

16 Mo i bin hapen se afta we mi, Nifae, i bin talem ol toktok ia long tufala brata blong mi, oli bin kros long mi. Mo i bin hapen se oli bin putum ol han blong olgeta long mi, from luk, oli bin kros tumas, mo oli bin fasem mi wetem ol rop, from oli bin lukaotem blong tekemaot laef blong mi, blong oli save livim mi long ples we i no gat man long hem blong ol wael anamol i save kakae mi.

17 Be i bin hapen se mi bin prea long Lod, se: O Lod, folem fet blong mi we mi gat long yu, bae yu mekem mi i kam fri aot long ol han blong tufala brata blong mi; yes, givim paoa long mi tu blong mi save brekem ol rop ia we i stap long mi.

18 Mo i bin hapen se afta we mi bin talem ol toktok ia, luk, ol rop i bin kamaot long ol han mo ol leg blong mi, mo mi bin stanap long fored blong tufala brata blong mi, mo mi bin toktok long tufala bakegen.

19 Mo i bin hapen se oli bin kros long mi bakegen, mo oli bin lukaotem blong putum ol han blong olgeta long mi; be luk, wan long ol gel blong Ismael, yes, mo tu mama blong hem, mo wan long ol boe blong Ismael, i bin askem strong long tufala

brata inaf blong mekem se oli bin mekem ol hat blong tufala i kam sofsof; mo oli bin stop blong traem blong tekemaot laef blong mi.

20 Mo i bin hapen se tufala i bin sore, from fasin nogud blong tufala, inaf blong mekem se tufala i bin bodaon long fored blong mi, mo tufala i bin askem strong long mi blong mi save fogivim tufala from samting ia we tufala i bin mekem agensem mi.

21 Mo i bin hapen se mi bin fogivim gud tufala from evri samting we tufala i bin mekem, mo mi bin askem strong long tufala se bae tufala i prea long Lod, God blong tufala blong askem hem blong fogivim tufala. Mo i bin hapen se tufala i bin mekem olsem. Mo afta we tufala i bin mekem prea long Lod, mifala i bin wokbaot bakegen i go long tenet blong papa blong mifala.

22 Mo i bin hapen se mifala i bin kam daon long tenet blong papa blong mifala. Mo afta mi, mo ol brata blong mi, mo ol famle blong Ismael i bin kam daon long tenet blong papa blong mi, oli bin talem tangkyu long Lod, God blong olgeta; mo oli bin mekem sakrifaes mo bonem ol ofring i go long hem.

---

## JAPTA 8

---

*Lihae i luk wan visen blong tri blong laef—Hem i kakae long ol frut blong hem mo hem i wantem famle blong hem blong mekem*

*olsem—Hem i luk wan rel blong aean, wan stret mo smol rod, mo ol klaod blong tudak we i kavremap ol man—Saraea, Nifae, mo Sam i kakae long frut ia, be Leman mo Lemyul i no wantem. Raonabaot 600-592 yia bifo Kraes i bon.*

Mo i bin hapen se mifala i bin karem i kam tugeta ol defren kaen sid blong evri kaen, blong wit tugeta wetem evri kaen, mo tu blong ol sid blong frut blong evri kaen.

2 Mo i bin hapen se long taem we papa blong mi i bin stap long ples we i no gat man long hem, hem i bin toktok long mifala, i se: Luk, mi bin drim long wan drim; o, long ol narafala toktok, mi bin luk wan visen.

3 Mo luk, from samting ia we mi bin luk, mi gat stamba tingting blong glad long Lod from Nifae, mo Sam, from mi gat stamba tingting blong biliv strong se tufala, mo tu plante long ol laen blong tufala, bae i sev.

4 Be luk, Leman mo Lemyul, mi fraet tumas from yutufala; from luk, mi bin ting mi bin luk long drim blong mi, wan dak mo sore ples we i no gat man long hem.

5 Mo i bin hapen se mi bin luk wan man, mo hem i bin putum wan longfala waet klos; mo hem i bin kam mo stanap long fored blong mi.

6 Mo i bin hapen se hem i bin toktok long mi, mo bin askem mi blong folem hem.

7 Mo i bin hapen se taem we mi bin folem hem mi bin luk

miwan se mi bin stap long wan dak mo sore emti ples.

8 Mo afta we mi bin wokbaot blong spes blong plante aoa long tudak, mi bin stat blong prea long Lod blong hem i gat sore long mi, folem plante sore mo lav blong hem.

9 Mo i bin hapen se afta we mi bin prea long Lod mi bin luk wan bigfala fil we i gat fulap spes.

10 Mo i bin hapen se mi bin luk wan tri, we frut blong hem i bin gud tumas blong i save mekem man i hapi.

11 Mo i bin hapen se mi bin go aot mo mi bin kakae long frut blong tri ia; mo mi bin faenem se frut ia i moa swit bitim evri frut we mi bin testem bifo. Yes, mo mi bin luk se frut blong hem i bin waet i bitim evri waet samting we mi bin luk bifo.

12 Mo taem we mi bin kakae long frut blong tri ia, hem i bin fulumap sol blong mi wetem bigfala glad we i bigwan tumas; from samting ia, mi bin stat blong wantem tumas se famle blong mi bae i kakae long frut ia tu, from mi bin save se tes blong frut ia i bitim tes blong evri narafala frut.

13 Mo taem we mi bin stap lukluk olbaot, blong maet mi save faenem famle blong mi tu, mi bin luk wan reva blong wota; mo i bin ron klosap, mo hem i bin klosap long tri we mi bin stap kakae frut blong hem.

14 Mo mi bin luk blong faenemaot wanem ples hem i bin kamaot long hem; mo mi bin

luk maot blong hem i no longwe tumas; mo long maot blong hem mi bin luk mama blong yufala Saraea, mo Sam, mo Nifae; mo oli bin stanap olsem we oli no bin save se bae oli go wea.

15 Mo i bin hapen se mi bin sakem han long olgeta; mo tu mi bin singaot bigwan long olgeta blong oli sud kam long mi mo kakae long frut ia, we i gud bitim ol narafala frut.

16 Mo i bin hapen se oli bin kam long mi mo oli bin kakae long frut ia tu.

17 Mo i bin hapen se mi bin wantem tumas se Lemam mo Lemyul bae i kam mo kakae long frut ia tu; from samting ia, mi bin sakem ol ae blong mi i go long maot blong reva, blong maet mi save luk tufala.

18 Mo i bin hapen se mi bin lukim tufala, be tufala i no bin wantem kam long mi mo kakae long frut.

19 Mo mi bin luk wan rel blong aean, mo i bin folem saed blong reva, mo i go long tri we mi bin stanap klosap long hem.

20 Mo tu mi bin luk wan stret mo smol rod, we i bin folem saed blong rel blong aean, i go kasem tri ia we mi bin stanap klosap long hem; mo tu hem i bin go long maot blong springwota, i go long wan bigfala fil we i gat fulap spes, olsem we hem i bin wan wol.

21 Mo mi bin luk plante grup blong ol pipol we i had tumas blong kaontem evriwan, plante long olgeta i bin gohed strong,

blong oli save kasem rod we i bin go long tri we mi bin stanap klosap long hem.

22 Mo i bin hapen se oli bin kam fored, mo stat blong wokbaot long rod ia we i bin go long tri.

23 Mo i bin hapen se wan klaod blong tudak i bin girap, yes, hem i wan bigfala klaod blong tudak, inaf, we i mekem se olgeta we i bin stat blong wokbaot long rod i bin lusum rod blong olgeta, blong mekem se oli bin wokbaot longwe mo oli bin lus.

24 Mo i bin hapen se mi bin luk sam narafala man i gohed strong, mo oli bin kam fored mo oli bin holem en blong rel blong aean; mo oli bin go fored tru long ol klaod blong tudak, oli holem strong long rel blong aean, mo tu, kasem taem we oli bin kam fored mo kakae long frut blong tri.

25 Mo afta oli bin kakae long frut blong tri, oli bin sakem ol ae blong olgeta olbaot, olsem se oli bin sem.

26 Mo tu mi bin sakem ol ae blong mi raonabaot, mo mi bin luk, long narasaed long reva blong wota, wan bigfala haos we i gat fulap spes; mo i bin stanap olsem we i bin stap long ea, hae antap long graon.

27 Mo hem i bin fulap wetem ol pipol, ol olfala tugeta wetem ol yangfala, ol man tugeta wetem ol woman; mo fasin blong klos blong olgeta i bin flas tumas; mo oli stap olsem se oli stap jikim ol man mo poenem ol fingga blong olgeta, long olgeta we i

bin kam long, mo oli bin stap kakae long frut.

28 Mo afta oli bin testem long frut ia oli bin sem, from olgeta we i stap jikim olgeta; mo oli bin foldaon i go long ol rod we i no blong folem, mo oli bin lus.

29 Mo nao mi, Nifae, mi no talemoot evri toktok blong papa blong mi.

30 Be, blong mekem raeting i sot, luk, hem i bin luk sam narafala grup blong ol pipol we i stap gohed strong; mo oli bin kam mo holem taet en blong rel blong aean; mo oli bin gohed stret fored, oli stap holem taet rel blong aean oltaem, kasem taem we oli bin kam fored mo oli bin foldaon mo oli bin kakae long frut blong tri.

31 Mo tu hem i bin luk sam narafala grup blong pipol i stap traee had blong faenem rod we i go long bigfala haos ia we i gat fulap spes.

32 Mo i bin hapen se plante i bin draon daon long ol dip ples blong springwota; mo plante i bin lus long ae blong hem, oli wokbaot long ol rod we oli no save.

33 Mo grup blong ol pipol ia i bigwan we i bin go insaed long bigfala defren haos ia. Mo afta we oli bin go insaed long haos ia oli bin poenem fingga blong jik long mi, mo olgeta we oli stap kakae long frut tu; be mifala i no bin lisin long olgeta.

34 Hemia i ol toktok blong papa blong mi: From evriwan we i bin lisin long olgeta i bin foldaon mo lus.

35 Mo Leman mo Lemyul i no

bin kakae frut, papa blong mi i bin talem.

36 Mo i bin hapen se afta we papa blong mi i bin talemoot evri toktok ia blong drim blong hem o visen, we oli bin plante, hem i bin talem long mifala se, from ol samting we hem i bin luk long wan visen, hem i bin fraet tumas from Leman mo Lemyul; yes, hem i bin fraet se bae Lod i sakemoot tufala long fes blong hem.

37 Mo hem i bin askem strong long tufala wetem evri filing blong wan gudfala papa, blong tufala i lisin long ol toktok blong hem, blong maet Lod bae i gat sore long tufala, mo no sakemoot tufala; yes, papa blong mi i bin prij long tufala.

38 Mo afta we hem i bin prij long tufala, mo tu i bin talemoot profesi long olgeta long saed blong plante samting, hem i askem strong long tufala blong holem ol komanmen blong Lod; mo hem i bin stop blong toktok long tufala.

---

## JAPTA 9

---

*Nifae i mekem tu set blong histri—Oli singaotem tufala buk ia, ol buk blong Nifae—Ol bigfala buk i gat histri blong ol man wetem ol samting we oli mekem long evri dei long laef blong olgeta—Ol smolfala buk i gat histri blong ol tabu samting. Raonabaot 600–592 yia bifo Kraes i bon.*

Mo evri samting ia papa blong mi i bin luk mo i bin harem, mo i bin tokbaot, taem we hem

i stap long wan tenet long vale blong Lemyul, mo tu plante moa samting, we mi no save raetem long ol buk ia.

2 Mo nao, olsem we mi bin tokbaot long saed blong ol buk ia, luk oli no ol buk we mi bin mekem wan ful histri blong ol histri blong ol pipol blong mi; from ol buk we mi bin mekem wan ful histri blong ol pipol blong mi, mi bin givim nem blong Nifae; from samting ia, oli singaotem olgeta ol buk blong Nifae, folem nem blong mi nomo; mo ol buk ia tu oli singaotem olgeta ol buk blong Nifae.

3 Be, mi bin kasem wan komanmen long Lod we mi mas mekem ol buk ia, from spesel stamba tingting se i mas gat wan histri we oli raetemdaon blong ministri blong ol pipol blong mi.

4 Long ol narafala buk oli mas raetemdaon histri blong rul blong ol king, mo ol faet mo ol rao blong ol pipol blong mi; from samting ia ol buk ia oli blong saed blong ministri; mo ol narafala buk oli blong rul blong ol king, mo ol faet, mo ol rao blong ol pipol blong mi.

5 From samting ia, Lod i bin givim oda long mi blong mekem ol buk ia blong wan waes stamba tingting blong hem, we stamba tingting ia mi no save.

6 Be Lod i save evri samting stat long stat; from samting ia, hem i mekem rere wan rod blong finisim evri wok blong hem long medel blong ol pikinini blong ol man; from luk, hem i bin gat evri paoa blong

mekem evri toktok blong hem i hapen. Mo i olsem ia nao. Amen.

---

## JAPTA 10

---

*Lihae i talem se long fiuja ol Jiu bae i kam prisena blong ol man blong Babilon—Hem i talemaot se long medel blong ol Jiu bae wan Mesaea i kam, wan Sevyu, wan Ridima—Lihae i talemaot tu long saed blong man we bae i kam we bae i baptaesem Smol Sipsip blong God—Lihae i talemaot ded mo laef bakegen blong Mesaea—Hem i skelem seraot mo kam tugeta blong Isrel long wan olif tri—Nifae i tokbaot Pikinini blong God, long saed blong presen we i Tabu Spirit, mo long saed blong nid blong stret fasin. Raonabaot 600–592 yia bifo Kraes i bon.*

Mo nao mi, Nifae, mi gohed blong givimaot wan histri long ol buk ia blong ol samting we mi bin mekem, mo rul blong mi mo ministri; from samting ia, blong gohed wetem histri blong mi, mi mas tokbaot smol long saed blong ol samting blong papa blong mi, mo tu long saed blong ol brata blong mi.

2 From luk, i bin hapen se afta we papa blong mi i bin stop blong talemaot ol toktok blong drim blong hem, mo tu blong askem strong long olgeta blong wok had oltaem, hem i bin toktok long olgeta long saed blong ol Jiu—

3 Se afta we oli mas smas gud, we i bigfala bigtaon ia Jerusalem, mo plante bae oli

mas tekem olgeta i go prisena long Babilon, folem taem we Lod i jusum bae oli mas kambak bakegen, yes, karemaot olgeta aot long kalabus tu; mo afta we oli kamaot long kalabus, bae oli mas karem bak bakegen graon blong olgeta we oli kasem long ol papa blong olgeta.

4 Yes, sikis handred yia stat long taem we papa blong mi i bin aot long Jerusalem, wan profet bae Lod God i resemap long medel blong ol Jiu—we i wan Mesaea, o, long ol narafala toktok, wan Sevya blong wol.

5 Mo tu hem i bin tokbaot ol profet, hamas nao wan bigfala namba i bin testifae long ol samting ia, long saed blong Mesaea ia, we hem i bin tokbaot, o Ridima blong wol.

6 From samting ia, evri man i bin stap long wan ples blong lus mo foldaon, mo bae oli stap long ples ia oltaem hemia nomo sapos oli no dipen long Ridima ia.

7 Mo hem i bin tokbaot tu long saed blong wan profet we bae i kam fastaem long Mesaea, blong mekem rere rod blong Lod—

8 Yes, hem i mas go aot mo singaot long ples we i no gat man long hem: Yufala i mekem rere rod blong Lod, mo mekem rod blong hem i stret; from i gat wan we i stap stanap long medel blong yufala we yufala i no save; mo hem i moa hae long mi, we strap blong sandel blong hem mi no stret inaf blong tekemaot. Mo plante samting papa blong mi i bin talem long saed blong samting ia.

9 Mo papa blong mi i bin talem se hem i mas baptaes long Betabara, bitim Jordan; mo tu hem i bin talem se hem i mas baptaes wetem wota; hem i mas baptaesem Mesaea tu wetem wota.

10 Mo afta we hem i bin baptaesem Mesaea wetem wota, bae hem i luk mo talemaot se hem i bin baptaesem Smol Sipsip blong God, we bae i tekemaot ol sin blong wol.

11 Mo i bin hapen se afta we papa blong mi i bin talemaot ol toktok ia, hem i bin toktok long ol brata blong mi long saed blong gospel we bae oli prijim long medel blong ol Jiu, mo tu long saed blong slak blong ol Jiu long taem we oli no bilif. Mo afta we oli bin kilim ded Mesaea, we bae i kam, mo afta we hem i bin ded, bae hem i girap long ded mo bae hem i soemaot hemwan, tru long Tabu Spirit, long ol Jentael.

12 Yes, papa blong mi i bin talem plante long saed blong ol Jentael tu, mo tu long saed blong laen blong Isrel, se bae oli skelem olgeta long wan olif tri, we ol branj blong hem bae oli mas kamaot mo oli mas seraot long ful fes blong wol.

13 From samting ia, hem i bin talem se i mas nid olsem se Lod bae i lidim yumi evriwan tugeta long graon blong promes, blong mekem se toktok blong Lod i hapen, se bae yumi mas seraot olbaot long ful fes blong wol.

14 Mo afta ol laen blong Isrel bae i seraot, bae oli mas kam tugeta bakegen; o, blong endem,

afta ol Jentael i bin kasem Gospel we i fulwan, ol stret branj blong olif tri, o ol smol haf nomo we i stap yet blong laen blong Isrel, Lod bae i joenem olgeta, o oli kam blong save long saed blong tru Mesaea, Lod blong olgeta mo Ridima blong olgeta.

15 Mo long kaen toktok ia papa blong mi i bin profesae mo toktok long ol brata blong mi, mo tu plante moa samting we mi no raetem long buk ia; from mi bin raetem evriwan long olgeta we mi ting se oli impoten long narafala buk blong mi.

16 Mo evri samting ia, we mi bin tokbaot, i bin hapen long taem we papa blong mi i bin stap long wan tenet, long vale blong Lemyul.

17 Mo i bin hapen se afta mi, Nifae, from mi bin harem ol toktok blong papa blong mi, long saed blong ol samting we hem i bin luk long wan visen, mo tu ol samting we hem i bin talemaot tru long paoa blong Tabu Spirit, we paoa ia hem i bin kasem tru long fet long Pikinini blong God—mo Piki-nini blong God i bin Mesaea ia we bae i mas kam—mi, Nifae, i bin wantem tu se bae mi save luk, mo harem, mo save long ol samting ia, tru long paoa blong Tabu Spirit, we i presen blong God long olgeta we i wok strong oltaem blong lukaotem hem, olsem long ol taem bifo, mo long taem we hem i mas soemaot hemwan long ol pikinini blong ol man.

18 From hem i semak yestedei,

tede, mo blong oltaem; mo rod i rere finis blong evri man stat long taem we wol i bin stat, sapos i olsem se oli sakem sin mo kam long hem.

19 From hem we i wok strong oltaem blong lukaot, bae i faenem; mo ol sekret blong God bae i eksplenem long olgeta, tru long paoa blong Tabu Spirit, long ol taem ia naoia olsem long ol taem blong bifo, mo long ol taem blong bifo olsem long ol taem we bae i kam; from samting ia, rod blong Lod i wan raon samting we i no save finis.

20 Taswe tingbaot, O man, from evri samting we yu stap mekem bae Lod i karem yu long jajmen from.

21 From samting ia, sapos yufala i bin lukaotem blong mekem ol rabis fasin long ol dei blong tes blong yufala, ale bae oli faenem se yufala i no klin long fored blong jea blong jajmen blong God; mo bae i no gat wan samting we i no klin we i save stap wetem God; from samting ia, bae God i mas sakemaot yufala blong oltaem.

22 Mo Tabu Spirit i givim raet se bae mi talem ol samting ia, mo no tanem baksaed blong mi long olgeta.

---

### JAPTA 11

---

*Nifae i lukim Spirit blong Lod, mo i soem long visen tri blong laef—Hem i lukim mama blong Pikinini blong God mo i lanem ol wok we hem i mekem i kam daon long ol pikinini blong man—Hem i lukim*

*baptaes, ministri, mo taem we oli krusifaem Smol Sipsip blong God— Hem i lukim tu taem we Lod i singaotem ol Twelef Aposol blong Smol Sipsip mo ministri blong olgeta. Raonabaot 600–592 yia bifo Kraes i bon.*

FROM i bin hapen se afta we mi bin wantem blong save ol samting we papa blong mi i bin luk, mo biliv we Lod i save soem ol samting ia long mi, taem we mi bin sidaon mo stap tingting hevi long hat blong mi, Spirit blong Lod i bin karem mi i go longwe, yes, i go antap long wan bigfala hil we i hae tumas we mi neva bin luk bifo, mo long hem mi neva bin putum leg blong mi.

2 Mo Spirit i bin talem long mi: Luk, wanem yu wantem?

3 Mo mi bin talem: Mi wantem blong luk ol samting we papa blong mi i bin luk.

4 Mo Spirit i bin talem long mi: Yu bilivim se papa blong yu i bin lukim tri ia we hem i bin tokbaot?

5 Mo mi bin talem: Yes, yu save se mi bilivim evri toktok blong papa blong mi.

6 Mo taem we mi bin talemaot ol toktok ia, Spirit i bin singaot wetem wan laod voes, i se: Hosana long Lod, God we i hae tumas; from hem i God ova long ful wol, yes, hem i antap long evri samting. Mo bae Lod i blesem yu, Nifae, from yu biliv long Pikinini blong God we i hae tumas; from samting ia, bae yu luk ol samting we yu bin wantem.

7 Mo luk samting ia bae i kam long yu olsem wan saen, we afta yu bin luk tri ia we i bin karem frut ia we papa blong yu i bin testem, bae yu luk tu wan man we i kam daon aot long heven, mo hem bae yu luk. Mo afta yu bin luk hem, yu mas talemaot se hemia i Pikinini blong God.

8 Mo i bin hapen se Spirit i bin talem long mi: Luk! Mo mi bin lukluk mo bin luk wan tri; mo i bin olsem tri ia we papa blong mi i bin luk; mo naes blong tri ia i bin bitim mak, yes, i naes tumas bitim evri naes samting; mo waet kala blong tri ia i bin bitim waet kala blong sno we i jes kam pas.

9 Mo i bin hapen se afta we mi bin lukim tri ia, mi bin talem long Spirit: Mi luk se yu bin soemaot long mi tri ia we praes blong hem i bitim praes blong evri samting.

10 Mo hem i bin talem long mi: Wanem yu wantem?

11 Mo mi bin talem long hem: Blong save mining blong hem— from mi bin toktok long hem olsem wan man i stap toktok; from mi bin luk se hem i bin stap long pikja blong wan man. Be long taem ia, mi bin save se hemia i Spirit blong Lod, mo hem i bin toktok long mi olsem wan man i stap toktok wetem narawan.

12 Mo i bin hapen se hem i bin talem long mi: Luk! Mo mi bin lukluk olsem blong lukluk long hem, mo mi no bin lukim hem; from hem i bin go aot long fored blong fes blong mi.



13 Mo i bin hapen se mi bin lukluk mo mi bin luk bigfala bigtaon blong Jerusalem, mo tu sam narafala bigtaon. Mo mi bin luk bigtaon blong Nasaret; mo long bigtaon blong Nasaret, mi bin luk wan woman we i neva go wetem man yet, mo hem i bin naes tumas mo i waet.

14 Mo i bin hapen se mi bin luk ol heven i open; mo wan enjel i bin kamdaon mo bin stanap long fored blong mi; mo hem i bin talem long mi: Nifae, wanem yu lukim?

15 Mo mi bin talem long hem: Wan woman we i neva go wetem man yet, we i naes mo gud bitim ol narafala woman we i neva go wetem man yet.

16 Mo hem i bin talem long mi: Yu save ol samting long saed blong ol wok we God i kam daon blong mekem wetem man?

17 Mo mi bin talem long hem: Mi save se hem i lavem ol pikinini blong hem; be, mi no save mining blong evri samting.

18 Mo hem i bin talem long mi: Luk, woman we i neva go wetem man yet we yu stap luk i mama blong Pikinini blong God, folem fasin blong bodi blong mit mo bun.

19 Mo i bin hapen se mi bin luk se spirit i bin karem hem i go longwe; mo afta we spirit i bin karem hem i go longwe blong spes blong wan taem, enjel i bin toktok long mi, se: Luk!

20 Mo mi bin lukluk mo mi bin luk woman ia we i neva go wetem man yet bakegen, hem i stap holem wan pikinini long ol han blong hem.

21 Mo enjel i bin talem long mi: Luk Smol Sipsip blong God, yes, hem i Pikinini blong Papa we i no Save Finis! Yu save mining blong tri we papa blong yu i bin lukim?

22 Mo mi bin ansa long hem, i se: Yes, hem i lav blong God, we i seraotem hemwan i go long evri ples long ol hat blong ol pikinini blong ol man; from samting ia, hem i samting we evri man i wantem moa plante long ol narafala samting.

23 Mo hem i bin toktok long mi: Yes, mo hem i wan glad we i bigwan olgeta long sol.

24 Mo afta we hem i bin talem ol toktok ia, hem i bin talem long mi se: Luk! Mo mi bin lukluk, mo mi bin luk Pikinini blong God, i stap go fored long medel blong ol pikinini blong ol man; mo mi bin luk plante i foldaon long tufala leg blong hem mo wosipim hem.

25 Mo i bin hapen se mi bin luk se rel blong aean, we papa blong mi i bin lukim, i bin toktok blong God, we i bin go stret long springwota blong ol wota we i laef, o long tri blong laef; we ol wota blong hem i wan eksampol blong lav blong God; mo tu mi bin luk se tri blong laef i eksampol blong lav blong God.

26 Mo enjel i bin talem long mi bakegen: Lukim mo luk ol wok we God i mekem i kam daon long ol pikinini blong ol man!

27 Mo mi bin lukluk mo mi bin luk Ridima blong wol, we papa blong mi i bin tokbaot;

mo tu mi bin luk profet we bae i mekem rere rod bifo long hem. Mo Smol Sipsip blong God i bin go fored mo i bin kasem baptaes tru long hem; mo afta we hem i bin kasem baptaes, mi bin luk ol heven i open, mo Tabu Spirit i kamdaon aot long heven mo i stap long hem olsem pikja blong wan pijin.

28 Mo mi bin luk se hem i bin go aot i givhan long ol pipol, wetem paoa mo bigfala glori; mo ol grup blong ol pipol i bin kam tugeta blong harem hem; mo mi bin luk se oli sakem hem aot long medel blong olgeta.

29 Mo tu mi bin luk twelef narafala man we i stap folem hem. Mo i bin hapen se Spirit i bin karem olgeta i go longwe aot long fored blong fes blong mi, mo mi no bin luk olgeta.

30 Mo i bin hapen se enjel i bin toktok long mi bakegen, i se: Luk! Mo mi bin lukluk, mo mi bin luk ol heven i open bakegen, mo mi bin luk ol enjel i stap kamdaon long ol pikinini blong ol man; mo oli bin givhan long olgeta.

31 Mo hem i bin toktok long mi bakegen, i se: Luk! Mo mi bin lukluk, mo mi bin luk Smol Sipsip blong God i stap go fored long medel blong ol pikinini blong ol man. Mo mi bin luk ol grup blong ol pipol we oli bin sik, mo we oli bin gat hadtaem wetem evri kaen blong sik, mo wetem ol devel mo ol spirit we i no klin; mo enjel i bin toktok mo i bin soem evri samting ia long mi. Mo oli bin kam oraet tru long paoa blong Smol Sipsip

blong God; mo ol devel mo ol spirit we oli no klin hem i bin sakemaot.

32 Mo i bin hapen se enjel i bin toktok long mi bakegen, i se: Luk! Mo mi bin lukluk mo mi bin luk Smol Sipsip blong God, we ol pipol i bin tekem hem; yes, Pikinini blong God we i no gat en i bin kasem jajmen blong wol; mo mi bin luk mo mi talemaot.

33 Mo mi, Nifae, i bin luk se oli bin leftemap hem long kros mo oli bin kilim hem i ded from ol sin blong wol.

34 Mo afta we oli bin kilim hem i ded, mi bin luk ol grup blong pipol blong wol, we oli bin kam tugeta blong faet agensem ol aposol blong Smol Sipsip; from olsem ia nao enjel blong Lod i bin singaotem ol twelef.

35 Mo grup blong pipol blong wol i bin kam tugeta; mo mi bin luk we oli bin stap long wan bigfala haos we i gat fulap spes, olsem haos ia we papa blong mi i bin lukim. Mo enjel blong Lod i bin toktok long mi, i se: Luk wol mo waes tingting blong hem, yes, luk laen blong Isrel i bin kam tugeta blong faet agensem ol twelef aposol blong Smol Sipsip.

36 Mo i bin hapen se mi bin luk mo talemaot, se bigfala haos we i gat fulap spes ia i bin hae tingting blong wol; mo i bin foldaon, mo foldaon blong haos ia i bin bigwan tumas. Mo enjel blong Lod i bin toktok long mi bakegen, i se: Olsem ia nao Lod bae i smasem evri kantri, famle, lanwis, mo pipol, we bae oli

faet agensem ol twelef aposol blong Smol Sipsip.

---

JAPTA 12

---

*Nifae i luk long visen, graon blong promes; stret fasin, rabis fasin, mo foldaon blong man we i stap long hem; Smol Sipsip blong God i visitim olgeta; hao nao ol Twelef Disaepol mo ol Twelef Aposol bae i jajem Isrel; mo ol rabis mo doti ples blong olgeta we i stap slak from oli bin lusum bilif. Raonabaot 600-592 yia bifo Kraes i bon.*

Mo i bin hapen se enjel i bin talem long mi: Lukim, mo luk ol laen blong yu, mo tu ol laen blong ol brata blong yu. Mo mi bin lukluk mo luk graon blong promes; mo mi bin luk ol grup blong ol pipol, yes, hem i olsem se namba blong hem i semak olsem namba blong ol sanbij blong solwota.

2 Mo i bin hapen se mi bin luk ol grup blong ol pipol we i kam tugeta blong faet, wan agensem narawan; mo mi bin luk ol faet, mo ol nius blong ol faet, mo ol bigfala ded wetem naef blong faet long medel blong ol pipol blong mi.

3 Mo i bin hapen se mi bin luk plante jeneresen i pas i gowe, folem fasin blong ol faet mo ol rao long graon; mo mi bin luk plante bigtaon, yes, i go kasem tumas we mi no bin kaontem olgeta.

4 Mo i bin hapen se mi bin luk wan klaod blong tudak long fes blong graon blong promes; mo mi bin luk ol laetning, mo mi bin

harem ol tanda, mo ol graon i seksek, mo evri kaen blong ol bigfala noes; mo mi bin luk graon mo ol ston, we oli bin brok; mo mi bin luk ol bigfala hil i foldaon long pisis; mo mi bin luk ol level ples blong graon, we oli bin brokbrok; mo mi bin luk plante bigtaon we oli bin draon; mo mi bin luk plante we i bin bon wetem faea; mo mi bin luk plante we i bin foldaon long graon, from seksek blong graon.

5 Mo i bin hapen se afta we mi bin luk ol samting ia, mi bin luk smok blong tudak, we i bin lus long fes blong wol; mo luk, mi bin luk ol grup blong ol pipol we i no bin foldaon from ol bigfala mo ol strong jajmen blong Lod.

6 Mo mi bin luk ol heven i open, mo Smol Sipsip blong God i stap kamdaon long heven; mo hem i bin kamdaon mo i bin soemaot hemwan long olgeta.

7 Mo tu mi bin luk mo stap talemaot se Tabu Spirit i bin kamdaon long twelef narafala man; mo God i bin odenem olgeta, mo i bin jusum olgeta.

8 Mo enjel i bin toktok long mi, i se: Luk ol twelef disaepol blong Smol Sipsip, we God i jusum olgeta blong givhan long ol laen blong yu.

9 Mo hem i bin talem long mi: Yu tingbaot ol twelef aposol blong Smol Sipsip? Luk oli olgeta we bae oli jajem ol twelef traeb blong Isrel; from samting ia, ol twelef minista blong ol laen blong yu bae oli kasem jajmen long olgeta; from yufala i pat blong laen blong Isrel.

10 Mo ol twelef disaepol ia we yu stap luk bae oli jajem ol laen blong yu. Mo, luk, oli stret oltaem; from fet blong olgeta long Smol Sipsip blong God, ol klos blong olgeta i kam waet tru long blad blong hem.

11 Mo enjel i bin talem long mi se: Luk! Mo mi bin lukluk, mo bin lukim tri jeneresen i pas long stret fasin; mo ol klos blong olgeta i bin waet olsem Smol Sipsip blong God. Mo enjel i bin talem long mi: Olgeta ia i kam waet long blad blong Smol Sipsip, from fet blong olgeta long hem.

12 Mo mi, Nifae, tu i bin luk plante blong nambafo jeneresen we i bin pas i gowe long stret fasin.

13 Mo i bin hapen se mi bin luk ol grup blong ol pipol blong wol i bin kam tugeta.

14 Mo enjel i bin talem long mi: Luk ol laen blong yu, mo tu ol laen blong brata blong yu.

15 Mo i bin hapen se mi bin luk mo mi bin lukim ol pipol blong laen blong mi i bin kam tugeta long ol grup blong pipol agensem ol laen blong ol brata blong mi; mo oli bin kam tugeta blong faet.

16 Mo enjel i bin toktok long mi, i se: Luk springwota blong wota we i doti we papa blong yu i bin luk; yes, hem i reva we hem i bin tokbaot; mo ol dip ples blong hem oli ol dip ples blong hel.

17 Mo ol klaod blong tudak oli ol temtesen blong devel, we i blaenem ol ae, mo i mekem ol hat blong ol pikinini blong ol

man i kam strong, mo i lidim olgeta i gowe long ol rod we i bigwan, blong mekem se oli ded mo oli lus.

18 Mo bigfala haos ia we i gat fulap spes, we papa blong yu i bin luk, i ol hae tingting blong flas, mo ol hae tingting blong ol pikinini blong ol man. Mo wan bigfala mo wan rabis hol i divaedem olgeta; yes, hem i toktok blong jastis blong God we i no Save Finis, mo Mesaea we i Smol Sipsip blong God, we Tabu Spirit i tokbaot hem, stat long taem we wol i bin stat kasem taem ia, mo stat long taem ia i go kasem long oltaem.

19 Mo taem we enjel i bin stap talemaot ol toktok ia, mi bin luk mo lukim se ol laen blong brata blong mi i bin faet agensem ol laen blong mi, folem toktok blong enjel; mo from ol hae tingting blong ol laen blong mi ol temtesen blong devel, mi bin luk se ol laen blong ol brata blong mi i bin winim ol pipol blong ol laen blong mi.

20 Mo i bin hapen se mi bin luk, mo mi bin lukim ol pipol blong ol laen blong brata blong mi, se oli bin winim ol laen blong mi; mo oli bin go fored long ol grup blong ol pipol long fes blong graon.

21 Mo mi bin luk olgeta i bin kam tugeta long ol grup blong ol pipol; mo mi bin luk ol faet mo ol nius blong ol faet long medel blong olgeta; mo long ol faet mo ol nius blong ol faet mi bin luk plante jeneresen i pas i gowe.

22 Mo enjel i bin talem long

mi: Luk, olgeta ia bae oli kam slak from oli lusum bilif.

23 Mo i bin hapen se mi bin luk, afta we oli bin kam slak from oli lusum bilif, oli bin kam wan dak mo wan rabis, mo wan doti pipol, oli fulap wetem les mo evri kaen rabis sin.

---

### JAPTA 13

---

*Nifae i luk long visen jos blong devel we i stanap long medel blong ol Jentael, oli faenem mo stanemap Amerika, ol pat blong Baebol we oli klia mo gudgudfala i lus long Baebol, wanem i hapen from apostasi blong ol Jentael, kambak blong gospel, ol skripja blong ol lata-dei bae i kamaot, mo taem we oli bildimap Saeon. Raonabaot 600–592 yia bifo Kraes i bon.*

Mo i bin hapen se enjel i bin toktok long mi, i se: Luk! Mo mi bin luk mo mi bin lukim plante kantri mo plante kingdom.

2 Mo enjel i bin talem long mi: Wanem yu lukim? Mo mi bin talem: Mi luk plante kantri mo kingdom.

3 Mo hem i bin talem long mi: Hemia i ol kantri mo ol kingdom blong ol Jentael.

4 Mo i bin hapen se mi bin luk long medel blong ol kantri blong ol Jentael wan bigfala jos i stanap.

5 Mo enjel i bin talem long mi: Luk jos ia we i stanap, hem i moa rabis bitim ol narafala jos, we i stap kilim ded ol sent blong God, yes, mo i mekem olgeta i safa, mo i fasem daon olgeta, mo i putum wan yok long olgeta

we i wan yok blong aean, mo i karem olgeta i kam daon long prisen.

6 Mo i bin hapen se mi bin luk bigfala mo rabis jos ia; mo mi bin luk devel we i bin stanemap hem.

7 Mo tu mi bin luk gol, mo silva, mo ol klos we oli mekem long silik, mo ol narafala klos we oli red mo oli stap saen, mo ol klos we oli soemap gud, mo evri kaen gudgudfala klos; mo mi bin luk plante woman blong rod.

8 Mo enjel i bin toktok long mi, i se: Luk gol, mo silva, mo ol klos we oli mekem long silik, mo ol narafala klos we oli red mo oli stap saen, mo ol klos ia we oli soemap gud, mo ol gudgudfala klos, mo ol woman blong rod, oli ol tingting blong bigfala mo rabis jos ia.

9 Mo tu from ol pres blong wol, oli kilim ded ol sent blong God mo karem olgeta i go daon long prisen.

10 Mo i bin hapen se mi bin luk mo lukim plante solwota; mo oli bin divaedem ol Jentael long ol laen blong ol brata blong mi.

11 Mo i bin hapen se enjel i bin talem long mi: Luk kros blong God i stap long ol pikinini blong ol brata blong yu.

12 Mo mi bin luk mo lukim wan man long medel blong ol Jentael, we plante solwota ia i bin divaedem hem long ol pikinini blong ol brata blong mi; mo mi bin luk Spirit blong God, we i bin kamdaon mo i bin wok long man ia; mo hem i bin

go aot long plante solwota ia, i go kasem ol laen blong ol brata blong mi, we i bin stap long promes graon.

13 Mo i bin hapen se mi bin luk Spirit blong God, we i bin wok long sam narafala Jentael; mo oli bin go aot long kalabus, long plante solwota ia.

14 Mo i bin hapen se mi bin luk plante grup blong pipol blong ol Jentael long graon blong promes; mo mi bin luk kros blong God, we i bin stap wetem ol laen blong ol brata blong mi; mo oli bin seraot long fored blong ol Jentael mo oli bin kilim olgeta.

15 Mo mi bin luk Spirit blong Lod, we i bin stap long ol Jentael, mo oli kam antap gud mo oli bin kasem graon blong olgeta we oli kasem long ol papa blong olgeta; mo mi bin luk we oli waet, mo oli gud tumas mo naes, olsem ol pipol blong mi bifo oli bin kilim olgeta i ded.

16 Mo i bin hapen se mi, Nifae, mi bin luk we ol Jentael we i bin go aot long kalabus, oli bin putum tingting blong olgeta i stap daon long fored blong Lod; mo paoa blong Lod i bin stap wetem olgeta.

17 Mo mi bin luk we ol mama Jentael blong olgeta i bin kam tugeta long ol solwota, mo long graon tu, blong faet agensem olgeta.

18 Mo mi bin luk we paoa blong God i bin stap wetem olgeta, mo tu we kros blong God i bin stap long olgeta we i bin kam tugeta agensem olgeta blong faet.

19 Mo mi, Nifae, mi bin luk we ol Jentael we i bin go aot long kalabus i bin kam fri tru long paoa blong God aot long ol han blong evri narafala kantri.

20 Mo i bin hapen se mi, Nifae, mi bin luk we oli bin kam antap gud long graon; mo mi bin luk wan buk, mo oli bin karem i go aot long medel blong olgeta.

21 Mo enjel i bin talem long mi: Yu save mining blong buk ia?

22 Mo mi bin talem long hem: Mi no save.

23 Mo hem i bin talem: Luk, i kam aot long maot blong wan Jiu. Mo mi, Nifae, mi bin lukim buk ia; mo hem i bin talem long mi: Buk ia we yu stap lukim i wan histri blong ol Jiu, we i holem ol kavenan blong Lod, we hem i bin mekem wetem laen blong Isrel; mo hem i holem tu plante long ol profesi blong ol tabu profet; mo hem i wan histri olsem ol raeting we i stap long ol buk we oli bin mekem wetem bras, be hemia nomo i no gat plante tumas; be, oli holem ol kavenan blong Lod, we hem i bin mekem wetem laen blong Isrel; from ol samting ia, oli gat bigfala yus long ol Jentael.

24 Mo enjel blong Lod i bin talem long mi: Yu bin luk we buk ia i bin kam aot long maot blong wan Jiu; mo taem we i bin kam aot long maot blong wan Jiu, i bin holem gospel we i fulwan blong Lod we ol twelef aposol i talemaot; mo oli talemaot ol samting folem trutok we i stap long Smol Sipsip blong God.

25 From samting ia, ol samting

ia i go aot long ol Jiu long klin fasin i go long ol Jentael, folem trutok we i stap long God.

26 Mo afta oli go aot tru long ol han blong ol twelef aposol blong Smol Sipsip, long ol Jiu i go long ol Jentael, yu stap luk taem we bigfala mo rabis jos ia i stat, we i moa rabis bitim ol narafala jos; from luk, oli bin tekemaot long gospel blong Smol Sipsip, plante pat we oli klia mo gudgudfala, mo tu plante kavenan blong Lod oli bin tekemaot.

27 Mo evri samting ia oli bin mekem blong oli save jenisim ol gudfala fasin blong Lod, blong oli save mekem ol ae mo mekem ol hat i kam strong blong ol pikinini blong ol man.

28 From samting ia, yu stap luk we afta buk ia i bin go aot tru ol han blong bigfala mo rabis jos, i bin gat plante klia mo gudgudfala samting we oli bin tekemaot long buk ia, we i buk blong Smol Sipsip blong God.

29 Mo afta we ol samting ia we i klia mo gudgudfala oli lus, buk ia i go aot long evri kantri blong ol Jentael; mo afta we i go aot long evri kantri blong ol Jentael, yes, go krosem plante solwota we yu bin luk wetem ol Jentael we oli bin go aot long kalabus, yu luk—from plante samting ia we i klia mo gudgudfala we oli bin tekemaot long buk ia, we oli bin isi blong ol pikinini blong ol man blong andastanem, folem klia fasin we i stap long Smol Sipsip blong God—from ol samting ia we oli

tekemaot long gospel blong Smol Sipsip, wan bigfala namba blong ol pipol i foldaon, yes, inaf blong mekem se Setan i gat bigfala paoa ova long olgeta.

30 Be, yu luk we ol Jentael we i bin go aot long kalabus, mo oli bin kam antap tru long paoa blong God ova long evri narafala kantri, long fes blong graon we i gud tumas bitim ol narafala graon, we i graon we Lod God i bin mekem kavenan wetem papa blong yu se ol laen blong hem i mas gat graon ia blong olgeta we oli kasem long papa; from samting ia, yu luk we Lod God bae i no letem se ol Jentael bae i smasem gud evriwan, olgeta blong laen blong yu we oli bin miks, we oli stap long medel blong ol brata blong yu.

31 Mo tu bae hem i no letem se ol Jentael bae i smasem ol pikinini blong ol brata blong yu.

32 Mo tu Lod God bae i no letem se ol Jentael bae i stap oltaem long nogud ples blong blaen, we yu luk oli stap long hem, from ol klia mo ol gudgudfala pat blong gospel blong Smol Sipsip we rabis jos ia i bin holem bak, we yu bin luk taem we hem i stat.

33 From samting ia Smol Sipsip blong God i talem: Bae mi gat sore long ol Jentael, taem we mi panisim smol haf nomo blong laen blong Isrel wetem panis we i strong tumas.

34 Mo i bin hapen se enjel blong Lod i bin toktok long mi, i se: Luk, Smol Sipsip blong God i talem, afta we mi bin visitim

smol haf we i stap yet blong laen blong Isrel—mo smol haf ia we i stap yet we mi tokbaot, oli ol laen blong papa blong yu— from samting ia, afta mi bin panisim olgeta wetem jajmen, mo mi bin kilim olgeta tru long han blong ol Jentael, mo afta ol Jentael i foldaon tumas, from we ol samting ia we oli klia mo gudgudfala blong gospel blong Smol Sipsip we rabis jos ia i bin holem bak olgeta, we i mama blong ol woman blong rod, Smol Sipsip i talem—bae mi gat sore long ol Jentael long dei ia, inaf blong mekem se bae mi karem i kam long olgeta, wetem paoa blong miwan, plante long gospel blong mi, we bae i klia mo gudgudfala, Smol Sipsip i talem.

35 From, luk, Smol Sipsip i talem: Bae mi soemaot miwan long ol laen blong yu, blong oli raetem plante samting we bae mi mas tijim long olgeta, we bae oli klia mo gudgudfala; mo afta ol laen blong yu bae oli ded, mo i kam slak from oli lusum bilif, mo tu ol laen blong ol brata blong yu, luk, ol samting ia bae mi haedem, blong i kam aot i go long ol Jentael, tru long presen mo paoa blong Smol Sipsip.

36 Mo long ol samting ia bae oli raetem gospel blong mi, Smol Sipsip i talem, mo ston blong mi mo fasin blong sevem man blong mi.

37 Mo bae mi blesem olgeta we oli lukaotem blong karem i kam Saeon blong mi long dei ia, from bae oli gat presen mo paoa blong Tabu Spirit; mo sapos

oli stap strong kasem en, bae God i leftemap olgeta long las dei, mo bae olgeta i sev long kingdom blong Smol Sipsip we i no gat en; mo eni man we i talemaot pis, yes, nius we i karem bigfala glad i kam, hamas naes nao, long ol bigfala hil, bae oli stap.

38 Mo i bin hapen se mi bin luk smol haf we i stap yet blong ol laen blong ol brata blong mi, mo tu buk blong Smol Sipsip blong God, we i bin kam aot long maot blong Jiu, we i bin kam aot long ol Jentael mo long samfala we oli stap yet blong ol pikinini blong ol brata blong mi.

39 Mo afta we i bin kam fored long olgeta, mi bin luk sam narafala buk we i bin kam tru long paoa blong Smol Sipsip long ol Jentael i go long olgeta, blong mekem ol Jentael mo smol haf we i stap yet blong ol laen blong ol brata blong mi, mo tu ol Jiu we i bin seraot olbaot long ful fes blong wol, blong ol histri blong ol profet mo blong ol twelef aposol blong Smol Sipsip i tru.

40 Mo enjel i bin toktok long mi, i se: Ol lasfala histri ia, we yu bin luk long medel blong ol Jentael, bae oli witnes long saed blong trutok blong faswan, we i blong ol twelef aposol blong Smol Sipsip, mo bae i soem ol samting we i klia mo gudgudfala we oli bin tekemaot long faswan; mo bae i soem long evri famle, lanwis, mo pipol se Smol Sipsip blong God i Pikinini blong Papa we i no Save Finis, mo Sevya blong wol; mo we



evri man i mas kam long hem, o oli no save sev.

41 Mo oli mas kam folem ol toktok we bae i stanap tru long maot blong Smol Sipsip; mo ol toktok blong Smol Sipsip bae oli soemaot long ol histri blong laen blong yu, mo tu long ol histri blong ol twelef aposol blong Smol Sipsip; from samting ia, tufala tugeta i mas stanap long wan; from i gat wan God mo wan Man blong Lukaot long Sipsip ova long ful wol.

42 Mo taem i kam we hem i mas soemaot hemwan long evri kantri, long ol Jiu tugeta wetem ol Jentael tu; mo afta hem i bin soemaot hemwan long ol Jiu mo tu long ol Jentael, afta bae hem i soemaot hemwan long ol Jentael mo tu long ol Jiu, mo laswan bae i faswan mo faswan bae i laswan.

---

#### JAPTA 14

---

*Wan enjel i talem long Nifae long saed blong ol blesing mo ol panis we bae i kam long ol Jentael—I gat tu jos nomo: Jos blong Smol Sipsip blong God, mo jos blong devel—Ol Sent blong God long evri kantri i kasem hadtaem tru long bigfala mo rabis jos ia—Aposol Jon bae i raetem ol samting long saed blong en blong wol. Raonabaot 600–592 yia bifo Kraes i bon.*

Mo bae i kam blong hapen se, sapos ol Jentael i lisin long Smol Sipsip blong God long dei ia we bae hem i soemaot hemwan long olgeta tru long toktok, mo tu long paoa, tru long ol

samting we hem i mekem, kasem taem we hem i karemaot ol samting we i stap mekem olgeta i foldaon—

2 Mo oli no mekem ol hat blong olgeta i kam strong agensem Smol Sipsip blong God, bae oli kaontem olgeta wetem ol laen blong papa blong yu; yes, bae oli kaontem olgeta wetem laen blong Isrel; mo bae oli kasem blesing long promes graon blong oltaem; bae oli nomo go daon long kalabus; mo laen blong Isrel bae i nomo save miks wetem ol narafala pipol.

3 Mo bigfala hol, we bigfala mo rabis jos ia i bin digim blong olgeta ia, we devel i bin statem wetem ol pikinini blong hem, blong hem i save lidim i gowe ol sol blong ol man i go daon long hel—yes, bigfala hol ia we oli bin digim blong smasem gud ol man, bae i fulap wetem olgeta ia we oli digim hol ia, kasem smas gud blong olgeta, Smol Sipsip blong God i talem; i no smas gud blong sol, be i blong sakem hem long hel ia we i no gat en.

4 From luk, samting ia i folem fasin blong devel blong holem taet man, mo tu folem jastis blong God, long olgeta we bae oli mekem ol fasin nogud mo ol rabis sin long fored blong hem.

5 Mo i bin hapen se enjel i bin toktok long mi, Nifae, i se: Yu bin luk we sapos ol Jentael i sakem sin, bae i oraet wetem olgeta; mo yu save tu long saed blong ol kavenan blong Lod we hem i mekem wetem laen blong Isrel; mo yu bin harem tu

we olgeta we i no sakem sin i mas ded.

6 Taswe, sore tumas long ol Jentael sapos i olsem we oli mekem ol hat blong olgeta i kam strong agensem Smol Sipsip blong God.

7 From taem i kam, Smol Sipsip blong God i talem, se bae mi mekem wan bigfala mo gudfala wok long medel blong ol pikinini blong ol man; wan wok we bae i no save en, long wan han o long narafala wan—samting ia bae i winim tingting blong olgeta long pis mo laef we i no save finis, o blong givim olgeta long strong hat blong olgeta mo ol tingting blong olgeta we i blaen olgeta, kasem we oli karem olgeta i go daon long kalabus, mo tu smasem gud olgeta, long saed blong bodi mo tu long spirit, folem fasin blong devel blong holem taet man, we mi bin tokbaot.

8 Mo i bin hapen se taem we enjel i bin talemaot ol toktok ia, hem i bin talem long mi: Yu tingbaot ol kavenan blong Papa we hem i bin mekem wetem laen blong Isrel? Mi bin talem long hem, Yes.

9 Mo i bin hapen se hem i bin talem long mi: Luk, mo lukim bigfala mo rabis jos ia, we i mama blong ol rabis sin, we devel i bin statem.

10 Mo hem i bin talem long mi: Luk, i gat tu jos nomo: wan i Jos blong Smol Sipsip blong God, mo narafala wan i jos blong devel; from samting ia, eni man we i no blong jos blong Smol Sipsip blong God, i blong

bigfala jos ia, we i mama blong ol rabis samting; mo hem i woman blong rod blong ful wol.

11 Mo i bin hapen se mi bin luk mo mi bin lukim woman blong rod blong ful wol, mo hem i bin sidaon long plante solwota; mo hem i bin gat paoa ova long ful wol, long medel blong evri kantri, famle, lanwis, mo pipol.

12 Mo i bin hapen se mi bin luk Jos blong Smol Sipsip blong God, mo ol namba blong hem i bin smol nomo, from ol fasin nogud mo ol rabis sin blong woman blong rod ia, we i bin sidaon long plante solwota; be, mi bin luk se Jos blong Smol Sipsip, we oli ol sent blong God, i bin stap tu long ful fes blong wol; mo ol samting we oli bin rulum long fes blong wol i bin smol, from ol fasin nogud blong bigfala woman blong rod we mi bin luk.

13 Mo i bin hapen se mi bin luk we bigfala mama blong ol rabis sin i bin karem i kam tugeta plante grup blong ol pipol long fes blong ful wol, long medel blong ol kantri blong ol Jentael, blong faet agensem Smol Sipsip blong God.

14 Mo i bin hapen se mi, Nifae, mi bin luk paoa blong Smol Sipsip blong God, we i bin kamdaon long ol sent blong Jos blong Smol Sipsip, mo long ol kavenan pipol blong Lod, we i bin seraot olbaot long ful fes blong wol; mo oli blokem olgeta wetem stret fasin mo paoa blong God long bigfala glori.

15 Mo i bin hapen se mi bin

luk we kros blong God hem i bin porem daon long bigfala mo rabis jos ia, inaf, we i mekem se i bin gat ol faet mo ol nius blong ol faet long evri kantri mo famle blong wol.

16 Mo taem we i bin stat blong gat ol faet mo ol nius blong ol faet long medel blong evri kantri we i bin blong mama blong ol rabis sin, enjel i bin toktok long mi, i se: Luk, kros blong God i stap long mama blong ol woman blong rod; mo luk, yu stap luk evri samting ia —

17 Mo taem we dei i kam we kros blong God hem i poremaot long mama blong ol woman blong rod, we i bigfala mo rabis jos ia blong ful wol, we man we i bin statem i devel, ale, long dei ia, wok blong Papa bae i stat, blong mekem rere fasin blong mekem i hapen ol kavenan blong hem, we hem i bin mekem wetem ol pipol blong hem we oli blong laen blong Isrel.

18 Mo i bin hapen se enjel i bin toktok long mi, i se: Luk!

19 Mo mi bin luk mo mi bin lukim wan man, mo hem i bin werem wan longfala waet klos.

20 Mo enjel i bin talem long mi: Luk wan long ol twelef aposol blong Smol Sipsip.

21 Luk, bae hem i luk mo raetem ol narafala pat we i stap yet blong ol samting ia, yes, mo tu plante samting we i bin hapen.

22 Mo tu bae hem i raetem long saed blong en blong wol.

23 From samting ia, evri samting we bae hem i raetem, oli stret mo tru; mo luk, oli bin raetem ol samting ia long buk

we yu bin luk i kam aot long maot long Jiu; mo long taem we oli bin kam aot long maot blong Jiu, o, long taem we buk ia i bin kam aot long maot blong Jiu, ol samting we oli bin raetem oli klia mo tru, mo gudgudfala mo i isi blong evri man i andastanem.

24 Mo luk, ol samting we aposol ia blong Smol Sipsip bae i raetem, oli plante samting we yu bin luk; mo luk, ol narafala pat bae yu lukim.

25 Be ol samting we bae yu luk stat long naomia i go, bae yu no mas raetendaon; from Lod God i bin odenem aposol blong Smol Sipsip blong God blong hem i mas raetendaon ol samting ia.

26 Mo tu sam narafala wan we i bin laef bifo, long olgeta hem i bin soem evri samting, mo oli bin raetendaon olgeta; mo ol samting ia, oli bin lokem olgeta blong kam aot long fasin we i tru blong olgeta, folem trutok we i stap long Smol Sipsip, long wan taem we Lod i jusum, long laen blong Isrel.

27 Mo mi, Nifae, mi bin harem mo talemaot se, nem blong aposol blong Smol Sipsip i bin Jon, folem toktok blong enjel.

28 Mo luk, mi, Nifae, oli blokem mi se mi no mas raetendaon haf blong ol samting we i stap yet we mi bin luk mo mi bin harem; from samting ia ol samting we mi bin raetem oli inaf long mi, mo mi bin raetendaon be wan smol pat nomo blong ol samting we mi bin luk.

29 Mo mi talemaot we mi bin luk ol samting we papa blong

mi i bin luk, mo enjel blong Lod i bin soem ol samting ia long mi.

30 Mo nao, mi stop blong toktok long saed blong ol samting we mi bin luk taem we spirit i bin karem mi i go longwe. Mo sapos evri samting we mi bin luk mi no bin raetem, ol samting we mi bin raetem i tru. Mo i olsem ia nao. Amen.

---

### JAPTA 15

---

*Ol laen blong Lihae bae oli kasem gospel long ol Jentael long ol lata-dei—Kam tugeta blong Isrel i olsem wan olif tri we ol stret branj blong hem bae oli joenem olgeta bakegen long olif tri ia—Nifae i givim mining blong visen blong tri blong laef mo i tokbaot jastis blong God, taem we hem i divaedem ol man nogud aot long olgeta we i stret. Raonabaot 600–592 yia bifo Kraes i bon.*

Mo i bin hapen se afta mi, Nifae, spirit i bin karem mi i go longwe, mo mi bin lukim ol samting ia, mi bin go bak long tenet blong papa blong mi.

2 Mo i bin hapen se mi bin luk ol brata blong mi, mo oli bin stap rao wan wetem narawan long saed blong ol samting we papa blong mi i bin talem long olgeta.

3 From i tru we hem i bin talem plante bigfala samting long olgeta, we i bin had blong andastanem, hemia nomo sapos wan man i no askem Lod; mo from ol hat blong olgeta i strong, taswe oli no bin lukluk long Lod olsem we oli sud mekem.

4 Mo nao mi, Nifae, mi bin harem nogud from ol hat blong olgeta i strong, mo tu, from ol samting we mi bin lukim, mo mi bin save se oli mas kam blong hapen, from ol bigfala fasin nogud blong ol pikinini blong ol man.

5 Mo i bin hapen se ol hadtaem blong mi i bin mekem mi mi slak, from mi bin ting se ol hadtaem blong mi i bin bigwan bitim evriwan, from ol pipol blong mi i bin foldaon, from mi bin luk foldaon blong olgeta.

6 Mo i bin hapen se afta we mi bin kasem paoa mi bin toktok long ol brata blong mi, mi bin wantem save long olgeta wanem i stamba tingting blong rao blong olgeta.

7 Mo oli bin talem: Luk, mifala i no save andastanem ol toktok we papa blong yumi i bin talem-aot long saed blong ol stret branj blong olif tri, mo tu long saed blong ol Jentael.

8 Mo mi bin talem long olgeta: Yufala i bin askem Lod?

9 Mo oli bin talem long mi: Mifala i no bin askem Lod; from Lod i no mekem mifala i save long saed blong eni samting olsem.

10 Luk, mi bin talem long olgeta: Hao nao yufala i no holem ol komanmen blong Lod? Hao nao yufala i wantem ded, from ol hat blong yufala i strong?

11 Yufala i no tingbaot ol samting we Lod i bin talemaot?—Sapos yufala i no mekem ol hat blong yufala i kam strong, mo askem mi wetem fet, bilivim se bae yufala i kasem, mo wok

had oltaem blong holem ol komanmen blong mi, i tru we ol samting ia bae oli mas kam long yufala.

12 Luk, mi talem long yufala, se laen blong Isrel oli bin skelem olsem wan olif tri, tru long Spirit blong Lod we i bin stap long papa blong yumi; mo luk, yumi no bin kamaot long laen blong Isrel, mo yumi no wan branj blong laen blong Isrel?

13 Mo nao, samting we papa blong yumi i minim long saed blong ol stret branj we oli joenem insaed long tri ia, i long taem blong fulwan blong ol Jentael, hem i long ol lata-dei, taem we bae ol laen blong yumi i bin kam slak from oli lusum bilif, yes, blong spes blong plante yia, mo plante jeneresen afta we Mesaea bae i soemaot hem long bodi long ol pikinini blong ol man, afta bae gospel we i fulwan blong Mesaea bae i kam long ol Jentael, mo long ol Jentael i go long smol haf we i stap yet blong ol laen blong yumi—

14 Mo long dei ia bae smol haf we i stap yet blong ol laen blong yumi bae oli save se oli blong laen blong Isrel, mo we oli ol kavenan pipol blong Lod; mo afta bae oli save mo kam blong save long saed blong ol bubu blong olgeta, mo tu oli kam blong save long saed blong gospel blong Ridima blong olgeta, we hem i bin givhan long ol bubu blong olgeta; from samting ia, bae oli kam blong save Ridima blong olgeta, mo ol impoten pat blong doktrin

blong hem, blong oli save gat save olsem wanem blong kam long hem mo sev.

15 Mo afta long dei ia bae oli no glad, mo presem God blong olgeta, we i no gat en, ston blong olgeta, mo fasin blong sevem man blong olgeta? Yes, long dei ia, bae oli no kasem paoa mo gudfala kakae long prapa rop? Yes, bae oli no kam long tru yad blong God?

16 Luk, mi talem long yufala, Yes; Lod bae i tingbaot olgeta bakegen long medel blong ol laen blong Isrel; Lod bae i joenem olgeta, from oli ol stret branj blong olif tri, long tru olif tri.

17 Mo hemia i wanem we papa blong yumi i minim; mo hem i minim se samting ia bae i no kam blong hapen kasem taem afta ol Jentael i mekem olgeta i seraot olbaot; mo hem i minim se bae i hapen tru long ol Jentael, blong Lod i save soemaot paoa blong hem long ol Jentael, from stamba tingting we ol Jiu, o ol laen blong Isrel, bae oli sakemaot hem.

18 From samting ia, papa blong yumi i no bin tokbaot ol pikinini blong yumi nomo, be tu long saed blong ol laen blong Isrel, hem i talemaot ol kavenan we bae oli hapen long lata-dei; we kavenan we Lod i bin mekem wetem papa blong yumi Ebrahim, i se: Long laen blong yu bae evri famle blong wol bae i kasem blesing.

19 Mo i bin hapen se mi, Nifae, mi bin talem plante long olgeta long saed blong ol samting ia; yes, mi bin toktok

long olgeta long saed blong taem we ol Jiu bae oli kambak long ol lata-dei.

20 Mo mi bin talem wan moa taem long olgeta ol toktok blong Aesea, we i bin tokbaot taem we ol Jiu bae oli kambak, o long saed blong laen blong Isrel; mo afta we oli bin kambak bae oli nomo save miks, mo tu bae oli nomo seraot olbaot bakegen. Mo i bin hapen se mi bin talem plante toktok long ol brata blong mi, blong mekem se oli bin kwaet mo oli bin putum tingting blong olgeta i stapdaon long fored blong Lod.

21 Mo i bin hapen se oli bin toktok long mi bakegen, oli se: Wanem mining blong samting ia we papa blong yumi i bin luk long wan drim? Wanem mining blong tri we hem i bin luk?

22 Mo mi bin talem long olgeta: Hemia i bin wan eksampol blong tri blong laef.

23 Mo oli bin talem long mi: Wanem mining blong rel blong aean we papa blong yumi i bin luk, we i bin go long tri?

24 Mo mi bin talem long olgeta se i bin toktok blong God, mo eni man we bae i lisiin long toktok blong God, mo bae i holem taet long hem, bae oli no save lus; mo tu ol temtesen mo ol spia blong devel, we i gat faea long hem, i no save winim olgeta kasem taem we oli kam blaen, blong lidim olgeta i gowe blong lus.

25 From samting ia, mi, Nifae, mi bin askem strong long olgeta blong folem gud long toktok blong Lod; yes, mi bin askem

strong long olgeta wetem evri paoa blong sol blong mi, mo wetem evri paoa we mi bin gat, blong oli mas folem gud long toktok blong God, mo tingbaot blong holem ol komanmen blong hem evri taem long evri samting.

26 Mo oli bin talem long mi: Wanem mining blong reva blong wota we papa blong yumi i bin luk?

27 Mo mi bin talem long olgeta se ol wota we papa blong mi i bin luk, hem i doti tumas; mo from papa blong yumi i bin bisi tumas blong tingbaot ol narafala samting, hem i no bin luk bigfala doti blong wota.

28 Mo mi bin talem long olgeta se i bin wan rabis hol, we i bin divaedem ol man nogud long tri blong laef, mo tu long ol sent blong God.

29 Mo mi bin talem long olgeta se i wan eksampol blong rabis hel ia, we enjel i bin talem long mi se i rere blong ol man nogud.

30 Mo mi bin talem long olgeta se papa blong mifala i bin luk tu se jastis blong God i bin divaedem tu ol man nogud long olgeta we i stret; mo bigfala laet blong hem i bin olsem bigfala laet blong wan faea, we i stap laet, we i go antap long God blong oltaem mo oltaem, mo i no gat en.

31 Mo oli bin talem long mi: Samting ia i minim ol safa blong bodi long ol dei blong tes, o hem i minim las ples blong sol afta ded blong bodi blong wol, o hem i tokbaot ol samting we i blong wol?

32 Mo i bin hapen se mi bin talem long olgeta se hemia i bin wan eksampol blong evri samting blong wol tugeta wetem spirit, from dei bae i kam we oli mas kasem jajmen long ol wok blong olgeta, yes, ol wok we oli bin mekem wetem bodi blong wol long ol dei blong olgeta blong tes.

33 From samting ia, sapos oli ded wetem nogud fasin blong olgeta, bae Lod i mas sakemaot olgeta tu, long saed blong ol samting we i blong spirit, we oli blong saed blong stret fasin; from samting ia, Lod i mas karem olgeta blong stanap long fes blong God, blong kasem jajmen blong ol wok blong olgeta; mo sapos ol wok blong olgeta i bin doti, oli mas stap doti; mo sapos oli doti, i mas nid se oli no save stap long kingdom blong God; sapos i olsem, kingdom blong God i mas stap doti tu.

34 Be luk, mi talem long yu, kingdom blong God i no doti, mo i no save gat wan samting we i no klin i save go insaed long kingdom blong God; from samting ia, i mas gat wan ples blong ol samting we i doti we i rere blong ol samting we i doti.

35 Mo i gat wan ples we i rere, yes, hem i rabis hel ia we mi bin tokbaot, mo devel i man we i mekem rere ples ia; from samting ia, las ples blong ol sol blong ol man, i blong stap long kingdom blong God, o Lod i mas sakemaot olgeta from jastis ia we mi bin tokbaot.

36 From samting ia, Lod i mas sakemaot ol man nogud long

olgeta we i stret, mo tu long tri ia blong laef, we frut blong hem i moa gudgudfala mo ol man i wantem moa bitim ol narafala frut; yes, mo hem i nambawan presen long evri presen blong God. Mo olsem ia nao mi bin toktok long ol brata blong mi. Amen.

---

## JAPTA 16

---

*Ol man nogud i ting se trutok i had tumas—Ol boe blong Lihae i mared wetem ol gel blong Ismael—Liahona i lidim trip blong olgeta long ples we i no gat man long hem—Ol mesej long Lod i kamaot long Liahona wanwan taem—Ismael i ded; famle blong hem i komplem from ol hadtaem. Raonabaot 600–592 yia bifo Kraes i bon.*

Mo nao i bin hapen se afta mi, Nifae, mi bin mekem wan en blong toktok long ol brata blong mi, luk tufala i bin talem long mi: Yu bin talem long mifala plante strong samting, moa bitim wanem mifala i save tekem.

2 Mo i bin hapen se mi bin talem long tufala se mi bin save se mi bin talem ol strong samting agensem ol man nogud, folem trutok; mo olgeta we i stret mi bin mekem olgeta i stret, mo mi bin testifae se bae God i leftemap olgeta long las dei; from samting ia, olgeta man we i gat rong i ting se trutok i strong tumas, from i katem olgeta i go stret long medel.

3 Mo nao tufala brata blong mi, sapos yutufala i bin stret

mo bin wantem blong harem trutok, mo folem gud long hem, blong mekem se yutufala i save wokbaot stret long fored blong God, ale bae yutufala i no save toktok nogud from trutok ia, mo se: Yu talem plante strong samting agensem mifala.

4 Mo i bin hapen se mi, Nifae, mi bin askem strong long tufala brata blong mi, wetem had wok oltaem, blong holem ol komanmen blong Lod.

5 Mo i bin hapen se tufala i bin putum tingting blong tufala i stapdaon long fored blong Lod; inaf blong mekem se mi bin gat glad mo ol bigfala hop from tufala, se bae tufala i wokbaot long ol rod blong stret fasin.

6 Nao, mifala i bin talem mo mekem evri samting ia long taem we papa blong mi i bin stap long wan tenet long vale we hem i bin singaotem Lemyul.

7 Mo i bin hapen se mi, Nifae, mi bin tekem wan long ol gel blong Ismael blong stap olsem woman blong mi, mo tu ol brata blong mi i bin tekem ol narafala gel blong Ismael olsem ol woman blong olgeta; mo tu Soram i bin tekem fasbon gel blong Ismael olsem woman blong hem.

8 Mo olsem ia nao papa blong mi i bin mekem evri komanmen blong Lod i hapen we hem i bin givim long hem. Mo tu, mi, Nifae, mi bin kasem plante blesing tumas long Lod.

9 Mo i bin hapen se voes blong Lod i bin toktok long papa blong mi long naet, mo i bin givim oda long hem se long nekis dei,

hem i mas wokbaot long ples we i no gat man long hem.

10 Mo i bin hapen se taem we papa blong mi i bin girap long moning, mo i bin go aot long do blong tenet, long bigfala sapraes blong hem hem i bin luk long graon wan bol we fasin blong wok blong hem i bin defren tumas; mo oli bin mekem wetem naes bras. Mo insaed long bol i bin gat tufala samting olsem nidel; mo wan i bin poenem wei, we mifala i mas go long ples we i no gat man long hem.

11 Mo i bin hapen se mifala i bin karem i kam tugeta eni samting we mifala i mas karem i go long ples we i no gat man long hem, mo evri kakae blong mifala we i stap yet we Lod i bin givim long mifala; mo mifala i bin karem sid blong evri kaen blong mifala i save karem i go long ples we i no gat man long hem.

12 Mo i bin hapen se mifala i bin karem ol tenet blong mifala mo mifala i bin aot i go long ples we i no gat man long hem, long narasaed blong reva Leman.

13 Mo i bin hapen se mifala i bin wokbaot blong spes blong fo dei, klosap long rod we i go saot-saot is, mo mifala i bin stanemap ol tenet blong mifala bakegen; mo mifala i bin singaotem nem blong ples ia Sesa.

14 Mo i bin hapen se mifala i bin karem ol bonara blong mifala mo ol ara blong mifala, mo i bin go aot long ples we i no gat man long hem blong kilim kakae blong ol famle



blong mifala; mo afta we mifala i bin kilim ol kakae blong ol famle blong mifala, mifala i bin gobak bakegen long ol famle blong mifala long ples we i no gat man long hem, long ples blong Sesa. Mo mifala i bin go aot bakegen long ples we i no gat man long hem, folem sem wei, mifala i stap wokbaot long gudfala graon long ples we i no gat man long hem, we i bin stap long ol boda klosap long Red Si.

15 Mo i bin hapen se mifala i bin wokbaot blong spes blong plante dei, mifala i stap kilim kakae long rod wetem ol bonara blong mifala mo ol ara blong mifala, mo ol ston blong mifala mo ol sling blong mifala.

16 Mo mifala i bin folem ol rod blong bol we i bin lidim mifala i go long ol gudfala pat blong ples we i no gat man long hem.

17 Mo afta we mifala i bin wokbaot blong spes blong plante dei, mifala i bin stanemap ol tenet blong mifala blong spes blong smol taem blong mekem se mifala i save spel smol mo kasem kakae blong ol famle blong mifala.

18 Mo i bin hapen se taem we mi, Nifae, mi bin go aot blong kilim kakae, luk, mi bin brekem bonara blong mi, we oli bin mekem wetem gudfala stil; mo afta we mi bin brekem bonara blong mi, luk, ol brata blong mi i bin kros long mi, from mifala i bin lusum bonara blong mi, from mifala i no bin kasem eni kakae.

19 Mo i bin hapen se mifala i bin gobak wetem no kakae long

ol famle blong mifala, mo from oli taed tumas from wokbaot blong olgeta, oli bin safa plante from oli nidim kakae.

20 Mo i bin hapen se Lemana mo Lemyul mo ol boe blong Ismael, i bin stat blong komplem tumas, from ol harem nogud blong olgeta mo ol hadtaem long ples we i no gat man long hem; mo tu papa blong mi i bin stat blong komplem agensem Lod, God blong hem; yes, mo olgeta evriwan i bin sore tumas, mekem se oli bin komplem agensem Lod.

21 Mo i bin hapen se mi, Nifae, from mi bin kasem hadtaem wetem ol brata blong mi from mi bin brekem bonara blong mi, mo ol bonara blong olgeta i bin brok tu, from ol spring blong olgeta i lus, i bin stat blong kam had tumas, yes, inaf, we i mekem se mifala i no save kasem eni kakae.

22 Mo i bin hapen se mi, Nifae, mi bin toktok plante long ol brata blong mi, from oli bin mekem ol hat blong olgeta i kam strong bakegen, kasem taem we oli komplem agensem Lod, God blong olgeta.

23 Mo i bin hapen se mi, Nifae, mi bin mekem aot long wud wan bonara, mo aot long wan stik we i stret, wan ara; From samting ia, mi bin mekem rere miwan wetem wan bonara mo wetem wan ara, wetem wan sling mo sam ston. Mo mi bin talem long papa blong mi: Wanem ples bae mi go blong kasem kakae?

24 Mo i bin hapen se hem i bin

askem Lod, from oli bin putum tingting blong olgeta i stapdaon from ol toktok blong mi; from mi bin talemaot plante samting long olgeta taem we mi bin harem strong insaed long sol blong mi.

25 Mo i bin hapen se voes blong Lod i bin kam long papa blong mi; mo i bin tok strong long papa blong mi, from hem i bin komplem agensem Lod, inaf, we i mekem se hem i kam daon long ol dip ples blong sore.

26 Mo i bin hapen se voes blong Lod i bin talem long hem: Luk long bol, mo lukim ol raeting we i stap.

27 Mo i bin hapen se taem we papa blong mi i bin luk ol samting we i bin raetem long bol, hem i bin fraet mo seksek tumas, mo tu ol brata blong mi mo ol boe blong Ismael mo ol woman blong mifala.

28 Mo i bin hapen se mi, Nifae, mi bin luk tufala samting olsem nidel we i bin stap insaed long bol, we oli bin wok folem fet mo had wok mo fasin blong folem gud we mifala i bin mekem long olgeta.

29 Mo tu i bin gat long olgeta wan niufala raeting, we i bin kliia gud blong ridim, we i bin givim save long mifala long saed blong ol fasin blong Lod; mo raeting ia Lod i bin raetem mo jenisim wanwan taem, folem fet mo had wok we mifala i bin givim long hem. Mo olsem ia nao yumi luk we tru long ol smol wei Lod i save mekem plante bigfala samting i hapen.

30 Mo i bin hapen se mi, Nifae,

mi bin go aot antap long bigfala hil, folem wei we i bin stap long bol.

31 Mo i bin hapen se mi bin kilim ded ol wael anamol, inaf blong mekem se mi bin kasem kakae blong ol famle blong mifala.

32 Mo i bin hapen se mi bin gobak long ol tenet blong mifala, mi stap karem ol anamol we mi bin kilim ded; mo nao taem we oli bin luk we mi bin kasem kakae, hamas nao bigfala glad blong olgeta! Mo i bin hapen se oli bin putum tingting blong olgeta bakegen i stap daon long fored blong Lod, mo oli bin talem tangkyu long hem.

33 Mo i bin hapen se mifala i bin tekem wokbaot blong mifala bakegen, mifala i stap wokbaot klosap long sem rod olsem long stat; mo afta we mifala i bin wokbaot blong wan spes blong plante dei mifala i bin stanemap ol tenet blong mifala bakegen, blong mekem se mifala i save stap blong wan spes blong wan taem.

34 Mo i bin hapen se Ismael i bin ded, mo mifala i bin berem hem long ples we oli bin singaotem Nehom.

35 Mo i bin hapen se ol gel blong Ismael i bin krae tumas, from oli bin lusum papa blong olgeta, mo from ol hadtaem blong olgeta long ples we i no gat man long hem; mo oli bin komplem agensem papa blong mi, from hem i bin karem olgeta aot long graon blong Jerusalem, oli se: Papa blong mifala i ded; yes, mo mifala i bin wokbaot

olbaot plante long ples we i no gat man long hem, mo mifala i bin safa long plante hadtaem, hanggri, tosta, mo taed; mo afta ol safa ia, mifala i mas ded long ples we i no gat man long hem, wetem hanggri.

36 Mo olsem ia nao oli bin komplek agensem papa blong mi, mo tu agensem mi; mo oli bin wantem blong gobak long Jerusalem.

37 Mo Leman i bin talem long Lemyul mo tu long ol boe blong Ismael: Luk, bae yumi kilim ded papa blong yumi, mo tu brata blong yumi Nifae, we hem i bin mekem hemwan i kam man blong rul blong yumi mo tija blong yumi, we yumi ol bigfala brata blong hem.

38 Nao, hem i talem se Lod i bin toktok wetem hem, mo tu se ol enjel i bin givhan long hem. Be luk, yumi save se hem i stap giaman long yumi; mo hem i talem yumi ol samting ia, mo hem i mekem plante samting tru long fasin blong trik blong hem, blong hem i save trikim ol ae blong yumi, tingting, maet, se hem i save lidim yumi i gowe long sam defren kaen ples we i no gat man long hem; mo afta hem i bin lidim yumi i gowe, hem i bin tingting blong mekem hemwan wan king mo wan man blong rul ova long yumi, blong hem i save mekem wetem yumi folem tingting blong hem mo wanem hem i wantem. Mo tru long fasin ia brata blong mi, Leman, i bin toktok long olgeta blong mekem ol hat blong olgeta i kros.

39 Mo i bin hapen se Lod i bin stap wetem mifala, yes, voes blong Lod tu i bin kam mo talemaot plante toktok long olgeta ia, mo i bin toktok strong tumas long olgeta; mo afta voes blong Lod i bin toktok strong long olgeta, oli bin tanem kros blong olgeta i gowe, mo oli bin sakem sin blong olgeta, inaf blong mekem se Lod i bin blesem mifala bakegen wetem kakae, blong mekem se mifala i no bin ded.

---

### JAPTA 17

---

*Nifae i kasem komanmen blong bildim wan sip—Ol brata blong hem i go agensem hem—Hem i tijim strong olgeta taem we hem i talem bakegen histri blong ol wok blong God we hem i mekem wetem Isrel—Nifae i fulap wetem paoa blong God—Ol brata blong hem i no mas tajem hem, from oli fraet se bae oli drae olsem wan drae gras. Raonabaot 592–591 yia bifo Kraes i bon.*

Mo i bin hapen se mifala bakegen i bin tekem wokbaot blong mifala long ples we i no gat man long hem; mo mifala i bin wokbaot folem rod we i go klosap long is stat long taem ia i go. Mo mifala i bin wokbaot mo go tru long plante hadtaem long ples we i no gat man long hem; mo ol woman blong mifala i bin bonem ol pikinini long ples we i no gat man long hem.

2 Mo ol blesing blong Lod long mifala i bin bigwan tumas, mekem se taem we mifala i stap

laef long ol mit we i no dan long ples we i no gat man long hem, titi blong ol woman blong mifala i bin fulap gud blong ol pikinini blong olgeta, mo oli bin strong, yes, olsem ol man; mo oli bin stat blong go tru long ol wokbaot blong olgeta mo no komplem.

3 Mo olsem ia nao yumi luk we ol komanmen blong God i mas hapen. Mo sapos i olsem se ol pikinini blong ol man i holem ol komanmen blong God, hem i givim gudfala kakae long olgeta, mo i mekem olgeta i kam strong, mo i givim ol wei, we oli save mekem samting we hem i bin talem long olgeta; from samting ia, hem i bin givim ol wei blong mifala taem we mifala i bin wokbaot olsem long ples we i no gat man long hem.

4 Mo mifala i bin wokbaot olsem blong spes blong plante yia, yes, hem i eit yia long ples we i no gat man long hem.

5 Mo mifala i bin kam long graon we mifala i bin singaotem Plante, from plante frut blong hem, mo wael hani; mo evri samting ia i bin rere tru long Lod blong mekem se mifala i no save ded. Mo mifala i bin luk solwota we mifala i bin singaotem Iriantum, we, long lanwis ia, i minim plante wota.

6 Mo i bin hapen se mifala i bin stanemap ol tenet blong mifala long saed blong so blong solwota; mo i nomata we mifala i bin safa plante hadtaem mo plante strong samting, yes, tumas we mifala i no save raetem evriwan, mifala i bin hapi tumas

taem we mifala i bin kam long so blong solwota; mo mifala i bin singaotem ples ia Plante, from plante frut blong hem.

7 Mo i bin hapen se afta mi, Nifae, mi bin stap long graon blong Plante blong spes blong plante dei, voes blong Lod i bin kam long mi, i se: Girap, mo yu go antap long bigfala hil. Mo i bin hapen se mi bin girap mo mi bin go antap long bigfala hil ia, mo mi bin prea long Lod.

8 Mo i bin hapen se Lod i bin toktok long mi, i se: Yu mas bildim wan sip, folem fasin we bae mi soem yu, blong mi save karem ol pipol blong yu i go krosem ol solwota ia.

9 Mo mi bin talem: Lod, bae mi go wea blong faenem ston blong aean blong meltem, blong mi save mekem ol tul blong bildim sip ia folem fasin we yu bin soem long mi?

10 Mo i bin hapen se Lod i bin talem mi wea ples mi mas go blong faenem ston blong aean, blong mi save mekem ol tul.

11 Mo i bin hapen se mi, Nifae, mi bin tekem wan skin blong anamol mo mi bin mekem wan samting blong flu long faea, afta mi bin mekem samting ia, mi bin kilkilim tufala ston tugeta blong mi save mekem faea.

12 From bifo i kam kasem naoia, Lod i no bin mekem se mifala i mas mekem faea, taem we mifala i bin wokbaot long ples we i no gat man long hem; from hem i bin talem: Bae mi mekem ol kakae blong yufala i kam swit, blong mekem se yufala i no kukum;

13 Mo tu bae mi stap olsem laet blong yufala long ples we i no gat man long hem, mo bae mi mekem rere rod bifo long yufala, sapos i olsem se yufala i holem ol komanmen blong mi; from samting ia, i semak olsem we bae yufala i holem ol komanmen blong mi, bae mi lidim yufala i go long promes graon; mo bae yufala i save se i tru long mi, we mi lidim yufala.

14 Yes, mo Lod i bin talem tu se: Afta yufala i bin kasem promes graon, bae yufala i save se mi, Lod, mi God; mo se mi, Lod, mi bin mekem yufala i go fri long saed blong spolem gud; yes, we mi bin karem yufala aot long graon blong Jerusalem.

15 From samting ia, mi, Nifae, mi bin traе had blong holem ol komanmen blong Lod, mo mi bin talem strong long olgeta brata blong mi se oli mas yusum fet mo wok had oltaem.

16 Mo i bin hapen se mi bin mekem ol tul long ston blong aean we mi bin meltem aot long ston.

17 Mo taem we ol brata blong mi i bin luk se mi stap rere blong bildim wan sip, oli bin stat blong komplen agensem mi, oli se: Brata blong yumi i krangke, from hem i ting se hem i save bildim wan sip; yes, mo tu hem i ting se hem i save krosem ol bigfala solwota ia.

18 Mo olsem ia nao ol brata blong mi i bin komplen agensem mi, mo oli bin wantem se bae oli no wok, from oli no bin biliv se mi save bildim wan sip; mo tu bae oli no biliv se Lod i

bin talem long mi blong bildim wan sip.

19 Mo nao i bin hapen se mi, Nifae, mi bin sore tumas from ol hat blong olgeta i strong; mo nao taem we oli bin luk se mi bin stat blong filim sore, oli bin glad long ol hat blong olgeta, inaf blong mekem se oli bin glad ova long mi, oli se: Mifala i bin save se yu no save bildim wan sip, from mifala i bin save se yu no gat inaf waes; from samting ia, yu no save finisim wan bigfala wok olsem.

20 Mo yu yu olsem papa blong yumi, we hem i folem ol krangke tingting blong hat blong hem; yes, hem i bin lidim yumi aot long graon blong Jerusalem, mo yumi bin go raon long ples we i no gat man long hem, blong plante yia ia; mo ol woman blong yumi i bin wok had tumas, from oli bigfala wetem pikinini; mo oli bin bonem ol pikinini long ples we i no gat man long hem, mo oli bin safa long evri samting, be ded nomo oli no bin safa; mo bae i moa gud se oli bin ded bifo oli bin kamaot long Jerusalem, bitim we oli bin safa long ol hadtaem ia.

21 Luk, plante yia ia mifala i bin safa long ples we i no gat man long hem, we taem ia maet mifala i bin save harem gud long ol samting blong mifala mo graon blong mifala we i kam long ol papa blong mifala, yes, mo maet mifala i bin save glad.

22 Mo mifala i save se ol pipol we oli bin stap long graon blong

Jerusalem oli wan pipol we i stret; from oli bin holem ol loa mo ol jajmen blong Lod, mo evri komanmen blong hem, folem loa blong Moses; from samting ia, mifala i save se oli wan pipol we i stret; mo papa blong yumi i bin jajem olgeta, mo i bin lidim yumi i gowe from bae yumi lisin long ol toktok blong hem; yes, mo brata blong yumi i olsem hem. Mo long fasin blong toktok ia ol brata blong mi i bin komplem mo komplem agensem mifala.

23 Mo i bin hapen se mi, Nifae, mi bin toktok long olgeta, se: Yufala i biliv se ol bubu blong yumi, we oli ol pikinini blong Isrel, God bae i lidim olgeta aot long ol han blong ol man Ijip, sapos oli no bin lisin long ol toktok blong Lod?

24 Yes, yufala i ting se Lod bae i bin lidim olgeta aot long slef, sapos hem i no bin givim oda long Moses se hem i mas lidim olgeta aot long slef?

25 Nao yufala i save se ol pikinini blong Isrel i bin stap long slef; mo yufala i save se oli bin gat fulap wok, we i bin strong blong mekem; from samting ia, yufala i save se i mas nid i stap wan gud samting blong olgeta, blong bae oli kamaot long slef.

26 Nao yufala i save se Lod i bin givim oda long Moses blong mekem bigfala wok ia; mo yufala i save we tru long toktok blong hem, ol wota blong Red Si i bin seraot i go long ples ia mo long ples ia, mo oli bin pas tru long drae graon.

27 Be yufala i save se ol man Ijip i bin draon long Red Si, we oli ol ami blong King blong Ijip.

28 Mo yufala i save tu se God i bin fidim olgeta wetem mana, long ples we i no gat man long hem.

29 Yes, mo tu yufala i save we Moses, tru long toktok blong hem folem paoa blong God we i bin stap insaed long hem, hem i bin kilim ston, mo wota i bin kamaot, blong ol pikinini blong Isrel i save mekem tosta blong olgeta i gowe.

30 Mo i nomata we Lod, God blong olgeta, Ridima blong olgeta, i bin go fastaem long olgeta, i lidim olgeta long dei mo i givim laet long olgeta long naet, mo hem i mekem evri samting long olgeta we i gat nid long man blong kasem, oli bin mekem ol hat blong olgeta i kam strong, mo oli bin blaenem tingting blong olgeta, mo oli bin toktok nogud agensem Moses mo agensem God we i tru mo i stap laef.

31 Mo i bin hapen se folem toktok blong hem, hem i bin smasem gud olgeta; mo folem toktok blong hem, hem i bin lidim olgeta; mo folem toktok blong hem, hem i bin mekem evri samting long olgeta; mo i no bin gat wan samting we i bin hapen be tru long toktok blong hem nomo.

32 Mo afta we oli bin krosem reva blong Jodan, hem i bin mekem olgeta i kam strong, mekem se oli bin ronemaot ol pikinini blong graon ia, yes, mekem se oli bin seraotem

olgeta olbaot kasem taem we oli bin smasem gud olgeta.

33 Mo nao, yufala i ting se ol pikinini blong graon ia, we i bin stap long graon blong promes, we ol bubu blong yumi i bin ronemaot olgeta, yufala i ting se oli bin stret? Luk, mi talem long yufala, No.

34 Yufala i ting se ol bubu blong yumi bae God i jusum olgeta moa bitim ol pipol ia sapos ol pipol ia i bin stret? Mi talem long yufala, No.

35 Luk, Lod i ting se evri bodi blong mit mo bun i semak nomo; God i laekem man we i stret. Be luk, ol pipol ia i bin sakemaot evri toktok blong God, mo oli bin raep long sin; mo ful bigfala kros blong God i bin stap long olgeta; mo Lod i bin panisim graon agensem olgeta, mo hem i blesem graon ia long ol bubu blong yumi; yes, hem i bin panisim graon ia agensem olgeta i go blong smasem gud olgeta, mo hem i bin blesem graon ia long ol bubu blong yumi mekem se oli gat paoa ova long graon ia.

36 Luk, Lod i bin mekem wol ia blong ol man i stap long hem; mo hem i bin mekem ol pikinini blong hem blong oli stap long wol ia.

37 Mo hem i resemap wan stret kantri, mo hem i smasem gud ol kantri blong ol man nogud.

38 Mo hem i lidim i gowe olgeta we i stret i go long ol gudgudfala graon, mo ol man nogud hem i smasem gud, mo i panisim graon blong olgeta, long saed blong olgeta.

39 Hem i stap rul hae long ol heaven, from hem i jea blong hem, mo wol ia i ples we hem i putum ol leg blong hem.

40 Mo hem i lavem olgeta we oli wantem hem se hem i God blong olgeta. Luk, hem i lavem ol bubu blong yumi, mo hem i bin mekem kavenan wetem olgeta, yes, mo tu wetem Ebrahim, Aesak, mo Jakob; mo hem i bin tingbaot ol kavenan we hem i bin mekem; from samting ia, hem i bin karem olgeta aot long graon blong Ijip.

41 Mo hem i bin panisim olgeta long ples we i no gat man long hem, wetem stik blong hem; from oli bin mekem ol hat blong olgeta i kam strong, olsem we yufala i bin mekem; mo Lod i bin stretem olgeta from ol rabis sin blong olgeta. Hem i bin sendem ol snek blong faea we i save flae i kam long medel blong olgeta; mo afta ol snek i bin kakae olgeta, hem i bin mekem rere wan wei we oli save kam oraet bakegen; mo wok we oli mas mekem, i blong lukluk nomo; mo from we wei ia i no had, o i isi, i bin gat plante we i bin ded.

42 Mo oli bin mekem ol hat blong olgeta i kam strong wanwan taem, mo oli bin toktok nogud agensem Moses, mo tu agensem God; be, yufala i save se God i bin lidim olgeta tru long paoa blong hem we i bitim eni narafala paoa, i go long graon blong promes.

43 Mo nao, afta evri samting ia, taem i bin kam we oli bin kam nogud; yes, klosap oli raep;

mo mi no save, be long dei ia oli klosap blong lus; from mi save se i tru we dei ia i mas kam we oli mas lus, be smol namba nomo, we bae oli tekem olgeta i go prisena.

44 From samting ia, Lod i bin givim oda long papa blong mi se hem i mas aot i go long ples we i no gat man long hem; mo ol Jiu tu i bin lukaotem blong tekemaot laef blong hem; yes, mo yufala tu i bin lukaotem blong tekemaot laef blong hem; from samting ia, yufala i ol man blong kilim ded man long ol hat blong yufala, mo yufala i olsem olgeta.

45 Yufala i kwik blong mekem ol rabis fasin, be i slo blong tingbaot Lod, God blong yufala. Yufala i bin luk wan enjel, mo hem i bin toktok long yufala; yes, yufala i bin harem voes blong hem wanwan taem; mo hem i bin toktok long yufala long wan voes we i smol mo i kwaet, be yufala i nomo save harem wan samting long hat blong yufala, mekem se yufala i nomo save filim ol toktok blong hem; from samting ia, hem i bin toktok long yufala olsem voes blong tanda, we i bin mekem graon i seksek olsem se bae i brokbrok.

46 Mo yufala tu i save we tru long paoa blong strong toktok blong hem, hem i save mekem se wol bae i pas i gowe; yes, mo yufala i save se tru long toktok blong hem, hem i save mekem ol ples we i raf i kam smut, mo ol smut ples bae oli brokbrok. O, ale, hem i from wanem, we

yufala i save strong tumas long ol hat blong yufala?

47 Luk, sol blong mi i harem nogud wetem tingting we i hevi tumas from yufala, mo hat blong mi i soa; mi fraet se bae oli sakemaot yufala blong oltaem. Luk, mi mi fulap wetem Spirit blong God, inaf we i mekem se bodi blong mi i no gat paoa.

48 Mo nao i bin hapen se taem we mi bin talem ol toktok ia oli bin kros long mi, mo oli bin wantem blong sakem mi long ol dip ples blong solwota; mo long taem we oli bin kam fored blong putum ol han blong olgeta long mi, mi bin toktok long olgeta, se: Long nem blong God we i gat Bigfala Paoa, mi givim oda long yufala se yufala i no mas tajem mi, from mi mi fulap wetem paoa blong God, kasem we i olsem se mit blong mi i bon; mo eni man we i putum ol han blong hem long mi bae i drae aot olsem wan drae gras, mo bae hem i olsem nating long fored blong paoa blong God, from God bae i kilim hem.

49 Mo i bin hapen se mi, Nifae, mi bin talem long olgeta se oli nomo mas komplem agensem papa blong olgeta; mo tu bae oli nomo mas talem long mi se oli no wantem wok wetem mi, from God i bin givim oda long mi se mi mas bildim wan sip.

50 Mo mi bin talem long olgeta: Sapos God i bin givim oda long mi blong mekem evri samting, mi mi save mekem olgeta. Sapos bae hem i talem long mi se mi



mas talem long solwota ia, yu stap olsem graon, bae i stap olsem graon; mo sapos mi mi talem samting ia, bae i hapen.

51 Mo nao, sapos Lod i gat bigfala paoa olsem, mo i bin mekem plante merikel long medel blong ol pikinini blong ol man, hao nao hem i no save talem long mi se mi mas bildim wan sip?

52 Mo i bin hapen se mi, Nifae, mi bin talemaot plante samting long ol brata blong mi, inaf we i mekem se oli no save ansa, mo oli no save rao agensem mi; mo tu oli fraet blong putum ol han blong olgeta long mi, o tajem mi wetem ol fingga blong olgeta, go kasem wan spes blong plante dei. Nao oli bin fraet blong mekem samting ia, from oli fraet se bae oli drae aot long fored blong mi, olsem ia paoa blong Spirit blong God i bin strong; mo olsem ia nao i bin hapen long olgeta.

53 Mo i bin hapen se Lod i bin talem long mi: Strettem han blong yu long ol brata blong yu, mo bae oli no drae aot long fored blong yu, be bae mi sekem olgeta, Lod i talem, mo samting ia bae mi mekem blong oli save gat save se mi mi Lod, God blong olgeta.

54 Mo i bin hapen se mi bin strettem han blong mi long ol brata blong mi, mo oli no bin drae aot long fored blong mi; be Lod i bin sekem olgeta i folem toktok we hem i bin talem.

55 Mo nao, oli bin talem: Mifala i save tru se Lod i stap wetem yu, from mifala i save se hem i

paoa blong Lod we i bin sekem mifala. Mo oli bin foldaon long fored blong mi, mo oli bin rere blong wosipim mi, be mi no bin letem olgeta, mi se: Mi mi brata blong yufala, yes, mi mi yangfala brata blong yufala; from samting ia, wosipim Lod, God blong yufala, mo onarem papa mo mama blong yufala, blong mekem se ol dei blong yufala i save longwan long graon we bae Lod, God blong yufala, i givim long yufala.

---

### JAPTA 18

---

*Sip i finis—Oli tokbaot bon blong Jakob mo Josef—Grup i go long graon blong promes—Ol boe blong Ismael mo ol woman blong olgeta i joen tugeta long rabis lafet mo fasin blong go agens—Oli fasem Nifae, mo sip i gobak tru long wan strong hariken—Nifae i kam fri, mo tru long prea blong hem hariken ia i stop—Ol pipol i kasem promes graon. Raonabaot 591–589 yia bifo Kraes i bon.*

Mo i bin hapen se oli bin wosipim Lod, mo oli bin go fored wetem mi; mo mifala i bin wokem ol timba long fasin we i defren. Mo Lod i bin soem long mi wanwan taem wanem fasin mi mas wokem ol timba blong sip.

2 Nao mi, Nifae, mi no bin wokem ol timba ia folem fasin we oli tijim ol man, mo tu mi no bin bildim sip ia folem fasin blong ol man; be mi bin bildim hem folem fasin we Lod i bin soem long mi; from samting ia,

hem i no bin folem fasin blong ol man.

3 Mo mi, Nifae, mi bin go long bigfala hil plante taem, mo mi bin prea plante long Lod; from samting ia Lod i bin soem long mi ol bigfala samting.

4 Mo i bin hapen se afta we mi bin finisim sip, folem toktok blong Lod, ol brata blong mi i bin luk we hem i gud, mo we ol fasin blong wok blong hem i bin naes tumas; from samting ia, oli bin putum tingting blong olgeta i stap daon bakegen long fored blong Lod.

5 Mo i bin hapen se voes blong Lod i bin kam long papa blong mi, se mifala i mas girap mo go daon insaed long sip.

6 Mo i bin hapen se long nekis dei, afta mifala i bin mekem rere evri samting, plante frut mo mit we i kamaot long ples we i no gat man long hem, mo hani we i plante, mo ol narafala kakae folem hemia we Lod i bin givim oda long mifala, mifala i bin go daon insaed long sip, wetem ol samting blong mifala mo ol sid blong mifala, mo evri samting we mifala i bin karem wetem mifala, evriwan folem yia blong hem; from samting ia, mifala evriwan i bin go daon insaed long sip, wetem ol woman blong mifala mo ol pikinini blong mifala.

7 Mo nao, papa blong mi i bin kasem tu boe long ples we i no gat man long hem; faswan oli bin singaotem Jakob mo nem blong seken wan i Josef.

8 Mo i bin hapen se afta we mifala evriwan i bin go daon

insaed long sip, mo mifala i bin tekem wetem mifala ol kakae mo ol samting we God i bin givim oda long mifala, mifala i bin putum sip i go long solwota mo win i bin pusem sip i go fored long promes graon.

9 Mo afta we win i bin pusem mifala i go fored blong spes blong plante dei, luk, ol brata blong mi mo ol boe blong Ismael, mo tu ol woman blong olgeta i bin stat blong mekem olgeta bakegen i glad, inaf blong mekem se oli bin stat blong danis, mo blong singsing, mo blong yusum ol toktok we i nogud, yes, kasem taem we oli bin fogetem tru long wanem paoa oli bin kam long ples ia; yes, oli bin kam antap long ol toktok we i nogud tumas.

10 Mo mi, Nifae, mi bin stat blong fraet tumas se Lod bae i kros wetem mifala, mo kilim mifala from ol rabis fasin blong mifala, blong bae mifala i draon long ol dip ples blong solwota; from samting ia, mi, Nifae, mi bin stat blong toktok long olgeta wetem plante strong toktok; be luk, oli bin kros long mi, oli talem se: Bae mifala i no save letem se yangfala brata blong mifala bae i rulum mifala.

11 Mo i bin hapen se Leman mo Lemyul i bin tekem mi mo oli bin fasem mi wetem ol rop, mo oli bin mekem nogud tumas long mi; be, Lod i bin letem samting ia blong mekem se hem i save soemaot paoa blong hem, mekem se toktok blong hem i hapen we hem i bin talemaot long saed blong ol nogud man.

12 Mo i bin hapen se afta we oli bin fasem mi inaf blong mekem se mi no bin save muv, kampas, we i bin rere tru long Lod, i bin stop blong wok.

13 From samting ia, oli no bin save se bae oli stiarem sip i go long wanem saed, mekem se wan bigfala ren wetem strong-fala win mo tanda i bin girap, yes, wan bigfala hariken we i nogud, mo mifala i bin gobak long ol solwota blong spes blong tri dei; mo oli bin stat blong fraet tumas se bae oli draon long solwota; be oli no bin tekemaot ol rop long mi.

14 Mo long nambafo dei, we win i bin pusum mifala i gobak, hariken i bin stat blong kam strong tumas.

15 Mo i bin hapen se solwota i rere blong solemdaon mifala long ol dip ples blong hem. Mo afta we win i bin pusum mifala i gobak long ol solwota blong spes blong fo dei, ol brata blong mi i bin stat blong luksave se ol jajmen blong God i bin stap long olgeta, mo we bae oli mas ded sapos oli no sakem ol rabis fasin blong olgeta; from samting ia, oli bin kam long mi, mo oli bin tekemaot ol rop we i bin stap long ol han blong mi, mo luk oli bin solap bigwan tumas; mo tu ol leg blong mi i bin solap plante, mo ol soa blong olgeta i bigwan.

16 Be, mi bin lukluk long God blong mi, mo mi bin presem hem blong fuldei; mo mi no bin komplem agensem Lod from ol hadtaem blong mi.

17 Nao papa blong mi, Lihae, i

bin talem plante samting long tufala, mo tu long ol boe blong Ismael; be, luk, oli bin givim plante woning long eniwan we bae i toktok long saed blong mi; mo from mama mo papa blong mi i no strong from oli olfala mo we tufala i bin harem nogud tumas from ol pikinini blong tufala, oli bin kam daon, yes, we i long ol bed blong sik blong olgeta.

18 From ol wari mo bigfala sore blong tufala, mo rabis fasin blong tufala brata blong mi, tufala i bin kasem klosap we oli karem tufala aot blong mitim God blong tufala; yes, ol hea blong tufala, we i waet, i bin klosap rere blong ledaon long das; yes, oli bin klosap rere, wetem bigfala sore, blong sakem tufala i go long gref blong solwota.

19 Mo Jakob mo Josef tu, from oli yang, from oli nidim plante gudfala kakae, i bin harem nogud tumas from ol hadtaem blong mama blong tufala; mo tu woman blong mi wetem ol wota blong ae blong hem mo ol prea, mo tu ol pikinini blong mi, oli no save mekem ol hat blong tufala brata blong mi i sofsof, blong tufala i tekemaot rop long mi.

20 Mo i no bin gat eni samting sapos i no paoa blong God, we klosap i kilim tufala i ded, we i save mekem ol hat blong olgeta i kam sofsof; from samting ia, taem we tufala i bin luk se klosap bae solwota i solemdaon olgeta long ol dip ples blong hem, oli bin sakem sin long

ol samting we oli bin mekem, inaf blong mekem se oli bin tekemaot rop long mi.

21 Mo i bin hapen se afta we oli bin tekemaot ol rop long mi, luk, mi bin tekem kamps, mo hem i bin wok long fasin we mi bin wantem. Mo i bin hapen se mi bin prea long Lod; mo afta mi bin prea ol win i bin stop, mo ren i bin stop, mo i bin gat wan bigfala kwaet.

22 Mo i bin hapen se mi, Nifae, mi bin stiaem sip, blong mekem se mifala i bin sel bakegen i go long promes graon.

23 Mo i bin hapen se afta we mifala i bin sel blong spes blong plante dei, mifala i bin kasem promes graon; mo mifala i bin go fored long graon mo mifala i bin stanemap ol tenet blong mifala; mo mifala i bin singaotem ples ia promes graon.

24 Mo i bin hapen se mifala i bin stat blong wok long graon, mo mifala i bin stat blong planem ol sid; yes, mifala i bin putum evri sid blong mifala long graon, we mifala i bin karem long graon blong Jerusalem. Mo i bin hapen se oli bin gru gud tumas; from samting ia, mifala i bin kasem plante blesing.

25 Mo i bin hapen se mifala i bin faenem long graon blong promes, taem we mifala i bin wokbaot long ples we i no gat man long hem, we i gat ol anamol long ol bus blong evri kaen, kao tugeta wetem buluk, mo dongki mo hos, mo nanigot mo wael nanigot, mo evri kaen wael anamol, we oli blong man blong yusum. Mo mifala i bin

faenem evri kaen ston blong aean, blong gol tugeta wetem blong silva, mo blong kopa.

---

### JAPTA 19

---

*Nifae i mekem ol buk long ston blong aean mo i raetem histri blong ol pipol blong hem—God blong Isrel bae i kam sikis handred yia afta long taem we Lihae i bin aot long Jerusalem—Nifae i talemaot ol safe blong Hem mo taem we oli krusi-faem Hem—Ol man bae oli no laekem ol Jiu mo bae oli seraotem olgeta olbaot kasem ol lata dei, taem we bae oli kambak long Lod. Raon-abaot 588–570 yia bifo Kraes i bon.*

Mo i bin hapen se Lod i bin givim oda long mi, from samting ia mi bin mekem ol buk long ston blong aean, blong mi save raetem long olgeta histri blong ol pipol blong mi. Mo long ol buk we mi bin mekem mi bin raetemdaon histri blong papa blong mi, mo tu ol wokbaot blong mifala long ples we i no gat man long hem, mo ol profesi blong papa blong mi; mo tu plante long ol profesi blong miwan, mi bin raetemdaon long olgeta.

2 Mo mi no bin save long taem ia we mi bin mekem olgeta, se bae Lod i givim oda long mi, blong mekem ol buk ia; from samting ia, ol histri blong papa blong mi, mo laen blong famle blong ol bubu blong hem, mo bigfala pat blong ol samting we mifala i bin mekem long ples we i no gat man long hem, oli bin raetem olgeta long ol fas

buk we mi bin tokbaot; from samting ia, ol samting we i bin hapen bifo mi bin mekem ol buk ia, i tru, oli bin raetem plante samting long saed blong olgeta long ol fas buk.

3 Mo afta mi bin mekem ol buk ia, folem komanmen, mi, Nifae, mi bin kasem wan komanmen se ministri mo ol profesi, ol pat we oli moa klia mo gudgudfala, mi mas raetem long ol buk ia; mo se ol samting we oli raetem oli mas holem blong tijim ol pipol blong mi, we bae oli stap long graon, mo tu from ol narafala stamba tingting, we Lod i save ol stamba tingting ia.

4 From samting ia, mi, Nifae, mi bin mekem wan histri long ol narafala buk, we i givim wan histri, o we i givim wan histri we i moa bigwan blong ol faet, mo ol rao, mo ol smasem gud blong ol pipol blong mi. Mo samting ia mi bin mekem, mo mi bin givim oda long ol pipol blong mi se oli mas mekem wanem afta mi mi go; mo se ol buk ia bae oli pasem long wan jeneresen i go long narawan, o long wan profet i go long narafala wan, kasem taem we Lod i givim ol narafala komanmem.

5 Mo wan histri blong taem we mi bin mekem ol buk ia bae mi givim afta; mo afta, luk, mi gohed folem hemia we mi bin talem; mo hemia mi mekem blong ol tabu samting oli save holem blong givim save long ol pipol blong mi.

6 Be, mi no raetem eni samting long ol buk, sapos i no olsem se

mi tingting se hem i tabu. Mo nao, sapos mi mekem mistek, ol man bifo i bin mekem mistek tu; mi no traem blong mekem eskus long miwan from ol narafala man, be from samting we i no strong we i stap long mi, long saed blong bodi blong mit mo bun, bae mi mekem eskus long miwan.

7 From ol samting ia we sam man i tingting se oli impoten tumas, long bodi tugeta wetem sol, ol narafala man i putum long saed mo purumbut andanit long ol leg blong olgeta. Yes, hemia tu, God blong Isrel, ol man i purumbut andanit long ol leg blong olgeta; mi talem, purumbut andanit long ol leg blong olgeta, be bae mi talem long ol narafala toktok—oli putum hem olsem se hem i no impoten nating, mo oli no lisin long voes blong ol advaes blong hem.

8 Mo luk hem i kam, folem ol toktok blong enjel, long sikis hundred yia afta taem we papa blong mi i bin aot long Jerusalem.

9 Mo wol, from ol rabis fasin blong olgeta, bae oli jajem hem se hem i wan samting blong nating; from samting ia oli wipim hem, mo hem i letem samting ia; mo oli kilim hem, mo hem i letem samting ia. Yes, oli spet long hem, mo hem i letem samting ia, from bigfala lav mo kaen blong hem, mo fasin blong go tru long ol hadtaem wetem longfala tingting, blong hem i go long ol pikinini blong ol man.

10 Mo God blong ol bubu blong yumi, we hem i bin lidim aot long Ijip, aot long slef, mo tu hem i bin sevem olgeta long ples we i no gat man long hem, yes, God blong Ebrahim, mo blong Aesak, mo God blong Jakob, i givim hemwan, folem ol toktok blong enjel, olsem wan man long ol han blong ol man nogud, blong oli leftemap hem, folem ol toktok blong Sinok, mo blong oli krusifaem hem, folem ol toktok blong Nium, mo blong oli berem hem long wan hol blong ston, folem ol toktok blong Sinos, we hem i bin talem long saed blong tri dei blong tudak, we bae i wan saen blong talemaot ded blong hem long olgeta we bae oli stap long ol aelan blong solwota, moa speseli long olgeta we oli blong laen blong Isrel.

11 From olsem ia nao profet i bin talem: Lod God bae i visitim ol laen blong Isrel long dei ia, samfala wetem voes blong hem, from stret fasin blong olgeta, we i mekem se oli glad tumas mo se oli sev. Mo ol narafala wetem ol tanda mo ol laetning blong paoa blong hem, tru ol hariken, tru long faea, mo tru long smok, mo klaod blong tudak, mo tru long graon we i open, mo tru long ol bigfala hil we bae i kam antap.

12 Mo evri samting ia i mas kam, profet Sinos i bin talemaot. Mo ol ston blong graon bae i mas brok; mo from ol noes blong graon, plante long ol king blong ol aelan blong solwota bae Spirit blong God i mekem

olgeta, blong singaot se: God blong wol i safu.

13 Mo long saed blong olgeta we i stap long Jerusalem, profet i talem, bae oli kasem kil tru long evri pipol, from oli krusifaem God blong Isrel, mo tanem ol hat blong olgeta i go longwe, oli no sakemaot ol saen mo ol samting blong sapraes, mo paoa mo glori blong God blong Isrel.

14 Mo from oli tanem ol hat blong olgeta i go longwe, profet i talem, mo oli bin tanem baksaed long Tabu Wan blong Isrel, bae oli wokbaot olbaot long bodi blong mit mo bun, mo ded, mo kam olsem wan wesil mo wan toktok we plante man i save, mo bae evri kantri i no laekem olgeta.

15 Be, taem we dei ia i kam, profet i talem, we oli nomo tanem i go longwe ol hat blong olgeta agensem Tabu Wan blong Isrel, afta bae hem i tingbaot ol kavenan we hem i bin mekem wetem ol bubu blong olgeta.

16 Yes, afta bae hem i tingbaot ol aelan blong solwota; yes, mo evri pipol we oli blong laen blong Isrel, bae mi karem i kam tugeta, Lod i talem, folem ol toktok blong profet Sinos, long ol fo pat blong wol.

17 Yes, mo ful wol bae i luk fasin blong sevem man blong Lod, profet i talem; evri kantri, famle, lanwis mo pipol bae oli kasem blesing.

18 Mo mi, Nifae, mi bin raetem ol samting ia long ol pipol blong mi, blong maet mi save winim tingting blong olgeta, blong

mekem se bae oli tingbaot Lod, Ridima blong olgeta.

19 From samting ia, mi toktok long ful laen blong Isrel, sapos i olsem se bae oli kasem ol samting ia.

20 From luk, mi gat ol filing long spirit, we i mekem mi taed mekem se evri joen long bodi blong mi i slak, from olgeta we i stap long Jerusalem; from sapos Lod i no bin gat sore, blong soem long mi long saed blong olgeta, olsem we hem i bin soem long ol profet blong bifo, mi mas bin ded tu.

21 Mo i tru se hem i bin soem long ol profet blong bifo evri samting long saed blong olgeta; mo tu, hem i bin soem long plante long saed blong yumi; from samting ia, i mas nid olsem we yumi save long saed blong olgeta, from oli bin raetem ol toktok ia long ol buk we oli bin mekem wetem bras.

22 Nao i bin hapen se mi, Nifae, mi bin tijim ol brata blong mi ol samting ia; mo i bin hapen se mi bin ridim plante samting long olgeta, we oli bin raetem long ol buk we oli bin mekem wetem bras, blong maet oli save long saed blong ol samting we Lod i bin mekem long ol narafala graon, long medel blong ol man bifo.

23 Mo mi bin ridim plante samting long olgeta we oli bin raetem long ol buk blong Moses; be blong mi save winim ful tingting blong olgeta blong oli bilif long Lod, Ridima blong olgeta, mi bin ridim long olgeta ol samting we profet Aesea i

bin raetem; from mi bin yusum evri skripja long laef blong mifala, blong hem i save stap blong helpem mo lanem mifala.

24 From samting ia, mi bin toktok long olgeta, se: Yufala i harem ol toktok blong profet, yufala we i wan smol haf we i stap yet blong laen blong Isrel, wan branj we i bin kamaot; yufala i harem ol toktok blong profet, we oli bin raetem long ful laen blong Isrel, mo yusum ol toktok ia long laef blong yufala, blong yufala i save gat hop, olsem ol brata blong yufala, we yufala i bin kamaot long olgeta; from long fasin ia profet i bin raet.

---

#### JAPTA 20

---

*Lod i soemaot ol stamba tingting blong hem long Isrel—Hem i bin jusum Isrel long oven blong faea blong hadtaem mo i nid blong go aot long Babilon—Luk long Aesea 48. Raonabaot 588–570 yia bifo Kraes i bon.*

HAREM mo lisin long samting ia, O laen blong Jakob, we oli singaotem olgeta long nem blong Isrel, mo i bin kamaot long ol wota blong Juda, o aot long ol wota blong baptaes, we i mekem tru promes long nem blong Lod, mo i tokbaot God blong Isrel, be stil oli no mekem tru promes long tru fasin o long stret fasin.

2 Be, oli talem se olgeta bak-egen oli blong tabu bigtaon, be olgeta bakegen oli no dipen long God blong Isrel, we i Lod

blong ol Host; yes, Lod blong ol Host, i nem blong hem.

3 Luk, mi bin talemaot ol samting we i bin hapen bifo stat long stat; mo oli bin go fored aot long maot blong mi, mo mi bin soemaot olgeta. Mi bin soemaot olgeta kwik taem nomo.

4 Mo mi bin mekem samting ia from mi bin save se yu no wantem lisin, mo nek blong yu i strong olsem aean, mo fored blong hed blong yu i strong olsem bras;

5 Mo mi bin, stat long stat, talemaot long yu; bifo i bin hapen mi bin soemaot olgeta long yu; mo mi bin soem olgeta from mi fraet se bae yu talem se—Aedol blong mi i bin mekem olgeta, mo pikja blong mi we oli katem long wud mo pikja blong mi we oli mekem wetem aean, i bin givim oda long olgeta.

6 Yu bin luk mo harem evri samting ia; mo bae yu no talemaot ol samting ia? Mo we mi bin soem long yu ol niu samting stat long taem ia, hem i ol samting we i haed, mo yu no bin save olgeta.

7 Oli stat nao, mo i no long stat, hem i bifo long dei ia we yu no bin harem olgeta oli bin talemaot ol samting ia long yu, from we bae yu se—luk mi bin save ol samting ia.

8 Yes, mo yu no bin harem; yes, yu no bin save; yes, from long taem ia sorae blong yu i no bin open yet; from mi bin save se bae yu go agensem, mo oli bin singaotem yu wan man blong sin taem yu stap yet long bel blong mama blong yu.

9 Be, from nem blong mi bae mi seftem kros blong mi, mo blong glori blong mi bae mi holem mi bakegen, blong mi no sakemaot yu.

10 From, luk, mi bin klinim yu, mi bin jusum yu long oven blong faea blong hadtaem.

11 From blong miwan, yes, from blong miwan nomo bae mi mekem samting ia, from bae mi no letem ol man i smasem gud nem blong mi, mo bae mi no givim glori blong mi long narawan.

12 Lisin long mi, O Jekob, mo Isrel, we mi bin singaotem, from mi mi hem; mi mi faswan, mo tu mi mi laswan.

13 Han blong mi tu i bin putum fandesen blong wol, mo raet han blong mi i bin mekem ol heven. Mi singaot long olgeta mo oli stanap tugeta.

14 Yufala evriwan, kam tugeta yufala bakegen, mo harem; huia long medel blong olgeta i bin talemaot ol samting ia long olgeta? Lod i bin lavem hem; yes, mo bae hem i mekem toktok blong hem i hapen we hem i bin talemaot tru long olgeta; mo bae hem i mekem olsem we hem i wantem long Babilon, mo han blong hem bae i kam long ol man Kaldia.

15 Tu, Lod i talem; mi Lod, yes, mi bin toktok; yes, mi bin singaotem hem blong talemaot, mi bin karem hem i kam, mo bae hem i mas mekem rod blong hem i mas kam antap gud.

16 Yu kam klosap long mi; mi no bin toktok long sikret; stat long stat, stat long taem we oli



bin talemaot samting ia mi bin talem; mo Lod God, mo Spirit blong hem, i bin sendem mi.

17 Mo olsem ia nao Lod i talem, Ridima blong yu, Tabu Wan blong Isrel; mi bin sendem hem, Lod, God blong yu we i tijim yu blong kam antap, we i lidim yu long ol rod we yu mas go long hem, i bin mekem samting ia.

18 O sapos yufala i bin holem ol komanen blong mi—sapos i bin olsem pis blong yu bae i olsem wan reva, mo stret fasin blong yu i olsem ol wef blong solwota.

19 Ol pikinini blong yu tu bae i bin olsem ol sanbij; ol pikinini we bae i kamaot long yu bae i olsem sanbij; bae oli no bin katemaot nem blong hem o lus long fored blong mi.

20 Yu go aot long Babilon, tu ronwe long ol man Kaldia, wetem wan voes blong singsing yu talemaot, talemaot samting ia, talemaot long en blong wol; yu talemaot: Lod i bin pemaot wokman blong hem Jakob.

21 Mo oli no bin tosta; hem i bin lidim olgeta tru long ol draeples; hem i bin mekem ol wota i ron aot long ston blong olgeta; hem i bin kilim ston tu mo ol wota i bin kamaot strong.

22 Mo i nomata we hem i bin mekem ol samting ia, mo ol nara-fala bigfala wan tu, i no gat pis, Lod i talem, long ol man nogud.

---

JAPTA 21

---

*Mesaea bae i wan laet long ol Jentael mo bae i mekem ol prisena*

*i go fri—Isrel bae i kam tugeta wetem paoa long ol las dei—Ol king bae i olsem ol papa we i givim ol gudfala kakae long olgeta—Luk long Aesea 49. Raonabaot 588–570 yia bifo Kraes i bon.*

Mo bakegen: Lisin, O yufala laen blong Isrel, yufala evriwan we i kamaot mo oli ronem aot yufala from ol nogud fasin blong ol pasta blong ol pipol blong mi, yes, yufala we i kamaot, we yufala i seraot olbaot we yufala i ol pipol blong mi, O laen blong Isrel. Lisin, O ol aelan, long mi, mo lisin yufala ol pipol we i stap longwe; Lod i bin singaotem mi taem we mi stap yet long bel; stat long bel blong mama blong mi hem i bin talemaot nem blong mi.

2 Mo hem i bin mekem maot blong mi olsem wan sap naef blong faet, long sado blong han hem i haedem mi, mo i bin mekem mi stret olsem wan ara we i saen; long basket blong ol ara blong hem, hem i bin haedem mi;

3 Mo i bin talem long mi: Yu yu wokman blong mi, O Isrel, long hem we bae mi kasem ol glori.

4 Afta mi bin talem, mi bin wok blong nating, mi bin yusum paoa blong mi blong nating wetem no ansa; i tru se jajmen blong mi i stap wetem Lod, mo wok blong mi wetem God blong mi.

5 Mo nao, Lod i talem—we i bin fomem mi long bel se bae mi kam wokman blong hem, blong

tekem Jakob long hem bak-egen—be Isrel i no kam tugeta yet, be bae mi kasem glori long ol ae blong Lod, mo God blong mi bae i paoa blong mi.

6 Mo hem i bin talem: Hem i wan smol samting blong kam wokman blong mi blong resem-  
ap ol traeb blong Jakob, mo blong putumbak olgeta blong Isrel we mi bin sevem olgeta. Bae mi givim yu tu olsem wan laet long ol Jentael, blong yu save kam olsem fasin blong sevem man blong mi long evri en blong wol.

7 Olsem ia nao Lod i talem, Ridima blong Isrel, Tabu Wan blong hem, long hem we ol man i no laekem, long hem we ol kantri i no laekem, long wokman blong ol man blong rul: Ol king bae i luk mo girap, ol boe blong king tu bae i wosip, from Lod we i holem taet fet.

8 Olsem ia nao Lod i talem: Long wan taem we i stret mi bin harem yu, O ol aelan blong solwota, mo long wan dei blong fasin blong sevem man mi bin helpem yu; mo bae mi sevem yu, mo givim yu wokman blong mi blong kavenan blong ol pipol, blong stanemap wol, blong mekem se oli kasem ol graon we i emti mo i no gat man.

9 Blong yu save talem long ol prisena: Go aot; long olgeta we i sidaon long tudak: Soemaot yufala bakegen. Bae oli kakae long ol rod, mo ol gras we buluk i save kakae bae i stap long evri hae ples.

10 Bae oli no hanggri o tosta, mo tu bae hot o san i no kilim

olgeta, from hem we i gat sore long olgeta bae i lidim olgeta, hem bae i lidim olgeta tru ol spring blong wota.

11 Mo bae mi mekem evri bigfala hil blong mi wan rod, mo ol bigfala rod blong mi bae mi leftemap olgeta.

12 Mo afta, O laen blong Isrel, luk, olgeta ia bae oli kam long longwe; mo luk, olgeta ia long not mo long wes; mo olgeta ia long graon blong Aswan long Ijip.

13 Singsing, O ol heven; mo stap glad, O wol; from ol leg blong olgeta we i stap long is bae oli stanap strong; mo bae oli stat blong singsing, O ol bigfala hil; from bae oli kilim olgeta nomo; from Lod i bin leftemap tingting blong ol pipol blong hem, mo bae i gat sore long olgeta blong hem we i gat hadtaem.

14 Be, luk, Saeon i bin talem: Lod i bin lego mi, mo Lod blong mi i bin fogetem mi—be bae hem i soem se hem i no bin mekem olsem.

15 From wan woman i save fogetem pikinini blong hem we i stap givim titi long hem, blong mekem se hem i no save gat sore long boe long bel blong hem? Yes, oli save fogetem, be stil bae mi no fogetem yu, O laen blong Isrel.

16 Luk, mi bin raetem yu long skin blong insaedhan blong ol han blong mi; ol wol blong yu oli fored long mi oltaem.

17 Ol pikinini blong yufala bae i muv kwik agensem ol man blong smasem gud yufala; mo

olgeta we i smasem gud yu bae oli goaot long yufala.

18 Leftemap ol ae blong yu raonabaot mo luk; olgeta ia olgeta bakegen i kam tugeta, mo olgeta bae oli kam long yu. Mo olsem mi stap laef, Lod i talem, i tru we bae yu putum long yu evriwan, olsem wan samting we i stap saen, mo fasem olgeta olsem wan woman we bae i mared.

19 From ol nogud mo ol emti ples blong yu, mo graon blong ded blong yu, bae i nao stap smol from stamba tingting blong olgeta i stap; mo olgeta we oli bin solemdaon yu bae i stap longwe.

20 Ol pikinini we bae yu kasem, afta yu bin lusum faswan, bae bakegen long ol sorae blong yu oli se: Ples ia i smol tumas blong mi; givim wan ples long mi blong mi save stap.

21 Afta bae yu talem long hat blong yu: Huia i bin bonem long mi olgeta ia, from mi luk we mi bin lusum ol pikinini blong mi, mo mi mi emti, wan prisena, mo mi muv i go ia mo i go ia? Mo huia i bin resemap olgeta ia? Luk, mi bin stap miwan nomo; olgeta ia, oli bin stap wea?

22 Olsem ia nao Lod God i talem: Luk, bae mi leftemap han blong mi long ol Jentael, mo stanemap flag blong mi long ol pipol; mo bae oli karem ol boe blong yufala long ol han blong olgeta, mo ol gel blong yufala bae oli karem long ol solda blong olgeta.

23 Mo ol king bae oli olsem ol papa we i givim gudfala kakae

long yu, mo ol kwin blong olgeta bae oli olsem ol mama we i givim gudfala kakae long yu; bae oli bodaon long yu wetem fes blong olgeta i fesem graon, mo likimap ol das long ol leg blong yu; mo bae yu save se mi mi Lod; from olgeta bae oli no sem we oli stap wet long mi.

24 From yu yu ting se oli save tekem ol kakae blong wan ia we i strong, o oli lego olgeta we oli kam prisena long fasin blong folem loa?

25 Be olsem ia nao Lod i talem, ol prisena tu blong olgeta we i strong bae oli tekemaot olgeta, mo bae oli lego ol kakae blong trabol meka; from bae mi faet wetem hem we i faet wetem yu, mo bae mi sevem ol pikinini blong yu.

26 Mo bae mi fidim olgeta we i mekem yu harem nogud wetem mit blong olgeta bakegen; bae oli drong wetem blad blong olgeta bakegen olsem wetem waen ia we i swit; mo evri bodi blong mit mo bun bae i save se mi, Lod, mi mi Sevyia blong yufala mo Ridima blong yufala, Strong Wan blong Jakob.

---

## JAPTA 22

---

*Isrel bae i seraot olbaot long ful fes blong wol—Ol Jentael bae i fidim mo givim gudfala kakae long Isrel wetem gospel long ol las dei—Isrel bae i kam tugeta mo sev, mo ol man nogud bae i bon olsem doti blong wit—Kingdom blong devel bae i lus, mo bae oli fasem Setan. Raonabaot 588–570 yia bifo Kraes i bon.*

Mo i bin hapen se afta mi, Nifae, mi bin ridim ol samting ia we oli bin raetem long ol buk we oli bin mekem wetem bras, ol brata blong mi i bin kam long mi mo bin talem long mi se: Wanem mining blong ol samting we yu bin ridim? Luk, mifala i sapos blong andastanem olgeta olsem ol samting we oli blong spirit, we bae i kam blong hapen folem spirit mo i no bodi blong mit mo bun?

2 Mo mi, Nifae, mi bin talem long olgeta: Luk oli bin soemaot ol samting ia long profet tru long voes blong Spirit; from tru long Spirit evri samting i kam long save blong ol profet, we bae i kam long ol pikinini blong ol man folem bodi blong mit mo bun.

3 From samting ia, ol samting we mi bin ridim, oli ol samting we i dil wetem ol samting blong wol mo ol samting blong spirit; from i luk olsem se laen blong Isrel, long naoia o taem we i stap kam, bae oli seraot olbaot long ful fes blong wol, mo tu long evri kantri.

4 Mo luk, i gat plante we oli lus finis long save blong olgeta we i stap long Jerusalem. Yes, bigfala pat blong evri traeb oli bin lidimaot olgeta, mo oli bin seraot olbaot i go ia mo i go ia long ol aelan blong solwota; mo i no gat wan long yumi we i save oli stap wea, be mifala i save nomo se oli bin lidimaot olgeta.

5 Mo stat long taem we oli bin lidimaot olgeta, oli bin talem-aot profesi ia long saed blong

olgeta, mo tu long saed blong olgeta we afta long taem ia bae oli seraot olbaot mo miks, from Tabu Wan blong Isrel; from agensem hem bae oli mekem ol hat blong olgeta i kam strong; from samting ia, bae oli seraot olbaot long evri kantri mo bae evri man i no laekem olgeta.

6 Be, afta ol Jentael i fidim olgeta, mo Lod i bin leftemap han blong hem long ol Jentael mo i bin stanemap olgeta olsem wan flag, mo ol pikinini blong olgeta oli bin karem olgeta long ol han blong olgeta, mo ol gel blong olgeta oli bin karem olgeta long ol solda blong olgeta, luk ol samting ia we hem i stap tokabaot oli blong wol; from olsem ia nao ol kavenan blong Lod i stap wetem ol bubu blong yumi; mo hem i minim yumi long ol dei we i stap kam, mo tu long evri brata blong yumi we oli blong laen blong Isrel.

7 Mo hem i minim se taem i stap kam we afta evri laen blong Isrel i bin seraot olbaot mo miks, se Lod God bae i resem wan strong kantri long medel blong ol Jentael, yes, hem i long fes blong graon ia; mo tru long olgeta bae ol pikinini blong yumi i seraot olbaot.

8 Mo afta ol pikinini blong yumi i bin seraot olbaot, Lod God bae i gohed blong mekem wan gudfala wok long medel blong ol Jentael, we bae oli gat bigfala yus long ol pikinini blong yumi; from samting ia, hem i olsem se ol Jentael i givim gudfala kakae long olgeta

mo karem olgeta long ol han blong olgeta mo long ol solda blong olgeta.

9 Mo bae hem i gat yus long ol Jentael; mo i no long ol Jentael nomo be long evri laen blong Isrel, go kasem we oli talem ol kavenan blong Papa blong heven long Ebraham, i talem se: Long ol pikinini blong yu bae evri famle blong wol i kasem blesing.

10 Mo mi wantem, ol brata blong mi, se yufala i mas save se evri famle blong wol i no save kasem blesing sapos hem i no soemaot han blong hem long ol ae blong ol kantri.

11 From samting ia, Lod God bae i gohed blong soemaot han blong hem long ol ae blong ol kantri, blong karem i kam ol kovenan blong hem mo gospel blong hem long olgeta we oli blong laen blong Isrel.

12 From samting ia, bae hem i karem olgeta bakegen aot long kalabus, mo bae olgeta oli kam tugeta long evri graon blong olgeta we i kam long ol papa; mo bae oli karem olgeta aot long ples blong haed mo aot long tudak; mo bae oli save se Lod i Sevyia blong olgeta, mo Ridima blong olgeta, Strong Wan blong Isrel.

13 Mo blad blong bigfala mo rabis jos ia, we i woman blong rod blong ful wol, bae i tanem hem long hed blong olgeta bakegen; from bae oli faet agensem olgeta bakegen, mo naef blong faet blong ol han blong olgeta nomo bae oli foldaon long ol hed blong olgeta bakegen, mo

bae oli drong wetem blad blong olgeta bakegen.

14 Mo evri kantri we bae i faet agensem yu, O laen blong Isrel, bae oli tanraon mo faetem wan agensem narafala wan, mo bae oli foldaon long hol we oli bin digim blong kasem ol pipol blong Lod. Mo evriwan we i faet agensem Saeon bae i ded evriwan, mo bigfala woman blong rod ia, we i bin jenisim ol stret wei blong Lod, yes, bigfala mo rabis jos ia, bae i foldaon i go daon long das mo foldaon blong hem bae i bigwan.

15 From luk, profet i talem, taem i kam kwik we Setan bae i gat nomo paoa ova ol hat blong ol pikinini blong ol man; from dei i kam klosap we olgeta we i gat hae tingting mo olgeta we i mekem sin bae i olsem doti blong wit; mo dei i stap kam we olgeta i mas bon.

16 From taem i kam klosap we ful kros blong God bae i poremaot long ol pikinini blong ol man; from bae hem i no letem se ol man nogud bae i kilim olgeta we i stret.

17 From samting ia, bae hem i sevem olgeta we i stret wetem paoa blong hem, i no mata sapos ful kros blong hem i mas kam, mo olgeta we i stret hem i sevem, kasem taem ia we i smasem gud ol enemi blong olgeta tru long faea. From samting ia, olgeta we i stret i no nid blong fraet; from olsem ia nao profet i bin talem, bae oli sev, i nomata olsem we i tru long faea.

18 Luk, ol brata blong mi, mi talem long yufala, se ol samting

ia i mas kam i no longtaem; yes, hem i blad, mo faea, mo stim blong smok i mas kam; mo bae i mas nid olsem long fes blong wol ia; mo i kam long ol man folem bodi blong mit mo bun sapos i olsem we oli mekem ol hat blong olgeta i kam strong agensem Tabu Wan blong Isrel.

19 From luk, olgeta we i stret bae i no ded; from i tru we taem i mas kam we olgeta evriwan we i faet agensem Saeon bae oli mas katemaot.

20 Mo i tru we Lod bae i mekem rere rod blong ol pipol blong hem, hem i blong mekem ol toktok blong Moses i hapen, we hem i bin talem, se: Wan profet bae Lod, God blong yufala i resemap long yufala, olsem mi; hem bae yufala i harem long evri samting we bae hem i talem long yufala. Mo bae i kam blong hapen se olgeta evriwan we i no wantem harem profet ia, bae God i mekem olgeta blong oli katemaot long medel blong ol pipol.

21 Mo nao mi, Nifae, mi talem-aot long yufala, se profet ia we Moses i bin tokbaot i bin Tabu Wan blong Isrel; from samting ia, bae hem i mekem jajmen long stret fasin.

22 Mo olgeta we oli stret i no nid blong fraet, from oli olgeta we bae oli no save miks. Be hem i kingdom blong devel, we bae oli bildim long medel blong ol pikinini blong ol man, we kingdom ia i stanap long medel blong olgeta we i stap long bodi blong mit mo bun—

23 From kwiktaem bae i kam

we evri jos we oli bildimap blong kase man, mo olgeta we oli bildimap blong gat paoa ova long bodi blong mit mo bun, mo olgeta we oli bildimap blong plante man i laekem olgeta long ol ae blong wol, mo olgeta we i lukaotem ol samting blong bodi blong mit mo bun mo ol samting blong wol, mo blong mekem evri kaen rabis fasin, yes, blong endem, olgeta we i blong kingdom blong devel oli olgeta we i nid blong fraet, mo seksek, mo seksek from fraet; oli olgeta we i mas go daon long das; Lod bae i bonem olgeta evriwan olsem doti blong wit; mo samting ia i folem ol toktok blong profet.

24 Mo taem i stap kam kwiktaem we olgeta we i stret bae oli lidim olgeta olsem ol yang buluk we i stap long yad, mo Tabu Wan blong Isrel bae i mas rul wetem kontrol, mo bigfala paoa, mo paoa, mo bigfala glori.

25 Mo hem i karem ol pikinini blong hem long ol fo pat blong wol i kam tugeta; mo hem i kaontem ol sipsip blong hem, mo oli save hem; mo bae i gat wan yad mo wan man blong lukaot long sipsip; mo hem bae i fidim ol sipsip blong hem, mo long hem bae oli faenem ples we i gat fulap gras blong kakae.

26 Mo from ol stret fasin blong ol pipol blong hem, Setan i no gat paoa; from samting ia, hem i no save kamaot blong spes blong plante yia; from hem i no gat paoa ova ol hat blong ol pipol, from oli stap long stret

fasin, mo Tabu Wan blong Isrel i stap rul.

27 Mo nao luk, mi, Nifae, mi talem long yufala se evri samting ia i mas kam folem bodi blong mit mo bun.

28 Be, luk, evri kantri, famle, lanwis, mo pipol bae i stap sev tru long Tabu Wan blong Isrel sapos i olsem se bae oli sakem sin.

29 Mo nao mi, Nifae, mi mekem wan en; from mi fraet blong toktok moa long taem ia long saed blong ol samting ia.

30 From samting ia, ol brata

blong mi, mi wantem se yufala i tingbaot we ol samting we oli bin raetem long ol buk we oli bin mekem wetem bras, oli tru; mo oli testifae se wan man i mas obei long ol komanmen blong God.

31 From samting ia, yufala i no nid blong tingting se mi no papa blong mi nomo i bin testifae, mo tu i bin tijim olgeta. From samting ia, sapos yufala i obei long ol komanmen, mo stap strong kasem en, bae yufala i sev long las dei. Mo i olsem ia nao. Amen.

## NAMBATU BUK BLONG NIFAE

**W**an histri blong ded blong Lihae. Ol brata blong Nifae i go agensem hem. Lod i wonem Nifae blong hem i mas aot i go long ples we i no gat man long hem. Ol wokbaot blong hem long ples we i no gat man long hem wetem samfala moa.

### JAPTA 1

*Lihae i talemaot profesi long saed blong wan graon blong fridom— Ol pikinini blong hem bae oli seraot olbaot mo kasem panis sapos oli sakemaot Tabu Wan blong Isrel— Hem i talem strong long ol boe blong hem blong werem ol klos blong faet blong stret fasin. Raonabaot 588–570 yia bifo Kraes i bon.*

**M**O nao i bin hapen se afta lwe mi, Nifae, mi bin stop blong tijim ol brata blong mi, papa blong mifala, Lihae, hem tu i bin talemaot plante samting long olgeta, mo hem i bin talem

long olgeta, hamas bigfala samting we Lod i bin mekem blong olgeta taem we hem i tekemaot olgeta long graon blong Jerusalem.

2 Mo hem i bin toktok long olgeta long saed blong ol fasin blong go agens, blong olgeta long taem we oli bin stap long ol wota, mo ol sore blong God blong sevem ol laef blong olgeta, i mekem se oli no bin draon long solwota.

3 Mo hem i bin talemaot long olgeta tu long saed blong graon blong promes, we oli bin kasem—hamas sore Lod i bin gat blong wonem mifala se

mifala i sud ronwe mo aot long graon blong Jerusalem.

4 From, luk, hem i bin talem se, mi bin lukim wan visen, tru long samting ia mi save se Jerusalem i bin foldaon finis; mo sapos yumi bin stap long Jerusalem bae yumi bin ded tu.

5 Be, hem i bin talem se, i nomata long ol hadtaem blong yumi, yumi bin kasem wan graon blong promes, wan graon we i gud tumas i bitim evri narafala graon; wan graon we Lod God i bin mekem wan kavenan wetem mi se bae i wan graon blong ol pikinini blong mi olsem wan graon we i kam long ol papa blong olgeta. Yes, Lod i bin mekem wan kavenan wetem mi se graon ia blong mi, mo blong ol pikinini blong mi blong oltaem, mo tu olgeta we bae oli lidim aot long ol narafala kantri tru long han blong Lod.

6 From samting ia, mi, Lihae, mi talemaot profesi folem paoa blong Spirit we i stap long mi, se i no save gat wan man i save kam long graon ia hemia nomo sapos oli no kam tru long han blong Lod.

7 From samting ia, hem i konsekretem graon ia i go long olgeta we bae hem i tekem olgeta i kam long ples ia. Mo sapos oli wok blong hem folem ol komanmen we hem i bin givimaot, bae graon ia i olsem wan graon blong fridom long olgeta; from samting ia, bae oli no save kam prisena; sapos i olsem, bae hem i from ol rabis fasin; from sapos ol rabis fasin i kam plante, God bae i panisim

graon ia from olgeta, be long olgeta we oli stret bae hem i blesem graon ia blong oltaem.

8 Mo luk, hem i waes tingting we graon ia i mas stap yet olsem wan sikret, blong ol narafala kantri i no save; from luk, plante kantri bae i winim graon ia, blong mekem se bae i no gat wan ples we i kam long ol papa.

9 From samting ia, mi, Lihae, mi bin kasem wan promes, i semak olsem we bae Lod God i tekemaot olgeta long graon blong Jerusalem i holem ol komanmen blong hem, bae oli kam antap gud long fes blong graon ia; mo bae ol narafala kantri i no save long saed blong olgeta, blong olgeta i save tekem graon ia blong olgeta nomo. Mo sapos oli holem ol komanmen blong hem, bae hem i blesem olgeta long fes blong graon ia, mo bae i no gat wan man we i save smasem gud olgeta, o blong tekemaot graon blong olgeta we i kam long ol papa blong olgeta; mo bae oli stap sev blong oltaem.

10 Be luk, taem we taem i kam we oli kam slak from we oli lusum bilif, afta we oli bin kasem ol bigfala blesing long han blong Lod—oli gat wan save long saed blong taem we oli mekem wol ia, mo evri man, oli save ol bigfala mo gudfala wok blong Lod stat long taem we oli bin mekem wol ia; oli gat paoa we oli bin givim long olgeta blong mekem evri samting wetem fet; oli gat evri komanmen stat long stat, mo oli bin



kam tru long lav blong hem we i no gat en long gudgudfala graon ia blong promes—Luk, mi talem, sapos dei i kam we bae oli sakemaot Tabu Wan blong Isrel tru Mesaea, Ridima blong olgeta mo God blong olgeta, luk, jajmen blong hem we i stret bae i stap long olgeta.

11 Yes, bae hem i karem ol narafala kantri i kam long olgeta, mo bae hem i givim long olgeta paoa, mo bae hem i tekemaot long olgeta ol graon we oli stap long hem, mo bae hem i mekem se oli seraot olbaot mo kasem panis.

12 Yes, taem we wan jeneresen i pas i go long wan narafala jeneresen bae ol blad i ron, mo bigfala panis bae i kam long medel blong olgeta; from samting ia, ol boe blong mi, mi wantem se yufala i tingbaot; yes, mi wantem se yufala i lisin long ol toktok blong mi.

13 O we yufala i save wekap; wekap from wan dip slip, yes, we i long slip ia blong hel, mo sekemaot ol nogud jen we devel i fasem raon long yufala, we oli ol jen we i holem ol pikinini blong ol man, blong hem i tekem olgeta i go prisena daon long wan bigfala hol we i no save finis blong sore tumas mo harem nogud.

14 Wekap! mo girap long das, mo harem ol toktok blong wan papa we i stap seksek, we i no longtaem we bae yufala i mas putum bodi blong hem long wan kolkol mo kwaet gref, we long ples ia eni man i go bae hem i no save kambak; sam moa

dei mo mi go long rod ia blong ded blong wol.

15 Be luk, Lod i bin pemaot sol blong mi long hel; mi bin luk glori blong hem, mo ol han blong lav blong hem i bin raonem mi blong taem we i no save finis.

16 Mo mi wantem se bae yufala i tingbaot blong obei ol loa mo ol jajmen blong Lod; luk, hemia i bin wari blong sol blong mi long stat kasem naoia.

17 Hat blong mi i bin hevi tumas wetem sore blong mi long wan wan taem, from mi bin fraet se from ol hat blong yufala i strong, Lod, God blong yufala bae i kamaot long evri kros blong hem long yufala, blong mekem se hem i katemaot yufala mo smasem gud yufala blong oltaem;

18 O, blong mekem se wan panis bae i kam long yufala long taem blong plante jeneresen; mo yufala i kasem ol visit wetem ol naef blong faet, mo wetem hadtaem blong kasem kakae, mo ol man i no laekem yufala, mo yufala i folem tingting blong devel mo kam prisena blong hem.

19 O ol boe blong mi, blong mekem se ol samting ia i no kam long yufala, be blong yufala i save kam wan stret pipol we Lod i laekem. Be luk, ol samting bae i hapen olsem we hem i wantem; from ol wei blong hem oli stret fasin oltaem.

20 Mo Lod i bin talem se: I semak olsem we yufala i holem ol komanmen blong mi bae yufala i kam antap gud long

graon ia; be i semak olsem we yufala i no holem ol komanmen blong mi bae mi katemaot yufala long fes blong mi.

21 Mo nao blong mekem se sol blong mi i save glad long yufala, mo blong mekem se hat blong mi i save livim wol ia wetem glad, from yufala, blong mekem se mi no go daon long gref wetem ol wari mo sore, girap long das, ol boe blong mi, mo stap olsem ol man, mo mekem tingting blong yufala i strong wetem wan tingting, mo wan hat, kam wan long evri samting, blong mekem se yufala i no save kam daon olsem prisena;

22 Blong mekem se God i no panisim yufala wetem wan panis we i soa tumas; mo tu, blong mekem se yufala i no kasem kros blong wan God we i stret long yufala, go kasem fasin blong smasem gud, yes, fasin ia blong smasem gud we i no save finis, blong sol tugeta wetem bodi.

23 Wekap, ol boe blong mi; putum ol klos blong faet we oli blong stret fasin. Sakemaot ol jen we i holem yufala, mo kam fored aot long ples blong tudak, mo girap long das.

24 Nomo tanem agensem brata blong yufala, we tingting blong hem i bin spesel tumas, mo we hem i bin holem ol komanmen stat long taem we yumi bin aot long Jerusalem; mo we hem i bin stap wan tul long ol han blong God, blong karem yumi i kam fored long graon blong promes; sapos i no bin from hem, bae yumi bin ded long hanggri long

ples we i no gat man long hem; be, yufala i bin lukaotem blong tekemaot laef blong hem; yes, mo hem i bin safa plante sore from yufala.

25 Mo mi fraet tumas mo mi seksek from yufala, mi fraet se bae hem i safa bakegen; from luk, yufala i bin talem se hem i bin lukaotem paoa mo raet ova long yufala; be mi save se hem i no bin lukaotem paoa o raet ova long yufala, be hem i bin lukaotem glori blong God mo gudfala laef we i no save finis blong yufala.

26 Mo yufala i bin toktok nogud from hem i bin toktok klia long yufala. Yufala i talem se hem i bin toktok strong; yufala i talem se hem i bin kros long yufala; be luk, strong toktok blong hem i bin strong tru long paoa blong toktok blong God, we i bin stap long hem; mo samting ia we yufala i singaotem kros i bin trutok, folem samting we i stap long God, we hem i no bin save holem bak, i talemaot strong long saed blong ol rabis fasin blong yufala.

27 Mo i mas olsem se paoa blong God i mas stap wetem hem, kasem taem we hem i givim oda long yufala se yufala i mas obei. Be luk, i no bin hem, be hem i bin Spirit blong Lod we i bin stap long hem, we i bin openem maot blong hem blong toktok i mekem se hem i no save sarem maot blong hem.

28 Mo nao boe blong mi, Leman, mo tu Lemyul mo Sam, mo ol boe blong mi we oli ol boe blong Ismael, luk, sapos yufala

i lisin long voes blong Nifae, bae yufala i no ded. Mo sapos yufala i lisin long hem mi livim long yufala wan blesing, yes, hem i fASFala blesing blong mi.

29 Be sapos yufala i no lisin long hem bae mi tekemaot fASFala blesing blong mi, yes, hem i blesing blong mi mo bae i stap long hem.

30 Mo nao, Soram, mi toktok long yu: Luk, yu yu wan wokman blong Leban; Be, oli bin tekemaot yu long graon blong Jerusalem, mo mi save se yu yu wan tru fren long boe blong mi, Nifae, blong oltaem.

31 From samting ia, from yu bin holem taet fet bae hem i blesem ol pikinini blong yu wetem ol pikinini blong hem blong oli stap wetem fulap samting long fes blong graon ia; mo i no gat wan samting, hemia nomo sapos i no gat rabis fasin long medel blong olgeta, bae i kilim o smasem gud laef blong olgeta long fes blong graon ia blong oltaem.

32 From samting ia, sapos yufala i holem ol komanmen blong Lod, Lod i bin konsekret-em graon ia blong kam wan sefples blong ol pikinini blong yu wetem ol pikinini blong boe blong mi.

---

## JAPTA 2

---

*Pemaot blong yumi i kam tru long Tabu Mesaea—Fridom blong jus (raet blong jus) i mas stap blong stap laef mo gru—Adam i bin foldaon blong mekem se ol man i save stap—Ol man i fri blong*

*jusum fridom mo laef we i no save finis. Raonabaot 588–570 yia bifo Kraes i bon.*

Mo nao, Jakob, mi toktok long yu: Yu yu fasbon blong mi long ol dei we mi stap kasem had taem long ples we i no gat man long hem. Mo luk, taem we yu smol, yu bin safa plante hadtaem mo plante sore, from ol rabis fasin blong ol brata blong yu.

2 Be, Jakob, fasbon blong mi long ples we i no gat man long hem, yu save ol bigfala samting blong God; mo bae hem i konsekret-em ol hadtaem blong yu blong oli kam wan blesing blong yu.

3 From samting ia, bae God i blesem sol blong yu, mo bae yu stap sev wetem brata blong yu, Nifae; mo ol dei blong yu bae yu wok blong God. From samting ia, mi save se hem i pemaot yu, from stret fasin blong Ridima blong yu; from yu bin luk se long en blong taem we God i makem, hem i kam blong karem i kam fasin blong sevem man long evri man.

4 Mo yu bin luk glori blong hem taem we yu yangfala glori blong hem; from samting ia bae hem i blesem yu, olsem olgeta ia we bae hem i prij long olgeta long taem we hem i stap long bodi blong mit mo bun; from Spirit i semak, yestedei, tede mo long oltaem. Mo rod i rere stat long taem we man i bin foldaon, mo fasin blong sevem man i fri.

5 Mo ol man oli kasem inaf tijing blong mekem se oli save

gud aot long nogud. Mo loa i go long evri man. Mo tru long loa i no gat wan bodi blong mit mo bun we i save talem se hem i no gat rong; o tru long loa God i katemaot evri man. Yes, folem loa blong wol hem i bin katemaot olgeta; mo tu, folem loa blong Spirit oli ded long wanem we i gud, mo bae oli harem nogud blong oltaem.

6 From samting ia, fasin blong pemaot man i kam long mo tru Tabu Mesaea; from hem i fulap long gladhat mo trutok.

7 Luk, hem i givim hemwan bakegen wan sakrifaes blong sin, blong mekem wanem we loa i askem long olgeta we i gat wan hat we i fulap wetem sore mo wan spirit we i wantem blong sakem sin; mo en blong loa ia i no save kam long olgeta we i no olsem.

8 From samting ia, hamas nao hem i impoten blong mekem ol samting ia i go long evri man we i stap long wol, blong mekem se oli save gat save se i no gat wan bodi blong mit mo bun we i save stap wetem God, hemia nomo sapos i no tru long ol gudfala wok, mo sore, mo gladhat blong Tabu Mesaea, we i givim laef blong hem long saed blong bodi blong mit mo bun, mo i tekem bak bakegen tru long paoa blong Spirit, blong mekem se hem i save mekem i hapen laef bakegen blong ol ded, from hem i faswan we bae i girap.

9 From samting ia, hem i fasfala frut blong God, i semak olsem we bae hem i givhan

long ol pikinini blong ol man; mo olgeta we oli bilif long hem bae oli sev.

10 Mo from fasin ia blong givhan from evriwan, olgeta evriwan i kam long God; from samting ia, oli stanap long fes blong hem, blong kasem jajmen long hem, folem trutok mo tabu fasin we i stap long hem. From samting ia, ol en blong loa we Tabu Wan i bin givim finis, i mekem se panis we i joen wetem loa i hapen, we panis we i joen wetem loa hem i defren olgeta long hapi we i joen wetem loa, blong mekem ol en blong Atonmen i hapen—

11 From i mas nid i stap, se i mas gat wan fasin blong go agens long evri samting. Sapos i no olsem, fasbon blong mi long ples we i no gat man long hem, stret fasin i no save hapen, mo tu fasin nogud, mo tabu fasin o ol sore, mo tu gud o nogud. From samting ia, evri samting bae i mas kam tugeta long wan; from samting ia sapos i kam tugeta blong mekem wan bodi, bae i mas stap olsem se i ded, from i no gat laef o ded, mo roten o no roten, hapi o sore, mo save luksave o no save luksave.

12 From samting ia, i mas olsem se God i bin mekem samting ia blong nating; from samting ia, bae i no bin gat wan yus long en, blong mekem wol ia. From samting ia, samting ia bae i mas smasem gud waes tingting blong God mo ol stamba tingting blong hem we i blong laef we i no save finis, mo tu paoa, mo sore, mo jastis blong God.

13 Mo sapos bae yufala i talem se i no gat loa, bae yufala i talem tu se i no gat sin. Sapos bae yufala i talem se i no gat sin, bae yufala i talem tu se i no gat stret fasin. Mo sapos i no gat stret fasin i no gat hapi. Mo sapos i no gat stret fasin o hapi i no gat panis o sore. Mo sapos ol samting ia i no stap i no gat God. Mo sapos i no gat God yumi i no gat, mo wol ia i no gat; from God i no bin save mekem ol samting ia, o ol samting we i save wok o we i save afektem ol narafala samting; from samting ia, evri samting bae i bin lus.

14 Mo nao, ol boe blong mi, mi talem long yufala ol samting ia blong gud blong yufala mo blong yufala i lanem ol samting ia; from i gat wan God, mo hem i bin mekem evri samting, ol heven tugeta wetem wol, mo evri samting we i stap long olgeta, ol samting we i save wok tugeta wetem ol samting we i afektem ol narafala samting.

15 Mo blong mekem ol stamba tingting blong hem blong laef we i no save finis i hapen, long en blong ol man, afta hem i bin mekem fas mama mo papa blong yumi, mo ol anamol blong ol plantesen mo ol pigin blong skae, mo blong endem, evri samting we hem i bin mekem, i mas gat wan samting we i agens; olsem frut we i no blong kakae blong go agensem tri blong laef; wan i swit mo naran i konkon.

16 From samting ia, Lod God i bin givim long man blong hem i fri blong jus blong hemwan.

From samting ia, man i no save jus blong hemwan sapos i no gat wan o narafala wan blong pulum tingting blong hem.

17 Mo mi, Lihae, folem ol samting we mi bin ridim, mi mas ting se wan enjel blong God, folem wanem we oli bin raetem, i bin foldaon long heven; from samting ia, hem i bin kam wan devel, from hem i bin lukaotem wanem we i nogud long fored blong God.

18 Mo from hem i bin foldaon long heven, mo i bin kam blong harem nogud blong oltaem, hem i bin lukaotem tu blong mekem evri man long wol i harem nogud. From samting ia, hem i bin talem long Iv, yes, olfala snek ia, we i devel, we i papa blong evri giaman toktok, from samting ia hem i bin talem: Kakae long frut ia we i no blong kakae, mo bae yu no kasem ded, be bae yu kam olsem God, bae yu save ol samting we i gud mo ol samting we i nogud.

19 Mo afta Adam mo Iv i bin kakae long frut ia we i no blong kakae, God i bin sakemaot tufala long garen blong Iden, blong wok long graon.

20 Mo oli bin bonem ol pikinini, yes, hem i famle blong ful wol.

21 Mo ol dei blong ol pikinini blong ol man i bin kam longwan, folem tingting blong God, blong oli save sakem sin taem we oli stap long bodi blong mit mo bun; from samting ia, ples blong olgeta i bin kam wan ples blong tes, mo laef blong olgeta i bin kam longwan, folem ol

komanmen we Lod God i bin givim long ol pikinini blong ol man. From hem i bin givim komanmen se evri man i mas sakem sin; from hem i bin soemaot long evri man we oli bin lus, from sin blong mama mo papa blong olgeta.

22 Mo nao, luk, sapos Adam i no bin sin bae hem i no bin foldaon, be bae hem i bin stap long garen blong Iden. Mo evri samting we God i bin mekem bae i mas bin stap semak olsem taem we afta hem i bin mekem olgeta; mo bae oli mas bin stap semak blong oltaem, mo bae oli no gat en.

23 Mo bae oli no bin gat eni pikinini; from samting ia, bae oli bin stap long wan ples we oli no gat rong from oli no save, oli no gat glad, from oli no bin save sore; oli no bin mekem eni gud, from oli no bin save sin.

24 Be luk, evri samting i bin hapen long waes tingting blong hem, we i save evri samting.

25 Adam i bin foldaon blong mekem se man i save stap; mo ol man i stap, blong oli save gat glad.

26 Mo Mesaea i kam long en blong taem we God i makem, blong hem i save pemaot ol pikinini blong ol man long foldaon. Mo from hem i bin pemaot olgeta long foldaon oli bin kam fri blong oltaem, oli save gud aot long nogud; oli fri blong jus blong olgeta bakegen mo i no save gat eni samting we i afektem olgeta, hemia nomo sapos i no tru long panis blong loa, long bigfala mo lasfala dei,

folem ol komanmen we God i bin givim.

27 From samting ia, ol man i fri folem bodi blong mit mo bun; mo oli kasem evri samting we i gat nid long man. Mo oli fri blong jusum fridom mo laef we i no save finis, tru long bigfala Man blong givhan, blong evri man, o blong jusum blong kam prisena mo ded, folem fasin blong kam prisena mo paoa blong devel; from hem i lukaotem blong mekem se evri man i save harem nogud olsem hem.

28 Mo nao, ol boe blong mi, mi wantem se yufala i dipen long bigfala Man blong givhan, mo obei long ol bigfala komanmen blong hem; mo stap strong wetem fet long ol toktok blong hem, mo jusum laef we i no save finis, folem wanem Tabu Spirit blong hem i wantem.

29 Mo no jusum ded we i no save finis, folem wanem we bodi blong mit mo bun i wantem mo ol nogud we i stap long hem, we i givim spirit blong devel paoa blong tekem prisena, blong tekem yufala daon long hel, blong hem i save rulum yufala long kingdom blong hemwan.

30 Mi bin talem ol smol toktok ia long yufala evriwan, ol boe blong mi, long ol las dei blong tes blong mi; mo mi bin jusum gud pat, folem ol toktok blong profet. Mo mi no gat eni narafala stamba tingting be hemia nomo gudfala laef we i no save finis, blong ol sol blong yufala. Amen.

## JAPTA 3

*Josef long Ijip i bin lukim ol man blong Nifae long wan visen— Hem i bin talemaot profesi long saed blong Josef Smit, sia blong ol lata-dei; long saed blong Moses, we bae i mekem Isrel i go fri; mo long taem we Buk blong Momon bae i kamaot. Raonabaot 588–570 yia bifo Kraes i bon.*

Mo nao mi toktok long yu, Josef, lasbon blong mi. Yu bin bon long ples we i no gat man long hem blong ol hadtaem blong mi; yes, long ol dei blong bigfala sore blong mi mama blong yu i bin bonem yu.

2 Mo bae Lod i konsekretem graon ia long yu tu, we i wan gudgudfala graon, blong graon we i kam long ol papa blong yu, we i blong yu mo ol pikinini blong yu, wetem ol brata blong yu, we i stap blong yu oltaem, sapos i hapen se bae yu holem ol komanmen blong Tabu Wan blong Isrel.

3 Mo nao, Josef, lasbon blong mi, we mi bin karem yu aot long ples we i no gat man long hem blong ol hadtaem blong mi, bae Lod i blesem yu blong oltaem, se ol pikinini blong yu bae i no ded evriwan.

4 From luk, yu yu wan pikinini blong ol laen blong mi; mo mi mi kamaot long laen blong Josef we oli bin tekem hem prisena long Ijip. Mo ol kavenan we Lod i bin mekem wetem Josef i bigwan tumas.

5 From samting ia, i tru we Josef i bin lukim dei blong yumi.

Mo hem i bin kasem wan promes long Lod, se aot long ol pikinini blong ol laen blong hem, Lod God bae i statem wan branj we i stret long laen blong Isrel; i no Mesaea, be wan branj we bae i brokaot, be, bae i wan branj we bae Lod i tingbaot hem long ol kavenan blong hem, se bae Mesaea i soemaot hem long olgeta, long ol lata dei, long spirit blong paoa, we bae i karemaot olgeta long tudak i kam long laet—yes, aot long tudak we i haed mo aot long kalabus i go long fridom.

6 From i tru se Josef i bin testifae se: Wan sia bae Lod, God blong mi i resemap, we bae hem i wan sia we bae hem i jusumaot long ol pikinini blong ol laen blong mi.

7 Yes, i tru se Josef i bin talem se: Olsem ia nao Lod i bin talem long mi se: Wan sia bae mi resemap we bae mi jusumaot long ol pikinini blong ol laen blong yu; mo bae ol pikinini blong ol laen blong yu bae oli rispektem hem bigwan. Mo long hem bae mi givim wan komanmen se bae hem i mekem wan wok blong ol pikinini blong ol laen blong yu, ol brata blong hem, we bae i impoten tumas long olgeta, go kasem taem we wok ia bae i tekem olgeta blong ol kavenan we mi bin mekem wetem ol olfala bubu blong yu.

8 Mo bae mi givim long hem wan komanmen se bae hem i no mekem wan narafala wok, be ol wok nomo we bae mi talem hem blong mekem. Mo bae mi mekem hem i kam wan haeman

long ol ae blong mi; from bae hem i mekem wok blong mi.

9 Mo bae hem i hae olsem Moses, we mi bin talem se bae mi resemap yufala, blong mekem ol pipol blong mi i go fri, O laen blong Isrel.

10 Mo bae mi resemap Moses, blong mekem ol pipol blong yu i go fri aot long graon blong Ijip.

11 Be bae mi resemap wan sia i kamaot long ol pikinini blong ol laen blong yu; mo long hem bae mi givim paoa blong karemaot ol toktok blong mi i go long ol pikinini blong ol laen blong yu—mo i no blong karemaot ol toktok blong mi nomo, Lod i talem, be blong mekem olgeta i biliv long ol toktok blong mi, we bae i bin go aot long medel blong olgeta finis.

12 From samting ia, ol pikinini blong ol laen blong yu bae i raet; mo ol pikinini blong ol laen blong Juda bae i raet; mo evri samting we ol pikinini blong ol laen blong yu bae i raetem, mo tu evri samting we ol pikinini blong ol laen blong Juda bae i raetem, bae i gru tugeta, blong blokem ol giaman doktrin mo putum daon ol rao, mo blong stanemap pis long medel blong ol pikinini blong ol laen blong yu, mo blong tekem olgeta blong save long saed blong ol bubu blong olgeta long las dei, mo tu blong save long saed blong ol kavenan blong mi, Lod i talem.

13 Mo aot long ol samting we i slak bae hem i kam strong, long dei we wok blong mi bae i stat long medel blong evri pipol

blong mi, blong karembak yu, O laen blong Isrel, Lod i talem olsem.

14 Mo olsem ia nao Josef i bin profesae: Luk, sia ia Lod bae i blesem; mo olgeta we oli luk-aotem blong kilim ded hem bae Lod i smasem gud olgeta; from promes ia, we mi bin kasem long Lod, blong ol piki-nini blong ol laen blong mi, bae i hapen. Luk, mi save se promes ia bae i hapen;

15 Mo bae oli singaotem nem blong hem olsem nem blong mi, mo bae i olsem nem blong papa blong hem. Mo bae man ia i olsem mi; from samting ia, we Lod bae i karem i kam fored tru long han blong hem, tru long paoa blong Lod bae i tekem ol pipol blong mi i go long fasin blong sevem man.

16 Yes, olsem ia nao Josef i bin profesae: Mi biliv strong long samting ia, olsem we mi biliv long promes blong Moses; from Lod i bin talem long mi, se bae mi sevem ol pikinini blong yu blong oltaem.

17 Mo Lod i bin talem se: Bae mi resemap wan Moses; mo bae mi givim paoa long hem long wan stik; mo bae mi givim save long hem blong raet. Be stil bae mi no save mekem hem i toktok gud, blong mekem se hem i toktok plante, from bae mi no mekem hem i kam strong long toktok. Be bae mi raetem long hem loa blong mi, wetem fingga blong han blong miwan, mo bae mi mekem wan man blong talemaot ol toktok blong hem.

18 Mo Lod i bin talemaot long



mi tu se: Bae mi resemap long ol pikinini blong ol laen blong yu mo bae mi mekem blong hem wan man blong talemaot ol toktok blong hem. Mo mi, luk, bae mi givim long hem se bae hem i raetem ol raeting blong ol pikinini blong ol laen blong yu, i go long ol pikinini blong ol laen blong yu bakegen; mo man blong toktok blong ol pikinini blong ol laen blong yu bae i talemaot ol toktok ia.

19 Mo ol toktok we bae hem i raet bae hem i ol toktok we i gat nid, tru long waes tingting blong mi, we i mas go aot long ol pikinini blong ol laen blong yu. Mo bae i olsem se ol pikinini blong ol laen blong yu, i bin singaot long olgeta aot long das; from mi mi save fet blong olgeta.

20 Mo bae oli singaot aot long das; yes, we i blong sakem sin long ol brata blong olgeta, yes plante jeneresen bae i pas afta long olgeta. Mo bae i kam blong hapen se bae ol singaot blong olgeta bae i go, folem ol isi toktok blong olgeta.

21 From fet blong olgeta ol wok blong olgeta bae i go fored aot long maot blong mi i go long ol brata blong olgeta we oli ol pikinini blong ol laen blong yu; mo ol toktok we i no strong blong olgeta bae mi mekem i kam strong from fet blong olgeta, mekem se bae mi tingbaot kavenan blong mi we mi bin mekem wetem ol bubu blong yu.

22 Mo nao, luk, boe blong mi Josef, folem fasin ia olfala papa blong mi i bin profesae.

23 From samting ia, from kavenan ia yu yu kasem blesing; from ol pikinini blong yu bae oli no ded, from bae oli lisin long ol toktok blong buk.

24 Mo bae i gat wan hae man we bae i kamaot long medel blong olgeta, we bae i mekem plante gudfala samting long ol toktok tugeta wetem ol wok, from hem i wan tul long ol han blong God, wetem plante fet tumas, blong mekem ol bigfala merikel, mo mekem samting we i bigwan long ae blong God, we i mekem se plante blesing i kambak long laen blong Isrel, mo long ol pikinini blong ol brata blong yu, i hapen.

25 Mo nao, God i blesem yu, Josef. Luk, yu yu smol; from samting ia lisin long ol toktok blong brata blong yu, Nifae, mo bae i hapen long yu olsem, folem ol toktok we mi bin talemaot. Tingbaot ol toktok blong papa blong yu we klosap bae i ded. Amen.

---

#### JAPTA 4

---

*Lihae i givim advaes mo i blesem ol pikinini blong hem—Hem i ded mo oli berem hem—Nifae i glad from gudfala fasin blong God—Nifae i putum tras blong hem long Lod blong oltaem. Raonabaot 588–570 yia bifo Kraes i bon.*

Mo nao, mi, Nifae, mi tokbaot long saed blong ol profesi we papa blong mi i bin tokbaot, long saed blong Josef, we oli bin tekem hem i go long Ijip.

2 From luk, i tru se Josef i bin

talemaot profesi long saed blong ol pikinini blong hem. Mo ol profesi we hem i bin raetem i no gat plante we oli moa impoten. Mo hem i bin profesae long saed blong yumi mo ol jeneresen blong yumi blong fiuja; mo hem i bin raetem olgeta long ol buk we oli bin mekem wetem bras.

3 From samting ia, afta we papa blong mi i bin stop blong toktok long saed blong ol profesi blong Josef, hem i bin singaotem ol pikinini blong Leman, ol boe blong hem, mo ol gel blong hem, mo hem i bin talem long olgeta se: Luk, ol boe blong mi, mo ol gel blong mi, we i ol boe mo ol gel blong fasbon blong mi, mi wantem se yufala i lisin long ol toktok blong mi.

4 From Lod God i bin talem se: I semak olsem we bae yufala i holem ol komanmen blong mi, bae yufala i kam antap gud long graon; mo i semak olsem we bae yufala i no holem ol komanmen blong mi, bae mi sakemaot yufala long fes blong mi.

5 Be luk, ol boe mo ol gel blong mi, mi no save go daon long gref blong mi sapos mi no livim wan blesing long yufala; From luk, mi save se sapos oli tijim yufala long taem we yufala i pikinini, long saed blong rod ia we yufala i mas wokbaot long hem, bae yufala i no livim rod ia.

6 From samting ia, sapos Lod i panisim yufala, luk, mi livim blesing blong mi long yufala, blong Lod i save tekemaot panis ia long yufala mo putum long ol

hed blong ol mama mo ol papa blong yufala.

7 From samting ia from blesing blong mi, Lod God bae i no letem se yufala i ded; from samting ia, bae hem i gat sore long yufala mo long ol pikinini blong yufala blong oltaem.

8 Mo i bin hapen se afta papa blong mi i bin stop blong toktok long ol boe mo ol gel blong Leman, hem i bin mekem se ol boe mo ol gel blong Lemyul blong oli karem olgeta i kam long hem.

9 Mo hem i bin talem long olgeta, se: Luk, ol boe blong mi mo ol gel blong mi, we i ol boe mo ol gel blong nambatu boe blong mi; luk mi givim long yufala semfala blesing we mi bin givim long ol boe mo ol gel blong Leman; from samting ia, bae yufala i no save ded evriwan; be long en ol pikinini blong yufala bae oli kasem blesing.

10 Mo i bin hapen se taem we papa blong mi i bin stop blong toktok long olgeta, luk, hem i bin toktok long ol boe blong Ismael, yes, mo tu evri famle blong hem.

11 Mo afta hem i bin stop blong toktok long olgeta, hem i bin talem long Sam se: God bae i blesem yu, mo ol pikinini blong yu; from bae yu kasem graon ia olsem brata blong yu Nifae. Mo ol pikinini blong yu bae oli kaotem wetem ol pikinini blong hem; mo bae yu kam olsem brata blong yu, mo ol pikinini blong yu olsem ol pikinini blong hem; mo bae yu

kasem blesing long evri dei blong yu.

12 Mo i bin hapen se afta papa blong mi, Lihae, i bin toktok long evri famle blong hem, folem wanem hem i bin filim long hat blong hem mo Spirit blong Lod we i bin stap long hem, hem i bin kam olfala. Mo i bin hapen se hem i bin ded, mo oli bin berem hem.

13 Mo i bin hapen se i no plante dei afta ded blong hem, Leman mo Lemyul mo ol boe blong Ismael i bin kam kros long mi from Lod i bin toktok strong agensem olgeta.

14 From mi, Nifae, Lod i bin pusum mi blong toktok long olgeta, folem toktok blong hem; from mi bin talemaot plante samting long olgeta, mo tu papa blong mi, bifo long ded blong hem; plante long ol toktok ia mi raetem long ol narafala buk blong mi; from wan pat we i gat moa histri mi bin raetem long ol narafala buk blong mi.

15 Mo long olgeta ia mi raetem ol samting blong sol blong mi, mo plante long ol skripja we oli bin raetem long ol buk we oli bin mekem wetem bras. From sol blong mi i glad long ol skripja, mo hat blong mi i tingting hevi long olgeta, mo mi raetem ol samting ia blong ol pikinini blong mi i lanem olgeta mo oli save yusum blong helpem olgeta.

16 Luk, sol blong mi i glad long ol samting blong Lod; mo hat blong mi i tingting hevi oltaem long ol samting we mi bin luk mo mi bin harem.

17 Be, i nomata long bigfala lav blong Lod, we hem i soem long mi ol bigfala mo gudfala wok blong hem, hat blong mi i singaot se: O, mi mi wan man we mi no hapi tumas! Yes, hat blong mi i sore from bodi blong mit mo bun blong mi; sol blong mi i harem nogud from ol rabis fasin blong mi.

18 Ol temtesen i raonem mi, tugeta wetem ol sin we i givim isi trabol long mi.

19 Mo taem we mi bin wantem stap hapi, hat blong mi i mekem noes olsem we i harem i soa tumas from ol sin blong mi; be, mi save long huia mi bin trastem.

20 God blong mi i bin sapot blong mi; hem i bin lidim mi tru long ol hadtaem blong mi long ples we i no gat man long hem; mo hem i bin sevem mi long ol bigfala solwota we i dip tumas.

21 Hem i bin fulumap mi wetem lav blong hem, kasem taem we i olsem se bodi blong mit mo bun blong mi i bon.

22 Hem i bin blokem ol enemi blong mi, kasem taem we oli seksek long fored blong mi.

23 Luk, hem i bin harem prea blong mi long dei, mo hem i bin givim save long mi tru long ol visen long naetaem.

24 Mo long dei mi bin kam strong long bigfala prea long fored blong hem; yes, mi bin sendem voes blong mi i go antap olgeta; mo ol enjel i bin kamdaon mo givhan long mi.

25 Mo hem i bin karem bodi blong mi i go longwe long ol

bigfala hil we i hae tumas wetem ol wing blong Spirit blong hem. Mo ol ae blong mi i bin luk ol bigfala samting, yes, oli bigwan tumas blong ol man; taswe mi bin kasem wan komanmen we mi no mas raetem ol samting ia.

26 O ale, sapos mi bin lukim ol bigfala samting olsem, sapos Lod long ol wok we hem i mekem i kamdaon long ol pikinini blong ol man i bin visitim ol man long plante sore olsem, from wanem hat blong mi i sud krae mo sol blong mi i stap long vale blong sore, mo mit blong mi i kam roten, mo paoa blong mi i kam slak, from ol hadtaem blong mi?

27 Mo from wanem mi sud foldaon long sin, from bodi blong mit mo bun blong mi? Yes, from wanem mi sud foldaon long ol temtesem, blong givim janis long nogud wan blong stap long hat blong mi blong smasem gud pis blong mi mo mekem sol blong mi i safa? From wanem mi stap kros from ol enemy blong mi?

28 Wekap, sol blong mi! Nomo stap harem nogud long sin. Stap hapi, O hat blong mi, mo nomo givim ples blong enemy blong sol blong mi.

29 No stap kros bakegen from ol enemy blong mi. No letem paoa blong mi i slak from ol hadtaem blong mi.

30 Stap hapi, O hat blong mi, mo askem long Lod, mo talem se: O Lod, bae mi presem yu blong oltaem; yes, sol blong mi bae i hapi long yu, God

blong mi, mo ston we bae i sevem mi.

31 O Lod, bae yu pemaot sol blong mi? Bae yu tekemaot mi long ol han blong ol enemy blong mi? Bae yu mekem mi blong seksek taem we mi luk sin?

32 Bae ol get blong hel i klos oltaem long fored blong mi, from we hat blong mi i brok mo spirit blong mi i wantem sakem sin! O Lod, bae yu no sareem ol get blong stret fasin blong yu long fored blong mi, blong mekem se mi save wokbaot long rod blong vale we i daon, blong mi save folem gud long stret rod!

33 O Lod, bae yu raonem mi wetem longfala klos blong stret fasin blong yu! O Lod, bae yu mekem wan rod blong mi blong ronwe long ol enemy blong mi! Bae yu mekem rod blong mi i stret long fored blong mi! Bae yu no putum wan samting we i blokem rod blong mi—be mi wantem se yu mekem rod blong mi i klia long fored blong mi, mo no blokem rod blong mi, be ol rod blong enemy blong mi.

34 O Lod, mi bin trastem yu, mo bae mi trastem yu blong oltaem. Bae mi no putum tras blong mi long han blong bodi blong mit mo bun; from mi save se man i kasem panis, hem we i putum tras blong hem long han blong bodi blong mit mo bun. Yes, man i kasem panis, hem we i putum tras blong hem long man o i mekem bodi blong mit mo bun i han blong hem.

35 Yes, mi save se God bae i glad blong givim eni samting long man we i askem. Yes, God

blong mi bae i givim long mi, sapos mi no askem eni samting we i rong; from samting ia bae mi singaot laod long yu; yes, bae mi singaot long yu, God blong mi, ston blong stret fasin blong mi. Luk, voes blong mi bae i go antap long yu blong oltaem, ston blong mi mo God blong mi we i no gat en. Amen.

---

### JAPTA 5

---

*Ol man blong Nifae i seraotem olgeta long ol man blong Leman, holem loa blong Moses, mo oli bildim wan tempol—From ol man blong Leman i no biliv, Lod i sakemaot olgeta long fes blong hem, mo oli kasem panis, mo oli mekem bigfala trabol long ol man blong Nifae. Raonabaot 588-559 yia bifo Kraes i bon.*

LUK, i bin hapen se mi, Nifae, mi bin askem plante long Lod, God blong mi, from kros blong ol brata blong mi.

2 Be luk, kros blong olgeta i bin kam antap agensem mi, inaf we i mekem se oli bin lukaotem blong kilim ded mi.

3 Yes, oli bin komplem agensem mi, oli se: Yangfala brata blong yumi i ting se bae hem i rulum yumi; mo yumi bin kasem plante hadtaem from hem; from samting ia, nao bae yumi kilim ded hem, blong yumi nomo gat hadtaem from ol toktok blong hem. From luk, bae yumi no letem hem i kam man blong rul blong yumi; from raet ia i blong yumi, we yumi ol olfala brata, blong rulum ol pipol ia.

4 Nao mi no raetem long ol buk ia, evri toktok we oli bin komplem agensem mi. Be hem i inaf long mi blong talemaot se, oli bin lukaotem blong tekemaot laef blong mi.

5 Mo i bin hapen se Lod i bin wonem mi, se mi, Nifae, mi mas aot long olgeta mo ronwe i go long ples we i no gat man long hem, mo olgeta we bae oli go wetem mi.

6 From samting ia, i bin hapen se mi, Nifae, mi bin tekem famle blong mi, mo tu Soram mo famle blong hem, mo Sam, bigfala brata blong mi mo famle blong hem, mo Jakob mo Josef, tufala yangfala brata blong mi, mo tu ol sista blong mi, mo olgeta we bae oli go wetem mi. Mo olgeta we bae oli go wetem mi oli olgeta we oli bin biliv long toktok blong wonem mo ol revelesen blong God; from samting ia, olgeta ia i bin lisin long ol toktok blong mi.

7 Mo mifala i bin tekem ol tenet blong mifala mo eni narafala samting we mifala i save tekem, mo mifala i bin wokbaot long ples we i no gat man long hem blong spes blong plante dei. Mo afta we mifala i bin wokbaot blong spes blong plante dei mifala i bin stanemap ol tenet blong mifala.

8 Mo ol pipol blong mi i bin wantem se mifala i singaotem ples ia Nifae; from samting ia, mifala i bin singaotem ples ia Nifae.

9 Mo evriwan we i bin stap wetem mi, oli bin tekem long

olgeta blong singaotem olgeta bakegen ol pipol blong Nifae.

10 Mo mifala i bin meksua se mifala i obei ol jajmen, mo ol loa, mo ol komanmen blong Lod long evri samting, folem loa blong Moses.

11 Mo Lod i bin stap wetem mifala; mo mifala i bin kam antap gud tumas; from mifala i bin planem sid, mo mifala i bin pikimap bakegen plante frut. Mo mifala i bin stat blong lukaotem mo fidim ol grup blong ol anamol, mo ol buluk, mo ol anamol blong evri kaen.

12 Mo mi, Nifae, i bin karem tu ol histri we oli bin raetem long ol buk we oli bin mekem wetem bras; mo tu bol ia, o kampas, we Lod i bin mekem rere wetem han blong hem blong papa blong mi, folem ol samting we mi bin raetem finis.

13 Mo i bin hapen se mifala i bin stat blong kam antap gud tumas, mo blong kam plante long graon.

14 Mo mi, Nifae, mi bin tekem naef blong faet blong Leban, mo long sem fasin blong hem mi bin mekem plante naef blong faet, from mi fraet se tru long eni wei ol pipol we oli singaotem olgeta ol man blong Lemana bae i kam long mifala mo smasem gud mifala; from mi bin save we oli no laekem mi mo ol pikinini blong mi mo olgeta we oli bin singaotem olgeta ol pipol blong mi.

15 Mo mi bin tijim ol pipol blong mi blong bildim ol kaos, mo blong wok long ol defren kaen wud, mo long aean, mo

long kopa, mo long bras, mo long stil, mo long gol, mo long silva, mo long ol gudgudfala aean, we oli bin plante tumas.

16 Mo mi, Nifae, mi bin bildim wan tempol; mo mi bin bildim tempol ia folem fasin blong tempol blong Solomon be hemia nomo mi no bin bildim wetem plante long ol gudgudfala samting we hem i bin yusum; from i no save faenem ol samting ia long graon ia, from samting ia, mi no save bildim tempol ia olsem tempol blong Solomon. Be fasin blong bildim i bin olsem blong tempol blong Solomon; mo fasin blong ol wok blong hem i bin naes tumas.

17 Mo i bin hapen se mi, Nifae, mi bin mekem se ol pipol blong mi i wok, mo blong wok wetem ol han blong olgeta.

18 Mo i bin hapen se oli bin wantem se bae mi kam king blong olgeta. Be mi, Nifae, mi bin wantem se olgeta i no gat wan king; be, mi bin mekem long olgeta folem wanem we i bin stap long paoa blong mi.

19 Mo luk, ol toktok blong Lod i bin hapen long ol brata blong mi, we hem i bin talem long saed blong olgeta se, bae mi kam man blong rul blong olgeta mo tija blong olgeta. From samting ia, mi bin stap olsem man blong rul blong olgeta mo wan tija blong olgeta, folem ol komanmen blong Lod, kasem taem we oli bin lukaotem blong kilim ded mi.

20 From samting ia, toktok blong Lod i bin hapen we hem i bin talem long mi, i se: I semak

olsem we oli no lisin long ol toktok blong yu bae mi katemaot olgeta long fored blong Lod. Mo luk, oli bin katemaot olgeta long fored blong hem.

21 Mo Lod i bin mekem se panis i kam long olgeta, yes, hem i wan rabis panis, from ol rabis fasin blong olgeta. From luk, oli bin mekem ol hat blong olgeta i kam strong agensem hem, blong mekem se oli bin kam olsem wan smol hadston; from samting ia, from oli bin waet, mo luk naes tumas mo oli gudfala, blong mekem se ol pipol blong mi i no wantem olgeta Lod God i bin mekem se wan skin we kala blong hem i dak i bin kam long olgeta.

22 Mo olsem ia nao Lod God i talem se: Bae mi mekem se oli kam rabis long tingting blong ol pipol blong yu, hemia nomo sapos oli no sakem ol rabis fasin blong olgeta.

23 Mo bae mi panisim ol laen blong man we i miks wetem laen blong olgeta; from bae oli kasem panis, yes wetem sem panis. Mo Lod i bin talem ol samting ia, mo hem i bin hapen.

24 Mo from panis blong olgeta we i bin stap long olgeta oli bin kam wan pipol we i les, oli fulap wetem tingting blong mekem rabis fasin mo yusum fasin blong haedem ol samting mo oli bin lukaotem long ples we i no gat man long hem, ol anamol we i kakae ol narafala anamol.

25 Mo Lod God i bin talem long mi se: Bae oli mekem trabol long ol laen blong yu, blong mekem olgeta i tingbaot mi; mo

i semak olsem we oli no tingbaot mi, mo lisin long ol toktok blong mi, bae oli mekem trabol long olgeta kasem taem we oli ded.

26 Mo i bin hapen se mi, Nifae, mi bin konsekretem Jakob mo Josef, blong oli kam ol pris mo ol tija ova long graon blong pipol blong mi.

27 Mo i bin hapen se mifala i bin laef folem fasin blong stap hapi.

28 Mo teti yia i bin pas i gowe long taem we mifala i aot long Jerusalem.

29 Mo mi, Nifae, mi bin raetem ol histri long ol buk blong mi, we mi bin mekem, blong ol pipol blong mi kasem naoia.

30 Mo i bin hapen se Lod God i bin talem long mi se: Mekem ol narafala buk; mo bae yu raetem plante samting long olgeta we i gud long tingting blong mi, blong mekem se oli save helpem ol pipol blong yu.

31 From samting ia, mi, Nifae, blong obei long ol komanmen blong Lod, mi bin go mo mekem ol buk ia we mi bin raetem ol samting ia long hem.

32 Mo mi bin raetem ol samting we i mekem God i glad. Mo sapos ol pipol blong mi i glad wetem ol samting blong God, bae oli glad tu wetem ol raeting blong mi we i stap long ol buk ia.

33 Mo sapos ol pipol blong mi i wantem blong save moa samting long saed blong stret histri blong ol pipol blong mi, oli mas stadi long ol narafala buk blong mi.

34 Mo hem i inaf long mi blong

talem se foti yia i bin pas i gowe, mo mifala i bin gat ol faet mo ol rao finis wetem ol brata blong mifala.

---

### JAPTA 6

---

*Jekob i talem bakegen ol histri blong ol Jiu: Ol Jiu i go prisena long Babilon mo oli kambak bakegen; wok mo taem we oli krusifaem Tabu Wan blong Isrel; ol help we ol Jentael i givim; mo lata- dei kambak blong ol Jiu taem we oli biliv long Mesaea. Raonabaot 559-545 yia bifo Kraes i bon.*

OL toktok blong Jekob, brata blong Nifae, we hem i bin talem-aot long ol pipol blong Nifae.

2 Luk, ol brata blong mi we mi lavem tumas, mi, Jekob, God i bin singaotem mi mo i bin odenem mi folem fasin blong tabu oda blong hem, mo brata blong mi Nifae i bin konsekretem mi, hem we yufala i lukluk long hem olsem wan king o olsem wan man blong lukaotem gud yufala, mo hem we yufala i dipen long hem blong stap sef, luk yufala i save se mi bin talem long yufala plante samting tumas.

3 Be, mi toktok long yufala bakegen; from mi wantem blong helpem gudfala laef blong ol sol blong yufala. Yes, wari blong mi i bigwan from yufala; mo yufala i save se hem i bin stap olsem oltaem. From mi bin talem strong long yufala wetem had wok oltaem; mo mi bin tijim yufala ol toktok blong papa blong mi; mo mi bin toktok

long yufala long saed blong evri samting we oli bin raetem, stat long taem we wol ia i bin stat.

4 Mo nao, luk, bae mi toktok long yufala long saed blong ol samting we i stap, mo we bae oli kam; from samting ia, bae mi ridim long yufala ol toktok blong Aesea. Mo oli ol toktok we brata blong mi i bin wantem se bae mi talemaot long yufala. Mo mi toktok long yufala blong mekem yufala i kam gud, blong yufala i save lanem mo presem nem blong God blong yufala.

5 Mo nao, ol toktok we bae mi ridimaot oli olgeta we Aesea i bin talemaot long saed blong ol laen blong Isrel; from samting ia, yufala i save yusum ol toktok ia long yufala, from yufala i pat blong laen blong Isrel. Mo i gat plante samting we Aesea i bin talemaot we yufala i save yusum long yufala, from yufala i pat blong laen blong Isrel.

6 Mo nao, hemia ol toktok: Olsem ia nao Lod God i talem: Luk, bae mi leftemap han blong mi long ol Jentael, mo stanemap flag blong mi long ol pipol; mo bae oli karem ol boe blong yufala long ol han blong olgeta, mo bae oli karem ol gel blong yufala long ol solda blong olgeta.

7 Mo ol king bae i stap olsem ol papa we oli stap givim gudfala kakae long yufala, mo ol kwin blong olgeta bae i stap olsem ol mama we oli stap givim gudfala kakae long yufala; bae oli bodaon long yufala wetem ol fes blong olgeta i fesem graon, mo likimap ol das long ol leg blong yufala; mo bae yufala



i save se mi mi Lod; from bae oli no sem we oli wet long mi.

8 Mo nao mi, Jakob, bae mi toktok smol long saed blong ol toktok ia. From luk, Lod i bin soemaot long mi se olgeta we i bin stap long Jerusalem, long ples we yumi bin kamaot long hem, oli bin kilim ded olgeta mo oli bin tekem olgeta i go olsem prisena longwe.

9 Be, Lod i bin soem long mi se bae oli kambak bakegen. Mo hem i bin soemaot long mi tu se Lod God, Tabu Wan blong Isrel, bae i soemaot hemwan long olgeta long bodi blong mit mo bun; mo afta we bae hem i soemaot hemwan bae oli wipim hem mo krusifaem hem, folem ol toktok blong enjel ia we i bin talem samting ia long mi.

10 Mo afta oli bin mekem ol hat blong olgeta i kam strong mo oli bin kam stronghed agensem Tabu Wan blong Isrel, luk, ol jajmen blong Tabu Wan blong Isrel bae i kam long olgeta. Mo dei i kam we bae oli kasem panis mo tu bae oli kasem hadtaem.

11 From samting ia, afta oli ronemaot olgeta i go ia mo i go ia, from olsem ia nao enjel i talem se, plante bae oli kasem hadtaem long bodi blong mit mo bun, mo bae Lod i no letem olgeta blong ded, from ol prea blong ol man we i yusum fet; bae oli seraot olbaot, mo bae oli kasem panis, mo ol man bae i no laekem olgeta; be, Lod bae i gat sore long olgeta, mekem se taem we oli kam blong save long saed blong Ridima blong olgeta, bae God i mekem se olgeta i

kambak tugeta bakegen long ol graon blong olgeta we i kam long ol papa blong olgeta.

12 Mo God bae i blesem ol Jentael, olgeta ia we profet i bin raetem long saed blong olgeta; from luk, sapos i olsem se bae oli sakem sin mo no faet agensem Saeon, mo no joenem olgeta wetem bigfala mo rabis jos ia, bae oli sev; from Lod God bae i mekem se ol kavenan blong hem i hapen we hem i bin mekem wetem ol pikinini blong hem; mo from stamba tingting ia profet i bin raetem ol samting ia.

13 From samting ia, olgeta we oli faet agensem Saeon mo ol kavenan pipol blong Lod bae oli likimap ol das long ol leg blong olgeta; mo ol pipol blong Lod bae oli no sem. From ol pipol blong Lod oli olgeta we oli stap wet long hem; from oli stap wet yet long taem we Mesaea bae i kam.

14 Mo luk, folem ol toktok blong profet, Mesaea bae i stat bakegen long nambatu taem blong karembak olgeta; from samting ia, bae hem i soemaot hemwan bakegen long olgeta wetem paoa mo bigfala glori, go kasem taem we hem i smasem gud ol enemi blong olgeta, taem we dei ia i kam we olgeta bae oli biliv long hem; mo bae hem i no smasem gud wan we i biliv long hem.

15 Mo olgeta we oli no biliv long hem bae hem i smasem gud olgeta, wetem faea, mo wetem bigfala win mo ren, mo wetem ol taem we graon i seksek, mo

wetem ol blad i ron, mo wetem rabis sik, mo wetem hadtaem blong kasem kakae. Mo bae oli save se Lod i God, Tabu Wan blong Isrel.

16 From yu yu ting se oli save tekem ol kakae blong hem we i strong, o lego olgeta we oli kam prisena long fasin blong folem loa?

17 Be olsem ia nao Lod i talem: Ol prisena tu blong olgeta we i strong bae oli tekemaot olgeta, mo bae oli lego ol kakae blong trabol meka; from God we i gat olgeta Paoa bae i tekemaot ol kavenan pipol blong hem. From olsem ia nao Lod i talem: Bae mi faet wetem olgeta we i faet wetem yufala—

18 Mo bae mi fidim olgeta we i mekem rabis fasin long yufala, wetem ol mit blong olgeta bakegen; mo bae oli drong wetem blad blong olgeta bakegen olsem wetem waen we i swit; Mo evri bodi blong mit mo bun bae i save se mi Lod, mi mi Sevyia blong yufala mo Ridi-ma blong yufala, Strong Wan blong Jakob.

---

### JAPTA 7

---

*Aesea i toktok olsem se hem i Mesaea—Mesaea bae i gat tang blong ol waes man—Bae hem i givim baksaed blong hem long olgeta we i wipim hem—I no gat wan man we bae i save blokem hem—Luk long Aesea 50. Raonabaot 559–545 yia bifo Kraes i bon.*

YES, from olsem ia nao Lod i talem: Mi mi bin putum yu

long saed, o mi bin sendemaot yu blong oltaem? From olsem ia nao Lod i talem: Wehem pepa blong divos blong mama blong yu? Mi bin givim yu long huia, o long wijwan, long ol man we mi gat kaon long olgeta, mi bin salem yu? Yes, long huia mi bin salem yu? Luk, from ol rabis fasin blong yu, yu bin salem yufala bakegen, mo from ol fasin blong brekem loa, blong yufala, yu bin putumaot mama blong yu.

2 From samting ia, taem we mi bin kam, i no bin gat wan man; taem mi bin singaot, yes, i no bin gat wan blong i ansa. O laen blong Isrel, han blong mi i sot tumas long eni wei, we i mekem se i no save pemaot, o mi no gat paoa blong sev? Luk, wetem voes blong mi, mi mekem solwota i drae, mi mekem ol reva blong olgeta i kam olsem wan ples we i no gat man long hem, mo ol fis blong olgeta i sting from ol wota blong olgeta i drae evriwan, mo oli kasem ded from tosta.

3 Mi kavremap ol heven wetem tudak, mo mi kavremap olgeta wetem tudak olsem klos blong olgeta.

4 Lod God i bin givim long mi tang blong ol waes man, blong mekem se mi save olsem wanem blong talem wan toktok long stret taem long yu, O laen blong Isrel. Taem we yu taed, hem i wekemap evri moning. Hem i wekemap sorae blong mi blong lisin olsem wan waes man.

5 Lod God i bin openem sorae blong mi, mo mi no bin

go agensem, mo mi no bin tanem bak.

6 Mi bin givim baksaed blong mi long ol man blong wip, mo ol jik blong mi long olgeta we i bin pulumaot ol hea blong mustas. Mi no bin haedem fes blong mi long olgeta we oli mekem mi sem mo olgeta we oli spet long fes blong mi.

7 From Lod God bae i helpem mi, taswe bae mi no save lus. Taswe mi mekem fes blong mi i luk olsem se oli mekem long ston, mo mi save se bae mi no sem.

8 Mo Lod i stap klosap, mo hem i soemaot se mi no gat rong. Huia bae i rao wetem mi? Bae yumi stanap tugeta. Huia i man we i agensem mi? Letem hem i kam klosap long mi, mo bae mi panisim hem wetem paoa blong maot blong mi.

9 From Lod God bae i helpem mi. Mo olgeta evriwan we bae oli jajem mi, luk, olgeta evriwan bae oli kam olfala olsem ol klos, mo bataflae bae i kakae olgeta evriwan.

10 Huia i stap long medel blong yufala we i fraet long Lod, we i folem voes blong wokman blong hem, we i wokbaot long tudak mo i no gat laet?

11 Luk, yufala evriwan we i laetem faea, we i raonem yufala bakegen wetem ol samting ia we i stap laet long naet, wokbaot long laet blong faea blong yufala mo long ol samting ia we yufala i bin laetem. Samting ia bae yufala i kasem long han blong mi—bae yufala i ledaon wetem sore.

## JAPTA 8

*Long ol las dei, Lod bae i leftemap tingting blong Saeon mo karem Isrel i kam tugeta—Ol pipol we Lod i bin pemaot bae oli kam long Saeon wetem bigfala glad—Luk long Aesea 51 mo 52:1–2. Raonabaot 559–545 yia bifo Kraes i bon.*

LISIN long mi, yufala we i stap folem stret fasin. Luk long ston we oli bin katemaot yufala, mo long dip hol ia we oli bin pulumaot yufala long hem.

2 Luk long Ebrahim, papa blong yufala, mo long Sera, hem we i bin bonem yufala; from mi bin singaotem hemwan nomo, mo mi bin blesem hem.

3 From Lod bae i leftemap tingting blong Saeon, bae hem i leftemap tingting blong evri emti ples blong hem; mo bae hem i mekem ol ples blong hem we i no gat man long hem, i kam olsem Iden, mo drae ples blong hem olsem garen blong Lod. Bae oli faenem glad mo bigfala glad long hem, talem tangkyu mo singsing blong pres.

4 Lisin long mi, ol pipol blong mi; mo givim sorae blong yufala long mi, O kantri blong mi; from wan loa bae i kamaot long mi, mo bae mi mekem jajmen blong mi blong stap olsem wan laet blong ol pipol.

5 Stret fasin blong mi i klosap; fasin blong sevem man blong mi i bin go aot, mo han blong mi bae i jajem ol pipol. Ol aelan bae oli gat hop long mi, mo bae oli gat tras long han blong mi.

6 Leftemap ol ae blong yufala i go long ol heven, mo lukluk long wol we i daon; from ol heven bae oli lus olsem smok, mo wol bae i kam olfala olsem wan klos; mo olgeta we i stap long hem bae oli ded long sem fasin. Be fasin blong sevem man, blong mi bae i stap long oltaem, mo stret fasin blong mi bae oli no save kanselem.

7 Lisin long mi, yufala we i save stret fasin, ol pipol we mi bin raetem loa blong mi long ol hat blong yufala, no fraet long taem we ol pipol i stap blemem yufala, mo tu yufala i no fraet long ol rabis toktok blong olgeta.

8 From bataflae bae i kakae olgeta evriwan olsem wan klos, mo bebet bae i kakae olgeta evriwan olsem wul. Be stret fasin blong mi bae i stap blong oltaem, mo fasin blong sevem man, blong mi long wan jeneresen i go long narafala jeneresen.

9 Wekap, wekap! Putum paoa long yu, O han blong Lod; wekap olsem long ol dei blong bifo. I no yu we i bin katem Rahab, mo bin givim kil long dragon?

10 I no yu we i bin mekem solwota i drae, ol solwota we i dip bigwan; we i bin mekem ol dip ples blong solwota wan rod blong olgeta we oli bin sev blong oli save pas tru long hem?

11 Taswe, ol pipol we Lod i bin pemaot bae oli kambak, mo kam wetem ol singsing long Saeon; mo glad ia we i no save finis mo tabu fasin bae i stap long ol hed blong olgeta; mo bae

oli kasem glad mo hapi; sore mo krae bae i ronwe.

12 Mi mi hem; yes, mi mi hem we i leftemap tingting blong yu. Luk, yu yu huia, blong bae yu stap fraet long man, we bae i ded, mo long boe blong man, we bae i stap olsem gras?

13 Mo yu fogetem Lod, man we i mekem yu, we i bin stretemaot ol heven, mo i mekem fandesen blong wol, mo i bin fraet oltaem evri dei, from kros blong enemi, i olsem se hem i rere blong smasem gud? Mo wehem kros blong enemi?

14 Wan prisena blong wan kantri we i stap farawe i hariap, blong mekem se bae hem i save kam fri, mo mekem se bae hem i no ded long hol, mo blong mekem se bae hem i no sot long bred blong hem.

15 Be mi mi Lod, God blong yu, we ol wef blong mi i bin mekem bigfala noes; Lod blong ol Host i nem blong mi.

16 Mo mi bin putum ol toktok blong mi long maot blong yu, mo mi bin kavremap yu wetem pikja blong han blong mi, blong mekem se mi save planem ol heven mo mekem ol fandesen blong wol, mo talem long Saeon: Luk, yu yu pipol blong mi.

17 Wekap, wekap, stanap, O Jerusalem, we yu bin dring long han blong Lod, kap blong kros blong hem— yu bin dringim ol makas blong kap we i mekem man i seksek from fraet, we oli bin skwisimaot—

18 Mo i no gat wan blong lidim hem long medel blong evri boe we hem i bin bonem; mo tu i no

gat wan we i tekem hem wetem han long evri boe we hem i bin resemap.

19 Tufala boe ia i kam long yu, we bae i sore long yu—ded blong yu mo smasem gud blong yu, mo hanggri mo naef blong faet—mo tru long hem bae mi leftemap tingting blong yu?

20 Ol boe blong yu ol ae i bin foldaon, be tufala ia nomo i no bin foldaon; tufala i slip long kona blong evri rod; olsem wan wael buluk long wan net, oli fulap long kros blong Lod, woning toktok blong God blong yu.

21 Taswe harem samting ia naoia, yu yu gat hadtaem, mo yu drong, mo i no wetem waen.

22 Olsem ia nao Lod blong yu i talem, Lod mo God blong yu i toktok from stamba tingting blong ol pipol blong hem; luk, mi bin tekemaot long han blong yu kap we i mekem man i seksek from fraet, makas blong kap blong kros blong mi; bae yu nomo dring bakegen.

23 Be bae mi putum hem long han blong olgeta we i givim hadtaem long yu; we oli bin talem long sol blong yu se: Bodaon, blong mekem se mifala i save go ova—mo yu yu bin leimdaon bodi blong yu olsem graon mo olsem rod blong olgeta ia we oli bin go ova.

24 Wekap, wekap, putum paoa blong yu long yu, O Saeon; Werem ol naes klos blong yu, O Jerusalem, tabu bigtaon; from stat long taem i go bae i no gat wan bae i kam insaed long yu, olgeta we i no sakomsaes mo olgeta we i no klin.

25 Sekemaot yuwan long das; girap, sidaon, O Jerusalem; tekemaot yuwan long ol rop long nek blong yu, O prisena gel blong Saeon.

---

## JAPTA 9

---

*Ol Jiu bae oli kam tugeta long evri graon blong promes blong olgeta—Atonmen i pemaot man long foldaon—Ol bodi blong ol ded bae i kam aot long gref, mo ol spirit blong olgeta long hel mo long paradaes—Bae oli kasem jajmen—Atonmen i sev long ded, hel, devel, mo harem nogud we i no finis—Ol stret man bae i sev long kingdom blong God—Oli talemaot ol panis blong ol sin—Tabu Wan blong Isrel i wajman blong get. Raonabaot 559–545 yia bifo Kraes i bon.*

Mo nao, ol brata blong mi we mi lavem tumas, mi bin ridim ol samting ia blong yufala i save gat save long saed blong ol kavenan blong Lod, we hem i bin mekem kavenan wetem evri laen blong Isrel—

2 We hem i bin talemaot long ol Jiu, tru long maot blong ol tabu profet blong hem, mo tu stat long stat i kamdaon, long wan jeneresen i go long narafala jeneresen, kasem taem i kam we bae oli kambak long tru jos mo yad blong God; taem we bae oli karem olgeta i kambak tugeta long evri graon blong olgeta we i kam long ol papa blong olgeta, mo bae oli stanap long evri graon blong promes blong olgeta.

3 Luk ol brata blong mi we

mi lavem tumas, mi talem long yufala ol samting ia blong mekem se yufala i save glad mo leftemap ol hed blong yufala blong oltaem, from ol blesing we bae Lod God i givim long ol pikinini blong yufala.

4 From mi save se yufala i bin stadi plante, plante long yufala, blong save long saed blong ol samting we bae i kam; from samting ia mi save se yufala i save we bae bodi blong mit mo bun blong yumi i mas kam roten mo ded; be, long ol bodi blong yumi bae yumi luk God.

5 Yes, mi save se yufala i save we long bodi bae hem i soemaot hemwan long olgeta long Jerusalem, long ples ia we yumi bin kam long hem; from hem i mas hapen olsem se bae i mas kamaot long medel blong olgeta; from i gat nid long bigfala Krieta we i letem hemwan blong man blong wol i gat paoa ova hem long taem we hem i stap long bodi blong mit mo bun, mo ded from evri man, blong mekem se evri man i save kam anda long paoa blong hem.

6 From olsem we ded i bin kam long evri man, blong mekem plan we i fulap wetem sore blong bigfala Krieta i hapen, i mas nid i stap wan paoa blong laef bakegen, mo laef bakegen i mas nid kam long man from foldaon; mo foldaon i bin kam from fasin blong brekem loa; mo from man i bin foldaon oli bin katemaot olgeta long fes blong Lod.

7 From samting ia, i mas nid i stap wan atonmen we i no gat

en—sapos i no wan atonmen we i no gat en ol roten ia i no save kam blong no roten. From samting ia, fas jajmen we i bin kam long man bae i mas bin nid blong stap blong wan taem we i no gat en. Mo sapos i olsem, bodi blong mit mo bun ia bae i mas bin ledaon blong kam roten mo blong brok wanwan long mama wol blong hem, blong nomo girap.

8 O waes tingting blong God, sore blong hem mo gladhat blong hem! From luk, sapos bodi blong mit mo bun bae i nomo girap ol spirit blong yumi bae i mas kam andanit long paoa blong enjel ia we i bin foldaon aot long fes blong God we i no Save Finis, mo hem i bin kam devel, blong nomo girap.

9 Mo ol spirit blong yumi bae oli mas bin kam olsem hem, mo bae yumi kam ol devel, ol enjel blong wan devel, blong oli sakemaot yumi long fes blong God blong yumi, mo blong stap wetem papa blong ol giaman, long sore olsem hem bakegen; yes, blong man ia we i bin trikim fas mama mo papa blong yumi, we i jenisim hemwan i kam klosap olsem wan enjel blong laet, mo mekem ol pikinini blong ol man i wantem blong mekem ol sikret grup we i stap kilim ol man i ded, mo evri fasin blong ol sikret wok blong tudak.

10 O hamas nao gudfala fasin blong God blong yumi, we i mekem rere wan rod blong ronwe blong yumi aot long paoa blong rabis anamol ia; yes, anamol ia, ded mo hel, we mi

singaotem se ded blong bodi, mo tu ded blong spirit.

11 Mo from fasin blong mekem fri blong God blong yumi, Tabu Wan blong Isrel, ded ia, we mi bin tokbaot, we i ded blong bodi, bae i lego ol ded blong hem; we ded ia hem i gref.

12 Mo ded ia we mi bin tokbaot, we i ded blong spirit, bae i lego ol ded blong hem; we ded blong spirit ia hem i hel; from samting ia, ded mo hel bae tufala i mas lego ol ded blong tufala, mo hel i mas lego ol spirit prisena blong hem, mo gref i mas lego ol bodi prisena blong hem, mo ol bodi mo ol spirit blong man bae i joen tugeta bakegen wan i go long narawan; mo hem i tru long paoa blong laef bakegen blong Tabu Wan blong Isrel.

13 O hamas nao bigfala plan blong God blong yumi! From long wan saed, paradaes blong God i mas lego ol spirit blong ol man we i stret, mo gref i mas lego ol bodi blong olgeta we i stret; mo spirit mo bodi i kambak tugeta long hemwan bakegen, mo evri man bae i nomo save roten, mo i no save ded, mo oli stap ol sol we i laef, from oli gat wan stret save olsem yumi long bodi blong mit mo bun, be save blong yumi bae i kam stret olgeta.

14 From samting ia, bae yumi gat wan stret save blong evri rong blong yumi, mo ol nogud fasin blong yumi, mo ol neked blong yumi; mo ol stret pipol bae i gat wan stret save blong ol gladtaem blong olgeta, mo

stret fasin blong olgeta, from ol samting we oli klin i kavremap olgeta, yes, oli kavremap olgeta tu wetem wan longfala klos blong stret fasin.

15 Mo bae i kam blong hapen se afta taem we evri man i bin pas long fas ded ia i go long laef, inaf we i mekem se oli bin kasem wan bodi we i no save ded, oli mas kam fored long jea blong jajmen blong Tabu Wan blong Isrel; mo afta jajmen i kam, mo afta oli mas kasem jajmen folem tabu jajmen blong God.

16 Mo i tru, olsem we Lod i stap laef, from Lod God i bin talemaot samting ia, mo hemia i toktok blong hem we i no save finis, we i stap oltaem, se olgeta we oli stret bae oli stap stret yet, mo olgeta we oli doti bae oli stap doti yet; from samting ia, olgeta we oli doti oli devel mo ol enjel blong hem; mo bae oli go longwe long faea we i no gat en, we oli bin mekem rere blong olgeta; mo bae ol hadtaem blong olgeta i olsem lek blong faea mo salfa, we faea blong hem i go antap blong oltaem mo oltaem mo i no gat en.

17 O hamas nao bigfala paoa mo jastis blong God blong yumi! From hem i mekem evri toktok blong hem i hapen, mo oli bin go fored aot long maot blong hem, mo loa blong hem i mas hapen.

18 Be, luk, olgeta we i stret, ol sent blong Tabu Wan blong Isrel, olgeta we oli bin biliv long Tabu Wan blong Isrel, olgeta we i bin stap stanap strong long ol

kros blong wol, mo oli no bin tingbaot ol sem blong hem, bae oli kasem kingdom blong God, we hem i bin mekem rere blong olgeta stat long taem we wol i bin stat, mo ol glad blong olgeta bae i fulap blong oltaem.

19 O hamas nao bigfala sore blong God blong yumi, Tabu Wan blong Isrel! From hem i bin mekem ol sent blong hem i go fri long rabis anamol ia, we i devel, mo ded, mo hel, mo lek blong faea ia mo salfa, we i fasin blong harem nogud we i no save finis.

20 O hamas nao bigfala tabu fasin blong God blong yumi! From hem i save evri samting, mo i no gat wan samting we hem i no save.

21 Mo bae hem i kam long wol blong hem i save sevem evri man sapos oli lisin long voes blong hem; from luk, hem i harem nogud long ol soa blong bodi blong evri man, yes, ol soa blong bodi blong evri samting we i stap laef, ol man tugeta wetem ol woman, mo ol pikinini, we oli blong famle blong Adam.

22 Mo hem i harem nogud long samting ia blong mekem se laef bakegen i save kam long evri man, blong olgeta evriwan i save stanap long fored blong hem long bigfala mo jajmen dei.

23 Mo hem i givim oda long evri man se oli mas sakem sin, mo kasem baptaes long nem blong hem, wetem stret fet long Tabu Wan blong Isrel, o oli no save sev long kingdom blong God.

24 Mo sapos bae oli no sakem sin mo biliv long nem blong

hem, mo kasem baptaes long nem blong hem, mo stap strong kasem en, bae oli mas stap anda long paoa blong Setan; from Lod God, Tabu Wan blong Isrel, i bin talem samting ia.

25 From samting ia, hem i bin givimaot loa; mo long ples we i no gat loa i no save gat panis; mo long ples we i no gat panis i no gat fasin blong talemaot se i gat rong; mo long ples we i no gat fasin blong talemaot se i gat rong, ol sore blong Tabu Wan blong Isrel i gat raet long olgeta, from atonmen; from paoa blong hem i mekem olgeta i go fri.

26 From atonmen i mekem stret evri samting we jastis i askem long olgeta evriwan we loa i no go long olgeta, be oli kamaot long rabis anamol, we i ded mo hel, mo devel, mo lek blong faea mo salfa, we i fasin blong harem nogud we i no gat en; mo oli kambak long God we i bin givim laef long olgeta, we i Tabu Wan blong Isrel.

27 Be sore tumas long hem we i kasem loa, yes, we i gat evri komanmen blong God olsem yumi, mo we i brekem olgeta, mo we i westem ol dei blong tes blong hem, from ples blong hem i nogud olgeta!

28 O hamas nao plan blong trik blong nogud wan! O ol fasin ia blong stap moa hae, mo ol slak samting blong spirit, mo fasin blong no stap waes blong ol man! Taem we oli gat plante save oli ting se oli waes, mo oli no lisin long ol komanmen blong God, from oli putum olgeta long saed, from oli ting



se oli save ol samting, olgeta bakegen, from samting ia, waes tingting blong olgeta i no waes nating mo i no helpem olgeta. Mo bae oli ded.

29 Be blong gat save i gud sapos oli lisiin long ol komanmen blong God.

30 Be sore tumas long olgeta rij man, we oli rij wetem ol samting blong wol. From oli rij oli no laekem ol pua, mo oli givim hadtaem long ol pipol we i no stap flas, mo oli putum ol hat blong olgeta long ol rij samting blong olgeta; from samting ia, ol rij samting blong olgeta i god blong olgeta. Mo luk ol rij samting blong olgeta bae i lus wetem olgeta tu.

31 Mo sore tumas long olgeta we sorae blong olgeta i fas we bae oli no lisiin; from bae oli ded.

32 Sore tumas long olgeta blaen we bae oli no lukluk; from bae oli ded tu.

33 Sore tumas long olgeta we hat blong olgeta i strong, from wan save blong ol rabis fasin blong olgeta bae i kilim olgeta long las dei.

34 Sore tumas long giaman man, from bae oli sakem hem i go daon long hel.

35 Sore tumas long man we i kilim ded narafala man wetem tingting blong mekem olsem, from bae hem i ded.

36 Sore tumas long olgeta we i stap slip olbaot, from bae oli sakem olgeta i go daon long hel.

37 Yes, sore tumas long olgeta we oli stap wosipim ol aedol, from devel blong evri devel i glad tumas long olgeta.

38 Mo, blong endem, sore tumas long olgeta we i ded wetem ol sin blong olgeta; from bae oli gobak long God, mo lukim fes blong hem, mo stap long ol sin blong olgeta.

39 O, ol brata blong mi we mi lavem tumas, tingbaot se i nogud nating blong brekem loa agensem Tabu God, mo tu se i nogud nating blong foldaon long ol temtesen blong man blong trik. Tingbaot, blong gat tingting we i folem fasin blong wol, hem i ded, mo blong gat tingting blong spirit, hem i laef we i no save finis.

40 O, ol brata blong mi we mi lavem tumas, givim sorae blong yufala long ol toktok blong mi. Tingbaot ol bigfala samting blong Tabu Wan blong Isrel. No talem se mi bin talem ol strong samting agensem yufala; from sapos yufala i talem olsem, bae yufala i toktok nogud agensem trutok; from mi bin talemaot ol toktok blong Man ia we i bin mekem yufala. Mi save se ol toktok blong trutok i strong agensem ol doti samting; be olgeta we i stret i no fraet long hem, from oli lavem ol trutok mo oli no seksek from.

41 O ale, ol brata blong mi we mi lavem tumas, kam long Lod, Tabu Wan. Tingbaot se ol rod blong hem i stret. Luk, rod blong man i no bigwan tumas, be i go long stret rod long fored blong hem, mo wajmen blong get i Tabu Wan blong Isrel; Mo hem i no yusum wan wokman long ples ia; mo i no gat wan narafala rod be tru long get

nomo; from i no save gat wan man i save giaman long hem, from Lod God i nem blong hem.

42 Mo eni man we i noknok, long hem bae i openem, mo olgeta waes, mo olgeta we i gat save, mo olgeta we i rij, we oli kam bigwan from ol save blong olgeta, mo ol waes tingting blong olgeta, mo ol rij samting blong olgeta—yes, olgeta ia, oli olgeta we hem i no laekem; mo sapos oli no sakem olgeta samting ia, mo tingting se oli olsem nating long fored blong God, mo putum tingting blong olgeta i stapdaon we i daon olgeta, bae hem i no save openem get long olgeta.

43 Be ol samting blong ol waes mo olgeta we i stap talemaot samting we bae i kam, bae oli haedem ol samting ia, blong oli nomo save faenem, blong oltaem—yes, fasin blong stap hapi we i rere blong ol sent.

44 O, ol brata blong mi we mi lavem tumas, tingbaot ol toktok blong mi. Luk, mi karemaot ol klos blong mi, mo mi seksekem olgeta long fored blong yufala; mi askem God ia we i sevem mi, blong hem i luk mi wetem ae blong hem we i stap luk evri samting; from samting ia, bae yufala i save long las dei, taem we evri man i kasem jajmen blong ol wok blong olgeta, se God blong Isrel i bin lukim se mi bin seksekem ol rabis fasin blong yufala aot long sol blong mi, mo we mi klin gud taem mi stanap long fored blong hem, mo blad blong yufala i no stap long mi.

45 O, ol brata blong mi we mi lavem tumas, gowe long ol sin blong yufala; sakemaot ol jen blong hem we bae i fasem yufala strong; kam long God we i ston blong sevem yufala.

46 Mekem rere ol sol blong yufala blong bigfala dei taem we God bae i givim jastis long olgeta we i stret, hem i long dei blong jajmen, blong mekem se yufala i no seksek wetem fraet we i nogud olgeta; blong mekem se yufala i no save tingbaot fulwan ol nogud rong blong yufala, mo blong yufala i no mas talem se: Ol jajmen blong yu oli tabu, we i tabu, O Lod God we i gat Bigfala Paoa—be mi save rong blong mi; mi bin brekem loa blong yu, mo ol brekem loa ia oli blong mi; mo devel i bin winim mi, mekem se mi mi wan slef blong ol nogud sore blong hem.

47 Be luk, ol brata blong mi, hem i gat nid se bae mi mas wekemap yufala blong save se ol tru samting ia i nogud olgeta? Bae mi givim hadtaem long ol sol blong yufala, sapos ol tingting blong yufala i klin? Bae mi toktok klia long yufala folem trutok we i klia sapos yufala i fri long sin?

48 Luk, sapos yufala i tabu bae mi toktok long yufala long saed blong ol tabu fasin; be from yufala i no tabu, mo yufala i lukluk long mi olsem wan tija, i mas i stap se mi tijim yufala long ol samting we bae i hapen afta long sin.

49 Luk, sol blong mi i no laekem sin nating, mo hat blong

mi i glad long stret fasin; mo bae mi presem tabu nem blong God blong mi.

50 Kam, ol brata blong mi, evriwan we i tosta, kam yufala long ol wota; mo hem we i no gat mane, kam pem mo kakae; yes, kam pem waen mo melek wetem no mane mo wetem no praes.

51 From samting ia, no spenem mane long samting we i no gat yus blong hem, mo no mekem wan wok we yu no save harem gud long hem. Lisin gud oltaem long mi, mo tingbaot ol toktok we mi bin talemaot finis; mo kam long Tabu Wan blong Isrel, mo kakae gud long ol samting we i no save lus, o no save kam roten, mo letem sol blong yufala i glad long fatfat.

52 Luk, ol brata blong mi we mi lavem tumas, tingbaot ol toktok blong God blong yufala; prea long hem oltaem long dei, mo talem tangkyu long tabu nem blong hem long naet. Letem ol hat blong yufala i stap glad.

53 Mo luk hamas nao ol bigfala kavenan blong Lod, mo hamas nao ol bigfala taem we hem i kam daon long ol pikinini blong ol man; mo from bigfala paoa blong hem, mo gladhat blong hem mo sore, hem i bin promes long yumi se ol pikinini blong yumi bae i no save ded evriwan, long saed blong bodi blong mit mo bun, be se bae hem i sevem olgeta; mo long ol jeneresen blong fiuja bae oli kam wan branj we i stret blong laen blong Isrel.

54 Mo nao, ol brata blong mi,

mi wantem blong toktok long yufala moa; be long tumora bae mi talemaot long yufala ol toktok blong mi we i stap yet. Amen.

---

## JAPTA 10

---

*Ol Jiu bae oli krusifaem God blong olgeta — Bae oli seraot olbaot kasem taem we oli stat blong biliv long hem — Amerika bae i wan graon blong fridom we bae i no gat king we i rulum — Stretem yufala long God mo kasem fasin blong sevem man tru long gladhat blong hem. Raonabaot 559–545 yia bifo Kraes i bon.*

Mo nao mi, Jakob, mi toktok long yufala bakegen, ol brata blong mi we mi lavem tumas, long saed blong branj ia we i stret we mi bin tokbaot.

2 From luk, ol promes we yumi bin kasem oli ol promes long yumi long saed blong bodi blong mit mo bun; from samting ia, olsem hem i bin soem long mi, we plante long ol pikinini blong yumi bae oli ded long bodi blong mit mo bun, from oli no gat bilif, be, God bae i gat sore long plante; mo ol pikinini blong yumi bae oli kambak, blong mekem se oli save kam long samting ia we bae i givim olgeta tru save long saed blong Ridima blong olgeta.

3 From samting ia, olsem we mi bin talem long yufala, i mas nid i stap se Kraes — from long las naet enjel i bin talem long mi se bae nem blong hem i olsem ia — hem i sud kam long

medel blong ol Jiu, long medel blong olgeta we oli moa rabis bitim evri rabis pat blong wol; mo bae oli krusifaem hem — from olsem ia nao hem i gat nid long God blong yumi, mo i no gat wan narafala kantri long wol we bae i krusifaem God blong olgeta.

4 From sapos ol bigfala merikel i hapen long medel blong ol narafala kantri, bae oli sakem sin, mo save se hem i God blong olgeta.

5 Be from ol fasin blong giaman pris mo ol rabis fasin, olgeta long Jerusalem bae oli kam stronghed agensem hem, blong mekem se oli krusifaem hem.

6 From samting ia, from ol rabis fasin blong olgeta, ol bigfala trabol, ol hadtaem blong kasem kakae, ol rabis sik, mo ol blad i ron bae i kam long olgeta; mo olgeta we bae oli no ded bae oli seraot olbaot long medel blong evri kantri.

7 Be luk, olsem ia nao Lod God i talem: Taem we dei i kam we bae oli biliv long mi, we mi mi Kraes, afta mi bin mekem kavenan wetem ol bubu blong olgeta se bae oli kambak long bodi blong mit mo bun, long wol, long evri graon blong olgeta we i kam long ol papa.

8 Mo bae i kam blong hapen se bae oli karem olgeta i kambak afta we oli bin seraot blong longtaem, long ol aelan blong solwota, mo long fofala pat blong wol; mo ol kantri blong ol Jentael bae oli bigfala long ol ae blong mi, God i talem,

blong karem olgeta i go fored long evri graon blong olgeta we i kam long ol papa blong olgeta.

9 Yes, ol king blong ol Jentael bae oli olsem ol papa we oli stap givim gudfala kakae long olgeta, mo ol kwin blong olgeta bae oli stap olsem ol mama we oli stap givim gudfala kakae; From samting ia, ol promes blong Lod i bigwan long ol Jentael, from hem i bin talem samting ia, mo huia i save kwestinim?

10 Be luk, graon ia, God i bin talem, bae i wan graon blong gudfala branj blong yu, olsem graon we i kam long ol papa, mo ol Jentael bae oli kasem blesing long graon ia.

11 Mo graon ia bae i wan graon blong fridom long ol Jentael, mo bae i no gat eni king long graon, we bae oli kam antap long ol Jentael.

12 Mo bae mi mekem graon ia i kam strong agensem ol narafala kantri.

13 Mo hem we i faet agensem Saeon bae hem i ded, God i talem.

14 From hem we i stanemap wan king agensem mi bae hem i ded, from mi, Lod, king blong heven, bae mi king blong olgeta, mo bae mi olsem wan laet long olgeta oltaem, we oli harem ol toktok blong mi.

15 From samting ia, blong stamba tingting ia, blong mekem ol kavenan i save hapen, we mi bin mekem wetem ol pikinini blong ol man, blong bae mi mekem long olgeta taem we oli stap long bodi blong mit mo bun, i mas nid

blong mi smasem gud ol sikret wok blong tudak, mo blong ol fasin blong kilim man i ded, mo blong ol rabis sin.

16 From samting ia, hem we i faet agensem Saeon, ol Jiu tugeta wetem Jentael, ol slef tugeta wetem ol fri man, man tugeta wetem woman, bae oli ded; from oli olgeta we oli woman blong rod blong ful wol; from olgeta we oli no blong mi, oli agensem mi, Lod i talem.

17 From bae mi mekem ol promes blong mi i hapen we mi bin mekem wetem ol piki-nini blong ol man, we bae mi mekem long olgeta taem we oli stap laef long bodi blong mit mo bun—

18 From samting ia, ol brata blong mi we mi lavem tumas, olsem ia nao God blong yumi i talem: Bae mi givim hadtaem long ol pikinini blong yu tru long han blong ol Jentael; be, bae mi mekem ol hat blong ol Jentael i kam sofsof, mekem se bae oli kam olsem wan papa long olgeta; from samting ia, ol Jentael bae i kasem blesing mo bae oli kaontem olgeta wetem laen blong Isrel.

19 From samting ia, bae mi konsekretem graon ia long ol pikinini blong yu, mo olgeta we bae oli kaontem olgeta wetem ol pikinini blong yu oltaem, blong graon blong olgeta olsem graon we i kam long ol papa; from hem i wan spesel graon, God i talem long mi, we i moa gud bitim ol nara-fala graon, from samting ia, bae mi mekem se evri man we i

stap long ples ia blong bae oli wosipim mi, God i talem.

20 Mo nao, ol brata blong mi we mi lavem tumas, yumi luk se God blong yumi we i gat fulap sore i bin givim long yumi plante save long saed blong ol samting ia, bae yumi tingbaot hem, mo putum long saed ol sin blong yumi, mo no lusum hop, from oli no sakemaot yumi; be, oli bin ronemaot yumi long graon blong yumi we i kam long ol papa blong yumi; be yumi bin kam long wan graon we i moa gud, from Lod i bin mekem solwota i kam rod blong yumi, mo yumi stap long wan aelan blong solwota.

21 Be ol promes blong Lod oli bigwan long olgeta we i stap long ol aelan blong solwota; from samting ia, olsem we i talem ol aelan, i mas nid i stap se i moa bitim hemia, mo i gat ol brata blong yumi we i stap long olgeta tu.

22 From luk, Lod God i bin lidim i go longwe wan wan taem aot long laen blong Isrel folem plan blong hem mo jus blong hem. Mo nao luk, Lod i tingbaot olgeta evriwan we oli bin brokaot, from samting ia hem i tingbaot yumi tu.

23 Taswe, mekem ol hat blong yufala i glad, mo tingbaot se yufala i fri blong jus blong yufala bakegen—blong jusum rod blong ded we i no gat en o rod blong laef we i no save finis.

24 From samting ia, ol brata blong mi we mi lavem tumas, stretem yufala bakegen long tingting blong God, mo i no long

tingting blong devel mo bodi blong mit mo bun; mo tingbaot, afta we yufala i stretem yufala long God, se i tru mo long gladhat blong God nomo, we yufala i sev.

25 From samting ia, bae God i resemap yufala aot long ded tru long paoa blong laef bakegen, mo tu aot long ded ia we i no gat en tru long paoa blong atonmen, blong mekem se hem i save tekem yufala long kingdom blong God we i no save finis, blong mekem se yufala i save presem hem tru long gladhat we i kam long God. Amen.

---

#### JAPTA 11

---

*Jekob i bin lukim Ridima blong hem —Loa blong Moses i wan eksampol blong Kraes mo i pruvum se bae hem i kam. Raonabaot 559–545 yia bifo Kraes i bon.*

Mo nao, Jekob i bin talemaot plante moa samting long ol pipol blong mi long taem ia, be ol samting ia nomo mi bin raetem, from ol samting we mi bin raetem oli inaf long mi.

2 Mo nao mi, Nifae, mi raetem moa long ol toktok blong Aesea, from sol blong mi i harem gud long ol toktok blong hem. From bae mi yusum ol toktok blong hem long ol pipol blong mi, mo bae mi sendem olgeta i go fored long evri pikinini blong mi, from hem i bin lukim Ridima blong mi, i olsem we mi bin lukim hem.

3 Mo brata blong mi, Jekob, tu i bin luk hem olsem we mi

bin luk hem; from samting ia, bae mi sendem ol toktok blong olgeta i go aot long ol pikinini blong mi blong pruvum long olgeta se ol toktok blong mi i tru. From samting ia, tru long ol toktok blong tri, God i bin talem se, bae mi pruvum toktok blong mi. Be, God i sendem moa witnes, mo hem i pruvum evri toktok blong hem.

4 Luk, sol blong mi i harem gud long pruvum long ol pipol blong mi, trutok long saed blong taem we Kraes bae i kam; long ol narafala toktok, from en ia i bin givim loa blong Moses; mo evri samting we God i bin givim stat long taem we wol i bin stat long ol man, oli eksampol blong hem.

5 Mo tu sol blong mi i harem gud long ol kavenan blong Lod we hem i bin mekem wetem ol bubu blong yumi; yes, sol blong mi i harem gud long gladhat blong hem, mo long jastis blong hem, mo paoa, mo sore long bigfala plan we i no save finis blong mekem ol man i go fri long ded.

6 Mo sol blong mi i harem gud blong pruvum long ol pipol blong mi se sapos Kraes i no kam bae evri man i mas ded.

7 From sapos i no gat Kraes i no gat God; mo sapos i no gat God, yumi no gat, from i no bin save gat wan taem we oli bin mekem evri samting. Be i gat wan God, mo hem i Kraes, mo hem i kam long en blong taem we God i makem blong hem.

8 Mo nao mi raetem sam long ol toktok blong Aesea, blong

mekem se evri man long ol pipol blong mi we i luk ol toktok ia oli save leftemap ol hat blong olgeta mo glad from evri man. Nao hemia i ol toktok, mo yufala save yusum long yufala mo long evri man.

---

JAPTA 12

---

*Aesea i luk tempol blong lata-dei, taem we Isrel i kambak tugeta, mo jajmen mo pis blong milenium—Ol man we i gat hae tingting mo ol rabis man bae oli pulumdaon olgeta long taem we Kraes i kambak long nambatu taem—Luk long Aesea japta 2. Raonabaot 559–545 yia bifo Kraes i bon.*

ТОКТОК we Aesea, boe blong Amoj, i bin luk long long saed blong Juda mo Jerusalem:

2 Mo bae i kam blong hapen se long ol las dei, taem we bigfala hil blong haos blong Lod bae i stanap antap long ol bigfala hil, mo bae i go hae antap long ol hil, mo evri kantri bae i go long hem.

3 Mo plante pipol bae oli go mo talem se, yufala i kam, mo bae yumi go antap long bigfala hil blong Lod, long haos blong God blong Jakob; mo bae hem i tijim yumi long saed blong ol wei blong hem, mo bae yumi wokbaot long ol rod blong hem; from aot long Saeon bae loa i go fored, mo toktok blong Lod aot long Jerusalem.

4 Mo bae hem i jaj long medel blong ol kantri, mo bae hem i toktok strong agensem plante pipol: mo bae oli hamarem ol

naef blong faet blong olgeta i kam ol bled blong digim graon, mo ol spia blong olgeta i kam ol huk blong katem mo klinim ol tri—kantri bae oli no leftemap ol naef blong faet agensem kantri, mo bae oli nomo lanem fasin blong mekem faet.

5 O laen blong Jakob, yufala i kam mo bae yumi wokbaot long laet blong Lod; yes, kam, from yufala evriwan i bin go lus, evriwan long ol rabis fasin blong hem.

6 Taswe, O Lod, yu bin lego ol pipol blong yu, laen blong Jakob, from oli kam fulap long is, mo lisin long wan kleva olsem ol man Filistia, mo oli mekem olgeta i glad tru ol laen blong ol man we oli no save olgeta.

7 Graon blong olgeta i fulap tu wetem silva mo gol, mo tu i no gat eni en blong ol rij samting blong olgeta; graon blong olgeta i fulap tu wetem ol hos, mo tu i no gat eni en long ol kat blong hos blong olgeta.

8 Graon blong olgeta i fulap tu wetem ol aedol; oli wosipim wok blong ol han blong olgeta nomo, hemia we ol fingga blong olgeta i bin mekem.

9 Mo ol man olbaot i no bo-daon, mo hae man i no mekem tingting blong hem i kam daon, taswe, no fogivim hem.

10 O yufala, ol nogud man, go insaed long ston, mo haedem yufala insaed long das, from respek blong Lod mo bigfala glori blong hem bae i kilim yufala.

11 Mo bae i kam blong hapen

se ol hae lukluk blong ol man bae i kam daon, mo ol flas blong ol man bae Lod i putumdaon, mo Lod hemwan nomo bae i stap hae long dei ia.

12 From dei blong Lod blong ol Host i kam klosap long evri kantri, yes, long evriwan; yes, long olgeta we i gat hae tingting mo olgeta we i flas tumas, mo long evriwan we i leftemap olgeta, mo Lod bae i putum hem daon.

13 Yes, mo dei blong Lod bae i kam long evri redwud blong Lebanon, from oli hae mo oli antap; mo long evri oktri blong Basan;

14 Mo long evri bigfala hil we i hae, mo long evri hil, mo long evri kantri we oli leftemap olgeta, mo long evri pipol;

15 Mo long evri taoa we i hae, mo long evri wol we i wan fanis;

16 Mo long evri sip blong solwota, mo long evri sip blong Tarsis, mo long evri pikja we i naes.

17 Mo hae tingting blong man, Lod bae i putumdaon, mo ol flas blong ol man bae hem i pulumdaon; mo Lod hemwannomo bae i stap hae long dei ia.

18 Mo ol aedol bae hem i aotem evriwan.

19 Mo bae oli go insaed long ol hol blong ol ston, mo insaed long ol hol blong graon, from respek blong Lod bae i kam long olgeta mo bigfala glori blong hem bae i kilim olgeta, taem we hem i girap blong sekem nogud wol ia.

20 Long dei ia wan man bae i sakem ol aedol blong hem blong

silva, mo ol aedol blong hem blong gol, we hem i bin mekem blong hemwan blong wosip, i go long ol mol, mo ol flaeng-fokis we oli gat tel;

21 Blong go long ol hol blong ol ston, mo long antap blong ol sap ston, from respek blong Lod bae i kam long olgeta mo paoa blong glori blong hem bae i kilim olgeta, taem we hem i girap blong sekem nogud wol ia.

22 Yufala i stop blong dipen long man, we win blong hem i stap long hol blong nus blong hem; from, bae oli givim wanem praes long hem?

---

### JAPTA 13

---

*Juda mo Jerusalem bae i kasem panis from tufala i no obei—Lod i toktok from mo i jajem ol pipol blong hem—Ol gel blong Saeon i kasem panis mo oli harem nogud from ol rij samting blong olgeta—Luk long Aesea japta 3. Raonabaot 559–545 yia bifo Kraes i bon.*

FROM luk, Lod, Lod blong ol Host, i tekemaot long Jerusalem, mo long Juda, ol samting blong sapot mo ol samting we laef i stap hang long hem, evri bred we laef i stap hang long hem, mo evri wota blong sapot—

2 Strong man, mo man blong faet, jaj, mo profet, mo olgeta we i stap talemaot samting we bae i kam, mo olfala;

3 Kaptan blong fifti, mo man we ol man i onarem, mo kaonsela, mo man we i yusum ol trik blong mekem majik, mo man we i gat gudfala save blong toktok.



4 Mo bae mi givim ol pikinini long olgeta blong kam ol boe blong king blong olgeta, mo ol smol bebi bae oli rulum olgeta.

5 Mo ol pipol bae oli harem nogud tumas, evriwan tru long narafala man, mo evriwan tru long man we i stap raonabaot long olgeta; pikinini bae i stap flas long ol olfala, mo man blong jikim man bae i stap flas long ol man we ol man i onarem.

6 Taem we wan man bae i tekem brata blong hem blong haos blong papa blong hem, mo bae i talem se: Yu yu gat klos, yu rulum mifala, mo no letem fasin blong smasem gud samting i kam long taem we yu stap rul—

7 Long dei ia bae hem i promises, i talem se: Bae mi no stap olsem wan man blong mekem ol man i kam oraet long sik, from long haos blong mi i no gat bred mo klos; no mekem mi wan man blong rul ova long ol pipol.

8 From oli smasem gud Jerusalem finis, mo Juda i bin foldaon finis, from tang blong olgeta mo ol wok blong olgeta i bin agensem Lod, mekem se oli mekem ol ae blong glori blong hem i kam kros.

9 Fes blong olgeta i soem wan witnes agensem olgeta, mo i talemaot se sin blong olgeta i olsem blong Sodom, mo oli no save haedem samting ia. Sore tumas long ol sol blong olgeta, from oli bin putum praes we i nogud long olgeta bakegen!

10 Talem long olgeta we i stret se hem i gud wetem olgeta; from bae oli kakae ol frut blong ol wok blong olgeta.

11 Sore tumas long olgeta nogud man, from bae oli ded; from praes blong ol han blong olgeta bae i kam long olgeta.

12 Mo ol pipol blong mi, ol pikinini oli mekem olgeta i harem nogud, mo ol woman i rul ova long olgeta. O ol pipol blong mi, olgeta we i lidim yufala i mekem yufala mekem rabis fasin mo smasem gud ol wei blong rod blong yufala.

13 Lod i stanap blong toktok from, mo i stanap blong jajem ol pipol.

14 Lod bae i go long jajmen wetem ol olfala blong ol pipol blong hem, mo ol boe blong king blong ol man blong hem; from yufala i bin kakae evri plantesen blong rop blong grep, mo ol samting we yufala i tekem long ol pua man, long ol haos blong yufala.

15 Yu minim wanem? Yufala i smasem ol pipol blong mi long pisis, mo smasem ol fes blong ol pua, Lod God blong ol Host i talem.

16 Mo tu, Lod i talem se: From ol gel blong Saeon i flas, mo mekem nek blong olgeta i stret taem we oli wokbaot, mo ol ae blong olgeta i stap switim ol man, oli wokbaot mo mekem smol kwik step taem we oli stap go, mo oli mekem noes wetem ol samting we i stap long ol leg blong olgeta—

17 Taswe Lod bae i kilim olgeta wetem wan rabis soa antap long hed blong ol gel blong Saeon, mo Lod bae i faenemaot ol sikret pat blong olgeta.

18 Long dei ia Lod bae i

tekemaot flas ia blong ol samting we oli werem we i mekem noes, mo ol kaliko blong hea, mo ol raon wil we oli olsem mun;

19 Ol jen mo ol samting we oli werem long han, mo ol kaliko blong blokem fes wetem;

20 Ol hat, mo ol flas samting blong ol leg, mo ol samting we oli fasem long hed, mo ol bokis blong senta, mo olgeta iaring;

21 Ol ring, mo ol ring blong nus;

22 Ol klos blong werem we oli save jenisim, mo ol kot, mo ol kaliko blong kavremap hed mo nek, mo ol pin blong tantanem hea;

23 Ol glas, mo ol naes bedsit, mo ol hud, mo ol kaliko blong blokem fes.

24 Mo bae i kam blong hapen se, long ples blong smel we i swit bae i gat sting; mo long ples blong wan strap, wan hol long klos; mo long ples blong naes hea, bolhed; mo long ples blong dres, ol pua klos i kavremap olgeta; mo bon long faea long ples blong naes.

25 Ol man blong yu bae oli foldaon tru long naef blong faet, mo ol strong man blong yu long faet ia.

26 Mo ol get blong hem bae oli krae, mo harem sore; mo bae hem i emti mo bae i sidaon long graon.

---

JAPTA 14

---

*Saeon mo ol gel blong hem bae oli pemaot olgeta mo klin long dei*

*blong milenium—Luk long Aesea japta 4. Raonabaot 559–545 yia bifo Kraes i bon.*

Mo long dei ia, seven woman bae oli holem taet wan man, mo talem se: Bae mifala i kakae bred blong mifala nomo, mo werem ol klos blong mifala nomo; letem nomo se ol man i singaotem mifala wetem nem blong yu blong tekemaot sem blong mifala.

2 Long dei ia bae branj blong Lod i stap naes mo gud tumas; frut blong wol i gud tumas mo naes long olgeta we i bin ronwe long Isrel.

3 Mo bae i kam blong hapen se, olgeta we i stap long Saeon mo stap long Jerusalem bae oli singaotem olgeta tabu, evriwan we oli raetem nem blong olgeta wetem olgeta we i stap laef long Jerusalem—

4 Taem we Lod i mas bin wasemaot ol rabis doti blong ol gel blong Saeon, mo bae hem i bin klinim blad blong Jerusalem aot long medel blong hem wetem spirit blong jajmen mo wetem spirit blong faea.

5 Mo Lod bae i mekem long evri ples blong stap, blong hil blong Saeon, mo long ol grup blong pipol blong hem, wan klaod mo smok long dei, mo saen blong laet blong faea long naet; from long evri glori blong Saeon bae i gat wan sefples.

6 Mo bae i gat wan tenet long dei taem blong blokem hotsan, mo wan ples blong haed, mo wan ples blong haed long ren

wetem strongfala win mo tanda mo long ren.

---

JAPTA 15

---

*Plantesen blong rop blong grep blong Lod (Isrel) bae i kam emti, mo ol pipol blong hem bae i seraot olbaot—Ol sore tumas bae i kam long olgeta long taem we oli stap long ples we oli no wantem folem Jos mo oli bin seraot blong olgeta—Bae Lod i leftemap wan flag mo mekem Isrel i kambak tugeta—Luk long Aesea japta 5. Raonabaot 559–545 yia bifo Kraes i bon.*

Mo afta bae mi singsing long hem we mi lavem tumas wan singing blong hem we mi lavem tumas, long saed blong plantesen blong rop blong grep blong hem. Hem we mi lavem tumas i gat wan plantesen blong rop blong grep long wan gudfala hil.

2 Mo hem i bin raonem wetem wan fanis, mo i bin tekemaot ol ston blong hem, mo hem i bin plan wetem vaen we i gud tumas long hem, mo i bin bildim wan taoa long medel blong hem, mo tu i bin mekem wan masin blong mekem waen long ples ia; mo hem i bin luk se bae i karem ol grep, mo i bin karem ol wael grep.

3 Mo nao, O ol man we i stap long Jerusalem, mo ol man blong Juda, jajem, mi askem yu, bitwin mi mo plantesen blong rop blong grep blong mi.

4 Wanem moa mi bin save mekem long plantesen blong rop blong grep blong mi, we

mi no bin mekem long hem? From samting ia, taem we mi bin luk se bae i karem ol grep, hem i bin karem ol wael grep.

5 Mo nao go stat; bae mi talem long yu wanem we bae mi mekem long plantesen blong rop blong grep blong mi—bae mi tekemaot fanis blong hem, mo bae ol anamol i kam kakae evriwan; mo bae mi brekem daon wol blong hem, mo bae oli purumbut long hem;

6 Mo bae mi smasem gud yad ia; bae oli nomo save katem blong klinim o digim yad ia; be ol plan we i save stikim man mo ol nil blong plan bae i kam antap; mo tu bae mi givim oda long ol klaod se oli no ren long hem.

7 From plantesen blong rop blong grep blong Lod blong ol Host, hem i laen blong Isrel, mo ol man blong Juda oli ol plan we oli naes; mo hem i bin lukaotem jajmen, mo luk, hem i bin luk fasin blong mekem man i harem nogud; hem i bin lukaotem ol stret fasin, be luk, hem i bin harem wan krae.

8 Sore tumas long olgeta we oli joen long wan kaos i go long narafala kaos, kasem taem we i nomo save gat ples, blong mekem se oli save stap olgeta nomo long medel blong wol!

9 Long ol sorae blong mi, Lod blong ol Host i bin talem, i tru se fulap kaos bae oli emti, mo ol bigfala mo gudfala bigtaon bae i no gat man i stap long hem.

10 Yes, long ten hekta blong

plantesen blong rop blong grep bae yufala i kasem twentitu lita, mo sapos yufala i planem tu handred mo twenti lita blong sid blong wit bae yufala i kasem twentitu lita nomo.

11 Sore tumas long olgeta we oli girap eli long moning, blong oli save kasem strong dring, we i gohed kasem naet, mo waen i mekem se oli drong!

12 Mo hap, mo vaeol, tabret, mo paep, mo waen i stap long ol lafet blong olgeta; be oli no tingbaot wok blong Lod, mo oli no tingbaot ol samting we hem i mekem wetem ol han blong hem.

13 Taswe, ol pipol blong mi i bin kam prisena, from oli no gat save; mo ol man blong olgeta we oli onarem, oli hanggri, mo grup blong pipol ia blong olgeta i bin kam drae wetem tosta.

14 Taswe, hel i bin mekem hem i kam bigwan, mo i bin openem maot blong hem bitim mak; mo glori blong olgeta, mo grup blong pipol blong olgeta, mo flas blong olgeta, mo hem we i glad bae i go daon long hem.

15 Mo man we i olbaot bae i foldaon, mo strongfala man bae oli putum tingting blong hem i stap daon, mo ol ae blong ol man we tingting blong olgeta i hae, bae oli stap daon.

16 Be Lod blong ol Host bae i singaot laod long jajmen, mo God we i tabu bae i kam klin long stret fasin.

17 Afta bae ol smol sipsip i kakae olsem we oli stap kakae oltaem, mo ol emti ples blong ol fatfat wan, bae ol man we oli no save olgeta i kakae.

18 Sore tumas long olgeta we i pulum ol rabis fasin wetem ol rop we oli blong nating, mo sin olsem hem i wetem wan rop blong kat;

19 We oli se: Letem hem i kwik, mekem wok blong hem i hariap, blong yumi save lukim; mo letem jajmen blong Tabu Wan blong Isrel i kam klosap mo kam, blong yumi save gat save long hem.

20 Sore tumas long olgeta we i singaotem ol nogud samting se i gudfala, mo ol gudfala samting i nogud, we oli se tudak i laet, mo laet i tudak, we oli tekem konkon blong swit, mo swit blong konkon!

21 Sore tumas long olgeta we oli waes long ol ae blong olgeta bakegen, mo olgeta we i stap talemaot samting we bae i kam long tingting blong olgeta bakegen!

22 Sore tumas long olgeta we oli strong blong dring waen, mo ol man we oli strong blong miksim strong dring!

23 Huia we i talemaot se ol nogud man bae i kasem praes, mo tekemaot stret fasin blong ol man we i stret long hem!

24 Taswe, olsem we faea i stap bonem gras we i drae, mo flem i bonem doti blong wit, ol rus blong olgeta bae oli go roten, mo ol flaoa blong olgeta bae i go antap olsem das; from oli bin sakemaot loa blong Lod blong ol Host, mo oli no bin laekem nating toktok blong Tabu Wan blong Isrel.

25 Taswe, kros blong Lod i bin girap agensem ol pipol blong

hem, mo hem i bin stretem han blong hem agensem olgeta, mo hem i bin kilim olgeta; mo ol hil i bin seksek, mo ol ded bodi blong olgeta oli bin terem olgeta i go long pisis long medel blong ol rod. From evri samting ia Lod i no tanem kros blong hem, be hem i stretem han blong hem yet.

26 Mo bae hem i leftemap wan flag long ol kantri we i stap longwe, mo bae hem i singaot wetem wan voes we i sap, long olgeta long en blong wol; mo luk, bae oli kam spid kwiktaem; i no gat wan we bae i taed o i foldaon long medel blong olgeta.

27 I no gat wan we bae i slip olsem we hem i ded o slip; mo tu ol strap raon long wes blong olgeta bae i no kam slak, o strap blong ol sandal blong olgeta i kam brok;

28 We ol ara blong olgeta bae i sap, mo ol bonara blong olgeta bae oli ben, mo ol leg blong ol hos blong olgeta bae oli kaontem olsem ol smol hadston, mo wil blong olgeta olsem wan waelwin, mo noes blong olgeta i olsem noes blong wan laeon.

29 Bae oli mekem noes olsem ol yang laeon; yes, bae oli mekem noes, mo holem taet kakae blong olgeta, mo bae oli karem hem i gowe sef, mo i no gat wan man we bae i mekem hem i fri.

30 Mo long dei ia bae oli mekem noes agensem olgeta olsem ol noes blong solwota; mo sapos oli lukluk long graon, luk, tudak mo sore, mo laet i kam tudak long ol heven blong hem.

## JAPTA 16

*Aesea i luk Lod—Lod i fogivim ol sin blong Aesea—Lod i singaotem hem blong talemaot profesi—Hem i talemaot profesi long saed blong ol tijing blong Kraes we ol Jiu i sakemaot—Wan smol haf nomo bae i kambak—Luk long Aesea japta 6. Raonabaot 559–545 yia bifo Kraes i bon.*

LONG yia we king Usia i bin ded, mi bin luk tu Lod i stap sidaon long wan jea we i hae mo i hae i go antap, mo longfala klos blong hem i bin fulumap tempol.

2 Ol seraf i bin stanap antap long jea ia; wanwan i bin gat sikis wing; wetem tu wing hem i bin kavremap fes blong hem, mo wetem tu wing hem i bin kavremap ol leg blong hem, mo wetem tu wing hem i bin flae.

3 Mo wan i bin singaot i go long narawan, mo se: Tabu, tabu, tabu, i Lod blong ol Host; ful wol i fulap wetem glori blong hem.

4 Mo ol pos blong do i bin seksek from voes blong hem we i bin singaot, mo haos i bin fulap wetem smok.

5 Afta mi bin talem: Sore tumas long mi! from Lod i smasem gud mi; from mi wan man we skin blong maot blong mi i no klin; mo mi stap long medel blong wan pipol we ol skin blong maot blong olgeta i no klin; from ol ae blong mi i bin lukim King, Lod blong ol Host.

6 Afta wan ol seraf i bin flae i kam long mi, i holem wan sakol faea we i laet long han blong

hem, we hem i bin tekem wetem samting ia we i olsem samting blong karemaot hot ston, aot long olta;

7 Mo hem i bin putum samting ia long maot blong mi, mo hem i bin talem se: Luk, samting ia i bin tajem skin blong maot blong yu; mo ol rabis fasin blong yu i gowe, mo sin blong yu i kam klin.

8 Mo tu mi bin harem voes blong Lod, i talem: Huia bae mi sendem, mo huia bae i go blong yumi? Afta mi bin talem: Mi hemia; sendem mi.

9 Mo hem i bin talem: Go mo talem long pipol ia—Yufala i lisin stret, be oli no bin andastanem; mo yufala i luk stret, be oli no bin luksave.

10 Mekem hat blong ol pipol ia i kam fatfat, mo mekem ol sorae blong olgeta i kam hevi, mo sareme ol ae blong olgeta— from fraet se oli no save lukluk wetem ol ae blong olgeta, mo lisin wetem ol sorae blong olgeta, mo andastanem wetem hat blong olgeta, mo jenisim laef blong olgeta mo kam oraet bakegen.

11 Afta mi bin talem: Lod, kasem wanem taem? Mo hem i bin talem: Kasem taem we ol bigtaon oli kam emti mo i no gat man i stap long olgeta, mo ol haos i no gat man, mo graon i emti gud;

12 Mo Lod i bin tekemaot ol man i go farawe, from bae i gat wan bigfala fasin blong lego ol ples long medel blong graon.

13 Be stil bae i gat wan ten, mo bae oli kambak, mo bae oli kakae olgeta, olsem wan laem

tri, mo olsem wan oktri we ol impoten pat i stap insaed long olgeta taem we oli sakem ol lif blong olgeta; blong mekem se, tabu sid ia bae hem i kam impoten pat blong olgeta.

---

## JAPTA 17

---

*Efrem mo Siria i go faet agensem Juda—Kraes bae i bon long wan woman we i neva go wetem man yet—Luk long Aesea japta 7. Raonabaot 559–545 yia bifo Kraes i bon.*

Mo i bin hapen se long ol dei blong Ahas pikinini blong Jotam, we i pikinini blong Usia, king blong Juda, we Resin, king blong Siria, mo Peka pikinini blong Remalia, king blong Isrel, i bin go antap long Jerusalem blong faet agensem hem, be hem i no bin save winim hem.

2 Mo oli talem haos blong Deved, se: Siria i bin joen wetem Efrem. Mo hat blong hem i bin seksek wetem fraet, mo hat blong ol pipol blong hem, olsem ol tri long bus taem we win i muvum olgeta.

3 Afta Lod i bin talem long Aesea: Go aot naoia blong mitim Ahas, yu mo Seajasub boe blong yu, long en blong rod blong wota, blong ples blong wota we i stap antap long bigfala rod blong fil blong ol man blong wasem ol klos.

4 Mo talem long hem se: Lukaot gud mo stap kwaet; no fraet, mo tu no fraet long hed blong yu from tufala tel blong tufala stik ia we i stap laet, from

strongfala kros blong Resin wetem Siria, mo blong boe blong Remalia.

5 From Siria, Efrem, mo boe blong Remalia, i bin mekem wan nogud plan agensem yu, oli se:

6 Bae yumi go antap agensem Juda mo mekem trabol long hem, mo bae yumi seraotem bigtaon ia bitwin yumi, mo putum wan king long medel blong hem, yes, boe blong Tabehel.

7 Olsem ia nao Lod God i talem: Samting ia bae i no stanap, mo tu bae i no save kam blong hapen.

8 From hed blong Siria i Damaskes mo hed blong Damaskes, Resin; mo long siksti mo faef yia bae Efrem i brok, mekem se hem i nomo wan pipol.

9 Mo hed blong Efrem i Sameria, mo hed blong Sameria i boe blong Remalia. Sapos yufala i no biliv i tru se bae yufala i no save stanap strong.

10 Mo tu, Lod i bin toktok bakegen long Ahas, i se:

11 Askem wan saen blong yu long Lod, God blong yu; askem hem long ol dip ples, o long ol ples antap.

12 Be Ahas i bin talem: Bae mi no askem hem, mo tu bae mi no testem Lod.

13 Mo hem i bin talem: Yufala i lisiin naoia, O haos blong Deved; hem i wan smol samting blong yufala, blong mekem ol man i kam taed, be bae yufala i mekem God blong mi i kam taed tu?

14 Taswe, Lod hemwan bae i givim yu wan saen — Luk, wan

woman we i neva go wetem man yet bae i gat bel, mo bae hem i bonem wan boe, mo bae hem i singaotem hem Emanuel.

15 Bae hem i kakae bata mo hani, blong mekem se bae hem i save blong talem no long nogud mo blong jusum gud.

16 From bifo pikinini ia bae i save blong talem no long nogud mo jusum gud, graon we yu no laekem nating bae tufala king blong hem bae oli livim.

17 Lod bae i karem i kam long yu, mo long ol pipol blong yu, mo long haos blong papa blong yu, ol dei we i no bin kam stat long dei we Efrem i bin aot long Juda, king blong Asiria.

18 Mo bae i kam blong hapen se long dei ia we Lod bae i singaot from flae ia we i stap long farawe pat blong Ijip, mo from sugabag we i stap long graon blong Asiria.

19 Mo bae oli kam, mo bae oli spel olgeta evriwan long ol emti vale mo long ol hol blong ol ston, mo long ol nil blong plan, mo long evri bus.

20 Long sem dei ia bae Lod i sev wetem wan resa, we ol man we oli stap longwe bitim reva, i bin rentem wetem help blong king blong Asiria; hed, mo ol hea blong ol leg, mo bae hem i katem mustas tu.

21 Mo bae i kam blong hapen se long dei ia, wan man bae i givim gudfala kakae long wan yang kao mo tu sipsip;

22 Mo bae i kam blong hapen se, from i gat plante melek we bae oli givim, bae hem i kakae bata; i olsem se bata mo hani bae

evriwan i kakae we i stap yet long graon.

23 Mo bae i kam blong hapen se long dei ia, evri ples bae i stap, we i bin gat wan taosen rop blong grep we i kasem wan taosen smol pis blong silva, we bae oli blong ol plan we i save stikim man mo ol nil blong plan.

24 Wetem ol ara mo ol bonara bae ol man i kam long ples ia, from evri graon bae i kam ol plan blong stikim man mo ol nil blong plan.

25 Mo evri hil we bae oli digim wetem ho, long ples ia bae i no gat fraet from ol plan we i save stikim man mo ol nil blong plan; be bae hem i blong sendem aot ol buluk, mo blong ol smol anamol blong purumbut long olgeta.

---

### JAPTA 18

---

*Kraes bae i olsem wan ston we i mekem man i foldaon mo wan ston we i smasem gud ol man—Lukaotem Lod, no ol kleva man we i stap toktok wetem wan smol voes—Luk long loa mo long testimoni blong lidim yufala—Luk long Aesea japta 8. Raonabaot 559–545 yia bifo Kraes i bon.*

Mo tu, toktok blong Lod i bin talem long mi se: Yu tekem wan bigfala pepa, mo raet long hem wetem wan pen blong man, long saed blong Mahe-salal-has-bas.

2 Mo mi bin tekem wetem mi ol witnes we oli holem taet fet blong raet, pris Uria, mo Sekaraea boe blong Jeberekia.

3 Mo mi bin go long profet we i woman; mo hem i bin gat bel mo bonem wan boe. Afta Lod i bin talem long mi: Singaotem nem blong hem Mahe-salal-has-bas.

4 From luk, pikinini bae i no gat save blong talem, Papa blong mi, mo mama blong mi, bifo ol rij samting blong Damaskes mo ol samting we oli bin tekem blong Sameria bae oli tekem i gowe long fored blong king blong Asiria.

5 Lod i bin talem bakegen long mi tu, se:

6 From we pipol ia i no wantem ol wota blong Siloa we i ron sloslo, mo glad tumas long Resin mo boe blong Remalia;

7 Nao taswe, luk, Lod i mekem i kam long olgeta ol wota blong reva, we oli strong mo fulap, long king blong Asiria mo evri paoa blong hem tu; mo bae hem i kam antap ova long ol rod blong hem, mo go ova long evri graon long saed blong hem.

8 Mo bae hem i pas tru long Juda; bae hem i fulap tumas mo go ova, bae hem i go kasem nek; mo ol wing blong hem we hem i stretemaot bae oli kavremap graon blong yu long wan boda kasem narafala boda, O Emanuel.

9 Yufala i kam tugeta mo joen tugeta, o yufala ol pipol, mo yufala bae i brok i go long pisis; mo lisin yufala evriwan blong ol kantri we oli farawe; yufala i rere blong faet, mo yufala bae i brok i go long pisis; yufala i



rere blong faet mo yufala bae i brok i go long pisis.

10 Mekem ol plan tugeta mo bae i no mekem wan samting; talem toktok, mo bae i no stanap; from God i stap wetem yumi.

11 From Lod i bin toktok olsem ia nao long mi wetem wan strong han, mo i bin talem mi se mi no mas wokbaot long fasin blong ol pipol ia, hem i se:

12 Yu no talem, Wan grup we oli joen tugeta, long olgeta we pipol ia bae oli talem se, Wan grup we oli joen tugeta; mo no fraet long wanem oli fraet long hem, mo yu no fraet.

13 Presem Lod blong ol Host hemwan, mo mekem hem i man we yu fraet long hem, mo mekem hem i man we yu fraet bigwan long hem.

14 Mo bae hem i olsem wan sefples; be olsem ston we i mekem man i foldaon long hem, mo olsem wan ston we i smasem gud ol man long tufala laen blong Isrel, olsem wan trap mo wan rop blong holem ol man, blong ol man we i stap long Jerusalem.

15 Mo plante long medel blong olgeta bae oli mekem wan rong samting mo foldaon, mo bae oli brokbrok, mo kam fas long rop blong trap, mo bae oli tekem olgeta.

16 Klosemap testemoni, makem loa wetem ol disaepol blong mi.

17 Mo bae mi trastem Lod, we i tanem fes blong hem long laen blong Jakob, mo bae mi lukaotem hem.

18 Luk, mi mo ol pikinini we Lod i bin givim long mi, mifala i ol saen mo ol merikel long Isrel long Lod blong ol Host, we i stap long hil blong Saeon.

19 Mo taem we bae oli talem long yu: Toktok long olgeta we i gat ol spirit blong ol ded man, mo long ol klewa we oli toktok wetem wan smol voes mo toktok blong olgeta i no strong tumas—bae ol pipol i no nidim blong askem God blong olgeta, blong olgeta we i stap laef i save harem ol samting long ol ded man?

20 Long loa mo long testemoni; mo sapos oli no toktok folem toktok ia, i from i no gat eni laet long olgeta.

21 Mo bae oli pas tru long hem we oli trabol lelebet mo hanggri; mo bae i kam blong hapen se taem we bae oli hanggri, bae oli kros bigwan, mo talem rabis toktok long king blong olgeta mo God blong olgeta, mo lukluk i go antap.

22 Mo bae oli lukluk long wol mo luk trabol, mo tudak, tingting hevi we i dak, mo bae olgeta oli aot i go long tudak.

---

## JAPTA 19

---

*Aesea i tokbaot Mesaea—Ol pipol long tudak bae oli luk wan bigfala laet—Long yumi wan pikinini i bon—Bae hem i kam wan Boe blong King blong Pis mo bae hem i rul long jea blong Deved—Luk long Aesea japta 9. Raonabaot 559–545 yia bifo Kraes i bon.*

BE, tudak bae i no olsem long

taem blong soa blong hem, taem we long stat hem i bin givim smol hadtaem long graon blong Sebulan, mo graon blong Naftali, mo afta long hemia hem i bin givim moa hadtaem raonabaot long Red Si bitim Jordan long Galili, we i gat ol man blong plante defren kantri.

2 Ol pipol we i bin wokbaot long tudak i bin luk wan bigfala laet; olgeta we i stap long graon blong pikja blong ded, long olgeta, laet i bin saen.

3 Yu bin fulumap kantri, mo yu bin mekem glad i kam antap—olgeta i glad long fored blong yu folem glad blong pikimap ol frut, mo olsem ol man i glad taem we oli seraotem ol samting blong ol narafala man.

4 From yu bin brokem yok blong ol hevi samting blong hem, mo stik blong solda blong hem, stik blong man we i stap mekem nogud long hem.

5 From evri faet blong soldia noes i miksimap olgeta, mo ol klos i swim long blad; be faet ia bae i bon olsem faeawud blong faea.

6 Mo long yumi wan pikinini i bon; long yumi wan boe oli givim; mo gavman bae i stap long solda blong hem; mo nem blong hem bae oli singaotem, Gudfala Wan, Kaonsela, Hae God, Papa we i no Save Finis, Boe blong King blong Pis.

7 Long bigfala namba blong gavman mo pis we i stap go antap i no gat en, long jea blong Deved, mo long kingdom blong hem blong rulum hem, mo

blong stanemap hem wetem jajmen mo jastis stat naoia i go kasem long oltaem. Sapot blong Lod blong ol Host bae i mekem samting ia.

8 Lod i bin sendem toktok blong hem i go long Jakob mo toktok ia i bin foldaon long Isrel.

9 Mo evri pipol bae oli save, Efrem tu mo ol pipol we i stap long Sameria, we i talem long hae tingting mo paoa blong hat:

10 Ol brikis i bin foldaon, be bae yumi bildim wetem ol ston we yumi katem; oli katem daon ol sikamo tri, be bae yumi yusum ol redwud long ples blong olgeta.

11 Taswe Lod bae i putumap ol enemi blong Resin agensem hem, mo joenem ol enemi blong hem tugeta;

12 Ol man blong Siria long fored mo ol man blong Filistia biae; mo bae oli kakae flatem Isrel wetem maot we i open. From evri samting ia Lod i no tanem kros blong hem i gowe, be hem i stretem han blong hem yet.

13 From ol pipol i no go long hem we i stap kilim olgeta, mo tu oli no lukaotem Lod blong ol Host.

14 Taswe Lod bae i katemaot long Isrel hed mo tel, branj mo ol gras long wan dei.

15 Ol olfala, hem i hed; mo profet we i stap tijim giaman toktok, hem i tel.

16 From ol lida blong pipol ia i mekem se oli mekem rabis fasin; mo olgeta we olgeta man ia i lidim oli smasem gud olgeta.

17 Taswe Lod bae i no gat glad

long ol yang boe, mo tu bae hem i no gat sore long olgeta we oli no gat papa mo olgeta woman we man blong olgeta i ded; from evriwan long olgeta oli ol man we i gat tufes mo oli stap mekem ol rabis samting, mo evri maot i stap talemaot nogud samting. From evri samting ia Lod i no tanem kros blong hem i gowe, be hem i stretem han blong hem yet.

18 From fasin nogud i bon olsem faea; bae i kakae flatem ol plan we i save stikim man mo ol nil blong plan, mo bae i girap long ol grup blong smol tri blong bus, mo bae oli go antap olsem we smok blong faea i go antap.

19 Tru long bigfala kros blong Lod blong ol Host graon i kam tudak, mo ol pipol bae oli olsem faeawud blong faea; bae i no gat wan man we i save sevem brata blong hem.

20 Mo bae hem i stil wetem raet han mo stap hanggri; mo bae hem i kakae wetem lef han mo bae oli nofulap; bae evri man i kakae mit blong han blong hem bakegen—

21 Manase, Efrem; mo Efrem, Manase; tufala tugeta bae i agensem Juda. From evri samting ia Lod i no tanem kros blong hem i gowe, be hem i stretem han blong hem yet.

---

JAPTA 20

---

*Long taem Kraes i kambak bae oli smasem gud ol rabis man olsem oli bin smasem gud Asiria—No*

*tumas pipol bae i stap laef afta long taem we Lod i kam bakegen—Smol haf nomo blong Jakob bae i kambak long dei ia—Luk long Aesea japta 10. Raonabaot 559–545 yia bifo Kraes i bon.*

SORE tumas long olgeta we oli talemaot ol samting we i no stret, mo we oli raetem ol bigfala rabis loa we oli bin mekem;

2 Blong tanem bak ol pua aot long jajmen, mo blong tekemaot raet long ol pua blong ol pipol blong mi, mekem se oli save stil long ol woman we man blong olgeta i ded, mo blong mekem se oli save stil long olgeta we oli no gat papa!

3 Mo wanem bae yufala i mekem long dei blong jajmen, mo long ples we i emti we bae i kam long farawe? bae yufala i ronwe i go long huia blong askem help? mo bae yufala i livim paoa blong yufala wea?

4 Sapos i no gat mi, bae oli bodaon long ol prisena, mo bae oli foldaon andanit long olgeta we oli bin kilim olgeta i ded. From evri samting ia Lod i no tanem kros blong hem i gowe, be hem i stretem han blong hem yet.

5 O, man blong Asiria, paoa blong kros blong mi mo stik long han blong olgeta, i stret kros blong olgeta.

6 Bae mi sendem hem agensem wan kantri we i gat tufes, mo agensem ol pipol blong kros blong mi bae mi givim oda long hem blong tekem ol samting blong ol narafala man, mo blong tekem ol samting we oli bin

stilim, mo blong purumbut long olgeta daon olsem sofmad blong ol rod.

7 Be hem i no minim olsem, mo tu bae hat blong hem i tingting olsem; be long hat blong hem, hem i blong smasem gud mo katemaot ol kantri we namba blong olgeta i no smol.

8 From hem i talem se: Ol boe blong king blong mi oli no ol king evriwan?

9 Kalnoho i no olsem Kakemis? Hamat i no olsem Apad? Same-ria i no olsem Damaskes?

10 Olsem we han blong mi i bin statem ol kingdom blong ol aedol, mo we ol pikja blong olgeta i bin bitim blong olgeta long Jerusalem mo blong Sameria.

11 Bae mi no mekem, olsem we mi bin mekem long Sameria mo ol aedol blong hem, mekem semak olsem ia long Jerusalem mo ol aedol blong hem?

12 From samting ia bae i blong hapen hapen se taem we Lod i bin mekem evri wok blong hem long hil blong Saeon mo long Jerusalem, bae mi panisim frut blong hat we i strong tumas blong king blong Asiria, mo ol glori blong ol lukluk blong hem we i hae.

13 From hem i talem se: Wetem paoa blong han blong mi mo wetem waes tingting blong mi, mi bin mekem ol samting ia; from mi mi waes; mo mi bin muvum ol boda blong ol pipol, mo mi bin stilim ol rij samting blong olgeta, mo mi bin putum daon ol pipol we i stap olsem wan strong man;

14 Mo han blong mi i bin faenem olsem wan bed blong pijin, ol rij samting blong ol pipol. Mo olsem wan i karem ol eg i kam tugeta we i stap mi bin karem i kam tugeta ful wol; mo i no bin gat wan we i bin muvum wing, o i openem maot o i bin mekem noes olsem wan smol pijin.

15 Bae akis i tok flas agensem hem we i kat wetem hem? Bae so i gat wan tingting se hem i moa hae long man we i stap yusum hem? Olsem se stik bae i sekem hemwan agensem olgeta we oli stap leftemap hem, o olsem se stik bae i leftemap hemwan olsem se stik ia i no wan wud!

16 Taswe bae Lod, Lod blong ol Host, bae hem i sendem long medel blong ol fatfat wan blong hem, fasin blong bunbun; mo andanit long glori blong hem bae hem i statem wan faea olsem wan faea we i bon.

17 Mo laet blong Isrel bae i stap olsem wan faea, mo Tabu Wan blong hem bae i stap olsem wan flem blong faea, mo bae i bon mo bae i kakae flatem ol nil blong plan blong hem mo ol plan blong hem we i save stikim man long wan dei;

18 Mo bae i kakae flatem glori blong bus blong hem, mo blong garen blong hem we i karem plante frut, sol tugeta wetem bodi; mo bae oli stap olsem taem we wan man we i karem flag i foldaon from i taed.

19 Mo ol tri blong bus blong hem bae oli no plante, mekem

se wan pikinini i save kaontem olgeta.

20 Mo bae i kam blong hapen se long dei ia, we smol haf nomo blong Isrel, mo olgeta we oli bin ronwe long laen blong Jakob, bae oli nomo dipen long hem, we i bin mekem olgeta harem nogud, be bae i dipen long Lod, Tabu Wan blong Isrel, samting ia i tru.

21 Smol haf nomo bae i kambak, yes, smol haf nomo blong Jakob tu, long strong God.

22 Hem i nomata se ol pipol blong yu Isrel i plante olsem sanbij blong solwota, be stil wan smol haf nomo bae i kambak; bae taem blong smasem gudgud we hem i bin talemaot finis bae i fulap tumas wetem stret fasin.

23 From Lod God blong ol Host bae i spolemgud, olsem we hem i bin talem long evri graon.

24 Taswe, olsem ia nao Lod God blong ol Host i talem: O ol pipol blong mi we i stap long Saeon, no fraet long man blong Asiria; bae hem i kilim yufala wetem wan stik, mo bae hem i leftemap stik blong hem agensem yufala, olsem fasin blong Ijip.

25 From long sot taem nomo, mo stret kros ia bae i finis, mo kros blong mi long saed blong ded blong olgeta.

26 Mo Lod blong ol Host bae i mekem wan wip blong hem folem taem we oli bin kilim ded ol man blong Midian long ston blong Oreb; Mo olsem we kros blong hem i bin stap long sol-

wota, olsem ia bae hem i leftemap hem folem fasin blong Ijip.

27 Mo bae i kam blong hapen se long dei ia, se ol hevi samting blong hem bae oli kamaot long solda blong yu, mo yok blong hem i aot long nek blong yu, mo bae oli smasem gud yok ia from taem blong anoenting.

28 Hem i kam long Eae, hem i bin go long Migron; long Mikmas hem i bin putum ol samting we oli pulum biae long hos blong karem ol samting long hem.

29 Oli bin go ova long rod; oli bin slip long tenet long Geba; Ramat i fraet; Gibeon blong Saol i bin ronwe.

30 Singaot i go antap, o gel blong Galim; mekem se singaot ia oli harem long Laes, O pua Anatot.

31 Madmena i bin ronwe; ol man we i stap long Gebim i kam long wan ples blong ronwe tugeta.

32 Be stil bae hem i stap long Nob long dei ia; bae hem i sekem han blong hem agensem hil blong gel blong Saeon, hil blong Jerusalem.

33 Luk, Lod, Lod blong ol Host bae i katemaot ol branj wetem fraet; mo ol hae wan we oli hae tumas bae i katem daon olgeta; mo olgeta we oli tingting hae tumas long olgeta bakegen bae oli putum tingting blong olgeta i stap daon.

34 Mo bae hem i katem daon ol grup blong smol tri blong bus wetem aean, mo Lebanon bae i foldaon tru long wan strong wan.

## JAPTA 21

*Stamba blong Jese (Kraes) bae i jaj long stret fasin — Save blong God bae i kavremap wol long milenium — Lod bae i leftemap wan flag mo karem Isrel i kam tugeta — Luk long Aesea japta 11. Raonabaot 559-545 yia bifo Kraes i bon.*

Mo bae i kamaot wan niufala gru aot long stamba blong Jese, mo wan branj bae i gru aot long ol rus blong hem.

2 Mo Spirit blong Lod bae i stap long hem, spirit blong waes tingting mo haremsave, spirit blong kaonsel mo paoa, spirit blong save mo blong respek blong Lod;

3 Mo bae i mekem hem blong andastanem kwik long respek blong Lod; mo bae hem i no jaj folem lukluk blong ol ae blong hem, mo tu toktok strong folem wanem we hem i harem wetem sorae blong hem.

4 Be wetem stret fasin bae hem i jajem ol pua, mo toktok strong wetem jastis blong ol man we oli no stap flas long wol; mo bae hem i kilim wol wetem stik blong maot blong hem, mo wetem win blong skin blong maot blong hem bae hem i kilim ded ol nogud man.

5 Mo stret fasin bae i stap olsem strap blong wes blong hem, mo fasin blong holem taet fet, strap blong jes blong hem.

6 Wael dog tu bae i stap wetem smol sipsip, mo lepad bae i ledaon wetem wan yang nani-got, mo yang buluk mo yang laeon mo buluk we i fatfat

tugeta; mo wan smol pikinini bae i lidim olgeta.

7 Mo kao mo bea bae i kakae; ol yang wan blong olgeta bae i ledaon tugeta; mo laeon bae i kakae gras olsem buluk.

8 Mo pikinini we i stap titi yet bae i pleiplei long hol blong wan smol posen snek mo bigfala pikinini bae i putum han blong hem long hol blong wan posen snek.

9 Bae oli no mekem i soa o smasem gud eni samting long evri tabu bigfala hil blong mi, from wol bae i fulap wetem save blong Lod, olsem we ol wota i kavremap solwota.

10 Mo long dei ia bae i gat wan rus blong Jese we bae i stanap olsem wan flag blong ol pipol; long hem bae ol Jentael i lukaotem; mo ples blong spel blong hem bae i naes.

11 Mo bae i kam blong hapen se long dei ia we Lod bae i putum han blong hem bakegen blong nambatu taem, blong tekem bak smol haf nomo blong ol pipol blong hem we bae i stap, long Asiria, mo long Ijip, mo long Patros, mo long Itiopia, mo long Elam, mo long Babilonia, mo long Hamat, mo long ol aelan blong solwota.

12 Mo bae hem i leftemap wan flag blong ol kantri, mo bae i karem i kam tugeta olgeta we oli bin sakemaot long Isrel, mo karem i kam tugeta ol man Juda we i bin go olbaot long ol fo pat blong wol.

13 Jalus blong Efrem tu bae i aot, mo ol enemi blong Juda

Lod bae i katemaot olgeta; Efrem bae i no jalus long Juda, mo Juda bae i no givim hadtaem long Efrem.

14 Be bae oli flae long ol solda blong ol man blong Filistia i go long wes; bae oli stilim olgeta blong is tugeta; bae oli putum han blong olgeta long Edom mo Moab; mo ol pikinini blong Amon bae oli obei olgeta.

15 Mo Lod bae i spoel gud tang blong solwota blong Ijip; mo wetem strong win blong hem bae hem i sekem han blong hem ova long reva, mo bae i kilim hem i go long seven smol riva, mo mekem ol man i go ova wetem drae leg.

16 Mo bae i gat wan bigfala rod blong smol haf nomo blong ol pipol blong hem we bae oli stap biae, long Asiria, olsem we i bin stap long Isrel long dei we hem i bin kamaot long Ijip.

---

### JAPTA 22

---

*Long dei blong milenium evri man bae i presem Lod—Bae hem i stap long medel blong olgeta—Luk long Aesea japta 12. Raonabaot 559–545 yia bifo Kraes i bon.*

Mo long dei ia bae yu talem se: O Lod, bae mi presem yu; i nomata we yu yu bin kros long mi kros blong yu i gowe long mi, mo yu bin leftemap tingting blong mi.

2 Luk, God i sevem mi; bae mi trastem, mo no fraet; from Lod JEHOVA i paoa blong mi mo singsing blong mi; hem tu i bin kam blong sevem mi.

3 Taswe, wetem glad bae yufala i kasem wota aot long ol wel blong fasin blong sevem man.

4 Mo long dei ia bae yufala i talem se: Presem Lod, prea long nem blong hem, talemaot ol wok blong hem long medel blong ol pipol, talem se nem blong hem i hae tumas.

5 Singsing long Lod; from hem i bin mekem ol gudgudfala samting; oli save samting ia long ful wol.

6 Singaot mo singaot laod, yufala we i stap long Saeon; from Tabu Wan blong Isrel i bigwan long medel blong yufala.

---

### JAPTA 23

---

*Smasgud blong Babilon i wan eksampol blong ol samting we bae oli smasem gud taem we Kraes i kambak bakegen—Bae hem i wan dei blong kros mo pembak trabol—Babilon (wol ia) bae i foldaon blong oltaem—Luk long Aesea japta 13. Raonabaot 559–545 yia bifo Kraes i bon.*

MESEJ blong ded blong Babilon, we Aesea boe blong Amoj i bin luk.

2 Yufala i leftemap wan flag long bigfala hae hil, singaot laod long olgeta, sekem han, blong oli save go long ol get blong ol man we oli laef moa gud bitim ol pua man.

3 Mi bin givim oda long ol tabu wan blong mi, mi tu mi bin singaotem ol strong man blong mi, from kros blong mi i no stap long olgeta we oli glad we mi mi hae.

4 Noes blong ol grup blong ol pipol long ol bigfala hil i olsem blong wan bigfala pipol, wan noes we i laod blong ol kingdom blong ol kantri we i stap tugeta, Lod blong ol Host i karem i kam tugeta ol soldia blong faet.

5 Oli kam long wan kantri we i longwe tumas, long en blong heven, yes, Lod, mo ol tul blong faet blong stret kros blong hem, blong smasem gud ful graon.

6 Singaot laod yufala, from dei blong Lod i klosap; bae i kam olsem wan fasin blong smasem gud samting long Hem we i gat bigfala paoa.

7 Taswe, bae evri han i taet; hat blong evri man bae i olsem aes we i ron;

8 Mo olgeta bae i fraet; ol soa blong bodi we i strong mo ol sore bae i holem taet olgeta; olgeta bae oli sapraes long wanwan long olgeta; ol fes blong olgeta bae i olsem ol flem blong faea.

9 Luk, dei blong Lod i stap kam, i rabis bigwan tugeta wetem kros mo strongfala kros, blong mekem graon i emti; mo bae hem i smasem gud ol man we oli sin, aot long hem.

10 From ol sta blong heven mo ol grup blong sta blong hem bae oli no givimaot laet; San bae i kam tudak taem we hem i girap, mo mun bae i no mekem laet blong hem i laet.

11 Mo bae mi panisim wol from fasin nogud, mo ol nogud man from ol rabis fasin blong olgeta; bae mi mekem se ol hae tingting blong ol flas man i stop, mo bae mi pulum daon

tingting we i hae blong ol rabis man.

12 Bae mi mekem wan man i moa gudgudfala bitim gudfala gol; wan man tu bitim wan pis gol blong Ofiri.

13 Taswe, bae mi sekem ol heven, mo wol bae i kamaot long ples blong hem, long kros blong Lod blong ol Host, mo long dei blong strongfala kros blong hem.

14 Mo bae i olsem wan dia we oli stap ronem, mo olsem wan sipsip we i no gat eni man we i stap lukaotem hem; mo olgeta, bae evri man i gobak long ol pipol blong hem, mo ronwe, evriwan i gobak long graon blong hem.

15 Evriwan we i gat hae tingting, bae oli stikim olgeta tru; yes, mo evriwan we i joenem olgeta we oli nogud bae oli foldaon wetem naef blong faet.

16 Ol pikinini blong olgeta tu bae oli katem olgeta long pisis long fored blong ol ae blong olgeta; bae oli smasem gud haos blong olgeta mo bae oli repem ol woman blong olgeta.

17 Luk, bae mi tanem tingting blong olgeta blong Media i go agensem olgeta, we bae oli no tingbaot silva mo gol, mo tu bae oli no glad long hem.

18 Ol bonara blong olgeta tu bae oli kilim ol yang man i go long pisis; mo olgeta bae oli no filim sore long ol pikinini blong bel; ol ae blong olgeta bae i no sevem ol pikinini.

19 Mo Babilon, glori blong ol kingdom, flas blong Kaldis we i bigwan tumas, bae i olsem



taem we God i bin smasem gud Sodom mo Gomora.

20 Bae i no gat man i stap long hem, mo tu bae hem i no gat man long wan jeneresen i go long narafala jeneresen: mo tu bae ol man blong Arab i no stanemap tenet blong olgeta long ples ia; mo tu bae ol man blong lukaotem sipsip i no mekem ol sipsip blong olgeta i spel long ples ia.

21 Be ol wael anamol blong dreaples bae i stap long ples ia; mo ol haos blong olgeta bae i fulap long ol anamol we i no glad; mo ol hok naet bae i stap long ples ia, mo ol man nanigot bae i danis long ples ia.

22 Mo ol wael anamol blong ol aelan bae oli singaot long ol emti haos blong olgeta, mo ol dragon long ol naes haos blong king; mo taem blong hem klosap i kam, mo dei blong hem bae oli no seftem. From bae mi smasem gud hem kwiktaem; yes, from bae mi gat sore long ol pipol blong mi, be ol nogud man bae oli ded.

---

### JAPTA 24

---

*Isrel bae i kam tugeta mo bae hem i pasem wan gud spel long milenium —Lod i bin sakemaot Lusifa aot long heven from hem i bin go agensem hem— Isrel bae i win ova long Babilon (wol ia)—Luk long Aesea japta 14. Raonabaot 559–545 yia bifo Kraes i bon.*

FROM Lod bae i gat sore long Jakob, mo bae i jusum Isrel yet,

mo putum olgeta long ol graon blong olgeta bakegen; mo ol man we oli no save olgeta bae oli joen wetem olgeta, mo bae oli holem taet long laen blong Jakob.

2 Mo ol pipol bae oli tekem olgeta mo tekem olgeta long ples blong olgeta; yes, from longwe long evri en blong wol; mo bae oli go bak long ol graon blong promes blong olgeta. Mo laen blong Isrel bae i kipim olgeta, mo graon blong Lod bae i blong ol wokman mo ol haosgel; mo bae oli tekem olgeta i kam prisena long olgeta we oli bin prisena; mo bae oli rulum ol man we oli stap givim hadtaem long olgeta.

3 Mo bae i kam blong hapen se long dei ia se Lod bae i givim long yu spel, long ol sore blong yu, mo long fraet blong yu, mo long strong wok blong slef we oli bin fosem yu blong wok long hem.

4 Mo bae i kam blong hapen se long dei ia, se bae yu talem toktok ia agensem king blong Babilon, mo talem se: Olsem wanem nao man we i stap givim hadtaem i bin stop, bigtaon blong gol i bin stop!

5 Lod i bin brokem stik blong ol nogud pipol, ol stik blong king blong ol man we i stap rul.

6 Hem we i bin kilim ol pipol long kros, wetem ol wip we i stap gohed, hem we i bin rulum ol kantri long kros, i kasem fulap hadtaem, mo i no gat wan we i stopem.

7 Ful wol i spel, mo i kwaet; oli stat blong singsing.

8 Yes, ol sapin tri i glad from yu, mo tu ol redwud blong Lebanon, i talem se: Stat long taem we yu bin foldaon i no gat wan man we i bin kam antap agensem mifala.

9 Hel long andanit i muv from yu, blong mitim yu long taem we yu kam; hem i wekemap ol ded from yu, ol jif wan blong wol tu; hem i bin leftemap long ol jea evri king blong ol kantri.

10 Olgeta evriwan bae oli toktok mo talem long yu se: Yu tu i bin kam slak olsem mifala? Yu bin kam olsem mifala?

11 Flas blong yu i foldaon long gref; oli no harem noes blong ol vaeol blong yu; ol wom i spred andanit yu, mo ol wom i kavremap yu.

12 Olsem wanem yu bin foldaon long heven, O Lusifa, son blong moning! Oli bin katem yu daon long graon, we i bin mekem ol kantri oli kam slak!

13 From yu bin talem long hat blong yu se: Bae mi go antap long heven, bae mi mekem jea blong mi i moa hae antap bitim ol sta blong God; bae mi sidaon tu long bigfala hil blong olgeta we oli kam tugeta, long ol saed blong not;

14 Bae mi go antap bitim ol hae blong ol klaod, bae mi olsem Hae God we i hae olgeta.

15 Stil bae oli karem yu i kam daon long hel, long ol saed blong hol.

16 Olgeta we i luk yu bae oli lukluk strong long yu, mo bae oli wajem gud yu, mo bae oli se: Hemia i man we i bin mekem

wol i seksek, we i bin sekem ol kingdom?

17 Mo i bin mekem wol i olsem wan ples we i no gat man long hem, mo bin smasem gud ol bigtaon blong hem, mo i no bin openem haos blong ol prisena blong hem?

18 Evri king blong ol kantri, yes, olgeta evriwan, ledaon long glori, evriwan long olgeta long haos blong hem nomo.

19 Be oli bin sakemaot yu long gref blong yu olsem wan branj we i olsem rabis sin, mo smol haf nomo blong olgeta we oli bin kilim ded olgeta, naef blong faet i go tru long olgeta, we i go daon long ol ston blong hol; olsem wan ded bodi we i bin purumbut andanit long leg.

20 Yu bae yu no joen wetem olgeta long taem blong berem man, from yu bin smasem gud graon blong yu mo bin kilim ol pipol blong yu; ol pikinini blong olgeta we i stap mekem ol samting we i nogud bae oli neva gat nem.

21 Mekem rere blong kilim ded ol pikinini blong hem from ol rabis fasin blong ol papa blong olgeta, blong mekem se oli no girap, o stap long graon, o fulumap fes blong wol wetem ol bigtaon.

22 From bae mi girap agensem olgeta, Lod blong ol Host i talem, mo katemaot long Babilon, nem, mo smol haf nomo, mo boe, mo nefiu, Lod i talem.

23 Bae mi mekem hem tu wan ples blong ol pijin blong solwota, mo ol smol ples blong wota; mo bae mi brum hem

wetem brum blong smasem gud ol samting, Lod blong ol Host i talem.

24 Lod blong ol Host i bin mekem wan strongfala promes, i se: I tru olsem we mi bin tingting, sem samting bae i hapen; mo olsem we mi bin plan, sem samting bae i hapen—

25 Blong bae mi karem man blong Asiria i kam long graon blong mi, mo long ol bigfala hil blong mi purumbut long hem andanit long leg; afta yok blong hem bae i aot long olgeta, mo hevi samting blong hem i aot long ol solda blong olgeta.

26 Hemia i stamba tingting we i plan blong ful wol; mo hemia i han we i stretemaot long evri kantri.

27 From Lod blong ol Host i bin plan, mo huia bae i jenisim? Mo han blong hem i stretemaot, mo huia bae i tanem hem bak?

28 Long yia we king Ahas i bin ded, i bin mesej ia blong ded.

29 No glad, yu, ful Palistina, from stik blong hem we i bin kilim yu i brok; from aot long rus blong wan posen snek bae i kamaot wan smol posen snek, mo frut blong hem bae i wan samting we i gat faea long hem mo i flae.

30 Mo ol fasbon blong ol pua man bae i kakae, mo olgeta we i gat nid bae i slip sef; mo bae mi kilim rus blong yu wetem hadtaem blong kasem kakae, mo hem bae i kilim ded ol smol haf nomo blong yu.

31 Krae laod, O get; singaot laod, O bigtaon; yu, ful Palistina, i no oganaes; from bae i kam

long not wan smok, mo i no gat wan we bae i stap hemwan long ol taem stret taem blong hem.

32 Wanem nao bae i ansa blong ol mesenja blong ol kantri? We Lod i bin statem Saeon, mo ol pua blong ol pipol blong hem bae oli tras long hem.

---

## JAPTA 25

---

*Nifae i glad long fasin we i klia—  
Ol profesi bae oli andastanem long ol las dei—Ol Jiu bae oli kambak long Babilon, krusifaem Mesaea, mo oli seraotem olgeta olbaot mo wipim olgeta—Bae oli karem olgeta i kambak taem we oli biliv long Mesaea—Bae hem i kam fas taem sikis handred yia afta Lihae i bin aot long Jerusalem—Ol laen blong Nifae i holem loa blong Moses mo biliv long Kraes, we i Tabu Wan blong Isrel. Raonabaot 559–545 yia bifo Kraes i bon.*

NAO mi, Nifae, mi tokbaot smol long saed blong ol toktok we mi bin raetem, we i bin kamaot long maot blong Aesea. From luk, Aesea i bin talemaot plante samting we i bin had long plante long ol pipol blong mi blong andastanem; from oli no save long saed blong fasin blong talemaot profesi long medel blong ol Jiu.

2 From mi, Nifae, mi no bin tijim olgeta plante samting long saed blong fasin blong ol Jiu; from ol wok blong olgeta i bin ol wok blong tudak, mo ol samting we oli bin mekem oli bin ol samting blong ol rabis sin.

3 From samting ia, mi raet long

ol pipol blong mi, long olgeta we bae oli kasem afta long taem ia ol samting we mi raetem, blong oli save gat save long ol jajmen blong God, se oli kam long evri kantri, folem toktok we hem i bin talemaot.

4 From samting ia, lisiin, O ol pipol blong mi, we i blong laen blong Isrel, mo givim sorae long ol toktok blong mi; from we ol toktok blong Aesea i no klia long yufala, be oli klia long olgeta we i fulap wetem spirit blong profesi. Be mi givim long yufala wan profesi, folem spirit we i stap long mi; from samting ia bae mi profesae folem klia fasin we i bin stap wetem mi stat long taem we mi bin kamaot long Jerusalem wetem papa blong mi; from luk, sol blong mi i glad long klia fasin long ol pipol blong mi blong mekem se oli save lanem.

5 Yes, mo sol blong mi i glad long ol toktok blong Aesea, from mi bin kamaot long Jerusalem, mo ol ae blong mi i bin luk ol samting blong ol Jiu, mo mi save we ol Jiu i andastanem ol samting blong ol profet, mo i no gat wan narafala pipol we i andastanem ol samting we oli bin talemaot long ol Jiu olsem olgeta, hemia nomo sapos oli no tijim olgeta folem fasin blong ol samting blong ol Jiu.

6 Be luk, mi, Nifae, mi no bin tijim ol pikinini blong mi folem fasin blong ol Jiu; be luk, mi, long mi bakegen, i bin stap long Jerusalem, from samting ia mi save long saed blong ol ples raonabaot; mo mi bin talemaot

long ol pikinini blong mi long saed blong ol jajmen blong God, we i bin kam blong hapen long medel blong ol Jiu, long ol pikinini blong mi, folem evri samting we Aesea i bin talemaot, mo mi mi no raetem ol samting ia.

7 Be luk, mi gohed wetem profesi blong miwan, folem klia fasin blong mi; long hem mi save we i no save gat wan man i save mekem mistek; be, long ol dei we ol profesi blong Aesea bae i hapen ol man bae oli save tru, long ol taem we bae oli hapen.

8 From samting ia, oli gat yus long ol pikinini blong ol man, mo hem we i ting se oli no olsem, long olgeta bae mi toktok stret, mo talemaot ol toktok nomo long ol pipol blong mi; from mi save se ol samting ia bae i gat bigfala yus long olgeta long ol las dei; from long dei ia bae oli andastanem olgeta; from samting ia, from gud blong olgeta mi bin raetem ol samting ia.

9 Mo olsem oli bin smasem gud wan jeneresen long medel blong ol Jiu from rabis fasin, long sem fasin oli bin smasem gud olgeta long wan jeneresen i go long narafala jeneresen folem ol rabis fasin blong olgeta; mo oli neva bin smasem gud eni long olgeta hemia nomo sapos ol profet blong Lod i no bin talemaot se ol samting ia bae i hapen.

10 From samting ia, oli bin talemaot long olgeta long saed blong smasgud we bae i kam long olgeta, kwiktaem afta papa blong mi i bin aot long

Jerusalem; be, oli bin mekem ol hat blong olgeta i kam strong; mo folem profesi blong mi oli bin kilim olgeta i ded, be olgeta ia nomo we oli tekem olgeta i gowe i kam prisena long Babilon.

11 Mo nao samting ia mi talem from spirit we i stap long mi. Mo i nomata we oli bin karem olgeta i go we bae oli kambak bakegen, mo stap long graon blong Jerusalem; from samting ia, bae oli gobak bakegen long graon blong olgeta we i kam long ol papa blong olgeta.

12 Be, luk, bae oli gat ol faet, mo ol nius blong ol faet; mo taem we dei ia i kam we Wan Pikinini Nomo blong Papa, yes, Papa blong heven tu mo blong wol, bae hem i soemaot hemwan long olgeta long bodi blong mit mo bun, luk, bae oli sakemaot hem, from ol rabis fasin blong olgeta, mo ol hat blong olgeta i strong, mo oli stronghed.

13 Luk, bae oli krusifaem hem; mo afta oli putum hem long wan hol blong ston blong spes blong tri dei bae hem i girap long ded, wetem paoa blong mekem oraet long ol wing blong hem; mo olgeta we bae oli biliv long nem blong hem bae oli sev long kingdom blong God. From samting ia, sol blong mi i glad blong talemaot profesi long saed blong hem, from mi bin luk dei blong hem, mo hat blong mi i presem tabu nem blong hem.

14 Mo luk bae i hapen se afta we Mesaea i bin girap long ded, mo i bin soemaot hemwan long

ol pipol blong hem, long olgeta evriwan we bae oli biliv long nem blong hem, luk, bae oli smasem gud Jerusalem bakegen; from sore tumas long olgeta we i faet agensem God mo ol pipol blong jos blong hem.

15 From samting ia, ol Jiu bae oli seraotem olgeta olbaot long evri kantri; yes, mo tu bae oli smasem gud Babilon tu; from samting ia, ol Jiu bae oli seraot olbaot tru long ol narafala kantri.

16 Mo afta oli bin seraot olbaot, mo Lod God i bin kilim olgeta tru ol narafala kantri blong spes blong plante jeneresen, yes, hem i daon long wan jeneresen i go long narafala jeneresen kasem taem we bae oli mekem olgeta blong biliv long Kraes, Pikinini blong God, mo atonmen, we i no gat en blong evri man—mo taem we dei ia bae i kam we olgeta bae i biliv long Kraes, mo wosipim Papa long nem blong hem, wetem ol klin hat mo ol klin han, mo no lukluk long fored bakegen blong wan narafala Mesaea, afta, long taem ia, dei ia bae i kam we i mas nid i stap we bae oli mas bilivim ol samting ia.

17 Mo Lod bae i yusum han blong hem bakegen blong seken taem blong karem bak ol pipol blong hem long ples ia blong go lus mo foldaon. From samting ia, bae hem i gohed blong mekem wan gudfala wok mo wan sapraes long medel blong ol pikinini blong man.

18 From samting ia, hem bae i

karem fored ol toktok blong hem long olgeta, we ol toktok bae i jajem olgeta long las dei, from Lod bae i givim long olgeta from stamba tingting blong winim tingting blong olgeta blong tru Mesaea, we oli bin sakemaot hem; mo blong winim tingting blong olgeta blong oli no nid blong lukluk i go long fored moa blong wan Mesaea blong kam, from bae i no sud gat wan i kam, hemia nomo sapos i no wan giaman Mesaea we bae i trikim ol pipol; from i gat wan Mesaea nomo we ol profet i tokbaot, mo Mesaea ia i hem we ol Jiu bae oli sakemaot.

19 From folem ol toktok blong ol profet, Mesaea i kam long sikis handred yia afta long taem we papa blong mi i bin aot long Jerusalem; mo folem ol toktok blong ol profet, mo tu toktok blong enjel blong God, nem blong hem bae i Jisas Kraes, Pikinini blong God.

20 Mo nao, ol brata blong mi, mi bin toktok klia blong mekem se yufala i no save mekem mistek. Mo olsem we Lod God i stap laef we i bin karem Isrel aot long graon blong Ijip, mo i bin givim long Moses paoa blong hem i mekem i oraet ol kantri afta we ol posen snek i bin kakae olgeta, sapos bae oli sakem ae blong olgeta long snek we hem i bin leftemap long fored blong olgeta, mo tu i bin givim hem paoa blong hem i kilim ston blong wota bae i kamaot; yes, luk mi talem long yu, se olsem we ol samting ia i tru, mo olsem we Lod God i

stap laef, i no gat eni narafala nem we oli givim andanit long heven, be Jisas Kraes ia nomo, we mi bin tokbaot, we tru long hem ol man i save sev.

21 From samting ia, from stamba tingting ia Lod God i bin promes long mi se ol samting ia we mi raetem bae oli kipim mo sevem, mo givim daon long ol pikinini blong mi, long wan jeneresen i go long narafala jeneresen, blong mekem se promes i save hapen long Josef, se ol pikinini blong hem bae i neva ded long taem we wol ia i stanap.

22 From samting ia, ol samting ia bae oli go long wan jeneresen i go long narafala jeneresen long taem we wol i stanap; mo bae oli go folem plan mo tingting blong God; mo ol kantri we bae oli holem ol samting ia bae oli kasem jajmen long olgeta folem ol toktok we oli bin raetem.

23 From mifala i wok had oltaem blong raet, blong mekem ol pikinini blong mifala, mo tu ol brata blong mifala, blong biliv long Kraes, mo blong stretem olgeta wetem God; from mifala i save se hem i tru long gladhat we mifala i sev, afta evri samting mifala i save mekem.

24 Mo, i nomata mifala i biliv long Kraes, mifala i folem loa blong Moses, mo lukluk long fored wetem strong bilif long Kraes, kasem taem we loa ia bae i hapen.

25 Long ol narafala toktok, from en ia oli bin givim loa; from samting ia loa ia i bin kam ded long mifala, mifala i kam laef long Kraes from fet blong

mifala; be stil mifala i folem loa from ol komanmen.

26 Mo mifala i tokbaot Kraes, mifala i glad long Kraes, mifala i prij long saed blong Kraes, mifala i profesae long saed blong Kraes, mo mifala i raetem folem ol profesu blong mifala blong mekem se ol pikinini blong mifala i save gat save long wanem ples oli save lukluk long hem blong kam klin aot long ol sin blong olgeta.

27 From samting ia, mifala i toktok long saed blong loa blong mekem se ol pikinini blong mifala i save gat save se loa ia i ded; mo olgeta, from oli save se loa i ded, i save lukluk i go long fored long laef ia we i stap long Kraes, mo save from wanem en oli bin givim loa ia. Mo afta loa i hapen long Kraes, oli no nidim blong mekem ol hat blong olgeta i kam strong agensem hem, taem we loa ia i mas stop.

28 Mo nao luk, ol pipol blong mi, yufala i wan stronghed pipol; from samting ia, mi bin toktok klia long yufala, blong mekem se yufala i no save andastanem nogud. Mo ol toktok we mi bin talemaot bae i stap olsem wan testimoni agensem yufala; from oli inaf blong tijim eni man wei we i stret; from wei we i stret hem i blong biliv long Kraes mo no tanem baksaed long hem; from taem we yufala tanem baksaed long hem yufala i tanem baksaed tu long ol profet mo loa.

29 Mo nao luk, mi talem long yufala se wei we i stret hem i blong biliv long Kraes, mo no

tanem baksaed long hem; mo Kraes i Tabu Wan blong Isrel; from samting ia yufala i mas bodaon long fored blong hem, mo wosipim hem wetem evri strong blong yufala, tingting, mo paoa, mo ful sol blong yufala; mo sapos yufala i mekem samting ia bae God i no save sakemaot yufala.

30 Mo, i semak olsem we bae i gat nid, yufala i mas holem ol wok mo ol odinens blong God kasem taem we loa bae i hapen we oli bin givim long Moses.

---

### JAPTA 26

---

*Kraes bae i prij long ol man blong Nifae — Nifae i luk long saed blong smasgud blong ol pipol blong hem long ol dei we oli stap kam — Bae oli toktok aot long das — Ol Jentael bae oli bildim ol giaman jos mo ol sikret grup — Lod i blokem ol man blong yusum ol fasin blong giaman pris. Raonabaot 559–545 yia bifo Kraes i bon.*

Mo afta Kraes bae i bin girap long ded hem bae i soemaot hemwan long yufala, ol pikinini blong mi, mo ol brata blong mi we mi lavem tumas; mo ol toktok we bae hem i talemaot long yufala bae oli ol loa we bae yufala i mekem.

2 From luk, mi talem long yu se mi bin luk we i gat plante jeneresen bae i pas i gowe, mo bae i gat ol bigfala faet mo ol rao long medel blong ol pipol blong mi.

3 Mo afta Mesaea bae i kam bae i gat ol saen i kamaot long ol

pipol blong mi long saed blong taem blong bon blong hem, mo tu long saed blong ded blong hem mo laef bakegen; mo dei ia bae i wan bigfala mo rabis dei long ol nogud man, from bae oli ded; mo oli ded from oli sakemaot ol profet, mo ol sent, mo stonem olgeta, mo kilim ded olgeta; from samting ia krae blong blad blong ol sent bae i go antap long God long graon agensem olgeta.

4 From samting ia, olgeta we oli gat hae tingting, mo we i stap mekem fasin nogud, dei we i stap kam bae i bonem olgeta evriwan, Lod blong ol Host i talem, from bae oli olsem ol doti blong wit.

5 Mo olgeta we oli kilim ded ol profet, mo ol sent, bae ol dip ples blong graon i open mo olgeta ia bae oli foldaon i go insaed, Lod blong ol Host i talem; mo ol bigfala hil bae i kavremap olgeta, mo ol waelwin bae i karem olgeta i gowe, mo ol ston haos bae i foldaon long olgeta mo smasem olgeta i go long pisis mo mekem olgeta i kam paoda.

6 Mo olgeta bae oli kasem visit wetem ol tanda, mo ol laetning, ol graon i seksek, mo evri kaen fasin blong smasem gud, from faea blong kros blong Lod bae i laet agensem olgeta, mo olgeta bae i olsem doti blong wit, mo dei we i kam bae i kakae flatem olgeta, Lod blong ol Host i talem.

7 O, soa blong bodi, mo harem nogud blong sol blong mi from ol pipol blong mi we i ded! From

mi, Nifae, mi bin luk samting ia, mo hem i klosap kakae flatem mi long fored blong Lod; be mi mas singaot long God blong mi: Ol fasin blong yu i stret.

8 Be luk, olgeta we i stret we oli lisin long ol toktok blong ol profet, mo no smasem gud olgeta, be oli lukluk i go long fored long Kraes wetem strong bilif, blong ol saen we oli givim, i nomata long ol fasin blong givim hadtaem—luk, olgeta ia oli olgeta we bae oli no ded.

9 Be Pikinini blong Stret Fasin bae i kamaot long olgeta; mo hem bae i mekem olgeta i olraet, mo bae oli gat pis wetem hem, kasem taem we tri jeneresen i bin pas i gowe, mo plante long olgeta blong nambafo jeneresen bae i bin pas i gowe long stret fasin.

10 Mo taem we ol samting ia i bin pas finis wan kwik fasin blong smasem gud bae i kam long ol pipol blong mi; from i nomata long ol soa blong bodi blong sol blong mi, mi bin luk samting ia; from samting ia, mi save se bae i kam blong hapen; mo oli salem olgeta bakegen blong nating; long ol narafala toktok, from praes blong ol hae tingting blong olgeta mo krangke blong olgeta, bae oli kasem smasgud; from oli givim olgeta long devel mo jusum ol wok blong tudak be i no laet, from samting ia oli mas go daon long hel.

11 From Spirit blong Lod bae i no stap wok oltaem wetem man. Mo taem we Spirit i stop wok wetem man, afta wan kwik fasin



blong smasem gud kam, mo hemia i mekem sol blong mi i harem nogud.

12 Mo olsem we mi bin toktok long saed blong winim ol tingting blong ol Jiu, blong oli biliv se Jisas hem i tru Kraes, hem i mas nid i stap olsem se ol Jentael i kam blong biliv tu, se Jisas hem i Kraes, God we i no Save Finis.

13 Mo we hem i soemaot hemwan long olgeta we oli biliv long hem, tru long paoa blong Tabu Spirit; yes, long evri kantri, famle, lanwis, mo pipol, hem i mekem ol bigfala merikel, ol saen, mo ol samting blong sapraes, long medel blong ol pikinini blong ol man folem fet blong olgeta.

14 Be luk, mi talemaot profesi long yufala long saed blong ol las dei; long saed blong ol dei we Lod God bae i karem ol samting ia i go aot long ol pikinini blong ol man.

15 Afta ol pikinini blong mi mo ol pikinini blong ol brata blong mi bae i bin kam slak from we oli bin lusum bilif, mo bae oli bin kasem panis tru long ol Jentael; yes, afta Lod God i bin stanemap ol tenet agensem olgeta raonabaot, mo i bin raonem olgeta wetem wan wol, mo i bin leftemap ol strong haos agensem olgeta; mo afta oli bin foldaon long das, kasem taem we oli nomo gat, be stil ol toktok blong ol man we i stret bae oli raetem, mo ol prea blong olgeta we oli holem taet fet bae oli harem, mo olgeta we oli bin slak from oli bin lusum bilif bae oli no fogetem olgeta.

16 From olgeta we bae oli smasem gud olgeta bae oli toktok long olgeta aot long graon, mo ol toktok blong olgeta bae i stap daon aot long das, mo voes blong olgeta bae i olsem wan we i gat spirit blong wan ded man; from Lod God bae i givim long hem paoa, blong hem i save toktok smolmol long saed blong olgeta, i olsem se i kamaot long graon; mo toktok blong olgeta bae i toktok smolmol aot long das.

17 From olsem ia nao Lod God i talem: Bae oli raetem ol samting we bae oli mekem long medel blong olgeta, mo bae oli raetem olgeta mo lokem long wan buk, mo olgeta we i bin kam slak from we oli bin lusum bilif bae i no kasem ol samting ia, from oli lukaotem blong smasem gud ol samting blong God.

18 From samting ia, olsem olgeta we oli bin smasem gud olgeta, oli bin smasem gud olgeta long wan kwik fasin; mo ol grup blong evri nogud wan bae oli olsem doti blong wit we i flae longwe—olsem ia nao Lod God i talem: Samting ia bae i hapen long smol taem, kwik taem nomo—

19 Mo bae i kam blong hapen se olgeta we oli bin kam slak from we oli bin lusum bilif bae oli kasem panis tru long han blong ol Jentael.

20 Mo ol Jentael i kam antap wetem hae tingting blong ol ae blong olgeta, mo oli bin foldaon, from bigfala samting we i stap blokem rod blong olgeta, mekem se oli bin bildimap plante

jos; be, oli putum daon paoa mo ol merikel blong God, mo oli prijim long olgeta bakegen waes tingting blong olgeta nomo mo ol tijing blong olgeta nomo, blong oli save kasem mane mo oli smasem fes blong ol pua.

21 Mo i gat plante jos we oli bildimap we i mekem plante fasin blong jalus, mo ol smol rao, mo fasin blong gat tingting blong kilim narafala man.

22 Mo i gat tu ol sikret grup, we i olsem long ol taem blong bifo, folem ol grup blong devel, from hem i man blong statem evri samting ia; yes, man blong statem fasin blong kilim man i ded, mo ol wok blong tudak; yes, mo hem i lidim olgeta long nek wetem wan sofsof rop, kasem taem we hem i fasem taet olgeta wetem ol strong rop blong hem blong oltaem.

23 From luk, ol brata blong mi we mi lavem tumas, mi talem long yufala se Lod God i no wok long tudak.

24 Hem i no mekem eni samting sapos i no blong helpem wol; from hem i lavem wol, go kasem hem i givim laef blong hem bakegen blong hem i save pulum evri man i kam long hem. From samting ia, hem i givim oda long no man se bae oli no mas tekempat long fasin blong sevem man, blong hem.

25 Luk, hem i singaot long eni man, se: Gowe long mi? Luk, mi talem long yu se, No; be hem i se: Kam long mi olgeta evriwan long evri en blong wol, pem melek mo hani, wetem no mane mo wetem no praes.

26 Luk, hem i givim oda long eni man se hem i mas aot long ol haos blong prea, o aot long ol haos blong wosip? Luk, mi talem long yu, No.

27 Hem i bin givim oda long eni man se oli no mas tekempat long fasin blong sevem man blong hem? Luk mi talem long yu se, No; be hem i bin givim i fri blong evri man; mo hem i bin givim oda long ol pipol blong hem se oli sud winim tingting blong ol man blong sakem sin.

28 Luk, Lod i bin givim oda long eni man se oli no sud tekempat long gud fasin blong hem? Luk mi talem long yu se, No; be evri man i gat janis wan i olsem narafala wan, mo i no gat wan we hem i blokem hem.

29 Hem i givim oda se i no mas gat fasin blong giaman pris, from, luk, ol fasin blong giaman pris oli hemia we ol man i prij mo putum olgeta antap olsem wan laet long wol, blong mekem se oli kasem mane mo pres blong wol; be oli no lukaotem gudfala laef blong Saeon.

30 Luk, Lod i bin blokem samting ia; from samting ia, Lod God i bin givim wan komanmen se evri man i mas gat bigfala lav, we bigfala lav ia i lav. Mo sapos oli no gat bigfala lav oli blong nating. From samting ia, sapos bae oli gat bigfala lav bae oli no letem ol man we i stap wok long Saeon blong ded.

31 Be ol man blong wok long Saeon bae i wok blong Saeon; from sapos oli wok blong mane bae oli ded.

32 Mo bakegen Lod God i bin givim komanmen se ol man i no mas kilim narafala man i ded, blong oli no mas giaman; blong oli no mas stil; blong oli no mas tekem nem blong Lod God blong olgeta blong nating; blong oli no mas wantem ol samting blong ol narafala man, blong oli no mas gat tingting ia blong kilim ol narafala man; blong oli no mas rao wan wetem narawan; blong oli no mas mekem ol fasin ia blong slip olbaot; mo blong oli no mas mekem wan long ol samting ia; from eni man we i mekem ol samting ia bae i ded.

33 From i no gat wan long ol rabis fasin ia i kam long Lod; from hem i mekem wanem we i gud long medel blong ol pikinini blong ol man; mo hem i no mekem wan samting hemia nomo sapos i no klia long ol pikinini blong ol man; mo hem i askem olgeta evriwan blong kam long hem mo tekempat long gud fasin blong hem; mo hem i no tanem baksaed blong hem long eniwan we i kam long hem, blak mo waet, slef mo fri, man mo woman; mo hem i tingbaot olgeta we i no gat respek long tru God; mo evriwan i semak long God, ol Jiu tugeta wetem ol Jentael.

---

### JAPTA 27

---

*Tudak mo apostasi bae i kavremap wol long ol las dei—Buk blong Momon bae i kamaot—Tri witnes bae i testifae long saed blong buk*

*—Man we i save plante samting bae i talem se hem i no save ridim buk ia we oli lokem—Lod bae i mekem wan gudfala wok mo wan sapraes—Luk long Aesea japta 29. Raonabaot 559–545 yia bifo Kraes i bon.*

BE, luk, long ol las dei, o long ol dei blong ol Jentael—yes, luk evri kantri blong ol Jentael mo tu ol Jiu, olgeta we bae oli kam long graon ia tugeta wetem olgeta we bae oli stap long ol narafala graon, yes, we i long evri graon blong wol, luk, bae oli drong wetem ol rabis fasin mo evri kaen blong rabis sin—

2 Mo taem we dei ia bae i kam, Lod blong ol Host bae i visitim olgeta wetem tanda mo wetem graon i seksek, mo wetem wan bigfala noes, mo wetem ren ia we i kam wetem strongfala win mo tanda, mo wetem solwota we i raf we i raf, mo wetem flem blong wan faea we i kakae flatem ol samting.

3 Mo evri kantri we i faet agensem Saeon, mo we oli givim hadtaem long hem, bae i olsem wan drim blong wan visen blong naet; yes, bae i hapen long olgeta, olsem we i hapen long wan hanggri man we i stap drim, mo luk hem i stap kakae be hem i wekap mo sol blong hem i emti; o olsem wan man we i tosta we i drim, mo luk hem i stap dring be hem i wekap mo luk hem i taed, mo sol blong hem i hanggri; yes, olsem ia bae ol grup blong pipol blong evri kantri bae i hapen long olgeta

we i faet agensem bigfala hil blong Saeon.

4 From luk, yufala evriwan we i stap mekem rabis fasin, holem bak yufala bakegen mo sapraes, from bae yufala i singaot mo mekem bigfala krae; yes, yufala bae i drong be i no wetem waen, yufala bae i wokbaot leilei be i no wetem strong dring.

5 From luk, Lod i bin poremaot long yufala spirit blong dip slip. From luk, yufala i bin klosem ol ae blong yufala, mo yufala i bin sakemaot ol profet; mo ol man blong rul blong yufala, mo ol sia hem i bin kavremap from ol rabis fasin blong yufala.

6 Mo bae i kam blong hapen se Lod God bae i karem i go aot long yufala ol toktok blong wan buk, mo olgeta bae oli ol toktok blong olgeta we i bin slip.

7 Mo luk buk ia bae oli lokem; mo long buk ia bae i gat wan revelesen i kam long God stat long taem we wol i bin stat i go kasem en blong hem.

8 From samting ia, from ol samting we oli bin lokem, ol samting we oli bin lokem bae oli no givimaot long dei blong fasin nogud mo rabis sin blong ol pipol. From samting ia buk ia bae oli holem bak long olgeta.

9 Be bae Lod i givim buk ia long wan man, mo bae hem i givimaot ol toktok blong buk, we oli ol toktok blong olgeta we i bin slip long das, mo bae hem i givim ol toktok ia long wan narafala man;

10 Be ol toktok we oli lokem bae hem i no givimaot, mo tu

bae hem i no givimaot buk ia. From buk ia paoa blong God bae i lokem, mo revelesen we oli bin lokem bae i stap long buk kasem taem we Lod i jusum, blong oli save kamaot; from luk, oli talemaot evri samting stat long taem we wol i bin stat go kasem en blong hem.

11 Mo dei i kam we ol toktok blong buk we oli bin lokem, bae oli ridimaot olgeta long ol ruf blong ol kaos; mo bae oli ridim olgeta wetem paoa blong Kraes; mo evri samting bae oli soemaot long ol pikinini blong ol man we i bin kam long medel blong ol pikinini blong ol man, mo we bae oli kam i go kasem en blong wol.

12 From samting ia, long dei ia taem we buk ia bae oli givim long man we mi bin tokbaot, buk ia bae i stap haed long ol ae blong wol, mekem se ol ae blong no man i luk buk ia, hemia nomo ol tri witnes bae i luk buk ia, tru long paoa blong God, wetem man ia we bae oli givim buk ia long hem; mo olgeta bae i talem testimoni blong olgeta long saed blong buk ia se i tru wetem ol samting insaed long hem.

13 Mo i no gat wan narafala man we bae i luk buk ia, be smol namba nomo folem tingting blong God, blong talem testimoni blong ol toktok blong God long ol pikinini blong ol man; from Lod God i bin talem se ol toktok blong olgeta we i holem taet fet bae i toktok olsem we i kam long ded.

14 From samting ia, Lod God

bae i gohed blong karem i kamaot ol toktok blong buk ia; mo long maot blong ol witnes we hem i ting i stret bae God i stanemap toktok blong hem; mo sore tumas long man we i sakemaot toktok blong God!

15 Be luk, bae i kam blong hapen se Lod God bae i talem long hem long man ia we bae hem i givim buk ia: Tekem ol toktok ia we oli no lokem olgeta mo givim olgeta long wan narafala man, blong hem i save soem olgeta long man ia we i gat plante save, i talem se: Ridim samting ia, mi askem yu. Mo man we gat plante save bae i talem se: Karem i kam long ples ia buk ia mo bae mi ridim ol samting ia.

16 Mo nao, from glori blong wol mo blong kasem plante mane bae oli talem samting ia, mo i no blong glori blong God.

17 Mo man ia bae i talem se: Mi no save karem buk ia i kam from God i bin lokem buk ia.

18 Afta bae man we i gat plante save i talem se: Mi no save ridim buk ia.

19 From samting ia bae i kam blong hapen se, Lod God bae i givim bakegen buk ia mo ol toktok blong buk ia long hem we i no gat plante save; mo man we i no gat plante save bae i talem se: Mi mi no gat plante save.

20 Afta bae Lod God i talem long hem se: Man we i gat plante save bae i no ridim olgeta from oli bin sakemaot olgeta, mo mi mi save mekem wok blong mi; from samting ia yu

bae yu ridim ol toktok we bae mi givim long yu.

21 No tajem ol samting we oli bin lokem olgeta, from bae mi karem olgeta i go fored long taem we mi jusum; from bae mi soem long ol pikinini blong ol man se mi mi save mekem wok blong mi.

22 From samting ia, taem we yu bin ridim ol toktok we mi bin givim oda long yu blong ridim, mo bin kasem ol witnes we mi promes long yu, afta bae yu lokemap buk ia bakegen, mo haedem hem long mi, blong mekem se mi save sevem ol toktok we yu no bin ridim, kasem taem we bae mi luk se i stret long waes tingting blong mi blong soemaot evri samting long ol pikinini blong ol man.

23 From luk, mi mi God; mo mi mi wan God blong ol merikel; mo bae mi soem long wol se mi mi semak yestedei, tede, mo blong oltaem; mo mi no wok long medel blong ol pikinini blong ol man sapos i no tru long fet blong olgeta.

24 Mo bakegen bae i kam blong hapen se Lod bae i talem long hem we bae i ridim ol toktok we bae hem i givim long hem:

25 Taem we pipol ia i stap kam klosap long mi wetem maot blong olgeta, mo wetem ol skin blong maot blong olgeta oli stap onarem mi, be oli bin tekemaot ol hat blong olgeta longwe long mi, mo ol respek blong olgeta long mi oli tijim long ol tijing blong ol man—

26 Taswe, bae mi gohed blong

mekem wan sapraes wok long medel blong ol pipol ia, yes, wan gudfala wok mo wan sapraes, from waes tingting blong ol waes blong olgeta mo olgeta we oli gat plante save bae oli ded, mo ol haremsave blong ol tijing blong olgeta bae i haed.

27 Mo sore tumas long olgeta we i traehad blong haedem plan blong olgeta long Lod! Mo ol wok blong olgeta i stap long tudak; mo oli talem se: Huia i stap luk mifala, mo huia i save mifala? Mo oli talem tu se: I tru tumas, ol wok blong yufala we i tanem ol samting i go apsaed daon bae oli ting se i olsem graon blong mekem pot. Be luk, bae mi soem long olgeta, Lod blong ol Host i talem, we mi save evri wok blong olgeta. From bae ol wok i talem long saed blong hem we i bin mekem hem, hem i no bin mekem mi? O bae samting we oli bin mekem bae i talem long saed blong hem we i bin mekem hem, hem i no bin gat eni save?

28 Be luk, Lod blong ol Host i talem: Bae mi soem long ol pikinini blong ol man se hem i long smol taem mo bae Lebanon i tanem i kam long wan garen we i gat plante frut; mo garen ia we i gat plante frut bae oli ting se hem i olsem wan bus.

29 Mo long dei ia olgeta we sorae i fas bae oli harem ol toktok blong buk ia, mo ol ae blong ol blaen man bae oli lukluk aot long ples blong haed mo aot long tudak.

30 Mo ol man we i no stap flas

bae oli kam antap, mo glad blong olgeta bae i stap long Lod, mo ol pua long medel blong ol man bae i glad long Tabu Wan blong Isrel.

31 From i tru olsem we Lod i stap laef bae oli luk se man we i givim hadtaem, bae oli kam olsem nating, mo ol jiki man bae i bon, mo olgeta we oli stap lukaot blong faenem rabis fasin bae i katemaot olgeta;

32 Mo olgeta we i mekem wan man i mekem rong from wan toktok, mo putum wan rop blong fasem man, blong hem we i toktok agens long get, mo oli putum long saed ol gud man olsem samting nating.

33 Taswe, olsem ia nao Lod i talem, we i bin pemaot Ebrahim, long saed blong laen blong Jakob: Jakob bae i no sem naoia, mo tu fes blong hem bae i no kam waet.

34 Be taem we hem i luk ol pikinini blong hem, wok blong ol han blong mi, long medel blong hem, bae oli presem nem blong mi, mo presem Tabu Wan blong Jakob, mo bae oli respektem God blong Isrel.

35 Olgeta tu we i bin mekem mistek long spirit bae oli kam blong andastanem, mo olgeta we i bin komplem bae oli lanem doktrin.

---

## JAPTA 28

---

*Plante giaman jos bae oli bildimap long ol las dei—Bae oli tijim ol giaman tijing, ol tijing we i blong nating, mo ol krangke doktrin—*

*Apostasi bae i hapen olbaot from ol giaman tija — Devel bae i toktok nogud long ol hat blong ol man — Bae hem i tijim evri kaen fasin blong ol giaman doktrin. Raonabaot 559–545 yia bifo Kraes i bon.*

Mo nao, luk, ol brata blong mi, mi bin toktok long yufala folem olsem we spirit i bin mekem mi blong talemaot; from samting ia, mi save tru se oli mas kam blong hapen.

2 Mo ol samting we bae oli raetem aot long buk ia bae oli gat bigfala yus long ol pikinini blong ol man, mo speseli long ol pikinini blong yumi, we i wan smol haf nomo blong laen blong Isrel.

3 From bae i kam blong hapen long dei ia se ol jos we oli bin bildimap, mo i no blong Lod, taem we wan bae i talem long narawan se: Luk, mi, mi mi blong Lod; mo ol narafala bae i talem se: Mi, mi mi blong Lod; mo olsem ia nao bae evriwan i talem we oli bin bildimap ol jos we i no blong Lod—

4 Mo bae oli rao wan wetem narawan; mo ol pris blong olgeta bae i rao wan wetem narawan, mo bae oli tij wetem save blong olgeta, mo tanem baksaed long Tabu Spirit, we i givim paoa blong toktok.

5 Mo oli tanem baksaed long paoa blong God, Tabu Wan blong Isrel; mo oli talem long ol pipol se: lisin long mifala, mo harem ol tijing blong mifala; from luk i no gat God tede, from Lod mo Ridima i bin mekem wok blong hem, mo

hem i bin givim paoa blong hem long ol man;

6 Luk, lisin yufala, long ol tijing blong mi; sapos bae oli talem se i gat wan merikel i hapen tru long han blong Lod, no biliv long hem; from long dei ia hem i no wan God blong ol merikel; hem i bin mekem wok blong hem.

7 Yes, mo bae i gat plante we bae oli talem se: Kakae, dring, mo stap glad, from tumora bae yumi ded; mo bae i oraet long yumi.

8 Mo bae i gat plante tu we bae i talem se: Kakae, dring, mo stap glad; be, respektem God—hem bae i letem yumi mekem wan smol sin; yes, giaman smol, tekem ol gudfala poen long wan man from ol toktok blong hem, digim wan hol blong man we i stap raonabaot long yu; i no gat rong long samting ia; mo mekem evri samting ia, from tumora bae yumi ded; mo sapos i olsem se yumi stap rong, God bae i wipim yumi wetem wan smol namba blong wip nomo, mo long en bae yumi sev long kingdom blong God.

9 Yes, mo bae i gat plante we bae oli tij long fasin ia, ol giaman mo we oli blong nating mo ol krangke doktrin, mo bae oli solap long ol hat blong olgeta, mo bae oli traehad blong haed-em plan blong olgeta long Lod; mo ol wok blong olgeta bae i stap long tudak.

10 Mo blad blong ol sent bae i singaot long graon agensem olgeta.

11 Yes, olgeta evriwan i bin go aot long rod; oli bin kam nogud.

12 From hae tingting, mo from ol giaman tija, mo ol giaman doktrin, ol jos blong olgeta i bin kam nogud, mo ol jos blong olgeta oli leftemap; from hae tingting oli solap.

13 Oli stilim ol pua from ol tabu ples blong olgeta we i naes tumas; oli stilim ol pua from ol naes klos blong olgeta; mo oli givim hadtaem long olgeta we oli no stap flas mo we oli pua long hat, from long hae tingting blong olgeta oli solap.

14 Oli wokbaot wetem ol nek we i stret mo ol hed i antap; yes, mo from hae tingting, mo fasin nogud, mo rabis sin, mo fasin blong slip olbaot, olgeta evriwan i bin go lus be smol namba nomo, we oli man we i no stap flas we i folem Kraes; be, oli lidim olgeta, blong mekem se long plante taem oli mekem mistek from oli stap tijim olgeta long ol tijing blong ol man.

15 O ol waes, mo olgeta we oli gat plante save, mo ol rij, we oli solap long hae tingting blong ol hat blong olgeta, mo olgeta evriwan we i prijim ol giaman doktrin, mo olgeta evriwan we oli stap slip olbaot, mo jenisim raet wei blong Lod, sore tumas, sore tumas, sore tumas long olgeta, Lod God we i gat Bigfala Paa i talem, from bae oli sakem olgeta i go daon long hel!

16 Sore tumas long olgeta we i putum long saed ol gud samting olsem wan samting blong nating mo toktok nogud agensem

samting we i gud, mo talem se i no gat yus! From dei bae i kam we Lod God bae i visitim kwik ol man we i stap long wol; mo long dei ia taem we oli raep gud long rabis fasin bae oli ded.

17 Be luk, sapos ol man we i stap long wol bae i sakem ol nogud fasin blong olgeta mo ol rabis sin bae oli no smasem gud olgeta, Lod blong ol Host i talem.

18 Be luk, bigfala jos ia blong ol rabis sin, woman blong rod blong ful wol, mo foldaon blong hem bae i mas bigfala.

19 From kingdom blong devel i mas seksek, mo olgeta we oli blong hem, oli mas nid i stap blong mekem olgeta blong sakem sin, o devel bae i holem taet olgeta wetem ol jen blong hem we i no gat en, mo bae hem i mekem olgeta i kros, mo ded;

20 From luk, long dei ia bae hem i toktok nogud long ol hat blong ol pikinini blong ol man, mo mekem olgeta blong kam kros agensem samting we i gud.

21 Mo ol narafala bae hem i mekem oli kwaet, mo giaman long olgeta blong lidim olgeta i go long sefples blong wol, blong mekem se bae oli talem se: Evri samting i oraet long Saeon; yes, Saeon i kam antap gud, evri samting i oraet—mo olsem ia nao devel i giaman long ol sol blong olgeta, mo i lidim olgeta i gowe sloslo daon long hel.

22 Mo luk, sam narafala hem i switim long olgeta blong gowe, mo hem i talem long olgeta se i no gat hel; mo hem i talem long



olgeta se: Mi mi no wan devel, from i no gat wan— mo olsem ia nao wetem smol voes i talem long ol sorae blong olgeta, kasem taem we hem i holem taet olgeta wetem ol rabis jen blong hem, aot long ol jen ia oli no save go fri.

23 Yes, ded i holem taet olgeta, mo hel; mo ded, mo hel, mo devel, mo evri man we ol samting ia i bin kasem olgeta bae i mas stanap long fored blong jea blong God, mo kasem jajmen folem ol wok blong olgeta, aot long ples ia oli mas go long ples ia we oli mekem rere blong olgeta, we i wan lek blong faea mo salfa, we i harem nogud we i no save finis.

24 Taswe, sore tumas long hem we i stap les long Saeon!

25 Sore tumas long hem we i singaot: Evri samting i oraet!

26 Yes, sore tumas long hem we i lisin long ol tijing blong ol man, mo i tanem baksaed long paoa blong God, mo long presen we i Tabu Spirit!

27 Yes, sore tumas long hem we i se: Yumi bin kasem, mo yumi no nidim moa!

28 Mo blong endem, sore tumas long olgeta we i seksek, mo oli kros from tru samting blong God! From luk, hem we oli bildim hem antap long ston i kasem hem wetem bigfala glad; mo hem we oli bildim hem antap long wan fandesen we i sanbij, i seksek from hem i fraet se bae hem i foldaon.

29 Sore tumas long hem we bae i se: Mifala bin kasem toktok blong God, mo mifala i no nidim

moa long ol toktok blong God, from mifala i gat inaf!

30 From luk, olsem ia nao Lod God i talem: Bae mi givim long ol pikinini blong ol man tijing folem tijing, rul folem rul, smol long ples ia mo smol longwe; mo olgeta i kasem blesing we i lisin long ol rul blong mi, mo oli lisin long ol advaes blong mi, from bae oli lanem waes tingting; from long hem we i kasem bae mi givim moa; mo long olgeta we bae oli talem se, Mifala i gat inaf, long olgeta bae mi tekemaot ol samting we oli gat tu.

31 Bae mi panisim hem we i putum tras blong hem long man, o i mekem bodi blong mit mo bun i han blong hem, o bae i lisin long ol tijing blong ol man, hemia nomo sapos ol tijing blong olgeta oli no givim tru long paoa blong Tabu Spirit.

32 Sore tumas long ol Jentael, Lod God blong ol Host i talem! From i nomata we bae mi stret-em han blong mi i go long olgeta long wan dei i go long narafala dei, bae oli tanem baksaed long mi; be, bae mi gat sore long olgeta, Lod God i talem, sapos oli sakem sin mo kam long mi; from han blong mi, mi stret-em long fuldei, Lod God blong ol Host i talem.

---

## JAPTA 29

---

*Plante Jentael bae oli sakemaot Buk blong Momon— Bae oli talem se, mifala i no nidim moa Baebol— Lod i toktok long plante kantri*

—*Bae hem i jajem wol aot long ol buk we bae oli raetem. Raonabaot 559-545 yia bifo Kraes i bon.*

BE luk, bae i gat plante—long dei ia we bae mi gohed blong mekem wok blong sapraes long medel blong olgeta, blong mekem se mi save tingbaot ol kavenan blong mi we mi bin mekem wetem ol pikinini blong ol man, mekem se mi save putum han blong mi bakegen blong seken taem blong karembak ol pipol blong mi, we oli blong laen blong Isrel;

2 Mo tu, blong mekem se mi save tingbaot ol promes we mi bin mekem long yu, Nifae, mo tu long papa blong yu, se bae mi tingbaot ol pikinini blong yu; mo se ol toktok blong ol pikinini blong yu bae i go fored aot long maot blong mi i go long ol pikinini blong yu; mo ol toktok blong mi bae oli stap wesil i go fored kasem evri en blong wol, olsem wan flag long ol pipol blong mi, we oli blong laen blong Isrel;

3 Mo from ol toktok blong mi bae oli stap wesil aot—plante long ol Jentael bae i talem se: Wan Baebol! Wan Baebol! Mifala i gat wan Baebol, mo i no save gat wan narafala Baebol.

4 Be olsem ia nao Lod God i talem: Ol krangke, bae oli gat wan Baebol; mo bae i kamaot long ol Jiu, ol olfala kavenan pipol blong mi. Mo wanem kaen tangkyu oli givim long ol Jiu from Baebol we oli bin kasem long olgeta? Yes, ol Jentael oli minim wanem? Oli

tingbaot ol trabol, mo ol wok, mo ol soa blong bodi blong ol Jiu, mo had wok oltaem blong olgeta long mi, blong karemaot fasin blong sevem man i kam long ol Jentael?

5 O yufala ol Jentael, yufala i bin tingbaot ol Jiu, ol olfala kavenan pipol blong mi? No; be yufala i bin panisim olgeta, mo yufala i no bin laekem olgeta, mo yufala i no bin lukaotem blong karembak olgeta. Be luk, bae mi putumbak ol samting ia i kambak long ol hed blong yufala bakegen, from mi Lod i no bin fogetem ol pipol blong mi.

6 Yu krangke, we bae i talem se: Wan Baebol, mifala i gat wan Baebol, mo mifala i no nidim moa Baebol. Yufala i bin kasem wan Baebol hemia nomo sapos i no kam tru long ol Jiu?

7 Yufala i no save se i gat moa kantri bitim wan? Yufala i no save se mi, Lod, God blong yufala, i bin mekem evri man, mo we mi tingbaot olgeta we i stap long ol aelan blong solwota; mo we mi rul long ol heven antap mo long wol andanit; mo mi karem i go fored toktok blong mi long ol pikinini blong ol man, yes, long evri kantri blong wol tu?

8 From samting ia yufala i komplem, from bae yufala i kasem moa long ol toktok blong mi? Yufala i no save se testimoni blong tu kantri i wan witness long yufala we mi mi God, we mi tingbaot wan kantri olsem wan narafala wan? From samting ia, mi talemaot ol semfala toktok long wan kantri olsem

long narafala wan. Mo taem we tufala kantri ia bae i stap tugeta, testemoni blong tufala kantri ia bae i stap tugeta tu.

9 Mo mi mekem samting ia blong mi save pruvum long plante se mi mi semak yestedei, tede, mo blong oltaem; mo we mi talemaot ol toktok blong mi folem glad blong miwan. Mo from we mi bin talem wan toktok yufala i no nid blong ting se mi no save talem wan narawan; from wok blong mi i no finis yet; mo tu hem bae i no finis kasem long en blong man, mo tu stat long taem ia i go kasem blong oltaem.

10 From samting ia, from we yufala i gat wan Baebol yufala i no nid blong ting se i holem evri toktok blong mi; mo tu yufala i no nid blong ting se mi no bin mekem se oli raetem moa.

11 From mi givim oda long evri man, olgeta we i stap long is tugeta wetem long wes, mo long not, mo long saot, mo long ol aelan blong solwota, se bae oli raetem ol toktok we mi talem long olgeta; from aot long ol buk we bae oli raetem bae mi jajem wol, evri man folem ol wok blong olgeta, folem wanem we oli bin raetem.

12 From luk, bae mi toktok long ol Jiu mo bae oli raetem hemia; mo bae mi toktok tu long ol man blong Nifae mo bae oli raetem hemia; mo bae mi toktok tu long ol narafala traeb blong laen blong Isrel, we mi bin lidim i gowe, mo bae oli raetem hemia; mo bae mi toktok

tu long evri kantri blong wol mo bae oli raetem hemia.

13 Mo bae i kam blong hapen se ol Jiu bae oli gat ol toktok blong ol man blong Nifae, mo ol man blong Nifae bae i kasem ol toktok blong ol Jiu; mo ol man blong Nifae mo ol Jiu bae oli gat ol toktok blong ol traeb blong Isrel we i bin lus; mo ol traeb blong Isrel we i bin lus bae oli kasem ol toktok blong ol man blong Nifae mo ol Jiu.

14 Mo bae i kam blong hapen se ol pipol blong mi, we oli blong laen blong Isrel, bae oli kam tugeta long haos blong ol graon blong olgeta we i kam long ol papa blong olgeta; mo toktok blong mi tu bae i kam tugeta long wan. Mo bae mi soem long olgeta we i faet agensem toktok blong mi mo agensem ol pipol blong mi, we oli blong laen blong Isrel, we mi mi God, mo we mi bin mekem kavenan wetem Ebrahim se bae mi tingbaot ol pikinini blong hem blong oltaem.

---

### JAPTA 30

---

*Ol Jentael we oli jenisim laef bae oli kaontem olgeta wetem ol kavenan pipol — Plante man blong Leman mo Jiu bae oli biliovim trutok mo oli kam gudfala — Isrel bae i kambak mo ol nogud man bae oli ded. Raonabaot 559–545 yia bifo Kraes i bon.*

Mo nao luk, ol brata blong mi we mi lavem tumas, bae mi toktok long yufala, from mi, Nifae, bae mi no letem se yufa-

la i ting se yufala i moa stret bitim ol Jentael long taem we bae i kam. From luk, hemia nomo sapos yufala i no holem ol komanmen blong God, yufala evriwan bae i ded tu; mo from ol toktok we oli bin talemaot yufala i no nid blong ting se God bae i smasem gud ol Jentael evriwan.

2 From luk, mi talem long yufala se olgeta long ol Jentael we bae oli sakem sin oli ol kavenan pipol blong Lod; mo olgeta long ol Jiu we bae oli no sakem sin bae oli sakemaot olgeta; from Lod i no mekem kavenan wetem eri man, hemia nomo sapos i no wetem olgeta we oli sakem sin mo biliv long Pikinini blong hem, we i Tabu Wan blong Isrel.

3 Mo nao, bae mi profesae plante moa long saed blong ol Jiu mo ol Jentael. From afta buk ia we mi bin tokbaot bae i kamaot, mo oli raetem i go long ol Jentael, mo lokem bakegen long Lod, bae i gat plante we bae oli bilivim ol toktok we oli bin raetem; mo bae oli karem olgeta i go fored long ol smol haf nomo blong ol pikinini blong yumi.

4 Mo afta ol smol haf nomo blong ol pikinini blong yumi bae oli save long saed blong yumi, olsem wanem we yumi bin kamaot long Jerusalem, mo we oli ol laen blong ol Jiu.

5 Mo gospel blong Jisas Kraes bae oli talemaot long medel blong olgeta; from samting ia, bae oli kambak long save blong ol papa blong olgeta bakegen, mo tu long save blong Jisas

Kraes, we i bin gat long medel blong ol papa blong olgeta.

6 Mo afta bae oli glad; from bae oli save se hemia i wan blesing long olgeta we i kam long han blong God; mo ol skel blong tudak bae i stat blong foldaon aot long ol ae blong olgeta; mo plante jeneresen bae i no pas i gowe wetem olgeta, sapos oli no wan klin mo wan gudfala pipol.

7 Mo bae i kam blong hapen se ol Jiu we oli bin seraot olbaot tu bae oli stat blong biliv long Kraes; mo bae oli stat blong kambak tugeta long fes blong graon; mo olgeta we bae i biliv long Kraes bae i kam wan gudfala pipol tu.

8 Mo bae i kam blong hapen se Lod God bae i statem wok blong hem long medel blong evri kantri, famle, lanwis, mo pipol, blong mekem se hem i karem bak ol pipol blong hem long wol.

9 Mo wetem stret fasin bae Lod God i jajem ol pua, mo toktok strong agensem, wetem fasin blong jastis from olgeta we i no stap flas blong wol. Mo bae hem i kilim wol wetem stik blong maot blong hem; mo wetem win blong skin blong maot blong hem bae hem i kilim ded ol nogud man.

10 From taem i stap kam kwik we Lod God bae i mekem se wan bigfala split i hapen long medel blong ol pipol, mo ol nogud man bae hem i smasem gud; mo bae hem i sevem ol pipol blong hem, yes, mo tu sapos i olsem se hem i mas

smasem gud ol nogud man wetem faea.

11 Mo stret fasin bae i stap olsem strap blong wes blong hem, mo fasin blong holem taet fet bae i strap blong jes blong bodi blong hem.

12 Mo afta bae wael dog i stap tugeta wetem smol sipsip; mo lepad bae i ledaon wetem yang nanigot, mo yang buluk, mo yang laeon, mo buluk we i fatfat, tugeta; mo wan smol pikinini bae i lidim olgeta.

13 Mo kao mo bea bae i kakae; ol yang wan blong olgeta bae i ledaon tugeta; mo laeon bae i kakae gras olsem buluk.

14 Mo pikinini we i stap titi yet bae i pleiplei long hol blong wan smol posen snek mo bigfala pikinini bae i putum han blong hem long hol blong wan posen snek.

15 Bae oli no mekem i soa o smasem gud eni samting long ful tabu hil blong mi; from wol bae i fulap wetem save blong Lod olsem we ol wota i kavrem-ap solwota.

16 From samting ia, evri samting blong evri kantri bae oli soemaot; yes, evri samting bae oli soemaot long ol pikinini blong ol man.

17 I no gat eni samting we i sikret sapos bae oli no soemaot; i no gat wan wok blong tudak sapos bae oli no soemaot hem long laet; mo i no gat eni samting we oli lokem long wol sapos bae oli no openem.

18 From samting ia, evri samting we oli bin talemaot long ol pikinini blong ol man bae long

dei ia oli soemaot olgeta; mo Setan bae i nomo gat paoa ova ol hat blong ol pikinini blong ol man, blong wan longfala taem. Mo nao, ol brata blong mi we mi lavem tumas, mi mekem wan en blong ol toktok blong mi.

---

### JAPTA 31

---

*Nifae i talem from wanem Kraes i bin baptaes—Ol man i mas folem Kraes, kasem baptaes, kasem Tabu Spirit, mo stap strong kasem en blong save sev—Sakem sin mo baptaes oli get blong stret mo smol rod—Laef we i no save finis i kam long olgeta we oli holem ol komanmen afta long baptaes. Raonabaot 559–545 yia bifo Kraes i bon.*

Mo nao mi, Nifae, mi mekem wan en blong ol profesi blong mi long yufala ol brata blong mi we mi lavem tumas. Mo mi no save raetem be smol samting nomo, we mi save se i mas kam blong hapen; mo tu mi no save raetem be smol toktok nomo blong brata blong mi Jakob.

2 From samting ia, ol samting we mi bin raetem oli inaf long mi, be hemia nomo sam toktok we mi mas talemaot long saed blong doktrin blong Kraes; from samting ia, bae mi toktok long yufala klia, folem klia fasin blong ol profesi blong mi.

3 From sol blong mi i glad long klia fasin; from long fasin ia Lod God i stap wok long medel blong ol pikinini blong ol man. From Lod God i givim laet blong save; from hem i toktok long ol man folem

lanwis blong olgeta, blong oli andastanem.

4 From samting ia, mi wantem se yufala i tingbaot se mi bin toktok long yufala long saed blong profet ia we Lod i bin soem long mi, we bae i baptaesem Smol Sipsip blong God, we bae i tekemaot ol sin blong wol.

5 Mo nao, sapos Smol Sipsip blong God, we hem i tabu, i gat nid blong kasem baptaes long wota, blong mekem evri stret fasin i hapen, O afta, hamas moa nid yumi gat, we yumi no tabu, blong kasem baptaes, yes, long wota!

6 Mo nao, bae mi askem yufala, ol brata blong mi we mi lavem tumas, olsem wanem nao Smol Sipsip blong God i bin mekem evri stret fasin i hapen taem we hem i bin kasem baptaes long wota?

7 Yufala i no save se hem i tabu? Be i nomata we hem i tabu, hem i soem long ol pikinini blong ol man we, folem bodi blong mit mo bun hem i putum tingting blong hem i stap daon long fored blong Papa, mo hem i witnes long Papa se bae hem i obei long hem blong holem ol komanmen blong hem.

8 From samting ia, afta we hem i bin baptaes wetem wota, Tabu Spirit i bin kamdaon long hem long pikja blong wan pijin.

9 Mo bakegen, i soem long ol pikinini blong ol man we rod i stret, mo we spes bitwin get ia i smol, tru long hem we oli sud go tru, hem i bin soem eksampol long fored blong olgeta.

10 Mo hem i bin talem long ol

pikinini blong ol man se: Yufala i folem mi. From samting ia, ol brata blong mi we mi lavem tumas, bae yumi save folem Jisas sapos yumi no glad blong holem ol komanmen blong Papa?

11 Mo Papa i bin talem se: Sakem sin yufala, sakem sin yufala, mo kasem baptaes long nem blong Pikinini blong mi we mi Lavem Tumas.

12 Mo tu, voes blong Pikinini i bin kam long mi, i talem se: Hem we i kasem baptaes long nem blong mi, long hem, Papa bae i givim Tabu Spirit, olsem long mi; from samting ia, folem mi, mo mekem evri samting we yufala i bin luk mi mekem.

13 From samting ia, ol brata blong mi we mi lavem tumas, mi save se sapos yufala i folem Pikinini, wetem evri tingting blong hat, mo no mekem fasin blong wan man we i gat tufes mo no giaman long fored blong God, be wetem tru tingting, sakem ol sin blong yufala, soem long Papa we yufala i glad blong tekem long yufala nem blong Kraes, tru long baptaes— yes, taem we yufala i folem Lod mo Sevyia blong yufala i go daon long wota, folem toktok blong hem, luk, afta bae yufala i kasem Tabu Spirit; yes, afta i kam baptaes blong faea mo blong Tabu Spirit; mo afta yufala i save toktok wetem ol lanwis blong ol enjel mo singaot ol pres i go long Tabu Wan blong Isrel.

14 Be, luk, ol brata blong mi we mi lavem tumas, olsem ia nao voes blong Pikinini i bin kam long mi, i talem se: Afta we

yufala i bin sakem ol sin blong yufala, mo bin soem long Papa we yufala i glad blong holem ol komanmen blong mi, tru long baptaes blong wota, mo yufala i bin kasem baptaes blong faea mo blong Tabu Spirit, mo save toktok long wan niu lanwis, yes, wetem lanwis blong ol enjel tu, mo afta samting ia sapos yufala i tanem baksaed long mi, i bin moa gud blong yufala se yufala i no bin save mi.

15 Mo mi bin harem wan voes long Papa we i talem se: Yes, ol toktok blong Pikinini blong mi we mi Lavem Tumas i tru mo oli holem taet fet. Hem we i strong kasem en, semfala man ia bae i sev.

16 Mo nao, ol brata blong mi we mi lavem tumas, mi save long samting ia se hemia nomo sapos wan man i no stap strong kasem en, mo i folem eksampol blong Pikinini blong God we i stap laef, hem i no save sev.

17 From samting ia, mekem ol samting we mi bin talem long yufala mi bin luk we Lod blong yufala mo Ridima blong yufala bae i mekem; long ol narafala toktok, from stamba tingting ia, Lod i bin soem ol samting ia long mi, blong yufala i save gat save se long wanem get yufala i mas go tru long hem. From get we bae yufala i mas go tru long hem, hem i sakem sin mo baptaes long wota; mo afta i kam wan klin aot long ol sin blong yufala tru long faea mo tru long Tabu Spirit.

18 Mo afta yufala i stap long stret mo smol rod we i lid i go

long laef we i no save finis; yes, yufala i bin go tru long get; yufala i bin mekem folem ol komanmen blong Papa mo Pikinini; mo yufala i bin kasem Tabu Spirit, we i witnes long Papa mo Pikinini, samting ia i kam tru long promes we hem i bin mekem, se sapos yufala i kam insaed tru long rod bae yufala i kasem.

19 Mo nao, ol brata blong mi we mi lavem tumas, afta we yufala i bin kam long stret mo smol rod ia, bae mi askem yufala sapos evri samting i finis? Luk, mi talem long yufala, No; from yufala i no bin kam long ples ia we i longwe tumas sapos i no tru long toktok blong Kraes wetem strong fet we i no seksek long hem, yufala i hang fulwan long ol gud wok blong hem, we i strong blong sev.

20 From samting ia, yufala i mas wokbaot fored wetem strong bilif long Kraes, wetem wan stret mo klin hop, mo wan lav blong God mo blong evri man. From samting ia, sapos yufala i gohed strong, kakae gud long toktok blong Kraes, mo stap strong kasem en, luk, olsem ia nao Papa i talem: Bae yufala i kasem laef we i no save finis.

21 Mo nao, luk, ol brata blong mi we mi lavem tumas, hemia i rod; mo i no gat wan narafala rod o nem we oli givim andanit long heven we tru long hem ol man i save sev long kingdom blong God. Mo nao, luk, hemia i doktrin blong Kraes, mo hem nomo mo i tru doktrin blong

Papa, mo blong Pikinini, mo blong Tabu Spirit, we i wan God, we i no gat en. Amen.

---

JAPTA 32

---

*Ol enjel i toktok tru long paoa blong Tabu Spirit — Ol man i mas prea mo kasem save blong olgeta bakegen long Tabu Spirit. Raonabaot 559-545 yia bifo Kraes i bon.*

Mo nao, luk, ol brata blong mi we mi lavem tumas, mi ting se yufala i tingting hevi long ol hat blong yufala long saed blong wanem yufala i mas mekem afta we yufala i bin go tru long rod. Be, luk, from wanem yufala i stap tingting hevi long ol samting ia long ol hat blong yufala?

2 Yufala i no tingbaot we mi bin talem long yufala se afta we yufala i bin kasem Tabu Spirit bae yufala i toktok wetem lanwis blong ol enjel? Mo nao, bae yufala i toktok wetem lanwis blong ol enjel olsem wanem sapos i no tru long Tabu Spirit?

3 Ol enjel i toktok tru long paoa blong Tabu Spirit; from samting ia, oli talemaot ol toktok blong Kraes. From samting ia, mi bin talem long yufala, kakae gud long ol toktok blong Kraes; from luk, ol toktok blong Kraes bae i talem long yufala evri samting we yufala i mas mekem.

4 From samting ia, nao afta we mi bin talemaot ol toktok ia, sapos yufala i no save andastanem olgeta bae hem i from we yufala i no askem, mo tu we yufala i no noknok; from sam-

ting ia, yufala i no kam long laet, be bae yufala i mas ded long tudak.

5 From luk, bakegen mi talem long yufala se sapos yufala i go tru long rod, mo kasem Tabu Spirit, bae hem i soem long yufala evri samting we bae yufala i mas mekem.

6 Luk, hemia i doktrin blong Kraes, mo bae i no gat moa doktrin we bae oli givim kasem taem we bae hem i soemaot hemwan long yufala long bodi blong mit mo bun. Mo taem we bae hem i soemaot hemwan long yufala long bodi blong mit mo bun, ol samting we bae hem i talem long yufala bae yufala i mas mekem.

7 Mo nao mi, Nifae, mi no save talem moa; spirit i stopem mi blong toktok, mo mi mi stap blong krae from ol pipol oli no biliv, mo ol fasin nogud, mo no lanem samting, mo ol man oli stronghed; from bae oli no lukaotem save, o andastanem bigfala save, taem we oli givim long olgeta long klia fasin, hem i klia olsem we ol toktok i save kam klia.

8 Mo nao, ol brata blong mi we mi lavem tumas, mi luk se yufala i tingting hevi yet long ol hat blong yufala; mo mi harem nogud we mi nid blong tokbaot samting ia. From sapos yufala i lisen long Spirit we i tijim wan man blong prea, bae yufala i save se yufala i mas prea; from nogud spirit i no tijim wan man blong prea, be i tijim hem se hem i no mas prea.

9 Be luk, mi talem long yufala



se yu mas prea oltaem, mo no letem tingting blong yufala i foldaon, blong yufala i no mas mekem eni samting long Lod sapos fastaem yufala i no prea long Papa long nem blong Kraes, blong hem i konsekretem wok blong yufala long yufala bakegen, blong wok blong yufala i save helpem gudfala laef blong sol blong yufala.

---

### JAPTA 33

---

*Ol toktok blong Nifae i tru—Oli testifae long saed blong Kraes—Olgeta we i biliv long Kraes bae oli bilivim ol toktok blong Nifae, we bae oli stanap olsem witnes long fored blong jea blong jajmen. Raonabaot 559-545 yia bifo Kraes i bon.*

Mo nao mi, Nifae, mi no save raetem evri samting we oli bin tijim long medel blong ol pipol blong mi; mo tu mi mi no strong tumas blong raet, olsem we mi save toktok; from taem we wan man i toktok wetem paoa blong Tabu Spirit, paoa blong Tabu Spirit i karem toktok ia i go long ol hat blong ol pikinini blong ol man.

2 Be luk, i gat plante we oli mekem ol hat blong olgeta i kam strong agensem Tabu Spirit, mekem se hem i no gat eni ples long olgeta; from samting ia, oli sakemaot plante samting we oli bin raetem mo oli ting se oli olsem ol samting nating.

3 Be mi, Nifae, mi bin raetem wanem we mi bin raetem, mo mi tekem samting ia olsem wan samting we i gat bigfala yus mo

speseli long ol pipol blong mi. From mi prea oltaem from olgeta long dei, mo wota blong ol ae blong mi i mekem pilo blong mi i wetwet long naet, from olgeta; mo mi prea long God blong mi wetem fet, mo mi save se bae hem i harem prea blong mi.

4 Mo mi save se Lod God bae i konsekretem ol prea blong mi blong helpem ol pipol blong mi. Mo ol toktok we mi bin raetem long taem we mi no save raet gud bae oli kam strong long olgeta; from i mekem olgeta blong mekem gudfasin; i talem long olgeta long saed blong ol papa blong olgeta; mo i tokbaot Jisas, mo mekem olgeta blong biliv long hem, mo blong stap strong kasem en, we i laef we i no save finis.

5 Mo hem i toktok strong agensem sin, folem klia fasin blong trutok; from samting ia, bae i no gat man i kros long ol toktok we mi bin raetem hemia nomo sapos man ia i no gat spirit blong devel.

6 Mi glad long klia fasin; mi glad long trutok; mi glad long Jisas blong mi, from hem i bin pemaot sol blong mi long hel.

7 Mi gat bigfala lav long ol pipol blong mi, mo bigfala fet long Kraes we bae mi mitim plante sol we i no gat mak long jea blong jajmen blong hem.

8 Mi gat bigfala lav long ol Jiu—mi talem Jiu, from mi minim olgeta we mi kamaot long olgeta.

9 Mi gat bigfala lav tu long ol Jentael. Be luk, from i no gat

wan long olgeta ia we mi save gat hop long olgeta hemia nomo sapos oli no stretem ol rabis fasin blong olgeta wetem Kraes, mo go tru long smol get, mo wokbaot long stret rod we i lid i go long laef, mo i gohed long rod kasem en blong dei blong tes.

10 Mo nao, ol brata blong mi we mi lavem tumas, mo tu ol Jiu, mo evriwan long evri en blong wol, lisin long ol toktok ia mo biliv long Kraes; mo sapos yufala i no biliv long ol toktok ia biliv long Kraes. Mo sapos bae yufala i biliv long Kraes bae yufala i biliv long ol toktok ia, from oli ol toktok blong Kraes, mo hem i bin givim ol toktok ia long mi; mo oli tijim evri man se oli mas mekem gud samting.

11 Mo sapos oli no ol toktok blong Kraes, yufala i jajem— from Kraes bae i soem long yufala, wetem paoa mo bigfala glori, we oli ol toktok blong hem, long las dei; mo yu mo mi bae yumi stanap fesem yumitu long fored blong kot blong hem; mo bae yufala i save se hem i bin givim oda long mi blong

raetem ol samting ia, i nomata we mi no save raet gud.

12 Mo mi prea long Papa long nem blong Kraes blong plante long yumi, sapos i no yumi evriwan, i save sev long kingdom blong hem long bigfala mo las dei.

13 Mo nao, ol brata blong mi we mi lavem tumas, olgeta evriwan we oli blong laen blong Isrel, mo yufala evriwan long evri en blong wol, mi toktok long yufala olsem wan voes blong wan we i stap singaot long das; gudbae kasem taem we bigfala dei ia bae i kam.

14 Mo yufala we bae i no tekempat long gud fasin blong God, mo respektem ol toktok blong ol Jiu, mo tu ol toktok blong mi, mo ol toktok we bae i kamaot long maot blong Smol Sipsip blong God, luk, mi talem long yufala wan gudbae we i no gat en, from ol toktok ia bae oli panisim yufala long las dei.

15 From wanem mi lokem long wol, bae oli go agensem yufala long kot blong jajmen; from olsem ia nao Lod i bin givim oda long mi, mo mi mas obei. Amen.

## BUK BLONG JEKOB

### BRATA BLONG NIFAE

**O**l toktok blong hem long ol brata blong hem. Hem i blokem wan man we i lukaotem blong smasem gud doktrin blong Kraes. Smol toktok blong ol samting long saed blong histri blong ol pipol blong Nifae.

## JAPTA 1

*Jekob mo Josef i traem blong mekem ol man blong biliv long Kraes mo holem ol komanmen blong hem—Nifae i ded—Ol fasin nogud i stap wetem ol man blong Nifae. Raonabaot 544-421 yia bifo Kraes i bon.*

**F**ROM luk, i bin hapen se fifti long taem we Lihae i bin aot long Jerusalem from samting ia, Nifae i bin givim long mi, Jekob, wan komanmen long saed blong ol smol buk we oli raetem ol samting ia long hem.

2 Mo hem i bin givim long mi, Jekob wan komanmen we mi mas raet long ol buk ia sam samting we mi bin ting se oli gud tumas, we mi no mas tajem, be raetem lelebet nomo, long saed blong histri blong ol pipol ia we oli singaotem olgeta ol pipol blong Nifae.

3 From hem i bin talem se bae oli raetem histri blong ol pipol blong hem long ol narafala buk blong hem, mo se mi mas sevem ol buk ia mo pasem i go daon long ol pikinini blong mi, stat long wan jeneresen i go long narafala jeneresen.

4 Mo sapos i gat ol toktok we i tabu, o revelesen we i bigwan, o profesi, mi mas raetem ol impoten samting long saed blong olgeta samting ia long ol buk ia, mo raetem plante samting long saed blong olgeta olsem we i save hapen, blong Kraes, mo blong helpem ol pipol blong yumi.

5 From fet mo bigfala wari, i tru we oli bin soemaot long mifala long saed blong ol pipol blong mifala, wanem ol samting we bae i hapen long olgeta.

6 Mo mifala tu i bin kasem plante revelesen, mo spirit blong plante profesi; taswe, mifala i bin save long Kraes mo kingdom blong hem, we bae i kam.

7 From samting ia, mifala i bin wok had tumas long medel blong ol pipol blong mifala, blong mekem se mifala i save mekem olgeta blong kam long Kraes, mo tekem pat long gud fasin blong God, blong oli save go insaed long kingdom blong hem, hem i fraet se bae hem i jaj long kros blong hem we bae hem i no go insaed, olsem ol dei blong rao mo temtesen taem we olgeta pikinini blong Isrel i bin stap long ples we i no gat man long hem.

8 Taswe, mifala i wantem tumas long God se mifala i save winim tingting blong evri man blong oli no go agensem God, blong mekem hem i kros, be se evri man bae i biliv long Kraes, mo tingbaot ded blong hem, mo safa blong karem kros blong hem mo blong holem ol sem blong wol; from samting ia, mi, Jekob, mi tekem long mi blong mekem i hapen komanmen blong brata blong mi Nifae.

9 Nao Nifae i bin stat blong kam olfala, mo hem i bin luk se bae hem i mas ded i no long taem; from samting ia, hem i bin anoentem wan man blong kam wan king mo wan man

blong rul ova long ol pipol blong hem naoia, folem ol rul blong ol king.

10 From ol pipol i bin lavem Nifae tumas, from hem i bin wan bigfala man we i stap lukaotem gud olgeta, from hem i bin yusum naef blong faet blong Leban blong lukaotem gud olgeta, mo from hem i bin wok evri dei long laef blong hem from gudfala laef blong olgeta—

11 From samting ia, ol pipol i bin wantem blong tingbaot nem blong hem. Mo eni man we bae i rul long ples blong hem ol pipol i singaotem olgeta, nambatu Nifae, nambatri Nifae, mo i go olsem ia nao, folem ol rul blong ol king; mo olsem ia nao ol pipol i bin singaotem olgeta, i nomata wanem nao nem blong olgeta.

12 Mo i bin hapen se Nifae i bin ded.

13 Nao ol pipol we i no ol man blong Lemam, oli ol man blong Nifae; be, oli bin singaotem olgeta ol laen blong Nifae, ol laen blong Jakob, ol laen blong Josef, ol laen blong Soram, ol laen blong Lemam, ol laen blong Lemyul, mo ol laen blong Ismael.

14 Be mi, Jakob, afta long taem ia bae mi no singaotem olgeta wetem ol nem ia, be bae mi singaotem olgeta ol man blong Lemam we oli stap lukaotem blong smasem gud ol pipol blong Nifae, mo olgeta we oli mekem gud fren wetem Nifae, bae mi singaotem olgeta ol man blong Nifae, o ol pipol blong Nifae, folem ol rul blong ol king.

15 Mo nao i hapen se ol pipol blong Nifae, long taem we ol nambatu king i stap rul, i bin stat blong gru strong long ol hat blong olgeta, mo oli bin letem olgeta lelebet long ol fasin nogud, olsem long Deved long bifo we i bin wantem plante woman blong hem mo ol narafala woman blong hem, mo tu Solomon, boe blong hem.

16 Yes, mo tu oli bin stat blong lukaotem plante gol mo silva, mo oli bin stat blong kam antap lelebet wetem hae tingting.

17 From samting ia mi, Jakob, mi bin givim long olgeta ol toktok ia taem we mi bin tijim olgeta long tempol, from faetaem mi bin kasem wok blong mi long Lod.

18 From Nifae i bin konsekretem mi, Jakob, mo brata blong mi Josef i kam olsem ol pris mo ol tija blong ol pipol ia, wetem han blong hem.

19 Mo mitufala i bin onarem wok blong mitufala long Lod, mo mitufala i bin tekem long mitufala stret wok ia, mo tekem ol panis blong ol sin blong ol pipol antap long hed blong mitufala sapos mitufala i no bin tijim gud olgeta long toktok blong God wetem hadwok oltaem; from samting ia, tru long wok wetem paoa blong mitufala, blad blong olgeta bae i no save kam long ol klos blong mitufala; sapos no blad blong olgeta bae i kam long ol klos blong mitufala, mo bae oli no faenem se mitufala i no gat mak long las dei.

## JAPTA 2

*Jekob i tok agensem fasin blong lavem ol rij samting, fasin blong gat hae tingting, mo fasin blong no stap klin — Ol man i save lukaotem ol rij samting blong helpem ol narafala man — Jekob i tok agensem fasin ia blong mared long fulap woman taem we i no gat raet — Lod i hapi long fasin blong stap klin, blong ol woman. Raonabaot 544-421 yia bifo Kraes i bon.*

OL toktok we Jekob, brata blong Nifae, i bin talemaot long ol pipol blong Nifae, afta we Nifae i bin ded:

2 Nao, ol brata blong mi we mi lavem tumas, mi, Jekob, folem ol stret wok we mi gat long God, blong onarem gud wok blong mi wetem fasin blong stap tru, mo blong mekem se mi save mekem ol klos blong mi i kam fri long ol sin blong yufala, mi kam antap long tempol long dei ia blong mi save talemaot long yufala ol toktok blong God.

3 Mo yufala i save insaed long yufala bakegen se, long bifo kasem naoia mi bin wok had long wok blong koling blong mi; be mi, long dei ia, mi stap daon wetem tingting we i moa strong, mo wari blong mi from gudfala laef blong ol sol blong yufala, we mi no bin gat bifo kasem naoia.

4 From luk, i kam kasem naoia, yufala i bin folem toktok blong Lod, we mi bin givim long yufala.

5 Be luk, yufala i lisin long mi,

mo save se tru long help blong Krieta we i gat ol strongfala paoa blong heven mo wol ia, mi save talem long yufala long saed blong ol tingting blong yufala, olsem wanem nao yufala i stat blong wok long sin, we sin ia i luk rabis tumas long mi, yes, mo tu i rabis tumas long God.

6 Yes, mi harem nogud long sol blong mi mo i mekem mi gobak wetem sem long fored blong Meka blong mi, se mi mas testifae long yufala long saed blong ol fasin nogud blong ol hat blong yufala.

7 Mo tu mi harem nogud we mi mas yusum plante strong toktok long saed blong yufala, long fored blong ol woman blong yufala mo ol pikinini blong yufala, we plante long ol filing blong olgeta i sofsof tumas, mo klin, mo i save brokbrok isi long fored blong God, we God i hapi long ol samting ia;

8 Mo mi ting se oli bin kam antap long ples ia blong harem toktok blong God we i mekem olgeta oli hapi, yes, toktok ia we i mekem ol sol we i gat soa i kam oraet bakegen.

9 From samting ia, i mekem sol blong mi i hevi we bae mi fosem mi, from ol strong komanmen we mi bin kasem long God, blong wonem yufala folem ol fasin blong brekem loa, blong yufala, blong mekem se ol kil i kam bigwan, blong olgeta we oli bin kasem kil finis, be i no blong leftem-ap tingting blong olgeta mo

mekem ol kil blong olgeta i kam oraet; mo olgeta we oli no bin kasem kil, long ples blong kakae gud long gudfala toktok blong God, i gat ol smol naef i rere blong stikim ol sol blong olgeta mo givim kil long tingting blong olgeta we i isi blong harem nogud.

10 Be, i nomata we wok blong mi i bigwan, mi mas mekem folem strong komanmen blong God, mo talem long yufala ol samting long saed blong ol fasin nogud mo rabis sin blong yufala, long fored blong olgeta we hat blong olgeta i klin, mo olgeta we hat i fulap wetem sore, mo andanit long sakem ae, blong ae we i go tru long eni samting, blong God we i gat Bigfala Paoa.

11 From samting ia, mi mas talem long yufala trutok folem kliia toktok blong God. From luk, taem we mi stap askem Lod, olsem ia nao toktok i bin kam long mi, i talem se: Jakob, go antap long tempol long tumora, mo talemaot toktok we bae mi givim long yu, long ol pipol ia.

12 Mo nao luk, ol brata blong mi, hemia i toktok we mi talemaot long yufala, se plante long yufala i bin stat blong lukaotem gol, mo silva, mo evri aean we praes blong olgeta i hae tumas, long ol samting ia, graon ia, we hem i wan graon blong promes long yufala mo long ol pikinini blong yufala, i gat plante tumas.

13 Mo han blong givhan i smael long yufala wetem fulap

glad, mekem se yufala i bin kasem plante rij samting; mo from sam long yufala i bin kasem moa plante bitim ol brata blong yufala, yufala i kam antap long ol hae tingting blong ol hat blong yufala, mo yufala i stronghed mo tingting blong yufala i hae from ol hae praes blong ol klos blong yufala, mo givim hadtaem long ol brata blong yufala from yufala i ting se yufala i mo gud bitim olgeta.

14 Mo nao, ol brata blong mi, yufala i ting se bae God i mekem yufala i stret long ol samting ia? Luk, mi talem long yufala, No. Be hem i panisim yufala, mo sapos yufala i gohed long ol samting ia, ol jajmen blong hem i mas kam kwiktaem long yufala.

15 O bae hem i save soem long yufala, we hem i save luk tru long yufala, mo wetem wan kwik lukluk long ae blong hem, hem i save nokem yufala i go long das!

16 O bae hem i save tekemaot yufala long rabis fasin ia mo long rabis sin ia. Mo, O bae yufala i save lisen long ol toktok blong ol komanmen blong hem, mo no letem hae tingting blong ol hat blong yufala i smasem gud ol sol blong yufala!

17 Tingbaot ol brata blong yufala olsem yufala i tingbaot yufala bakegen, mo mekem fren wetem olgeta evriwan mo serem plante long evri samting blong yufala, blong mekem se oli save kam rij olsem yufala.

18 Be bifo yufala i lukaotem ol

rij samting, lukaotem kingdom blong God.

19 Mo afta we yufala i bin kasem wan hop long Kraes, bae yufala i kasem ol rij samting, sapos yufala i lukaotem olgeta; mo bae yufala i lukaotem ol samting ia wetem tingting blong mekem ol gud samting—blong givim klos long olgeta we oli neked, mo blong fidim olgeta we i hanggri, mo blong mekem ol prisena i go fri, mo givhan long ol sik pipol mo olgeta we oli harem nogud.

20 Mo nao, ol brata blong mi, mi bin toktok long yufala long saed blong fasin ia blong gat hae tingting; mo olgeta long yufala we i bin givim hadtaem long ol man we i stap raonabaot long yufala, mo i bin mekem nogud long hem from ol tingting insaed long ol hat blong yufala i hae tumas, from ol samting we God i bin givim long yufala, yufala i talem wanem long hem?

21 Yufala i no ting se ol samting olsem ia, oli ol rabis sin long hem we i bin mekem evri bodi blong mit mo bun? Mo wan man i gudfala long lukluk blong hem sem mak olsem narafala man. Mo evri bodi blong mit mo bun i kamaot long das; mo blong semfala stamba tingting God i bin mekem olgeta, blong bae oli holem ol komanmen blong hem, mo presem hem blong oltaem.

22 Mo nao mi stop blong toktok long saed blong hae tingting ia. Mo sapos mi no mas toktok strong long yufala long saed

blong wan fasin blong brekem loa we i moa nogud, hat blong mi bae i glad tumas from yufala.

23 Be toktok blong God i mekem mi filim hevi from ol fasin ia blong brekem loa blong yufala we oli moa rabis. From luk, olsem ia nao Lod i talem se: Pipol ia i stat blong gru i kam antap long ol rabis fasin; oli no andastanem ol skripja, from oli lukaotem blong mekem eskus blong olgeta taem we oli stap slip olbaot, from ol samting we oli bin raetem long saed blong Deved, mo Solomon boe blong hem.

24 Luk, Deved mo Solomon tufala i tru we oli bin gat plante woman blong olgeta mo narafala woman blong olgeta, we samting ia i rabis sin long fored blong mi, Lod i talem.

25 From samting ia, olsem ia nao Lod i talem se, Mi bin lidim ol pipol ia fored aot long graon blong Jerusalem, wetem paoa blong han blong mi, blong mi save mekem i kamaot long mi wan branj we i stret long ol frut blong laen blong Josef.

26 From samting ia, mi Lod God bae mi no letem se ol pipol ia bae i mekem olsem olgeta blong bifo.

27 From samting ia, olgeta brata blong mi, harem mi, mo lisen long toktok blong Lod: From bae i no gat eni wan long medel blong yufala we i save gat moa bitim wan woman; mo ol narafala woman, bae hem i no gat wan;

28 From mi, Lod God, mi hapi long fasin blong stap klin blong

ol woman. Mo ol fasin blong slip olbaot i wan rabis sin long fes blong mi; olsem ia nao Lod blong ol Host i talem.

29 From samting ia, Pipol ia bae i holem ol komanmen blong mi, Lod blong ol Host i talem, o bae mi panisim graon from olgeta.

30 From sapos mi mi wantem, Lod blong ol Host i talem, resemap ol pikinini long mi, bae mi givim oda long ol pipol blong mi; Sapos no bae oli fol-em ol samting ia.

31 From luk, mi, Lod, mi bin lukim sore, mo mi bin harem ol krae blong ol gel blong ol pipol blong mi long graon blong Jerusalem, yes, mo long evri graon blong ol pipol blong mi, from ol fasin nogud mo rabis sin blong ol man blong olgeta.

32 Mo bae mi mi no letem, Lod blong ol Host i talem, se ol krae blong ol naes gel blong ol pipol ia, we mi bin lidim i kam aot long graon blong Jerusalem, bae i kam long mi agensem ol man blong ol pipol blong mi, Lod blong ol Host i talem.

33 From bae oli no tekem ol gel blong ol pipol blong mi i gowe olsem prisena, from gudfala fasin blong olgeta, hemia nomo sapos mi mi no kam visitim olgeta wetem wan panis we i soa, go kasem i smasem gud olgeta; from bae oli no mekem fasin ia blong slip olbaot, olsem olgeta blong bifo, Lod blong ol Host i talem.

34 Mo nao luk, ol brata blong mi, yufala i save se ol komanmen ia oli bin givim olgeta long

papa blong yumi, Lihae; from samting ia, yufala i bin save olgeta bifo mo yufala i bin kam long wan bigfala panis; from yufala i bin mekem ol samting ia we yufala i no bin sapos blong mekem.

35 Luk, yufala i bin mekem ol bigfala rabis fasin we i moa bitim ol man blong Leman, ol brata blong yumi. Yufala i bin brekem ol hat blong ol gudfala woman blong yufala, mo bin lusum tras blong ol pikinini blong yufala, from ol nogud eksampol blong yufala we yufala i bin soem long fored blong olgeta, mo ol krae blong ol hat blong olgeta i go antap long God agensem yufala. Mo from ol stret toktok blong God, we i kamdaon agensem yufala, plante hat i bin ded, from oli bin harem nogud from ol rabis eksampol ia.

---

### JAPTA 3

---

*Olgeta we hat blong olgeta i klin i kasem gudfala toktok blong God—Stret fasin blong ol man blong Leman i bitim hemia blong ol man blong Nifae—Jekob i wonem agensem fasin ia blong slip wetem wan man o woman aotsaed long mared, Fasin blong gat rabis tingting long wan woman o man, mo evri sin. Raonabaot 544–421 yia bifo Kraes i bon.*

BE luk, mi, Jekob, bae mi toktok long yufala we hat blong yufala i klin. Luk long God wetem strong tingting, mo prea long hem wetem fet we i tumas, mo



bae hem i leftemap tingting blong yufala long ol hadtaem blong yufala, mo bae hem i toktok from stamba tingting blong yufala, mo sendem daon jastis long olgeta we oli lukaotem blong smasem gud yufala.

2 O yufala evriwan we hat blong yufala i klin, leftemap ol hed blong yufala mo kasem gudfala toktok blong God, mo kakae gud long lav blong hem; from yufala i save, sapos ol tingting blong yufala i stap strong blong oltaem.

3 Be, sore tumas, sore tumas, long yufala we hat blong yufala i no klin, we i doti long dei ia long fored blong God; from hemia nomo sapos yufala i no sakem sin blong yufala, bae Lod i panisim graon from yufala; mo ol man blong Leman, we oli no doti olsem yufala, be Lod i bin panisim olgeta wetem wan strong panis, bae oli panisim yufala i go kasem taem we oli smasem gud yufala.

4 Mo taem i kam kwik tumas, se sapos yufala i no sakem sin blong yufala, bae oli tekem graon blong yufala we yufala i kasem long ol papa blong yufala, mo Lod God bae i tekem olgeta we i stret aot long medel blong yufala.

5 Luk, ol man blong Leman ol brata blong yufala, we yufala no laekem olgeta from ol doti blong olgeta mo panis we i bin kam long ol skin blong olgeta, oli moa stret bitim yufala; from oli no bin fogetem komanmen blong Lod, we hem i bin givim long papa blong yumi—blong

bae oli gat wan woman nomo, mo ol narafala woman bae oli no gat wan, mo no mas gat ol fasin blong stap slip olbaot long medel blong olgeta.

6 Mo nao, komanmen ia, oli holem; from samting ia, from oli folem komanmen ia, Lod God bae i no smasem gud olgeta, be bae i gat sore long olgeta; mo wan dei bae Lod i blesem olgeta.

7 Luk, ol man blong olgeta i lavem ol woman blong olgeta, mo ol woman blong olgeta i lavem ol man blong olgeta; mo ol man mo ol woman blong olgeta i lavem ol pikinini blong olgeta; mo no bilif blong olgeta mo fasin blong no laekem man i go long yufala from ol rabis fasin blong ol bubu blong olgeta; from samting ia, hamas moa yufala i gud bitim olgeta, long ae blong bigfala Krieta blong yufala?

8 O ol brata blong mi, mi fraet se hemia nomo sapos yufala i no sakem ol sin blong yufala bae ol skin blong olgeta bae i moa waet bitim ol skin blong yufala, taem we yufala i kam stanap long fored blong jea blong God wetem olgeta.

9 From samting ia, wan komanmen mi givim long yufala, we i toktok blong God, se yufala i nomo toktok nogud agensem olgeta from ol skin blong olgeta i dak; mo tu bae yufala i nomo toktok nogud long olgeta from ol doti blong olgeta; be bae yufala tingbaot ol doti blong yufala nomo, mo tingbaot se ol doti blong olgeta i bin kam from ol bubu blong olgeta.

10 From samting ia, bae yufala i tingbaot ol pikinini blong yufala, olsem wanem we yufala i bin mekem ol hat blong olgeta i harem nogud from eksampol we yufala i bin soem long fored blong olgeta; mo tu, tingbaot se yufala i save, from ol doti blong yufala, tekem ol pikinini blong yufala i go lus, mo ol sin blong olgeta bae i foldaon long ol hed blong yufala long las dei.

11 O ol brata blong mi, lisiin long ol toktok blong mi; wekem-ap ol paoa blong ol sol blong yufala; sekem yufala bakegen blong wekap long slip blong ded; mo mekem yufala i go fri long ol soa blong hel blong mekem se bae yufala i no kam ol enjel blong devel, blong oli sakem yufala i go long lek blong faea mo salfa, we i nambatu ded.

12 Mo nao, mi, Jakob, mi bin talem plante moa samting long ol pipol blong Nifae, blong wonem olgeta agensem fasin ia blong slip wetem man o woman aotsaed long mared mo fasin blong gat rabis tingting, mo evri kaen sin mo mi bin talem long olgeta ol nogud samting we bae i hapen long olgeta sapos oli mekem ol rabis samting ia.

13 Mo wan hundred pat blong ol histri blong pipol ia, we nao i bin stat blong kam plante, oli no save raetem olgeta long ol buk ia; be plante long ol histri ia, mi bin raetem olgeta long olgeta buk we oli moa bigfala, mo ol faet blong olgeta, mo ol rao blong olgeta, mo ol rul blong ol king blong olgeta.

14 Olgeta buk ia oli singaotem olgeta ol buk blong Jakob, mo Nifae i bin mekem olgeta wetem han blong hem. Mo mi stop blong talemaot ol toktok ia.

---

#### JAPTA 4

---

*Evri profet i wosipim Papa long nem blong Kraes — Sakrifaes blong Ebrahim we i mekem wetem Aesak i bin olsem wan eksampol blong God mo Wan Pikinini Nomo blong hem — Ol man i mas stretem olgeta bakegen long God tru long Atonmen — Ol Jiu bae oli sakemaot ston blong fandesen. Raonabaot 544–421 yia bifo Kraes i bon.*

NAO luk, i hapen se mi, Jakob, mi bin tijim plante long ol pipol blong mi long ol toktok, (mo mi no save raetem be smol pat long ol toktok blong mi, from i had tumas blong raetem ol toktok ia long ol buk) mo mifala i save se ol samting we oli raetem long ol buk bae oli stap gud;

2 Be evri samting we mifala i raetem long eni samting sapos oli no ol buk we oli bin mekem wetem gol bae i mas ded mo lus; be mifala i save raetem smol toktok long ol buk, we bae i givim ol pikinini blong mifala, mo tu ol brata blong mifala we mifala lavem olgeta tumas, wan smol pat blong save long saed blong mifala, o long saed blong ol bubu blong olgeta —

3 Nao long samting ia mifala i stap glad; mo mifala i wok had blong raetem ol toktok ia long ol buk, wetem hop se ol brata blong mifala we mifala i lavem

tumas mo ol pikinini blong mifala bae i kasem olgeta wetem ol hat blong tangkyu, mo lukluk long olgeta blong mekem se oli save lanem wetem glad mo no wetem sore, mo tu i no wetem fasin blong luk daon long man, long saed blong ol fas papa mo mama blong olgeta.

4 Long ol narafala toktok, from plan ia mifala i bin raetem ol samting ia, blong mekem se bae oli save se mifala i bin save long Kraes, mo mifala i bin gat wan hop blong glori blong hem plante handred yia bifo hem i kam; mo i no mifala nomo i gat wan hop blong glori blong hem, be tu ol tabu profet we i bin stap bifo long mifala.

5 Luk, oli bin biliv long Kraes mo bin wosipim Papa long nem blong hem, mo tu mifala i wosipim Papa long nem blong hem. Mo from plan ia mifala i holem loa blong Moses, we i poenem ol sol blong mifala long hem; mo from stamba tingting ia, loa ia God i akseptem se hem i stret long mifala, olsem we oli bin givim long Ebrahim long ples we i no gat man long hem blong hem i obei long ol komanmen blong God blong sakrifaesem boe blong hem Aesak, we i olsem wan eksampol blong God mo Wan Pikinini Nomo blong hem.

6 From samting ia, mifala i stadi long ol toktok blong ol profet mo mifala i kasem plante revelesen mo spirit blong profesi; mo from mifala gat ol witnes ia mifala i kasem wan hop, mo fet blong mifala i kam blong no

save seksek, mekem se mifala i save givim oda long nem blong Jisas mo ol tri i obei mifala, o ol bigfala hil, o ol wef blong solwota mo samting ia i tru.

7 Be, Lod God i soem long mifala ol samting blong mifala we i no strong blong mekem se mifala i save se hem i tru long gladhat blong hem, mo ol bigfala wok we hem i kamdaon blong mekem long ol pikinini blong ol man, we mifala i gat paoa blong mekem ol samting ia.

8 Luk, ol wok blong Lod, oli bigfala mo gudfala. Hamas i had blong man, i lukaotem long ol dip ples blong ol sikret blong hem; mo hem i no save hapen se man bae i faenemaot evri wei blong hem. Mo i no gat man i save long ol wei blong hem, sapos hem i no kasem tru long revelesen; from samting ia, ol brata, no luk daon long ol revelesen blong God.

9 From luk, tru long paoa blong toktok blong hem man i bin kam long fes blong wol, we wol ia i bin kamaot tru long paoa blong toktok blong hem. From samting ia, sapos God i save toktok mo wol i bin kamaot, mo blong toktok mo man i bin kamaot, O ale, from wanem hem i no save rulum wol ia, o ol samting we hem i mekem wetem ol han blong hem long fes blong wol, folem tingting mo glad blong hem?

10 From samting ia, ol brata, no lukaotem blong givim advaes long Lod, be tekem advaes long han blong hem. From luk, yufala i save yufala

bakegen se hem i stap givim advaes wetem waes tingting, mo wetem jastis, mo wetem wan bigfala sore, ova evri wok blong hem.

11 From samting ia, ol brata we mi lavem tumas, stretem yufala long hem tru long atonmen blong Kraes, Wan Pikinini Nomo blong hem, mo yufala i save kasem wan laef bakegen, folem paoa blong laef bakegen we i stap long Kraes, mo bae oli soem yufala olsem ol fas frut blong Kraes long God, yufala i gat fet, mo kasem wan gud hop blong glori long hem bifo hem i soemaot hemwan long bodi blong mit mo bun.

12 Mo nao, yufala we mi lavem tumas, no sapraes tumas we mi talem ol samting ia long yufala; from wanem nao yumi no tokbaot atonmen blong Kraes, mo kam blong gat wan stret mo gud save long hem, olsem blong kasem wan save long laef bakegen mo blong wol we bae i kam?

13 Luk, ol brata blong mi, hem we i talemaot profesi, letem hem i talemaot profesi, long haremsave blong ol man; from Spirit i talem trutok mo i no giaman. From samting ia, hem i talemaot ol samting olsem we oli rili stap, mo ol samting olsem we bae i rili stap; from samting ia, ol samting ia oli soemaot long mifala long wan klia fasin, blong sevem ol sol blong yumi. Be luk, mifala nomo, i no evri witnes long ol samting ia; from God tu i bin talemaot ol samting ia long ol profet blong bifo.

14 Be luk, ol Jiu i bin wan stronghed pipol; mo oli bin luk daon long ol klia toktok, mo oli bin kilim ol profet, mo oli bin lukaotem ol samting we oli no save andastanem. From samting ia, from oli blaen, we blaen ia i bin kam tru long taem we oli bin lukluk i go ova long mak, oli mas foldaon; from God i bin tekemaot klia fasin blong hem long olgeta, mo i bin givim long olgeta plante samting we oli no save andastanem, from oli bin wantem samting ia. Mo from oli bin wantem samting ia, God i bin mekem samting ia, blong blokem olgeta.

15 Mo nao, mi, Jakob, Spirit i lidim mi blong talemaot profesi; from mi haremsave wetem ol wok blong Spirit we i stap long mi, we tru long foldaon blong ol Jiu bae oli sakemaot ston ia we oli save bildim mo gat wan sef fandesen antap long hem.

16 Be luk, folem ol skripja, ston ia bae i kam bigfala, mo laswan, mo hem wan nomo i tru fandesen, we ol Jiu i save bildim long hem.

17 Mo nao, olgeta blong mi we mi lavem tumas, olsem wanem i save hapen se ol samting ia, afta we oli bin sakemaot tru fandesen, oli no save bildim antap long hem, blong mekem se i save kam hed blong kona blong olgeta?

18 Luk, ol brata blong mi we mi lavem tumas, bae mi eksplenem sikret ia long yu; sapos mi no, tru eni wei, kam nogud long saed blong fasin blong no muvmuv, blong mi wetem

Spirit, mo foldaon from mi wari tumas from yufala.

---

JAPTA 5

---

*Jekob i talemaot stret toktok blong Sinos long saed blong stori olsem parabol blong ol olif tri we i no wael mo ol wael olif tri—Oli olsem Isrel mo ol Jentael—Seroat mo kam tugeta blong Isrel, oli talemaot fastaem bifo i hapen—Oli tokbaot smol long saed blong ol man blong Nifae mo ol man blong Lemam mo evri laen blong Isrel—Ol Jentael bae oli joenem olgeta wetem Isrel—Plantesen bae i bon long en. Raonabaot 544-421 yia bifo Kraes i bon.*

LUK, olgeta brata blong mi, yufala i no tingbaot se yufala i bin ridim ol toktok blong profet Sinos, we hem i bin talemaot long laen blong Isrel, we i talem se:

2 Lisin gud, O yufala laen blong Isrel mo harem ol toktok blong mi, wan profet blong Lod.

3 From luk, olsem ia nao Lod i talem se, bae mi talem se yu, O laen blong Isrel, yu olsem wan olif tri we i no wael, we wan man i bin tekem mo i bin givim gudfala kakae long hem long plantesen blong hem; mo i bin gru, mo i bin kam olfala, mo i bin stat blong roten.

4 Mo i bin hapen se masta blong plantesen i bin go fored, mo hem i bin luk se olif tri blong hem i bin stat blong roten; mo hem i bin talem se: Bae mi katem tri ia blong klinim, mo digim raonabaot long hem, mo givim

gudfala kakae long hem blong mekem se maet hem i save gat ol branj we oli niu mo save brok isi i kamaot, mo i no ded.

5 Mo i bin hapen se hem i bin katem hem blong klinim, mo i bin digim raonabaot long hem, mo i bin givim gudfala kakae long tri ia folem toktok blong hem.

6 Mo i bin hapen se afta plante dei hem i bin stat blong gat sam smol niu branj i kamaot we oli save brok isi; be luk, stamba ples antap blong tri ia i bin stat blong ded.

7 Mo i bin hapen se masta blong plantesen i bin luk samting ia, mo hem i bin talem long wokman blong hem se: Mi harem nogud se bae mi lusum tri ia; from samting ia, go mo katemaot ol branj long wan wael olif tri, mo karem olgeta i kam long ples ia long mi; mo bae yumi katemaot ol stamba branj we oli stat blong drae aot, mo bae yumi sakem olgeta i go long faea blong oli save bon.

8 Mo luk, Lod blong plantesen i talem se, mi tekemaot plante long ol niu mo branj ia we oli save brok isi, mo bae mi joenem olgeta i go long eni ples we mi wantem; mo i nomata sapos hem i olsem se ol rus blong tri ia bae i ded, mi save sevem ol frut blong tri ia blong mi bak-egen; from samting ia, bae mi tekem ol niufala branj ia we oli save brok isi, mo bae mi joenem olgeta long eni ples we mi wantem.

9 Yu tekem ol branj blong wael olif tri, mo joenem olgeta i go

long ples blong olgeta; mo olgeta ia we mi bin katemaot bae mi sakem i go long faea mo bonem olgeta, blong mekem se oli nomo save mekem doti long graon blong plantesen blong mi.

10 Mo i bin hapen se wokman blong Lod blong plantesen i bin mekem folem we Lod blong plantesen i talem long hem, mo hem i bin joenem ol branj blong wael olif tri.

11 Mo Lod blong plantesen i bin mekem se oli digim raonabaot long tri mo katem blong klinim, mo givim gudfala kakae long hem, hem i talem long wokman blong hem, mi harem nogud se bae mi lusum tri ia; from samting ia, maet mi save sevem ol rus blong hem, blong oli no ded, blong mekem se mi save sevem olgeta blong mi bakegen, mi bin mekem samting ia.

12 From samting ia, gohed wetem wok blong yu, lukluk long tri, mo givim gudfala kakae long hem, folem ol toktok blong mi.

13 Mo bae mi putum olgeta ia long pat blong plantesen blong mi we i stap daon olgeta, long eni ples mi wantem, samting ia i nomata long yu; mo mi mekem samting ia blong mi save sevem long mi bakegen ol stret branj blong tri; mo tu, blong mi save hipimap ol frut blong tri ia blong mekem rere blong mi yusum long taem we taem blong pikim ol frut i pas, blong mi bakegen; from mi harem nogud se bae mi lusum tri ia mo frut blong hem.

14 Mo i bin hapen se Lod blong plantesen i bin gobak long rod blong hem, mo i bin haedem ol stret branj blong olif tri we i no wael, long ol pat blong plantesen we i stap daon olgeta, sam long wan ples mo sam long wan narafala ples, folem tingting mo glad blong hem.

15 Mo i bin hapen se longfala taem i bin pas i gowe, mo Lod blong plantesen i bin talem long wokman blong hem se: Kam, bae yumitu go daon long plantesen, blong yumi save wok long plantesen.

16 Mo i bin hapen se Lod blong plantesen, mo tu wokman, i bin go daon long plantesen blong wok. Mo i bin hapen se wokman i bin talem long masta blong hem se: Luk, luk long ples ia, lukim tri ia.

17 Mo i bin hapen se Lod blong plantesen i bin luk mo i bin luk tri ia we oli bin joenem ol branj blong wael olif tri i go long hem; mo i bin stat blong gru mo i bin stat blong karem frut. Mo hem i bin luk se hem i gud; mo frut blong hem i bin olsem stret frut.

18 Mo hem i bin talem long wokman se: Luk, ol branj blong wael tri i bin kasem wota blong rus blong tri ia, blong mekem se rus blong tri ia i bin karem i kam fulap paoa; mo from rus i gat fulap paoa long tri ia, ol wael branj i bin karem frut we i no wael. Nao, sapos yumi no bin joenem ol branj ia, bae tri ia i bin ded. Mo nao, luk, bae mi hipimap plante frut, we tri ia i bin karem; mo ol frut blong tri

ia bae mi hipimap blong mi save yusum long taem we, taem blong pikim ol frut i pas.

19 Mo i bin hapen se Lod blong plantesen i bin talem long wokman se: Kam, bae yumitu go daon long pat blong plantesen we i stap daon olgeta, mo luk sapos ol stret branj blong tri i no bin karem plante frut tu, blong mi save hipimap long ol frut blong tri ia blong mi yusum bakegen long taem we, taem blong pikim ol frut i pas, blong mi bakegen.

20 Mo i bin hapen se oli bin go fored long ol ples we masta i bin haedem ol stret branj blong tri long hem, mo hem i bin talem long wokman se: Luk, ol branj ia, mo hem i bin luk se faswan i bin karem plante frut; mo hem i bin luk tu se hem i gud. Mo hem i bin talem long wokman se: Tekemaot ol frut long tri ia, mo hipimap blong mi save yusum long taem we, taem blong pikim ol frut i pas, blong mekem se mi save sevem blong miwan bakegen; from luk, hem i bin talem se, mi bin givim gudfala kakae long hem blong longfala taem ia mo hem i bin karem plante frut.

21 Mo i bin hapen se wokman i bin talem long masta blong hem se: From wanem yu yu kam long ples ia blong planem tri ia, o branj ia blong tri? From luk, ples ia i moa pua bitim ol narafala graon blong plantesen blong yu.

22 Mo Lod blong plantesen i bin talem long hem se: Yu no givim advaes long mi; mi bin

save se ples ia i wan pua ples long graon; from samting ia, mi bin talem long yu, mi bin givim gudfala kakae long hem blong longfala taem ia, mo yu luk se i bin karem plante frut.

23 Mo i bin hapen se Lod blong plantesen i bin talem long wokman blong hem se: Lukluk i go longwe; luk mi bin planem wan narafala branj blong tri tu; mo yu yu save se ples ia blong graon i moa pua bitim faswan. Be, luk tri ia. Mi bin givim gudfala kakae long hem blong longfala taem ia, mo i bin karem plante frut; taswe, karem hemia, mo hipimap blong mi save yusum long taem we, taem blong pikim ol frut i pas, blong mekem se mi save sevem blong miwan bakegen.

24 Mo i bin hapen se Lod blong plantesen i bin talem bakegen long wokman blong hem se: Lukluk long ples ia, mo luk wan narafala branj tu, we mi bin planem; luk we mi bin givim gudfala kakae long hem tu, mo i bin karem plante frut.

25 Mo hem i bin talem long wokman se: Lukluk long ples ia mo luk branj ia we i laswan. Luk, hemia mi bin planem long wan gud ples blong graon; mo mi bin givim gudfala kakae long hem blong longfala taem ia, mo wan pat blong tri ia nomo i bin karem frut we i no wael, mo narafala pat blong tri i bin karem wael frut; luk, mi bin givim gudfala kakae long tri ia olsem ol narawan.

26 Mo i bin hapen se Lod blong plantesen i bin talem

long wokman se: Katemaot ol branj we oli no bin karem ol gudfala frut, mo sakem olgeta i go long faea.

27 Be luk, wokman i bin talem long hem se: Bae yumi katem hem blong klinim, mo digim raonabaot long hem, mo givim gudfala kakae smol taem moa blong maet hem i save karem gudfala frut i kam long yu, blong mekem se yu save hipimap blong yusum taem we, taem blong pikim ol frut i pas.

28 Mo i bin hapen se Lod blong plantesen mo wokman blong Lod blong plantesen i bin givim gudfala kakae long evri frut blong plantesen.

29 Mo i bin hapen se wan longfala taem i bin pas i gowe, mo Lod blong plantesen i bin talem long wokman blong hem se: Kam, bae yumitu go daon long plantesen, blong yumitu save wok bakegen long plantesen. From luk, taem i stap kam klosap, mo en bae i kam i no longtaem; from samting ia, mi mas hipimap ol frut blong mi save yusum long taem, we taem blong pikim ol frut i pas, blong miwan bakegen.

30 Mo i bin hapen se Lod blong plantesen mo wokman i bin go daon long plantesen; mo oli bin kam long tri we ol stret branj blong hem oli bin katemaot olgeta, mo ol wael branj oli bin joenem olgeta i go long hem; mo luk fulap defren kaen frut i bin stap long tri ia.

31 Mo i bin hapen se Lod blong plantesen i bin testem frut, evri kaen folem namba

blong olgeta. Mo Lod blong plantesen i bin talem se: Luk, blong longfala taem ia yumi bin givim gudfala kakae long tri ia, mo mi bin hipimap blong mi bakegen plante frut we mi save yusum long taem, we taem blong pikim ol frut i pas.

32 Be luk, long taem ia hem i bin karem plante frut, mo i no gat wan long hem we i gud. Mo luk, i gat fulap defren kaen blong ol rabis frut; mo frut i no helpem mi, i nomata long evri wok blong yumi; mo nao mi harem nogud we bae mi lusum tri ia.

33 Mo Lod blong plantesen i bin talem long wokman se: Bae yumi mekem wanem long tri ia, blong mekem se mi save sevem bakegen ol gud frut blong tri ia blong miwan bakegen?

34 Mo wokman i bin talem long masta blong hem se: Luk, from yu bin joenem ol branj blong wael olif tri oli bin givim gudfala kakae long ol rus, blong mekem se oli stap laef mo oli no bin ded; from samting ia, yu luk se oli gud yet.

35 Mo i bin hapen se Lod blong plantesen i bin talem long wokman blong hem se: Tri ia i no helpem mi nating, ol rus blong tri ia i no helpem mi nating long taem we bae i karem ol rabis frut.

36 Be, mi save se ol rus oli gud, mo blong stamba tingting blong miwan, mi bin sevem olgeta; mo from bigfala paa we oli bin karem bifo, long ol wael branj, ol gudfala frut.

37 Be luk, ol wael branj i bin



gru mo oli bin winim ol rus blong tri ia; mo from we ol wael branj i bin winim ol rus blong tri ia, hem i bin karem plante rabis frut; mo from we hem i bin karem plante rabis frut yu luk se i stat blong ded; mo bae i kam rere, mo oli save sakem hem long faea, hemia nomo sapos yumi no mekem wan samting blong sevem tri ia.

38 Mo i bin hapen se Lod blong plantesen i bin talem long wokman blong hem se: Bae yumitu go daon long ol pat blong plantesen we i stap daon olgeta, mo luk sapos ol stret branj tu i bin karem ol rabis frut.

39 Mo i bin hapen se oli bin go daon long ol pat blong plantesen we i stap daon olgeta. Mo i bin hapen se oli bin luk se ol frut blong ol stret branj i bin kam roten tu; yes, faswan mo nambatu mo tu laswan; mo olgeta evriwan i bin kam roten.

40 Mo wael frut blong las branj i bin winim pat ia blong tri we i bin karem gudfala frut, go kasem mak we branj i bin drae aot mo i bin ded.

41 Mo i bin hapen se Lod blong plantesen i bin krae, mo i bin talem long wokman se: Wanem samting moa mi bin save mekem blong plantesen blong mi?

42 Luk, mi bin save se evri frut blong plantesen i bin kam roten be olgeta ia nomo i no bin kam roten. Mo nao olgeta ia we oli bin karem ol gudfala frut long wan taem bifo, oli bin kam roten tu; mo nao evri tri long plantesen blong mi oli gud blong nating, be blong katem

daon nomo olgeta mo sakem i go long faea.

43 Mo luk las tri ia, we olgeta branj blong hem oli drae, mi bin planem hem long wan gudfala ples long graon; yes, ples ia we mi bin save se i moa stret long mi bitim ol narafala ples long graon blong plantesen blong mi.

44 Mo yu bin luk we mi bin katem daon tu olgeta we i bin mekem doti ples ia blong graon, blong mi save planem tri ia long ples blong olgeta ia.

45 Mo yu bin luk we wan pat blong tri ia i bin karem ol gudfala frut, mo wan pat blong tri ia i bin karem ol wael frut; mo from mi no bin katemaot ol branj blong tri ia mo sakem olgeta i go long faea, luk, oli bin winim ol gudfala branj mekem se hem i bin drae aot.

46 Mo nao, luk, i nomata long evri samting we yumi bin mekem blong lukaotem gud plantesen blong mi, ol tri blong plantesen ia i bin kam rabis, mekem se oli no karem ol gudfala frut; mo ol tri ia mi bin wantem tumas blong sevem olgeta, blong hipimap ol frut blong tri ia, blong mi save yusum long taem we, taem blong pikim ol frut i pas, long miwan bakegen. Be, luk, oli bin kam olsem wael olif tri, mo oli blong nating be blong katem daon mo sakem i go long faea; mo mi harem nogud we bae mi lusum olgeta.

47 Be wanem samting moa mi bin save mekem long plantesen blong mi? Mi bin slakem han

blong mi, mekem se mi no bin givim gudfala kakae long hem? No, mi bin givim gudfala kakae long hem, mo mi bin digim raonabaot long hem, mo mi bin katem hem blong klinim, mo mi bin putum sitsit blong anamol long hem; mo mi bin stret-em han blong mi klosap fuldei, mo en i stap kam klosap. Mo mi harem nogud we bae mi katem daon evri tri blong plantesen blong mi, mo sakem olgeta i go long faea blong mekem se oli save bon. Huia nao i bin smasem gud plantesen blong mi?

48 Mo i bin hapen se wokman i bin talem long masta blong hem se: Hem i no ol hae tingting blong plantesen blong yu—ol branj blong olgeta i no bin winim ol rus we i gud? Mo from ol branj i bin winim ol rus blong ol tri ia, luk oli gru moa kwik bitim paoa blong ol rus, oli tekem paoa long olgeta bakegen. Luk, mi talem, samting ia i no stamba tingting we i bin mekem ol tri long plantesen blong yu i kam nogud?

49 Mo i bin hapen se Lod blong plantesen i bin talem long wokman se: Bae yumitu go stat mo katem daon ol tri blong plantesen mo sakem olgeta i go long faea, blong mekem se bae oli no mekem graon blong plantesen blong mi i doti, from mi bin mekem evri samting. Wanem samting moa mi bin save mekem long plantesen blong mi?

50 Be, luk, wokman i bin talem long Lod blong plantesen se: Livim hem i stap smoltaem moa.

51 Mo Lod i bin talem se: Yes,

bae mi livim i stap smoltaem moa, from mi harem nogud we bae mi lusum ol tri blong plantesen blong mi.

52 From samting ia, bae yumitu tekemaot samfala branj blong ol tri ia we mi bin planem long ol pat blong plantesen we oli stap daon olgeta, mo bae yumitu joenem olgeta i go long ol tri we oli bin kamaot long hem; mo bae yumitu katemaot long tri ia ol branj ia we frut blong olgeta i konkon tumas, mo joenem ol stret branj blong tri long ples blong olgeta.

53 Mo bae mi mekem samting ia blong mekem se tri bae i no ded, se, maet, mi save sevem long mi bakegen ol rus blong tri ia blong stamba tingting blong mi.

54 Mo, luk, ol rus blong ol stret branj blong tri we mi bin planem long eni ples we mi bin wantem oli stap laef yet; from samting ia, blong mi save sevem olgeta tu blong stamba tingting blong mi, bae mi tekem samfala long ol branj blong tri ia mo bae mi joenem long olgeta. Yes, bae mi joenem i go long olgeta, ol branj blong mama tri blong olgeta, blong mi save sevem ol rus tu long mi bakegen, blong taem we bae oli strong inaf maet bae oli karem ol gudfala frut long mi, mo bae mi glad yet long ol frut blong plantesen blong mi.

55 Mo i bin hapen se oli bin tekem samfala long stret tri we i bin kam wael, mo bin joenem i go long ol stret tri, we oli bin kam wael tu.

56 Mo oli bin tekem ol branj tu long ol stret tri ia we i bin kam wael, mo bin joenem olgeta i go long mama tri blong olgeta.

57 Mo Lod blong plantesen i bin talem long wokman se: No katemaot ol wael branj long ol tri be olgeta nomo we oli konkon tumas; mo long olgeta, bae yu joenem folem wanem we mi bin talem.

58 Mo bae yumitu givim gudfala kakae bakegen long ol tri blong plantesen, mo bae yumitu katem blong klinim ol branj blong ol tri ia; mo bae yumitu katemaot long ol tri ia, ol branj we oli rere, we oli mas ded, mo sakem olgeta i go long faea.

59 Mo mi mekem samting ia blong, maet, ol rus blong ol tri ia i save tekem paoa from oli gud tumas; mo from ol branj i jenis, mekem se ol gudfala wan i save winim ol rabis wan.

60 Mo from we mi bin sevem ol stret branj mo ol rus blong ol tri ia, mo from we mi bin joenem long olgeta, ol stret branj bakegen i go long mama tri blong olgeta, mo mi bin sevem ol rus blong mama tri blong olgeta, blong, maet, ol tri blong plantesen blong mi i save karem ol gudfala frut bakegen; mo blong mi save gat glad bakegen long ol frut blong plantesen blong mi, mo, maet, blong mi save glad tumas we mi bin sevem ol rus mo ol branj blong fas frut—

61 From samting ia, go stat, mo singaotem ol wokman blong mekem se yumi save wok had oltaem wetem paoa blong yumi

long plantesen, blong yumi save mekem rere rod, blong mekem se mi save karem i kam bakegen ol stret frut, we stret frut ia i gud, mo i gudgudfala bitim evri narafala frut.

62 From samting ia, bae yumitu go stat mo wok wetem paoa blong yumitu blong las taem ia, from luk en i stap kam klosap, mo hemia i las taem we bae mi katem plantesen blong mi blong klinim.

63 Joenem ol branj; stat long ol laswan blong mekem se oli save kam faswan, mo blong mekem se ol faswan oli save kam laswan, mo digim raonabaot ol tri ia, ol yangfala tugeta wetem ol olfala, faswan mo laswan; mo laswan mo faswan, blong mekem se evriwan i save kasem gudfala kakae wan taem bakegen blong las taem.

64 From samting ia, digim raonabaot long olgeta, mo katem blong klinim olgeta, mo putum sitsit blong anamol long olgeta wan taem moa, blong las taem, from en i stap kam klosap. Mo sapos i olsem se ol joen bae i gru, mo karem stret frut, ale bae yufala i mekem rere rod blong olgeta.

65 Mo taem we oli stat blong gru bae yufala i katemaot ol branj we i karem ol konkon frut, folem paoa blong ol gudfala wan mo saes blong olgeta; mo bae yufala i no katemaot ol nogud wan blong olgeta evriwan wan taem, from mi fraet se bae ol rus blong olgeta bae i strong tumas blong joenem, mo ol joen blong olgeta bae i ded,

mo mi lusum ol tri blong plantesen blong mi.

66 From mi harem nogud se bae mi lusum ol tri long plantesen blong mi; from samting ia bae yufala i tekemaot ol nogud wan long semfala spid we ol gudfala wan i stap gru, blong mekem se rus mo antap blong hem, bae oli gat semfala paoa, kasem taem we ol gudfala wan bae i winim ol nogud wan, mo oli katem daon ol nogud wan mo sakem olgeta i go long faea, blong oli no mekem doti long graon blong plantesen blong mi; mo olsem ia nao bae mi brumaot ol nogud wan long plantesen blong mi.

67 Mo ol branj blong stret tri bae mi joenem i go bakegen long stret tri;

68 Mo ol branj blong stret tri bae mi joenem long ol stret branj blong tri ia; mo olsem ia nao bae mi karem olgeta i kam tugeta bakegen, blong mekem se bae oli karem ol stret frut, mo bae oli kam wan.

69 Mo ol nogud wan bae oli sakemaot, yes, aot long evri graon blong plantesen blong mi tu; from luk, long wan taem ia nomo bae mi katem blong klinim plantesen blong mi.

70 Mo i bin hapen se Lod blong plantesen i bin sendem wokman blong hem; mo wokman i bin go mo i bin mekem olsem we Lod i bin givim oda long hem, mo i bin tekem i kam samfala moa wokman; mo oli no bin plante tumas.

71 Mo Lod blong plantesen i bin talem long olgeta se: Go stat,

mo wok long plantesen, wetem paoa blong yufala. From luk, hemia i las taem we bae mi givim gudfala kakae long plantesen blong mi; from en i stap klosap nao, mo en blong taem blong pikimap frut i stap kam kwik; mo sapos yufala i wok wetem paoa blong yufala wetem mi, bae yufala i gat glad long ol frut we bae mi hipimap long mi bakegen, blong mi save yusum long taem we bae i kam kwik.

72 Mo i bin hapen se ol wokman i bin go mo wok wetem paoa blong olgeta; mo Lod blong plantesen i bin wok tu wetem olgeta; mo oli bin obei long ol komanmen blong Lod blong plantesen long evri samting.

73 Mo i bin stat blong gat ol stret frut bakegen long plantesen; mo ol stret branj i bin stat blong gru mo kam plante tumas; mo ol wael branj oli bin stat blong katemaot, mo blong sakemaot olgeta; mo oli bin kipim ol rus mo antap blong hem i sem mak, folem paoa blong hem.

74 Mo olsem ia nao oli bin wok, wetem evri fasin blong wok had oltaem folem ol komanmen blong Lod blong plantesen, kasem taem we ol nogud wan tu oli bin sakemaot long plantesen, mo Lod i bin sevem long hem bakegen mekem se ol tri i bin karem ol stret frut bakegen; mo oli bin kam olsem wan bodi; mo ol frut i bin sem mak; mo Lod blong plantesen i bin sevem long hem bakegen ol stret frut,

we i gudgudfala tumas long hem long stat kasem naoia.

75 Mo i bin hapen se taem we Lod blong plantesen i bin luk se ol frut blong hem i bin gud, mo se plantesen blong hem i nomo rabis, hem i bin singaotem ol wokman blong hem blong kam, mo i bin talem long olgeta se: Luk, blong las taem ia yumi bin givim gudfala kakae long plantesen blong mi; mo yufala i luk we mi bin mekem folem wanem we mi bin wantem; mo mi bin sevem ol stret frut, we i gud, olsem we i bin stap long stat tu. Mo yufala i kasem blesing; from we yufala i bin wok had oltaem wetem mi long plantesen blong mi mo bin holem ol komanmen blong mi, mo yufala i bin karem i kam long mi bakegen ol stret frut, mekem se plantesen blong mi i nomo rabis, mo ol nogud wan oli sakemaot, luk bae yufala i gat glad wetem mi from ol frut blong plantesen blong mi.

76 From luk, blong wan longfala taem bae mi hipimap ol frut blong plantesen blong mi long miwan bakegen blong mi save yusum long taem, we taem blong pikim ol frut i pas, we i stap kam kwik taem tumas; mo blong las taem mi bin givim gudfala kakae long plantesen blong mi mo mi bin katem blong klinim hem, mo bin digim raonabaot long hem, mo bin putum sitsit blong anamol long hem; from samting ia, bae mi hipimap long miwan bakegen ol frut ia, blong wan longfala

taem, folem wanem we mi bin talemaot.

77 Mo taem we taem ia i kam we ol nogud frut bae i kambak long plantesen blong mi, ale bae mi mekem se oli pikimap ol gudfala wan mo ol nogud wan; mo bae mi sevem ol gudfala wan blong mi bakegen, mo ol nogud wan bae mi sakemaot i go long ples blong hem. Mo afta, i kam en blong taem blong pikimap frut; mo bae mi mekem se faea i bonem plantesen blong mi.

---

### JAPTA 6

---

*Lod bae i karembak Isrel long ol las dei—Bae faea i bonem wol—Ol man i mas folem Kraes blong mekem se oli no kasem lek blong faea mo salfa. Raonabaot 544–421 yia bifo Kraes i bon.*

Mo nao, luk, ol brata blong mi, olsem we mi bin talem long yufala se bae mi talemaot profesi, luk, hemia profesi blong mi—se ol samting we profet ia Sinos i bin talemaot, long saed blong ol laen blong Isrel, long profesi ia hem i bin skelem olgeta wetem wan olif tri, bae i mas hapen.

2 Mo dei ia we bae hem i stret-em han blong hem bakegen blong nambatu taem blong karembak ol pipol blong hem, hem i dei, yes, las taem tu, we ol wokman blong Lod bae i go fored wetem paoa blong hem, blong givim gudfala kakae mo katem blong klinim plantesen

blong hem; mo afta samting ia en bae i kam klosap.

3 Mo hamas nao olgeta we i bin wok had oltaem long plantesen blong hem, i kasem blesing; mo hamas nao olgeta we bae oli sakemaot olgeta i go long ples blong olgeta bakegen, i kasem panis! Mo faea bae i bonem wol.

4 Mo hamas nao God blong yumi i gat sore long yumi, from hem i stap tingbaot ol laen blong Isrel, ol rus tugeta wetem ol branj; mo hem i stretem ol han blong hem i go long olgeta long fuldei; mo oli wan pipol we i stronghed mo wan pipol we i rao tumas; be evriwan we bae i no mekem ol hat blong olgeta i kam strong bae oli sev long kingdom blong God.

5 From samting ia, ol brata blong mi we mi lavem tumas, mi askem long yufala long ol stret toktok blong mekem se bae yufala i sakem sin, mo kam wetem evri tingting blong hat, mo stap lisin strong mo lisin long God olsem hem i lisin long yufala. Mo taem we hem i stap stretem han blong sore blong hem i go long yufala long laet blong dei, no mekem ol hat blong yufala i kam strong.

6 Yes, long dei ia, sapos yufala i jusum blong harem voes blong hem, no mekem ol hat blong yufala i kam strong; from wanem bae yufala i jusum ded?

7 From luk, afta we yufala i bin kasem gudfala kakae long ol gudfala toktok blong God long fuldei. Bae yufala i karem ol rabis frut, blong mekem se oli

katem daon yufala mo sakem yufala i go long faea?

8 Luk, bae yufala i sakemaot ol toktok ia? Bae yufala i sakemaot ol toktok blong ol profet; mo bae yufala i sakemaot ol toktok we oli bin talem-aot long saed blong Kraes, afta we plante long olgeta i bin toktok long saed blong hem? Mo tanem baksaed long ol gudfala toktok blong Kraes, mo paoa blong God, mo presen we i Tabu Spirit, mo smasem gud Tabu Spirit, mo jikim bigfala plan blong fasin ia blong pemaot man, we Lod i bin mekem rere blong yufala?

9 Yufala i no save se sapos yufala i mekem ol samting ia, se paoa blong pemaot man mo laef bakegen, we i stap long Kraes, bae i tekem yufala blong stanap wetem sem mo nogud rong long fored blong kot blong God?

10 Mo folem paoa blong jastis, from oli no save tanem baksaed long jastis, yufala i mas go long lek blong faea mo salfa, we ol flem blong hem i no save ded, mo ol smok blong hem i go antap blong oltaem mo oltaem, we lek blong faea mo salfa ia, hem i harem nogud we i no gat en.

11 O ale, ol brata blong mi we mi lavem tumas, yufala i sakem sin, mo kam insaed long get we i no gat plante spes long medel, mo gohed long rod ia we i smol, kasem taem we bae yufala i kasem laef we i no save finis.

12 O stap waes, bae mi save talem wanem moa?

13 Blong endem toktok blong

mi, mi talem gudbae long yufala, kasem taem we bae mi mitim yufala long fored blong stret kot blong God, we kot ia i stikim tingting blong ol nogud man wetem harem nogud tumas mo fraet. Amen.

---

### JAPTA 7

---

*Serem i tanem baksaed blong hem long Kraes, i rao wetem Jakob, hem i askem strong blong luk wan saen mo God i panisim hem — Evari profet i bin tokbaot Kraes mo atonmen blong hem — Ol man blong Nifae i bin spenem laef blong olgeta olsem ol man we i no gat kaos, oli bin bon long wan taem we laef i had tumas, mo ol man blong Leman i no laekem olgeta. Raonabaot 544-421 yia bifo Kraes i bon.*

Mo nao i hapen se afta plante yia i bin pas i gowe, i bin gat wan man i kam long medel blong ol pipol blong Nifae, we nem blong hem i Serem.

2 Mo i bin hapen se hem i bin stat blong prij long medel blong ol pipol, mo blong talemaot long olgeta se bae i no gat wan Kraes. Mo hem i bin prijim plante samting blong switim ol pipol; mo samting ia hem i bin mekem blong mekem se hem i save smasem gud doktrin blong Kraes.

3 Mo hem i bin wok had oltaem blong hem i save lidim ol hat blong ol pipol i gowe, inaf blong mekem se hem i bin lidim plante hat i gowe; mo hem i bin save se mi, Jakob, i bin gat fet long Kraes ia we bae

i kam, hem i bin lukaotem plante wei blong mekem se hem i save kam long mi.

4 Mo hem i bin gat plante save, mekem se hem i bin gat wan ful save long lanwis blong ol pipol; from samting ia, hem i bin save yusum plante swit tok, mo plante paoa blong toktok, folem paoa blong devel.

5 Mo hem i bin gat hop blong pusumaot mi long fet ia, i nomata long plante revelesen mo plante samting we mi bin luk long saed blong ol samting ia; from i tru we mi bin lukim ol enjel, mo oli bin givhan long mi. Mo tu, mi bin harem voes blong Lod i toktok long mi wetem tru voes blong hem, long wan wan taem; from samting ia, hem i no save pusumaot mi.

6 Mo i bin hapen se hem i bin kam long mi, mo long fasin ia hem i bin toktok long mi, se: Brata Jakob, mi bin lukaotem plante taem blong mi save toktok long yu; from mi bin harem mo save tu se yu stap go olbaot fulap, prijim samting ia we yu singaotem se gospel, o doktrin blong Kraes.

7 Mo yu bin lidim plante long ol pipol ia i gowe mekem se oli jenisim stret fasin blong God, mo oli no holem loa blong Moses we i stret rod; mo jenisim loa blong Moses i go long wosip long wan man we yu talem se bae hem i kam long plante handred yia long fiuja. Mo nao luk, mi, Serem, mi talemaot long yu se samting ia i tok agensem nem blong God; from i no gat wan man we i save eni

samting olsem; from hem i no save talemaot ol samting we bae i kam. Mo long fasin ia Serem i bin rao agensem mi.

8 Be luk, Lod God i bin porem Spirit blong hem long sol blong mi, inaf we i mekem se mi bin blokem hem long evri toktok blong hem.

9 Mo mi bin talem long hem se: Yu tanem baksaed blong yu long Kraes we bae i kam? Mo hem i bin talem se: Sapos bae i gat wan Kraes, bae mi no tanem baksaed blong mi long hem; be mi save se i no gat Kraes, mo i no bin gat, mo bae i neva gat.

10 Mo mi bin talem long hem se: Yu biliv long ol skripja? Mo hem i bin talem, Yes.

11 Mo mi bin talem long hem se: Ale, yu no andastanem olgeta; from i tru we oli tokbaot Kraes. Luk, mi talem long yu se i no gat wan long ol profet we i bin raet, o i bin talemaot profesi, sapos oli no bin toktok long saed blong Kraes ia.

12 Mo i no hemia nomo—Lod i bin soemaot long mi, from mi bin harem mo bin luk; mo hem i bin soemaot tu long mi wetem paoa blong Tabu Spirit; from samting ia, mi save se sapos i no gat atonmen i hapen evri man i mas lus.

13 Mo i bin hapen se hem i bin talem long mi se: Soem wan saen long mi tru long paoa blong Tabu Spirit ia, we tru long hem yu save fulap samting.

14 Mo mi bin talem long hem se: Yu ting se mi mi huia blong traem God blong soem wan saen long yu long saed blong

samting ia we yu save se i tru? Be stil yu tanem baksaed blong yu long hem, from yu yu wan man blong devel. Be, tingting blong mi bae i no hapen; be sapos God bae i nokem yu, letem samting ia i stap olsem wan saen long yu we hem i gat paoa long heven tugeta wetem long wol; mo tu, we bae Kraes i kam. Mo tingting blong yu, O Lod, bae i hapen, mo i no tingting blong mi.

15 Mo i bin hapen se taem we mi, Jekob, mi bin talemaot ol toktok ia, paoa blong Lod i bin kam long hem, inaf we i mekem se hem i bin foldaon long graon. Mo i bin hapen se oli bin givim gudfala kakae long hem blong spes blong plante dei.

16 Mo i bin hapen se hem i bin talem long ol pipol se: Kam tugeta long tumora from bae mi ded; from samting ia, mi wantem blong toktok long ol pipol bifo bae mi ded.

17 Mo i bin hapen se long nekis dei ol grup blong ol pipol i bin kam tugeta; mo hem i bin toktok klia long olgeta mo i bin tanem baksaed blong hem long ol samting we hem i bin tijim long olgeta mo hem i bin talemaot se hem i save se i gat Kraes, mo paoa blong Tabu Spirit, mo ol tijing blong ol enjel.

18 Mo hem i bin toktok klia long olgeta se paoa blong devel i bin giaman long hem. Mo hem i bin tokbaot hel mo taem we i no save finis, mo panis we i no save finis.

19 Mo hem i bin talem: Mi fraet se mi bin mekem sin ia we Lod i



no save fogivim mi long hem, from mi bin giaman long God; from mi bin tanem baksaed blong mi long Kraes, mo mi talem se mi bin bilivim ol skripja; mo i tru we oli tokbaot hem. Mo from mi bin giaman olsem ia nao long God mi fraet bigwan se kes blong mi bae i nogud olgeta; be mi talemaot long God.

20 Mo i bin hapen se taem we hem i bin talemaot ol toktok ia hem i no bin save talem moa, mo hem i bin lego spirit.

21 Mo taem we grup blong ol pipol i bin harem we hem i bin talemaot ol samting ia long taem we hem i rere blong lego spirit, oli bin sapraes tumas; inaf we i mekem se paoa blong God i bin kam daon long olgeta, mo paoa ia i bin winim olgeta mekem se oli bin foldaon long graon.

22 Nao, samting ia i bin mekem glad long mi, Jekob, from mi bin askem samting ia long Papa blong mi we i stap long heven; from hem i bin harem krae blong mi mo i bin ansarem prea blong mi.

23 Mo i bin hapen se pis mo lav blong God i bin kambak bak-egen long medel blong ol pipol ia; mo oli bin stadi ol skripja mo oli nomo bin lisen long ol toktok blong rabis man ia.

24 Mo i bin hapen se ol man blong Nifae i bin plan long plante wei blong tekembak mo putumbak ol man blong Leman long save blong trutok; be evri samting ia i bin blong nating, from oli bin harem gud blong mekem faet mo mekem blad i ron, mo oli bin gat wan fasin

blong no laekem man we i no save en, long mifala ol brata blong olgeta. Mo oli bin lukaot-em tru long paoa blong ol tul blong faet blong olgeta, blong smasem gud mifala oltaem.

25 From samting ia ol pipol blong Nifae i bin mekem strong ol haos blong olgeta, agensem ol laen blong Leman, wetem ol tul blong faet blong olgeta, mo wetem evri paoa blong olgeta, oli bin putum tras blong olgeta long God mo ston blong seven olgeta; from samting ia, oli bin gohed kasem taem ia blong winim ol enemi blong olgeta.

26 Mo i bin hapen se mi, Jekob, i bin stat blong kam olfala; mo histri blong pipol ia we oli bin kipim long ol narafala buk blong Nifae; from samting ia, mi finisim histri ia, mi talemaot se mi bin raet folem gudfala save blong mi, long taem mi talem se taem i bin pas wetem mifala; mo tu laef blong mifala i bin pas olsem se mifala i stap drim. Mifala i stap mifala nomo, mo wan pipol we i tru, mo i no gat ples blong stap long hem; oli bin sakemaot mifala long Jerusalem, mifala i bin bon long hadtaem, long wan ples we i no gat man long hem, mo ol brata blong mifala i no laekem mifala, samting ia i bin mekem ol faet mo ol rao i hapen; from samting ia, mifala i bin sore tumas long ol dei blong mifala.

27 Mo mi, Jekob, mi bin luk se mi mas go daon long gref blong mi i no longtaem; from samting ia, mi bin talem long boe blong mi Inos: Tekem ol buk ia. Mo

mi bin talem hem evri samting we brata blong mi, Nifae, i bin talemaot long mi, mo hem i bin promes blong holem ol komanmen. Mo mi stop blong raet long ol buk ia, we raeting we mi bin

raet i smol nomo; mo long man we i ridim ol samting ia mi talem gudbae, mi hop se plante long ol brata blong mi bae i ridim ol toktok blong mi. Ol brata, God i stap wetem yufala.

## BUK BLONG INOS

*Inos i prea strong tumas mo i kam klin aot long ol sin blong hem—Voes blong Lod i kam long tingting blong hem, we i promes se ol man blong Lemana bae i kasem fasin blong sevem man long wan dei long fiuja—Ol man blong Nifae i bin lukaotem blong tekembak ol man blong Lemana—Inos i glad long Ridima blong hem. Raonabaot 420 yia bifo Kraes i bon.*

**L**UK, i bin hapen se mi, Inos, mi save se papa blong mi i bin wan stret man—from hem i bin tijim mi long lanwis blong hem, mo tu long ol fasin blong lukaotem gud mo givim advaes blong Lod—mo mi blesem blong God from samting ia—

2 Mo bae mi talem long yufala long saed blong traehad we mi bin gat long fored blong God, bifo mi bin kam klin aot long ol sin blong mi.

3 Luk, mi bin go blong lukaotem ol anamol long ol bus; mo ol toktok we mi bin harem plante taem papa blong mi i toktok long saed blong laef we i no save finis, mo glad blong ol sent, i bin go daon dip long hat blong mi.

4 Mo sol blong mi i bin hanggri; mo mi bin nildaon long fored blong Man we i bin mekem mi, mo mi bin prea long hem wetem wan strong-fala prea mo bin askem hem strong from sol blong miwan; mo long fuldei mi bin prea long hem; yes, mo taem we naet i bin kam mi bin stap blong leftemap voes blong mi laod mekem se i bin kasem ol heven.

5 Mo wan voes i bin kam long mi, i talem se: Inos, mi mi fogivim ol sin blong yu, mo bae mi blesem yu.

6 Mo mi, Inos, mi bin save we God i no save giaman; from samting ia, hem i bin tekemaot ol rong blong mi.

7 Mo mi bin talem se: Lod, yu mekem samting ia olsem wanem?

8 Mo hem i bin talem long mi se: From fet blong yu long Kraes, we yu yu neva bin harem o lukim hem. Mo plante yia bae i pas i gowe bifo hem i soemaot hemwan long bodi blong mit mo bun; from samting ia, go stat, fet blong yu i bin mekem yu klin.

9 Nao, i bin hapen se taem we

mi bin harem ol toktok ia, mi bin stat blong gat wan tingting we mi wantem wan gudfala laef blong ol brata blong mi, ol man blong Nifae; from samting ia, mi bin poremaot ful sol blong mi long God from olgeta.

10 Mo taem we, olsem ia nao, mi bin stap traehad long spirit, luk, voes blong Lod i bin kam long tingting blong mi bakegen, i talem se: Bae mi visitim ol brata blong yu folem ol had wok blong olgeta oltaem blong holem ol komanmen blong mi. Mi bin givim long olgeta graon ia, mo hem i wan tabu graon; mo bae mi no panisim graon ia hemia nomo sapos i no from stamba tingting ia blong rabis fasin; from samting ia, bae mi visitim ol brata blong yu folem wanem mi bin talem; mo ol fasin blong brekem loa, bae mi mekem se i foldaon wetem sore long ol hed blong olgeta bakegen.

11 Mo afta mi, Inos, mi bin harem ol toktok ia, fet blong mi i bin stat blong kam strong long Lod; mo mi bin prea long hem wetem plante longfala hadwok from ol brata blong mi, ol man blong Leman.

12 Mo i bin hapen se afta we mi bin prea mo bin wok had wetem fasin blong wok had oltaem, Lod i bin talem long mi: Bae mi givim long yu olsem we yu yu wantem, from fet blong yu.

13 Mo nao, luk, hemia i bin samting we mi bin wantem long hem—se sapos i olsem, we ol

pipol blong mi, ol man blong Nifae, bae i foldaon long fasin blong brekem loa, mo tru long eni wei oli ded, mo, ol man blong Leman bae i no ded, se Lod God bae i sevem wan histri blong ol pipol blong mi, ol man blong Nifae; sapos samting ia i mas hapen tru long paoa blong tabu han blong hem, blong mekem se i save kamaot long wan dei long fiuja long ol man blong Leman, blong, maet, oli save tekem olgeta long fasin blong sevem man—

14 From long taem ia ol hadwok blong mifala oli blong nating nomo blong karem bak olgeta i kam long tru fet. Mo oli bin mekem wan promes long kros blong olgeta se, sapos i save hapen, bae oli smasem ol histri blong mifala mo mifala, mo tu evri kastom blong ol bubu blong mifala.

15 From samting ia, from mi bin save se Lod God i save sevem ol histri blong mifala, mi bin gohed blong prea long hem, from hem i bin talem long mi se: Eni samting we bae yu askem wetem fet, bilivim se bae yu kasem long nem blong Kraes, bae yu kasem samting ia.

16 Mo mi bin gat fet, mo mi bin prea long God blong bae hem i sevem ol histri; mo hem i bin mekem wan kavenan wetem mi se bae hem i karem olgeta i kamaot long ol man blong Leman long taem we hem i jusum.

17 Mo mi, Inos, mi bin save se bae i hapen folem kavenan we hem i bin mekem; from

samting ia, sol blong mi i bin stop blong wari.

18 Mo Lod i bin talem long mi: Ol bubu blong yu tu i bin askem long mi samting ia; mo bae mi mekem samting ia long olgeta folem fet blong olgeta; from fet blong olgeta i bin olsem blong yu.

19 Mo nao i hapen se mi, Inos, mi bin go aot long medel blong ol pipol blong Nifae, mi bin talemaot ol profesi blong ol samting we bae i kam mo talem testemoni long ol samting we mi bin harem mo bin lukim.

20 Mo mi talemaot se ol pipol blong Nifae i bin lukaotem gud oltaem blong karembak ol man blong Lemana i kam long tru fet blong God. Be ol wok blong mifala i blong nating nomo; fasin ia blong olgeta blong no laekem ol man i bin strong, mo ol rabis fasin blong olgeta i bin lidim olgeta, mekem se oli bin kam wael, mo prapa wael, mo wan pipol we i laekem blong mekem blad i ron, oli bin fulap wetem fasin blong wosipim ol aedol mo oli bin doti; oli bin kakae ol anamol we oli kakae ol narafala anamol; oli bin stap insaed long ol tenet, mo oli wokbaot olbaot long ples we i no gat man long hem, wetem wan smolfala skin blong anamol we i raonem wes blong olgeta, mo oli bin sevem ol hed blong olgeta; mo oli bin gud tumas long bonara, mo long huknaef, mo long akis. Mo plante long olgeta i no bin kakae eni samting, be mit nomo we i no tan; mo oli bin

gohed oltaem blong lukaotem mifala blong kilim ded mifala.

21 Mo i bin hapen se ol pipol blong Nifae i bin wok long graon, mo oli resemap evri kaen sid, mo blong ol frut, mo ol grup blong eni kaen anamol we i stap tugeta, mo ol grup blong ol kaen buluk blong evri kaen, mo ol nanigot, mo ol wael nanigot, mo tu plante hos.

22 Mo i bin gat bigfala namba blong ol profet long medel blong mifala. Mo ol pipol i bin wan pipol we i stronghed, mo oli slo blong andastanem.

23 Mo i no bin gat eni samting, be ol rabis hadtaem nomo, oli bin prij mo profesae long saed blong ol faet, mo ol rao, mo ol foldaon, mo oli gohed blong mekem se oli tingbaot ded, mo taem blong taem we i no save finis, mo ol jajmen mo paoa blong God, mo evri samting ia—oli gohed blong mekem olgeta i gat respek long Lod oltaem. Mi se i no bin gat eni samting we i sot long ol samting ia, mo toktok we i klia tumas, we bae i blokem olgeta blong go daon kwik long ded. Mo long fasin ia nao mi raet long saed blong olgeta.

24 Mo mi bin luk ol faet bitwin ol man blong Nifae mo ol man blong Lemana, long rod blong ol dei blong mi.

25 Mo i bin hapen se mi bin stat blong kam olfala, mo wan hundred mo seventi mo naen yia i bin pas long taem we papa blong mifala Lihae i bin aot long Jerusalem.

26 Mo mi bin luk se i no

longtaem we mi mas go daon long gref blong mi, mo paoa blong God i bin kam long mi mekem se mi mas prij mo talemaot profesi long ol pipol ia, mo talemaot trutok folem trutok we i stap long Kraes. Mo mi bin talemaot hemia long evri dei blong mi, mo mi bin glad long hem mo i bitim evri nara-fala samting long wol.

27 Mo klosap mi go long ples blong spel blong mi, we i wetem

Ridima blong mi; from mi save se tru long hem bae mi spel. Mo mi glad long dei we bodi blong mit mo bun blong mi bae i kam wan niu bodi we i nomo save ded, mo bae i stanap long fored blong hem; afta bae mi luk fes blong hem wetem glad, mo bae hem i talem long mi: Kam long mi, yu we mi bin blesem yu, i gat wan ples i rere blong yu long ol kingdom blong Papa blong mi. Amen.

## BUK BLONG JEROM

*Ol man blong Nifae i holem loa blong Moses, oli lukluk fored long taem we Kraes bae i kam, mo oli kam antap gud long graon— Plante profet i wok blong holem ol pipol long rod blong trutok. Raonabaot 399–361 yia bifo Kraes i bon.*

**N**AO luk, mi, Jerom, mi raetem smol toktok folem komanmen blong papa blong mi, Inos, blong mekem se oli save kipim laen blong famle blong mifala.

2 Mo from ol buk ia i smol, mo from ol samting ia oli bin raetem wetem stamba tingting blong helpem ol brata blong mifala ol man blong Lemana, from samting ia, i mas nid i stap we mi raet smol, be bae mi no raetem ol samting blong taem we mi stap profesae long hem, o ol revelesen blong mi. From wanem bae mi save raet moa bitim ol

samting we ol bubu blong mi i bin raetem? From i no tru se oli bin talemaot plan blong fasin blong sevem man? Mi talem long yufala se, yes; mo hemia i inaf long mi.

3 Luk, i gat nid se plante i mas hapen long medel blong ol pipol ia, from ol hat blong olgeta i strong, mo ol sorae blong olgeta i fas, mo ol tingting blong olgeta i blaen, mo oli stronghed; be, God i gat bigfala sore long olgeta, mo hem i no bin kasem naoia, brumaot olgeta long fes blong graon.

4 Mo i gat plante long medel blong yumi we i kasem plante revelesen, from i no evriwan i stronghed. Mo evriwan we oli no stronghed mo oli gat fet, oli gud fren wetem Tabu Spirit, we i soemaot long ol pikinini blong ol man folem fet blong olgeta.

5 Mo nao, luk, tu handred yia

i bin pas, mo ol pipol blong Nifae i bin kam strong long graon. Oli bin holem loa blong Moses mo sapat dei we i tabu long Lod. Mo oli no talem ol rabis toktok; mo oli no tok agensem Lod. Mo ol loa blong graon i bin strong tumas.

6 Mo oli bin seraot i go olbaot long fulap ples long fes blong graon, mo ol man blong Leman tu. Mo olgeta ia i moa plante tumas bitim ol man blong Nifae; mo oli bin laekem blong kilim ol man i ded mo dring blad blong ol anamol.

7 Mo i bin hapen se oli bin kam plante taem agensem mifala, ol man blong Nifae, blong faet. Be ol king mo ol lida blong mifala oli bin ol strong man long fet blong Lod; mo oli bin tijim ol pipol ol fasin blong Lod; from samting ia, mifala i bin stanap strong agensem ol man blong Leman mo bin fossem olgeta i go aot long graon blong mifala, mo bin stat blong mekem strong ol bigtaon blong mifala, o eni ples blong mifala we i kam long ol papa.

8 Mo mifala i kam plante tumas, mo bin go olbaot long fes blong graon, mo i bin kam rij tumas long gol, mo long silva, mo long ol gudgudfala samting, mo long flas fasin blong wok long wud, long ol haos, mo long ol masin, mo tu long ol samting wetem aean mo kopa, mo bras mo stil, i mekem ol kaen tul blong evri kaen blong wok long graon, mo ol tul blong faet—yes, ol ara we oli sap, mo basket blong ara, mo dat, mo

javelin, mo evri samting blong rere blong faet.

9 Mo olsem ia nao mifala i bin rere blong mitim ol man blong Leman, oli no bin kam antap gud agensem mifala. Be Lod i bin pruvum ol toktok blong hem, we hem i bin talemaot long ol bubu blong mifala, i talem se: I sem mak olsem we bae yufala i stap holem ol komanmen blong mi, bae yufala i kam antap gud long graon ia.

10 Mo i bin hapen se ol profet blong Lod i bin wonem ol pipol blong Nifae, folem toktok blong God, se sapos oli no holem ol komanmen, be bae oli foldaon long fasin blong brekem loa, bae i smasem gud olgeta aot long fes blong graon.

11 From samting ia, ol profet, mo ol pris, mo ol tija, i bin wok had oltaem, oli bin talem strong long olgeta wetem evri fasin blong save go tru long ol hadtaem wetem longfala tingting, ol pipol blong wok had oltaem; oli tijim loa blong Moses, mo plan from wanem God i bin givim loa ia; blong winim tingting blong olgeta blong lukluk fored long Mesaea, mo biliv long hem blong kam olsem se hem i bin kam finis. Mo long fasin ia oli bin tijim olgeta.

12 Mo i bin hapen se from oli bin mekem samting ia oli bin blokem olgeta blong oli no save ded long fes blong graon; from oli bin stikim ol hat blong olgeta wetem trutok, oli gohed blong mekem olgeta blong sakem sin.

13 Mo i bin hapen se tu hundred mo teti mo eit yia i bin

pas i gowe—afta long ol fasin blong ol faet, mo ol rao, mo plante fasin blong pulaot, blong plante spes blong taem ia.

14 Mo mi, Jerom, mi no raet moa, from ol buk ia i smol. Be luk, ol brata blong mi, yufala i save go long ol narafala buk blong Nifae; from luk, long olgeta, ol histri blong ol faet

blong mifala i stap, folem ol raeting blong ol king, o olgeta we oli bin mekem se oli raetem.

15 Mo mi givim ol buk ia long ol han blong boe blong mi Omnae, blong mekem se hem i save kipim olgeta folem ol komanmen blong ol bubu blong mi.

## BUK BLONG OMNAE

*Omnae, Amaron, Kemis, Abinadam, mo Amalekae, olgeta long taem blong olgeta, i kipim ol histri—Mosaea i faenem ol pipol blong Sarahemla, we i bin kam long Jerusalem long ol dei blong Sedekaea—Mosaea i kam king ova long olgeta—Ol laen blong Myulek long Sarahemla i bin faenem Koriantuma, laswan long ol laen blong Jared—King Benjamin i kam king afta Mosaea—Ol man i nid blong givim ol sol blong olgeta olsem wan ofring long Kraes. Raonabaot 323–130 yia bifo Kraes i bon.*

**L**UK, i bin hapen se mi, Omnae, from mi bin kasem komanmen long papa blong mi, Jerom, we mi mas raet smol long ol buk ia, blong sevem ol laen blong famle blong mifala—

2 From samting ia, long ol dei blong mi, mi wantem se yufala i save se mi bin faet plante wetem naef blong faet blong sevem ol pipol blong mi, ol man blong Nifae, aot long foldaon long ol han blong ol enemi

blong olgeta, ol man blong Leman. Be luk, mi tu, mi mi wan rabis man, mo mi no bin holem ol loa mo ol komanmen blong Lod olsem we mi sud bin mekem.

3 Mo i bin hapen se tu handred mo seventi mo sikis yia i bin pas i gowe, mo mifala i bin gat plante taem blong pis; mo mifala i bin gat plante taem blong rabis faet mo blad i ron. Yes, mo blong endem, tu handred mo eiti mo tu yia i bin pas i gowe, mo mi bin kipim ol buk ia folem ol komanmen blong ol bubu blong mi; mo mi bin pasem olgeta i go long boe blong mi Amaron. Mo mi stop blong raet.

4 Mo nao, mi Amaron, mi raetem wanem samting we mi raetem, we oli no plante tumas, long buk blong papa blong mi.

5 Luk, i bin hapen se tri handred mo twenti yia i bin pas i gowe, mo moa rabis pat ia blong ol man blong Nifae oli bin kilim olgeta i ded.

6 From bae Lod i no letem se,

afta we hem i bin lidim olgeta i kamaot long graon blong Jerusalem mo i bin holem mo bin sevem olgeta blong oli no foldaon i go long ol han blong ol enemi blong olgeta, yes, bae hem i no letem se ol toktok i no save gat pruf, we hem i bin talem long ol bubu blong mifala, i talem se: I semak olsem se bae yufala i no holem ol komanmen blong mi, bae yufala i no kam antap gud long graon.

7 From samting ia, Lod i bin visitim olgeta wetem bigfala jajmen; be, hem i bin sevem olgeta we i stret blong mekem se bae oli no ded, be hem i bin tekemaot olgeta long ol han blong ol enemi blong olgeta.

8 Mo i bin hapen se mi bin pasem ol buk ia i go long brata blong mi Kemis.

9 Nao mi, Kemis, mi raetem wanem smol samting we mi stap reatem, long sem buk wetem ol brata blong mi; from luk, mi bin luk ol las samting we hem i bin raetem, we hem i bin raetem wetem han blong hem nomo; mo hem i bin raetem samting ia long dei we hem i bin givim ol buk ia long mi. Mo long fasin ia nao mifala i kipim ol histri, from samting ia i folem ol komanmen blong ol bubu blong mifala. Mo mi mekem wan en.

10 Luk, mi Abinadom, mi mi boe blong Kemis. Luk, i bin hapen se mi bin luk plante faet mo rao bitwin ol pipol blong mi, ol man blong Nifae, mo ol man blong Leman; mo mi, wetem naef blong faet blong mi, i bin

tekemaot laef blong plante long ol man blong Leman blong lukaotem gud ol brata blong mi.

11 Mo luk, histri blong pipol ia oli bin raetem long ol buk we ol king i holem, folem ol jeneresen; mo mi no save wan revelesen be hemia nomo we oli bin raetem, mo tu profesi; from samting ia, ol samting we i inaf mi mi raetem. Mo mi mekem wan en.

12 Luk, mi mi Amalekae, boe blong Abinadom. Luk, bae mi toktok long yufala smol long saed blong Mosaea, we i bin kam king long graon blong Sarahemla; from luk, from Lod i bin givim woning long hem se hem i mas aot long graon blong Nifae, mo evriwan we oli bin lisen long voes blong Lod, bae oli ronwe aot long graon wetem hem, i go long ples we i no gat man long hem—

13 Mo i bin hapen se hem i bin mekem folem samting ia we Lod i bin talem long hem. Mo oli bin aot long graon i go long ples we i no gat man long hem, olgeta evriwan we bae oli lisen long voes blong Lod; mo plante prijing mo profesi i bin lidim olgeta. Mo oli bin kasem tijing blong toktok blong God oltaem; mo paoa blong han blong hem i bin lidim olgeta, tru long ples we i no gat man long hem kasem taem we oli bin kamdaon long graon ia we oli bin singaotem graon blong Sarahemla.

14 Mo oli bin faenem wan pipol, we oli bin singaotem olgeta ol pipol blong Sarahemla. Nao, i bin gat bigfala glad long medel blong ol pipol blong



Sarahemla; mo tu Sarahemla i bin hapi tumas, from Lod i bin sendem ol pipol blong Mosaea wetem ol buk we oli bin mekem wetem bras we i bin gat histri blong ol Jiu.

15 Luk, i bin hapen se Mosaea i bin faenemaot se ol pipol blong Sarahemla i bin kamaot long Jerusalem long taem we Sedekaea, king blong Juda, oli bin tekem hem prisena long Babilon.

16 Mo oli bin wokbaot long ples we i no gat man long hem, mo han blong Lod i bin tekem olgeta i krosem ol bigfala wota i go long graon we Mosaea i bin faenem olgeta; mo oli bin stap long ples ia stat long taem ia i go.

17 Mo long taem we Mosaea i bin faenem olgeta, oli bin kam plante tumas. Be, oli bin gat plante faet mo rabis rao, mo bin foldaon from naef blong faet long wan wan taem; mo lanwis blong olgeta i bin kam nogud; mo oli no bin karem eni histri wetem olgeta; mo oli bin tanem baksaed blong olgeta long man we i Krieta blong olgeta; mo Mosaea, mo tu ol pipol blong Mosaea, i no save andastanem olgeta.

18 Be i bin hapen se Mosaea i bin mekem se bae oli mas tijim olgeta long lanwis blong hem. Mo i bin hapen se afta we oli bin tijim olgeta long lanwis blong Mosaea, Sarahemla i bin talemaot wan laen blong famle blong ol bubu blong hem, folem memori blong hem; mo oli bin raetem ol samting ia, be i no long ol buk ia.

19 Mo i bin hapen se ol pipol blong Sarahemla, mo blong Mosaea, i bin kam tugeta; mo oli bin jusum Mosaea blong kam king blong olgeta.

20 Mo i bin hapen se long ol dei blong Mosaea, oli bin karem wan bigfala ston i kam long hem wetem ol raeting long hem; mo hem i bin talemaot mining blong ol raeting ia tru long presen mo paa blong God.

21 Mo oli bin givim wan histri blong wan man we nem blong hem i Koriantuma mo ol pipol blong hem we oli bin ded. Mo ol pipol blong Sarahemla i bin faenem Koriantuma; mo hem i bin stap wetem olgeta blong naen manis blong mun.

22 Ol raeting ia i bin tokbaot tu smol long saed blong ol bubu blong hem. Mo ol fas bubu blong hem i bin kamaot long taoa, long taem we Lod i bin miksimap lanwis blong ol pipol; mo rabis panis blong Lod i bin foldaon long olgeta folem ol jajmen blong hem, we oli stret; mo ol bun blong olgeta i ledaon olbaot long graon blong not.

23 Luk, mi, Amalekae, mi bin bon long ol dei blong Mosaea; mo mi bin stap laef blong luk ded blong hem; mo Benjamin, boe blong hem, i rul long ples blong hem.

24 Mo luk, mi bin luk, long ol dei blong King Benjamin, wan rabis faet mo plante blad i ron bitwin ol man blong Nifae mo ol man blong Leman. Be luk, ol man blong Nifae i bin kasem moa janis bitim olgeta. Inaf we i mekem se King Benjamin i bin

ronemaot olgeta long graon blong Sarahemla.

25 Mo i bin hapen se mi bin stat blong kam olfala, mo, from mi no gat pikinini, mo mi save se King Benjamin i wan stret man long fored blong Lod, from samting ia, bae mi pasem ol buk ia long hem, mo mi askem strong long ol man blong kam long God, Tabu Wan blong Isrel, mo biliv long profesi, mo long ol revelesen, mo long ol tijing blong ol enjel, mo long presen blong toktok long plante lanwis, mo long presen blong talem mining blong ol lanwis, mo long evri samting we oli gud; from i no gat wan samting we i gud hemia nomo sapos i no kam long Lod: mo evri samting we i nogud i kam long devel.

26 Mo nao, ol brata blong mi we mi lavem tumas, mi wantem se bae yufala i kam long Kraes, we i Tabu Wan blong Isrel, mo tekem pat long fasin blong sevem man blong hem, mo paoa blong hem we i blong pemaot man. Yes, kam long hem, mo givim ol ful sol blong yufala olsem wan ofring long hem, mo gohed blong livim kakae mo long prea, mo stap strong kasem en; mo olsem we Lod i stap laef bae yufala i sev.

27 Mo nao bae mi toktok smol long saed blong wan namba we i bin go antap long ples we i no gat man long hem blong gobak long graon blong Nifae; from i bin gat wan bigfala namba we i bin wantem blong stap long graon blong olgeta we i kam long ol papa blong olgeta.

28 From samting ia, oli bin go antap long ples we i no gat man long hem. Mo from lida blong olgeta i bin wan strong mo bigfala man, mo wan stronghed, from samting ia hem i bin statem wan rao long medel blong olgeta; mo olgeta evriwan i bin ded, be fifti nomo i bin stap long ples we i no gat man long hem mo oli bin go bak bakegen long graon blong Sarahemla.

29 Mo i bin hapen se oli bin tekem tu wan bigfala namba blong ol narafala pipol, mo oli bin tekem wokbaot blong olgeta i gobak long ples we i no gat man long hem.

30 Mo mi, Amalekae, mi bin gat wan brata we i bin go wetem olgeta tu; mo mi no bin harem wan toktok long olgeta stat long taem ia kasem naoia. Mo mi mi stap rere blong ledaon long gref blong mi; mo ol buk ia i fulap. Mo mi mekem wan en blong ol toktok blong mi.

## OL TOKTOK BLONG MOMON

*Momon i mekem ol bigfala buk blong Nifae i kam smol—Hem i putum ol smolfala buk wetem ol*

*narafala buk—King Benjamin i stanemap pis long graon. Raonabaot 385 yia afta Kraes i bon.*

**M**O nao mi, Momon, mi rere blong pasem histri we mi bin stap raetem i go long han blong boe blong mi Moronae, luk mi bin luk klosap evri pipol blong mi i ded, ol man blong Nifae.

2 Mo hem i plante handred yia afta Kraes i bin kam we mi pasem ol histri ia i go long ol han blong boe blong mi; mo mi ting se bae hem i luk taem we evri man blong pipol blong mi i ded. Be bae God i letem se hem i save stap laef long taem ia, blong mekem se hem i save raet smol long saed blong olgeta mo smol long saed blong Kraes, blong maet wan dei hem i save helpem olgeta.

3 Mo nao, mi toktok smol long saed blong wanem we mi bin raetem; from afta mi bin mekem ol buk blong Nifae i kam smol, go kasem rul blong king Benjamin, we Amalekae i bin tokbaot, mi bin stadi long ol histri we oli bin givim long mi, mo mi bin faenem ol buk ia we i holem smol histri ia blong ol profet, stat long Jakob i go daon long rul blong king Benjamin ia, mo tu plante long ol toktok blong Nifae.

4 Mo ol samting we i stap long ol buk ia mi laekem, from ol profesi blong taem we Kraes bae i kam; mo ol bubu blong mi i save se plante long olgeta i bin hapen finis; yes, mo mi save tu se evri samting we oli bin profesae long saed blong mifala i kam kasem dei ia i bin hapen, mo evriwan we i bitim dei ia bae i mas hapen—

5 From samting ia, mi bin jusum ol samting ia, blong finisim histri blong mi long olgeta, we haf blong histri blong mi we i stap bae mi tekem long ol buk blong Nifae; mo mi no save raetem handred pat blong ol samting blong ol pipol blong mi.

6 Be luk, bae mi tekem ol buk ia, we oli holem ol profesi mo ol revelesen, mo putum olgeta wetem haf we i stap blong histri blong mi, from oli gudfala tumas long mi; mo mi save se bae oli gud tumas long ol brata blong mi.

7 Mo mi mekem samting ia blong wan waes stamba tingting; from olsem ia nao Spirit i talem long mi, folem fasin blong Spirit blong Lod we i stap long mi. Mo nao, mi no save evri samting; be Lod i save evri samting we bae i kam; from samting ia, hem i wok tru long mi blong mekem samting folem wanem hem i wantem.

8 Mo prea blong mi long God i long saed blong ol brata blong mi, blong mekem se oli save kambak wan taem bakegen blong save long saed blong God, yes, fasin blong pemaot blong Kraes; blong mekem se oli save kambak bakegen, wan pipol we evriwan i laekem.

9 Mo nao, mi, Momon, mi gohed blong finisim histri blong mi, we mi tekem long ol buk blong Nifae; mo mi mekem samting ia folem save mo fasin ia blong andastanem ol samting we God i bin givim long mi.

10 From samting ia, i bin

hapen se afta we Amalekae i bin pasem ol buk ia i go long han blong king Benjamin, hem i bin tekem olgeta mo bin putum olgeta wetem ol narafala buk, we i bin holem ol histri we ol king i bin pasem daon, long wan jeneresen i go long narafala jeneresen kasem ol dei blong king Benjamin.

11 Mo oli bin pasem olgeta daon long king Benjamin, long wan jeneresen i go long narafala jeneresen kasem taem we oli bin foldaon long han blong mi. Mo mi, Momon, mi prea long God blong hem i save sevem olgeta stat long taem ia i go. Mo mi save se bae oli sef; from we ol bigfala samting oli bin raetem long olgeta, tru long ol samting ia ol pipol blong mi mo ol brata blong olgeta bae i kasem jajem from, long bigfala mo las dei, folem toktok blong God we oli bin raetem.

12 Mo nao, long saed blong king Benjamin ia—hem i bin gat samfala rao long medel blong ol pipol blong hem.

13 Mo i bin hapen tu se ol ami blong ol man blong Leman i bin kam daon aot long graon blong Nifae, blong faet agensem ol pipol blong hem. Be luk, king Benjamin i bin mekem ol ami blong hem i kam tugeta mo hem i bin stanap agensem olgeta; mo hem i bin faet wetem paoa blong han blong hemwan, wetem naef blong faet blong Leban.

14 Mo wetem paoa blong Lod oli bin faet agensem ol enemi blong olgeta, kasem taem we oli bin kilim ded plante taosen

long ol man blong Leman. Mo i bin hapen se oli bin faet agensem ol man blong Leman kasem taem we oli bin ronemaot olgeta long evri graon blong olgeta we i kam long ol papa blong olgeta.

15 Mo i bin hapen se afta i bin gat ol giaman Kraes, mo oli bin mekem olgeta blong stopem toktok blong olgeta, mo oli bin kasem panis folem fasin blong brekem loa, blong olgeta;

16 Mo afta we i bin gat ol giaman profet, mo ol giaman man blong prij mo ol tija long medel blong ol pipol, mo olgeta evriwan ia oli bin panisim olgeta folem ol fasin blong brekem loa, blong olgeta; mo afta i bin gat plante rao mo plante grup we i bin pulaot i go long ol man blong Leman, luk, i hapen se king Benjamin, wetem help blong ol tabu profet we i bin stap wetem ol pipol blong hem—

17 From luk, king Benjamin i bin wan tabu man, mo hem i bin rulum ol pipol blong hem wetem stret fasin; mo i bin gat plante tabu man long graon, mo oli bin talemaot toktok blong God wetem paoa mo wetem raet; mo oli bin yusum plante strong toktok, from ol pipol i stronghed—

18 From samting ia, wetem help blong olgeta ia, king Benjamin, taem we hem i bin wok wetem ful paoa blong bodi blong hem mo paoa blong ful sol blong hem, mo tu ol profet, i bin stanemap pis long graon wan taem bakegen.

# BUK BLONG MOSAEA

## JAPTA 1

*King Benjamin i tijim long ol boe blong hem lanwis mo ol profesi blong ol olfala bubu blong olgeta — Bilif long God blong olgeta mo fasin blong stap laef, i bin sev from ol histori we oli bin kipim long ol buk—Oli jusum Mosaea blong kam king mo oli talem long hem blong lukaotem ol histori mo sam narafala samting. Raonabaot 130–124 yia bifo Kraes i bon.*

**M**O nao i nomo bin gat rao long ful graon blong Sarahemla, long medel blong evri pipol we oli blong king Benjamin, mekem se king Benjamin i bin gohed blong gat pis long ol dei blong laef blong hem we i stap.

2 Mo i bin hapen se hem i bin gat tri boe; mo hem i bin singaotem ol nem blong olgeta Mosaea, mo Heloram, mo Hileman. Mo hem i bin mekem se oli mas tijim olgeta long evri lanwis blong ol olfala bubu blong hem, mekem se tru long samting ia bae oli save kam ol man blong haremsave ol samting; blong mekem se oli save kasem ol samting long saed blong ol profesi we oli bin kamaot long ol maot blong ol olfala bubu blong olgeta, we i bin kam long olgeta tru long han blong Lod.

3 Mo tu hem i bin tijim olgeta long saed blong ol histori we oli bin raetem long ol buk we oli bin mekem wetem bras, mo i

talem se: Ol boe blong mi, mi wantem se bae yufala i tingbaot we sapos yumi no gat ol buk ia, we oli holem ol histori mo ol komanmen ia, bae yumi bin safa from bae yumi no save wan samting, go kasem long taem ia, from yumi no save ol sikret blong God.

4 From i no save hapen se papa blong yumi, Lihae, i bin save tingbaot evri samting ia, blong hem i save tijim olgeta long ol pikinini blong hem, sapos i no bin gat help blong ol buk ia; from oli bin lanem hem long lanwis blong ol man Ijip taswe hem i save ridim ol raeting ia mo tijim olgeta long ol pikinini blong hem, mekem se tru long samting ia, oli save tijim olgeta samting ia long ol pikinini blong olgeta. Mo taem oli mekem olsem, oli mekem ol komanmen blong God i hapen, go kam kasem taem naoia.

5 Mi talem long yufala, ol boe blong mi, sapos yumi no bin gat ol samting ia, we han blong God i bin holem mo sevem, mekem se yumi save ridim mo save long ol sikret blong hem. Mo gat ol komanmen blong hem oltaem long fored blong ol ae blong yumi, mekem se ol olfala bubu blong yumi bae oli bin kam slak from we oli bin lusum bilif. Mo bae yumi bin olsem ol brata blong yumi, ol man blong Leman, we oli no save wan samting long saed blong ol samting ia, o tu oli no bilivim olgeta taem we oli tijim

olgeta ol samting ia, from ol kastom blong ol olfala bubu blong olgeta, we oli no stret.

6 O ol boe blong mi, mi wantem se bae yufala i tingbaot se ol toktok ia i tru, mo tu ol histri ia i tru. Mo luk tu, ol buk blong Nifae we oli holem ol histri mo ol toktok blong ol olfala bubu blong yumi stat long taem we oli bin lego Jerusalem kasem naoia, mo oli tru, mo yumi save kasem se oli tru from yumi gat olgeta long fored blong ol ae blong yumi.

7 Mo nao, ol boe blong mi, mi wantem yufala blong tingbaot blong stadi gud olgeta, blong mekem se yufala i save kasem gud, taem we yufala i stadi olgeta. Mo mi wantem se yufala i holem ol komanmen blong God, mekem se yufala i save kam antap gud long graon folem ol promes we Lod i bin mekem long ol olfala bubu blong yumi.

8 Mo king Benjamin i tijim olgeta boe blong hem long plante moa samting we oli no bin raetem long buk ia.

9 Mo i bin hapen se afta we king Benjamin i bin stop blong tijim ol boe blong hem, se hem i bin kam olfala mo hem i bin luk se klosap bae hem i mas go long rod ia blong ded blong wol; Taswe, hem i bin ting se i gat nid blong hem i givim kingdom long wan long ol boe blong hem.

10 Taswe, hem i bin mekem Mosaea i kam long fored blong hem; mo hemia ol toktok we hem i bin talem long hem, i se:

Boe blong mi, mi wantem se bae yu mekem wan toktok we i talemaot long pablik, truaot long ful graon ia long medel blong evri pipol ia, o ol pipol blong Sarahemla mo ol pipol blong Mosaea we oli stap long graon, se tru long toktok ia bae oli save kam tugeta; from long tumora bae mi talemaot long olgeta ia, ol pipol blong mi, wetem maot blong mi se yu yu wan king mo wan man blong rul ova long pipol ia, we Lod, God blong yumi i bin givim long yumi.

11 Mo antap long hem, bae mi givim long pipol ia wan nem blong mekem se tru long nem ia, bae oli save defren long evri pipol ia we Lod God i bin karemaot olgeta long graon blong Jerusalem; mo samting ia mi mekem from oli bin wan pipol we oli strong blong holem ol komanmen blong Lod.

12 Mo mi givim long olgeta wan nem we bae i neva lus, hemia nomo, sapos oli brekem loa.

13 Yes, mo antap long samting ia mi talem long yu, se sapos ol pipol ia we Lod i laekem olgeta tumas, i foldaon long saed blong brekem loa, mo kam wan nogud pipol mo kam wan pipol we i mekem adaltri, se bae Lod i lego olgeta, mekem se oli kam slak olsem ol brata blong olgeta; mo bae hem i nomo sevem olgeta tru long paoa blong hem we i gudfala mo we i bitim evri narafala paoa, olsem we hem i bin sevem ol olfala bubu blong yumi bifo.

14 From mi talem long yu, se

sapos hem i no bin yusum paoa blong hem blong sevem ol olfala bubu blong yumi, bae oli bin foldaon long ol han blong ol man blong Leman, mo bin harem nogud long fasin blong no laekem, blong olgeta.

15 Mo i bin hapen se afta we king Benjamin i bin stop blong talem ol toktok ia long boe blong hem, se hem i bin givim wok long hem long saed blong evri wok blong kingdom.

16 Mo antap long samting ia, hem i bin givim wok tu long hem long saed blong ol histri we oli bin raetem long ol buk we oli bin mekem wetem bras; mo tu ol buk blong Nifae; mo tu naef blong faet blong Leban, mo bol o samting ia we i poenem rod, we i bin lidim ol olfala bubu blong yumi tru long ples we i no gat man long hem, we han blong Lod i bin mekem rere mekem se tru long samting ia, i save lidim olgeta, evriwan folem fasin blong folem gud mo fasin blong wok had oltaem, we oli bin givim long hem.

17 Taswe, taem we oli no bin yusum fet, oli no bin kam antap gud, o go fored long rod blong olgeta, be oli bin pusumbak olgeta, mo oli bin kasem fasin blong no glad blong God, long olgeta; mo taswe ol hadtaem blong kasem kakae i bin nokem olgeta, mo ol tumas hadtaem, blong mekem olgeta blong tingbaot wok blong olgeta.

18 Mo nao, i bin hapen se Mosaea i bin go mo bin mekem olsem we papa blong hem i bin givim oda long hem, mo i bin

talemaot long evri pipol we oli bin stap long graon blong Sarahemla, blong mekem se oli save kam tugeta, blong go antap long tempol blong harem ol toktok we papa blong hem bae i talemaot long olgeta.

---

JAPTA 2

---

*King Benjamin i toktok long ol pipol blong hem—Hem i mekem olgeta i tingbaot fasin blong mekem stret, mo blong jajem long stret fasin, mo fasin blong gat spirit long taem blong rul blong hem—Hem i givim advaes long olgeta blong wok blong King blong Heven, we i king blong olgeta—Olgeta we oli go agensem God bae oli safe long harem nogud we i olsem wan faea we i no save ded. Raonabaot 124 yia bifo Kraes i bon.*

Mo i bin hapen se afta we Mosaea i bin mekem olsem we papa blong hem i bin givim oda long hem mo i bin mekem wan toktok i go long pablik truaot long evri graon, se ol pipol i bin kam tugeta long wan ples truaot evri ples long graon, blong oli save go antap long tempol blong harem ol toktok we bae king Benjamin i talemaot long olgeta.

2 Mo i bin gat wan bigfala namba, oli plante tumas mekem se oli no bin kaontem olgeta tu; from oli bin gru plante tumas mo oli bin kam plante long graon.

3 Mo tu oli bin tekem long ol faswan blong ol grup blong ol

anamol blong olgeta, blong oli save givim sakrifaes mo bonem ol ofring folem loa blong Moses;

4 Mo tu blong oli save talem tangkyu long Lod, God blong olgeta, we i bin lidim olgeta i aot long graon blong Jerusalem mo we i bin sevem olgeta aot long ol han blong ol enemi blong olgeta, mo bin jusum ol gudfala man blong kam olsem ol tija blong olgeta, mo tu wan gudfala man blong kam king blong olgeta we i bin stanemap pis long graon blong Sarahemla, mo we hem i bin tijim olgeta blong holem ol komanmen blong God, blong mekem se oli save hapi mo kam fulap long lav long God mo evri man.

5 Mo i bin hapen se taem we oli bin kam long tempol, oli bin stanemap ol tenet blong olgeta raonabaot, evri man folem famle blong hem, we i gat woman blong hem, mo ol boe blong hem, mo ol gel blong hem, mo ol boe blong olgeta, mo ol gel blong olgeta, stat long faswan i go daon kasem laswan, evri famle oli no stap tugeta wetem narafala wan.

6 Mo oli bin stanemap ol tenet blong olgeta raonabaot long tempol, evri man i stanemap ol tenet blong hem wetem do blong tenet i fesem tempol, blong mekem se oli save stap insaed long ol tenet blong olgeta mo harem ol toktok we king Benjamin bae i talemaot long olgeta;

7 From ol grup blong pipol i bin plante tumas mekem se king Benjamin i no bin save tijim

olgeta evriwan insaed long ol wol blong tempol. Taswe hem i bin mekem se oli stanemap wan taoa, blong mekem se ol pipol blong hem i save harem ol toktok we bae hem i talemaot long olgeta.

8 Mo i bin hapen se hem i bin stat blong toktok long ol pipol blong hem long taoa; mo olgeta evriwan i no bin save harem ol toktok blong hem from grup blong pipol i bin plante tumas; taswe hem i bin mekem se oli raetem ol toktok we hem i bin talemaot mo oli sendem i go fored long olgeta we oli no save harem voes blong hem, blong mekem se olgeta tu i save kasem ol toktok blong hem.

9 Mo hemia ol toktok we hem i bin talemaot mo i bin mekem se oli bin raetem olgeta mo hem i talem se: Ol brata blong mi, yufala evriwan we i bin kam tugeta, yufala we i save harem ol toktok blong mi we bae mi talemaot long yufala tede; from mi no bin givim oda long yufala blong kam ia blong pleiplei wetem ol toktok we bae mi talemaot, be blong yufala i lisin long mi mo openem ol sorae blong yufala blong mekem se yufala i save harem, mo openem ol hat blong yufala blong mekem se yufala i save andastanem, mo openem ol tingting blong yufala blong mekem se mi save eksplenem ol sikret blong God blong mekem se yufala i save luksave olgeta.

10 Mi no bin givim oda long yufala blong kam ia blong bae yufala i fraet long mi, o blong



bae yufala i ting se mi mi moa hae long wan man blong wol.

11 Be mi mi olsem yufala nomo, mi mi save kasem evri kaen fasin blong no strong long bodi mo tingting; be stil ol pipol ia i bin jusum mi, mo papa blong mi i bin konsekretem mi, mo han blong Lod i bin letem mi blong bae mi kam wan man blong rul mo kam wan king long pipol ia; mo Lod i bin sevem mi wetem paoa blong hem we i bitim eni narafala paoa, blong wok blong helpem yufala wetem evri strong, tingting, mo paoa we Lod i bin givim long mi.

12 Mi talem long yufala se olsem we mi bin letem mi blong spenem ol dei blong mi long wok blong yufala, go kasem taem ia, mo mi no bin lukaotem gol o silva o eni kaen blong ol rij samting long yufala;

13 Mo tu mi no bin letem se yufala i stap long ol kalabus we i stap andanit long graon, o blong letem yufala i kam slef long yufala bakagen, o blong letem yufala i kilim man i ded, o stil, o stil long taem blong faet, o mekem adaltri; o tu mi no bin letem yufala i mekem eni kaen nogud fasin, mo mi bin tijim yufala se yufala i mas holem ol komanmen blong Lod, long evri samting we hem i bin givim oda long yufala—

14 Mo tu mi, miwan, mi bin wok wetem ol han blong mi nomo blong mi save wok blong yufala, mo we yufala i no hevi wetem ol taks, mo we bae i no gat wan samting i kam long

yufala we i hevi blong karem— mo long evri samting ia we mi bin tokbaot, yufala nomo i witnesem long dei ia.

15 Be stil, ol brata blong mi, mi no bin mekem ol samting ia blong mi save tok flas, mo mi no talem ol samting ia blong mekem se mi save talem se yufala i brekem loa; be mi talem ol samting ia long yufala, blong mekem se yufala i save se mi save givim wan ansa wetem wan klia tingting long fored blong God long dei ia.

16 Luk, mi talem long yufala se from mi bin talem long yufala se mi bin spenem ol dei blong mi long wok blong yufala, mi no gat tingting blong tok flas, from mi bin mekem wok blong God nomo.

17 Mo luk, mi talem ol samting ia long yufala blong yufala i save lanem waes tingting, blong yufala i save lanem se taem we yufala i stap wok blong ol narafala man, yufala i stap mekem wok blong God blong yufala nomo.

18 Luk, yufala i bin singaotem mi king blong yufala; mo sapos mi, we yufala i singaotem king blong yufala, stap wok blong helpem yufala, ale, yufala i no sud wok blong helpem wan wan long yufala?

19 Mo luk tu, sapos mi, we yufala i singaotem king blong yufala, we i bin spenem ol dei blong hem long wok blong yufala, mo yet hem i bin stap long wok blong God, mo i no stret blong kasem tangkyu long yufala, O hamas moa yufala i

nidim blong talem tangkyu long King blong yufala long Heven!

20 Mi talem long yufala, ol brata blong mi, sapos yufala i givim evri tangkyu mo pres we ful sol blong yufala i gat paoa blong holem, long God ia we i bin mekem yufala, mo i bin holem mo sevem yufala, mo i bin mekem se bae yufala i hapi, mo i bin mekem se bae yufala i save stap long pis wan wetem narawan—

21 Mi talem long yufala se sapos yufala i mekem wok blong hem we i bin mekem yufala stat long stat, mo hem i stap sevem yufala evri dei, tru long fasin blong givim win long yufala, blong mekem se yufala i save stap laef mo muv mo mekem wanem we yufala i wantem, mo tu sapotem yufala long wan taem i go long narafala taem— Mi talem se, sapos bae yufala i wok blong hem wetem ol ful sol blong yufala, stil bae yufala i stap olsem ol wokman we i no save winim wan samting.

22 Mo luk, samting ia nomo we hem i askem long yufala hem i blong holem ol komanmen blong hem mo hem i bin promes long yufala se sapos yufala i holem ol komanmen blong hem, bae yufala i kam antap gud long graon; mo hem i neva jenisim wanem we hem i bin talem; taswe, sapos yufala i holem ol komanmen blong hem, hem i stap blesem yufala mo mekem yufala i kam antap gud.

23 Mo nao, long fas ples, hem i bin mekem yufala, mo i bin givim long yufala laef blong

yufala, from samting ia yufala i gat kaon long hem.

24 Mo long nambatu ples, hem i stap askem se yufala i mas mekem wanem we hem i bin askem yufala blong mekem; from samting ia sapos yufala i mekem, hem i stap blesem yufala semtaem; mo taswe, hem i bin pem yufala. Mo yufala i stil gat kaon long hem, mo yufala i gat, mo bae yufala i gat, blong oltaem mo long oltaem; taswe, yufala i gat wanem blong flas from?

25 Mo nao mi askem, yufala i save talem wan samting long saed blong yufala nomo? Mi ansa long yufala, No. Yufala i no save talem se yufala i impoten tu olsem we das blong graon blong wol i impoten, stil oli bin mekem yufala long das blong wol; be luk, hemia i blong man we i bin mekem yufala.

26 Mo mi, mi tu, we yufala i singaotem king blong yufala, mi no gud moa bitim olsem we yufala i stap; from mi tu mi blong das. Mo yufala i luk se mi mi olfala, mo klosap bae mi givim bak bodi blong wol ia i gobak long mama blong hem we i graon.

27 Taswe, olsem we mi bin talem long yufala se mi bin wok blong yufala, mi stap wokbaot wetem wan tingting we i klia long fes blong God, mi tu, long taem ia mi bin mekem se yufala i save kam tugeta long wan ples, blong mekem se God i no save faenem wan samting i rong long mi, mo blong mekem se blad blong yufala i no kam

long mi long taem we bae mi stanap blong God i jajem mi long evri samting we hem i givim oda long mi long saed blong yufala.

28 Mi talem long yufala se mi bin mekem se yufala i kam tugeta long wan ples, blong mekem se mi save karemaot ol blad blong yufala aot long ol klos blong mi, long taem ia we mi stap rere blong go daon long gref blong mi, blong mi save go daon long pis, mo spirit blong mi we i no save ded i save joenem ol kwaea antap mo singsing long ol pres blong wan God we i stret.

29 Mo antap long samting ia, mi talem long yufala se mi bin mekem se yufala i kam tugeta long wan ples, blong mekem se mi save talemaot long yufala se mi nomo save stap olsem tija blong yufala, o king blong yufala;

30 From long taem ia tu, evri bodi blong mi i stap seksek plante, taem we mi stap traem blong toktok long yufala; be Lod God i stap sapotem mi, mo i bin letem mi blong bae mi toktok long yufala mo hem i bin givim oda long mi se mi nidim blong talem long yufala long dei ia, se boe blong mi Mosaea hem i wan king mo wan man blong rul ova long yufala.

31 Mo nao, ol brata blong mi, mi wantem se bae yufala i mekem olsem we yufala i bin mekem bifo. Olsem we yufala i bin holem ol komanmen blong mi mo tu ol komanmen blong papa blong mi, mo yufala i bin

kam antap gud, mo Lod i bin mekem se yufala i no foldaon long ol han blong ol enemi blong yufala, mo tu sapos yufala i holem ol komanmen blong boe blong mi, o ol komanmen blong God we hem bae i givim long yufala, bae yufala i kam antap gud long graon mo ol enemi blong yufala bae oli no gat eni paoa ova long yufala.

32 Be, O ol pipol blong mi, yufala i lukaot gud blong mekem se i no gat rao bitwin yufala, mo blong yufala i jusum blong obei long nogud spirit, we papa blong mi Mosaea i bin tokbaot.

33 From luk, i gat wan sore tumas we oli bin talemaot finis long olgeta we oli jusum blong obei long spirit ia; from sapos hem i jusum blong obei long hem mo i stap mo i ded long ol sin blong hem, semfala man ia i kasem panis long sol blong hem folem wanem we hem i bin mekem; from hem i kasem long ol pei blong hem wan panis we i no gat en, from hem i bin brekem loa blong God we i go agensem save we man ia gat.

34 Mi talem long yufala se i no gat eni long medel blong yufala, be ol smol pikinini blong yufala nomo we oli no bin tijim ol samting ia long saed blong ol samting ia, be huia i no save we yufala i gat wan kaon we i no save finis long Papa long heven blong yufala, blong givim long hem evri samting we yufala i gat mo yufala i stap; mo tu bin tijim yufala long saed blong ol histri we i holem ol profesi we ol tabu profet i bin talemaot, i

go kasem taem ia we papa blong yumi, Lihae, i bin lego Jerusalem;

35 Mo tu, evri samting we ol olfala bubu blong yumi i bin talemaot kasem naoia. Mo luk, tu, oli bin talem ol samting we Lod i bin givim oda long olgeta; taswe, oli stret mo tru.

36 Mo nao, mi talem long yufala, ol brata blong mi, se afta yufala i bin save mo oli bin tijim yufala ol samting ia, sapos yufala i brekem loa mo go agensem samting ia we oli bin talem, mekem se yufala i pulumaot yufala bakegen aot long Spirit blong Lod, mekem se i no save gat ples insaed long yufala blong lidim yufala long ol rod blong waes tingting, blong mekem se Lod i save blesem yufala, mekem se yufala i kam antap gud, mo i sevem yufala—

37 Mi talem long yufala, se man we i mekem samting ia, semfala man ia i kamaot long wan open faet agensem God; taswe hem i jusum blong obei long nogud spirit, mo hem i kam wan enemi blong evri stret fasin; taswe, Lod i no gat ples long man ia, from hem i no stap long ol tempol we i no tabu.

38 Taswe sapos man ia i no sakem sin, mo i stap mo i ded olsem wan enemi blong God, ol samting we jastis i askem i wekemap sol blong hem we i no save ded, blong mekem se hem i save tingbaot ol rong blong hem, we i stap mekem hem blong kam smol lelebet long fes blong Lod. Mo i stap fulumap jes blong hem wetem rong, mo

soa, mo harem nogud, we i olsem wan faea we i no save ded, we flem blong hem i go antap blong oltaem mo oltaem.

39 Mo nao mi talem long yufala, se sore i no gat raet blong holem long man ia; taswe las rod blong hem i blong go long wan trabol we i no save finis.

40 O, yufala evriwan ol olfala man, mo tu yufala ol yangfala man, mo yufala ol smol pikinini we i save andastanem ol toktok blong mi, from mi bin toktok long wan fasin we i klia long yufala, blong mekem se yufala i save andastanem, mi prea se bae yufala i wekap blong tingbaot ol rabis taem blong olgeta we i bin foldaon long fasin blong brekem loa.

41 Mo antap long samting ia, mi wantem se yufala i tingbaot gudfala mo hapi ples blong olgeta we oli holem ol komanmen blong God. From luk, Lod i blesem olgeta long evri samting, ol samting blong wol tuge-ta wetem blong spirit; mo sapos oli holem taet fet kasem en, bae oli kasem olgeta long heven, blong mekem se oli save stap wetem God long wan ples blong hapi we i no gat en. O tingbaot, tingbaot se ol samting ia i tru; from Lod God i bin talemaot ol samting ia.

---

### JAPTA 3

---

*King Benjamin i gohed long toktok blong hem—Lod we i gat Ol Paoa bae givhan long ol man long wan bodi blong mit mo bun—Blad bae*

*i kamaot tru long evri smol hol blong skin blong hem taem we hem i stap pem praes from ol sin blong wol—Fasin blong sevem man i kam tru long nem blong hem nomo —Evri man i save lego fasin blong wol mo kam ol Sent tru long Atonem —Panis blong ol nogud man bae i olsem wan lek blong faea mo salfa. Raonabaot 124 yia bifo Kraes i bon.*

Mo bakegen ol brata blong mi, mi wantem blong yufala i lisiin, from mi gat samting moa blong talem long yufala. From luk, mi gat ol samting blong talem long yufala long saed blong ol samting we bae i kam.

2 Mo ol samting we bae mi talem long yufala, wan enjel blong God i bin talem ol samting ia long mi. Mo hem i bin talem long mi: Wekap; mo mi bin wekap, mo luk hem i bin stanap long fored blong mi.

3 Mo hem i bin talem long mi: Wekap, mo harem ol toktok we bae mi talem long yu; from luk, mi mi bin kam blong talemaot long yu gudfala nius ia blong wan bigfala glad.

4 From we Lod i bin harem ol prea blong yu, mo i bin jajem stret fasin, mo i bin sendem mi blong talemaot long yu se yu yu save glad; mo blong yu yu save talem long ol pipol blong yu blong mekem se olgeta tu i save fulap long glad.

5 From luk, taem i stap kam, mo i no longwe tumas, we wetem paoa, Lod we i gat Ol Paoa we i stap rul, we i bin, mo i stap long ol taem we i no save finis

kasem ol taem we i no save finis, bae i kamdaon long heven long medel blong ol pikinini blong ol man, mo bae hem i stap long wan bodi blong mit mo bun, mo bae hem i go fored long medel blong ol man, i mekem ol bigfala merikel, olsem blong mekem ol pipol we oli sik i kam oraet bakegen, i mekem ol ded man i girap bakegen, i mekem olgeta we oli no save wokbaot i wokbaot bakegen, ol man we oli no save lukluk blong mekem se oli save lukluk bakegen, mo olgeta we sorae blong olgeta i fas blong mekem se oli save harem samting bakegen, mo mekem i kam oraet bakegen evri kaen rabis sik.

6 Mo bae hem i sakemaot ol devel, o ol nogud spirit we i stap long ol hat blong ol pikinini blong ol man.

7 Mo luk, bae hem i fesem ol temtesen, mo harem nogud long bodi, hanggri, tosta, mo filim taed, hem i harem nogud bitim we man i save fesem, hemia nomo sapos i no ded from; from luk, blad bae i kamaot long evri hol blong skin blong hem, bae hem i harem i soa plante from ol fasin nogud mo ol rabis sin blong ol pipol blong hem.

8 Mo bae oli singaotem hem Jisas Kraes, Pikinini blong God, Papa blong heven mo wol, Krieta blong evri samting stat long stat; mo mama blong hem bae oli singaotem hem Meri.

9 Mo luk, hem i kam long ol man blong hem blong mekem se fasin blong sevem man i save kam long ol pikinini blong

ol man, tru long fet long nem blong hem tu; mo tu afta evri samting ia, bae oli tekem hem olsem wan man, mo talem se hem i gat wan devel, mo bae oli wipim hem, mo bae oli krusi-faem hem.

10 Mo bae hem i girap long nambatri dei long ded; mo luk, bae hem i stanap blong jajem wol, mo luk, ol samting ia i mekem se wan jajmen we i stret i save kam long ol pikinini blong ol man.

11 From luk, mo tu blad blong hem bae i pemaot ol sin blong olgeta we oli bin foldaon tru long loa we Adam i bin brekem, we oli bin ded be oli no bin save wanem nao God i wantem olgeta blong mekem, o olgeta we oli bin mekem sin be oli no bin save se samting we oli stap mekem i rong.

12 Be sore tumas, sore tumas long hem we i save se hem i go agensem God! From fasin blong sevem man i no kam long eniwan olsem, be tru long fasin blong sakem sin mo fet long Lod Jisas Kraes.

13 Mo Lod God i bin sendem ol tabu profet blong hem long medel blong ol pikinini blong ol man, blong talemaot ol samting ia i go long evri famle, evri kantri, mo lanwis, blong mekem se eni man we bae i bilivim se Kraes bae i kam, olgeta ia bae oli save kam klin aot long ol sin blong olgeta mo glad wetem wan glad we i bigwan tumas, i olsem se hem i bin kam finis long medel blong olgeta.

14 Stil Lod God i bin luk se ol

pipol blong hem oli wan pipol we oli stronghed mo hem i bin givim long olgeta wan loa, we i loa blong Moses.

15 Mo plante saen, mo plante samting blong sapraes, mo plante eksampol, mo plante pikja, we hem i bin soem long olgeta, long saed blong taem we bae hem i kam; mo tu ol tabu profet i bin tokbaot long olgeta long saed blong taem ia we bae hem i kam; mo stil oli bin mekem ol hat blong olgeta i kam strong, mo oli no bin andastan-em se loa blong Moses i no gat yus, be tru long atonmen blong blad blong hem nomo.

16 Mo tu, sapos hem i save hapen se ol smol pikinini i save mekem sin, bae oli no save sev; be mi talem long yufala se Lod i blesem olgeta; from luk, olsem long saed blong Adam, o tru fasin blong wol, oli foldaon, blad blong Kraes i pemaot ol sin blong olgeta tu.

17 Mo antap long samting ia, mi talem long yufala se bae i no gat wan narafala nem we bae oli givim, o wan narafala wei, o fasin we fasin blong sevem man i save kam long ol pikinini blong ol man, tru mo long nem blong Kraes nomo, Lod we i gat Ol Paoa.

18 From luk hem i jajem, mo jajmen blong hem i stret; mo bebi we i ded taem we hem i bebi yet, bae hem i no save lus; be ol man oli dring panis long ol sol blong olgeta bakegen, hemia nomo sapos oli putum tingting blong olgeta i stap daon mo kam olsem ol smol pikinini,

mo bilivim se fasin blong sevem man i bin, mo i stap, mo bae i kam, tru mo long blad blong Kraes we i pemaot man, Lod we i gat Ol Paoa.

19 From man we i folem fasin blong wol i wan enemi blong God, mo i bin olsem stat long taem we Adam i bin foldaon mo bae i stap olsem, blong oltaem mo oltaem, hemia nomo sapos hem i lisiin long ol gudfala toktok blong Tabu Spirit, mo i tekem aot man we i folem fasin blong wol, mo kam wan sent tru long atonmen blong Kraes, Lod, mo i kam olsem wan pikinini, i stap lisiin, no stap flas, putum tingting blong hem i stap daon, i save wet longtaem, i gat plante lav, glad blong stap biae long evri samting we Lod i tingting blong putum long hem, olsem wan pikinini i stap biae long papa blong hem.

20 Mo antap long samting ia, mi mi talem long yufala, se taem bae i kam we save blong Sevyia bae i goaot olbaot long evri kantri, famle, lanwis, mo pipol.

21 Mo luk, taem we taem ia i kam, bae i no gat wan man we i no gat wan rong samting long fes blong God, be ol smol pikinini nomo, tru long sakem sin nomo mo fet long nem blong Lod God we i gat Ol Paoa.

22 Mo tu long taem ia, taem we bae yu yu bin tijim ol pipol blong yu ol samting we Lod, God blong yu i bin askem yu, ale bae oli nomo save gat wan rong samting long lukluk blong God, folem ol toktok we mi bin talemaot long yu.

23 Mo nao mi mi bin talemaot ol toktok we Lod God i bin askem mi.

24 Mo olsem ia nao Lod i talem se: Bae oli stap olsem wan klia testemoni agensem pipol ia, long dei blong jajmen; we olgeta bae oli kasem jajmen long ol toktok ia, evri man folem ol wok blong hem, sapos oli gud, o sapos oli nogud.

25 Mo sapos oli nogud, oli mekem olgeta i kasem wan rabis lukluk long ol rong mo ol rabis sin blong olgeta, we i stap mekem olgeta i go lelebet longwe long fes blong Lod long wan ples blong harem nogud tumas mo panis we i no gat en, long ples ia oli nomo save kambak; taswe oli bin dring panis long ol sol blong olgeta bakegen.

26 Taswe, oli bin dring long kap blong kros blong God we jastis i no save tanem baksaed long olgeta, olsem we i no bin save tanem baksaed se Adam bae i foldaon from hem i kakae frut ia we i no blong kakae; taswe, sore i nomo save holem olgeta blong oltaem.

27 Mo panis blong olgeta i olsem wan lek blong faea mo salfa we ol flem blong hem i no save ded, mo we ol smok blong hem i go antap blong oltaem mo oltaem. Olsem ia nao Lod i bin givim oda long mi. Amen.

---

#### JAPTA 4

---

*King Benjamin i gohed wetem toktok blong hem—Fasin blong sevem man i kam from Atonmen*

—*Biliv long God blong yu save sev—Kasem wan fasin blong kam klin aot long ol sin blong yufala tru long fasin ia blong holem taet fet—Serem wanem yufala i gat wetem ol pua man—Mekem evri samting wetem waes tingting mo oda. Raonabaot 124 yia bifo Kraes i bon.*

Mo nao, i bin hapen se taem we king Benjamin i bin stop blong talemaot ol toktok we enjel ia blong Lod i bin givim long hem, hem i bin lukluk olbaot long grup blong pipol ia, mo luk oli bin foldaon long graon from respek blong Lod i bin kam long olgeta.

2 Mo oli bin luk olgeta bakegen long fasin nogud we oli bin stap long hem, mo oli luk we das blong graon i moa gud bitim olgeta. Mo olgeta evriwan i bin singaot laod tugeta, mo talem se: O gat sore, mo sevem mifala tru long atonmen mo blad blong Kraes blong yu save fogivim sin blong mifala, mo blong mekem se ol hat blong mifala i save kam klin. From we mifala i biliv long Jisas Kraes, Pikinini blong God we i bin mekem heven mo wol mo evri samting; we bae i kamdaon long medel blong ol pikinini blong ol man.

3 Mo i bin hapen se afta we oli bin talemaot ol toktok ia, Spirit blong Lod i bin kam long olgeta, mo oli bin fulap long glad, from oli bin kam klin aot long ol sin blong olgeta, mo oli bin kasem pis long tingting, from bigfala fet we oli bin gat long Jisas

Kraes ia we bae i kam, folem ol toktok we king Benjamin i bin talemaot long olgeta.

4 Mo king Benjamin i bin openem maot blong hem bakegen, mo i bin stat blong toktok long olgeta, hem i talem se: Ol fren blong mi mo ol brata blong mi, ol famle blong mi mo ol pipol blong mi, bae mi singaotem yufala bakegen blong yufala i save harem mo andastanem ol toktok blong mi we i stap yet we bae mi talemaot long yufala.

5 From luk, sapos save ia blong gudfala fasin blong God, long taem ia i bin wekemap yufala blong mekem se yufala i luk save se yufala i nating nomo, mo se yufala i no stret mo i stap long ples blong foldaon—

6 Mi talem long yufala se, sapos yufala i bin kam blong save gudfala fasin blong God, mo paoa blong hem ia we i bitim eni narafala paoa, mo waes tingting blong hem, mo fasin blong save wet longtaem blong hem, mo fasin blong gotru long hadtaem wetem longfala tingting blong hem, i go long ol pikinini blong ol man; mo tu, atonmen we i bin rere stat long taem we wol i stat, se tru long hemia, fasin blong sevem man i save kam long hem we bae i putum tras blong hem long Lod, mo bae i strong blong obei ol komanmen blong Lod, mo i gohed long fet go kasem en blong laef blong hem. Mi minim laef blong bodi blong wol—

7 Mi talem se, hemia man we i kasem fasin blong sevem man, tru long atonmen we God i bin



mekem i rere stat long taem we wol i bin stat blong evri pipol, we oli bin stap long taem we Adam i bin foldaon, o oli stap, o bae oli stap, go kasem en blong wol.

8 Mo hemia i wei, we tru long hem fasin blong sevem man i kam. Mo i nomo gat wan narafala fasin blong sevem man be hemia nomo we oli bin tokbaot; mo tu i no gat eni narafala fasin we ol man i save sev, be tru long ol fasin nomo we mi bin talemaot long yufala.

9 Biliv long God, biliv se hem i stap, mo we hem i bin mekem evri samting, tugeta long heven mo long wol. Biliv se hem i gat evri waes tingting, mo evri paoa, tugeta long heven mo long wol; biliv se man i no save andastanem evri samting we Lod i save.

10 Mo bakegen, biliv se yufala i mas sakem sin blong yufala mo no mekem ol sin ia bakegen, mo putum tingting blong yufala i stap daon long fored blong God; mo askem hem wetem wan tru hat, se bae hem i fogivim yufala, mo nao, sapos yufala i bilivim evri samting ia, meksua se yufala i mekem olgeta.

11 Mo bakegen, mi talem long yufala olsem we mi bin talem bifo, se from we yufala i bin kam blong save glori blong God, o sapos yufala i bin save gudfala fasin blong hem, mo yufala i bin testem lav blong hem, mo bin kam klin aot long ol sin blong yufala we i mekem se yufala i harem i gud plante long ol sol blong yufala, mo tu

mi wantem se yufala i tingbaot, mo holem taet long tingting oltaem, se God i gat bigfala paoa, mo se yufala i nating nomo, mo se God i gudwan tumas, mo se hem i gat longfala tingting long yufala, ol wael man we oli nogud olgeta, mo putum tingting blong yufala i stapdaon go kasem daon tumas, prea long nem blong Lod evri dei, mo stanap strong long fet blong ol samting we bae i kam, we maot blong enjel i bin talemaot.

12 Mo luk, mi talem long yufala se sapos yufala i mekem samting ia, bae yufala i glad oltaem, mo lav blong God bae i fulumap yufala, mo holem taet fasin blong kam klin aot long ol sin blong yufala; mo bae yufala i gru long save blong hem we i bin mekem yufala, o long save long ol samting we i stret mo tru.

13 Mo bae yufala i no gat wan tingting blong givim kil long wan wan long yufala, be blong stap long pis, mo givim long evri man folem wanem we i nid blong givim.

14 Mo bae yufala i no letem ol pikinini blong yufala blong oli go hanggri, o neked; mo tu bae yufala i no letem se oli brekem ol loa blong God mo faet mo rao wan wetem narawan, mo wok blong devel, we i masta blong sin, o we i nogud spirit we ol olfala bubu blong yumi i bin tokbaot, hem i wan enemi blong evri stret fasin.

15 Be bae yufala i tijim olgeta blong wokbaot long ol wei

blong trutok mo blong tru; bae yufala i tijim olgeta blong lavem wan wan long olgeta mo blong wok blong wan wan long olgeta.

16 Mo tu, yufala bakegen bae yufala i helpem olgeta we oli nidim help blong yufala; bae yufala i serem sam long ol samting blong yufala long eni man we i gat nid; mo bae yufala i no letem se wan we i blong askem samting, i askem samting blong nating, mo sendem aot hem i go ded.

17 Maet bae yufala i talem se: Man ia i putum long hemwan rabis samting ia; taswe bae mi no help, mo bae mi no givim hem eni kakae blong mi o serem wetem hem wanem we mi gat, blong mekem se bae hem i no safa, from ol panis blong hem i stret—

18 Be mi talem long yufala, O man, eni man we i mekem samting ia, semfala man ia i gat bigfala stamba tingting blong sakem sin; mo hemia nomo sapos hem i no sakem sin long ol samting we hem i bin mekem, hem i ded blong oltaem, mo hem i no gat ples long kingdom blong God.

19 From luk, yumi evriwan yumi no man blong askem samting? Yumi evriwan yumi no dipen long sem Man, we i God, from evri samting we yumi gat, from kakae mo klos tugeta, mo from gol, mo from silva, mo from evri rij samting we yumi gat blong evri kaen?

20 Mo luk, long taem ia tu, yufala i bin prea long nem blong

hem, mo askem hem blong mekem yu kam klin aot long ol sin blong yufala. Mo hem i bin letem se yufala i bin askem samting blong nating? No; hem i bin poremaot Spirit blong hem long yufala, mo i bin mekem se ol hat blong yufala bae i fulap wetem glad, mo i bin mekem se maot blong yufala i klos blong mekem se yufala i no faenem ol toktok blong talemaot, glad blong yufala i bin bigwan tumas.

21 Mo nao, sapos God, we i bin mekem yufala, long hem we yufala i dipen long laef blong yufala mo long evri samting we yufala i gat mo we yufala i olsem, hem i givim long yufala eni samting we yufala i askem we i stret, long fet, bilivim se bae yufala i kasem, O afta, hamas moa yufala i sud serem wanem we yufala i gat long wan wan long yufala.

22 Mo sapos yufala i jajem man ia we i askem ol samting blong yufala long yufala, blong mekem se hem i no save ded, mo talemaot strong se hem i mekem wan rong samting, hamas moa bae yu kasem wan panis we i stret from we yufala i no bin serem ol samting blong yufala, we i no blong yufala be i blong God, we laef blong yufala tu i blong hem; mo stil yufala i no askem, o sakem sin long samting ia we yufala i bin mekem.

23 Mi talem long yufala, sore tumas long man ia, from ol samting blong hem bae i lus wetem hem; mo nao, mi talem

ol samting ia long olgeta we oli rij long saed blong ol samting blong wol ia.

24 Mo bakegen, mi talem long ol pua, yufala we i no gat be stil yufala i gat inaf blong yufala i stap laef long wan dei i go long narafala dei; mi minim yufala evriwan we i tanem baksaed long olgeta we i stap askem samting, from yufala i no gat; mi wantem se yufala i talem long ol hat blong yufala se mi no givim from mi mi no gat, be sapos mi mi gat bae mi givim.

25 Mo nao, sapos yufala i talem samting ia long ol hat blong yufala, yufala i stap olsem se yufala i no gat rong, sapos no bae mi talem strong se yufala i rong; mo panis blong yufala i stret from yufala i wantem samting blong narafala man we yufala i no bin kasem.

26 Mo nao, from ol samting ia we mi bin talemaot long yufala—hem i, from long saed blong holem taet fasin blong kam klin aot long ol sin blong yufala long wan dei i go long narafala dei, blong mekem se yufala i no wokbaot wetem no gat rong long fes blong God—mi wantem se bae yufala i serem ol samting blong yufala long ol pua, evri man folem samting we hem i gat, olsem givim kakae long olgeta we oli hanggri, putum klos long olgeta we oli neked, go luk ol sik man mo givhan long olgeta blong mekem se oli harem gud, long saed blong spirit tugeta wetem saed

blong wol, folem ol samting we oli wantem.

27 Mo yufala i luk se oli mekem ol samting ia long waes tingting mo long oda; from i no gat nid blong wan man i ron moa kwik bitim paoa we hem i gat. Mo bakegen, i nid blong hem i wok strong oltaem, blong mekem se hem i save winim praes; taswe, evri samting i mas hapen long oda.

28 Mo mi wantem se yufala i tingbaot, se eni wan long yufala i tekem mo yusum wan samting blong man we i stap raonabaot long yu, i sud tekem samting ia i gobak, folem olsem we hem i bin agri blong mekem, o sapos no bae yu mekem sin; mo maet bae yu mekem man we i stap raonabaot long yu i mekem sin tu.

29 Mo blong endem, mi no save talem long yufala evri samting we yufala i save mekem sin long hem; from i gat plante defren wei mo plante fasin, hem i plante tumas mekem se mi no save kaontem olgeta.

30 Be hemia nomo mi save talem long yufala, se sapos yufala i no lukaotem gud yufala bakegen, mo ol tingting blong yufala, mo ol toktok blong yufala, mo ol wok blong yufala, mo holem ol komanmen blong God, mo gohed long fet blong wanem we yufala i bin harem long saed blong taem we Lod bae i kam, go kasem en blong laef blong yufala, yufala i mas ded. Mo nao, O man, tingbaot, mo no ded.

## JAPTA 5

*Ol Sent i kam ol boe mo ol gel blong Kraes tru long fet — Afta oli singaotem olgeta long nem blong Kraes — King Benjamin i talem strong long olgeta blong stap strong mo no muvmuv long ol gudfala wok. Raonabaot 124 yia bifo Kraes i bon.*

Mo nao, i bin hapen se, taem we king Benjamin i bin toktok olsem ia nao long ol pipol blong hem, hem i bin sendem ol man i go long medel blong olgeta, blong faenemaot long ol pipol blong hem sapos oli bin bilivim ol toktok we hem i bin talemaot long olgeta.

2 Mo olgeta evriwan i bin singaot wetem wan voes, i talem se: Yes, mifala i bin bilivim evri toktok we yu bin talemaot long mifala; mo tu, mifala i save se ol toktok ia oli stret gud mo oli tru, from Spirit blong Lod we i gat Ol Paoa, we i bin mekem wan bigfala jenis long mifala, o insaed long ol hat blong mifala, mekem se mifala i nomo wantem blong mekem nogud fasin, be blong gohed blong mekem gudfala fasin oltaem.

3 Mo mifala, mifala bakegen, tu, tru long gudfala fasin blong God we i no gat en, mo ol fasin blong soemaot samting blong Spirit blong hem, i gat ol bigfala save long ol samting we bae i kam; mo sapos hem i bin gat nid, mifala i save talemaot profes long evri samting.

4 Mo hem i fet we mifala i bin gat long ol samting we king

blong mifala i bin talemaot long mifala we i bin mekem mifala i kam long bigfala save ia, hemia nao i mekem se mifala i glad wetem wan bigfala glad.

5 Mo mifala i glad blong mekem wan kavenan wetem God blong mifala blong mekem wok we hem i wantem, mo blong obei long ol komanmen blong hem, long evri samting we bae hem i askem mifala, long evri dei blong mifala we i stap, blong mifala i no putum long mifala bakegen wan harem nogud we i no gat en, olsem we enjel i bin talemaot, we bae mifala i no dring long kap blong kros blong God.

6 Mo nao, hemia ol toktok we king Benjamin i bin wantem blong harem long olgeta; mo taswe hem i bin talem long olgeta se: Yufala i bin talemaot ol toktok we mi bin wantem; mo kavenan we yufala i bin mekem, i wan stret kavenan.

7 Mo nao, from kavenan ia we yufala i bin mekem, bae oli singaotem yufala ol pikinini blong Kraes, ol boe blong hem, mo ol gel blong hem; from luk, long dei ia, hem i bin bonem yufala long saed blong spirit; from yufala i talem se ol hat blong yufala i bin jenis tru long fet long nem blong hem; taswe, yufala i bon long hem mo bin kam ol boe blong hem mo ol gel blong hem.

8 Mo long nem ia yufala i kam fri, mo i no gat wan narafala nem we i save mekem yufala i fri tru long hem. Fasin blong sevem man i no save kam tru

long wan narafala nem; taswe, mi wantem se yufala i tekem long yufala nem blong Kraes, yufala evriwan we i bin mekem kavenan ia wetem God se bae yufala i obei kasem en blong ol laef blong yufala.

9 Mo bae i kam blong hapen se eni man we i mekem samting ia, bae i gat wan ples blong hem long raet han blong God, from bae hem i save nem ia we bae oli yusum blong singaotem hem; from bae oli singaotem hem long nem blong Kraes.

10 Mo nao bae i hapen se, eni man we bae i no tekem long hem nem blong Kraes, oli mas singaotem hem long sam narafala nem; taswe, hem i faenem hem long lef han blong God.

11 Mo mi wantem se yufala i tingbaot tu, se hemia nem we mi bin talem se bae mi givim long yufala we bae oli no save tekemaot, be tru long brekem loa nomo; taswe, meksua se yufala i no brekem loa, blong mekem se nem ia i no lus long ol hat blong yufala.

12 Mi talem long yufala se mi wantem se yufala i tingbaot blong holem nem ia mo raetem oltaem long ol hat blong yufala, blong mekem se oli no faenem yufala long lef han blong God, be blong yufala i harem mo save voes we bae i singaotem yufala, mo tu, nem we bae hem i singaotem yufala wetem.

13 From olsem wanem nao wan man i save wan masta we hem i no bin wok blong hem, mo we i wan man we hem i no save mo i longwe long ol

tingting mo ol plan blong hat blong hem?

14 Mo bakegen, bae wan man i tekem wan dongki blong wan man we i stap raonabaot long hem, mo kipim hem? Mi talem long yufala, No; bae hem i no save letem se dongki ia i kakae wetem ol grup blong ol anamol blong hem, be bae i ronemaot hem, mo sakemaot hem. Mi talem long yufala, se hemia i samting we bae i hapen long yufala sapos yufala i no save nem we bae oli singaotem yufala wetem.

15 Taswe, mi wantem se yufala i stanap strong mo no muvmuv, mekem plante gudfala wok oltaem, blong mekem se Kraes, Lod God we i gat Ol Paoa, i save holem taet yufala blong hem, blong hem i save karem yufala i go long heven, blong yufala i save kasem fasin blong sevem man mo laef we i no save finis, tru long waes tingting, mo paoa, mo jastis, mo sore blong hem we i bin mekem evri samting, long heven mo long wol, we i God antap long evri samting. Amen.

---

#### JAPTA 6

---

*King Benjamin i raetem daon ol nem blong ol pipol mo i jusum ol pris blong tijim olgeta—Mosaea i rul olsem wan stret king. Raonabaot 124–121 yia bifo Kraes i bon.*

Mo nao, king Benjamin i bin ting se i bin gat nid, afta we hem i stop blong toktok long ol pipol, se bae hem i tekem ol nem

blong olgeta we oli bin mekem kavenan wetem God blong holem ol komanmen blong hem.

2 Mo i bin hapen se i no bin gat wan sol, be ol smol pikinini nomo, we oli no bin mekem kavenan mo i bin tekem long olgeta nem blong Kraes.

3 Mo bakegen, i bin hapen se taem we king Benjamin i bin endem evri samting ia, mo i bin konsekretem boe blong hem Mosaea blong kam wan man blong rul mo wan king ova long ol pipol blong hem, mo i bin givim long hem evri wok long saed blong kingdom, mo tu i bin jusum ol pris blong tijim ol pipol, we tru long samting ia oli save harem mo save ol komanmen blong God, mo blong mekem olgeta blong tingbaot promes we oli bin mekem, hem i bin sendem bak grup blong pipol ia mo oli bin gobak, evriwan folem famle blong olgeta, long haos blong olgeta bakegen.

4 Mo Mosaea i bin stat blong rul long ples blong papa blong hem. Mo hem i bin stat blong rul long taem we hem i gat teti yia, mekem wan total, raonabaot fo hundred mo seventi sikis yia long taem we Lihae i bin lego Jerusalem.

5 Mo king Benjamin i bin stap laef tri yia, afta hem i ded.

6 Mo i bin hapen se king Mosaea i bin wokbaot folem ol wei blong Lod, mo i bin folem ol jajmen mo ol loa blong hem, mo i bin holem ol komanmen blong hem long evri samting we hem i bin talem long hem.

7 Mo king Mosaea i bin mekem se ol pipol blong hem i wok long graon. Mo tu, hemwan, i bin wok long graon, we tru long samting ia hem i no save kam wan hevi samting long ol man blong hem, blong mekem se hem i save mekem folem olsem we papa blong hem i bin mekem long evri samting. Mo i no bin gat rao long medel blong ol pipol blong hem blong spes blong tri ia.

---

### JAPTA 7

---

*Amon i faenem graon blong Lihae-Nifae, we Limhae i king long hem — Ol pipol blong Limhae i stap olsem ol slef blong ol man blong Leman — Limhae i talemaot histri blong laef blong olgeta — Wan profet (Abinadae) i bin talemaot se Kraes i God mo Papa blong evri samting — Olgeta we oli planem doti samting bae oli pikimap wael win, mo olgeta we oli putum tras blong olgeta long Lod bae oli sev. Raonabaot 121 yia bifo Kraes i bon.*

Mo nao, i bin hapen se afta we king Mosaea i bin gat pis blong spes blong tri yia, hem i bin wantem blong save long saed blong ol pipol we oli bin go antap blong stap long graon blong Lihae-Nifae, o long bigtaon blong Lihae-Nifae; from ol pipol blong hem i no bin harem wan samting long saed blong olgeta stat long taem we oli bin lego graon blong Sarahemla; taswe, hem i bin taed long ol man blong hem we oli bin

askem hem evri taem long saed blong ol pipol ia.

2 Mo i bin hapen se king Mosaea i bin letem se sikstin long ol strong man blong olgeta bae oli save go antap long graon blong Lihae-Nifae, blong askem long saed blong ol brata blong olgeta.

3 Mo i bin hapen se long nekis dei oli bin stat blong go antap, mo oli bin gat wetem olgeta wan Amon, we i wan strong man mo i gat paoa, we hem i kamaot long laen blong Sarahemla; mo tu hem i lida blong olgeta.

4 Mo nao, oli no bin save rod we bae oli tekem long ples we i no gat man long hem, blong go antap long graon blong Lihae-Nifae; taswe oli bin goraon long ples we i no gat man long hem blong plante dei, go kasem foti dei oli bin goraon long ples we i no gat man long hem.

5 Mo taem we oli bin goraon blong foti dei, oli bin kam long wan hil we i stap long not long graon blong Saelom, mo long ples ia oli bin stanemap ol tenet blong olgeta.

6 Mo Amon i bin tekem tri long ol brata blong hem, mo ol nem blong olgeta i Amalekae, Hilem, mo Hem, mo oli bin go daon long graon blong Nifae.

7 Mo luk, oli bin mitim king blong ol pipol we i bin stap long graon blong Nifae, mo long graon blong Saelom; mo ol gad blong king i bin raonem olgeta, mo oli bin tekem olgeta, mo oli bin fasem olgeta, mo oli bin putum olgeta long kalabus.

8 Mo i bin hapen se afta we oli

bin spendem tu dei long kalabus, oli bin tekem olgeta i go long fored blong king bakegen, mo oli bin tekemaot ol rop long olgeta; mo oli bin stanap long fored blong king, mo oli bin letem olgeta, o long ol narafala toktok oli bin givim oda long olgeta, se oli mas ansa ol kwestin we bae hem i askem long olgeta.

9 Mo hem i bin talem long olgeta se: Luk, mi mi Limhae, boe blong Noa, we i boe blong Senif, we i bin kamaot long graon blong Sarahemla blong tekem graon ia, we hem i graon blong ol olfala bubu blong olgeta, we voes blong ol pipol i bin mekem hem i kam king.

10 Mo nao, mi wantem blong save stamba tingting we i bin mekem yufala i no fraet blong kam klosap long ol wol blong bigtaon ia, taem we mi, miwan, mi bin stap wetem ol gad blong mi aotsaed long get?

11 Mo nao, from stamba tingting ia mi bin letem se oli sevem yufala, blong mi save askem long yufala sam kwestin, sapos no, bae mi bin talem long ol gad blong mi blong kilim yufala i ded. Mi letem yufala blong toktok.

12 Mo nao, taem we Amon i bin luk se oli bin letem hem blong toktok, hem i bin go fored long king mo i bin bodaon long hem, mo hem i bin stanap bakegen, hem i bin talem se: O king, mi mi stap talem tangkyu tumas long fored blong God long dei ia, we mi mi stap laef yet, mo we oli

letem mi blong toktok; mo bae mi no fraet taem we mi toktok.

13 From mi sua se sapos yu bin save mi bae yu no bin letem se mi bin werem ol rop ia. From mi mi Amon, mo mi mi bin kamaot long laen blong Sarahemla, mo mi bin kam aot long graon blong Sarahemla blong askem long saed blong ol brata blong mifala, we Senif i bin karemaot olgeta i kam aot long graon ia.

14 Mo nao, i bin hapen se afta we Limhae i bin harem ol toktok blong Amon, hem i bin glad tumas, mo i bin talem se: Nao, mi save gud se ol brata blong mi we oli bin stap long graon blong Sarahemla i stap laef yet. Mo nao, bae mi glad; mo long tumora, bae mi mekem se ol pipol blong mi oli glad tu.

15 From luk, mifala i stap slef long ol man blong Leman, mo oli mekem mifala i pem taks we i had tumas blong pem. Mo nao, luk, ol brata blong yumi bae oli mekem yumi kamaot long slef o kamaot long ol han blong ol man blong Leman, mo bae yumi kam ol slef blong olgeta; from i moa gud se yumi kam slef blong ol man blong Nifae, bitim blong pem taks i go long king blong ol man blong Leman.

16 Mo nao, king Limhae i bin givim oda long ol gad blong hem se bae oli nomo fasem Amon o ol brata blong hem, hem i be bin mekem se bae oli go long hil ia we i bin stap long not blong Saelom, mo tekem ol brata blong olgeta i kam long bigtaon, we tru long samting ia

oli save kakae, mo dring, mo spel long ol wok blong longfala wokbaot blong olgeta; from oli bin harem nogud long plante smating; oli bin harem nogud long hanggri, tosta, mo taed.

17 Mo nao, i bin hapen long nekis dei se king Limhae i bin sendem wan toktok i go long evri pipol blong hem, we tru long samting ia oli save kam tugeta long tempol, blong harem ol toktok we bae hem i talemaot long olgeta.

18 Mo i bin hapen se taem we oli bin kam tugeta, we hem i bin talem long olgeta long fasin ia, se: O yufala, ol pipol blong mi, leftemap ol hed blong yufala mo harem gud; from luk, taem i klosap mo i no longwe, taem we bae yumi no mas folem ol enemi blong yumi, i nomata long plante taem we yumi bin had wok blong nating; be stil mi trastem se i gat wan had wok i stap, we bae i wok gud.

19 Taswe, leftemap ol hed blong yufala, mo stap glad, mo putum tras blong yufala long God, long God we hem i bin God blong Ebrahim, mo Aesak, mo Jakob; mo tu, God ia we i bin karemaot ol pikinini blong Isrel aot long graon blong Ijip, mo i bin mekem se oli wokabaot tru long Red Si long drae graon, mo i bin fidim olgeta wetem mana blong mekem se oli no save ded long ples we i no gat man long hem; mo hem i bin mekem plante moa samting blong olgeta.

20 Mo bakegen, semfala God ia i bin karemaot ol olfala bubu



blong yumi aot long graon blong Jerusalem, mo i bin hol-em mo sevem ol pipol blong hem go kasem naoia; mo luk, hem i from ol rabis fasin blong yumi mo ol rabis sin blong yumi we i mekem se hem i bin putum yumi long slef.

21 Mo yufala evriwan i ol witnes long dei ia, se Senif, we i bin kam king ova long pipol ia, from hem i bin hanggri blong kasem graon blong ol olfala bubu blong hem, taswe oli bin giaman long Senif tru long ol trik mo waes plan blong king Leman, we i bin mekem wan promes wetem king Senif, mo hem i bin givim long ol han blong hem ol pat blong graon, o tu bigtaon blong Lihae-Nifae, mo bigtaon blong Saelom; mo graon raonabaot—

22 Mo evri samting ia hem i bin mekem, from stamba tingting blong karem ol pipol i kam blong folem rul blong hem o kam slef blong hem. Mo luk, mifala long dei ia i stap pem taks i go long king blong ol man blong Leman, mifala i pem wan haf blong kon blong mifala, mo ol bali blong mifala, mo tu long evri kaen sid blong mifala, mo wan haf blong ol niu anamol we i bon long ol grup blong anamol blong mifala mo ol buluk blong mifala; mo tu wan haf blong evri samting we mifala i gat, king blong ol man blong Leman i stap askem long mifala, o ol laef blong mifala.

23 Mo nao, yufala i ting se samting ia, hadtaem blong yumi, i no bigwan? Mo sam-

ting ia, hadtaem blong yumi, i no bigfala? Nao luk, hamas bigfala stamba tingting yumi gat blong krae.

24 Yes, mi talem long yufala, ol stamba tingting we yumi gat blong krae long hem i bigwan tumas; from luk hamas long ol brata blong yumi oli bin kilim olgeta i ded, mo blad blong olgeta i bin ron blong nating, mo evri samting ia from fasin nogud.

25 From sapos pipol ia i no bin foldaon long fasin blong brekem loa, Lod bae i no bin save letem bigfala rabis samting i kam long olgeta. Be luk, oli no bin wantem lisin long ol toktok blong hem; be ol rao i bin kam-aot long medel blong olgeta, plante tumas i mekem se oli bin mekem blad i ron long medel blong olgeta bakegen.

26 Mo oli bin kilim ded wan profet blong Lod; yes, wan man we God i bin jusum hem, we i bin talem long olgeta ol samting long saed blong ol fasin nogud mo ol rabis sin blong olgeta, mo i bin profesae long plante samting we bae i kam, yes, taem we Kraes bae i kam tu.

27 Mo from hem i bin talem long olgeta se Kraes hem i God, Papa blong evri samting, mo hem i bin talem se bae hem i tekem long hem pikja blong man, mo bae hem i pikja we God i bin mekem man aot long hem long stat; o long ol nara-fala toktok, hem i bin talem se God i bin mekem man folem pikja blong hem, mo se God bae i kam daon long medel blong ol

pikinini blong ol man, mo tekem long hem bodi blong mit mo bun mo blad, mo go aot long fes blong wol—

28 Mo nao, from hem i bin talem samting ia, oli bin kilim hem i ded; mo oli bin mekem plante moa samting we i bin mekem kros blong God i kam daon long olgeta. Taswe, huia i sapraes se oli slef, mo se God i panisim olgeta wetem ol nogud hadtaem?

29 From luk, Lod i bin talem se: Bae mi no helpem ol pipol blong mi long dei blong brekem loa blong olgeta; be bae mi blokem ol wei blong olgeta blong mekem se oli no kam antap gud; mo ol wok blong olgeta bae i olsem wan ston we i blokem rod blong olgeta.

30 Mo bakegen, hem i bin talem se: Sapos ol pipol blong mi i planem ol doti samting bae oli pikim gras blong hem long wael win; mo frut blong hem i posen.

31 Mo bakegen hem i bin talem se: Sapos ol pipol blong mi i planem ol doti samting, bae oli pikimap win blong is, we i karem i kam fasin blong smasem gud, kwik taem nomo.

32 Mo nao, luk, promes blong Lod i bin hapen mo hem i panisim yufala mo hem i givim had taem long yufala.

33 Be sapos yufala i tanem yufala i go long Lod wetem evri tingting blong hat blong yufala, mo putum tras blong yufala long hem, mo wok blong hem wetem evri fasin ia blong lukaot gud blong tingting,

sapos yufala i mekem samting ia, bae hem i, folem ol samting we hem i wantem mo glad blong hem, tekem yufala i go fri aot long slef.

---

## JAPTA 8

---

*Amon i tijim ol pipol blong Limhae — Hem i lanem long saed blong ol twentifo buk blong ol laen blong Jared — Ol sia i save tanem lanwis blong ol histri blong ol man blong bifo — Fasin ia blong kam olsem wan sia i moa big bitim eni narafala presen. Raonabaot 121 yia bifo Kraes i bon.*

Mo i bin hapen se afta we king Limhae i bin endem toktok long ol pipol blong hem, from hem i bin talemaot plante samting long olgeta mo mi bin raetem wan smol pat nomo long ol toktok ia long buk ia, hem i bin talem long ol pipol blong hem evri samting long saed blong ol brata blong olgeta we oli stap long graon blong Sarahemla.

2 Mo hem i bin mekem se Amon bae i stanap long fes blong grup blong pipol ia mo talem long olgeta evri samting we i bin hapen long ol brata blong olgeta long stat long taem we Senif i bin kamaot long graon i go kasem taem we hemwan i bin kam aot long graon.

3 Mo tu hem i bin talemaot long olgeta, ol las toktok we king Benjamin i bin tijim olgeta, mo i bin eksplenem olgeta long ol pipol blong king Limhae, blong mekem se oli save andas-

tanem evri toktok we hem i bin talemaot.

4 Mo i bin hapen se afta we hem i bin mekem evri samting ia, we king Limhae i talem long grup blong pipol ia blong go wan wan, mo i bin mekem se oli gobak, evriwan long wan wan haos blong hem.

5 Mo i bin hapen se hem i bin mekem se oli karem ol buk we i holem ol histri blong ol pipol blong hem stat long taem we oli bin lego graon blong Sarahemla, i kam long fored blong Amon, blong hem i save ridim olgeta.

6 Nao, stret long taem we Amon i bin ridim histri, king i bin askem long hem blong save sapos hem i save talem mining blong ol lanwis, mo Amon i bin talem long hem se hem i no save.

7 Mo king i bin talem long hem se: From mi stap sore tumas from ol hadtaem blong ol pipol blong mi, mi bin mekem se foti mo tri pipol blong mi i mas go long ples we i no gat man long hem, we tru long samting ia oli save faenem graon blong Sarahemla, blong mekem se mifala i save askem long ol brata blong mifala blong mekem mifala i kamaot long slef.

8 Mo oli bin lus long ples ia we i no gat man long hem blong spes blong plante dei, be stil oli bin stap strong oltaem, mo oli no bin faenem graon blong Sarahemla be oli bin kambak long graon ia, afta we oli bin wokbaot long wan graon we i gat plante wota, oli bin faenem wan graon we ol bun blong ol

man, mo ol anamol i kavremap, mo tu plante haos blong plante kaen we oli brokdaon, i kavremap graon ia, oli bin faenem wan graon we i bin gat ol pipol long hem, wan pipol we oli bin plante olsem ol grup blong Isrel.

9 Mo blong wan testimoni se ol samting we oli bin talem i tru, oli bin karem i kam wetem olgeta twentifo buk we oli fulap wetem ol raeting long hem, mo oli bin mekem olgeta wetem stret gol.

10 Mo luk, tu, oli bin karem i kam wetem olgeta ol plet blong kavremap jes we oli bigwan, mo oli bin mekem olgeta wetem bras mo kopa, mo oli stap stret gud.

11 Mo bakegen, oli bin karem i kam ol naef blong faet we ol handel blong olgeta i nomo gat, mo ol ples we oli sap blong ol naef ia i bin gat fulap rosta; mo i no gat wan man long graon we i save talem mining blong lanwis o ol raeting we i stap long ol buk ia. Taswe mi bin talem long yu se: Yu save tanem ol lanwis?

12 Mo mi talem long yu bakegen se: Yu save eni man we i save tanem ol lanwis? From mi wantem tumas blong oli save tanem ol histri ia i kam long lanwis blong mifala; blong, maet, oli save givim long mifala wan save long saed blong smol haf blong pipol we oli bin ded, we ol histri ia i bin kam long hem, o, maet, bae oli givim long mifala wan save long saed blong stret pipol ia we oli bin ded; mo

mi wantem tumas blong save from wanem oli bin ded.

13 Nao Amon i bin talem long hem se: Mi save talem stret long yu, O king, long wan man we i save tanem lanwis blong ol histri ia, from hem i gat wan samting we hem i save yusum blong luk, mo tanem lanwis blong evri histri we oli blong olfala taem; mo hemia i wan presen we i kam long God. Mo oli singaotem ol samting ia ol samting blong tanem lanwis, mo i no gat wan man we i save luk long ol samting ia, hemia nomo sapos oli givim oda long hem, from fraet se maet hem i lukaotem ol samting we hem i no sud lukaotem mo bae hem i ded. Mo eni man we oli givim oda long hem blong luk long ol samting ia, semfala man ia oli singaotem hem sia.

14 Mo luk, king blong ol pipol we oli stap long graon blong Sarahemla, hem i man we oli givim oda long hem blong mekem ol samting ia, mo we i gat bigfala presen ia we i kam long God.

15 Mo king i bin talem se wan sia i moa hae bitim wan profet.

16 Mo Amon i bin talem se wan sia i wan man blong revelesen mo wan profet tu; mo wan presen we i moa bigfala we i no gat wan man i save gat, hemia nomo sapos hem i save gat paoa blong God, we i no gat man we i save mekem olsem; be stil, wan man i save gat bigfala paoa we God i givim long hem.

17 Be wan sia i save kasem ol samting we oli pas finis, mo tu

ol samting we bae i kam, mo tru long ol samting ia bae oli soemaot evri samting, o, long ol narafala toktok, ol sikret samting bae i kamaot mo ol samting we i stap haed bae i soemaot long laet, mo ol samting we oli no save bae oli save tru long ol samting ia, mo tu ol samting bae oli save tru long ol samting ia we oli no save faenemaot tru long wan narafala wei.

18 Olsem ia nao God i bin mekem wan wei we man, tru fet, i save mekem ol bigfala merikel; taswe hem i kam wan bigfala help long ol pipol we oli stap wetem hem.

19 Mo nao, taem we Amon i bin stop blong talem ol toktok ia, king i bin glad tumas, mo i bin talem tangkyu long God, i talem se: Mi biliv strong se i gat wan bigfala sikret we i stap long ol buk ia mo mi biliv strong se ol samting blong tanem ol lanwis oli bin mekem rere ol samting ia blong mekem ol sikret olsem i kam klia long ol pikinini blong ol man.

20 O ol wok blong Lod i nambawan tumas, mo hamas taem hem i tekem wanem ol pipol blong hem i mekem; yes, mo hamas nao ol save blong ol pikinini blong ol man i blaen mo i no open; from bae oli no lukaotem waes tingting, mo oli no wantem se bae i rulum olgeta!

21 Yes, oli stap olsem wan wael grup blong anamol we i ronwe long man blong lukaotem sipsip, mo i go olbaot, mo ol anamol blong bus i ronem olgeta mo kakae olgeta.

HISTRI BLONG SENIF—Histri blong ol pipol blong hem, stat long taem we oli bin aot long graon blong Sarahemla, kasem taem we oli bin go fri long ol han blong ol man blong Leman.

*I stat long japta 9 i go kasem japta 22 nomo.*

---

JAPTA 9

---

*Senif i lidim wan grup long Sarahemla blong tekem graon blong Lihae-Nifae—King blong ol man blong Leman i letem olgeta blong tekem graon—I gat faet bitwin ol man blong Leman mo ol pipol blong Senif. Raonabaot 200-187 yia bifo Kraes i bon.*

MI, Senif, oli bin tijim mi long evri lanwis blong ol man blong Nifae, mo mi bin gat wan save long saed blong graon blong Nifae, o faszala graon blong ol bubu blong mifala we oli bin karem long ol papa blong olgeta, mo oli bin sendem mi olsem wan spae long medel blong ol man blong Leman blong mi save spae long ol ami blong olgeta, blong mekem se ami blong mifala i save kam mo smasem olgeta—be taem we mi bin luk ol samting we i gud long medel blong olgeta, mi no bin wantem se oli smasem olgeta.

2 Taswe, mi bin rao wetem ol brata blong mi long ples we i no gat man long hem, from mi bin wantem se man we i rulum mifala bae i mekem wan promes wetem olgeta; be from hem i wan man we i stronghed mo i

tosta long blad, hem i bin givim wan oda se bae oli mas kilim ded mi; be mi bin sev tru long plante blad we i bin ron; from papa i bin faet agensem papa, mo brata agensem brata, kasem taem we bigfala namba blong ami blong mifala i nomo gat long ples we i no gat man long hem; mo mifala i bin gobak, olgeta long mifala we i no ded, long graon blong Sarahemla, blong talemaot stori ia long ol woman mo ol pikinini blong olgeta.

3 Mo yet, from mi bin wantem tumas blong tekem graon blong ol bubu blong mifala, mi bin karem i kam tugeta olgeta we oli bin wantem blong go antap blong tekem graon ia, mo mifala i bin statem bakegen wokbaot blong mifala i go long ples we i no gat man long hem, blong go antap long graon ia; be mifala i bin kasem hadtaem blong kasem kakae mo hadtaem we i tumas; from mifala i bin slo blong tingbaot Lod, God blong mifala.

4 Be, afta plante dei we mifala i stap goraon long ples we i no gat man long hem, mifala i bin stanemap ol tenet blong mifala long ples ia we ol brata blong mifala oli bin kilim olgeta i ded long hem, we i bin stap klosap long graon blong ol bubu blong mifala.

5 Mo i bin hapen se mi bin go bakegen wetem fo man blong mi insaed long bigtaon, long king, blong mi save kasem tingting blong king, mo blong mi save sapos mi save go insaed

wetem ol pipol blong mi mo tekem graon long wan fasin blong pis.

6 Mo mi bin go long king mo hem i bin mekem wan kavenan wetem mi se bae mi save stap long graon blong Lihae-Nifae, mo graon blong Saelom.

7 Mo tu hem i bin givim oda long ol pipol blong hem se oli mas aot long graon, mo mi mo ol pipol blong mi i bin go long graon we mifala i save stap long hem.

8 Mo mifala i bin stat blong bildim ol haos, mo blong fiksिम ol wol blong bigtaon ia, yes, ol wol blong bigtaon blong Lihae-Nifae tu, mo bigtaon blong Saelom.

9 Mo mifala i bin stat blong plan long graon, yes, wetem evri kaen sid tu, wetem ol sid blong kon, mo blong wit, mo blong bali, mo wetem nas, mo wetem sam, mo wetem ol sid blong evri kaen frut; mo mifala i bin stat blong kam plante mo kam antap gud long graon.

10 Nao hem i tru long ol trik mo waes blong king Leman, blong mekem ol pipol blong mi i kam slef, mekem se hem i bin letem graon blong mekem se mifala i save stap long hem.

11 Taswe i bin hapen, afta we mifala i bin stap long graon blong spes blong twelef yia, se king Leman i bin stat blong wari, hem i fraet se long eni wei bae ol pipol blong mi i kam strong long graon, mo se oli no save winim olgeta, mo mekem olgeta i kam slef.

12 Nao oli bin wan pipol we i

les mo oli wosip long ol aedol; taswe oli bin wantem blong mekem mifala i kam slef, blong oli save flasem olgeta tru long ol wok blong ol han blong mifala. Yes, blong oli save fidim olgeta bakegen long ol grup blong anamol blong ol plan-tesen blong mifala.

13 Taswe i bin hapen se king Leman i bin stat blong pusem ol pipol blong hem blong bae oli rao wetem ol pipol blong mi; taswe i bin stat blong gat ol faet mo ol rao long graon.

14 Nao, long tetin yia we mi stap rul long graon blong Nifae, longwe long saot blong graon blong Saelom, taem we ol pipol blong mi i stap givim wota mo fidim ol grup blong anamol blong olgeta, mo stap wok long ol graon blong olgeta, wan bigfala ami blong ol man blong Leman i bin kam long olgeta mo i bin stat blong smasem olgeta, mo blong tekem ol grup blong anamol blong olgeta, mo ol kon long ol garen blong olgeta.

15 Yes, mo i bin hapen se oli bin ronwe, evriwan we oli no bin kasem, insaed long bigtaon blong Nifae tu, mo oli bin singaotem mi blong lukaot gud long olgeta.

16 Mo i bin hapen se mi bin mekem olgeta i rere wetem ol bonara, mo wetem ol ara, wetem ol naef blong faet, mo wetem ol huknaef, mo wetem ol nalnal, mo wetem ol sling, mo wetem evri kaen tul blong faet we mifala i save mekem, mo mi mo ol pipol blong mi mifala i bin

go fored agensem ol man blong Leman blong faet.

17 Yes, long paoa blong Lod mifala i bin go fored agensem ol man blong Leman; from mi mo ol pipol blong mi i bin prea strong long Lod blong hem i sevem mifala aot long ol han blong ol enemi blong mifala, from mifala i bin wekap blong tingbaot we ol bubu blong mifala i bin go fri.

18 Mo God i bin harem ol krae blong mifala mo i bin ansarem ol prea blong mifala; mo mifala i bin gohed long paoa blong hem; yes, mifala i bin go fored agensem ol man blong Leman, mo long wan dei mo wan naet mifala i bin kilim ded tri taosen mo foti-tri; mifala i bin kilim olgeta i ded kasem taem we mifala i bin ronemaot olgeta long graon blong mifala.

19 Mo mi, miwan, wetem ol han blong mi, mi bin help blong berem ol ded man blong olgeta. Mo luk, long bigfala sore mo harem nogud blong mifala, tu hundred mo seventi-naen brata blong mifala i bin ded.

---

JAPTA 10

---

*King Leman i ded—Ol pipol blong hem oli wael mo prapa wael mo oli biliv long ol giaman kastom—Senif mo ol pipol blong hem i win agensem olgeta. Raonabaot 187-160 yia bifo Kraes i bon.*

Mo i bin hapen se mifala bakegen i bin stat blong stanemap kingdom mo mifala bakegen i bin stat blong stap long graon

wetem pis. Mo mi bin mekem se oli mekem ol tul blong faet blong evri kaen, we tru long samting ia mi save gat ol tul blong faet blong ol pipol blong mi i rere long taem we ol man blong Leman bae i kam bakegen blong faet agensem ol pipol blong mi.

2 Mo mi bin putum ol gadman raonabaot long graon, blong mekem se ol man blong Leman oli no save kam long mifala bakegen wetem sapraes, mo smasem gud mifala; mo olsem ia nao mi bin wajem ol pipol blong mi mo ol grup blong anamol blong mi, mo mi bin lukaotem olgeta blong oli no foldaon long ol han blong enemi blong mifala.

3 Mo i bin hapen se mifala i bin kasem graon blong ol papa blong mifala blong plante yia, yes, blong wan taem blong twenti mo tu yia.

4 Mo mi bin mekem se ol man i wok long graon, mo planem evri kaen sid mo evri kaen frut blong evri kaen.

5 Mo mi bin mekem se ol woman oli mekem tred, mo wok, mo wok strong, mo mekem kaliko blong evri kaen, yes, mo klos blong evri kaen, blong mifala i save kavremap bodi blong mifala we i neked; mo olsem ia nao mifala i bin kam antap gud long graon—olsem ia nao mifala i bin gohed blong gat pis long graon blong spes blong twenti mo tu yia.

6 Mo i bin hapen se king Leman i bin ded, mo boe blong hem i bin stat blong rul long

ples blong hem. Mo hem i bin stat blong pusum ol pipol blong hem blong oli go agensem ol pipol blong mi; taswe oli bin stat blong rere blong faet, mo blong kam blong faet agensem ol pipol blong mi.

7 Be mi bin sendem ol spae blong mi aot raonabaot long graon blong Semlon, blong mi save faenem olsem wanem oli stap rere, blong mekem se mi save waj agensem olgeta, blong oli no save kam long ol pipol blong mi mo smasem olgeta.

8 Mo i bin hapen se oli bin kam antap long not blong graon blong Saelom, wetem bigfala ami blong olgeta, ol man we oli karem ol bonara, mo wetem ol ara, mo wetem ol naef blong faet, mo wetem ol huknaef, mo wetem ol ston, mo wetem ol sling. Mo oli bin sevem ol hed blong olgeta mekem se oli neked; mo oli bin werem wan strap we oli bin mekem wetem skin blong buluk long wes blong olgeta.

9 Mo i bin hapen se mi bin mekem se ol woman mo ol pikinini blong ol pipol blong mi bae oli go haed long ples we i no gat man long hem; mo tu mi bin mekem se evri olfala man blong mi we i save yusum ol tul blong faet, mo tu ol yangfala man blong mi we i save yusum ol tul blong faet, i mas kam tugeta blong go faet agensem ol man blong Leman; mo mi bin putum olgeta long ol laen blong olgeta, evri man folem yia blong hem.

10 Mo i bin hapen se mifala i

bin go antap blong faet agensem ol man blong Leman; mo mi, mi tu, we mi olfala, mi bin go antap blong faet agensem ol man blong Leman. Mo i bin hapen se mifala i bin go antap wetem paoa blong Lod blong faet.

11 Nao, ol man blong Leman i no bin save wan samting long saed blong Lod, o paoa blong Lod, taswe oli bin dipen long paoa blong olgeta nomo. Be oli bin wan strong pipol, long saed blong paoa blong ol man.

12 Oli bin wan wael, mo prapa wael, mo wan pipol we oli tosta from blad, oli biliv long ol kastom blong ol bubu blong olgeta, we i olsem—Oli biliv se oli bin ronemaot olgeta long graon blong Jerusalem from ol fasin nogud blong ol bubu blong olgeta, mo se ol brata blong olgeta i bin mekem i nogud long olgeta long ples we i no gat man long hem, mo tu oli bin mekem i nogud long olgeta taem we oli stap krosem solwota;

13 Mo bakegen, se oli bin mekem nogud long olgeta taem we oli stap long fasfala graon we ol papa blong olgeta oli bin kasem, afta we oli bin krosem solwota, mo evri samting ia from we Nifae i bin yusum moa fet blong holem ol komanmen blong Lod—taswe Lod i bin laekem hem, from Lod i bin harem ol prea blong hem mo i ansarem olgeta, mo hem i bin lidim olgeta long wokbaot blong olgeta long ples we i no gat man long hem.

14 Mo ol brata blong hem i bin kros long hem from oli no bin



andastanem ol fasin blong Lod; oli bin kros long hem tu long ol solwota from oli bin mekem hat blong olgeta i kam strong agensem Lod.

15 Mo bakegen, oli bin kros wetem hem taem we oli bin kasem graon blong promes, from oli bin talem se hem i bin tekemaot long olgeta raet blong rulum ol pipol; mo oli bin traem blong kilim hem i ded.

16 Mo bakegen, oli bin kros long hem from hem i bin aot i go long ples we i no gat man long hem olsem we Lod i bin talem hem, mo i bin tekem ol histri we oli bin raetem long ol buk we oli bin mekem wetem bras, from oli bin talem se hem i bin stilim olgeta.

17 Mo olsem ia nao oli bin tijim ol pikinini blong olgeta se oli no mas laekem olgeta, mo se oli mas kilim olgeta i ded, mo se oli mas stil mo blong go insaed long haos blong olgeta, mo mekem evri samting we oli save mekem blong smasem olgeta; taswe oli no laekem ol pikinini blong Nifae mo tingting ia i no save en.

18 From samting ia, king Leman, tru long ol trik, mo giaman waes, mo ol flas promes blong hem, i bin giaman long mi, mekem se mi bin karem olgeta ia, ol pipol blong mi, i kam long graon ia, blong oli save smasem olgeta; yes, mo mifala i bin safa long ol plante yia ia long graon ia.

19 Mo nao mi, Senif, afta we mi bin talem ol samting ia long ol pipol blong mi long saed

blong ol man blong Leman, mi bin stikim tingting blong olgeta blong go blong faet wetem paoa blong olgeta, putum tras blong olgeta long Lod; taswe, mifala i bin faet wetem olgeta, long fes blong olgeta.

20 Mo i bin hapen se mifala i bin ronemaot olgeta bakegen aot long graon blong mifala; mo mifala i bin kilim olgeta i ded wetem wan bigafala namba blong ded, oli plante tumas mekem se mifala i no bin kaontem olgeta.

21 Mo i bin hapen se mifala i bin kambak bakegen long graon blong mifala, mo ol pipol blong mi bakegen i bin stat blong fidim ol grup blong anamol blong olgeta, mo blong wok long graon blong olgeta.

22 Mo nao mi, we mi mi olfala, mi bin givim kingdom ia long wan long ol boe blong mi; taswe mi no talem moa, mo bae Lod i blesem ol pipol blong mi. Amen.

---

## JAPTA 11

---

*King Noa i rul wetem nogud fasin —Hem i laekem blong stap long wael laef wetem ol woman blong hem mo ol narafala woman blong hem—Abinadae i talemaot profesi se bae ol pipol i kam slef—King Noa i lukaotem blong tekem laef blong hem. Raonabaot 160–150 yia bifo Kraes i bon.*

Mo nao i bin hapen se Senif i bin givim kingdom long Noa, wan long ol boe blong hem; taswe Noa i bin stat blong rul long ples blong hem; mo hem i

no bin wokbaot long ol wei blong papa blong hem.

2 From luk, hem i no bin hol-em ol komanmen blong God, be hem i bin wokbaot folem ol tingting blong hat blong hem nomo. Mo hem i bin gat plante woman mo ol narafala woman. Mo hem i bin mekem se ol pipol blong hem i mekem sin, mo mekem samting we i rabis sin long ae blong Lod. Yes, mo oli bin mekem fasin ia blong stap slip olbaot mo evri kaen blong fasin nogud.

3 Mo hem i bin putum wan taks blong wan faef long evri samting we oli bin gat, wan faef long ol gol blong olgeta mo long ol silva blong olgeta, mo wan faef long sif blong olgeta, mo long kopa blong olgeta, mo long bras blong olgeta, mo long aean blong olgeta; mo wan faef long ol anamol blong olgeta; mo tu wan faef long ol sid blong olgeta.

4 Mo evri samting ia hem i bin tekem blong sapotem hemwan, mo ol woman blong hem mo ol narafala woman blong hem; mo tu ol pris blong hem, mo ol woman blong olgeta mo ol narafala woman blong olgeta; olsem ia nao hem i bin jenisim ol samting blong kingdom.

5 From hem i bin putum daon evri pris we papa blong hem i bin konsekretem olgeta, mo i bin konsekretem ol niuwan long ples blong olgeta, ol niuwan we oli bin gat hae tingting long ol hat blong olgeta.

6 Yes, mo olsem ia nao oli bin sapotem olgeta long les blong

olgeta, mo long fasin blong wosipim ol aedol blong olgeta, mo long fasin ia blong slip olbaot blong olgeta, tru long ol taks we king Noa i bin putum long ol pipol blong hem; olsem ia nao ol pipol i bin wok plante blong sapotem rabis fasin.

7 Yes, mo oli bin kam blong wosipim ol aedol, from ol swit tok blong nating blong king mo ol pris i bin trikim olgeta, from oli bin talem ol swit tok long olgeta.

8 Mo i bin hapen se king Noa i bin bildim plante flas haos we i gat plante spes; mo hem i bin flasem olgeta wetem naes wok blong ol wud, mo long evri kaen blong ol gudgudfala samting, long gol, mo long silva, mo long aean, mo long bras, mo long sif, mo long kopa;

9 Mo hem i bin mekem tu wan haos blong king we i gat plante spes, mo wan jea long medel blong hem, evri samting ia oli bin mekem wetem naes wud, mo oli bin flasem wetem gol mo silva mo wetem ol gudgudfala samting.

10 Mo hem i bin mekem tu se ol wokman blong hem oli mas mekem evri kaen blong gudfala wok insaed long ol wol blong tempol, long naes wud, mo long kopa, mo long bras.

11 Mo ol jea we oli bin stap blong ol hae pris, we oli bin stap moa hae long olgeta narafala jea, hem i bin flasem wetem stret gol; mo hem i bin mekem se oli bildim wan ples long fored blong olgeta, blong oli save putum ol bodi mo ol han blong

olgeta long hem long taem we bae oli stap talem ol giaman mo ol toktok blong nating long ol pipol blong hem.

12 Mo i bin hapen se hem i bin bildim wan taoa klosap long tempol; yes, wan taoa we i hae tumas, go kasem we i hae tumas, mekem se hem i save stanap antap long hem mo lukluk i go long graon blong Saelom, mo tu graon blong Semlon, we ol man blong Leman i bin stap long hem; mo hem i bin save lukluk i go long evri graon raonabaot.

13 Mo i bin hapen se hem i bin mekem se oli bildim plante haos long graon blong Saelom; mo hem i bin mekem se oli bildim wan bigfala taoa long hil we i stap long not blong graon blong Saelom, we i bin olsem wan sefples blong ol pikinini blong Nifae long taem we oli bin ronwe long graon; mo olsem ia nao hem i bin mekem wetem ol rij samting we hem i bin kasem tru long taks blong ol pipol blong hem.

14 Mo i bin hapen se hem i bin putum hat blong hem long ol rij samting blong hem, mo hem i bin spendem taem blong hem long wael laef wetem ol woman blong hem mo ol nara-fala woman blong hem, mo tu ol pris blong hem i bin spendem taem blong olgeta wetem ol woman blong rod.

15 Mo i bin hapen se hem i bin planem ol plantesen blong rop blong grep raonabaot long graon; mo hem i bin bildim masin blong mekem waen, mo

oli bin mekem plante waen; mo taswe hem i bin kam wan man blong dring plante waen, mo tu ol pipol blong hem.

16 Mo i bin hapen se ol man blong Leman i bin stat blong kam long ol pipol blong hem, long ol smol namba mo bin kilim olgeta i ded long garen blong olgeta, mo taem we oli bin stap lukaot long ol grup blong anamol blong olgeta.

17 Mo king Noa i bin sendem ol gadman raonabaot long graon blong mekem se olgeta i stap longwe, be hem i no bin sendem wan namba we hem i inaf, mo ol man blong Leman i bin kam long olgeta mo oli bin kilim olgeta i ded, mo oli bin ronem plante long ol grup blong anamol blong olgeta aot long graon; olsem ia nao ol man blong Leman i bin stat blong smasem olgeta, mo blong yusum fasin ia blong no laekem man long olgeta.

18 Mo i bin hapen se king Noa i bin sendem ol ami blong hem agensem olgeta, mo oli bin pusumbak olgeta, o oli bin pusumbak olgeta blong wan taem; taswe, oli bin kambak wetem glad from ol samting we oli bin smasem gud.

19 Mo nao, from bigfala win ia, oli bin kam antap long hae tingting long ol hat blong olgeta; oli bin tok flas long paoa blong olgeta, oli talem se fifti long olgeta i save stanap agensem ol taosen blong ol man blong Leman; Mo olsem ia nao oli bin tok flas, mo oli bin glad long blad, mo blong mekem

blad blong ol brata blong olgeta i ron, mo samting ia from fasin nogud blong king mo ol pris blong olgeta.

20 Mo i bin hapen se i bin gat wan man long medel blong olgeta we nem blong hem i Abinadae; mo hem i bin go fored long medel blong olgeta mo i bin stat blong talemaot profesi, i talem se: Luk, olsem ia nao Lod i talem, mo olsem ia nao hem i bin givim oda long mi, se, Go fored, mo talem long pipol ia, olsem ia nao Lod i talem—Sore tumas long pipol ia, from mi mi bin luk ol rabis sin blong olgeta, mo ol fasin nogud blong olgeta, mo ol fasin blong slip olbaot blong olgeta; mo hemia nomo sapos oli no sakem sin bae mi visitim olgeta long kros blong mi.

21 Mo hemia nomo sapos oli no sakem sin mo tanem olgeta i go long Lod, God blong olgeta, luk, bae mi mekem olgeta i go long ol han blong ol enemi blong olgeta; yes, mo bae oli kam slef; mo bae oli gat hadtaem long ol han blong ol enemi blong olgeta.

22 Mo bae i kam blong hapen se bae oli save se mi mi Lod, God blong olgeta, mo mi mi wan God blong jalus, we i panisim from ol rabis fasin blong ol pipol blong mi.

23 Mo bae i kam blong hapen se hemia nomo sapos ol pipol ia i no sakem sin mo tanem olgeta i go long Lod, God blong olgeta, bae oli kam slef; mo i no gat wan man we i save mekem

olgeta i go fri, be Lod nomo, God we i gat Bigfala Paoa.

24 Yes, mo bae i kam blong hapen se taem we oli krae long mi, bae mi tekem taem blong harem ol krae blong olgeta; yes, mo bae mi letem olgeta blong mekem se ol enemi blong olgeta i smasem olgeta.

25 Mo hemia nomo sapos oli no sakem sin long ol rafrak klos mo asis, mo prea strong long Lod, God blong olgeta, bae mi no harem ol prea blong olgeta, mo bae mi no mekem olgeta i go fri long ol hadtaem blong olgeta; mo olsem ia nao Lod i talem, mo olsem ia nao hem i bin givim oda long mi.

26 Nao i bin hapen se taem we Abinadae i bin talemaot ol toktok ia long olgeta oli bin kros long hem, mo oli bin traem blong kilim hem i ded, be Lod i bin tekemaot hem long ol han blong olgeta.

27 Nao taem we king Noa i bin harem long saed blong ol toktok we Abinadae i bin talemaot long ol pipol, hem tu i bin kros; mo hem i bin talem se: Huia i Abinadae, we mi mo ol pipol blong mi i save kasem jajmen long hem? O huia i Lod, we bae i putum long ol pipol blong mi ol bigfala hadtaem olsem?

28 Mi givim oda long yufala blong tekem Abinadae i kam ia, blong mi save kilim hem i ded, from hem i bin talemaot ol samting ia blong hem i save mekem ol pipol blong mi i kam kros wan long narawan, mo blong statem ol rao long medel

blong ol pipol blong mi; taswe bae mi kilim hem i ded.

29 Nao ol ae blong ol pipol i bin blaen; taswe, oli bin mekem ol hat blong olgeta i kam strong agensem ol toktok blong Abinadae, mo oli bin wantem, stat long taem ia i go blong tekem hem. Mo king Noa i bin mekem hat blong hem i kam strong agensem ol toktok blong Lod, mo hem i no bin sakem sin from ol rabis wok blong hem.

---

### JAPTA 12

---

*Abinadae i go long kalabus from hem i profesae se bae oli smasem ol pipol, mo ded blong King Noa—Ol giaman pris i talemaot ol skripja mo oli giaman blong holem loa blong Moses—Abinadae i stat blong tijim ol Ten Komanmen long olgeta. Raonabaot 148 yia bifo Kraes i bon.*

Mo i bin hapen se afta we spes blong tu yia i pas, se Abinadae i bin kam long medel blong olgeta long ol defren kaen klos, blong mekem se oli no luksave hem, mo hem i bin stat blong profesae long medel blong olgeta, i talem se: Olsem ia nao Lod i bin givim oda long mi, se—Abinadae, go mo talemaot profesi long olgeta ia, ol pipol blong mi, from oli bin mekem ol hat blong olgeta i kam strong agensem ol toktok blong mi; oli no bin sakem sin long ol rabis fasin we oli stap mekem; taswe, bae mi panisim olgeta long kros blong mi, yes, long strongfala kros blong mi bae mi panisim

olgeta from ol rabis fasin mo ol rabis sin blong olgeta.

2 Yes, sore tumas long jeneresen ia! Mo Lod i bin talem long mi se: Stretem han blong yu mo profesae, mo talem se: Olsem ia nao Lod i talem se, bae i hapen se jeneresen ia, from ol rabis fasin blong olgeta, bae oli kam slef, mo bae oli slapem olgeta long saed blong fes; yes, mo bae ol man i ronemaot olgeta, mo bae oli kilim olgeta i ded, mo ol pijin blong ea, mo ol dog, yes, mo ol wael anamol, bae oli kakae ol mit blong olgeta.

3 Mo bae i kam blong hapen se praes blong laef blong king Noa bae i olsem wan klos insaed long wan hot oven; from bae hem i save se mi mi Lod.

4 Mo bae i kam blong hapen se bae mi mi nokem olgeta ia ol pipol blong mi, wetem tumas hadtaem, yes, wetem hadtaem blong kasem kakae, mo wetem sik; mo bae mi mekem se bae oli mekem bigfala noes blong fuldei.

5 Yes, mo bae mi mekem se oli holem ol hevi samting long ol bak blong olgeta; mo bae oli pulum olgeta olsem wan dongki we i no save toktok.

6 Mo bae i kam blong hapen se bae mi sendem ol smol pis blong aes i kam long olgeta, mo bae i nokem olgeta; mo bae oli panisim olgeta tu wetem win blong is; mo tu ol bebet bae oli mekem trabol long graon blong olgeta, mo kakae ol sid blong olgeta.

7 Mo bae oli panisim olgeta wetem wan bigfala sik—mo

evri samting ia bae mi mekem from ol rabis fasin mo ol sin blong olgeta.

8 Mo bae i kam blong hapen se hemia nomo sapos oli no sakem sin bae mi smasem olgeta evri-wan aot long fes blong wol; be stil bae oli livim wan histri i stap biae long olgeta, mo bae mi sevem olgeta blong ol narafala pipol we bae oli stap long graon ia; yes, bae mi mekem samting ia tu blong mekem se mi save soem ol rabis sin blong ol pipol ia long ol narafala pipol. Mo plante samting Abinadae i bin talemaot profesi agensem ol pipol ia.

9 Mo i bin hapen se oli bin kros long hem; mo oli bin tekem hem mo oli bin karem i go long fored blong king afta we oli bin fasem hem, mo oli bin talem long king se: Luk, mifala i bin karem wan man i kam long fored blong yu we i bin profesae long saed blong nogud blong ol pipol blong yu, mo i talem se bae God i smasem olgeta.

10 Mo tu hem i profesae nogud long saed blong laef blong yu, mo i talem se laef blong yu bae i olsem wan klos we i stap insaed long wan oven blong faea.

11 Mo bakegen, hem i talem se bae yu olsem wan rop, olsem wan rop blong garen we i drae, we ol wael anamol i ron ova long hem mo oli purumbut andanit long leg.

12 Mo bakegen, hem i talem se bae yu olsem ol flaoa blong nil, we taem we i raep fulwan, sapos win i blo, hem i gowe long fes blong graon. Mo hem i stap

mekem olsem se Lod i bin talemaot samting ia. Mo hem i talem se evri samting ia bae i kam long yu, hemia nomo sapos yu no sakem sin, mo hemia from ol rabis fasin blong yu.

13 Mo nao, O king, wanem nao bigfala nogud samting we yu bin mekem, o wanem ol bigfala sin we ol pipol blong yu i bin mekem, blong mekem se God bae i panisim mifala o blong man ia i jajem mifala?

14 Mo nao, O king, luk, mifala i no gat rong, mo yu, O king, i no bin sin; taswe, man ia i bin giaman long saed blong yu, mo hem i bin profesae blong nating.

15 Mo luk, yumi strong, bae yumi i no kam slef, o se ol enemi blong yumi bae oli no save tekem yumi olsem prisena; yes, mo yu bin kam antap gud long graon mo bae yu kam antap gud tu.

16 Luk, hemia man ia, mifala i putum hem long ol han blong yu; yu save mekem wanem wetem hem we yu ting se i gud blong mekem.

17 Mo i bin hapen se king Noa i bin mekem se bae oli sakem Abinadae i go long kalabus; mo hem i bin givim oda long ol pris blong kam tugeta, blong hem i save holem wan kaonsel wetem olgeta blong askem wanem blong mekem wetem hem.

18 Mo i bin hapen se oli bin talem long king se: Karem hem i kam long ples ia blong mifala i save askem sam kwestin long hem; mo king i bin givim oda se bae oli karem hem i kam long fored blong olgeta.

19 Mo oli bin stat blong kwes-tinim hem, blong mekem se oli save trikim hem, we tru long samting ia, oli save gat wan samting we oli save yusum agensem hem; be hem i bin ansa long olgeta wetem fasin blong no save fraet, mo hem i bin stanap strong agensem olgeta long evri kwestin blong olgeta, mo i bin blokem olgeta long evri toktok blong olgeta.

20 Mo i bin hapen se wan long olgeta i bin talem long hem se: Ol toktok we oli bin raetem i minim wanem, mo we ol bubu blong yumi i bin tijim, se:

21 Hamas naes nao, long ol bigfala hil, ol leg blong hem we i stap karem i kam ol gud nius; we i talemaot pis; we i karem i kam ol gud nius blong gud; we i talemaot fasin blong sevem man; we i talem long Saeon, God blong yu i rul;

22 Ol gadman blong yu bae oli singaot strong i go antap, wetem wan voes tugeta bae oli sing-sing; from bae oli luk wetem ae blong olgeta taem we Lod bae i karembak Saeon.

23 Kamaot wetem glad; sing-sing tugeta ol emti ples blong Jerusalem; from Lod i bin leftemap tingting blong ol pipol blong hem, hem i bin pem-aot Jerusalem;

24 Lod i bin soemaot tabu han blong hem long ol ae blong evri kantri, mo evri en blong wol bae oli luk fasin blong sevem man blong God blong yumi?

25 Mo nao Abinadae i bin talem long olgeta se: Yufala i ol pris, mo yufala i stap mekem

olsem se yufala i stap tijim ol pipol ia, mo blong andastanem spirit blong profesi, mo stil yufala i wantem blong save long mi, wanem mining blong ol samting ia?

26 Mi talem long yufala, sore tumas long yufala from yufala i stap jenisim ol gudfala fasin blong Lod! From sapos yufala i andastanem ol samting ia, yufala i no bin tijim olgeta; taswe, yufala i bin smasem gud ol gudfala fasin blong Lod.

27 Yufala i no bin putum ol hat blong yufala blong andastanem; taswe, yufala i no bin waes. Taswe, yufala i tijim wanem long ol pipol ia?

28 Mo oli bin talem: Mifala i tijim loa blong Moses.

29 Mo bakegen hem i bin talem long olgeta: Sapos yufala i tijim loa blong Moses, from wanem yufala i no holem loa ia? From wanem yufala i putum ol hat blong yufala long ol rij samting? From wanem yufala i stap mekem fasin ia blong slip olbaot mo westem paoa blong yufala wetem ol woman blong rod, yes, mo mekem pipol ia blong mekem sin, mekem se Lod i gat stamba tingting blong sendem mi blong talemaot profesi agensem ol pipol ia, yes, wan bigfala nogud samting agensem pipol ia tu?

30 Yufala i no save se mi stap talem trutok? Yes, yufala i save se mi stap talem trutok; mo yufala i nid blong seksek wetem fraet long fored blong God.

31 Mo bae i kam blong hapen se bae oli panisim yufala from ol rabis fasin blong yufala, from

yufala i bin talem se yufala i tijim loa blong Moses. Mo yufala i save wanem long saed blong loa blong Moses? Fasin blong sevem man i kam tru long loa blong Moses? Yufala i talem wanem?

32 Mo oli bin ansa mo talem se fasin blong sevem man i bin kam tru long loa blong Moses.

33 Be nao Abinadae i bin talem long olgeta: Mi save se sapos yufala i holem ol komanmen blong God, bae yufala i sev; yes, sapos yufala i holem ol komanmen we Lod i bin givim long Moses long hil blong Sinae, i talem:

34 Mi mi Lod, God blong yu, we i bin karemaot yu long graon blong Ijip, aot long haos blong slef.

35 Yu yu no mas gat wan narafala God bifo long mi.

36 Yu yu no mas mekem blong yu bakegen eni kaen pikja, o eni samting we i olsem eni samting antap long heven, o ol samting we i stap daon long wol ia.

37 Nao Abinadae i bin talem long olgeta, Yufala i bin mekem evri samting ia? Mi talem long yufala se No, yufala i no bin mekem. Mo yufala i bin tijim ol pipol ia se oli mas mekem evri samting ia? Mi talem long yufala se No, yufala i no bin mekem.

---

### JAPTA 13

---

*Paoa blong God i lukaot gud long Abinadae—Hem i tijim ol Ten Komanmen—Fasin blong sevem*

*man i no kam tru long loa blong Moses nomo—God hemwan bae i mekem wan atonmen mo pemaot ol pipol blong hem. Raonabaot 148 yia bifo Kraes i bon.*

Mo nao taem we king i bin harem ol toktok ia, hem i bin talem long ol pris blong hem: Tekem man ia i gowe, mo kilim hem i ded; from bae yumi mekem wanem wetem hem, from hem i krangke.

2 Mo oli bin stanap mo bin traem blong putum ol han blong olgeta long hem, be hem i bin stanap strong long olgeta, mo i bin talem long olgeta:

3 Yufala i no tajem mi, from bae God i panisim yufala sapos yufala i putum han blong yufala long mi, from mi no bin talem-aot yet mesej ia we Lod i bin sendem mi blong talemaot; mo mi no bin talemaot long yufala yet, ol samting we yufala i bin askem mi blong talem; taswe, God bae i no letem se yufala i smasem gud mi long taem ia.

4 Be mi mas mekem i hapen ol komanmen we God i bin givim long mi; mo from mi bin talem yufala trutok ia yufala i kros long mi. Mo bakegen, from mi bin talemaot toktok blong God yufala i bin jajem mi se mi mi krangke.

5 Nao i bin hapen se afta we Abinadae i bin talemaot ol toktok ia ol pipol blong king Noa oli fraet blong putum ol han blong olgeta long hem, from Spirit blong Lod i bin stap wetem hem; mo fes blong hem i bin saen we i saen bigwan,



olsem we fes blong Moses i bin mekem taem we hem i bin stap long hil blong Sinae taem we hem i stap toktok wetem Lod.

6 Mo hem i bin toktok wetem paoa mo raet long God; mo hem i bin gohed wetem ol toktok blong hem, se:

7 Yufala i luk se yufala i no gat paoa blong kilim ded mi, taswe mi finisim mesej blong mi. Yes, mo mi luk se i go tru long ol hat blong yufala from mi talem tru long yufala long saed blong ol rabis fasin blong yufala.

8 Yes, mo ol toktok blong mi i fulumap yufala wetem bigfala sek mo sapraes, mo wetem kros.

9 Be mi finisim mesej blong mi, mo afta i nomata se mi go long wanem ples, sapos i hapen se mi sev.

10 Be mi save talem hemia long yufala, wanem we yufala i mekem long mi, afta long samting ia, bae hem i wan eksampol mo wan pikja blong ol samting we bae oli kam.

11 Mo nao mi ridim long yufala smol haf blong ol komanmen blong God, from mi luk se yufala i no raetem olgeta long ol hat blong yufala; mi luk se yufala i bin lanem mo oli bin tijim rabis fasin long bigfala pat blong laef blong yufala.

12 Mo nao, yufala i tingbaot we mi bin talem long yufala: Yu yu no mas mekem blong yu bakegen eni kaen pikja, o eni narafala samting we i olsem ol samting antap long heven, o we i stap daon long wol ia, o we i stap long solwota andanit long graon.

13 Mo bakegen: Yu yu no mas bodaon yuwan long olgeta, mo wok blong olgeta; from mi Lod, God blong yu, mi mi wan jalus God, mi stap panisim ol rabis fasin blong ol papa long ol pikinini, i go kasem long nambatri mo nambafo jeneresen blong olgeta we oli no laekem mi;

14 Mo i stap soem sore long ol taosen blong olgeta we oli lavem mi mo holem ol komanmen blong mi.

15 Yu yu no mas tekem nem blong Lod, God blong yu blong nating; from bae Lod i no luk se man ia i no gat rong, we i stap tekem nem blong hem blong nating.

16 Tingbaot sabbat dei, blong holem i tabu.

17 Sikis dei bae yu wok, mo mekem evri wok blong yu;

18 Be nambaseven dei, sabbat blong Lod, God blong yu, yu yu no mas mekem eni wok, yu, o boe blong yu, o gel blong yu, man blong wok blong yu, o woman blong wok blong yu, o ol buluk blong yu, o ol strenja we oli stap long ples blong yu;

19 From long sikis dei Lod i bin mekem heven mo wol, mo solwota, mo evri samting we i stap long hem; from samting ia Lod i bin blessem sabbat dei, mo i bin mekem i tabu.

20 Ona long papa mo mama blong yu, blong mekem se ol dei blong yu i save longfala long graon we Lod, God blong yu i givim long yu.

21 Yu yu no mas kilim man i ded.

22 Yu yu no mas mekem adaltri. Yu yu no mas stil.

23 Yu yu no mas mekem giaman toktok agensem ol man we i stap raonabaot long yu.

24 Yu yu no mas gat tingting blong wantem haos blong man we i stap raonabaot long yu, yu no mas gat tingting blong wantem woman blong man we i stap raonabaot long yu, o man blong wok blong hem, o woman blong wok blong hem, o buluk blong hem, o dongki blong hem, o eni samting we i blong man we i stap raonabaot long yu.

25 Mo i bin hapen se afta we Abinadae i bin stop long ol toktok blong hem we hem i bin talem long olgeta: Yufala i bin tijim ol pipol ia se oli mas mekem evri samting ia blong holem ol komanmen ia?

26 Mi talem long yufala, No; from sapos yufala i bin mekem, bae Lod i no bin mekem mi blong kam fored mo blong talemaot profesi we i no gud long saed blong ol pipol ia.

27 Mo nao yufala i bin talem se fasin blong sevem man i kam tru long loa blong Moses. Mi talem long yufala se i gat nid blong yufala bae i gohed blong holem taet loa blong Moses yet, be mi talem long yufala se taem ia bae i kam we bae i nomo gat nid blong holem loa blong Moses.

28 Mo antap long samting ia, mi talem long yufala, se fasin blong sevem man i no kam tru long loa ia nomo; mo sapos i no from atonmen, we God hemwan bae i mekem from ol sin mo ol rabis fasin blong ol pipol blong

hem, bae oli mas ded, i nomata long loa blong Moses.

29 Mo nao mi talem long yufala se i bin gat nid blong oli givim wan loa long ol pikinini blong Isrel, yes, wan strongfala loa tu; from oli bin wan stronghed pipol, oli kwik blong mekem rabis fasin, mo slo blong tingbaot Lod God blong olgeta.

30 Taswe oli bin givim wan loa long olgeta, yes, wan loa blong mekem ol wok mo ol odinens, wan loa we oli bin nid blong folem gud long wan dei i go long narafala dei, blong kipim olgeta blong tingbaot God mo ol wok blong olgeta i go long hem.

31 Be luk, mi talem long yufala, se evri samting ia oli ol eksampol blong ol samting we bae oli kam.

32 Mo nao, oli bin andastanem loa? Mi talem long yufala, No, evriwan i no bin andastanem loa ia; mo samting ia from ol hat blong olgeta i strong tumas; from oli no andastanem we i no save gat wan man we i save sev hemia nomo sapos i no tru long fasin blong pemaot man we i blong God.

33 From luk, i no tru se Moses i bin talemaot profesi long olgeta long saed blong taem we Mesaea bae i kam, mo we God bae i pemaot ol pipol blong hem? Yes, mo tu evri profet we oli bin talemaot ol profesi stat long taem we wol i bin stat—i no tru se oli bin toktok plante o smol long saed blong ol samting ia?

34 Oli no bin talemaot se God

hemwan bae i kam daon long medel blong ol pikinini blong ol man, mo tekem long hem pikja blong wan man mo go fored wetem bigfala paoa long fes blong wol?

35 Yes, mo oli no bin talemaot tu se bae hem i mekem i hapen laef bakegen blong ol ded, mo we hem, hemwan, bae oli mekem nogud fasin mo givim hadtaem long hem?

---

### JAPTA 14

---

*Aesea i tokbaot Mesaea—Hem i talemaot ol fasin blong mekem man i sem mo ol safa blong Mesaea—Hem i givim sol blong hemwan olsem wan presen blong pemaot sin, mo hem i givhan long olgeta we oli mekem sin—Luk long Aesea japta 53. Raonabaot 148 yia bifo Kraes i bon.*

YES, mo tu Aesea i no talem se: Huia i bin bilivim ripot blong mifala, mo long huia, Lod i bin soem han blong hem?

2 From bae hem i gru i kam antap long fored blong hem olsem wan plan we i sofosof, mo olsem wan rus we i kamaot long graon we i drae; hem i no gat sep mo i no luk naes tumas; mo taem we bae yumi luk hem, i no gat wan samting blong pulum ae blong yumi blong mekem se yumi wantem hem.

3 Oli lukluk daon long hem mo ol man i tanem baksaed long hem; wan man blong ol sore, mo hem i savegud ol samting blong mekem man i harem nogud; mo i olsem se yumi bin tanem ol fes

blong yumi long hem; oli bin lukluk daon long hem mo yumi no bin tingting hevi long hem.

4 I tru se hem i bin harem nogud long ol sore blong yumi, mo i bin karem ol sore blong yumi; be stil yumi ting se hem i bin kasem panis, panis ia i kam long God, mo i bin gat hadtaem.

5 Be hem i bin kasem kil from ol sin blong yumi, skin blong bodi blong hem i bin kasem ol mak blong kil from ol rabis fasin blong yumi; mo fasin blong stretem blong pis blong yumi, i bin stap long hem; mo tru long ol mak blong kil blong hem, yumi kam oraet.

6 Yumi evriwan, olsem ol sip-sip, i bin go olbaot; yumi bin tanem, evriwan i bin go long wan wan rod blong hem; mo Lod i bin putum long hem ol rabis fasin blong yumi evriwan.

7 Oli bin mekem nogud fasin long hem, mo oli bin givim hadtaem long hem, be stil hem i no bin openem maot blong hem; oli karem hem i go olsem wan smol sipsip we i go blong kasem ded, mo olsem wan sipsip long fored blong ol man blong katemaot hea blong sipsip, hem i no save toktok, olsem ia hem i no bin openem maot blong hem.

8 Oli bin tekemaot hem long kalabus mo aot long jajmen; mo huia bae i talemaot jeneresen blong hem? From oli bin katemaot hem long graon blong olgeta we oli stap laef; from ol fasin blong brekem ol loa blong ol pipol blong mi, hem i bin gat hadtaem.

9 Mo hem i bin mekem gref blong hem wetem ol nogud man, mo wetem ol rij man long ded blong hem; from hem i no bin mekem wan nogud samting, mo tu i no bin gat eni rabis toktok long maot blong hem.

10 Be stil Lod i bin glad blong hem i kasem mak blong kil; hem i bin putum hem blong i harem nogud; taem we bae yu mekem sol blong hem i wan ofring blong sin, bae hem i luk ol pikinini blong hem, bae hem i mekem ol dei blong hem i go longwan, mo glad blong Lod bae i kam antap gud long han blong hem.

11 Bae hem i luk ol safa blong sol blong hem, mo bae hem i harem gud; tru long save blong hem bae stret wokman blong mi i talem se plante i no gat rong; from bae hem i karem ol rabis fasin blong olgeta.

12 Taswe bae mi givim pat blong hem wetem ol bigfala, mo bae hem i seraotem ol samting we hem i bin tekem taem we hem i bin go stil long haos, wetem ol strong; from hem i poremaot sol blong hem i go long ded; mo oli bin kaontem hem wetem olgeta we oli brekem loa; mo hem i bin karem ol sin blong plante man, mo i bin givhan long olgeta we oli brekem loa.

---

### JAPTA 15

---

*Olsem wanem Kraes i Papa mo Pikinini—Bae hem i givhan mo karem ol fasin blong brekem loa blong ol pipol blong hem—Olgeta*

*mo evri tabu profet oli ol pikinini blong hem—Hem i mekem laef bakegen i hapen—Ol smol pikinini i kasem laef we i no save finis. Raonabaot 148 yia bifo Kraes i bon.*

Mo nao Abinadae i bin talem long olgeta se: Mi wantem blong yufala i andastanem se God hemwan bae i kamdaon long medel blong ol pikinini blong ol man, mo bae hem i pemaot ol pipol blong hem.

2 Mo from hem i stap laef long bodi blong mit mo bun, bae oli singaotem hem Pikinini blong God, mo from hem i bin putum bodi blong mit mo bun long wanem Papa i wantem, hem i Papa mo Pikinini—

3 Hem i Papa, from oli bin mekem hem wetem paoa blong God; mo hem i Pikinini from bodi blong mit mo bun; olsem ia nao hem i kam Papa mo Pikinini—

4 Mo tufala i wan God, yes, Papa ia we i no Save Finis blong heven mo blong wol.

5 Mo olsem ia nao bodi blong mit mo bun i stap andanit long Spirit, o Pikinini blong Papa, we oli wan God, i fesem ol temtesen, mo i no foldaon long ol temtesen, be i letem hemwan blong oli jikim hem, mo wipim hem, mo sakemaot, mo ol pipol blong hem oli no wantem hem.

6 Mo afta evri samting ia, afta we hem i bin mekem plante bigfala merikel long medel blong ol pikinini blong ol man, bae oli lidim hem, yes, olsem we Aesea i bin talem, olsem wan sipsip long fored blong man

blong katemaot hea blong sipsip i no toktok, olsem ia hem i no openem maot blong hem.

7 Yes, long sem fasin bae oli lidim hem, krusifaem hem, mo kilim hem i ded, bodi blong mit mo bun bae i stap andanit long ded tu, wanem we Pikinini i wantem bae i kam wan pat blong wanem we Papa i wantem.

8 Mo olsem ia nao God i brekem ol rop blong ded, from hem i bin winim ded; hem i givim paoa long Pikinini blong givhan long ol pikinini blong ol man—

9 Hem i bin go antap long heven, hem i bin gat stamba blong sore; hem i bin fulap wetem sore long ol pikinini blong ol man; hem i bin stanap bitwin long olgeta mo jastis; hem i bin brekem ol rop blong ded, hem i bin tekem long hemwan ol rabis fasin mo ol fasin blong brekem loa blong olgeta, hem i bin pemaot olgeta, mo i bin givim wanem we jastis i askem.

10 Mo nao mi talem long yufala, huia bae i talemaot ol jeneresen blong hem? Luk, mi talem long yufala, se taem we bae oli mekem sol blong hem i wan ofring blong sin, bae hem i luk ol pikinini blong hem. Mo nao wanem yufala i talem? Mo huia bae i pikinini blong hem?

11 Luk mi talem long yufala, se eni man we i bin harem ol toktok blong ol profet, yes, evri tabu profet we i bin talemaot profesi long saed blong taem we Lod bae i kam—Mi talem long yufala, se evriwan we i bin lisin gud long ol toktok blong olgeta,

mo i bin biliv se Lod bae i pemaot ol pipol blong hem, mo oli bin lukluk i go fored long dei blong oli kam klin aot long ol sin blong olgeta—Mi talem long yufala, se olgeta ia oli ol pikinini blong hem, o oli olgeta we bae oli kasem kingdom blong God.

12 From olgeta ia oli olgeta we hem i bin karem ol sin blong olgeta; olgeta ia oli olgeta we hem i bin ded from, blong pemaot olgeta long ol loa we oli bin brekem. Mo nao, olgeta ia oli no ol pikinini blong hem?

13 Yes, mo ol profet oli no ol pikinini blong hem, evriwan we i bin openem maot blong hem blong talemaot profesi, we i no bin foldaon long fasin blong brekem loa, mi minim se evri tabu profet stat long taem we wol i bin stat? Mi talem long yufala se oli ol pikinini blong hem.

14 Mo olgeta ia oli olgeta we oli bin talemaot pis, we oli bin karem gudfala nius blong gud, we i bin talemaot fasin blong sevem man, mo talem long Saeon: God blong yu i rul!

15 Mo O hamas naes nao, long ol bigfala hil, ol leg blong olgeta!

16 Mo bakegen, hamas naes nao, long ol bigfala hil, ol leg blong olgeta we oli stil stap talemaot pis!

17 Mo bakegen, hamas naes nao, long ol bigfala hil, ol leg blong olgeta we bae oli talemaot pis long fiuja, yes, stat long taem ia i go kasem blong oltaem!

18 Mo luk, mi talem long yufala se, i no hemia nomo. From hamas naes nao, long ol bigfala

hil, ol leg blong hem we i karem i kam ol gudfala nius, we i stamba man blong pis, yes, we hem i Lod, we i bin pemaot ol pipol blong hem; yes, hem we i bin givim fasin blong sevem man long ol pipol blong hem;

19 From sapos i no bin gat fasin blong pemaot man we hem i bin mekem blong ol pipol blong hem, we oli bin mekem rere long stat blong wol, mi talem long yufala, sapos i no bin gat samting ia, evri pipol bae oli mas ded.

20 Be luk, ol rop blong ded bae oli brekem olgeta mo Pikinini i stap rul, mo i gat paoa ova long ded; taswe, hem i mekem i hapen laef bakegen blong ol ded.

21 Mo i gat wan laef bakegen we i stap kam, yes, we i wan faszala laef bakegen; yes, we i wan laef bakegen blong olgeta we oli bin stap, mo we oli stap, mo we bae oli stap, i go kasem laef bakegen blong Kraes— from olsem ia nao bae oli singaotem hem.

22 Mo nao, laef bakegen blong evri profet, mo evriwan we oli bin biliv long ol toktok blong olgeta, o evriwan we oli bin holem ol komanmen blong God, bae oli kam aot long faszala laef bakegen; taswe, oli faszala laef bakegen.

23 God i leftemap olgeta blong stap wetem hem, we i bin pemaot olgeta; olsem ia nao oli kasem laef we i no save finis tru long Kraes, we i bin brekem ol rop blong ded.

24 Mo hemia olgeta we oli gat

pat long faszala laef bakegen; mo hemia olgeta we oli bin ded bifo Kraes i bin kam, long no save blong olgeta, oli no bin talemaot fasin blong sevem man long olgeta. Mo olsem ia nao Lod i mekem kambak i hapen; mo oli gat wan pat long faszala laef bakegen, o kasem laef we i no save finis, from Lod i bin pemaot olgeta.

25 Mo ol smol pikinini tu i kasem laef we i no save finis.

26 Be luk, mo fraet, mo seksek long fes blong God, from yufala i nid blong seksek; from Lod i no pemaot eni man we oli tanem baksaed i go agensem hem, mo oli ded wetem ol sin blong olgeta; yes, evriwan tu we i bin ded wetem ol sin blong olgeta, stat long taem we wol i bin stat, we oli minim blong go agensem God, we oli bin save ol komanmen blong God, mo oli no holem olgeta; hemia olgeta we oli no gat pat long faszala laef bakegen.

27 Taswe to yufala i no ting se yufala i nid blong seksek from fraet? From fasin blong sevem man i no kam long eni man olsem; from Lod i no bin pemaot eni man olsem; yes, mo tu Lod i no save pemaot eni man olsem ia; from hem i no save tanem baksaed long hemwan; from hem i no save tanem baksaed long jastis taem we hem i gat raet blong hem.

28 Mo nao mi talem long yufala se taem bae i kam we bae oli talemaot fasin blong sevem man blong Lod i go long evri kantri, famle, lanwis, mo pipol.

29 Yes, Lod, ol gadman blong yu bae oli singaot laod; wetem ol voes tugeta bae oli singsing; from bae oli luk wetem ae blong olgeta, taem we Lod bae i karembak Saeon.

30 Kamaot wetem glad, singsing tugeta, yufala ol emti ples blong Jerusalem; from Lod i bin leftemap tingting blong ol pipol blong hem, hem i bin pemaot Jerusalem.

31 Lod i bin soemaot tabu han blong hem long ol ae blong evri kantri; mo evri en blong wol bae i luk fasin blong sevem man blong God blong yumi.

---

JAPTA 16

---

*God i pemaot man long fasin blong lus mo foldaon blong olgeta—Olgeta we oli laekem ol fasin blong wol, oli stap olsem se i no gat wan fasin blong pemaot man—Kraes i mekem i hapen wan laef bakegen blong kasem laef we i no gat en blong hem, o blong kasem panis we i no gat en blong hem. Raonabaot 148 yia bifo Kraes i bon.*

Mo nao, i bin hapen se afta we Abinadae i bin talemaot ol toktok ia hem i bin stretem han blong hem mo bin talem se: Taem bae i kam we evriwan bae i luk fasin blong sevem man blong Lod; taem we evri kantri, famle, lanwis, mo pipol bae oli luk wetem ae blong olgeta, mo bae oli talemaot long fes blong God se ol jajmen blong hem oli stret.

2 Mo afta bae oli sakemaot ol nogud man, mo bae oli gat

stamba tingting blong singaot strong, mo krae, mo krae laod, mo kakae tut blong olgeta; mo samting ia from oli no bin wantem lisiin long voes blong Lod; taswe, Lod i no pemaot olgeta.

3 From olgeta oli gat fasin blong wol mo blong devel, mo devel i gat paoa ova long olgeta; yes, hem i olfala snek ia we i bin trikim ol fas mama mo papa blong yumi, we i bin mekem olgeta i foldaon; we i bin mekem evri man i kasem fasin blong wol, oli lukaotem ol wei blong harem gud, mo oli mekem olsem devel, oli save nogud samting aot long gudfala samting, oli letem devel i kontrolem olgeta.

4 Olsem ia nao evri man i bin lus; mo luk, bae oli bin lus blong oltaem sapos God i no bin pemaot ol pipol blong hem from ples blong lus mo foldaon blong olgeta.

5 Be tingbaot se man we i gohed long fasin blong wol blong hem, mo i gohed long ol rod blong sin, mo i tanem baksaed blong hem agensem God, i stap long ples blong foldaon blong hem mo devel i gat evri paoa ova long hem. Taswe hem i olsem se i no bin gat wan fasin blong pemaot man we i bin hapen, hem i wan enemi blong God; mo tu devel i wan enemi blong God.

6 Mo nao sapos Kraes i no bin kam long wol, blong talemaot ol samting we bae i kam olsem se oli bin kam finis, i no bin save gat wan fasin blong pemaot man.

7 Mo sapos Kraes i no bin girap long ded, o i no bin brekem ol rop blong ded, blong mekem se gref i no save win, mo blong mekem se harem nogud blong ded bae i no gat, bae i no bin save gat wan laef bakegen.

8 Be i gat wan laef bakegen, taswe gref i no win, mo harem nogud blong ded i lus long Kraes.

9 Hem i laet mo laef blong wol; yes, wan laet we i no gat en, we i no save kam tudak; yes, mo tu wan laef we i no gat en, mekem se i nomo save gat ded.

10 Mo tu ded bodi blong wol ia bae i kam wan bodi we i nomo save ded, mo roten bodi ia bae i nomo save roten, mo bae oli karem olgeta blong stanap long kot blong God, blong kasem jajmen folem ol wok blong olgeta, sapos oli gud, o sapos oli nogud—

11 Sapos oli gud, blong go long laef bakegen blong laef we i no gat en mo glad; mo sapos oli nogud, blong go long laef bakegen blong panis we i no gat en, oli givim olgeta long devel, we i kontrolem olgeta, we i panis—

12 Oli bin go folem ol fasin blong wol blong olgeta nomo, mo ol tingting blong olgeta; oli neva bin singaotem Lod taem we hem i stap stretem ol han blong sore i go long olgeta; from ol han blong sore oli bin stretem i go long olgeta mo oli no bin wantem; oli bin wonem olgeta long saed blong ol rabis fasin blong olgeta mo stil, oli

no bin aot long olgeta; mo oli bin givim oda long olgeta blong sakem sin mo oli no bin wantem sakem sin.

13 Mo nao, to yufala i no ting se yufala i nid blong seksek mo sakem sin blong yufala, mo tingbaot se tru mo long Kraes yufala i save sev?

14 Taswe, sapos yufala i tijim loa blong Moses, tijim tu se i wan pikja blong ol samting ia we bae oli kam—

15 Tijim olgeta se fasin blong pemaot man i kam tru long Kraes, Lod we i Papa ia we i no Save Finis. Amen.

---

#### JAPTA 17

---

*Alma i bilivim mo i raetem ol toktok blong Abinadae—Abinadae i kasem ded tru long faea—Hem i profesae se ol siknes mo ded long faea bae i kam long olgeta we oli kilim hem i ded. Raonabaot 148 yia bifo Kraes i bon.*

Mo nao i bin hapen se taem we Abinadae i bin finisim ol toktok ia, se king i givim oda blong ol pris i tekem hem mo oli kilim hem i ded.

2 Be i bin gat wan long olgeta we nem blong hem i Alma, hem tu i bin kamaot long laen blong Nifae. Mo hem i bin wan yangfala man, mo hem i bin biliv long ol toktok we Abinadae i bin talemaot, from hem i bin save long saed blong rabis fasin we Abinadae i bin testifae agensem olgeta; taswe, hem i bin stat blong askem strong long king blong hem i no kros



long Abinadae, be letem se hem i save aot long pis.

3 Be king i bin kam moa kros, mo i bin mekem se oli sakemaot Alma long olgeta, mo hem i bin sendem ol wokman blong hem blong folem hem blong mekem se oli save kilim hem i ded.

4 Be hem i bin ronwe long olgeta, mo i bin haed blong mekem se oli no bin faenem hem. Mo from hem i bin haed blong plante dei, hem i bin raetem evri toktok we Abinadae i bin talemaot.

5 Mo i bin hapen se king i bin mekem se ol gad blong hem i raonem Abinadae mo tekem hem; mo oli bin fasem hem mo bin sakem hem i go long kalabus.

6 Mo afta tri dei, afta hem i bin toktok wetem ol pris blong hem, hem i bin mekem se oli tekem hem bakegen i kam long fored blong hem.

7 Mo hem i bin talem long hem: Abinadae, mifala i bin faenem wan rong agensem yu, mo yu yu stret blong ded.

8 From yu bin talem se God hemwan bae i kam daon long medel blong ol pikinini blong ol man; mo nao, from samting ia bae oli kilim yu i ded hemia nomo sapos yu no jenisim evri toktok we yu bin talemaot we i nogud long saed blong mi mo ol pipol blong mi.

9 Nao Abinadae i bin talem long hem: Mi talem long yufala, bae mi no jenisim ol toktok we mi bin talemaot long yufala long saed blong ol pipol ia, from oli tru; mo blong mekem

se yufala i save se oli tru, mi bin letem mi blong foldaon long ol han blong yufala.

10 Yes, mo bae mi safa i go kasem ded, mo bae mi no jenisim ol toktok blong mi, mo bae oli stap olsem wan testimononi agensem yufala. Mo sapos yufala i kilim ded mi bae yufala i mekem blad blong wan man we i no gat rong i ron, mo tu samting ia bae i stap olsem wan testimononi agensem yufala long las dei.

11 Mo nao king Noa i bin rere blong letem hem i go, from hem i bin fraet long toktok blong hem, from hem i bin fraet se ol jajmen blong God bae i kam long hem.

12 Be ol pris i bin singaot strong agensem hem, mo oli bin stat blong toktok agensem hem, oli talem: Hem i bin toktok agensem king. Taswe king i bin kam kros agensem hem, mo hem i bin givim hem long olgeta blong mekem se oli save kilim hem i ded.

13 Mo i bin hapen se oli bin tekem hem mo bin fasem hem, mo bin wipim skin blong hem wetem ol wud we faea i stap long hem, yes, go kasem taem we hem i ded.

14 Mo nao taem we ol flem i bin stat blong bonem hem, hem i bin singaot i go long olgeta se:

15 Luk, olsem we yufala i bin mekem long mi, olsem ia bae i kam blong hapen se ol pikinini blong yufala bae oli mekem se plante bae oli safa ol soa blong bodi we mi stap safa, we i ol soa blong ded tru long faea; mo

hemia from oli bin biliv long fasin blong sevem man blong Lod, God blong olgeta.

16 Mo bae i kam blong hapen se bae yufala i kasem hadtaem wetem ol kaen siknes from ol rabis fasin blong yufala.

17 Yes, mo bae oli faetem yufala long evri saed, mo bae oli ronem yufala mo mekem se yufala i seraot i go olbaot, i go ia mo i go ia, olsem wan wael grup blong ol anamol, we ol wael mo rabis anamol oli stap ronem olgeta.

18 Mo long dei ia bae oli lukaotem yufala, mo ol han blong ol enemi blong yufala bae i hol-em yufala, mo afta bae yufala i safa, olsem we mi mi safa, ol soa blong ded tru long faea.

19 Olsem ia nao God i pembak long olgeta we oli kilim ded ol pipol blong hem. O God, kasem sol blong mi.

20 Mo nao, taem we Abinadae i bin talem ol toktok ia, hem i bin foldaon, from hem i bin kasem ded tru long faea; yes, oli bin kilim hem i ded from hem i no save tanem baksaed blong hem long ol komanmen blong God, hem i bin soem we ol toktok blong hem i tru, tru long ded blong hem.

---

### JAPTA 18

---

*Alma i prij long sikret—Hem i eksplenem kavenan blong baptaes, mo i mekem baptaes long ol wota blong Momon—Hem i statem Jos blong Kraes mo odenem ol pris—Oli lukaotem olgeta bakegen mo*

*tijim ol pipol—Alma mo ol pipol blong hem i ronwe long King Noa i go long ples we i no gat man long hem. Raonabaot 147–145 yia bifo Kraes i bon.*

Mo nao, i bin hapen se Alma, we i bin ronwe long ol wokman blong king Noa, i bin sakem ol sin blong hem mo ol rabis fasin blong hem, mo i bin go long sikret nomo long medel blong ol pipol, mo i bin stat blong tijim ol toktok blong Abinadae—

2 Yes, long saed blong samting we bae i kam, mo tu long saed blong laef bakegen blong ol ded, mo fasin blong pemaot man blong ol pipol, we bae i kam blong hapen tru long paoa, mo ol hadtaem, mo ded blong Kraes, mo laef bakegen blong hem, mo taem hem i gobak antap long heven.

3 Mo evri man i bin wantem blong harem toktok blong hem, hem i bin tijim olgeta. Mo hem i bin tijim olgeta long sikret nomo, blong mekem se king i no save long saed blong ol samting ia. Mo i bin gat plante man we oli bin bilivim ol toktok blong hem.

4 Mo i bin hapen se evriwan we i bin bilivim hem, i bin go aot long wan ples we oli singaotem Momon, we king nao i bin givim nem ia, from i bin stap long ol boda blong graon we i bin fulap, long ol taem o ol defren taem, wetem ol wael anamol.

5 Nao, i bin gat long Momon wan springwota, blong wota we i klia, mo Alma i bin go long ples ia, from we i bin gat klosap

long wota, wan smol bus blong ol smol tri, we hem i bin haedem hemwan long deitaem from king i stap lukaotem hem.

6 Mo i bin hapen se olgeta evriwan we i bin bilivim hem i bin go long ples ia blong harem ol toktok blong hem.

7 Mo i bin hapen se afta plante dei i bin gat wan bigfala namba we i bin kam tugeta long ples blong Momon, blong harem ol toktok blong Alma. Yes, evriwan i bin kam tugeta, olgeta we oli bin biliv long ol toktok blong hem, blong harem hem. Mo hem i bin tijim olgeta, mo hem i bin prij long olgeta fasin blong sakem sin, mo fasin blong pemaot man, mo fet long Lod.

8 Mo i bin hapen se hem i bin talem long olgeta: Luk, hemia ol wota blong Momon (from olsem ia nao oli bin singaotem ples ia) mo nao, from yufala i wantem blong kam long yad blong God, mo se oli singaotem yufala ol pipol blong hem, mo yufala i glad blong karem ol hevi samting blong wan wan long yufala, blong mekem se oli nomo hevi;

9 Yes, mo yufala i glad blong krae wetem olgeta we oli krae, yes, mo leftemap tingting blong olgeta we oli nidim fasin blong leftemap tingting, mo blong stanap olsem ol witnes blong God evri taem mo long evri samting, mo long evri ples we yufala i save stap long hem, go kasem ded, mekem se God i save pemaot yufala, mo bae oli kaotem yufala wetem olgeta ia blong fasfala laef bakegen,

mekem se yufala i save kasem laef we i no save finis—

10 Nao mi talem long yufala, sapos hemia i tingting we ol hat blong yufala i wantem, wanem nao yufala i gat we i go agensem yufala blong kasem baptaes long nem blong Lod, olsem wan witnes long fored blong hem se yufala i bin mekem wan kavenan wetem hem, se bae yufala i wok blong hem mo holem ol komanmen blong hem blong mekem se hem i save poremaot Spirit blong hem moa fulap long yufala?

11 Mo nao taem we ol pipol i bin harem ol toktok ia, oli bin klapem han blong olgeta from glad, mo oli bin singaot: Hemia tingting we ol hat blong mifala i wantem.

12 Mo nao i bin hapen se Alma i bin tekem Helam, we i wan long ol faswan, mo i bin go mo i bin stanap fored insaed long wota, mo i bin singaot laod, i se: O Lod, poremaot Spirit blong yu long wokman blong yu, blong mekem se hem i save mekem wok ia wetem wan hat we i tabu.

13 Mo taem we hem i bin talem ol toktok ia, Spirit blong Lod i bin kamdaon long hem, mo hem i bin talem: Helam, mi baptaesem yu, from mi mi gat raet long God we i gat Bigfala Paoa, olsem wan testemoni we yu bin mekem wan kavenan blong wok blong hem kasem taem we yu ded long bodi blong mit mo bun; mo bae Spirit blong Lod i save poremaot long yu; mo bae hem i givim long yu laef

we i no save finis, tru long fasin blong pemaot man blong Kraes we hem i bin mekem i rere stat long taem we wol i bin stat.

14 Mo afta we Alma i bin talemaot ol toktok ia, Alma tugeta wetem Helam i bin berem tufala tugeta andanit long wota; mo tufala i bin girap mo kam fored aot long wota wetem glad, from tufala i bin fulap wetem Spirit.

15 Mo bakegen, Alma i bin tekem wan narafala wan mo i bin go fored blong nambatu taem insaed long wota, mo i bin baptaesem hem olsem fasfala wan, be hemia nomo hem i no bin berem hemwan bakegen long wota.

16 Mo folem fasin ia hem i bin baptaesem evriwan we i bin go fored long ples blong Momon; mo namba blong olgeta i bin klosap tu hundred mo fo sol; yes, mo oli bin kasem baptaes long ol wota blong Momon, mo oli bin fulap wetem gladhat blong God.

17 Mo oli bin singaotem olgeta jos blong God, o jos blong Kraes, stat long taem ia i go. Mo i bin hapen se eni man we i bin kasem baptaes tru long paoa mo raet blong God, i bin joenem jos blong hem.

18 Mo i bin hapen se Alma, from we hem i bin gat raet long God, i bin odenem ol pris; wan pris long evri fifti long namba blong olgeta, hem i bin odenem, blong prij long olgeta, mo blong tijim olgeta long saed blong ol samting we oli blong kingdom blong God.

19 Mo hem i bin givim oda long olgeta se oli no mas tijim eni samting be hemia nomo ol samting we hem i bin tijim, mo we oli bin kamaot long maot blong ol tabu profet.

20 Yes, hem i bin givim oda long olgeta tu se oli no mas prijim eni samting be hemia nomo fasin blong sakem sin mo fet long Lod ia we i bin pemaot ol pipol blong hem.

21 Mo hem i bin givim oda long olgeta se i no mas gat rao wan wetem narawan, be se oli mas lukluk i go long fored wetem wan ae, mo gat wan fet, mo wan baptaes, mo ol hat blong olgeta oli joen tugeta blong kam wan long lav, long wan wan long olgeta.

22 Mo olsem ia nao hem i bin givim oda long olgeta blong prij. Mo olsem ia nao oli bin kam ol pikinini blong God.

23 Mo hem i bin givim oda long olgeta se oli mas obei long sabat dei, mo holem i tabu, mo tu long evri dei oli mas talem tangkyu long Lod, God blong olgeta.

24 Mo tu hem i bin givim oda long olgeta se ol pris we hem i bin odenem olgeta i mas wok wetem ol han blong olgeta nomo blong sapotem olgeta.

25 Mo i bin gat wan dei long evri wik we oli bin putum blong oli mas kam tugeta blong tijim ol pipol, mo blong wosipim Lod, God blong olgeta, mo tu, long evri taem olsem we i save hapen long paoa blong olgeta, blong olgeta i kam tugeta.

26 Mo ol pris oli no mas dipen

long ol pipol blong sapotem olgeta; be from ol wok blong olgeta bae oli kasem gladhat blong God, mekem se oli save kam strong long Spirit, from oli gat save blong God, mekem se oli save tij wetem paoa mo raet long God.

27 Mo bakegen Alma i bin givim oda se ol pipol blong jos i mas serem wanem oli gat, evriwan folem wanem hem i bin gat; sapos hem i gat moa plante hem i mas serem aot moa plante; mo long hem we i bin gat be smol nomo, bae oli askem smol nomo; mo long hem we i no bin gat oli mas givim.

28 Mo olsem ia nao oli mas serem wanem olgeta i gat, tru long gladhat blong olgeta mo gudfala tingting blong olgeta nomo long God, mo long ol pris we oli bin stanap long nid, yes, mo long evri sol we oli nidim help mo oli neked.

29 Mo hemia hem i bin talem long olgeta, from God i bin givim oda long hem; mo oli bin wokbaot stret long fored blong God, oli serem samting long wan wan long olgeta, samting blong wol ia mo blong spirit folem ol samting we oli nidim mo samting we oli wantem.

30 Mo nao i bin hapen se evri samting ia i bin tekem ples long Momon, yes, klosap long ol wota blong Momon, long bus we i bin stap klosap long ol wota blong Momon; yes, ples blong Momon, ol wota blong Momon, bus blong Momon, hamas naes nao i olgeta long

ol ae blong olgeta we oli bin kam long ples ia blong save Ridima blong olgeta; yes, hamas blesing oli gat, from bae oli singsing blong presem hem blong oltaem.

31 Mo ol samting ia i bin hapen long boda blong graon, blong mekem se king i no save long saed blong olgeta.

32 Be luk, i bin hapen se king i bin faenemaot wan muv we i stap tekem ples long medel blong ol pipol, hem i bin sendem ol wokman blong hem blong wajem olgeta. Taswe long dei ia we oli stap kam tugeta blong harem ol toktok blong Lod, king i bin faenemaot olgeta.

33 Mo nao king i bin talem se Alma i bin stap lidim ol pipol blong tanem olgeta blong go agensem hem; taswe hem i bin sendem ami blong hem blong kilim olgeta i ded.

34 Mo i bin hapen se Alma mo ol pipol blong Lod i bin save se ami blong king i stap kam; taswe oli bin tekem ol tenet blong olgeta mo ol famle blong ogeta mo oli bin aot i go long ples we i no gat man long hem.

35 Mo namba blong olgeta i bin kasem raonabaot fo hundred mo fifti sol.

---

### JAPTA 19

---

*Gidion i traem blong kilim ded King Noa—Ol man blong Leman oli atakem graon—King Noa i ded tru long faea—Limhae i rul andanit long wan narafala king.*

*Raonabaot 145-121 yia bifo Kraes i bon.*

Mo i bin hapen se ami blong king i bin gobak, from oli bin lukaotem ol pipol blong Lod blong nating.

2 Mo nao luk, ol ami blong king i bin smol, from oli bin katem daon namba blong olgeta, mo oli bin stat blong gat wan seraot long medel blong smol haf blong ol pipol we i bin stap.

3 Mo smol pat i bin stat blong talemaot sam toktok agensem king mo i bin stat blong gat bigfala rao long medel blong olgeta.

4 Mo nao i bin gat wan man long medel blong olgeta we nem blong hem i Gidion, mo hem i bin wan strong man mo wan enemy blong king, taswe, hem i bin tekem naef blong faet blong hem, mo i bin mekem wan promes long kros blong hem se bae hem i kilim king i ded.

5 Mo i bin hapen se hem i bin faet wetem king; mo taem we king i bin luk se klosap bae hem i winim hem, hem i bin ronwe mo ron i go antap long taoa we i bin stap klosap long tempol.

6 Mo Gidion i bin folem hem mo i bin rere blong go antap long taoa blong kilim king i ded, mo king i bin sakem ae blong hem i go raonabaot long graon blong Semlon, mo luk, ami blong ol man blong Leman i bin stap insaed long ol boda blong graon.

7 Mo nao king i bin singaot long rabis soa blong sol blong

hem, i talem se: Gidion, no kilim mi, from ol man blong Leman i stap kam klosap long yumi, mo bae oli smasem yumi; yes, bae oli smasem ol pipol blong mi.

8 Mo nao king i no bin wari long ol pipol blong hem olsem we hem i bin wari from laef blong hemwan; Be, Gidion i no bin kilim hem i ded.

9 Mo king i givim oda long ol pipol se oli mas ronwe long ol man blong Leman, mo hemwan i bin go long fored blong olgeta, mo oli bin ronwe i go long ples we i no gat man long hem, wetem ol woman mo ol pikinini blong olgeta.

10 Mo i bin hapen se ol man blong Leman i bin folem olgeta, mo oli bin kasem olgeta, mo oli bin stat blong kilim olgeta i ded.

11 Nao i bin hapen se king i bin givim oda long olgeta se evri man i mas livim ol woman blong olgeta, mo ol pikinini blong olgeta, mo ronwe long ol man blong Leman.

12 Nao i bin gat plante we oli no bin wantem blong livim olgeta, be oli bin wantem moa blong stap mo ded wetem olgeta. Mo ol narafala wan i bin livim ol woman blong olgeta mo ol pikinini blong olgeta mo oli bin ronwe.

13 Mo i bin hapen se olgeta we i bin stap wetem ol woman blong olgeta mo ol pikinini blong olgeta i bin mekem se ol naes gel blong olgeta i mas stanap long fored blong olgeta mo askem strong long ol man blong Leman blong oli no kilim olgeta i ded.

14 Mo i bin hapen se ol man blong Leman i bin gat sore long olgeta, from oli glad tumas blong luk ol gel blong olgeta we oli naes.

15 Taswe ol man blong Leman i bin sevem laef blong olgeta, mo oli bin tekem olgeta i kam prisena mo oli bin tekem olgeta i gobak long graon blong Nifae, mo oli bin letem olgeta blong save stap long graon, long promes ia se bae oli givim king Noa i go long ol han blong ol man blong Leman, mo givim ol samting blong olgeta long olgeta, go kasem wan haf long evri samting we oli bin gat, wan haf long gol blong olgeta, mo silva blong olgeta, mo evri gudgudfala samting blong olgeta, mo olsem ia nao bae oli pem taks i go long king blong ol man blong Leman stat long wan yia i go long narafala yia.

16 Mo nao i bin gat wan long ol boe blong king long medel blong olgeta we oli bin tekem olsem prisena we nem blong hem i Limhae.

17 Mo nao Limhae i bin wantem se oli no kilim ded papa blong hem; be, Limhae i bin save ol rabis fasin blong papa blong hem, from hemwan i bin wan gudfala man.

18 Mo i bin hapen se Gidion i bin sendem sam man i go long ples we i no gat man long hem long sikret, blong lukaotem king mo olgeta we i bin stap wetem hem. Mo i bin hapen se oli bin mitim ol pipol long ples we i no gat man long hem,

evriwan be king mo ol pris blong hem nomo.

19 Nao oli bin mekem wan promes long ol hat blong olgeta se bae oli gobak long graon blong Nifae, mo sapos ol woman mo ol pikinini blong olgeta oli bin ded, mo tu olgeta we oli bin stap wetem olgeta, blong mekem se bae oli pembak wanem we i bin hapen long olgeta, mo tu ded wetem olgeta.

20 Mo king i bin givim oda long olgeta se oli no mas gobak; mo oli bin kros long king, mo bin mekem se hem i mas safa, we i long ded tru long faea.

21 Mo oli bin rere blong tekem ol pris tu mo kilim ded olgeta, mo oli bin ronwe long olgeta.

22 Mo i bin hapen se oli bin rere blong gobak long graon blong Nifae, mo oli bin mitim ol man blong Gidion. Mo ol man blong Gidion i bin talem long olgeta evri samting we i bin hapen long ol woman blong olgeta mo long ol pikinini blong olgeta; mo se ol man blong Leman i bin letem olgeta blong save stap laef long graon sapos oli pem wan taks i go long ol man blong Leman blong wan haf long evri samting we oli bin gat.

23 Mo ol pipol i bin talem long ol man blong Gidion se oli bin kilim king i ded, mo ol pris blong hem i bin ronwe long olgeta i go moa longwe long ples we i no gat man long hem.

24 Mo i bin hapen se afta we oli bin endem smol seremoni

ia, se oli bin gobak long graon blong Nifae, oli stap glad tumas, from ol woman blong olgeta mo ol pikinini blong olgeta oli no bin kilim ded olgeta; mo oli bin talem long Gidion wanem oli bin mekem long king.

25 Mo i bin hapen se king blong ol man blong Leman i bin mekem wan promes long olgeta, se ol pipol blong hem bae i no mas kilim olgeta.

26 Mo tu Limhae, from hem i boe blong king, we ol pipol i bin givim kingdom long hem, i bin mekem wan promes long king blong ol man blong Leman se bae ol pipol blong hem bae i pem taks long hem, go kasem wan haf long evri samting we oli bin gat.

27 Mo i bin hapen se Limhae i bin stat blong stanemap kingdom mo blong stanemap pis long medel blong ol pipol blong hem.

28 Mo king blong ol man blong Leman i bin putum ol gadman raonabaot long graon, blong mekem se hem i save holem ol pipol blong Limhae long graon, blong mekem se oli no aot i go long ples we i no gat man long hem; mo hem i bin sapotem ol gadman blong hem aot long ol taks we hem i bin kasem long ol man blong Nifae.

29 Mo nao king Limhae i bin gat pis oltaem long kingdom blong hem blong wan spes blong tu yia, from ol man blong Leman i no bin mekem trabol long olgeta o lukaot blong kilim olgeta i ded.

---

 JAPTA 20
 

---

*Ol pris blong Noa i stilim sam gel blong ol man blong Leman—Ol man blong Leman i wantem blong faet wetem Limhae mo ol pipol blong hem—Oli pusum bak ol man blong Leman mo oli putum daon kros blong olgeta. Raonabaot 145–123 yia bifo Kraes i bon.*

NAO i bin gat wan ples long Semlon we ol gel blong ol man blong Leman i bin kam tugeta blong singsing, mo blong danis, mo blong mekem olgeta i stap hapi.

2 Mo i bin hapen se i bin gat wan dei, wan smol namba blong olgeta i bin kam tugeta blong singsing mo blong danis.

3 Mo nao ol pris blong king Noa, from oli sem blong gobak long bigtaon blong Nifae, yes, mo tu oli fraet se ol pipol bae i kilim olgeta i ded, taswe oli bin fraet blong gobak long ol woman blong olgeta mo ol pikinini blong olgeta.

4 Mo afta we oli bin stap long ples we i no gat man long hem, mo afta we oli bin faenem ol gel blong ol man blong Leman, oli bin haed mo wajem olgeta;

5 Mo taem we i bin gat be smol nomo long olgeta we i bin kam tugeta blong danis, oli bin kam fored aot long ol sikret ples blong olgeta, mo bin tekem olgeta mo bin karem olgeta i go long ples we i no gat man long hem; yes, twenti mo fo gel blong ol man blong Leman oli bin karem i go long ples we i no gat man long hem.



6 Mo i bin hapen se taem we ol man blong Leman i bin faenem se ol gel blong olgeta i bin lus, oli bin kros long ol pipol blong Limhae, from oli bin ting se hem i ol pipol blong Limhae.

7 Taswe oli bin sendem ami blong olgeta i go fored; yes, king tu hemwan i bin go long fored blong ol pipol blong hem; mo oli bin go antap long graon blong Nifae blong smasem ol pipol blong Limhae.

8 Mo nao Limhae i bin luk olgeta antap long taoa, tu evri samting we oli stap mekem rere blong faet hem i bin luk; taswe hem i bin tekem ol pipol blong hem i kam tugeta, mo i bin wet long olgeta long ol plantesen mo long ol bus.

9 Mo i bin hapen se taem we ol man blong Leman i bin kam antap, se ol pipol blong Limhae i bin stat blong foldaon long olgeta long ol ples we oli stap wet long hem, mo oli bin stat blong kilim olgeta i ded.

10 Mo i bin hapen se faet ia i bin stat blong kam rabis tumas, from oli bin faet olsem ol laeon i faet from kakae blong olgeta.

11 Mo i bin hapen se ol pipol blong Limhae i bin stat blong pusum bak bakegen ol man blong Leman long fored blong olgeta; be namba blong olgeta i no bin kasem haf blong ol namba blong ol man blong Leman. Be oli bin faet from laef blong olgeta, mo from ol woman blong olgeta, mo from pikinini blong olgeta; taswe oli bin yusum evri paoa blong olgeta mo oli bin faet olsem ol dragen.

12 Mo i bin hapen se oli bin faenem king blong ol man blong Leman long medel blong olgeta we oli bin ded; be hem i no bin ded, from hem i bin kasem kil mo oli bin livim hem i stap long graon, from ol pipol blong hem i bin ronwe kwiktaem.

13 Mo oli bin tekem hem mo bin putum bandej long ol kil blong hem, mo bin tekem hem i kam long fored blong Limhae, mo oli bin talem: Luk, hemia king blong ol man blong Leman; from hem i bin kasem wan kil i bin foldaon long medel blong ol ded man blong olgeta, mo oli bin livim hem; mo luk, mifala i bin tekem hem i kam long fored blong yu; mo nao, bae yumi kilim hem i ded.

14 Be Limhae i bin talem long olgeta: Bae yufala i no kilim hem i ded, be tekem hem i kam ia blong mi save luk hem. Mo oli bin tekem hem i kam. Mo Limhae i bin talem long hem: From wanem nao yu bin kam antap blong faet agensem ol pipol blong mi? Luk, ol pipol blong mi i no bin brekem promes ia we mi bin mekem long yu; taswe, from wanem yu bin brekem promes we yu bin mekem long ol pipol blong mi?

15 Mo nao king i bin talem se: Mi bin brekem promes ia from ol pipol blong yu i bin karem i gowe ol gel blong ol pipol blong mi; taswe, long kros blong mi, mi bin mekem se ol pipol blong mi i kam antap blong mekem faet agensem ol pipol blong yu.

16 Mo nao Limhae i no bin

harem wan samting long saed blong samting ia; taswe hem i bin talem: Bae mi lukaotem long ol pipol blong mi mo eni man we i bin mekem samting ia bae i ded. Taswe, hem i bin mekem se oli lukaotem olgeta long medel blong ol pipol blong hem.

17 Nao taem we Gidion i bin harem ol samting ia, from we hem i kapten blong king, hem i bin go fored mo i bin talem long king: Mi askem yu blong wet, mo no lukaotem long ol pipol ia, mo no blemem olgeta long samting ia.

18 From yu no tingbaot ol pris blong papa blong yu, olgeta pipol ia we i bin lukaotem blong kilim olgeta i ded? Mo oli no stap long ples we i no gat man long hem? Mo i no olgeta ia we i bin stilim ol gel blong ol man blong Leman?

19 Mo nao, luk, mo talem long king long saed blong ol samting ia, blong mekem se hem i save talem long ol pipol blong hem blong oli save putum daon kros blong olgeta from yumi; from luk, oli stat blong rere finis blong kam bakegen agensem yumi; mo luk tu i gat be smol nomo blong yumi.

20 Mo luk, oli kam wetem bigfala ami blong olgeta; mo hemia nomo sapos king i no putum kros blong olgeta i kam daon, yumi mas ded.

21 From ol toktok blong Abinadae i no bin hapen, we hem i profesae agensem yumi—mo evri samting ia, from yumi no bin wantem lisin long ol toktok

blong Lod, mo tanem yumi long ol rabis fasin?

22 Mo nao letem yumi putum kros blong king i kam daon, mo bae yumi mekem i hapen promes we yumi bin mekem long hem; from i moa gud se yumi stap olsem slef bitim we yumi lusum ol laef blong yumi; taswe, bae yumi stopem plante blad blong ron.

23 Mo nao Limhae i bin talem long king evri samting long saed blong papa blong hem, mo ol pris we i bin ronwe i go long ples we i no gat man long hem, mo bin blemem olgeta blong stilim ol gel blong olgeta.

24 Mo i bin hapen se king i bin putum daon kros blong hem from ol pipol blong hem; mo hem i bin talem long olgeta: Bae yumi go fored blong mitim ol pipol blong mi, wetem no gat tul blong faet; mo mi mekem promes long yufala wetem wan strongfala promes se bae ol pipol blong mi bae oli no kilim ded ol pipol blong yu.

25 Mo i bin hapen se oli bin folem king, mo oli bin go fored wetem no gat tul blong faet blong mitim ol man blong Leman. Mo i bin hapen se oli bin mitim ol man blong Leman; mo king blong ol man blong Leman i bin bodaon hemwan long fored blong olgeta, mo i bin askem olgeta blong helpem ol pipol blong Limhae.

26 Mo taem we ol man blong Leman i bin luk ol pipol blong Limhae, se oli no bin gat ol tul blong faet wetem olgeta, oli bin gat sore long olgeta mo oli bin

putum daon kros blong olgeta from olgeta, mo oli bin gobak wetem king blong olgeta wetem pis long graon blong olgeta bakegen.

---

JAPTA 21

---

*Oli kilim ol man blong Limhae mo ol man blong Leman i winim olgeta — Ol man blong Limhae i mitim Amon mo oli jenisim laef blong olgeta — Oli talem long Amon long saed blong ol twenti-fo buk blong ol man blong Jared. Raonabaot 122-121 yia bifo Kraes i bon.*

Mo i bin hapen se Limhae mo ol pipol blong hem i bin gobak long bigtaon blong Nifae, mo oli bin stat blong stap bakegen long graon long pis.

2 Mo i bin hapen se afta plante dei oli bin stat bakegen blong tanem tingting blong ol man blong Leman blong oli kros agensem ol man blong Nifae, mo oli bin stat blong kam long ol boda blong graon raonabaot.

3 Nao oli bin fraet blong kilim ded olgeta, from promes we king blong olgeta i bin mekem long Limhae; be oli bin slapem olgeta long ol jik blong olgeta, mo yusum raet blong olgeta; mo oli bin stat blong putum ol hevi samting long ol bak blong olgeta, mo fosem olgeta olsem we oli pulum wan dongki we i no toktok —

4 Yes, oli bin mekem evri samting ia blong mekem se toktok blong Lod i save hapen.

5 Mo nao ol hadtaem blong ol man blong Nifae i bin bigwan,

mo i no bin gat wan wei we oli save mekem olgeta i go fri aot long ol han blong olgeta, from ol man blong Leman i bin raonem olgeta long evri saed.

6 Mo i bin hapen se ol pipol i bin stat blong komplem long king from ol hadtaem blong olgeta; mo oli bin stat blong gat tingting blong go agensem olgeta long faet. Mo oli bin givim tumas hadtaem long king wetem ol komplem blong olgeta; taswe hem i bin letem olgeta blong oli mekem olsem we i folem tingting blong olgeta.

7 Mo oli bin kam tugeta bakegen, mo oli bin werem ol klos blong faet, mo oli bin go fored agensem ol man blong Leman blong pusumaot olgeta long graon blong olgeta.

8 Mo i bin hapen se ol man blong Leman i bin winim olgeta, mo oli bin pusum olgeta bak, mo bin kilim ded plante long olgeta.

9 Mo nao i bin gat wan bigfala sore mo krae long medel blong ol pipol blong Limhae, woman we i bin lusum man blong hem i stap krae from hem, boe mo gel i stap krae from papa blong olgeta, mo ol brata from ol brata blong olgeta.

10 Nao i bin gat plante woman tumas we oli nomo gat man long graon, mo oli bin krae strong long wan dei i go long narafala dei, from wan bigfala fraet long ol man blong Leman i bin kam long olgeta.

11 Mo i bin hapen se ol krae blong olgeta we i gohed oltaem i bin mekem tingting blong smol

haf blong ol man blong Limhae blong kam kros agensem ol man blong Leman; mo oli bin go bakegen long faet, be oli bin pusum olgeta bak bakegen, mo oli bin lusum plante man.

12 Yes, oli bin go bakegen blong nambatri taem, mo bin safa long sem fasin; mo olgeta we oli no bin ded i bin gobak long bigtaon blong Nifae.

13 Mo oli bin putum tingting blong olgeta i stap daon go kasem das, oli bin letem olgeta long yok blong slef, oli letem olgeta blong oli kilim olgeta, mo blong ronem olgeta i go ia mo i go ia, mo ol enemi blong olgeta i bin putum ol hevi samting long olgeta folem ol tingting blong olgeta.

14 Mo oli bin putum tingting blong olgeta i stapdaon go kasem daon olgeta; mo oli bin prea strong long God; yes, go kasem fuldei oli bin prea long God blong hem i mekem olgeta i go fri aot long ol hadtaem blong olgeta.

15 Mo nao Lod i bin tekem taem blong harem prea blong olgeta from ol rabis fasin blong olgeta; be Lod i bin harem ol prea blong olgeta, mo i bin stat blong mekem hat blong ol man blong Leman i kam sofsop, mekem se oli bin stat blong tekemaot ol hevi samting long bak blong olgeta; be stil Lod i no bin luk se i stret taem blong tekem olgeta i kamaot long slef.

16 Mo i bin hapen se oli bin stat blong kam antap gud smolsmol long graon, mo oli bin stat blong resemap plante sid, mo

ol grup blong anamol, mo ol buluk, blong mekem se oli no bin harem nogud long hanggri.

17 Nao i bin gat wan bigfala namba blong ol woman, bitim ol man; taswe king Limhae i bin givim oda se evri man i mas serem blong sapotem ol woman we ol man blong olgeta i ded mo ol pikinini blong olgeta, blong mekem se oli no save ded long hanggri; mo oli bin mekem samting ia from bigfala namba blong olgeta we oli bin ded.

18 Nao ol pipol blong Limhae i bin stap tugeta long wan grup olsem long evri taem we i save hapen, mo bin lukaotem ol sid blong olgeta mo ol grup blong anamol blong olgeta;

19 Mo king hemwan i no bin trastem we bae hem i sef aot-saed long ol wol blong bigtaon, hemia nomo sapos hem i no bin tekem ol gadman blong hem wetem hem, from hem i fraet se long sam wei bae hem i foldaon long ol han blong ol man blong Leman.

20 Mo hem i bin mekem se ol pipol blong hem bae oli lukaotem ol graon raonabaot, blong mekem se long sam wei oli save kasem ol pris ia we i bin ronwe i go long ples we i no gat man long hem, we oli bin stilim ol gel blong ol man blong Leman, mo we oli bin mekem se wan bigfala trabol i bin kam long olgeta.

21 From oli bin wantem blong tekem olgeta blong oli save panisim olgeta; from oli bin kam long graon blong Nifae long naet, mo oli bin tekem ol sid blong olgeta mo plante long

ol gudgudfala samting blong olgeta; taswe oli bin haed blong kasem olgeta.

22 Mo i bin hapen se i nomo bin gat trabol bitwin ol man blong Leman mo ol pipol blong Limhae, go kasem taem we Amon mo ol brata blong hem i bin kam long graon.

23 Mo from king i bin kam aotsaed long ol get blong bigtaon wetem ol gad blong hem, hem i bin faenem Amon mo ol brata blong hem; mo from hem i bin ting se oli ol pris blong Noa, taswe hem i bin mekem se oli tekem olgeta, mo fasem olgeta, mo sakem olgeta i go long kalabus. Mo sapos oli bin ol pris blong Noa bae hem i bin mekem se oli kilim olgeta i ded.

24 Be taem we hem i bin faenemaot se oli no ol pris, be se oli ol brata blong hem, mo oli bin kam long graon blong Sarahemla, hem i bin fulap wetem glad we i bigwan tumas.

25 Nao king Limhae i bin sendem, bifo Amon i bin kam, wan smol namba blong ol man blong lukaotem graon blong Sarahemla; be oli no bin save faenem, mo oli bin lus long ples we i no gat man long hem.

26 Be, oli bin faenem wan graon we i bin gat man long hem bifo; yes, wan graon we ol drae bun i bin kavremap; yes, wan graon we i bin gat man mo we faet i bin smasem gud; mo olgeta, from oli bin ting se hem i graon blong Sarahemla, oli bin gobak long graon blong Nifae, mo oli bin kam insaed ol boda

blong graon fiu dei nomo bifo Amon i bin kam.

27 Mo oli bin karem i kam wan histri wetem olgeta, we i wan histri blong ol pipol we ol bun blong olgeta oli bin faenem; mo oli bin raetem olgeta long buk blong ston blong aean.

28 Mo nao Limhae i bin bak-egen fulap wetem glad taem we hem i bin lanem tru long ol toktok blong maot blong Amon se king Mosaea i bin gat wan presen long God, we tru long presen ia hem i save talem mining blong ol raeting olsem ia; yes, mo Amon tu i bin glad.

29 Be stil Amon mo ol brata blong hem i bin fulap wetem sore from plante long ol brata blong olgeta oli bin kilim olgeta i ded;

30 Mo tu se king Noa mo ol pris blong hem i bin mekem ol pipol blong hem i mekem plante sin mo plante rabis fasin agensem God; mo oli bin krae tu from ded blong Abinadae; mo tu from Alma i bin aot mo ol pipol we oli bin go wetem hem we hem i bin mekem wan jos blong God tru long fulpaoa mo paoa blong God, mo fet long ol toktok we Abinadae i bin talemaot.

31 Yes, oli bin krae from oli bin aot long olgeta, from oli no bin save se oli bin ronwe i go wea. Nao bae oli bin save hapi blong joen long olgeta, from olgeta tu i bin mekem wan kavenan wetem God blong wok blong hem mo holem ol komanmen blong hem.

32 Mo nao stat long taem we

Amon i bin kam, king Limhae tu i bin mekem wan kavenan wetem God, mo tu plante long ol pipol blong wok blong hem mo holem ol komanmen blong hem.

33 Mo i bin hapen se king Limhae mo plante long ol pipol blong hem i bin wantem blong kasem baptaes; be i no bin gat wan man long graon we i bin gat raet long God. Mo Amon i no bin wantem blong mekem samting ia, from hem i bin ting se hem i wan wokman we i no stret inaf.

34 Taswe oli no bin, long taem ia, kam tugeta blong mekem wan jos, be oli bin wet long Spirit blong Lod. Nao oli bin wantem blong kam olsem Alma mo ol brata blong hem, we i bin ronwe i go long ples we i no gat man long hem.

35 Oli bin wantem blong kasaem baptaes olsem wan witness mo wan testimoni se oli glad blong wok blong God wetem evri hat blong olgeta; be oli bin seftem taem; mo histri blong baptaes blong olgeta bae oli talem afta.

36 Mo nao evri tingting blong Amon mo ol pipol blong hem, mo king Limhae mo ol pipol blong hem, i bin blong mekem olgeta i go fri, mo kamaot long ol han blong ol man blong Leman, mo long slef.

---

JAPTA 22

---

*Oli mekem ol plan blong ol pipol blong ronwe long slef blong ol*

*man blong Leman—Oli mekem ol man blong Leman i drong—Ol pipol i ronwe, oli gobak long Sarahemla, mo King Mosaea i rulum olgeta. Raonabaot 121–120 yia bifo Kraes i bon.*

Mo nao i bin hapen se Amon mo king Limhae i bin stat blong toktok wetem ol pipol olsem wanem bae oli mekem olgeta i kamaot long slef; mo tu oli bin mekem se evri pipol i mas kam tugeta long wan ples; mo oli bin mekem samting ia blong mekem se oli save harem voes blong ol pipol long saed blong samting ia.

2 Mo i bin hapen se oli no bin save faenem wan wei blong mekem olgeta i kamaot long slef, hemia nomo blong tekem ol woman blong olgeta mo ol pikinini blong olgeta, mo ol grup blong anamol blong olgeta, mo ol buluk blong olgeta, mo ol tenet blong olgeta, mo aot i go long ples we i no gat man long hem; from ol man blong Leman i bin plante tumas, hem i had tumas blong ol pipol blong Limhae blong faet wetem olgeta, oli tingting blong mekem olgeta i go fri aot long slef tru long naef blong faet.

3 Nao i bin hapen se Gidion i bin go fored mo i bin stanap long fored blong king, mo i bin talem long hem: Nao, O king, yu bin lisen long ol toktok blong mi plante taem bifo taem we yumi bin stap faet wetem ol brata blong yumi ol man blong Leman.

4 Mo nao O king, sapos yu no

bin faenem mi olsem wan wokman blong nating, o sapos yu bin lisin bifo long ol toktok blong mi long eni pat, mo oli bin helpem yu, mi wantem tu se yu lisin long ol toktok blong mi long taem ia, mo bae mi wokman blong yu mo mekem ol pipol ia i kamaot long slef.

5 Mo king i bin letem hem blong toktok. Mo Gidion i bin talem long hem se:

6 Luk get we i stap biae, we i go tru long wol we i stap biae, long bak saed blong bigtaon. Ol man blong Leman, o ol gadman blong ol man blong Leman, oli drong long naet; taswe bae yumi sendemaot wan toktok i go long evri pipol ia blong mekem se oli karem i kam tugeta ol grup blong anamol blong olgeta mo ol buluk, blong mekem se oli save tekem olgeta i go long ples we i no gat man long hem long naet.

7 Mo bae mi go folem oda blong yu mo pem las taks blong waen long ol man blong Leman, mo bae oli drong; mo bae yumi go tru long sikret rod long lef saed blong kamp blong olgeta taem we oli drong mo slip.

8 Olsem ia nao bae yumi aot wetem ol woman blong yumi mo ol pikinini blong yumi, ol grup blong anamol blong yumi, mo ol buluk blong yumi i go long ples we i no gat man long hem; mo bae yumi wokbaot go raonem graon blong Saelom.

9 Mo i bin hapen se king i bin lisin long ol toktok blong Gidion.

10 Mo king Limhae i bin mek-

em se ol pipol blong hem i bin karem i kam tugeta ol grup blong anamol blong olgeta; mo hem i bin sendem taks blong waen i go long ol man blong Leman; mo hem i bin sendem tu moa waen, olsem wan presen long olgeta; Mo oli bin dring plante long waen we king Limhae i bin sendem long olgeta.

11 Mo i bin hapen se ol pipol blong king Limhae i bin aot long naet i go long ples we i no gat man long hem wetem ol grup blong anamol blong olgeta, mo ol buluk blong olgeta, mo oli bin go raonabaot graon blong Saelom long ples we i no gat man long hem, mo oli bin tanem rod blong olgeta i go long graon blong Sarahemla, from Amon mo ol brata blong hem i bin lidim olgeta.

12 Mo oli bin tekem evri gol blong olgeta, mo silva, mo ol gudgudfala samting blong olgeta, we oli bin save karem, mo tu ol kakae blong olgeta wetem olgeta, i go long ples we i no gat man long hem; mo oli gohed long wokbaot blong olgeta.

13 Mo afta oli bin spendem plante dei long ples we i no gat man long hem, oli bin kam long graon blong Sarahemla, mo oli bin joenem ol pipol blong Mosaea, mo oli bin kam pat blong ol pipol blong hem.

14 Mo i bin hapen se Mosaea i bin kasem olgeta wetem glad; mo hem i bin kasem ol histri blong olgeta tu, mo tu ol histri we ol pipol blong Limhae i bin faenem.

15 Mo nao i bin hapen se taem we ol man blong Leman i bin faenemaot se ol pipol blong Limhae i bin aot long graon long naet, mekem se oli bin sendem wan ami i go long ples we i no gat man long hem blong folem olgeta;

16 Mo afta we oli bin folem olgeta blong tu dei, oli nomo bin save folem trak blong olgeta; taswe oli bin lus long ples we i no gat man long hem.

Wan histri blong Alma mo ol pipol blong Lod we ol pipol blong King Noa i bin ronem olgeta i go long ples we i no gat man long hem.

*I stat long japta 23 i go kasem  
japta 24 nomo.*

---

### JAPTA 23

---

*Alma i no wantem blong kam king—Hem i kam hae pris—Lod i stretem ol pipol blong hem, ol man blong Leman i tekem graon blong Hilam—Amulon, we i lida blong ol rabis pris blong King Noa, i rul andanit long king blong ol man blong Leman. Raonabaot 145–121 yia bifo Kraes i bon.*

NAO Alma, from Lod i bin wonem hem se ol ami blong king Noa bae i kam long olgeta, mo from hem i bin talemaot samting ia long ol pipol blong hem, taswe oli bin karem i kam tugeta ol grup blong anamol blong olgeta, mo oli bin tekem sam sid blong olgeta, mo oli bin aot i go long ples we i no

gat man long hem long fored blong ol ami blong king Noa.

2 Mo Lod i bin mekem olgeta i kam strong, mekem se ol pipol blong king Noa i no save kasem olgeta mo smasem olgeta.

3 Mo oli bin ronwe blong eit dei wokbaot i go long ples we i no gat man long hem.

4 Mo oli bin kam long wan graon, yes, hem i wan naes mo gudfala graon, wan graon blong klin wota.

5 Mo oli bin stanemap ol tenet blong olgeta, mo oli bin stat blong wok long graon, mo oli bin stat blong mekem ol haos; yes, oli bin mekem plante samting, mo oli bin wok had tumas.

6 Mo ol pipol i bin wantem se Alma i kam king blong olgeta, from ol pipol blong hem i bin lavem hem tumas.

7 Be hem i bin talem long olgeta se: Luk, i no gat nid we yumi gat wan king; from olsem ia nao Lod i talem: Yufala i no mas tekem wan bodi blong mit mo bun i moa hae long narawan, o wan man i no mas tingting se hem i moa hae long narawan; taswe mi talem long yufala se i no gat nid we yufala i gat wan king.

8 Be, sapos hem i save hapen se yufala i gat ol man we oli stret blong kam ol king blong yufala, bae hem i gud blong yufala i gat wan king.

9 Be tingbaot rabis fasin blong king Noa mo ol pris blong hem; mo mi tu, mi bin foldaon long wan trap, mo mi bin mekem plante samting we i rabis sin long ae blong Lod, we i bin



mekem mi harem nogud long taem we mi bin sakem sin;

10 Be, afta plante hadtaem, Lod i bin harem ol prea blong mi, mo i bin ansarem ol prea blong mi, mo hem i bin mekem mi wan tul long ol han blong hem blong karem plante long yufala blong kam blong save trutok blong hem.

11 Be, long samting ia mi no glori, from mi mi no stret blong mi save glori long miwan.

12 Mo nao mi talem long yufala, king Noa i bin mekem nogud fasin long yufala, mo yufala i bin slef blong hem mo ol pris blong hem, mo oli bin lidim yufala long ol rabis fasin; taswe oli bin fasem yufala wetem ol rop blong rabis fasin.

13 Mo nao from paoa blong God i bin mekem yufala i go fri aot long ol rop ia; yes, kamaot tu long ol han blong king Noa mo ol pipol blong hem, mo tu long ol rop blong rabis fasin, mi wantem tu se yufala i stanap strong long fridom ia we tru long hem oli bin mekem yufala i fri, mo se yufala i no trastem wan man blong kam wan king ova long yufala.

14 Mo tu no trastem wan man blong stap olsem tija blong yufala o pasta blong yufala, hemia nomo sapos hem i wan man blong God, we i wokbaot folem ol rod blong hem mo holem ol komanmen blong hem.

15 Olsem ia nao Alma i bin tijim ol pipol blong hem, se evri man i mas lavem man we i stap raonabaot long hem olsem hemwan, blong mekem se i

no save gat rao long medel blong olgeta.

16 Mo nao, Alma i bin hae pris blong olgeta, from hem i bin statem jos blong olgeta.

17 Mo i bin hapen se i no gat wan we i bin kasem raet blong prij, o blong tij, be tru long hem nomo we i kam long God. Taswe hem i bin konsekretem evri pris blong olgeta mo evri tija blong olgeta; mo oli no konsekretem wan long olgeta hemia nomo sapos oli no ol stret man.

18 Taswe oli bin lukaotem ol pipol, mo oli bin fidim olgeta wetem ol samting we i stret.

19 Mo i bin hapen se oli bin stat blong kam antap gud tumas long graon; mo oli bin singaotem graon ia Helam.

20 Mo i bin hapen se oli bin kam plante mo kam antap gud tumas long graon blong Helam; mo oli bin bildim wan bigtaon, we oli bin singaotem bigtaon blong Helam.

21 Be Lod i luk se i stret blong stretem ol pipol blong hem; yes, hem i testem ol fasin blong save wet long taem blong olgeta mo fet blong olgeta.

22 Be—eni man we i putum tras blong hem long hem, semfala man ia bae hem i leftemap hem long las dei. Yes, mo i olsem ia nao wetem ol pipol ia.

23 From luk, bae mi soem long yufala se oli bin mekem olgeta i kam slef, mo i no gat wan man we i bin save mekem olgeta i go fri be Lod, God blong olgeta, yes, hem i God blong Ebrahim mo Aesak mo blong Jakob.

24 Mo i bin hapen se hem i bin mekem olgeta i go fri, mo hem i bin soemaot strongfala paoa blong hem long olgeta, mo ol glad blong olgeta i bin bigwan.

25 From luk, i bin hapen se taem we oli bin stap long graon blong Helam, yes, long bigtaon blong Helam, taem we oli stap wok long graon we i raonabaot, luk, wan ami blong ol man blong Leman i bin kam long ol boda blong graon.

26 Nao i bin hapen se ol brata blong Alma i bin ronwe long ol garen blong olgeta mo oli bin kam tugeta long bigtaon blong Helam; mo oli bin fraet tumas from kam tru blong ol man blong Leman.

27 Be Alma i bin go fored mo i bin stanap long medel blong olgeta mo i bin talem strong long olgeta se oli no mas fraet; be se oli mas tingbaot Lod, God blong olgeta mo bae hem i mekem olgeta i go fri.

28 Taswe oli bin stopem ol fraet blong olgeta, mo bin stat blong prea long Lod blong bae hem i mekem ol hat blong ol man blong Leman i kam sofsof, blong mekem se bae oli no kilim olgeta i ded, mo ol woman blong olgeta, mo ol pikinini blong olgeta.

29 Mo i bin hapen se Lod i bin mekem ol hat blong ol man blong Leman i kam sofsof. Mo Alma mo ol brata blong hem i bin go fored mo i bin givim olgeta long ol han blong olgeta; mo ol man blong Leman i bin tekem graon blong Helam.

30 Nao ol ami blong ol man blong Leman, we i bin folem ol pipol blong king Limhae, i bin lus long ples we i no gat man long hem blong plante dei.

31 Mo luk, oli bin faenem ol pris ia blong king Noa, long wan ples we oli bin singaotem Amulon; mo oli bin stat blong stap long graon blong Amulon mo oli bin stat blong wok long graon.

32 Nao nem blong lida blong ol pris ia i Amulon.

33 Mo i bin hapen se Amulon i bin askem strong long ol man blong Leman; mo tu hem i bin sendem aot ol woman blong olgeta, we oli ol gel blong ol man blong Leman, blong askem strong long ol brata blong olgeta, blong oli no mas kilim ded ol man blong olgeta.

34 Mo ol man blong Leman i bin gat sore long Amulon mo ol brata blong hem, mo oli no bin kilim ded olgeta, from ol woman blong olgeta.

35 Mo Amulon mo ol brata blong hem i bin joenem ol man blong Leman, mo oli bin stap wokbaot long ples we i no gat man long hem blong lukaotem graon blong Nifae taem we oli bin faenem graon blong Helam, we Alma mo ol brata blong hem i bin stap long hem.

36 Mo i bin hapen se ol man blong Leman i bin promes long Alma mo ol brata blong hem, se sapos oli soem long olgeta rod we i go long graon blong Nifae bae oli no tekem ol laef blong olgeta mo fridom blong olgeta.

37 Be afta we Alma i bin soem long olgeta rod we i bin go long graon blong Nifae ol man blong Leman i no bin holem promes blong olgeta; be oli bin putum ol gadman raonabaot long graon blong Helam, blong lukaotem Alma mo ol brata blong hem.

38 Mo smol haf blong olgeta we i bin stap i bin go long graon blong Nifae; mo wan pat blong olgeta i bin gobak long graon blong Helam, mo tu oli bin tekem wetem olgeta ol woman mo ol pikinini blong ol gadman we i bin stap long graon.

39 Mo king blong ol man blong Leman i bin mekem Amulon blong hem i kam wan king mo rulum ol pipol blong hem, we i bin stap long graon blong Helam; be bae hem i no save gat paoa blong mekem eni samting we i go agensem wanem we king blong ol man blong Leman i bin wantem.

---

JAPTA 24

---

*Amulon i givim hadtaem long Alma mo ol pipol blong hem — Bae oli kilim ded olgeta sapos oli prea — Lod i mekem ol hevi samting blong olgeta i no hevi — Hem i tekemaot olgeta long slef mo oli gobak long Sarahemla. Raonabaot 145–120 yia bifo Kraes i bon.*

Mo i bin hapen se Amulon i bin kasem wan agrimen tru long tingting blong king blong ol man blong Leman; taswe, king blong ol man blong Leman i bin letem long hem mo ol brata blong oli kam ol tija ova ol pipol

blong hem, yes, long ol pipol tu we i bin stap long graon blong Semlon, mo long graon blong Saelom, mo long graon blong Amulon.

2 From ol man blong Leman i bin tekem ol graon ia; taswe, king blong ol man blong Leman i bin jusum ol king ova long evri graon ia.

3 Mo nao nem blong king blong ol man blong Leman i Leman, oli bin singaotem hem folem nem blong papa blong hem; mo taswe oli bin singaotem hem king Leman. Mo hem i bin king ova long wan plante pipol.

4 Mo hem i bin jusum ol brata blong Amulon, blong kam ol tija long evri graon we ol pipol blong hem i bin stap long hem; mo olsem ia nao oli bin stat blong tijim lanwis blong Nifae long medel blong evri pipol blong ol man blong Leman.

5 Mo oli bin wan pipol we oli gudfala fren wan wetem narawan; be oli no bin save God; mo tu ol brata blong Amulon i no bin tijim olgeta eni samting long saed blong Lod, God blong olgeta, o loa blong Moses; mo tu oli no bin tijim olgeta ol toktok blong Abinadae;

6 Be oli bin tijim olgeta se oli mas raetem histri blong olgeta, mo se bae oli save raet i go long wan wan long olgeta.

7 Mo olsem ia nao ol man blong Leman i bin stat blong gat plante rij samting, mo oli bin stat blong givim ol samting wan long narawan mo oli kam rij, mo oli bin stat blong yusum

ol trik mo kam wan waes pipol, long saed blong ol waes tingting blong wol, yes, wan pipol we i yusum ol trik tumas, oli glad long evri kaen blong nogud fasin mo fasin blong stil long taem blong faet, be oli no mekem samting ia long medel blong ol brata blong olgeta bakegen.

8 Mo nao i bin hapen se Amulon i bin stat blong yusum raet ova long Alma mo ol brata blong hem, mo bin stat blong givim hadtaem long hem, mo mekem se bae ol pikinini blong hem i givim hadtaem long ol pikinini blong olgeta.

9 From Amulon i bin save Alma, se hem i bin wan long ol pris blong king, mo se i hem we i bin bilivim ol toktok blong Abinadae mo king i bin ronemaot hem long fored blong hem, mo taswe hem i bin kros long hem; from hem i bin stap andanit long king Leman, be stil hem i bin yusum raet ova long olgeta, mo i bin putum ol wok long olgeta, mo i bin putum ol man we i wajem wok blong olgeta.

10 Mo i bin hapen se ol hadtaem blong olgeta i bin bigwan tumas mekem se oli bin stat blong prea strong long God.

11 Mo Amulon i bin givim oda long olgeta se oli mas stopem ol prea blong olgeta; mo hem i bin putum ol gad ova long olgeta blong wajem olgeta, blong mekem se eni man we oli faenem se hem i stap prea long God bae oli kilim hem i ded.

12 Mo Alma mo ol pipol blong hem oli no bin leftemap ol voes

blong olgeta i go long Lod, God blong olgeta, be oli bin poremaot ol hat blong olgeta long hem; mo hem i bin save ol tingting blong ol hat blong olgeta.

13 Mo i bin hapen se voes blong Lod i bin kam long olgeta long ol hadtaem blong olgeta, i talem se: Leftemap ol hed blong yufala mo yufala i glad, from mi save kavenan we yufala i bin mekem wetem mi; mo bae mi mekem kavenan wetem ol pipol blong mi mo mekem olgeta i go fri long slef.

14 Mo tu bae mi mekem ol hevi samting long solda blong yufala i nomo hevi, mekem se bae yufala i no save filim long ol bak blong yufala, taem we yufala i stap tu olsem slef; mo hemia bae mi mekem, blong mekem se yufala i save stanap olsem ol witnes blong mi long fiuja, mo blong mekem se yufala i save gud se mi, Lod God, mi visitim ol pipol blong mi long ol hadtaem blong olgeta.

15 Mo nao i bin hapen se ol hevi samting we oli bin putum long Alma mo ol brata blong hem i nomo hevi; yes, Lod i bin mekem olgeta i kam strong blong mekem se oli save karem ol hevi samting blong olgeta isi nomo, mo oli bin stap andanit wetem bigfala glad mo fasin blong save wet longtaem long evri wok blong Lod.

16 Mo i bin hapen se fet blong olgeta mo fasin blong save wet longtaem blong olgeta i bin bigwan tumas mekem se voes blong Lod i bin kam bakegen long olgeta, i talem: Stap glad,

from long tumora bae mi mekem yufala i kamaot long slef.

17 Mo hem i bin talem long Alma: Bae yu go long fored blong pipol ia, mo bae mi go wetem yu mo mekem ol pipol ia i go fri long slef.

18 Nao i bin hapen se Alma mo ol pipol blong hem, long naetaem oli bin karem ol grup blong anamol blong olgeta i kam tugeta, mo tu ol sid blong olgeta; yes, mo tu long ful naetaem oli bin stap karem ol grup blong anamol blong olgeta i kam tugeta.

19 Mo long moning Lod i bin mekem wan bigfala slip i kam long ol man blong Lemana, yes, mo tu evri man blong wajem wok blong olgeta i bin stap long wan bigfala slip.

20 Mo Alma mo ol pipol blong hem i bin aot i go long ples we i no gat man long hem; mo afta we oli bin wokbaot blong ful dei oli bin stanemap ol tenet blong olgeta long wan vale mo oli bin singaotem vale ia Alma, from hem i bin lidim rod blong olgeta long ples we i no gat man long hem.

21 Yes, mo long vale blong Alma oli bin poremaot ol tangkyu blong olgeta long God from hem i bin gat sore long olgeta, mo i bin mekem ol hevi samting blong olgeta i nomo hevi, mo i bin mekem olgeta i kamaot long slef; from oli bin slef, mo i no bin gat wan man we i save mekem olgeta i go fri be Lod nomo, God blong olgeta.

22 Mo oli bin talem tangkyu long God, yes, evri man blong

olgeta mo evri woman blong olgeta mo evri pikinini blong olgeta we oli bin save toktok, i bin singaot laod mo bin presem God blong olgeta.

23 Mo nao Lod i bin talem long Alma: Hariap mo tekem yu mo ol pipol ia aot long graon ia, from ol man blong Lemana i bin wekap mo oli stap folem yufala; taswe kamaot long graon ia, mo bae mi stopem ol man blong Lemana long vale ia blong mekem se oli no save gohed blong folem pipol ia.

24 Mo i bin hapen se oli bin aot long vale, mo oli bin tekem wokbaot blong olgeta i go long ples we i no gat man long hem.

25 Mo afta we oli bin stap long ples we i no gat man long hem blong twelef dei, oli bin kam long graon blong Sarahemla; mo tu king Mosaea i bin kasem olgeta wetem glad.

---

## JAPTA 25

---

*Ol laen blong Myulek long Sarahemla i kam ol man blong Nifae— Oli save long ol pipol blong Alma mo blong Senif— Alma i baptaesem Limhae mo evri pipol blong hem— Mosaea i givim raet long Alma blong mekem Jos blong God. Raonabaot 120 yia bifo Kraes i bon.*

Mo nao king Mosaea i bin mekem se evri pipol i kam tugeta.

2 Nao i no gat plante long ol pikinini blong Nifae, o plante long olgeta we oli bin kamaot long laen blong Nifae, olsem we i bin gat long ol pipol blong Sarahemla, we i bin kamaot long

laen blong Myulek mo olgeta we oli bin kam wetem hem long ples we i no gat man long hem.

3 Mo i no bin gat plante long ol pipol blong Nifae mo long ol pipol blong Sarahemla olsem long ol man blong Leman; yes, namba blong olgeta i no bin kasem haf blong olgeta.

4 Mo nao evri pipol blong Nifae i bin kam tugeta mo tu evri man blong Sarahemla, mo oli bin kam tugeta long tu grup.

5 Mo i bin hapen se Mosaea i bin ridim, mo i bin mekem se oli ridim, ol histri blong Senif long ol pipol blong hem; yes, hem i bin ridim ol histri blong ol pipol blong Senif, stat long taem we oli bin aot long graon blong Sarahemla go kasem taem we oli bin kambak bakegen.

6 Mo tu hem i bin ridim histri blong Alma mo ol brata blong hem, mo evri hadtaem blong olgeta stat long taem we oli bin livim graon blong Sarahemla, go kasem taem we oli bin kambak bakegen.

7 Mo nao, taem we Mosaea i bin finis blong ridim ol histri ia, ol pipol blong hem we i bin stap long graon i bin fulap wetem sapraes mo oli sapraes tumas.

8 From oli no bin save wanem blong tingting long hem; from taem we oli bin luk olgeta ia we oli bin mekem olgeta i kamaot long slef, oli bin fulap wetem bigfala glad we i bigwan tumas.

9 Mo bakegen, taem we oli bin tingbaot ol brata blong olgeta we ol man blong Leman i bin

kilim olgeta i ded, oli bin fulap wetem sore, mo tu wota blong ae i bin kamaot plante from sore.

10 Mo bakegen, taem we oli bin tingbaot fasin ia blong God we i gud tumas we i bin kam kwiktaem mo paoa blong hem blong mekem Alma mo ol brata blong hem i go fri long ol han blong ol man blong Leman mo long slef, oli bin leftemap ol voes blong olgeta mo oli bin talem tangkyu long God.

11 Mo bakegen, taem we oli bin tingbaot ol man blong Leman, we oli ol brata blong olgeta, long saed blong ol fasin blong sin mo doti ples blong olgeta, oli bin fulap wetem soa blong bodi mo harem nogud tumas from ol gudfala laef blong olgeta.

12 Mo i bin hapen se olgeta we oli ol pikinini blong Amulon mo ol brata blong hem, we oli bin tekem ol gel blong ol man blong Leman olsem ol woman blong olgeta, i no bin hapi long ol fasin blong ol papa blong olgeta, mo bae oli nomo wantem olgeta blong singaotem olgeta wetem ol nem blong ol papa blong olgeta, taswe oli bin tekem long olgeta nem blong Nifae blong mekem se oli save singaotem olgeta ol pikinini blong Nifae, mo bae oli kaontem olgeta ia long medel blong olgeta we oli bin singaotem ol man blong Nifae.

13 Mo nao evri pipol blong Sarahemla oli bin kaontem olgeta wetem ol man blong Nifae, mo samting ia from oli no bin givim kingdom long wan man, be long olgeta we oli

bin kamaot long laen blong Nifae nomo.

14 Mo nao i bin hapen se taem we Mosaea i bin finis blong toktok mo rid long ol pipol, hem i bin wantem se Alma tu bae i toktok long ol pipol.

15 Mo Alma i bin toktok long olgeta, taem we oli bin stap tugeta long ol bigfala grup, mo hem i bin go long wan grup i go long narafala grup, i prij long ol pipol fasin blong sakem sin mo fet long Lod.

16 Mo hem i bin talem strong long ol man blong Limhae mo ol brata blong hem, evriwan we oli bin mekem olgeta i kamaot long slef, blong bae oli tingbaot se hem i bin Lod we i bin mekem olgeta i go fri.

17 Mo i bin hapen se afta we Alma i bin tijim plante samting long ol pipol, mo i bin stop blong toktok long olgeta, se king Limhae i bin wantem se hem i save kasem baptaes; mo evri pipol blong hem i bin wantem blong kasem baptaes tu.

18 Taswe, Alma i bin go fored long wota mo i bin baptaesem olgeta; yes, hem i bin baptaesem olgeta olsem we hem i bin mekem long ol brata blong hem long ol wota blong Momon; yes, mo evriwan we hem i bin baptaesem olgeta, oli bin joenem jos blong God; mo samting ia from bilif blong olgeta long ol toktok blong Alma.

19 Mo i bin hapen se king Mosaea i bin letem long Alma blong hem i save stanemap ol jos truaot long evri graon blong Sarahemla; mo i bin givim paoa

long hem blong odenem ol pris mo ol tija ova long evri jos.

20 Nao oli bin mekem samting ia from i bin gat plante man tumas, mekem se oli no save lukaotem olgeta tru long wan wan tija nomo; mo tu olgeta evriwan i no save harem toktok blong God taem we oli kam tugeta long wan grup;

21 Taswe oli bin kam tugeta long ol defren grup, we oli singaotem olgeta ol jos; mo evri jos i bin gat ol pris blong olgeta mo ol tija blong olgeta, mo evri pris i bin gat trutok folem olsem we oli bin kasem tru long maot blong Alma.

22 Mo olsem ia nao, i nomata we i bin gat plante jos, olgeta evriwan i wan jos nomo, yes, hem i jos blong God; from i no gat wan samting we oli bin prijim long evri jos be fasin blong sakem sin mo fet long God.

23 Mo nao i bin gat seven jos long graon blong Sarahemla. Mo i bin hapen se eniwan we i bin wantem blong tekem long olgeta nem blong Kraes, o blong God, oli bin joenem ol jos blong God;

24 Mo oli bin singaotem olgeta ol pipol blong God. Mo Lod i bin poremaot Spirit blong hem long olgeta, mo hem i bin blesem olgeta, mo oli bin kam antap gud long graon.

---

### JAPTA 26

---

*Olgeta we oli no biliv, oli lidim plante memba blong Jos i go long sin — Oli promes long Alma se bae*

*hem i kasem laef we i no save finis — Olgeta we oli sakem sin mo oli baptaes bae oli kasem fogivones — Ol memba blong Jos we oli mekem sin mo oli sakem sin mo talemaot sin blong olgeta long Alma mo long Lod bae oli fogivim olgeta; sapos no, bae oli no kaontem olgeta long ol pipol blong Jos. Raonabaot 120-100 yia bifo Kraes i bon.*

NAO i bin hapen se i bin gat plante long jeneresen ia we i stap kam antap we oli no bin save andastanem ol toktok blong king Benjamin, from oli ol smol pikinini taem we hem i bin toktok long ol pipol blong hem; mo oli no biliv long ol kastom blong ol bubu blong olgeta.

2 Oli no bin biliv long wanem we oli bin talemaot long saed blong laef bakegen blong ol ded, mo tu oli no biliv long saed blong Kraes bae i kam.

3 Mo nao from oli no bin biliv, oli no bin save andastanem toktok blong God; mo ol hat blong olgeta i bin kam strong.

4 Mo oli no bin wantem blong kasem baptaes; mo tu oli no bin wantem blong joenem jos. Mo oli bin wan pipol we i stap olgeta nomo long saed blong fet blong olgeta, mo oli bin stap olsem long ol taem afta, we i long ol fasin blong wol mo long fasin blong sin blong olgeta; from bae oli no prea long Lod, God blong olgeta.

5 Mo nao long taem we Mosaea i stap rul, namba blong olgeta i no bin kasen haf blong ol namba blong ol pipol blong God; be from ol pulaot long

medel blong ol brata blong olgeta, oli bin kam moa plante.

6 From i bin hapen se oli bin giaman long plante wetem ol flas toktok blong olgeta, we oli bin stap long jos, mo oli bin mekem olgeta blong mekem plante sin; taswe i bin gat nid se olgeta we oli bin mekem sin, we oli stap long jos, bae jos i panisim olgeta.

7 Mo i bin hapen se oli bin tekem olgeta i kam long fored blong ol pris, mo ol tija i bin givim olgeta long ol pris; mo ol pris i bin tekem olgeta i go long fored blong Alma we i bin hae pris.

8 Nao king Mosaea i bin givim Alma raet ova long jos.

9 Mo i bin hapen se Alma i no bin save long saed blong olgeta; be i bin gat plante witnes agensem olgeta; yes, ol pipol i bin stanap mo bin testifae agensem ol rabis fasin blong olgeta, fulap.

10 Nao i no bin gat eni samting olsem we i bin hapen long jos bifo; taswe Alma i bin harem nogud long spirit blong hem, mo hem i bin mekem se bae oli tekem olgeta i go long fored blong king.

11 Mo hem i bin talem long king: Luk, hemia plante we mifala i bin tekem i kam long fored blong yu we ol brata blong olgeta i talem se oli bin mekem rong; yes, oli bin faenem olgeta long taem we oli stap mekem evri kaen rabis fasin. Mo oli no sakem ol rabis fasin blong olgeta; taswe mifala i bin tekem olgeta i kam long fored blong



yu, blong yu save jajem olgeta folem ol rabis samting we oli bin mekem.

12 Be king Mosaea i bin talem long Alma: Luk, mi no jajem olgeta, taswe mi livim olgeta long ol han blong yu blong yu jajem olgeta.

13 Mo nao spirit blong Alma i bin harem nogud bakegen; mo hem i bin go mo i bin askem long Lod se wanem bae hem i mas mekem long saed blong samting ia, from hem i bin fraet se bae hem i mekem wan rong samting long ae blong God.

14 Mo i bin hapen se afta hem i bin poremaot ful sol blong hem long prea long God, voes blong Lod i bin kam long hem se:

15 Mi mi blesem yu, Alma, mo bae mi mi blesem olgeta we i bin baptaes long ol wota blong Momon. Mi mi blesem yu from strong fet blong yu long ol toktok nomo blong wokman blong mi Abinadae.

16 Mo mi mi blesem olgeta from strong fet blong olgeta long ol toktok nomo we yu yu bin talemaot long olgeta.

17 Mo mi mi blesem yu from yu yu bin stanemap wan jos long medel blong ol pipol ia; mo bae oli stanap strong, mo bae oli ol pipol blong mi.

18 Yes, mi mi blesem pipol ia we oli glad blong holem nem blong mi; from long nem blong mi bae oli singaotem olgeta, mo oli blong mi.

19 Mo from yu yu bin askem long mi long saed blong ol man we i brekem loa, mi mi blesem yu.

20 Yu yu wokman blong mi; mo mi mi mekem kavenan wetem yu blong bae yu yu kasem laef we i no save finis; mo bae yu yu wok blong mi mo go aot long nem blong mi, mo bae yu yu karem ol sipsip blong mi i kam tugeta.

21 Mo hem we bae i harem voes blong mi bae i sipsip blong mi; mo hem bae yufala i tekem long jos, mo hem bae mi mi tekem tu.

22 From luk, hemia i jos blong mi; eni man we i kasem baptaes bae oli baptaesem hem blong sakem sin. Mo eni man we bae yufala i tekem, bae i bilif long nem blong mi; mo hem bae mi mi fogivim gud.

23 From hem i mi we mi tekem long mi ol sin blong wol; from hem i mi we mi bin mekem olgeta; mo hem i mi, we i letem long hem we i biliv, go kasem en, wan ples long raet han blong mi.

24 From luk, long nem blong mi oli singaotem olgeta; mo sapos oli save mi bae oli kam fored, mo bae oli gat wan ples we i no save finis long raet han blong mi.

25 Mo bae i kam blong hapen se taem we nambatu bigfala pupu bae i krae, afta bae olgeta we oli no bin save mi i kam fored mo bae oli stanap long fored blong mi.

26 Mo afta bae oli save se mi mi Lod, God blong olgeta, se mi mi Ridima blong olgeta; be bae oli no bin wantem mi blong pemaot olgeta.

27 Mo afta bae mi talemaot

long olgeta se mi mi neva bin save olgeta; mo bae oli aot i go long faea we i no gat en blong hem we oli bin mekem rere finis blong devel mo ol enjel blong hem.

28 Taswe mi mi talem long yufala, man we bae i no harem voes blong mi, semfala man ia bae yufala i no tekem hem i kam long jos blong mi, from hem bae mi mi no tekem long las dei.

29 Taswe mi mi talem long yufala, Go; mo eni man we i brekem loa agensem mi, hem bae yufala i jajem folem ol sin we hem i bin mekem; mo sapos hem i bin talemaot ol sin blong hem long fored blong yufala mo mi, mo i sakem sin wetem tru hat blong hem, hem bae yufala i fogivim, mo bae mi mi fogivim hem tu.

30 Yes, mo evri taem we ol pipol blong mi i sakem sin bae mi fogivim olgeta long ol fasin blong brekem loa blong olgeta agensem mi.

31 Mo bae yufala i fogivim ol fasin blong brekem loa blong yufala wan wan, from mi mi talem stret long yufala se, hem we i no fogivim ol fasin blong brekem loa blong man we i stap raonabaot long hem, taem we hem i talem se hem i sakem sin, semfala man ia i karem panis i kam long hemwan bakegen.

32 Nao mi mi talem long yufala, Go; mo eni man we bae i no sakem sin blong hem, semfala man ia bae oli no kaontem hem wetem ol pipol blong mi; mo samting ia bae oli folem stat long taem ia i go.

33 Mo i bin hapen se taem we Alma i bin harem ol toktok ia hem i bin raetem daon olgeta blong mekem se hem i save holem olgeta, mo blong hem i save jajem ol pipol blong jos folem ol komanmen blong God.

34 Mo i bin hapen se Alma i bin go mo i bin jajem olgeta we oli bin tekem olgeta long taem we oli stap mekem rabis fasin, folem toktok blong Lod.

35 Mo eni man we i bin sakem sin blong olgeta mo i bin talemaot olgeta, olgeta ia hem i bin kaontem wetem ol pipol blong jos;

36 Mo olgeta we bae oli no talemaot ol sin blong olgeta mo sakem rabis fasin blong olgeta, ol semfala man ia oli no bin kaontem olgeta wetem ol pipol blong jos, mo ol nem blong olgeta oli bin tekemaot.

37 Mo i bin hapen se Alma i bin lidim evri wok blong jos; mo oli bin stat bakegen blong gat pis mo blong kam antap gud tumas long ol wok blong jos, oli bin wokbaot folem wan gud laef long fored blong God, oli bin tekem plante mo oli bin baptaesem plante.

38 Mo nao evri samting ia, Alma mo olgeta we oli wok wetem hem i bin mekem, we oli bin lidim jos, oli wokbaot stret, oli tijim ol toktok blong God long evri samting, oli harem nogud long evri kaen hadtaem, olgeta we oli no blong jos blong God i bin givim hadtaem long olgeta.

39 Mo oli bin panisim ol brata blong olgeta; mo oli bin panisim

olgeta tu, evriwan tru long tok-tok blong God, folem ol sin blong hem, o long ol sin we hem i bin mekem, from God i bin givim oda long hem blong prea mo no stop, mo blong talem tangkyu long evri samting.

JAPTA 27

*Mosaea i agensem fasin blong givim hadtaem long ol man, mo i givim oda blong mekem gud long wan wan man—Yangfala Alma mo ol fo boe blong Mosaea i lukaotem blong smasem gud Jos—Wan enjel i kamaot mo i givim oda long olgeta blong stopem ol nogud wok blong olgeta—Alma i no save tok-tok—Evri man i mas bon bakegen blong kasem fasin blong sevem man—Alma mo ol boe blong Mosaea i talemaot ol gudfala nius. Raonabaot 100-92 yia bifo Kraes i bon.*

Mo nao i bin hapen se ol fasin blong givim hadtaem we olgeta we oli no biliv i bin mekem agensem jos i bin kam bigwan tumas, mekem se jos i bin stat blong komplén, mo oli bin komplén long ol lida blong olgeta long saed ia; mo oli bin komplén long Alma. Mo Alma i bin tekem samting ia i go long fored blong king blong olgeta, Mosaea. Mo Mosaea i bin holem wan miting wetem ol pris blong hem.

2 Mo i bin hapen se king Mosaea i bin sendem wan tok-tok i go long publik truaot long graon raonabaot blong mekem se bae i no save gat wan man we i no biliv i givim hadtaem

long olgeta we oli blong jos blong God.

3 Mo i bin gat wan strong rul truaot long evri jos, se bae i no mas gat fasin ia blong givim hadtaem long medel blong olgeta, blong mekem se evri man i gat sem raet nomo;

4 Blong oli no mas letem hae tingting, o bigfala flas, smasem gud pis blong olgeta; blong evri man i mas mekem i gud long ol man we i stap raonabaot long hem olsem hemwan, blong oli wok wetem ol han blong olgeta nomo blong sapotem olgeta.

5 Yes, mo evri pris blong olgeta mo evri tija blong olgeta i mas wok wetem ol han blong olgeta blong sapotem olgeta, long evri taem hemia nomo sapos oli sik, o oli wantem samting tumas; mo taem oli mekem ol samting ia, oli bin kasem fulap gladhat blong God.

6 Mo i bin stat blong gat bigfala pis bakegen long graon; mo ol pipol i bin stat blong kam plante, mo i bin stat blong seraot i go olbaot long fes long graon, yes, long not mo long saot, long is mo long wes, oli bildim ol bigfala bigtaon mo ol vilej long evri pat blong graon.

7 Mo Lod i bin visitim olgeta mo i bin mekem olgeta i kam antap gud, mo oli bin kam bigwan mo wan rij pipol.

8 Nao ol boe blong Mosaea, oli bin kaotem olgeta wetem olgeta we oli no biliv; mo tu wan long ol boe blong Alma oli bin kaotem hem wetem olgeta, oli bin singaotem hem Alma, folem

papa blong hem; be, hem i bin kam wan nogud man mo i bin wosip long ol aedol. Mo hem i bin wan man we i toktok plante mo i bin talem plante flas toktok long ol pipol; taswe hem i bin lidim plante long ol pipol blong mekem semak olsem ol rabis fasin blong hem.

9 Mo hem i bin kam olsem wan bigfala samting we i blokem jos blong God blong kam antap gud; hem i stilim i gowe ol hat blong ol pipol, i mekem se plante pulaot i hapen long medel blong ol pipol, i givim wan janis blong enemi blong God blong yusum paoa blong hem ova long olgeta.

10 Mo nao i bin hapen se taem we hem i stap go aot blong smasem gud jos blong God, from hem i bin go long sikret wetem ol boe blong Mosaea blong lukaotem blong smasem gud jos, mo blong lidim i gowe ol pipol blong Lod agensem ol komanmen blong God, o king tu—

11 Mo olsem we mi bin talem long yufala, taem we oli bin stap go aot agensem God, luk, wan enjel blong Lod i bin kam-aot long olgeta; mo hem i bin kamdaon olsem se hem i stap long wan klaod; mo hem i toktok olsem se hem i gat wan voes blong tanda, we i bin mekem graon i seksek long ples we oli bin stanap long hem;

12 Mo sapraes blong olgeta i bin bigwan tumas, mekem se oli bin foldaon long graon, mo oli no bin andastanem ol toktok we hem i bin talem long olgeta.

13 Be hem i bin tok laod bak-egen, i talem: Alma, girap mo kam fored, from wanem yu givim hadtaem long jos blong God? From Lod i bin talem: Hemia i jos blong mi, mo bae mi stanemap hem; mo i no save gat wan samting we i save putum daon hem, sapos i no tru long ol fasin blong brekem loa blong ol pipol blong mi.

14 Mo bakegen, enjel i bin talem: Luk, Lod i bin harem ol prea blong ol pipol blong hem, mo tu ol prea blong wokman blong hem, Alma, we i papa blong yu; from hem i bin prea wetem fulap fet long saed blong yu blong mekem se oli save tekem yu i kam long save blong trutok; taswe, from stamba tingting ia, mi mi bin kam blong winim tingting blong yu blong mekem se yu save paoa mo raet blong God, blong ol prea blong ol wokman blong hem i save gat ansa folem fet blong olgeta.

15 Mo nao luk, yu yu save toktok agensem paoa blong God? From luk, voes blong mi i no mekem graon i seksek? Mo tu yu yu no save luk mi long fored blong yu? Mo God i bin sendem mi.

16 Nao mi talem long yu: Go, mo tingbaot taem we ol bubu blong yu i bin stap long kalabus long graon blong Helam, mo long graon blong Nifae; mo tingbaot ol bigfala samting hem i bin mekem long olgeta; from oli bin slef mo hem i bin mekem olgeta i go fri. Mo nao mi talem long yu, Alma, go long rod blong yu, mo nomo

lukaotem blong smasem gud jos, blong mekem se oli save kasem ansa blong ol prea blong olgeta, mo samting ia tu sapos yu yu no wantem blong yu sakemaot yu wan.

17 Mo nao i bin hapen se hemia ol las toktok we enjel i bin talem long Alma, mo hem i bin aot.

18 Mo nao Alma mo olgeta we i bin stap wetem hem i bin foldaon bakegen long graon, from sapraes blong olgeta i bin bigwan tumas; from wetem ae blong olgeta nomo oli bin luk wan enjel blong Lod; mo voes blong hem i bin olsem tanda, we i bin mekem graon i seksek; mo oli bin save se i no gat wan samting be paoa blong God nomo we i save mekem graon i seksek mo mekem se i seksek olsem se bae i brok brok.

19 Mo nao sapraes blong Alma i bin bigwan tumas mo hem i no bin save toktok, we i mekem se hem i no save openem maot blong hem, yes, mo hem i bin kam slak tumas, kasem we hem i no save muvum ol han blong hem; taswe olgeta we oli bin stap wetem hem, i bin tekem hem mo oli bin karem hem from hem i no save mekem wan samting, go kasem taem we oli bin putum hem daon long fored blong papa blong hem.

20 Mo oli bin talem long papa blong hem evri samting we i bin hapen long olgeta; mo papa blong hem i bin glad, from hem i bin save se hem i paoa blong God.

21 Mo hem i bin mekem se wan grup blong pipol bae i kam

tugeta blong mekem se oli save witnes long wanem we Lod i bin mekem blong boe blong hem, mo tu blong olgeta we i bin stap wetem hem.

22 Mo hem i bin mekem se ol pris i mas kam tugeta; mo oli bin stat blong livim kakae, mo blong prea long Lod, God blong olgeta blong bae hem i openem maot blong Alma, blong mekem se hem i save toktok, mo tu blong ol leg mo ol han blong hem i save kasem paoa blong olgeta—blong ol ae blong ol pipol i save open blong luk mo save long saed blong gudfala fasin mo glori blong God.

23 Mo i bin hapen se afta we oli bin livim kakae mo bin prea blong spes blong tu dei mo tu naet, ol leg mo ol han blong Alma i bin kasem paoa blong olgeta, mo hem i bin stanap mo bin stat blong toktok long olgeta, i askem olgeta blong stap hapi:

24 From, hem i bin talem, mi bin sakem ol sin blong mi, mo Lod i bin pemaot mi; luk, mi mi bon long saed blong Spirit.

25 Mo Lod i bin talem long mi: No sapraes se evri man, yes, ol man mo ol woman, evri kantri, famle, lanwis mo pipol, i mas bon bakegen; yes, bon long God, oli mas jenis long fasin blong wol mo fasin blong foldaon blong olgeta we oli stap long hem, i go long wan fasin blong stret fasin, mo God i pemaot olgeta, oli kam ol boe mo ol gel blong hem;

26 Mo olsem ia nao oli kam ol niu man, mo hemia nomo

sapos oli no mekem samting ia, oli no save long eni wei, kasem kingdom blong God.

27 Mo mi talem long yufala, hemia nomo sapos i no olsem ia, oli mas sakemaot olgeta; mo hemia mi save, from we klosap oli bin sakemaot mi.

28 Be, afta we mi mi bin wokbaot long plante hadtaem, mi stap sakem sin kasem taem we mi klosap ded, Lod long sore, i bin luk se i stret blong tekemaot mi long wan faea we i no gat en, mo mi mi bon long God.

29 Sol blong mi, Lod i bin pemaot sol blong mi long prapa rabis ples ia mo ol rop blong rabis fasin. Mi bin stap long wan hol we i no gat en mo i tudak; be nao mi luk gudfala laet blong God. Oli bin mekem sol blong mi i soa wetem trabol we i no save finis; be oli bin tekemaot mi, mo sol blong mi i nomo soa.

30 Mi bin sakemaot Ridima blong mi, mo bin tanem baksaed blong mi long samting we ol bubu blong yumi i bin talemaot; be nao blong oli save luk se bae hem i kam, mo we hem i tingbaot evri samting we hem i bin mekem, bae hem i soemaot hem long evriwan.

31 Yes, evri ni bae i bodaon, mo evri tang bae i talemaot long fored blong hem. Yes, long las dei tu, taem we evri man bae i stanap blong hem i jajem olgeta, ale bae oli talemaot se hem i God; afta bae oli talemaot, olgeta we oli laef long wol we i no gat God, se jajmen blong wan panis we i no gat en hem i

stret long olgeta; mo bae oli seksek, mo seksek from fraet, mo gobak wetem fraet andanit long ae blong hem we i lukluk kwik long evri samting.

32 Mo nao i bin hapen se Alma i bin stat long taem ia i go blong tijim ol pipol, mo olgeta we i bin stap wetem Alma long taem we enjel i bin kamaot long olgeta, i wokbaot raonabaot truaot long graon, mo talemaot long evri pipol ol samting we oli bin harem mo bin luk, mo oli prijim toktok blong God wetem fulap hadtaem, olgeta we oli no biliv i bin givim tumas hadtaem long olgeta, mo plante long olgeta i bin faetem olgeta.

33 Be i nomata long ol samting ia, oli bin givim plante help long jos, mekem fet blong olgeta i strong, mo oli bin toktok strong long olgeta wetem longfala tingting, mo plante hadtaem blong holem ol komanmen blong God.

34 Mo fo long olgeta oli ol boe blong Mosaea; mo ol nem blong olgeta i Amon, mo Eron, mo Omna, mo Himnae; hemia ol nem blong ol boe blong Mosaea.

35 Mo oli bin wokbaot truaot long evri graon blong Sarahemla, mo long medel blong ol pipol we i bin stap andanit long rul blong king Mosaea, oli bin wok had blong mekem gud ol samting nogud we oli bin mekem long jos, oli bin talemaot evri sin blong olgeta, mo oli bin talemaot evri samting we oli bin luk, mo eksplenem ol profesi mo ol skripja long evriwan we i bin wantem blong harem olgeta.

36 Mo olsem ia nao oli bin ol tul long ol han blong God blong karem plante i kam long save blong trutok, yes, blong save long saed blong Ridima blong olgeta.

37 Mo hamas nao oli blesem olgeta! From oli bin talemaot pis; mo oli bin talemaot gudfala nius blong gud; mo oli bin talemaot long pipol se Lod i rul.

---

### JAPTA 28

---

*Ol boe blong Mosaea i go blong prij long ol man blong Leman—  
Wetem tu ston blong sia Mosaea i transletem ol buk blong ol man blong Jared. Raonabaot 92 yia bifo Kraes i bon.*

NAO i bin hapen se afta we ol boe blong Mosaea i bin mekem ol samting ia, oli bin tekem wan smol namba wetem olgeta mo oli bin gobak long papa blong olgeta, king, mo oli bin askem hem blong letem olgeta blong oli save, wetem olgeta we oli bin jusum, go antap long graon blong Nifae blong oli save prijim evri samting we oli bin harem, mo blong oli save serem toktok blong God long ol brata blong olgeta, ol man blong Leman—

2 Blong maet oli save tekem olgeta blong save long saed blong Lod, God blong olgeta, mo winim tingting blong olgeta blong oli luksave ol rabis fasin blong ol bubu blong olgeta; mo maet oli save tekemaot rabis tingting ia blong oli no laekem ol man blong Nifae,

blong mekem se oli save mekem olgeta i glad long Lod, God blong olgeta, blong oli save kam gudfala fren wetem wan wan long olgeta, mo we i nomo mas gat ol rao long evri graon we Lod, God blong olgeta i bin givim long olgeta.

3 Nao oli bin wantem se oli mas talemaot fasin blong sevem man long evri man, from oli no save bin wantem letem se wan sol blong wan man i save lus; yes, tu ol tru tingting ia, se eni sol bae i harem nogud long wan hadtaem we i no gat en, i bin mekem olgeta i seksek.

4 Mo olsem ia nao Spirit blong Lod i bin wok long olgeta, from oli bin moa nogud long ol rabis man blong mekem ol sin. Mo Lod i bin luk se i stret long sore blong hem we i no gat en blong sevem olgeta; be, oli bin safa plante hadtaem blong sol, from ol rabis sin blong olgeta, oli kasem plante hadtaem mo oli fraet se bae oli sakemaot olgeta blong oltaem.

5 Mo i bin hapen se oli bin askem long papa blong olgeta plante dei blong oli save go antap long graon blong Nifae.

6 Mo king Mosaea i bin go mo i bin askem long Lod sapos hem i mas letem ol boe blong hem i go antap long medel blong ol man blong Leman blong prijim trutok.

7 Mo Lod i bin talem long Mosaea: Letem olgeta i go antap, from bae plante i biliv long ol toktok blong olgeta, mo bae oli kasem laef we i no save finis; mo bae mi mekem ol boe blong

yu i go fri long ol han blong ol man blong Leman.

8 Mo i bin hapen se Mosaea i bin letem olgeta blong go mo mekem folem we oli bin askem.

9 Mo oli bin tekem wokbaot blong olgeta i go long ples we i no gat man long hem blong go antap blong prijim trutok long medel blong ol man blong Leman; mo bae mi talemaot wan histri blong wanem oli bin mekem, afta hemia.

10 Nao king Mosaea i no bin gat wan man we hem i save givim raet long hem blong rul-um kingdom, from i no bin gat eni long ol boe blong hem we bae i akseptem kingdom.

11 Taswe hem i bin tekem ol histri we oli bin raetem long ol buk we oli bin mekem wetem bras, mo tu ol buk blong Nifae, mo evri samting we hem i bin holem mo i bin sevem folem ol komanmen blong God, afta we hem i bin transletem mo i bin mekem oli raetem ol histri we i bin stap long ol buk blong gol, we ol pipol blong Limhae i bin faenem, we Limhae i bin givim olgeta long hem;

12 Mo samting ia hem i bin mekem from bigfala wari blong ol pipol blong hem; from oli bin wantem bitimak blong save long saed blong ol pipol ia we oli bin ded.

13 Mo nao hem i bin transletem olgeta tru long tu ston ia we oli bin fasem tufala long tufala saed blong wan bonara.

14 Nao ol samting ia oli bin mekem rere stat long stat, mo oli bin pasem daon long wan

jeneresen i go long narafala jeneresen, from stamba tingting ia blong tanem ol lanwis;

15 Mo Lod i bin holem mo sevem olgeta wetem han blong hem, blong hem i save soemaot long evri man we bae i stap long graon ia, ol rabis fasin mo ol rabis sin blong ol pipol blong hem;

16 Mo eni man we i holem ol samting ia, oli singaotem hem sia, folem fasin blong ol taem bifo.

17 Nao afta we Mosaea i bin finis blong transletem ol histri ia, luk, hem i bin talemaot wan histri blong ol pipol we oli bin ded, stat long taem we oli bin ded, i gobak long taem we oli bin bildim bigfala taoa, long taem we Lod i bin miksimap lanwis blong ol pipol, mo oli bin seraot i go olbaot long fes blong ful wol, yes, mo tu stat long taem ia i gobak kasem taem blong mekem Adam.

18 Nao histri ia i bin mekem ol pipol blong Mosaea blong oli krae tumas, yes, oli bin fulap wetem sore; be tu hem i bin givim long olgeta plante save, long samting ia oli bin hapi.

19 Mo histri ia bae oli raetem afta hemia; from luk, i nid se evri pipol i mas save ol samting we oli bin raetem long histri ia.

20 Mo nao, olsem we mi bin talem long yufala se afta we king Mosaea i bin mekem ol samting ia, hem i bin tekem buk ia we oli bin mekem wetem bras, mo evri samting we hem i bin holem, mo i bin givim olgeta long Alma, we i bin boe



blong Alma; yes, evri histri, mo tu ol samting blong tanem ol lanwis, mo i bin givim olgeta long hem, mo hem i bin givim oda long hem se hem i mas holem mo sevem olgeta, mo tu kipim wan histri blong ol pipol, pasem i go daon long wan jenesen i go long narawan, olsem we oli bin pasem i go daon stat long taem we Lihae i bin aot long Jerusalem.

---

JAPTA 29

---

*Mosaea i putumap tingting ia se oli jusum ol jaj long ples blong wan king—Ol king we oli no stret mo gud i lidim ol pipol blong olgeta long sin—Voes blong ol pipol i jusum Yangfala Alma blong kam jif blong ol jaj—Hem i hae pris tu ova long Jos—Olfala Alma mo Mosaea i ded. Raonabaot 92-91 yia bifo Kraes i bon.*

NAO taem we Mosaea i bin mekem samting ia hem i bin sendemaot wan mesej i go long evri graon, long evri pipol, from hem i bin wantem blong save tingting blong olgeta long saed blong huia bae i kam king blong olgeta.

2 Mo i bin hapen se voes blong ol pipol i bin kam, i talem: Mifala i wantem se Eron, boe blong yu i kam king blong mifala mo man blong rul blong mifala.

3 Nao Eron i bin go antap long graon blong Nifae, taswe king i no bin save givim kingdom long hem; mo tu Eron i no bin wantem blong tekem long hem kingdom ia; mo tu i no bin gat

wan long ol boe blong Mosaea we i bin wantem blong tekem long hem kingdom ia.

4 Taswe king Mosaea i bin sendem wan mesej bakegen long medel blong ol pipol; yes we i wan toktok we hem i bin raetem i bin sendem i go long medel blong ol pipol. Mo hemia i ol toktok we hem i bin raetem, i talem:

5 Luk, O yufala ol pipol blong mi, o ol brata blong mi, from mi tekem yufala olsem ol brata blong mi, mi wantem se yufala i tingbaot samting ia we mi bin singaotem yufala blong tingbaot—from yufala i wantem blong gat wan king.

6 Nao mi talem long yufala se hem we i stret blong kingdom i go long hem i no bin akseptem, mo bae hem i no tekem long hem kingdom ia.

7 Mo nao sapos i gat wan narafala we oli putumap long ples blong hem, luk mi fraet se bae ol rao i kamaot long medel blong yufala. Mo huia i save sapos boe blong mi, we kingdom ia i blong hem, bae i kros mo i pulum wan pat blong ol pipol ia i go folem hem, mo samting ia bae i statem ol faet mo ol rao long medel blong yufala, we bae i mekem plante blad i ron mo jenisim ol gudfala fasin blong Lod, yes, mo smasem gud ol sol blong plante pipol.

8 Nao mi talem long yufala bae yumi gat waes tingting mo tingbaot ol samting ia, from yumi no gat eni raet blong smasem gud boe blong mi, mo

tu bae yumi no gat raet blong smasem gud wan narafala wan sapos oli jusum hem blong tekem ples blong hem.

9 Mo sapos boe blong mi i gobak long hae tingting blong hem mo ol samting blong nating bae hem i jenisim ol samting we hem i bin talem, mo askem raet blong hem blong tekem kingdom, we bae i mekem hem mo tu ol pipol blong hem blong mekem plante sin.

10 Mo nao bae yumi gat waes tingting mo lukluk i go long fored long ol samting ia, mo mekem evri samting we bae i karem pis i kam long pipol ia.

11 Taswe bae mi stap olsem king blong yufala long ol dei blong mi we i stap yet; be, bae yumi jusum ol jaj, blong jajem ol pipol ia folem ol loa blong yumi; mo wan niu fasin bae yumi mekem i rere ol wok blong pipol ia, from bae yumi jusum ol man we oli gat waes tingting blong kam ol jaj, we bae oli jajem pipol ia folem ol komanmen blong God.

12 Nao i moa gud se wan man i kasem jajmen long God be no long man, from ol jajmen blong God i stret oltaem, be ol jajmen blong ol man i no stret oltaem.

13 Taswe, sapos i save hapen se yufala i save gat ol stret man blong stap olsem ol king blong yufala, we bae oli stanemap ol loa blong God, mo jajem pipol ia folem ol komanmen blong hem, yes, sapos yufala i save gat ol man olsem ol king blong

yufala we bae oli mekem olsem papa blong mi Benjamin i bin mekem blong ol pipol ia—Mi talem long yufala, sapos i save olsem ia oltaem, afta bae i gat nid se yufala i gat ol king oltaem blong rulum yufala.

14 Mo tu miwan, mi bin wok wetem evri paoa mo evri fasin blong save we mi bin gat, blong tijim yufala ol komanmen blong God, mo blong stanemap pis truaot long graon, mekem se i no gat ol faet, o ol rao, o ol stil, o stil long taem blong faet, o blong kilim man i ded, o eni kaen fasin blong rabis sin;

15 Mo eni man we i bin mekem rabis fasin, hem mi bin panisim folem rabis samting ia we hem i bin mekem, folem loa we ol bubu blong yumi i bin givim long yumi.

16 Nao mi talem long yufala se, from evri man i no stret i no gat nid se yufala i gat wan king o ol king blong rulum yufala.

17 From luk, hamas rabis fasin wan nogud king i mekem se i hapen, yes, mo wanem bigfala trabol ia!

18 Yes, tingbaot king Noa, ol fasin nogud blong hem mo ol rabis sin blong hem, mo tu ol fasin nogud mo ol rabis sin blong ol pipol blong hem. Luk, wanem bigfala trabol i bin kam long olgeta; mo tu from ol rabis fasin blong olgeta, oli bin mekem olgeta i kam slef.

19 Mo sapos i no bin from help blong Krieta blong olgeta we i waes olgeta, mo samting ia from oli bin sakem sin blong olgeta wetem wan truhata, oli

no save ronwe mo oli mas stap olsem slef kasem naoia.

20 Be luk, hem i bin mekem olgeta i go fri from oli bin putum tingting blong olgeta i stap daon long fored blong hem; mo from oli bin prea strong tumas long hem, hem i bin mekem olgeta i kamaot long slef; mo olsem ia nao Lod i stap wok wetem paoa blong hem long evri samting long medel blong ol pikinini blong ol man, hem i stretem han blong sore i go long olgeta we oli putum tras blong olgeta long hem.

21 Mo luk, nao mi talem long yufala, se yufala i no save tekemaot wan rabis king long jea blong hem sapos i no tru long plante rao, mo mekem plante blad i ron.

22 From luk, hem i gat ol fren blong hem we oli man blong fasin nogud, mo hem i gat ol gad blong hem raonem hem; mo hem i terem ol loa blong olgeta we i bin rul wetem stret fasin bifo long hem; mo hem i purumbut long ol komanmen blong God andanit long ol leg blong hem;

23 Mo hem i mekem ol niu loa, mo i sendem olgeta i go fored long medel blong ol pipol blong hem, yes, ol loa folem fasin nogud blong hemwan; mo eni man we i no stap folem ol loa blong hem, hem i mekem se oli kilim hem i ded; mo eni man we i stap tanem baksaed agensem hem, bae hem i sendem ol ami blong hem agensem olgeta blong faet, mo sapos hem

i save bae hem i smasem olgeta; mo olsem ia nao wan nogud king i stap jenisim ol wei blong evri stret fasin.

24 Mo nao luk mi talem long yufala, i no nid se ol rabis sin olsem bae i kam long yufala.

25 Taswe, yufala i jus tru long voes blong pipol ia, ol jaj, blong mekem se yufala i kasem jajmen folem ol loa we oli bin givim long yufala long ol bubu blong yumi, we oli stret, mo we oli bin givim long olgeta tru long han blong Lod.

26 Nao i no hapen plante taem we voes blong ol pipol i wantem eni samting we i go agensem ol samting we i stret; be i hapen plante taem we olgeta we oli no plante tumas, blong wantem ol samting we i nogud; taswe bae yufala i mekem samting ia mo mekem se i loa blong yufala—blong mekem ol bisnes blong yufala tru long voes blong ol pipol.

27 Mo sapos taem i kam we voes blong ol pipol i stap jusum rabis fasin, ale hem i taem we ol jajmen blong God bae i kam long yufala; yes, ale hem i taem we bae hem i visitim yufala mo smasem yufala bigwan olsem we hem i bin visitim graon ia bifo.

28 Mo nao sapos yufala i gat ol jaj, mo oli no jajem yufala folem loa we oli bin givim finis, yufala i save mekem se wan hae jaj i jajem olgeta.

29 Sapos ol hae jaj blong yufala i no jajem ol stret jajmen, bae yufala i mekem se wan smol namba blong ol jaj blong

yufala we oli no hae blong oli kam tugeta, mo bae oli jajem ol hae jaj blong yufala folem voes blong ol pipol.

30 Mo mi givim oda long yufala blong mekem ol samting ia long respek blong Lod; mo mi givim oda long yufala blong mekem ol samting ia, mo se yufala i no gat king; mekem se sapos ol pipol ia i mekem ol sin mo ol rabis fasin, bae ol samting ia oli foldaon long ol hed blong olgeta bakegen.

31 From luk mi talem long yufala se, ol sin blong plante pipol i bin hapen from ol rabis fasin blong ol king blong olgeta; taswe ol rabis fasin blong olgeta i foldaon long ol hed blong ol king blong olgeta.

32 Mo nao mi wantem se fasin ia we evriwan i no semak, i nomo gat long graon ia, speseli long medel blong hemia ol pipol blong mi; be mi wantem se graon ia i wan graon blong fridom, mo evri man i save harem gud long ol raet blong hem mo ol janis tu, go kasem taem we Lod i luk se hem i stret se yumi save stap laef mo holem graon, yes, go kasem taem we eni laen blong yumi we bae i kam i stap long fes blong graon ia.

33 Mo plante samting moa king Mosaea i bin raetem long olgeta, blong eksplenem long olgeta evri hadtaem mo ol trabol blong wan stret king, yes, evri trabol blong sol blong hem from ol pipol, mo tu evri komplem blong ol pipol long king blong olgeta; mo hem i bin eksplenem evri samting ia long olgeta.

34 Mo hem i bin talem long olgeta se ol samting ia i no sud hapen; be se ol hevi samting bae i kam long evri pipol, mekem se evri man i save karem pat blong hem.

35 Mo tu hem i bin eksplenem long olgeta, evri nogud samting we oli bin wok long hem, taem we oli gat wan nogud king we i stap rulum olgeta.

36 Evri rabis fasin blong hem mo ol rabis sin, mo evri faet, mo rao, mo blad i ron, mo ol stil, mo ol stil long taem blong faet, mo ol fasin ia blong stap slip olbaot, mo evri kaen blong rabis fasin, we oli no save kaontem—hem i talem long olgeta se ol samting ia i no sud hapen, mo we i klia nomo se oli go agensem ol komanmen blong God.

37 Mo nao i bin hapen se, afta we king Mosaea i bin sendem ol samting ia i go fored long medel blong ol pipol, oli bin biliv se ol toktok blong hem i tru.

38 Taswe oli bin lego tingting ia blong gat wan king, mo oli bin wari plante tumas se evri man bae i gat sem janis truaot long ful graon; yes, mo evri man i bin talem se oli glad blong kasem panis blong ol sin blong olgeta bakegen.

39 Taswe, i bin hapen se oli bin kam tugeta long ol grup truaot long graon, blong sakem vot blong olgeta long saed blong huia bae i kam ol jaj blong olgeta blong jajem olgeta folem loa we oli bin givim long olgeta; mo oli bin glad plante tumas from fridom we oli bin givim long olgeta.

40 Mo oli bin kam strong long lav long Mosaea; yes, oli bin ting hae long hem moa bitim eni narafala man; from oli no bin lukluk long hem olsem wan man we i yusum paoa mo raet blong hem long wan rabis fasin, we i stap lukaotem blong kasem mane, yes, from rij samting ia we i smasem gud sol, from hem i no bin akseptem ol rij samting long olgeta, mo tu hem i no bin glad blong mekem blad i ron, be hem i bin stanem ap pis long graon, mo hem i bin letem long ol pipol blong hem blong oli go fri long evri kaen fasin blong slef; taswe oli bin ting hae long hem, yes, i tumas, i bitim we oli save kaontem.

41 Mo i bin hapen se oli bin jusum ol jaj blong rulum olgeta, o blong jajem olgeta folem ol loa; mo samting ia oli bin mekem truaot long graon.

42 Mo i bin hapen se oli bin jusum Alma blong kam faszala jif jaj, hem i hae pris tu, from papa blong hem i bin givim wok ia long hem, mo from hem i bin givim stret wok long hem long saed blong ol wok blong jos.

43 Mo nao i bin hapen se Alma i bin wokbaot long ol wei blong Lod, mo hem i bin folem ol komanmen blong hem, mo hem i bin jaj wetem ol stret jajmen; mo i bin gat pis oltaem truaot long graon.

44 Mo olsem ia nao rul blong ol jaj i bin stat truaot long ful graon blong Sarahemla, long medel blong evri pipol we oli bin singaotem olgeta ol man blong Nifae; mo Alma i bin faszala mo jif jaj.

45 Mo nao i bin hapen se papa blong hem i bin ded, hem i bin gat eiti mo tu yia, hem i bin stap laef blong mekem i hapen ol komanmen blong God.

46 Mo i bin hapen se Mosaea tu i bin ded, long teti mo tri yia blong rul blong hem, hem i bin gat siksti mo tri yia; i mekem wan total blong faef hundred mo naen yia stat long taem we Lihae i bin aot long Jerusalem.

47 Mo olsem ia nao rul blong ol king i bin en ova long ol pipol blong Nifae; mo olsem ia nao ol dei blong Alma i bin en, we hem i bin statem jos blong olgeta.

## BUK BLONG ALMA

### BOE BLONG ALMA

**H**istri blong Alma, we i boe blong Alma, we i faszala jif jaj blong Hol pipol blong Nifae mo hae pris tu blong Jos. Wan histri blong rul blong ol jaj mo ol faet mo ol rao long medel blong ol pipol. Mo tu wan histri blong faet we i stap bitwin ol laen blong Nifae mo ol laen blong Lemana folem stori blong Alma we i faszala mo jif jaj.

## JAPTA 1

*Nehor i tijim ol giaman doktrin, i stanemap wan jos, i statem fasin blong giaman pris mo i kilim Gidion i ded—Oli kilim Nehor i ded from hemi bin brekem ol loa—Fasin blong giaman pris mo fasin blong givim hadtaem i spred i go long ol pipol—Olgeta pris oli lukaotem mo helpem olgeta bak-egen, ol pipol oli lukaotem gud olgeta we oli pua mo Jos i kam antap gud. Raonabaot 91-88 yia bifo Kraes i bon.*

**N**AO i bin hapen se, long fas yia blong rul blong ol jaj long ol pipol blong Nifae, stat long taem ia i go, king Mosaea i bin go long rod ia blong evri pipol long wol, i bin faetem wan gudfala faet, i bin wokbaot stret long fored blong God, i no bin livim wan man blong tekem ples blong hem be hem i bin stanemap ol loa mo ol pipol oli agri long ol loa ia. Taswe, oli mas folem ol loa we hem i bin mekem.

2 Mo i bin hapen se, long fas yia we Alma i stap rul long jea blong jajmen, oli bin tekem wan man i kam long fored blong hem blong hem i jajem, wan man we i bigfala, mo oli save gud hem from bigfala paoa blong hem.

3 Mo hem i bin go olbaot long medel long ol pipol blong prij long olgeta samting ia we hem i kolem toktok blong God, i bin go agensem jos, i talemaot long ol pipol se evri pris mo evri tija oli sud save gud olgeta mo oli no mas wok wetem ol han

blong olgeta be ol pipol oli mas lukaotem olgeta.

4 Mo hem i bin talemaot long ol pipol se evri pipol bae oli sev long las dei mo oli no nid blong fraet o seksek. Be blong oli save leftemap hed blong olgeta mo hapi from Lod i bin mekem evri man mo i bin pemaot man tu. Mo long en bae evri man oli mas kasem laef we i no save finis.

5 Mo i bin hapen se, hem i bin tijim ol samting ia plante mekem se plante oli bin biliv long ol toktok blong hem, we i plante tumas mekem se oli stat blong sapotem hem mo givim mane long hem.

6 Mo hem i bin stat blong kam antap long fasin blong gat hae tingting long hat blong hem mo blong werem ol klos we oli sas tumas, yes, mo tu hemi bin statem blong stanemap wan jos folem ol fasin blong ol prijing blong hem.

7 Mo i bin hapen se, taem hem i stap go blong prij long olgeta we oli biliv long ol toktok blong hem, hem i bin mitim wan man we i blong jos blong God, yes, we i wan tija blong olgeta. Mo hem i bin stat blong rao wetem hem wetem ol strongfala toktok blong hem, blong i save lidim i gowe ol man blong jos; be man ia i bin stanap strong agensem hem, hem i toktok strong long hem wetem ol toktok blong God.

8 Nao nem blong man i Gidion; mo i bin hem we i bin wan tul long ol han blong God blong mekem ol pipol blong Limhae i kamaot long slef.

9 Nao from Gidion i stanap strong agensem hem wetem ol toktok blong God, hem i kros long Gidion mo i pulumaot naef blong faet blong hem mo i bin stat blong faetem hem. Nao from Gidion i bin olfala wetem plante yia, taswe hem i no save kasem ol atak blong hem. Taswe man ia i bin kilim hem i ded wetem naef blong faet.

10 Mo ol man blong jos oli bin tekem man we i kilim hem i ded mo oli tekem hem i go long Alma blong jajem hem folem ol fasin blong hem we i brekem loa.

11 Mo i bin hapen se, hem i bin stanap long fored blong Alma mo hem i toktok strong blong sevem laef blong hemwan.

12 Be Alma i bin talem long hem: Luk hemia fas taem we fasin blong giaman pris i bin stat long medel blong olgeta pipol. Mo luk, yu no rong nomo long fasin blong giaman pris be yu bin fosem samting ia wetem naef blong faet. Mo sapos oli fosem fasin blong giaman pris long medel blong olgeta pipol ia bae i smasem gud evri pipol.

13 Mo yu bin mekem blad blong wan stret man i ron, yes, wan man we i bin mekem plante gudfala samting long medel blong olgeta pipol ia. Mo sapos mifala i sevem laef blong yu bae blad blong hem i kam agensem mifala blong pembak wanem we i bin hapen long hem.

14 Taswe mifala i jajem yu blong mas ded folem loa we Mosaea i bin givim long mifala,

we i las king blong mifala; mo pipol ia i bin luksave loa ia. Taswe pipol ia i mas folem loa.

15 Mo i bin hapen se, oli bin tekem hem mo nem blong hem i Nehor mo oli tekem hem i go antap long hil Mantae. Mo long ples ia, oli mekem hem, o hem i bin talem, bitwin long medel blong heven mo wol, se wanem we hem i bin talemaot long olgeta pipol i go agensem toktok blong God; Mo long ples ia hem i bin harem nogud long wan ded blong sem.

16 Be, samting ia i no bin stop-em fasin blong giaman pris blong i go olbaot long olgeta ples long graon. From i gat plante we oli laekem olgeta emti samting blong wol mo oli go prijim ol giaman doktrin. Mo oli mekem samting ia from oli laekem olgeta rij samting mo respek blong man.

17 Be, oli fraet blong giaman, sapos ol pipol oli save, from oli fraet long loa from olgeta we oli stap giaman bae oli panisim olgeta. Taswe, oli stap mekem i olsem se oli stap prij folem bilif blong olgeta mo naoia loa i no save gat paoa long bilif blong eni man.

18 Mo oli no stap tingting blong stil from oli fraet long loa, from oli stap panisim ol man we oli mekem olsem; mo oli fraet blong stil o kilim i ded wan man from man we i kilim wan man i ded, oli panisim hem blong hem i ded.

19 Be i bin hapen se olgeta evriwan we i no blong jos blong God, oli stat blong givim

hadtaem long olgeta we oli blong jos blong God, mo we oli bin tekem long olgeta nem blong Kraes.

20 Yes, oli bin givim hadtaem long olgeta, mo mekem tumas trabol long olgeta wetem evri kaen toktok, mo hemia from fasin blong tingting blong olgeta i stap daon, from ol tingting blong olgeta i no hae tumas long ae blong olgeta. Mo from oli bin talemaot toktok blong God, wan wetem narawan, we i no gat mane mo we i no gat praes.

21 Naoia i gat wan loa we i strong tumas i stap long medel blong ol man blong jos se, bae i no save gat wan man blong jos, we hem i girap mo givim hadtaem long ol man we oli no blong jos, mo se bae i no save gat hadtaem long medel blong olgeta.

22 Be, i gat plante long olgeta we oli bin stat blong gat fasin blong gat hae tingting mo oli stat blong gat rao we oli strong tumas wetem ol enemi blong olgeta go kasem taem tu we oli sakem han. Yes, oli stap faet wetem wan wan long olgeta wetem han blong olgeta.

23 Naoia, samting ia i tekem ples long nambatu yia we Alma i stap rul mo samting ia, i mekem plante hadtaem long jos; Yes, samting ia i bin mekem plante hadtaem wetem jos.

24 From ol hat blong fulap man oli strong, mo oli tekemaot nem blong olgeta, mekem se oli nomo tingbaot olgeta long medel blong ol pipol blong God. Mo tu

i bin gat plante we oli bin kam-aot long medel blong olgeta.

25 Naoia samting ia i wan big-fala hadtaem long olgeta we oli stanap strong long fet; be, oli bin strong mo oli no muvmuv blong holem ol komanmen blong God, mo oli bin holem taet fasin blong save wet long taem, long ol hadtaem we i bin hip i go antap long olgeta.

26 Mo taem ol pris oli lego wok blong olgeta blong prijim toktok blong God long ol pipol, ol pipol tu oli lego wok blong olgeta blong harem toktok blong God. Mo taem pris i bin prijim toktok blong God long olgeta, olgeta evriwan oli bin gobak long ol wok blong olgeta; mo pris i no tekem se hem i moa hae long olgeta we oli bin kam lisin long hem from man we i priji no gud bitim man we i lisin. Mo tija i nomo gud bitim man we i stap lan; mo, olsem ia nao yumi luk se olgeta evriwan i semak, mo olgeta evriwan oli wok, evri man folem paoa blong hem.

27 Mo oli bin serem wanem olgeta i gat, evriwan i dipen long hamas hem i gat, long ol man we oli pua, olgeta we oli nidim samting mo olgeta we oli sik mo olgeta we oli gat hadtaem; Mo oli no werem ol klos we oli sas tumas, be oli stil klin mo oli luk gud tumas.

28 Mo olsem ia nao oli bin stanemap ol wok blong jos; mo olsem ia nao oli bin stat bakegen blong gat pis, i nomata long ol hadtaem blong olgeta.

29 Mo nao, from jos i stanap



strong, oli stat blong kam rij plante, oli gat evri mo eni kaen samting we oli nidim—oli gat plante grup blong anamol mo ol buluk, mo ol evri kaen anamol we oli fattat plante, mo plante sid tu, mo plante gol, mo plante silva, mo plante gud-gudfala samting, mo plante silik, mo kaliko we i tintin, mo evri kaen blong oli gud kaliko we i no gat flas.

30 Mo long fasin ia nao, long taem we oli kam antap gud, oli no sendem bak olgeta we oli neked, o olgeta we oli bin hanggri, o olgeta we oli bin tosta, o olgeta we oli bin sik, o olgeta we oli no bin fidim olgeta; mo oli no putum ol hat blong olgeta long ol rij samting; taswe oli bin glad blong givim samting long evriwan, ol yangfala mo ol olfala, olgeta long kalabus mo olgeta we oli fri, ol man mo ol woman, i nomata sapos oli blong jos o oli no blong jos. Oli mekem semak long eni kaen man, olsem long olgeta we oli gat nid.

31 Mo olsem ia nao oli bin kam antap gud mo oli kam rij plante, i bitim olgeta we oli no blong jos blong olgeta.

32 From olgeta ia we oli no blong jos blong olgeta, oli bin yusum fasin blong mekem posen fulap, mo long fasin ia blong wosip long ol aedol o long ol fasin blong stap les, mo long ol toktok we oli krangke, mo long ol fasin ia blong wantem samting blong narafala man mo long ol rao; oli werem ol klos we oli sas tumas; ting-

ting long ol ae blong olgeta i antap; oli givim hadtaem, oli giaman, oli stil, oli brok i go long haos, oli stap slip olbaot, mo oli kilim man i ded, mo ol fasin nogud blong evri kaen; be, oli yusum loa long olgeta evriwan we oli bin brekem loa, i semak olsem we i save hapen.

33 Mo i bin hapen se, tru long fasin ia blong yusum loa long olgeta, evri man i kasem trabol folem samting we hem i bin mekem. Oli bin kam moa kwaet mo oli fraet blong mekem fasin nogud sapos oli save long saed blong fasin nogud ia; taswe i bin gat plante pis long ol pipol blong Nifae kasem nambafaef yia blong rul blong ol jaj.

---

## JAPTA 2

---

*Amlisae i lukaotem wan wei blong i kam king mo voes blong ol pipol oli no wantem hem—Olgeta we oli folem hem oli mekem hem i kam king—Olgeta laen blong Amlisae oli mekem faet long ol man blong Nifae mo oli lus—Ol ami blong ol laen blong Lemana mo ol laen blong Amlisae oli joen tugeta mo oli lus—Alma i kilim Amlisae i ded. Raonabaot 87 yia bifo Kraes i bon.*

Mo i bin hapen se, long stat blong nambafaef yia we oli stap rul long hem, i bin stat blong gat rao long medel blong olgeta pipol; from wan man, we oli singaotem hem Amlisae, hem i wan man blong giaman, yes, wan waes man we i gat gudfala save long saed blong wol, hem i wan man we hem i

blong oda blong man we i kilim  
Gidion i ded wetem naef blong  
faet, we oli bin kilim hem i ded  
folem loa—

2 Nao Amlisae ia i bin pulum i  
gowe plante pipol folem hem  
tru long giaman blong hem;  
oli kam plante tumas mekem se  
oli bin stat blong kam strong;  
mo oli stat blong fos blong  
stanemap Amlisae i kam king  
blong olgeta pipol.

3 Nao samting ia i bin mekem  
ol man blong jos oli fraet, mo  
tu long olgeta evriwan we oli  
no bin folem ol tok tok we  
Amlisae i bin yusum blong  
traem karemaot olgeta; from  
oli bin save se folem loa blong  
olgeta, ol samting olsem, ol  
voes blong ol pipol nao oli mas  
stanemap olgeta.

4 Taswe, sapos i bin save  
hapen, se Amlisae i save kasem  
voes blong ol pipol, hem we i  
wan nogud man, bae hem i  
tekemaot ol raet blong olgeta  
mo ol raet blong jos; from i plan  
blong hem blong smasem gud  
jos blong God.

5 Mo i bin hapen se olgeta pi-  
pol oli bin kam tugeta long ol  
ples blong ful graon, evri man  
folem tingting blong hem, sam  
long olgeta oli bin sapotem  
Amlisae, ol narafala wan oli  
bin agensem Amlisae, long ol  
defren grup, i bin gat plante  
rao mo ol sapraes faet wan  
wetem narawan.

6 Mo olsem ia nao oli bin kam  
tugeta blong givim voes blong  
olgeta long saed blong samting  
ia; mo oli bin stanap long fored  
blong ol jaj.

7 Mo i bin hapen se voes blong  
ol pipol i bin go agensem  
Amlisae, mekem se oli no mekem  
hem i kam king ova long ol  
pipol.

8 Nao samting ia i mekem hat  
blong olgeta we oli agensem  
hem i glad; be Amlisae i mekem  
olgeta we oli sapotem hem  
blong oli kros long olgeta we  
oli no sapotem hem.

9 Mo i bin hapen se oli bin  
kam tugeta, mo oli bin konse-  
kretem Amlisae blong kam  
king blong olgeta.

10 Nao taem we oli bin  
mekem Amlisae i king blong  
olgeta, hem i talem long olgeta  
blong oli tekem ol tul blong  
faet mo go agensem ol brata  
blong olgeta; mo hem i mekem  
olsem blong hem i save kon-  
trolelem olgeta.

11 Nao oli bin save ol man  
blong Amlisae, from oli bin  
singaotem olgeta ol laen blong  
Amlisae; mo narafala smol haf  
oli bin singaotem olgeta ol laen  
blong Nifae, o ol pipol blong  
God.

12 Taswe ol pipol blong Nifae  
oli bin save plan blong ol man  
blong Amlisae, mo taswe oli bin  
mekem olgeta oli rere blong  
mitim olgeta; yes, oli bin blok-  
em olgeta bakegen wetem ol  
naef blong faet, mo wetem ol  
huknaef, mo wetem ol bonara,  
mo wetem ol ara, mo wetem ol  
ston, mo wetem ol sling, mo  
wetem evri kaen tul blong faet,  
blong evri kaen.

13 Mo olsem ia nao oli bin  
mekem olgeta oli rere blong  
mitim ol man blong Amlisae

blong taem we bae oli kam long hem. Mo oli bin jusum ol kapten, mo ol kapten we oli moa hae, mo ol jif kapten folem ol namba blong olgeta.

14 Mo i bin hapen se Amlisae i bin mekem ol man blong hem oli tekem evri kaen tul blong faet blong evri kaen; mo hem i bin jusum ol man blong rul mo ol lida blong rulum ol man blong hem, blong lidim olgeta i go blong faet agensem ol brata blong olgeta.

15 Mo i bin hapen se ol man blong Amlisae oli bin go antap long hil blong Amnaehu, we i bin stap long is blong reva Saedon, we i bin ron klosap long Sarahemla, mo long ples ia nao oli bin stat blong mekem faet wetem ol man blong Nifae.

16 Nao, Alma, from hem i jif jaj mo gavena blong ol pipol blong Nifae, taswe hem i bin go antap wetem ol pipol blong hem, yes, wetem ol kapten blong hem, mo ol jif kapten, yes, long fored blong ol ami blong hem, agensem ol man blong Amlisae blong faet.

17 Mo oli bin stat blong kilim ol man blong Amlisae i ded long hil long is blong Saedon. Mo ol man blong Amlisae i bin faet wetem ol man blong Nifae wetem bigfala paoa, inaf blong mekem se plante long ol man blong Nifae oli bin foldaon long fored blong ol man blong Amlisae.

18 Be Lod i bin mekem han blong ol man blong Nifae i kam strong, mekem se oli bin kilim ol man blong Amlisae i ded mo

smasem gud olgeta, mekem se oli stat blong ronwe long fored blong olgeta.

19 Mo i bin hapen se ol man blong Nifae oli bin folem ol man blong Amlisae long ful dei, mo oli bin kilim olgeta i ded, oli smasem gud olgeta, inaf blong mekem se long olgeta man blong Amlisae, twelef taosen faef handred teti mo tu sol oli bin ded; Mo long olgeta man blong Nifae, sikis taosen faef handred siksti mo tu sol oli bin ded.

20 Mo i bin hapen se taem we Alma i nomo bin save folem ol man blong Amlisae, hem i bin mekem ol man blong hem blong oli stanemap tenet blong olgeta long vale blong Gidion, vale ia we oli bin singaotem, Gidion, folem nem blong man ia we Nehor i bin kilim hem i ded wetem naef blong faet; mo long vale ia, ol man blong Nifae i bin stanemap ol tenet blong olgeta blong pasem naet long hem.

21 Mo Alma i bin sendem ol spae blong folem smol haf ia blong ol man blong Amlisae, blong hem i save ol plan blong olgeta mo ol waes plan blong olgeta, we tru long samting ia hem i save lukaotem gud hemwan agensem olgeta, blong hem i save sevem ol pipol blong hem blong oli no smasem olgeta.

22 Nao, olgeta ia we hem i bin sendemaot blong go wajem kamp blong ol man blong Amlisae, oli singaotem olgeta Seram, mo Amnor, mo Mantae, mo Limha; Olgeta ia oli olgeta

we oli bin go aot wetem ol man blong olgeta blong wajem kamp blong ol man blong Amlisae.

23 Mo i bin hapen se long nekis dei oli bin kambak long kamp blong ol man blong Nifae kwiktaem nomo, oli bin sapraes bigwan, mo wan bigfala fraet i bin kasem olgeta, oli talem:

24 Luk, mifala i bin folem kamp blong ol man blong Amlisae, mo long bigfala sapraes blong mifala, long graon blong Maenon, antap long graon blong Sarahemla, long kos we i go long graon blong Nifae, mifala i bin luk wan bigfala ami blong ol man blong Leman; mo luk, ol man blong Amlisae oli bin joenem olgeta;

25 Mo oli stap atakem ol brata blong yumi long graon ia; mo oli stap ronwe long fored blong olgeta wetem olgeta grup blong ol anamol blong olgeta, mo ol woman blong olgeta, mo ol pikinini blong olgeta, oli stap ronwe i kam long bigtaon blong yumi; mo hemia nomo sapos yumi no hariap bae oli tekem bigtaon blong yumi, mo bae ol papa blong yumi, mo ol woman blong yumi, mo ol pikinini blong yumi, bae oli kilim olgeta i ded.

26 Mo i bin hapen se ol pipol blong Nifae oli bin tekem ol tenet blong olgeta, mo oli bin aot long vale blong Gidion, oli gobak long bigtaon blong olgeta, we hem i bigtaon blong Sarahemla.

27 Mo luk, taem we oli bin stap krosem reva blong Saedon,

ol man blong Leman mo ol man blong Amlisae, we oli plante, olgeta i stap, klosap semak long ol sanbij blong solwota, oli bin kam long olgeta blong smasem gud olgeta.

28 Be, han blong Lod i bin mekem ol man blong Nifae oli kam strong, from oli bin prea strong tumas long hem blong bae hem i mekem olgeta oli fri long ol han blong ol enemi blong olgeta, taswe Lod i bin harem ol prea blong olgeta, mo i bin mekem olgeta oli kam strong, mo olgeta man blong Leman mo olgeta man blong Amlisae oli bin foldaon long fored blong olgeta.

29 Mo i bin hapen se Alma mo Amlisae tufala i bin faet wetem naef blong faet, fesem tufala; mo tufala i bin faet strong tumas, wan wetem narawan.

30 Mo i bin hapen se Alma, from hem i bin wan man blong God, from hem i bin gat plante fet, i bin prea, i talem: O Lod, gat sore long mi mo sevem laef blong mi, mekem se mi save kam wan tul long ol han blong yu, blong holem taet mo sevem ol pipol ia.

31 Nao taem we Alma i bin talem ol toktok ia, hem i bin faet bakegen wetem Amlisae; mo hem i bin kasem moa paoa, inaf blong mekem se hem i bin kilim Amlisae i ded wetem naef blong faet.

32 Mo tu hem i bin faet wetem king blong ol man blong Leman; be king blong ol man blong Leman i bin ronwe long Alma mo hem i bin sendem ol gad

blong hem blong faet wetem Alma.

33 Be Alma wetem ol gad blong hem, oli bin faet wetem ol gad blong king blong ol man blong Leman kasem taem we hem i bin smasem olgeta mo pusbak olgeta.

34 Mo olsem ia nao hem i bin klinim graon, o long ol narafala toktok so, we i bin stap long wes blong reva Saedon, hem i bin sakem ol bodi blong ol man blong Leman we oli bin ded i go long wota blong Saedon, blong mekem se ol man blong hem oli save gat rum blong go kros mo faet wetem ol man blong Leman mo ol man blong Amlisae long wes saed blong reva blong Saedon.

35 Mo i bin hapen se taem olgeta evriwan oli bin go krosem reva blong Saedon ol man blong Leman mo ol man blong Amlisae oli stat blong ronwe long fored blong olgeta, i nomata we oli bin plante tumas mekem se oli no save kaontem olgeta.

36 Mo oli bin ronwe long fored blong ol man blong Nifae i go long ples we i no gat man long hem we i stap long wes mo not, longwe long ol boda blong graon; mo ol man blong Nifae oli bin folem olgeta wetem strong tingting, mo oli bin smasem olgeta.

37 Yes, oli bin mitim olgeta long evri saed, mo smasem mo ronemaot olgeta, kasem taem we oli bin seraot i go long wes, mo long not, kasem taem we oli bin kasem ples we i no gat man

long hem, we oli bin singaotem Hemans; mo hem i bin pat blong ples we i no gat man long hem we i gat fulap wael anamol mo ol rabis wael anamol i stap long hem.

38 Mo i bin hapen se plante oli bin ded long ples we i no gat man long hem from ol kil we oli bin kasem, mo ol wael anamol wetem ol pijin blong skae i bin kakae olgeta; mo oli bin faenem ol bun blong olgeta mo oli bin hipimap olgeta long graon.

---

### JAPTA 3

---

*Ol man blong Amlisae oli bin putum mak long olgeta folem toktok ia we ol profet i bin talem we bae oli kam tru—Ol man blong Leman oli bin kasem panis from oli bin gat fasin blong go agens—Ol man oli mekem ol panis blong olgeta i kam long olgeta bakegen—Ol man blong Nifae i winim wan moa ami blong ol man blong Leman. Raonabaot 87–86 yia bifo Kraes i bon.*

Mo i bin hapen se ol man blong Nifae we oli no bin kilim olgeta oli ded wetem ol tul blong faet, afta we oli bin berem olgeta we oli bin ded—nao, oli no kaontem namba blong olgeta we oli ded, from namba blong olgeta i bigwan tumas—afta we oli bin finis blong berem ol ded man blong olgeta, olgeta evriwan i bin gobak long graon blong olgeta, mo long haos blong olgeta, mo long ol woman blong olgeta, mo long pikinini blong olgeta.

2 Nao i gat plante woman mo

pikinini we oli bin kilim olgeta oli ded wetem naef blong faet, mo tu plante long ol grup blong ol anamol mo ol buluk blong olgeta; mo tu oli bin smasem gud plante garen we oli bin planem ol sid long hem, from ol ami blong ol man oli bin purumbut long olgeta.

3 Mo nao ol man blong Lemana mo ol man blong Amlisae we oli bin smas long so blong reva blong Saedon, mo oli bin sakem olgeta i go long wota blong Saedon; mo luk, ol bun blong olgeta i stap daon long dip ples blong solwota, mo oli plante.

4 Mo ol man blong Amlisae oli defren long ol man blong Nifae, from ol man blong Amlisae oli bin putum red mak long fored blong hed blong olgeta olsem ol man blong Lemana; Be oli no bin sevem hed blong olgeta olsem ol man blong Lemana.

5 Nao ol man blong Lemana oli bin sevem hed blong olgeta; mo oli bin neked sapos oli no bin gat skin blong anamol we oli bin fasem raon long wes blong olgeta, mo tu ol klos blong faet we oli bin putum long olgeta, mo ol bonara blong olgeta, mo ol ara blong olgeta, mo ol ston blong olgeta, mo ol sling blong olgeta, mo samfala samting moa.

6 Mo ol skin blong ol man blong Lemana oli bin dak, folem mak we Lod i bin putum long ol olfala bubu blong olgeta, we i bin wan panis i bin kam long olgeta from oli bin brekem loa

mo from oli bin go agensem ol brata blong olgeta, we oli Nifae, Jakob, mo Josef, mo Sam, we oli stret mo tabu man.

7 Mo ol brata blong olgeta i bin stap lukaotem wan wei blong kilim olgeta i ded, taswe oli bin kasem panis; mo Lod God i bin putum wan mak long olgeta, yes, long Lemana mo Lemyul, mo tu ol boe blong Ismael, mo ol woman we oli blong laen blong Ismael.

8 Mo samting ia i bin hapen, blong mekem se ol laen blong olgeta i defren long ol laen blong ol brata blong olgeta, blong mekem se Lod God i save sevem ol pipol blong hem, blong bae oli no miks mo biliv long ol kastom we oli rong we i save smasem gud olgeta.

9 Mo i bin hapen se eni man we i bin miksim laen blong hem wetem laen blong ol man blong Lemana i bin mekem semfala panis ia i kam long ol laen blong hem.

10 Taswe, eni man we i bin letem ol man blong Lemana i lidim hem i go nogud, oli bin singaotem hem anda long nem ia, mo i gat wan mak we Lod God i bin putum long hem.

11 Mo i bin hapen se eni man we oli no bin save biliv long ol kastom blong ol man blong Lemana, be i bin biliv long ol histri we oli bin karem aot long graon blong Jerusalem, mo tu long kastom blong ol bubu blong olgeta, we oli stret, we oli bin biliv long ol komanmen blong God mo bin folem olgeta, oli bin singaotem olgeta ol man

blong Nifae, o ol pipol blong Nifae, stat long taem ia i go—

12 Mo olgeta ia nao i bin kipim ol rekod, we oli tru, blong ol man blong Nifae, mo blong ol man blong Leman tu.

13 Nao bae yumi gobak bakegen long ol man blong Amlisae, from oli bin gat wan mak we oli putum long olgeta; yes, oli bin putum mak long olgeta bakegen, yes, wan red mak long fored blong hed blong olgeta.

14 Olsem ia nao ol toktok blong God i bin kam tru, from olgeta ia nao oli ol toktok we hem i bin talem long Nifae: Luk, mi mi bin panisim ol man blong Leman, mo bae mi putum wan mak long olgeta, blong mekem se olgeta mo ol pikinini blong olgeta bae oli defren long yu mo long ol pikinini blong yu, stat long taem ia i go kasem blong oltaem, hemia nomo sapos oli no sakem ol fasin nogud blong olgeta mo tanem olgeta i kam long mi blong mekem se mi save gat sore long olgeta.

15 Mo bakegen: Bae mi putum wan mak long hem we i miksim pikinini blong hem wetem ol brata blong yu, mekem se bae mi panisim olgeta tu.

16 Mo bakegen: Bae mi putum wan mak long hem we i stap faet agensem yu mo laen blong yu.

17 Mo bakegen, mi talem se man we i aot long yu bae oli nomo singaotem hem olsem laen blong yu; Mo bae mi blessem yu, mo eni man we bae oli singaotem olgeta olsem laen

blong yu, stat long taem ia i go kasem long oltaem; mo ol samting ia oli ol promes blong Lod i go long Nifae mo long laen blong hem.

18 Nao ol man blong Amlisae oli no bin save se oli stap mekem ol toktok blong God i kam tru, taem we oli bin stat blong putum ol mak long fored blong hed blong olgeta; be, oli bin kamaot fulwan agensem God; taswe, hem i bin stret nomo blong panis i foldaon long olgeta.

19 Nao mi wantem se bae yufala i mas luk we olgeta nomo oli bin mekem panis i kam long olgeta; mo tu evri man we i kasem panis, i putum panis i kam long hem wan.

20 Nao i bin hapen se, fulap dei oli no pas yet afta long faet we i bin hapen long graon blong Sarahemla, tru long ol man blong Leman mo ol man blong Amlisae, i bin gat wan narafala ami blong ol man blong Leman we i bin kam long ol pipol blong Nifae, long sem ples we fas ami i bin mitim ol man blong Amlisae.

21 Mo i bin hapen se ol man blong Nifae i bin sendem wan ami blong ronemaot olgeta long graon blong olgeta.

22 Nao from we Alma hemwan i bin kasem kil, hem i no bin go long faet long taem ia agensem ol man blong Leman;

23 Be hem i bin sendem wan bigfala ami agensem olgeta; mo oli bin go mo kilim ded plante long olgeta man blong Leman, mo oli bin ronemaot smol haf

blong olgeta i kamaot long ol boda blong graon blong olgeta.

24 Mo afta oli bin gobak bakegen mo i bin stat blong stanemap pis long graon; oli nomo bin kasem trabol blong wan taem, wetem ol enemi blong olgeta.

25 Nao oli bin mekem ol samting ia, yes, evri faet ia mo evri rao ia, i bin stat mo en long nambafaef yia blong rul blong ol jaj.

26 Mo long wan yia plante taosen mo ol ten blong taosen sol oli bin go long wol ia we i no save finis, blong oli save kasem jajmen, folem ol wok blong olgeta, sapos oli gud, o sapos oli nogud, blong kasem glad ia we i no save finis o blong stap harem nogud ia we i no save finis, folem spirit we oli bin jusum blong obei, sapos hem i wan gudfala spirit o wan nogud wan.

27 From evri man i kasem pei long man we hem i jusum blong obei, mo samting ia folem ol toktok blong spirit blong profes; taswe, bae i folem trutok. Mo olsem ia nao nambafaef yia blong rul blong ol jaj i bin en.

---

#### JAPTA 4

---

*Alma i baptaesem plante taosen man we oli jenisim laef—Rabis fasin i go insaed long Jos mo gru blong Jos i no save gohed—Nifaeha i kam jif jaj—Alma, olsem hae pris, i givim taem blong hem long wok blong God. Raonabaot 86–83 yia bifo Kraes i bon.*

NAO i bin hapen se, long nambasikis yia blong rul blong ol jaj long ol pipol blong Nifae, i no bin gat ol rao o ol faet long graon blong Sarahemla.

2 Be tingting blong ol pipol i bin trabol tumas, yes, oli bin trabol plante from oli bin lusum ol brata blong olgeta, mo from oli bin lusum ol grup blong anamol blong olgeta mo ol buluk tu, mo tu from oli bin lusum ol garen blong olgeta we oli planem ol sid long hem, o we ol man blong Lemana i bin purumbut antap long olgeta mo smasem gud olgeta gud.

3 Mo ol hadtaem blong olgeta i bin bigwan tumas, mekem se evri sol i bin gat wan samting we oli save krae long hem; mo oli bin biliv se hem i ol jajmen blong God we hem i bin sendem i kam long olgeta from ol fasin nogud blong olgeta mo ol rabis sin blong olgeta; taswe oli bin wekap blong tingbaot ol wok blong olgeta.

4 Mo oli bin stat blong stanemap jos i kam moa fulwan; yes, mo plante oli bin baptaes long wota blong Saedon mo oli joenem jos blong God; yes, Alma i bin baptaesem olgeta wetem han blong hem, sem man ia we papa blong hem, Alma, i bin konsekretem hem i kam hae pris blong ol man blong jos, wetem han blong hem.

5 Mo i bin hapen se long nambaseven yia blong rul blong ol jaj, i bin gat raonabaot tri taosen faef hundred sol we oli kam joen tugeta long jos



blong God mo oli bin baptaes. Mo olsem ia nao nambaseven yia we ol jaj oli stap rulum ava long ol pipol blong Nifae i bin en; mo i bin gohed blong gat pis long ol taem ia.

6 Mo i bin hapen se long nambaait yia blong rul blong ol jaj, we ol pipol blong jos oli bin stat blong kam praod, from oli bin gat plante rij samting, mo plante flas silik, mo ol gudfala kaliko we i tintin, mo from plante grup blong ol anamol blong olgeta mo ol buluk, mo gol blong olgeta mo silva blong olgeta, mo evri kaen gudgudfala samting, we oli bin kasem tru long had wok blong olgeta; mo tingting blong ae blong olgeta i kam antap long evri samting ia, from oli bin stat blong werem ol klos we oli sas tumas.

7 Nao samting ia i bin samting we i bin givim hadtaem long Alma, yes, mo long plante pipol we Alma i bin konsekretem olgeta blong kam ol tija, mo ol pris, mo ol elda ova long jos; yes, plante long olgeta oli bin harem nogud tumas long ol fasin nogud we oli bin luk we i bin stat blong kam antap long medel blong ol pipol blong olgeta.

8 From oli bin luk mo oli luk save wetem wan bigfala sore we ol man blong jos oli bin stat blong kam antap long tingting blong ae blong olgeta, mo blong putum hat blong olgeta long ol rij samting mo long ol samting blong wol we i blong nating, mo oli bin stat blong gat ting-

ting ia se ol man oli no hae long olgeta, oli stap mekem olsem long wan wan long olgeta, mo oli bin stat blong givim hadtaem long olgeta we oli no biliv long saed blong wantem mo ol glad blong olgeta.

9 Mo olsem ia nao, long nambaait yia blong rul blong ol jaj, i bin stat blong gat ol bigfala rao long ol pipol blong jos; yes, i bin gat tingting ia blong wantem ol samting blong narafala man, mo rao, mo tingting ia blong mekem nogud long wan man, mo fasin ia blong givim hadtaem, mo praod, i go bitim hae tingting blong olgeta ia we oli no blong jos blong God.

10 Mo olsem ia nao nambaait yia blong rul blong ol jaj i bin en; mo ol fasin nogud blong jos i olsem wan ston we i blokem rod blong olgeta we oli no blong jos; mo olsem ia nao jos i bin stat blong stop blong muv i go long fored.

11 Mo i bin hapen se long stat blong nambanaen yia, Alma i bin luk fasin nogud blong jos, mo hem i bin luk tu we eksampol blong jos i bin stat blong lidim olgeta ia we oli no bin biliv i go long wan pis blong rabis fasin i go long narawan, olsem ia nao samting ia i bin mekem ol pipol oli ded.

12 Yes, hem i bin luk se fasin ia blong no stap semak i bigwan tumas long medel blong ol pipol, sam oli bin leftemap olgeta i go antap wetem hae tingting blong olgeta, oli lukluk daon long ol narafala wan, oli tanem baksaed blong olgeta

long ol puaman, mo olgeta we oli bin nedek, mo olgeta we oli bin hanggri, mo olgeta we oli bin tosta, mo olgeta we oli bin sik mo oli bin gat hadtaem.

13 Nao bigfala samting ia nao i bin mekem ol sore long medel blong ol pipol, taem we ol narafala wan oli bin mekem tingting blong olgeta oli stap daon, oli bin helpem olgeta we oli bin nidim help blong olgeta, olsem givim sam samting blong olgeta long ol man we oli pua mo olgeta we oli gat nid, mo fidim olgeta we oli hanggri, mo olgeta we oli harem nogud long evri kaen hadtaem, from nem blong Kraes, we bae i kam folem spirit blong profesi.

14 Lukluk i go fored long dei ia, olsem ia nao oli bin holem taet fasin blong kam klin aot long ol sin blong olgeta; oli fulap wetem bigfala glad from laef bakegen blong ol ded, folem wantem mo paoa mo long taem we Jisas Kraes i mekem ol man oli fri long ol rop blong ded.

15 Mo nao i bin hapen se Alma, from i bin luk ol hadtaem blong olgeta we tingting blong olgeta i stap daon we oli stap folem God, mo ol hadtaem mo we ol smol haf blong ol man blong hem oli kavremap olgeta wetem, mo i bin luk se oli no stap semak, i bin stat blong gat bigfala sore; be, Spirit blong Lod i no bin livim hem.

16 Mo hem i bin jusum wan waes man long medel blong olgeta elda blong jos, mo i bin givim paoa long hem folem

voes blong ol pipol, mekem se hem i save gat paoa blong pasem ol loa folem ol loa we oli bin givimaot finis, mo blong yusum olgeta folem fasin nogud mo ol loa we ol pipol i brekem.

17 Nao nem blong man ia hemi Nifaeha, mo oli bin jusum hem blong kam jif jaj; mo hem i bin sidaon long jea blong jajmen blong jajem mo lidim ol pipol.

18 Nao Alma i no bin givim long hem wok blong hae pris blong jos, be hem i bin holem taet wok blong hae pris long hem wan; be hem i givim jea blong jajmen long Nifaeha.

19 Mo hem i bin mekem samting ia blong mekem se hemwan i save go aot long ol pipol blong hem, o long medel blong ol pipol blong Nifae, blong mekem se hem i save prijim toktok blong God long olgeta, blong stretem olgeta blong tingbaot wok blong olgeta, mo blong hem i save putum daon, wetem toktok blong God, evri hae tingting mo fasin blong giaman mo evri rao we i bin stap long medel blong ol pipol blong hem, from hem i bin luk se i no gat wei, we hem i save tekembak olgeta sapos hem i no talemaot strong wetem klin testemoni agensem olgeta.

20 Mo olsem ia nao long stat blong nambanaen yia blong rul blong ol jaj ova long ol pipol blong Nifae, Alma i bin givim jea blong jajmen long Nifaeha, mo hem i bin putum evri taem blong hemwan long hae prishud blong tabu oda blong God, long testemoni blong trutok,

folem spirit blong revelesen mo profesi.

Ol toktok we Alma, Hae Pris folem tabu oda blong God, i bin talemaot long ol pipol long ol bigtaon blong olgeta mo ol vilej truaot long graon.

*I stap long japta 5 nomo.*

### JAPTA 5

*Blong kasem fasin blong sevem man, ol man i mas sakem sin mo holem ol komanmen, oli mas bon bakegen, oli mas klinim ol klos blong olgeta tru long blad blong Kraes, oli mas putum tingting blong olgeta i stap daon mo oli mas stopem fasin ia blong gat hae tingting mo wantem samting blong narafala man, mo mekem ol wok blong stret fasin—Gudfala Man blong lukaotem ol sipsip i singaotem ol pipol blong hem—Olgeta we oli mekem ol wok we oli nogud oli ol pikinini blong devel—Alma i talem testimoni blong hem se doktrin blong hem i tru mo i talem long ol man blong sakem sin—Ol nem blong olgeta we i stret bae oli raetem daon olgeta long buk blong laef. Raonabaot 83 yia bifo Kraes i bon.*

NAO i bin hapen se, Alma i bin stat blong talemaot toktok blong God long ol pipol, stat long graon blong Sarahemla, mo afta, truaot long evri ples long graon.

2 Mo hemia ol toktok we hem i bin talem long ol man long jos we oli bin stanemap long

bigtaon blong Sarahemla, folem histri blong hem bakegen, i talem:

3 Mi, Alma, mi bin kasem konsekresen tru long papa blong mi, Alma, blong kam wan hae pris blong jos blong God, hem i bin gat paoa mo raet long God blong mekem ol samting ia, luk, mi talem long yufala se hem i bin stat blong stanemap wan jos long graon we i bin stap long ol boda blong Nifae; yes, graon we oli bin singaotem graon blong Momon; yes, mo hem i bin baptaesem ol brata blong hem long wota blong Momon.

4 Mo luk, mi talem long yufala, oli bin go fri mo kamaot tru long ol han blong ol man blong king Noa, tru long sore mo paoa blong God.

5 Mo luk, afta, oli bin kam slef long ol han blong ol laen blong Lemana long ples we i no gat man long hem; yes, mi talem long yufala, oli stap olsem we oli stap long kalabus, mo bakegen, Lod i bin mekem oli kamaot long slef tru long paoa blong toktok blong hem; mo hem i bin tekem yumi i kam long graon ia mo yumi stat blong stanemap jos blong God long ples ia, long evri ples blong graon ia tu.

6 Mo nao luk, mi talem long yufala, ol brata blong mi, yufala blong jos ia, yufala i bin holem taet naf long tingting blong yufala, se ol bubu blong yufala oli stap long kalabus? Yes, mo yufala i bin holem taet naf long tingting blong yufala, sore mo

save wet longtaem blong God long olgeta? Mo antap long samting ia, yufala i bin holem taet inaf long tingting blong yufala, se hem i bin sevem ol sol blong olgeta long hel?

7 Luk, hem i bin jenisim hat blong olgeta; yes, hem i bin wekemap olgeta long wan dip slip, mo oli bin wekap long God. Luk, oli bin stap long medel blong ol klaod blong tudak; be, laet blong toktok ia we i no save en, i bin laetem ol sol blong olgeta; yes, ol rop blong ded, mo ol jen blong hel, i bin raonem olgeta, mo wan ded we i no save en i bin stap wet long olgeta.

8 Mo nao mi askem yufala, ol brata blong mi, yufala i ting se olgeta oli bin lus olgeta? Luk, mi talem long yufala, No, oli no bin lus.

9 Mo bakegen mi askem, yufala i ting se ol rop blong ded oli brok, mo se ol jen blong hel we i bin raonem olgeta, oli bin kamaot? Mi talem long yufala, Yes, oli bin kamaot, mo ol sol blong olgeta i bin gru bigwan, mo oli bin singim singsing blong lav blong pemaot man. Mo mi talem long yufala se oli sev.

10 Mo nao mi askem yufala se long wanem stamba tingting nao oli sev? Yes, long wanem stamba tingting nao we oli bin gat hop blong kasem fasin blong sevem man? Wanem nao i bin mekem olgeta i kamaot long ol rop blong ded, yes, mo tu long ol jen blong hel?

11 Luk, mi save talem long yufala — papa blong mi Alma i

no bin biliv long ol toktok we oli bin kamaot long maot blong Abinadae? Mo yufala i ting se hem i no wan tabu profet? Yufala i ting se hem i no talem-aot ol toktok blong God, mo papa blong mi Alma i bilivim olgeta?

12 Mo folem fet blong hem, wan bigfala jenis i bin hapen long hat blong hem. Luk mi talem long yufala se evri samting ia i tru.

13 Mo luk, hem i bin prijim ol toktok long ol bubu blong yufala, mo tu wan bigfala jenis i bin hapen long ol hat blong olgeta. Mo oli bin putum tingting blong olgeta daon mo oli bin putum tras blong olgeta long tru God we i stap laef. Mo luk, oli bin holem taet fet kasem en; Taswe oli bin sev.

14 Mo nao luk, mi askem yufala, ol brata blong mi blong jos, yufala i bin bon long spirit blong God? Yufala i bin kasem pikja blong hem long fes blong yufala? Yufala i ting se yufala i bin kasem bigfala jenis ia long ol hat blong yufala?

15 Yufala i yusum fet long fasin blong pemaot man, blong hem we i bin mekem yufala? Yufala i lukluk i go long fored wetem wan ae blong fet, mo luk bodi we i save ded i girap long wan bodi we i nomo save ded, mo roten ia i girap long wan bodi we i nomo save roten, blong stanap long fored blong God blong hem i jajem yufala folem ol wok we yufala i bin mekem long bodi blong wol ia?

16 Mi talem long yufala, traem

tingbaot se yufala i harem voes blong Lod, we i talem long yufala, long dei ia: Kam long mi yufala we mi blesem yufala, from luk, ol wok blong yufala oli ol wok blong stret fasin long fes blong wol?

17 O traem tingbaot se yufala i save giaman long Lod long dei ia, mo talem—Lod, ol wok blong mifala i bin ol stret wok long fes blong wol—mo talem se, bae hem i sevem yufala?

18 O sapos no, traem tingbaot taem bae God i karem yufala i kam long kot blong hem wetem ol sol blong yufala we oli fulap wetem rong mo sore, filim wan tingting blong evri rong blong yufala, yes, wan ful tingting bak long evri rong blong yufala, yes, wan ful tingting bak we yufala i bin tanem baksaed blong yufala long ol komanmen blong God?

19 Mi talem long yufala, yufala i ting se yufala i save luk God long dei ia wetem wan klin hat mo ol klin han? Mi talem long yufala se, yufala i ting se yufala i save leftemap ae blong yufala wetem pikja blong God we i stap long fes blong yufala?

20 Mi talem long yufala, yufala i ting se oli save sevem yufala taem yufala i bin givim yufala long devel blong kam ol man blong hem?

21 Mi talem long yufala, bae yufala i save long dei ia se yufala i no save sev; from i no save gat wan man we i save sev hemia nomo sapos hem i wasem klos ia i kam waet. Yes, ol klos blong hem i mas klin kasem

taem we evri mak i kamaot, tru long blad blong man ia we ol bubu blong yumi oli bin tokbaot, we bae hem i kam blong pemaot ol pipol blong hem aot long ol sin blong olgeta.

22 Mo nao mi askem long yufala, ol brata blong mi, bae yufala i filim olsem wanem, sapos yufala i stanap long fored blong kot blong God, wetem ol blad mo evri kaen mak i stap long ol klos blong yufala? Luk, ol samting ia bae oli go agensem yufala long wanem?

23 Luk, bae oli no talemaot se yufala i ol man blong kilim man i ded, yes, mo tu se oli faenem rong blong yufala long evri kaen fasin nogud?

24 Luk, ol brata blong mi, yufala i ting se wan man olsem i save gat wan ples blong sidaon long hem long kingdom blong God, wetem Ebrahim, wetem Aesak, mo wetem Jakob, mo tu evri tabu profet, we ol klos blong olgeta oli klin, mo oli no gat mak, oli klin gud tumas mo oli waet?

25 Mi talem long yufala, No; hemia nomo sapos yufala i mekem Krieta blong yumi i wan man blong giaman long stat, o sapos hem i wan man blong giaman long stat, yufala i no save traem tingbaot se man olsem i save gat wan ples long kingdom blong heven; be bae oli sakemaot olgeta from oli ol pikinini blong kingdom blong devel.

26 Mo nao luk, mi talem long yufala, ol brata blong mi, sapos

yufala i bin gat wan jenis we i hapen long hat, mo sapos yufala i bin wantem blong singim singsing blong lav blong pemaot man, bae mi askem, yufala i save filim samting ia naoia?

27 Yufala i bin wokbaot long wol ia, laef blong yufala i no gat rong long fored blong God? Yu save talem, sapos God i singaotem yufala naoia blong ded, insaed long yufala bakegen, se tingting blong yufala i bin stap daon inaf? Ol klos blong yufala oli klin, mo oli kam waet tru long blad blong Kraes ia, we bae hem i kam blong pemaot ol pipol blong hem, aot long ol sin blong olgeta?

28 Luk, yufala i bin karemaot fasin blong gat hae tingting long yufala? Mi talem long yufala, sapos yufala i no bin mekem samting ia yet, yufala i no rere blong mitim God. Luk yufala i rere kwik; from kingdom blong heven i kam klosap, mo ol man olsem ia bae oli no gat laef we i no save finis.

29 Luk, mi talem, i gat wan long medel blong yufala we i no bin karemaot fasin ia blong wantem samting blong nara-fala man long hem? Mi talem long yufala se man olsem ia i no rere; mo mi wantem blong hem i mas rere kwik, from aoa i kam klosap, mo hem i no save wanem taem bae samting ia i hapen; from man olsem ia bae oli no save faenemaot se hem i no gat rong.

30 Mo bakegen mi talem long yufala, i gat wan long yufala we i stap jikim brata blong hem, o

we i hipimap ol hadtaem antap long hem?

31 Sore tumas long wan man olsem, from hem i no rere, mo taem i klosap we hem i mas sakem sin o hem i no save sev!

32 Yes, sore tumas long yufala evriwan we i stap mekem rabis fasin; sakem sin, sakem sin, from Lod God i bin talemaot samting ia!

33 Luk, hem i sendemaot wan toktok long evri man blong kam, from ol han blong sore i stretem i go long olgeta, mo hem i talem: Sakem sin, mo bae mi tekem yufala.

34 Yes, hem i talem: Kam long mi mo bae yufala i save kakae frut blong tri blong laef; Yes, bae yufala kakae mo dring bred mo ol wota blong laef fri nomo;

35 Yes, kam long mi mo karem i kam ol wok blong stret fasin, mo bae oli no save katem daon yufala mo sakem yufala i go long faea—

36 From luk, taem i kam klosap we eni man we i no karem i kam gudfala frut, o eni man we i no mekem ol wok blong stret fasin, ol sem man ia, bae oli krae mo tingting hevi from stamba tingting ia.

37 O yufala ol man blong mekem ol rabis fasin, yufala we i fulap long ol samting blong wol we oli blong nating, yufala we i talemaot se yufala i bin save ol rod blong stret fasin be stil yufala i go long rabis rod, olsem wan sipsip we i no gat man we i stap lukaotem hem, i no mata we wan man blong lukaotem sipsip i bin singaot-

em yufala mo i stil singaotem yufala, be yufala i no lisiin long voes blong hem!

38 Luk, mi talem long yufala se, gudfala man blong lukaotem ol sipsip i singaotem yufala; Yes, mo hem i singaotem yufala long nem blong hem bakegen, we i nem blong Kraes; Mo sapos yufala i no lisiin long voes blong gudfala man blong lukaotem ol sipsip, long nem we hem i stap singaotem yufala wetem, luk yufala i no sipsip blong gudfala man blong lukaotem sipsip.

39 Mo nao sapos yufala i no sipsip blong gudfala man blong lukaotem ol sipsip, yufala i blong wanem yad? Luk, mi talem long yufala se, devel i man blong lukaotem sipsip blong yufala, mo yufala i yad blong hem; mo nao huia i save tanem baksaed long samting ia? Luk, mi talem long yufala, eni man we i tanem baksaed blong olgeta long samting ia, hem i wan giaman man mo hem i wan pikinini blong devel.

40 From mi talem long yufala se, eni samting we i gud i kam long God, mo eni samting we i nogud i kam long devel.

41 Taswe, sapos wan man i karem i kam ol gudfala wok hem i lisiin long voes blong gudfala man blong lukaotem ol sipsip, mo hem i stap folem hem; Be eni man we i karem i kam ol nogud wok, semfala man ia i kam wan pikinini blong devel, from hem i lisiin long voes blong hem, mo i stap folem hem.

42 Mo eni man we i mekem samting ia i mas kasem pei

blong hem long hem; Taswe, pei blong hem we bae hem i kasem, hem i ded long saed blong ol samting blong stret fasin, from hem i ded long evri gudfala wok.

43 Mo nao, ol brata blong mi, mi wantem yufala blong lisiin long mi, from mi toktok wetem paoa blong sol blong mi; From luk, mi bin toktok long yufala long wan klia fasin blong mekem se yufala i no save mestem, o mi bin toktok folem ol komanmen blong God.

44 From oli singaotem mi blong toktok long fasin ia nao, folem tabu oda blong God, we i stap long Kraes Jisas; Yes, oli talem long mi blong stanap mo talem testimoni long pipol ia long ol samting we ol bubu blong yumi oli bin talemaot long saed blong ol samting we bae oli kam.

45 Mo i no hemia nomo. Yufala i no ting se mi save ol samting ia mi wan bakegen? Luk, mi talem long yufala se mi save se ol samting we mi bin talemaot long yufala oli tru. Mo olsem wanem nao yufala i ting se mi save se oli tru?

46 Luk, mi talem long yufala se, Tabu Spirit blong God i bin mekem mi save ol samting ia. Luk, mi bin livim kakae mo prea plante dei blong mi save ol samting ia mi wan. Mo nao mi save long mi wan se oli tru; from Lod God i bin soemaot olgeta long mi tru long Tabu Spirit blong hem; Mo hemia spirit blong revelesen we i stap long mi.

47 Mo antap long samting ia, mi talem long yufala se oli bin talem long mi se, ol toktok we ol bubu blong yumi oli bin talemaot oli tru, long sem fasin tu folem spirit blong profesi we i stap long mi, we tu i kam tru long fasin blong soemaot blong Spirit blong God.

48 Mi talem long yufala, se mi save long miwan se eni samting we bae mi talem long yufala, long saed blong samting we bae i kam, i tru; Mo mi talem long yufala, se mi save se Jisas Kraes bae i kam, yes, Pikinini, Wan Pikinini Nomo blong Papa, we i gat fulap gladhat, mo sore, mo trutok. Mo luk, hem nao we bae i kam blong tekemaot ol sin blong wol, yes, ol sin blong evri man we oli biliv semak evri taem long nem blong hem.

49 Mo nao mi talem long yufala se, hemia oda we oli singaotem mi long hem, yes, blong prij long ol brata blong mi we mi lavem tumas, yes, mo evriwan we oli stap long graon; Yes, blong prij long evriwan, ol olfala tugeta wetem ol yangfala, long olgeta we oli stap long kalabus tugeta wetem olgeta we oli fri; Yes, mi talem long yufala, ol olfala, mo olgeta medel man, mo olgeta we oli stap gru yet i kam antap; yes, blong talemaot strong long olgeta se oli mas sakem sin mo oli mas bon bakegen.

50 Yes, Spirit i talem se: Sakem sin, yufala evriwan long evri en blong wol, from kingdom blong heven i stap kam klosap; Yes, bae Pikinini blong God i kam

long glori blong hem mo long strong blong hem, long fasin we i hae tumas, long paoa mo long kontrol. Yes, ol brata blong mi we mi lavem tumas, mi talem long yufala se, Spirit i talem: Luk, glori blong King blong ful wol ia, mo tu King blong heven bae i no long taem; hem i saen tu long medel blong evri piki-nini blong ol man.

51 Mo tu Spirit i talem long mi se, yes, talem long mi wetem wan strong voes, i se: Go fored mo talem long pipol ia—Sakem sin, from hemia nomo sapos yufala i no sakem sin, yufala i no save go stap long kingdom blong heven.

52 Mo bakegen mi talem long yufala, Spirit i talem: Luk, oli putum akis long rus blong tri; taswe evri tri we i no karem gudfala frut bae oli katem daon mo sakem i go long faea, yes, wan faea we i no save stop, yes wan faea we oli no save kilim i ded. Luk, mo tingbaot, Tabu Wan i bin talem samting ia.

53 Mo nao olgeta brata blong mi we mi lavem tumas, mi talem long yufala, yufala i ting se yufala i save go agensem ol samting ia; Yes, yufala i save putum ol samting ia long saed, mo purumbut long Tabu Wan andanit long leg blong yufala; yes, yufala i save fulap long hae tingting long hat blong yufala; yes, bae yufala i gohed blong werem ol klos we oli sas plante mo putum hat blong yufala long ol samting blong wol we oli blong nating, antap long ol rij samting blong yufala?



54 Yes, bae yufala i gohed blong stap soem se yufala i moa gud bitim ol narafala wan, yes, bae yufala i gohed long ol fasin ia blong givim hadtaem long ol brata blong yufala, olgeta ia we tingting blong olgeta i stap daon mo oli wokbaot folem tabu oda blong God, we tru long hem nao, oli kam joenem jos ia, mo oli bin kam klin tru long Tabu Spirit, mo oli mekem ol wok we oli blong fasin blong sakem sin —

55 Yes, mo bae yufala i gohed blong tanem baksaed blong yufala long ol pua, mo olgeta we oli nidim help, mo no serem ol samting blong yufala wetem olgeta?

56 Mo las toktok, yufala evriwan we i gohed long ol fasin nogud, mi talem long yufala se olgeta ia oli olgeta we bae oli katem daon olgeta mo sakem olgeta i go long faea hemia nomo sapos oli no sakem sin kwiktaem.

57 Mo nao mi talem long yufala, yufala evriwan we i wantem blong folem voes blong gudfala man blong lukaotem ol sipsip, yufala i kamaot long ol nogud man, mo yufala i stap defren, mo no tajem ol samting blong olgeta we i no klin; Mo luk, bae oli tekemaot nem blong olgeta nogud man, blong mekem se oli no kaontem olgeta wetem nem blong olgeta we i stret, blong mekem se toktok blong God i save hapen, we i talem: Ol nem blong ol nogud man bae oli no miks wetem ol nem blong ol man blong mi;

58 From ol nem blong olgeta we i stret bae oli raetem daon long buk blong laef, mo bae mi givim long olgeta wan ples we i kam long ol papa long raet han blong mi. Mo nao, ol brata blong mi, yufala i gat wanem blong talem agensem samting ia? Mi talem long yufala, sapos yufala i toktok agensem samting ia, i oraet nomo, from toktok blong God i mas hapen.

59 Huia long yufala we i man blong lukaotem sipsip we i gat plante sipsip be i no lukaotem olgeta, blong ol wael dog oli no save go insaed mo kakae ol anamol blong hem? Mo luk, sapos wan wael dog i go insaed long ol grup blong anamol blong hem, bae hem i no ronemaot hem? Yes, mo long en, sapos hem i save, bae hem i kilim hem i ded.

60 Mo nao, mi talem long yufala se gudfala man blong lukaotem ol sipsip i stap singaotem yufala; mo sapos yufala i lisin long voes blong hem bae hem i tekem yufala i go long yad blong hem, mo yufala i sipsip blong hem; mo hem i talem long yufala blong no letem wan rabis wael dog i kam insaed, blong yufala i no save ded.

61 Mo nao mi, Alma, mi givim oda long yufala long lanwis blong hem we i bin talem long mi, blong yufala i folem olgeta toktok we mi bin talemaot long yufala.

62 Mi toktok folem wei blong oda long yufala, we i blong jos; Mo long olgeta we oli no blong jos, mi toktok folem wei

blong askem, se: Kam mo kasem baptaes blong sakem sin, blong mekem se yufala tu i save kam mo kakae frut blong tri blong laef.

---

### JAPTA 6

---

*Oli klinim Jos long Sarahemla mo oli putum long oda—Alma i go long Gidion blong prij. Raonabaot 83 yia bifo Kraes i bon.*

Mo nao i bin hapen se afta taem we Alma i bin finisim toktok blong hem long ol man blong jos, we i bin stanap long bigtaon blong Sarahemla, hem i bin odenem ol pris mo ol elda, hemi bin putum han blong hem long hed blong olgeta folem oda blong God, blong lidim mo lukaotem jos.

2 Mo i bin hapen se, olgeta evriwan we i no blong jos be oli bin sakem ol sin blong olgeta, oli bin kasem baptaes blong sakem sin, mo oli bin akseptem olgeta i kam insaed long jos.

3 Mo i bin hapen se, olgeta evriwan we oli blong jos we oli no sakem ol fasin nogud blong olgeta mo putum tingting blong olgeta i stapdaon long fored blong God—Mi minim olgeta we oli gat hae tingting tumas long hat blong olgeta—ol semfala man ia oli sakemaot olgeta, mo nem blong olgeta oli bin tekemaot, mekem se oli no kaotem nem blong olgeta wetem nem blong olgeta we i stret.

4 Mo olsem ia nao oli stat blong

stanemap oda blong jos long bigtaon blong Sarahemla.

5 Nao mi wantem blong yufala i mas andastanem se evri man i save kasem toktok blong God, se oli no blokem eni man blong oli save kam tugeta blong harem toktok blong God.

6 Be God i bin givim komanen long ol pikinini blong hem, se oli mas kam tugeta plante taem, mo joen tugeta blong livim kakae mo prea strong long saed blong gudfala laef blong ol sol blong olgeta ia we oli no bin save God.

7 Mo nao i bin hapen se, taem Alma i bin mekem ol rul ia hem i bin aot long olgeta, yes, long jos we i bin stap long bigtaon blong Sarahemla, mo i go long is blong reva blong Saedon, i go long vale blong Gidion, we oli bin mekem wan bigtaon, we oli singaotem se bigtaon blong Gidion, we i stap long vale we oli singaotem Gidion. Oli singaotem ples ia folem nem blong man ia we Nehor i bin kilim hem i ded wetem naef blong faet.

8 Mo Alma i bin go mo i bin stat blong talemaot toktok blong God long jos we i bin stanap long vale blong Gidion, folem revelesen blong trutok blong toktok we ol bubu blong hem oli bin talemaot, mo folem spirit blong profesi we i bin stap long hem, folem testimoni blong Jisas Kraes, Pikinini blong God, we bae i kam blong pemaot man blong hem long ol sin blong olgeta, mo tabu oda we oli bin singaotem hem long

hem. Mo olsem ia nao oli bin raetem. Amen.

Ol toktok blong Alma we hem i bin talemaot long ol man long Gidion, folem ol histri blong hem.

*I stap long japta 7 nomo.*

### JAPTA 7

*Bae Meri i bonem Kraes—Bae hem i tekemaot ol rop blong ded mo tekem ol sin blong ol pipol long hem—Olgeta we oli sakem sin, kasem baptaes, mo holem ol komanmen, bae oli kasem laef we i no save finis—Ol samting we oli doti tumas oli no save kasem kingdom blong God—Ol man i mas gat fasin ia blong putum tingting i stapdaon, fet, hop mo bigfala lav. Raonabaot 83 yia bifo Kraes i bon.*

LUK ol brata blong mi we mi lavem tumas, from oli bin letem mi blong kam long yufala, taswe mi traem blong toktok long yufala long lanwis blong mi; yes, wetem maot blong mi, from hem i fastaem we mi bin toktok long yufala wetem ol toktok blong maot blong mi, from mi bin stap fulwan nomo long jea blong jajmen, mo from mi bin gat plante wok, mekem se mi no bin save kam long yufala.

2 Mo tu mi no bin save kam naoia, sapos oli no bin putum wan narafala man long jea blong jajmen, blong rul long ples

blong mi; Mo Lod, long bigfala sore blong hem, i bin letem se mi save kam long yufala.

3 Mo luk, mi bin kam wetem wan bigfala hop mo plante tingting se bae mi faenemaot se yufala i bin putum tingting blong yufala daon long fored blong God, mo se yufala i bin gohed blong prea long gladhat blong hem, se bae mi faenemaot se yufala i no gat rong long fored blong hem, mo se bae mi faenemaot se yufala i no stap long bigfala trabol olsem ol brata blong yumi i bin gat long Sarahemla.

4 Be blesem nem blong God, we i bin givim long mi blong save, yes, we i bin givim bigfala glad we i bigwan tumas blong save se oli bin stanap bakegen long rod blong stret fasin blong hem.

5 Mo mi trastem, folem Spirit blong God we i stap long mi, mo tu se bae mi gat glad from yufala; be mi no wantem se glad blong mi long yufala i kam from ol hadtaem mo sore we mi bin gat, long ol brata long Sarahemla, from luk, glad blong mi long olgeta i bin kam, afta we mi bin go tru plante hadtaem mo sore.

6 Be luk, mi trastem se yufala i no stap long bigfala fasin blong no biliv olsem ol brata blong yufala; Mi trastem se yufala i no gat hae tingting long hat blong yufala; Yes, mi trastem se yufala i no putum hat blong yufala long ol rij samting mo ol samting blong wol we i blong nating; Yes, mi trastem se

yufala i no wosipim ol aedol, be se yufala i wosipim tru God ia we i stap laef, mo se yufala i lukluk i go long fored blong kam klin aot long ol sin blong yufala, wetem wan fet we i no gat en we bae i kam.

7 From luk, mi talem long yufala i gat plante samting we bae i kam; mo luk, i gat wan samting we i moa impoten long evriwan—from luk, taem i no longwe tumas we Ridima i laef mo i kam long medel blong ol man blong hem.

8 Luk, mi no talem se bae hem i kam long yumi long taem we hem i stap long bodi blong hem we i blong wol ia; From luk, Spirit i no talem long mi se samting ia bae i hapen olsem. Nao long saed blong samting ia, mi no save; be hemia nao mi save, se Lod God i gat paoa blong mekem evri samting we i folem toktok blong hem.

9 Be luk, Spirit i bin talem hemia long mi, se: Talem strong long ol pipol ia, se—Yufala i sakem sin, mo mekem rere rod blong Lod, mo wokbaot long ol rod blong hem, we oli stret; from luk, kingdom blong heven i stap kam klosap, mo Pikinini blong God bae i kam long fes blong wol.

10 Mo luk, Meri bae i bonem hem, long Jerusalem we i graon blong ol bubu blong yumi, hem i wan woman we i neva go wetem man yet, hem i wan gudfala woman we God i bin jusum hem, we bae Tabu Spirit i kavremap hem mo bae i gat bel tru long paoa blong Tabu

Spirit, mo bonem wan boe, yes, Pikinini blong God.

11 Mo bae hem i go aot, i harem nogud long ol soa blong bodi mo fulap hadtaem mo temtesen blong evri kaen; mo samting ia bae i mekem profesi i hapen we i talem se, bae hem i tekem long hem ol soa blong bodi mo ol siknes blong ol pipol blong hem.

12 Mo bae hem i tekem long hem ded, blong hem i save tekemaot ol rop blong ded we i fasem ol pipol blong hem; mo bae hem i tekem long hem ol wik samting blong olgeta, blong mekem se insaed blong hem i save kam fulap long sore, long saed blong bodi blong mit mo bun, mekem se hem i save, long saed blong bodi blong mit mo bun, olsem wanem blong help-em ol man blong hem long saed blong ol samting blong olgeta we oli no strong long hem.

13 Nao Spirit i save evri samting; be Pikinini blong God i harem nogud long saed blong bodi blong mit mo bun mekem se hem i save tekem long hem ol sin blong ol pipol blong hem, blong mekem se hem i save tekemaot ol sin blong olgeta folem paoa blong hem ia we i mekem man i go fri; mo nao luk, hemia testimoni we i stap long mi.

14 Nao mi talem long yufala se yufala i mas sakem sin, mo yufala i mas bon bakegen; from Spirit i talem se sapos yufala i no bon bakegen, yufala i no save kasem kingdom blong heven; taswe yufala i kam mo kasem

baptaes blong sakem sin, blong yufala i save wasemaot ol sin blong yufala, blong mekem se yufala i gat fet long Smol Sipsip blong God, we i tekemaot ol sin blong wol, we i strong blong sev mo blong wasemaot evri fasin ia we i no stret.

15 Yes, mi talem long yufala blong kam mo no fraet, mo putum long saed evri sin, we i stap mekem trabol long yufala isi nomo, we i fasem yufala daon blong go lus, yes, kam mo go fored, mo soem long God blong yufala se yufala i glad blong sakem ol sin blong yufala, mo mekem wan kavenan wetem hem blong holem ol komanmen blong hem, mo witnesem samting ia long hem long dei ia, taem we yu go insaed long ol wota blong baptaes.

16 Mo eni man we i mekem samting ia, mo i holem ol komanmen blong God stat long taem ia i go, sem man ia bae i tingbaot se mi talem long hem, yes, bae hem i tingbaot se mi bin talem long hem se, bae hem i kasem laef we i no save finis, folem testemoni blong Tabu Spirit, we i testifae long mi.

17 Mo nao ol brata blong mi we mi lavem tumas, yufala i bilivim ol samting ia? Luk, mi talem long yufala, yes, mi save se yufala i bilivim olgeta; mo wei we mi save se yufala i bilivim olgeta, hem i tru long fasin blong soemaot blong Spirit we i stap long mi. Mo nao from fet blong yufala i strong tumas long saed ia, yes, long saed blong ol samting we mi

bin talemaot, glad blong me i bigwan.

18 From olsem we mi bin talem long yufala long stat, mi bin gat tingting ia blong wantem tumas se yufala i no stap long bigfala trabol olsem ol brata blong yufala, olsem we mi bin faenemaot tu se ol tingting blong mi oli bin kam tru.

19 From mi luk se yufala i stap long ol rod blong stret fasin; mi luk se yufala i stap long rod ia we i go long kingdom blong God; yes, mi luk se yufala i stap mekem ol rod blong hem oli stret.

20 Mi luk se oli bin talem long yufala, tru long testemoni blong toktok blong hem, se hem i no save wokbaot long ol rod we oli kruked; hem i no jenis long wanem we hem i bin talemaot, hem i no gat sado blong tanem long raet i go long lef, o long samting ia we i gud i go long samting ia we i rong; taswe, ol rod blong hem i wan raon samting we i no save finis.

21 Mo hem i no stap long ol tempol we oli no tabu; i no save gat wan samting we i doti tumas o we i no klin i save go insaed long kingdom blong God; Taswe mi talem long yufala se bae taem i kam, yes, mo bae i stap long las dei, se hem we i doti bae i stap nomo long fasin ia blong doti.

22 Mo nao ol brata blong mi we mi lavem yufala tumas, mi bin talemaot ol samting ia long yufala blong mi save wekemap yufala blong yufala i save ol wok blong yufala long God, se

yufala i save wokbaot, wetem no gat rong, long fes blong hem, blong yufala i save wokbaot folem tabu oda blong God ia we oli bin kasem yufala long hem.

23 Mo nao mi wantem se bae yufala i putum tingting blong yufala i daon, mo stap lisin long ol man mo gat sloslo fasin; isi blong folem; fulap long fasin blong wet longtaem mo blong save wet longtaem; yufala i kontrolem yufala long evri samting; yufala i lukaot gud blong holem ol komanmen blong God long evri taem; yufala i askem eni samting taem yufala i stap long nid, blong spirit tugeta wetem blong wol; evri taem yufala i talem tangkyu long God long wanem samting we yufala i kasem.

24 Mo meksua se yufala i gat fet, hop, mo bigfala lav, mo afta bae yufala i gat fulap gudfala wok evri taem.

25 Mo bae Lod i blesem yufala, mo lukaotem ol klos blong yufala blong oli no gat mak, blong oli save tekem yufala blong sidaon wetem Ebrahim, Aesak, mo Jakob mo ol tabu profet we oli bin stap stat long taem we wol i stat, from ol klos blong yufala oli no gat mak olsem ol klos blong olgeta tu oli no gat mak, long kingdom blong heven blong yufala i nomo save kamaot.

26 Mo naoia ol brata blong mi we mi lavem tumas, mi bin talemaot ol toktok ia long yufala folem Spirit we i toktok long mi; mo sol blong mi i hapi

bigwan tumas, from yufala i bin stap strong bigwan mo lisin gud long ol toktok blong mi.

27 Mo nao, bae pis blong God i stap wetem yufala, mo long ol haos blong yufala mo ol graon, mo long ol grup blong ol anamol blong yufala mo ol buluk blong yufala, mo evri samting we yufala i gat, ol woman blong yufala mo ol pikinini blong yufala, folem fet mo ol gudfala wok blong yufala, stat long taem ia i go blong oltaem. Mo mi bin toktok olsem ia nao. Amen.

---

### JAPTA 8

---

*Alma i prij mo i baptaesem ol pipol long Melek—Oli no wantem hem long Amonaeha mo hem i aot—Wan enjel i talem long hem blong gobak mo talemaot fasin blong sakem sin long ol pipol—Amulek i kasem hem, mo tufala i prij long Amonaeha. Raonabaot 82 yia bifo Kraes i bon.*

Mo nao i bin hapen se, Alma i bin lego graon blong Gidion, afta we hem i bin tijim ol man blong Gidion plante samting we oli no save raetem daon olgeta, afta hem i bin stanemap oda blong jos, folem olsem we hem i bin mekem long graon blong Sarahemla, yes, hem i bin kambak long haos blong hem long Sarahemla blong spel long olgeta wok we hem i bin mekem.

2 Mo olsem ia nao nambanaen yia blong rul blong ol jaj long ol pipol blong Nifae i bin en.

3 Mo i bin hapen se, long stat

blong nambaten yia blong rul  
blong ol jaj long ol pipol blong  
Nifae, Alma i bin aot mo hem i  
wokbaot i go long graon blong  
Melek, long wes blong reva  
blong Saedon, long wes klosap  
long ol boda blong ples we i no  
gat man long hem.

4 Mo hem i bin stat blong tijim  
ol pipol long graon blong Melek  
folem tabu oda blong God ia  
we i bin singaotem hem; mo  
hem i stat blong tijim ol pipol  
long ful graon blong Melek.

5 Mo i bin hapen se, ol pipol i  
bin kam long hem long evri  
ples long ol boda blong graon  
we i stap klosap long saed  
blong ples we i no gat man long  
hem. Mo oli kasem baptaes  
long evri ples long graon;

6 Mekem se taem hem i bin  
finisim wok blong hem long  
Melek hem i bin aot long ples  
ia, mo i bin wokbaot tri dei i go  
long not long graon blong  
Melek; mo hem i bin kam long  
wan bigtaon we oli singaotem  
Amonaeha.

7 Nao i bin kastom blong  
ol pipol blong Nifae blong  
singaotem graon blong olgeta,  
mo ol bigtaon blong olgeta, mo  
ol vilej blong olgeta, yes, evri  
smolfala vilej blong olgeta tu,  
long nem blong fasfala man we  
i bin stap long olgeta; mo hem i  
olsem ia nao wetem graon  
blong Amonaeha.

8 Mo i bin hapen se, taem we  
Alma i bin kam long bigtaon  
blong Amonaeha, hem i bin  
stat blong prijim toktok blong  
God long olgeta.

9 Nao Setan i bin holem taet ol

hat blong ol man blong bigtaon  
blong Amonaeha. Taswe oli no  
bin wantem blong lisin long ol  
toktok blong Alma.

10 Be Alma i stil wok plante  
long spirit, hem i bin traehad  
long strongfala prea blong hem  
wetem God, blong mekem se  
hem i poremaot Spirit blong  
hem long ol pipol, we oli stap  
long bigtaon; blong hem tu i  
save letem se hem i save bap-  
taesem olgeta blong sakem sin.

11 Be, oli bin mekem ol hat  
blong olgeta i kam strong, oli  
talem long hem: Luk, mifala i  
save se yu yu Alma; mo mifala i  
save se yu yu hae pris blong jos  
ia we yu bin stanemap long  
plante pat blong graon, folem  
kastom blong yu; Mo mifala  
i no blong jos blong yu, mo mi-  
fala i no biliv long ol krangke  
kastom ia.

12 Mo nao mifala i save se  
from mifala i no blong jos  
blong yu, mifala i save se yu yu  
no gat paoa ova long mifala;  
mo yu bin givim jea blong jaj-  
men long Nifae; taswe yu yu  
no jif jaj ova long mifala.

13 Nao taem we ol pipol i bin  
talem samting ia, mo oli no bin  
lisin long ol toktok blong hem,  
mo oli bin toktok agensem  
hem, mo oli spet long hem, mo  
mekem se oli ronemaot hem  
long bigtaon blong olgeta, hem  
i bin aot mo i bin wokbaot i go  
long bigtaon ia we oli bin  
singaotem Eron.

14 Mo i bin hapen se, taem we  
hem i stap wokbaot i go long  
ples ia, sore blong hem i hevi  
tumas, hem i go tru wan bigfala

taem blong ol hadtaem mo ol sore mo sol blong hem i fulap long rabis soa, from ol fasin nogud blong ol pipol we oli stap long bigtaon blong Amonaeha, i bin hapen se, taem sore blong Alma i hevi tumas olsem, luk wan enjel blong Lod i bin kamaot long hem, i talem:

15 Mi blesem yu, Alma; taswe, leftemap hed blong yu mo stap glad, from yu gat bigfala stamba tingting blong glad; from yu bin holem taet fet blong holem ol komanmen blong God, stat long taem we yu bin kasem fasfala mesej blong yu long hem. Luk, mi man ia we i bin karem mesej ia i kam long yu.

16 Mo luk, God i bin sendem mi blong talem long yu blong gobak long bigtaon blong Amonaeha, mo prij bakegen long ol man blong bigtaon; yes, prij long olgeta. Yes, talem long olgeta se, hemia nomo sapos oli no sakem sin bae Lod God i kilim olgeta i ded.

17 From luk, naolia oli stap stadi blong smasem gud fridom blong ol man blong yu, (from Lod i talem olsem) we i agensem ol loa, mo ol jajmen, mo ol komanmen we hem i bin givim long ol pipol blong hem.

18 Nao i bin hapen se, afta Alma i bin kasem mesej blong hem long enjel blong Lod, hem i bin gobak kwiktaem long graon blong Amonaeha. Mo hem i bin go long bigtaon long wan narafala rod, yes, long rod ia we i stap long saot blong bigtaon blong Amonaeha.

19 Mo taem we hem bin i go insaed long bigtaon, hem i bin hanggri, mo hem i talem long wan man se: Bae yu save givim long wan wokman blong God, we tingting blong hem i stap daon, wan samting blong kakae?

20 Mo man ia i bin talem long hem: Mi mi wan man blong Nifae, mo mi save se yu wan tabu profet blong God, from yu nao man ia we wan enjel i bin talem long wan visen: Bae yu akseptem hem. Taswe, kam wetem mi long haos blong mi mo bae mi givim long yu kakae blong mi; mo mi save se bae yu wan blesing long mi mo long haos blong mi.

21 Mo i bin hapen se, man ia i tekem hem long haos blong hem, mo oli singaotem man ia Amulek; mo hem i bin tekem bred mo mit mo i putum long fored blong Alma.

22 Mo i bin hapen se, Alma i bin kakae bred mo i bin kam fulap; mo hem i bin blesem Amulek mo haos blong hem, mo hem i talem tangkyu long God.

23 Mo afta hem i bin kakae mo hem i bin kam fulap, hem i bin talem long Amulek se: Mi mi Alma, mo mi mi hae pris ova long jos blong God truaot long graon.

24 Mo luk, God i bin singaotem mi blong prijim toktok blong hem long medel blong evri pipol ia, folem spirit blong revelesen mo profesi; mo mi bin kam finis long graon ia mo oli no bin wantem akseptem mi be oli bin sakemaot mi mo



mi stap rere blong tanem bak-saed blong mi long graon ia blong oltaem.

25 Be luk, God i bin talem long mi se mi mas kambak bakegen mo talemaot profesi long pipol ia, yes, mo blong toktok agens-  
em olgeta long saed blong ol rabis fasin blong olgeta.

26 Mo nao, Amulek, from yu bin fidim mi mo tekem mi i kam insaed, mi blesem yu; from mi bin hanggri, from mi bin livim kakae plante dei.

27 Mo Alma i bin stap wetem Amulek plante dei bifo hem i stat blong prij long ol pipol.

28 Mo i bin hapen se, ol pipol oli bin kam moa nogud long ol rabis fasin blong olgeta.

29 Mo toktok i kam long Alma, i talem: Go; mo tu talem long wokman blong mi Amulek, go aot mo talemaot profesi long pipol ia, se—Yufala i sakem sin, from Lod i talem se, hemia nomo sapos yufala i no sakem sin bae mi panisim pipol ia long kros blong mi; yes, mo bae mi no tanem strongfala kros blong mi i gowe.

30 Mo Alma i bin go, mo Amulek tu, long ol pipol blong talemaot ol toktok blong God long olgeta; mo oli bin fulap long Tabu Spirit.

31 Mo God i bin givim paoa long olgeta, we i bigwan tumas, inaf blong mekem se oli no save putum olgeta long kalabus; mo i no save gat eni man i save kilim olgeta i ded; be oli no yusum paoa blong olgeta kasem taem we oli fasem olgeta long rop mo sakem olgeta i go long

kalabus. Nao, samting ia i bin hapen blong Lod i save soemaot paoa blong hem long olgeta.

32 Mo i bin hapen se, oli kam-aot mo oli stat blong prij mo talemaot profesi long ol pipol, folem spirit mo paoa we Lod i bin givim long olgeta.

---

Ol toktok blong Alma mo tu ol toktok blong Amulek we oli bin talemaot long ol pipol we oli bin stap long graon blong Amonaeha. Mo tu oli sakem olgeta i go long kalabus, mo oli go fri tru long merikel paoa blong God we i bin stap long olgeta, folem histri blong Alma.

*I stat long japta 9 i go kasem japta 14 nomo.*

---

## JAPTA 9

---

*Alma i givim oda long ol man blong Amonaeha blong sakem sin—Lod bae i sore plante long ol man blong Leman long las dei—Sapos ol man blong Nifae oli sakem laet bae ol man blong Leman oli smasem olgeta—Pikinini blong God bae i klosap i kam nao—Bae hem i pemaot olgeta ia we i sakem sin, kasem baptaes, mo gat fet long nem blong hem. Raonabaot 82 yia bifo Kraes i bon.*

Mo bakegen, mi, Alma, from God i bin talem long mi se mi mas tekem Amulek mo go aot mo prij bakegen long ol pipol ia, o ol pipol we oli bin stap long bigtaon blong Amonaeha, i bin hapen se, taem mi bin stat

blong prij long olgeta, oli stat blong rao wetem mi, oli talem:

2 Yu, huia? Yu ting se bae mifala i biliv long testemoni blong wan man, nomata sapos hem bae i prij long mifala se bae wol bae i pas i gowe?

3 Nao oli no bin haremsave ol toktok we oli bin talem; from oli no bin save se wol bae i pas i gowe.

4 Mo oli talem tu se: Bae mifala i no bilivim ol toktok blong yu sapos yu talemaot profesi se bae bigfala bigtaon ia i smas gud long wan dei.

5 Nao oli no bin save se God i save mekem ol gudfala wok, from oli bin mekem hat blong olgeta i kam strong mo oli wan stronghed pipol.

6 Mo oli bin talem: Huia i God ia, we i nomo sendem raet bitim wan man nomo long pipol ia, blong talem long olgeta trutok blong ol samting ia we oli bigwan mo gudfala tumas?

7 Mo oli bin kam klosap blong putum ol han blong olgeta long mi; be luk, oli no bin mekem. Mo mi bin stanap wetem strong tingting blong talem long olgeta, yes, mi no bin fraet blong talem long olgeta se:

8 Luk, O yufala ol man nogud mo jeneresen we i stronghed, olsem wanem nao yufala i bin fogetem fasin blong ol bubu blong yufala: Yes, yufala i kwik tumas blong fogetem ol komanmen blong God.

9 Yufala i no tingbaot se papa blong yumi, Lihae, i bin kamaot long Jerusalem tru long ol han blong God? Yufala i no ting-

baot se hem i bin lidim olgeta evriwan tru long ples we i no gat man long hem?

10 Mo yufala i fogetem kwiktaem nomo hamas taem hem i bin mekem ol bubu blong yumi oli go fri mo oli kamaot long ol han blong ol enemi blong olgeta, mo i bin sevem olgeta blong oli no kilim olgeta i ded, mo tu, tru long ol han blong ol brata blong olgeta?

11 Yes, mo sapos i no bin long paoa blong hem we i no gat wan paoa i save bitim, mo long sore blong hem, mo long fasin blong go tru long hadtaem wetem longfala tingting blong hem, bae hem i no mestem yumi mo kilim yumi long fes long wol longtaem, bifo long taem naoia, mo ating hem i bin putum yumi finis long wan ples we i no gat en blong stap harem nogud mo trabol.

12 Luk, nao mi talem long yufala se hemi givim oda long yufala blong sakem sin; mo hemia nomo sapos yufala i no sakem sin, yufala i no save kasem kingdom blong God. Be luk, i no hemia nomo—hem i bin givim oda long yufala blong sakem sin, o bae hem i smasem yufala gud, aot long fes long wol, yes, bae hem i visitim yufala long kros blong hem, mo long strongfala kros blong hem bae hem i no tanem hem i gowe.

13 Luk, yufala i no tingbaot ol toktok we hem i bin talemaot long Lihae, we i telem se: I semak olsem we yufala i stap holem ol komanmen blong mi,

bae yufala i kam antap gud long graon? Mo toktok ia i talem bakegen se: I semak olsem we yufala i no stap folem ol komanmen blong mi bae oli sakemaot yufala long fes blong Lod.

14 Nao mi wantem blong yufala i tingbaot se, i semak we ol laen blong Lemana oli no bin holem ol komanmen blong God, oli bin sakemaot olgeta long fes blong Lod. Nao yumi luk se toktok blong Lod i bin kam tru long ol samting ia, mo oli sakemaot ol laen blong Lemana long fes blong hem, long taem we oli stat blong brekem loa long graon.

15 Be mi talem long yufala se, bae oli oraet long dei blong jajmen bitim yufala, sapos yufala i stap long ol sin blong yufala, yes, mo bae oli oraet bigwan tu long laef ia bitim yufala, hemia nomo sapos yufala i no sakem sin.

16 From i gat plante promes we i go long ol laen blong Lemana; from hem i from kastom blong ol bubu blong olgeta we i mekem olgeta i stap long ples ia we oli no save wan samting; taswe Lod bae i sore long olgeta mo bae i mekem laef blong olgeta i longfala long graon.

17 Mo wan dei Lod bae i mekem olgeta i biliv long toktok blong hem, mo blong save se ol kastom blong ol bubu blong olgeta oli no stret; mo plante long olgeta bae oli sev, from Lod bae i sore long olgeta evriwan we oli singaotem nem blong hem.

18 Be luk, mi talem long yufala se sapos yufala i gohed

long ol fasin nogud blong yufala bae ol dei blong yufala i no save kam longfala long graon, from bae oli sendem ol man blong Lemana oli kam long yufala; mo sapos yufala i no sakem sin, bae oli kam long wan taem we yufala i no save, mo bae oli kam agensem yufala mo smasem yufala; mo bae samting ia i kam folem strongfala kros blong Lod.

19 From bae hem i no letem yufala blong stap laef wetem ol rabis fasin blong yufala, blong smasem gud ol pipol blong hem. Mi talem long yufala, No; hem i wantem se i moa gud, blong hem i letem ol man blong Lemana oli save smasem evriwan long ol pipol blong hem, we oli singaotem olgeta ol pipol blong Nifae, sapos hem i save hapen se oli save foldaon long ol sin mo brekem ol loa, afta we oli bin gat plante laet, mo plante save, we Lod God blong olgeta i bin givim long olgeta;

20 Yes, afta we oli bin kam wan pipol we Lod i bin sapotem olgeta bigwan, yes, afta we Lod i bin sapotem olgeta i bitim evri narafala kantri, famle, lanwis, o pipol; afta we oli bin kasem save long evri samting, folem ol tingting blong olgeta, mo fet blong olgeta, mo ol prea, long samting we i bin stap, mo we i stap, mo we bae i kam yet;

21 Afta we Spirit blong God i bin visitim olgeta; afta we oli bin toktok wetem ol enjel, mo afta we voes blong Lod i bin toktok long olgeta; mo afta oli bin gat spirit blong profesi, mo

spirit blong revelesen, mo tu plante presen, presen blong toktok long ol lanwis, mo presen blong prij, mo presen we i Tabu Spirit, mo presen blong tanem ol lanwis;

22 Yes, mo afta we God i bin karemaot olgeta long graon blong Jerusalem, tru long han blong Lod; afta oli bin sevem olgeta long hadtaem blong kasem kakae, mo long ol siknes, mo eni kaen siknes blong everi kaen; mo afta oli bin kam strong long ol faet, blong ol man blong Leman i no kilim ded olgeta; afta oli bin kamaot long slef plante taem, mo afta oli bin kipim mo sevem olgeta kasem naoia; mo oli kam antap gud kasem taem we oli rij long evri kaen samting—

23 Mo nao luk mi talem long yufala se, sapos pipol ia, we i bin kasem plante blesing long han blong Lod, oli brekem loa agensem laet mo save we oli gat, mi talem long yufala se sapos hem i olsem ia nao, se sapos oli foldaon long brekem loa, ol laen blong Leman oli moa oraet bitim olgeta.

24 From luk, ol promes blong Lod i go long ol laen blong Leman, be oli no go long yufala sapos yufala i brekem loa; from i no tru se Lod i bin promes long wan klia fasin mo i bin talemaot strong long pablik se, sapos yufala i go agensem hem, bae oli smasem gud yufala aot long fes blong wol?

25 Mo from stamba tingting ia nao, blong oli no save smasem yufala, Lod i bin sendem enjel

blong hem blong visitim plante long ol man blong hem, i talem long olgeta se oli mas go fored mo talemaot wetem wan strong voes long pipol ia, se: Yufala i sakem sin, from kingdom blong heven i kam klosap;

26 Mo bae i no gat plante dei long stat long naoia we bae Pikinini blong God i kam wetem glori blong hem, mo glori blong hem bae i glori blong Wan Pikinini Nomo blong Papa, i fulap long gladhat, jastis, mo trutok, i fulap long fasin ia blong save wet longtaem, sore, go tru long hadtaem wetem longfala tingting, i kwik blong harem ol prea blong ol pipol blong hem mo blong ansa ol prea blong olgeta.

27 Mo luk, hem i kam blong pemaot olgeta we bae oli kasem baptaes blong sakem sin, tru long fet long nem blong hem.

28 Taswe, yufala i mekem i rere rod blong Lod, from taem i kam klosap we evri man bae oli kasem pei blong ol wok blong olgeta, folem ol fasin blong olgeta—sapos oli bin stret bae oli kasem fasin blong Lod we i sevem ol sol blong olgeta, folem paoa mo fasin ia blong Jisas Kraes i sevem olgeta; mo sapos oli bin stap nogud bae oli kasem panis long ol sol blong olgeta, folem paoa mo fasin ia blong devel blong kasem mo holem taet ol pipol.

29 Nao luk, hemia voes blong enjel we i stap talem strong long ol pipol.

30 Mo nao, ol brata blong mi we mi lavem tumas, from yufala

ol brata blong mi, mo i nid blong mi lavem yufala, mo i nid blong yufala i karem i kam ol wok we oli stret blong fasin blong sakem sin, from we yufala i stap mekem hat blong yufala i kam strong agensem ol toktok blong God, mo from we yufala i wan pipol we i lus mo i bin foldaon.

31 Nao i bin hapen se, taem we mi, Alma, mi bin talemaot ol toktok ia, luk, ol pipol oli kros long mi from mi bin talem long olgeta se oli wan pipol we oli mekem hat blong olgeta i kam strong mo oli stronghed.

32 Mo tu from mi bin talem long olgeta se oli wan pipol we i lus mo i bin foldaon, oli bin kros long mi, mo oli bin traem blong putum han blong olgeta long mi, blong oli save sakem mi i go long kalabus.

33 Be i bin hapen se, Lod i no letem olgeta blong oli holem mi long taem ia mo sakem mi i go long kalabus.

34 Mo i bin hapen se, Amulek i bin go mo stanap, mo i stat blong prij long olgeta tu. Mo nao oli no raetem evri toktok blong Amulek, be wan pat blong toktok blong hem oli bin raetem long buk ia.

---

### JAPTA 10

---

*Lihae i bin kamaot long laen blong Manase—Amulek i talem bak toktok blong enjel se bae hem i lukaotem Alma—Ol prea blong olgeta we i stret i mekem ol pipol i sev—Ol loea mo ol jaj we oli no stret, oli statem wok ia we bae i*

*smasem gud ol pipol. Raonabaot 82 yia bifo Kraes i bon.*

NAO hemia i ol toktok we Amulek i bin prijim long ol pipol we oli stap long graon blong Amonaeha, hem i talem:

2 Mi mi Amulek; mi mi boe blong Gidona, we hemi boe blong Ismael, we i bin kamaot long Aminadae; mo hem i sem Aminadae we i tanem raeting we i stap long wol blong tempol, we God i bin raetem wetem finga blong hem.

3 Mo Aminadae i bin kamaot long laen blong Nifae, we i bin boe blong Lihae, we i kamaot long graon blong Jerusalem, we i kamaot long laen blong Manase, we i boe blong Josef ia we ol brata blong hem oli salem hem i go long Ijip tru long ol han blong olgeta.

4 Mo luk, mi mi wan man tu we olgeta we oli save mi, oli save long saed blong nem blong mi; yes, mo luk, mi gat plante famle mo plante fren, mo mi bin kasem plante rij samting tru long wok blong han blong mi.

5 Be, afta evri samting ia, mi neva bin save plante long ol fasin blong Lod, mo ol sikret blong hem mo gudfala paoa. Mi talem se mi neva bin save plante long ol samting ia; be luk, mi mekem mistek from mi bin luk plante long ol sikret blong hem, mo gudfala paoa blong hem; yes, mi luk tu we hem i holem laef blong ol pipol ia stap sev tu.

6 Be, mi bin mekem hat blong mi i kam strong, from oli bin

singaotem mi plante taem mo mi no bin lisiin; taswe mi bin save long saed blong ol samting ia, stil mi no wantem blong save; taswe mi bin gohed blong go agensem God, long fasin nogud blong hat blong mi, go kasem nambafo dei blong nambaseven manis ia, we i stap long nambaten yia blong rul blong ol jaj.

7 Taem we mi bin stap wokbaot blong go luk wan klos famle blong mi, luk, wan enjel blong Lod i bin kamaot long mi mo i talem: Amulek, gobak long haos blong yu, from bae yu givim kakae long wan profet blong Lod; yes, wan tabu man, we God i bin jusum hem; from hem i bin livim kakae plante dei from ol sin blong pipol ia, mo hem i hanggri, mo bae yu karem hem i go insaed long haos blong yu mo givim kakae long hem mo bae hem i blesem yu mo haos blong yu. Mo bae blesing blong Lod i stap long yu mo haos blong yu.

8 Mo i bin hapen se, mi bin obei long voes blong enjel, mo mi bin gobak long haos blong mi. Mo taem mi stap go long ples ia, mi bin faenem man we enjel i talem long mi: bae yu tekem hem i go insaed long haos blong yu—mo luk hem i sem man ia we i bin toktok long yufala long saed blong ol samting blong God.

9 Mo enjel i bin talem long mi se hem i wan tabu man; taswe mi save se hem i wan tabu man from wan enjel blong God i bin talem samting ia.

10 Mo bakegen, mi save se ol

samting ia we hem i bin talem aot oli tru; from luk mi talem long yufala se, olsem we Lod i stap laef, mo tu hem i bin sendem enjel blong hem blong soemaot ol samting ia long mi; mo hem i mekem samting ia taem we Alma ia i bin stap long haos blong mi.

11 From luk, hem i bin blesem haos blong mi, hem i bin blesem mi, mo ol woman blong mi, mo ol pikinini blong mi, mo papa blong mi mo famle blong mi; yes, hem i bin blesem evri famle blong mi tu, mo blesing blong Lod i stap long mifala folem ol toktok we hem i bin talemaot.

12 Mo nao, taem Amulek i bin talemaot ol toktok ia ol pipol, oli bin stat blong sapraes, from oli luk se i gat moa bitim wan witnes we i bin testifae long ol samting we oli bin faenem i rong long olgeta, mo tu long ol samting we bae oli kam, folem spirit blong profesi we i stap long olgeta.

13 Be, i gat sam long olgeta we oli bin tingting blong askem kwestin long tufala, blong oli save kasem tufala long ol toktok blong tufala tru long ol giaman fasin blong olgeta, blong oli save faenem wan samting agensem tufala, blong oli save tekem tufala i go long ol jaj blong olgeta blong oli jajem tufala folem loa, mo blong oli save kilim tufala i ded o sakem tufala i go long kalabus, folem rabis samting we oli save mekem i kamaot o we oli save witnesem agensem tufala.

14 Nao i bin ol man ia we

oli stap lukaotem blong kilim tufala i ded, we oli ol loa, we olgeta pipol oli bin pem o we oli bin stanemap olgeta blong yusum loa, long taem blong kot blong olgeta, o long ol kot blong ol rabis samting blong ol pipol long fored blong ol jaj.

15 Nao ol loa ia oli bin lan long saed blong evri wok mo giaman blong ol pipol; mo samting ia blong mekem olgeta blong oli no gat save long wok blong olgeta.

16 Mo i bin hapen se, oli bin stat blong askem Amulek, blong oli save kasem hem long ol toktok blong hem, o blong hem i save toktok agensem toktok we bae hem i talemaot.

17 Nao oli no bin save se Amulek i save gat save long saed blong ol plan blong olgeta. Be i bin hapen se, taem we oli bin stat blong askem hem, hem i bin faenemaot tingting blong olgeta mo, hem i bin talem long olgeta: O yufala ol man nogud mo jeneresen we i stronghed, yufala ol loa mo olgeta we oli gat tufes, from yufala i stap statem wok ia we i blong devel; from yufala i stap putum ol trap mo ol rop blong holem ol man, blong kasem ol tabu man blong God.

18 Yufala i stap statem wok ia blong smasem gud ol wei blong olgeta we i stret, mo blong mekem kros blong God i kam daon long hed blong yufala, yes, go kasem taem pipol ia i smas evriwan.

19 Yes, Mosaea, we i las king blong yumi i bin talem taem we

hem i stap rere blong givimaot kingdom, from i no gat wan man we hem i save givim i go long hem, hem i mekem blong oli rulum pipol ia tru long voes blong olgeta—yes, hem i talem gud se sapos taem i kam we voes blong pipol ia i jusum rabis fasin, olsem se, sapos taem i kam we pipol ia i foldaon long fasin blong brekem loa, bae oli raep blong kilim olgeta i ded.

20 Mo nao mi talem long yufala se Lod i jajem gud ol rabis fasin blong yufala; hem i talemaot gud long pipol ia, tru long voes blong ol enjel: Yufala i sakem sin, sakem sin, from kingdom blong heven i kam klosap.

21 Yes, hem i talemaot gud tru long voes blong enjel blong hem i se: Bae mi kam daon long ol man blong mi wetem loa mo jastis long ol han blong mi.

22 Yes, mo mi talem long yufala se sapos i no gat ol prea blong olgeta we i stret, we oli stap naoia long graon, be bae i no wota we bae i kam antap mo i kavremap graon olsem ol man long taem blong Noa, be bae i kam tru long hadtaem blong kasem kakae, mo rabis siknes, mo naef blong faet.

23 Be hem i tru long ol prea blong olgeta we i stret we i mekem se yufala i sev; nao taswe, sapos yufala i sakemaot olgeta we i stret long yufala, ale bae Lod i nomo save holem taet han blong hem; be long strongfala kros blong hem bae hem i kamaot agensem yufala; Ale bae hadtaem blong kasem kakae i kilim yufala, mo wetem rabis

siknes, mo wetem naef blong faet; mo taem i kam klosap hemia nomo sapos yufala i no sakem sin.

24 Mo nao i bin hapen se, ol pipol oli bin kros tumas long Amulek, mo oli bin singaot, se: Man ia i toktok nogud agensem ol loa blong yumi we oli stret, mo ol waes loea blong yumi we yumi bin jusum.

25 Be Amulek i bin stretem han blong hem, mo i bin singaot moa strong long olgeta, se: O yufala ol man nogud mo jeneresen we i stronghed, from wanem Setan i gat bigfala paoa long ol hat blong yufala? From wanem yufala i givim yufala long hem blong hem i save gat paoa long yufala, blong mekem ae blong yufala oli blaen, blong yufala i no save andastanem ol toktok we oli bin talemaot olgeta, folem trutok blong olgeta?

26 From luk, i tru se mi bin toktok agensem loa blong yufala? Yufala i no andastanem; yufala i talem se mi bin toktok agensem loa blong yufala; be mi no bin toktok olsem, be mi bin toktok blong sapotem loa blong yufala, blong talemaot panis blong yufala.

27 Mo nao luk, mi talem long yufala se, wok blong smasem gud pipol ia i stat blong kamaot tru long fasin ia we i no stret blong ol loa blong yufala mo ol jaj blong yufala.

28 Mo nao i bin hapen se, taem we Amulek i bin talemaot ol toktok ia ol pipol oli bin singaot agensem hem, oli se: Nao mifala i save se man ia i wan

pikinini blong devel, from hem i bin giaman long mifala; from hem i bin toktok agensem loa blong yumi. Mo nao hem i talem se hem i no bin toktok agensem loa.

29 Mo bakegen, hem i bin toktok nogud agensem ol loa blong yumi, mo ol jaj blong yumi.

30 Mo i bin hapen se, ol loa oli bin putum samting ia long hat blong olgeta, blong bae oli tingbaot ol samting ia agensem hem.

31 Mo i bin gat wan long olgeta we nem blong hem i Siesrom. Hem i bin fasfala man blong toktok agensem Amulek mo Alma, hem i bin wan long olgeta nambawan man we i gat fulap save blong mekem samting, long medel blong olgeta, from hem i gat plante bisnes blong mekem long medel blong ol pipol.

32 Nao samting we ol loa ia oli bin wantem blong kasem, hem i blong kasem mane; mo oli bin kasem mane folem ol wok blong olgeta.

---

### JAPTA 11

---

*Oli talemaot fasin blong mane blong ol laen blong Nifae—Amulek i rao wetem Siesrom—Kraes bae i no sevem ol pipol long ol sin blong olgeta—Olgeta ia nomo we oli kasem kingdom blong heven bae oli sev—Evari man bae i girap long ded wetem wan bodi we i nomo save ded—I no gat ded afta laef bakegen. Raonabaot 82 yia bifo Kraes i bon.*



NAO i bin stap long loa blong Mosaea se evri man we i olsem wan jaj blong loa, o olgeta we oli stanemap olgeta blong kam jaj, oli nid blong kasem pei folem taem we oli bin wok blong jajem olgeta man we oli bin tekem olgeta i kam long fored blong olgeta, blong oli jajem olgeta.

2 Nao sapos wan man i letem wan narafala man i tekem wan samting blong hem, mo man ia i no bin pem bak wanem we hem i nidim blong pem bak, oli bin mekem komplem i go long jaj; mo jaj i yusum raet blong hem, mo i bin sendem ol man blong wok blong tekem man ia i kam long fored blong hem; mo hem i bin jajem man ia folem loa mo ol samting we i go agensem hem we oli bin karem i kam, mo afta oli fosem man ia blong pem samting we hem i nidim blong pem, o oli tekem ol samting blong hem, o oli sakemaot hem long medel blong olgeta pipol olsem wan stilman mo man blong stil.

3 Mo jaj i bin kasem pei blong hem folem taem blong hem—wan sinaen blong gol blong wan dei, o wan sinam blong silva, we i semak long wan sinaen blong gol; mo samting ia i folem loa we oli bin givim.

4 Nao hemia ol nem blong ol kaen pis blong gol blong olgeta, mo blong silva blong olgeta, folem praes blong olgeta. Mo ol man blong Nifae oli givim ol nem ia, from oli no kaontem folem fasin blong ol Jiu we oli stap long Jerusalem; mo tu oli

no skelem folem fasin blong ol Jiu; be oli bin jenisim ol fasin blong ol Jiu blong kaontem mo skelem samting, folem ol tingting mo ol ples blong ol pipol we oli stap long hem, long evri jeneresen, kasem taem blong rul blong ol jaj, we king Mosaea i bin stanemap olgeta.

5 Nao fasin blong kaontem i olsem ia nao—wan sinaen blong gol, wan sion blong gol, wan sam blong gol, mo wan limna blong gol.

6 Wan sinam blong silva, wan amno blong silva, wan esrom blong silva mo wan ontae blong silva.

7 Wan sinam blong silva i bin semak long wan sinaen blong gol, mo wanwan long tufala i praes blong wan basket blong sid blong bali, mo long evri kaen sid tu.

8 Nao praes blong wan sion blong gol i bin tutaem long praes blong maket blong wan sinaen.

9 Mo wan sam blong gol i bin tutaem praes blong maket blong wan sion.

10 Mo wan limna blong gol i bin praes blong maket blong olgeta evriwan.

11 Mo wan amno blong silva i bin bigwan olsem tu sinam.

12 Mo wan esrom blong silva i bin bigwan olsem fo sinam.

13 Mo wan ontae i bin bigwan olsem olgeta evriwan.

14 Nao hemia i fasin blong kaontem ol smolfala namba blong olgeta—

15 Wan siblon i wan haf blong wan sinam; taswe, wan siblon i

praes blong wan haf basket blong sid blong bali.

16 Mo wan siblam i wan haf blong wan siblon.

17 Mo wan lia i wan haf blong wan siblam.

18 Nao hemia ol namba blong olgeta, folem fasin blong kaontem blong olgeta.

19 Nao ia wan antion blong gol i semak long tri siblon.

20 Nao hem i from stamba tingting ia blong kasem pei, from oli bin kasem pei folem ol wok blong olgeta, taswe, oli bin mekem ol pipol oli mekem bigfala faet, mo evri kaen noes mo fasin nogud, blong oli save gat plante wok, blong oli save kasem mane folem ol komplén we kam long olgeta; taswe oli bin mekem ol man oli go agensem Alma mo Amulek.

21 Mo Siesrom ia i bin stat blong askem Amulek se: Yu save ansa long sam kwestin we bae mi askem yu? Nao Siesrom i bin wan man we i gat gudfala save long ol plan blong devel, blong hem i save smasem gud samting ia we i gud; taswe, hem i talem long Amulek: Bae yu save ansa long ol kwestin we bae mi askem yu?

22 Mo Amulek i bin talem long hem: Yes, sapos i folem Spirit blong Lod, we i stap long mi; from bae mi no save talem wan samting we i go agensem Spirit blong Lod. Mo Siesrom i bin talem long hem: Luk, hemia sikis ontae blong silva, mo bae mi givim evri samting ia long yu sapos yu talem se yu no

save God ia we paoa blong hem i Bigwan Tumas.

23 Nao Amulek i bin talem se: O yu pikinini blong hel, from wanem yu traem mi? Yu save se olgeta we i stret i no save foldaon long ol temtesen olsem ia?

24 Yu biliv se i no gat God? Mi talem long yu, No, yu save se i gat wan God, be yu laekem ol rij samting moa i bitim hem.

25 Mo nao yu bin giaman long fored blong God long mi. Yu bin talem long mi se—Luk ol sikis ontae ia, we praes blong olgeta i hae tumas, bae mi givim long yu—be insaed long hat blong yu, yu wantem blong holem taet olgeta long mi; mo hem i tingting blong yu nomo se bae mi talem se mi no save tru God we i stap laef, blong yu save gat wan stamba tingting blong smasem gud mi. Mo nao luk, from bigfala rabis samting ia bae yu kasem pei blong yu.

26 Mo Siesrom i bin talem long hem i: Yu talem se i gat wan tru God we i stap laef?

27 Mo Amulek i bin talem: Yes, i gat wan tru God we i stap laef.

28 Nao Siesrom i bin talem: I gat moa bitim wan God?

29 Mo hem i bin ansa, No.

30 Nao Siesrom i bin talem long hem bakegen: Olsem wanem nao yu save ol samting ia?

31 Mo hem i bin talem: Wan enjel i bin talemaot ol samting ia long mi.

32 Mo Siesrom i bin talem bakegen: Huia man ia we bae i kam? Hem i Pikinini blong God?

33 Mo hem i bin talem long hem, Yes.

34 Mo Siesrom i bin talem bakegen: Bae hem i sevem man blong hem long ol sin blong olgeta? Mo Amulek i bin ansa mo i talem long hem: Mi talem long yu se bae hem i no mekem olsem, from hem i no save tanem baksaed agensem toktok blong hem.

35 Nao Siesrom i bin talem long ol pipol se: Meksua se yufala i tingbaot ol samting ia, from hem i bin talem se i gat be wan God nomo; Be stil hem i bin talem se bae Pikinini blong God i kam, be bae hem i no sevem man blong hem—i olsem se hem i gat raet blong givim oda long God.

36 Nao Amulek i bin talem bakegen long hem: Luk yu bin giaman, from yu talem se mi bin toktok olsem se mi bin gat raet blong givim oda long God from mi bin talem se hem i no save sevem man blong hem long ol sin blong olgeta.

37 Mo mi talem long yu bakegen se hem i no save sevem olgeta long ol sin blong olgeta; from mi no save tanem baksaed long toktok blong hem, mo hem i bin talem se bae i no save gat wan samting we i doti i save kasem kingdom blong heven; taswe, olsem wanem nao yufala i save sev, sapos yufala i no kasem kingdom blong heven? Taswe, yufala i no save sev wetem ol sin blong yufala.

38 Nao Siesrom i bin talem long hem bakegen: I tru se Piki-

nini blong God i Papa ia we i no Save Finis?

39 Mo Amulek i bin talem long hem: Yes, hem i Papa ia we i no Save Finis blong heven mo blong wol, mo evri samting we i stap long olgeta; hem i stat mo i en, faswan mo laswan;

40 Mo bae hem i kam long wol blong pemaot ol pipol blong hem, mo bae hem i tekem long hem ol sin blong olgeta we oli biliv long nem blong hem; mo olgeta ia oli olgeta we bae oli kasem laef we i no save finis, mo fasin blong sevem man i no kam long wan narafala man.

41 Taswe ol nogud man bae oli stap nomo olsem se fasin blong pemaot man i no bin hapen, hemia nomo sapos ol rop blong ded i no kam lus; from luk, dei i kam we bae evriwan oli kamaot long ded mo stanap long fes blong God, mo blong hem i jajem olgeta long saed blong ol wok blong olgeta.

42 Nao, i gat wan ded we oli singaotem ded blong bodi; mo ded blong Kraes bae i tekemaot ol rop blong ded ia blong bodi, blong mekem se evriwan bae i girap long ded ia blong bodi.

43 Spirit mo bodi bae oli kam tugeta bakegen long stret fom blong hem, ol han, ol leg mo ol joen bae oli kam tugeta bakegen long ol stret ples blong olgeta, olsem we yumi stap naoia long taem ia; mo bae oli karem yumi i kam stanap long fored blong God, bae yumi save olsem we yumi save naoia, mo gat wan klia save blong ol rong blong yumi.

44 Nao, kambak ia bae i hapen long evriwan, ol olfala tugeta wetem ol yangfala, ol slef tugeta wetem olgeta we oli fri, ol man tugeta wetem ol woman, ol nogud man tugeta wetem olgeta we i stret; mo tu bae i no save gat wan pis hea blong wan wan hed blong olgeta we i lus; be evri samting bae i kambak long ol stret ples blong olgeta, olsem naoia, o long bodi, mo bae oli tekem olgeta mo oli kolem olgeta blong ansa long fored blong kot blong Kraes Pikinini, mo God Papa, mo Tabu Spirit, we i wan God we i no Save Finis, blong oli jajem olgeta folem ol wok blong olgeta sapos oli gud o sapos oli nogud.

45 Nao, luk, mi bin toktok long yufala long saed blong ded blong bodi blong wol mo tu long saed blong laef bakegen blong bodi blong wol. Mi talem long yufala se, bodi blong wol ia bae i girap long wan bodi we i nomo save ded, hemia aot long ded, we i long fassala ded i kam long laef, blong oli nomo save ded; spirit blong olgeta bae i go joenem bodi blong olgeta, mo bae oli nomo save seraot; olsem ia nao fulwan i kam blong spirit mo oli nomo save ded, blong mekem se oli nomo save lukim taem we bodi blong olgeta i kam roten.

46 Nao, taem we Amulek i bin finisim ol toktok ia ol pipol oli bin stat bakegen blong sapraes, mo tu Siesrom i bin stat blong seksek. Mo olsem ia nao ol toktok blong Amulek i bin finis, o

hemia nomo ol samting we mi bin raetem.

---

## JAPTA 12

---

*Alma i rao wetem Siesrom—God i save givim ol sikret blong Hem long olgeta nomo we oli stap holem taet fet—God i jajem ol man long ol tingting blong olgeta, ol bilif, ol toktok, mo ol wok—Ol nogud man bae oli harem nogud long ded blong spirit—Laef ia blong wol i wan ples blong tes—Plan blong fasin blong pemaot man hem i mekem se laef bakegen i hapen mo, tru long fet, oli kam klin from ol sin—Man we i sakem sin i save kasem sore tru long Wan Pikinini Nomo. Raonabaot 82 yia bifo Kraes i bon.*

NAO Alma, from hem i luk se ol toktok blong Amulek i bin mekem Siesrom i nomo toktok, from hem i bin luk se Amulek i bin kasem hem long ol giaman toktok blong hem mo long ol fasin blong trikim man blong smasem gud hem, mo hem i luk se hem i bin stat blong seksek from hem i save stret ol rong blong hem we oli kontrolem hem, hem i bin openem maot blong hem mo hem i bin stat blong toktok long hem, mo blong sapotem ol toktok blong Amulek, mo blong eksplenem ol samting we i go lelebet moa, mo blong eksplenem ol skripja we oli go lelebet moa bitim we Amulek i bin mekem.

2 Nao ol toktok we Alma i bin talemaot long Siesrom, ol pipol we oli bin stap raonabaot i

bin harem; from i bin gat plante pipol, mo hem i bin toktok long fasin ia nao:

3 Nao Siesrom, yu luk se oli bin kasem yu long giaman blong yu mo long fasin ia blong stap giaman, from yu no bin giaman nomo long ol man be yu bin giaman long God; From luk, hem i save evri tingting blong yufala mo yu luk se mifala i save ol tingting blong yu tru long Spirit blong hem;

4 Mo yu luk se mifala i save se yu bin haedem gud plan blong yu, folem fasin blong haedem gud blong devel, blong i save giaman mo blong trikim ol pipol ia, blong yu save mekem olgeta i go agensem mitufala, blong tok nogud long mitufala mo blong sakemaot mitufala —

5 Nao hemia i bin wan plan blong enemi blong yu, mo hem i bin yusum paoa blong hem long yu. Nao mi wantem se yu tingbaot se wanem we mi talem long yu, mi talem long evriwan.

6 Mo luk mi talem long yufala evriwan, se samting ia i bin wan trap blong enemi, we hem i bin putum blong kasem ol pipol ia, blong hem i save karem yufala i kam long hem mo kontrolem yufala, blong hem i save raonem yufala wetem ol jen blong hem, blong hem i save fasem yufala blong yufala i lus, long taem we i no gat en, folem paoa blong hem blong putum man long kalabus.

7 Nao taem Alma i bin talem-aot ol toktok ia, Siesrom i bin stat blong seksek moa bigwan, from hem i bin luk save moa

mo moa long saed blong paoa blong God; mo tu hem i bin luk save se Alma mo Amulek oli bin save long saed blong hem, from hem i bin luk save tru we oli bin save ol tingting mo ol samting we hat blong hem i bin wantem blong mekem; from oli bin givim paoa long olgeta blong oli save ol samting ia folem spirit blong profesi.

8 Mo Siesrom i bin stat blong askem olgeta gud, blong hem i save kasem moa save long saed blong kingdom blong God. Mo hem i bin talem long Alma: Wanem ia mining blong ol toktok we Amulek i bin talem long saed blong laef bakegen blong ol ded, se evriwan bae i girap long ded, ol stret man tugeta wetem ol nogud man, mo bae oli tekem olgeta oli kam stanap long fored blong God blong hem i jajem olgeta folem ol wok blong olgeta?

9 Mo nao Alma i bin stat blong eksplenem ol samting ia long hem, se: Oli givim long plante blong save ol sikret blong God; Be oli givim long olgeta wan strong komanmen, blong oli talemaot nomo wan pat long saed blong toktok blong hem, we hem i bin letem long ol pikinini blong ol man, folem fasin blong folem gud mo wokhad oltaem we oli givim long hem.

10 Mo taswe man we bae i mekem hat blong hem i kam strong, semfala man ia i kasem moa smolfala pat blong trutok; mo man we bae i no mekem hat blong hem i kam strong, bae oli givim bigfala pat blong trutok

long hem, kasem taem we oli givim long hem blong save ol sikret blong God kasem taem we hem i save fulwan long olgeta.

11 Mo olgeta we bae oli mekem hat blong olgeta i strong, bae oli givim long olgeta moa smol pat blong trutok kasem taem we oli no save wan samting long saed blong ol sikret blong hem; mo afta devel bae i tekem olgeta olsem prisena, mo i lidim olgeta folem tingting blong hem, i go lus. Nao hemia mining blong ol jen blong hel.

12 Mo Amulek i bin toktok long wan klia fasin long saed blong ded, mo girap long ded ia mo nomo save ded bakegen, mo kam stanap long fored blong kot blong God blong hem i jajem yumi folem ol wok blong yumi.

13 Afta sapos yumi bin mekem hat blong yumi i kam strong, yes, sapos yumi bin mekem hat blong yumi i kam strong agensem truktok, inaf blong mekem se God i no bin faenem trutok long yumi, afta bae yumi stap long wan ples we i rabis, from afta bae oli panisim yumi.

14 From ol tok tok blong yumi bae i go agensem yumi, yes, ol wok blong yumi bae i go agensem yumi; bae oli no save faenem se i gat mak long yumi, mo tu ol tingting blong yumi bae i go agensem yumi; mo long rabis ples ia bae yumi no save gat fasin blong no fraet blong lukluk antap long God blong yumi; mo bae yumi glad plante blong talem long ol ston mo ol bigfala hil blong foldaon long

yumi blong haedem yumi long fes blong hem.

15 Be i no save hapen; yumi mas kam aot long mo stanap long fes blong hem, long glori blong hem, mo long paoa blong hem, mo long bigfala fos blong hem, i hae, mo rul, mo talem long saed blong ol sem blong yumi we i no save finis, mo we evri jajmen blong hem i stret; we hem i stret long evri wok blong hem, mo we hem i gat sore long ol pikinini blong ol man, mo we hem i gat evri paoa blong sevem evri man we oli biliv long nem blong hem, mo oli karem i kam frut ia we i soem se oli wantem blong sakem sin.

16 Mo nao luk, mi talem long yufala se ale i gat wan ded i kam, we i wan nambatu ded, we i ded blong spirit; ale i wan taem we eni man we i ded long ol sin blong hem, long saed blong ded blong bodi, bae i ded long spirit tu; yes, bae hem i ded long ol samting we i blong stret fasin.

17 Ale hem i taem we ol harem nogud blong olgeta bae i olsem wan lek blong faea mo salfa, we i stap go antap we i no gat en mo i no save finis; mo ale hem i taem we bae oli jenem olgeta daon long wan ded we i no gat en, folem paoa mo fasin ia blong Setan blong putum man long kalabus, from hem i bin kontrolem olgeta folem fasin blong hem.

18 Ale, mi talem long yufala, bae oli stap olsem se fasin blong pemaot man i no bin hapen; from oli no save pemaot olgeta

folem jastis blong God; mo oli no save ded, from i nomo gat roten.

19 Nao i hapen se, taem we Alma i bin finis blong talem ol toktok ia, ol pipol oli bin stat blong sapraes plante moa;

20 Be i bin gat wan man we nem blong hem i Antiona, we i bin wan jif blong rul long olgeta, i bin kam fored mo i bin talem long hem se: Wanem mining blong toktok ia we yu bin talem, se bae man i girap long ded mo bae i jenis long bodi ia i go long wan bodi we i nomo save ded, se sol i no save ded?

21 Skripja i minim wanem, we i talem se God i bin putum ol jerubim blong gad mo wan naef blong faet we i gat faea long hem long is blong garen blong Iden, blong mekem se fASFala papa mo mama blong yumi i no go insaed mo kakae frut blong tri blong laef, mo stap laef long oltaem? Mo olsem ia nao yumi luk se i no gat wan janis blong oli save stap laef long oltaem.

22 Nao Alma i bin talem long hem: Hemia i samting we mi stap rere blong eksplenem. Nao yumi luk se Adam i bin foldaon taem hem i bin kakae frut ia we i no blong kakae, folem toktok blong God; mo olsem ia nao yumi luk se from hem i bin foldaon, evri man i bin kam wan pipol we oli bin lus mo oli bin foldaon.

23 Mo nao luk, mi talem long yufala se sapos hem i bin save gat janis blong Adam blong kakae frut blong tri blong laef long taem ia, bae i no save gat

ded, mo trutok bae i kam no gud, i mekem se God i wan giaman man, from hem i bin talem: Sapos yu kakae bae yu mas ded.

24 Mo yumi luk se ded i kam long evri man, yes, ded ia we Amulek i bin tokbaot, we hem i ded blong bodi; be oli letem wan taem long man blong i save sakem sin; taswe laef ia i bin kam wan ples blong tes; wan taem blong mekem rere blong mitim God, wan taem blong mekem rere blong ples ia we i no gat en, we mitufala i bin tokbaot, we i kam afta long laef bakegen blong ol ded.

25 Nao, sapos i no bin from plan blong fasin blong pemaot man, we oli bin mekem i rere stat long taem we wol i bin stat, bae man i no save kam laef bakegen long ded; be i gat wan plan blong fasin blong pemaot man we oli bin mekem i rere, we bae i mekem man i kam laef bakegen long ded, ded ia we mitufala i bin tokbaot.

26 Mo nao luk, sapos i bin save gat janis blong fASFala papa mo mama blong yumi se oli bin save go mo kakae frut blong tri blong laef, bae oli no bin hapi mo i no gat en long samting ia, from i no gat wan ples blong tes; mo olsem ia nao plan blong fasin blong pemaot man bae i no bin save hapen, mo toktok blong God bae i no bin gat yus, from i no bin wok.

27 Be luk, i no bin olsem ia; be God i bin givim long ol man se bae oli mas ded; mo afta ded, bae oli kam long jajmen, we i

semfala jajmen ia we mitufala i bin tokbaot, we hem i en.

28 Mo afta God i bin givim ol samting ia we bae i kam long ol man, luk, afta hem i bin luk se i gud blong ol man bae oli save ol samting ia we hem i bin givim long olgeta;

29 Taswe hem i bin sendem ol enjel blong toktok wetem olgeta we oli bin mekem ol man blong luk glori blong hem.

30 Mo oli bin stat long taem ia i go, blong prea long nem blong hem; taswe God i bin toktok wetem ol man, mo i bin mekem olgeta oli save plan blong fasin blong pemaot man, we i bin rere stat long taem we wol i bin stat; mo hem i bin mekem olgeta oli save samting ia folem fet blong olgeta mo fasin blong sakem sin mo ol tabu wok blong olgeta.

31 From samting ia, hem i bin givim ol komanmen long ol man, from oli bin brekem ol fasfala komanmen long saed blong ol samting blong wol ia, mo oli bin kam olsem ol god, oli save gudfala samting aot long rabis samting, oli putum olgeta long wan ples blong wok, o God i putum olgeta long wan ples we oli save wok folem tingting blong olgeta mo samting we oli wantem, sapos oli wantem mekem i nogud o gud—

32 Taswe God i bin givim long olgeta ol komanmen, afta we hem i bin mekem olgeta oli save plan blong fasin blong pemaot man, blong bae oli no mekem rabis fasin, panis blong

samting ia hem i nambatu ded, we i wan ded we i no gat en, long saed blong ol stret fasin; from plan blong fasin blong pemaot man i no save gat paoa, from ol wok blong jastis i no save smasem gud, folem gudfala fasin blong God we i bigwan tumas.

33 Be God i bin singaotem ol man, long nem blong Pikinini blong hem (hemia i plan blong fasin blong pemaot man we i bin rere) i talem: Sapos yufala i sakem sin mo yufala i no mekem hat blong yufala i kam strong, ale bae mi gat sore long yufala, tru long Wan Pikinini Nomo blong mi.

34 Taswe, eni man we i sakem sin, mo i no mekem hat blong hem i kam strong, bae i gat raet blong kasem sore tru long Wan Pikinini Nomo blong mi, mekem se hem i save kam klin aot long ol sin blong hem; mo olgeta ia bae oli go insaed long kingdom blong mi.

35 Mo eni man we bae i mekem hat blong hem i kam strong, mo bae i mekem ol rabis fasin, luk, mi talem stret long kros blong mi se hem bae i no go insaed long kingdom blong mi.

36 Mo nao, ol brata blong mi, luk mi talem long yufala se, sapos yufala i mekem ol hat blong yufala i kam strong, bae yufala i no save go insaed long kingdom blong Lod; taswe, ol rabis fasin blong yufala oli stikim hem blong hem i sendem daon kros blong hem long yufala, olsem long fasfala taem we man i bin stikim hem, yes,



folem toktok blong hem long las taem we man i bin stikim hem, olsem long faszala taem, blong smasem gud ol sol blong yufala kasem taem we i no gat en; taswe, folem toktok blong hem, i go kasem lasfala ded, semak wetem faszala ded.

37 Mo nao, ol brata blong mi, from se yumi save ol samting ia, mo oli tru, bae yumi sakem sin, mo yumi no mekem ol hat blong yumi i kam strong, blong yumi no mekem Lod, God blong yumi, blong pulum daon kros blong hem long yumi long nambatu komanmen ia blong hem, we hem i bin givim long yumi; be bae yumi go insaed long kingdom blong God we hem i rere i stap, folem toktok blong hem.

---

### JAPTA 13

---

*Oli bin singaotem ol man blong kam hae pris from fet blong olgeta i bigwan tumas mo ol wok blong olgeta oli gud—Oli mas tijim ol komanmen—Tru long stret fasin oli mekem olgeta i kam klin aot long ol sin mo oli go insaed long kingdom blong Lod—Melkisedek i bin wan long olgeta ia—Ol enjel oli stap talemaot ol gudfala nius long evri ples long graon—Bae oli talemaot se Kraes bae i kam. Raonabaot 82 yia bifo Kraes i bon.*

Mo bakegen, ol brata blong mi, mi wantem blong tekem tingting blong yufala i gobak long taem we Lod God i bin givim ol komanmen ia long ol pikinini blong hem; mo mi wantem se

yufala i tingbaot se Lod God i bin odenem ol pris, folem tabu oda blong hem, we i bin folem oda blong Pikinini blong hem, blong tijim ol samting ia long ol pipol.

2 Mo oli bin odenem ol pris ia folem oda blong Pikinini blong hem, long wan fasin we, tru long wei ia, ol pipol oli save long wanem fasin blong lukluk long taem we Pikinini blong hem bae i pemaot olgeta.

3 Mo hemia fasin we oli bin odenem olgeta—oli bin singaotem olgeta mo mekem olgeta i rere stat long taem we wol i bin stat folem save blong God we hem i gat finis, from fet blong olgeta i bigwan tumas mo ol wok blong olgeta oli gud; long stat, oli bin livim olgeta blong jusum gud o nogud; taswe from oli bin jusum gud, mo oli yusum fet we i bigfala tumas, oli singaotem olgeta wetem wan tabu koling, yes, wetem tabu koling ia we i bin rere wetem, mo folem wan fasin blong pemaot man we i rere i stap finis blong ol man ia.

4 Mo olsem ia nao oli bin singaotem olgeta long tabu koling ia from fet blong olgeta, taem we ol narawan bae oli sakemaot Spirit blong God, from ol hat blong olgeta i strong, mo tingting blong olgeta i blaen, taem we, sapos hem i no bin from samting ia, maet oli bin gat ol bigfala raet olsem ol brata blong olgeta.

5 O blong endem, long fas taem oli bin stap semak wetem ol brata blong olgeta; olsem ia

nao oli bin mekem rere tabu koling ia stat long taem we wol i bin stat, blong olgeta ia we bae oli no mekem hat blong olgeta i kam strong, hem i from mo tru atonmen blong Wan Pikinini Nomo, we oli bin mekem i rere —

6 Mo olsem ia nao oli bin singaotem olgeta tru long tabu koling ia, mo oli bin odenem olgeta long hae prishud blong tabu oda blong God, blong tijim ol komanmen blong hem long ol pikinini blong ol man, blong olgeta tu i save go insaed long kingdom blong hem —

7 Hae prishud ia i folem oda blong Pikinini blong hem, we oda ia i bin stap stat long taem we wol i bin stat; o long nara-fala toktok, i no gat stat blong ol dei o en blong ol yia, oli bin mekem i rere stat long wan taem we i no save finis i go long evri taem we i no save finis, folem save blong hem we i gat finis long saed blong evri samting —

8 Oli bin odenem olgeta long fasin ia nao — oli bin singaotem olgeta wetem wan tabu koling mo oli bin odenem olgeta wetem wan tabu odinens, mo oli bin tekem long olgeta hae prishud blong tabu oda, we koling, mo odinens, mo hae prishud, i no gat stat o en —

9 Olsem ia nao oli kam ol hae pris blong oltaem, folem oda blong Pikinini, Wan Pikinini Nomo blong Papa, we i no gat stat blong ol dei o en blong ol yia, we i fulap long gladhat, jastis, mo trutok. Mo i olsem ia nao. Amen.

10 Nao, olsem we mi bin talem long saed blong tabu oda, o hae prishud ia, i gat plante we oli bin odenem olgeta mo oli bin kam ol hae pris blong God; mo hem i from bigfala fet blong olgeta mo fasin blong sakem sin, mo blong stret fasin blong olgeta long fored blong God, oli bin jusum blong sakem sin mo mekem wok we i stret, oli no bin jusum blong kasem ded;

11 Taswe oli bin singaotem olgeta long tabu oda ia, mo oli bin mekem olgeta oli klin aot long ol sin, mo oli bin wasem ol klos blong olgeta i kam waet tru long blad blong Smol Sipsip.

12 Nao olgeta, afta we oli bin mekem olgeta oli klin aot long ol sin tru long Tabu Spirit, ol klos blong olgeta oli bin kam waet, oli bin klin mo oli no gat mak long fored blong God, oli no bin save luk sin sapos oli no gat fasin blong no laekem; mo i bin gat plante man, plante we plante tumas, we oli bin kam klin mo oli bin go insaed long kingdom blong Lod, God blong olgeta.

13 Mo nao, ol brata blong mi, mi wantem yufala blong putum tingting blong yufala i stap daon long fored blong God, mo karem i kam ol frut ia we i soem se oli wantem blong sakem sin, blong yufala tu i save go insaed long kingdom blong hem.

14 Yes, putum tingting blong yufala daon olsem we ol pipol long ol dei blong Melkisedek, we i bin wan hae pris tu folem semfala oda ia we mi bin

tokbaot, we tu hem i bin kasem hae prishud blong oltaem.

15 Mo hem i semfala Melkisedek ia we long hem Ebrahim i bin pem taeting; yes, we hem i papa blong yumi Ebrahim, hem i bin pem wan ten long evri samting we hem i bin gat olsem taeting blong hem .

16 Nao ol odinens ia oli bin givim olgeta long fasin ia, blong wei ia ol pipol oli save luk fored long Pikinini blong God, hem i bin wan kaen samting blong oda blong hem, o hem i bin oda blong hem, mo samting ia blong oli save luk fored long hem blong kam klin aot long ol sin blong olgeta, blong oli save go insaed long kingdom blong Lod.

17 Nao Melkisedek ia i bin king blong graon blong Salem; mo ol man blong hem i bin kam strong long rabis fasin mo ol rabis sin; yes, olgeta evriwan i bin lego ol gudfala rod; oli bin fulap long evri kaen fasin nogud;

18 Be Melkisedek from hem i bin yusum bigfala fet, mo hem i bin kasem wok blong hae prishud folem tabu oda blong God, i bin prijim fasin blong sakem sin long ol pipol blong hem. Mo luk, oli bin sakem sin; mo Melkisedek i bin stanemap pis long graon long ol dei blong hem; taswe, oli bin singaotem hem boe blong king blong pis, from hem i bin king blong Salem; mo hem i bin rul andanit long papa blong hem.

19 Nao, i bin gat plante bifo long hem, mo tu i bin gat plante afta, be i no gat wan we i moa

hae long hem; taswe, oli bin tokbaot hem moa fulap.

20 Nao mi no nid blong talem bak samting ia; wanem we mi bin talem, bae i inaf. Luk, ol skripja i stap long fored blong yufala; sapos yufala i twistim mining blong olgeta, bae i smasem gud yufala bakegen.

21 Mo nao i bin hapen se, taem we Alma i bin talem ol toktok ia long olgeta, hem i bin stretem han blong hem long olgeta mo i bin singaot wetem wan strong voes, se: Naoia hem i taem blong sakem sin, from dei blong fasin blong sevem man i kam klosap.

22 Yes, mo voes blong Lod, tru long maot blong ol enjel, i talemaot samting ia long evri kantri; yes, i talemaot samting ia, blong oli save gat ol gudfala nius blong bigfala glad; yes, hem i talemaot ol gudfala nius ia long evri pipol, yes, long olgeta tu we oli bin seraot i go olbaot long fes blong wol; from samting ia oli bin kam long yumi.

23 Mo oli bin talemaot long yumi long wan klia fasin, blong yumi save haremsave, blong yumi no save mestem; mo samting ia from yumi stap wokbaot olbaot long wan graon we yumi no save; taswe, Lod i laekem yumi plante tumas, from yumi gat ol gudfala nius ia we oli stap talemaot long yumi long evri pat blong plantesen blong rop blong grep blong yumi.

24 From luk, ol enjel oli stap talemaot samting ia long plante man, naoia long graon blong yumi; mo hem i stamba ting-

ting ia blong mekem rere ol hat blong ol pikinini blong ol man blong kasem toktok blong hem, long taem we bae hem i kam long glori blong hem.

25 Mo nao yumi wet nomo blong harem ol gudfala nius we bae oli talemaot long yumi tru long maot blong ol enjel, long saed blong taem we bae hem i kam; from taem i kam, yumi no save se i klosap olsem wanem. Mi wantem tumas long God se i save hapen long dei blong mi; be sapos hem i naoia o sam dei afta, bae mi hapi long samting ia.

26 Mo bae oli mekem ol man we oli gud mo oli tabu oli save, tru long maot blong ol enjel, long taem we hem i kam long hem, blong ol toktok blong ol bubu blong yumi oli save hapen, folem samting ia we oli bin tokbaot long saed blong hem, we i bin folem spirit blong profesi we i bin stap long olgeta.

27 Mo nao, ol brata blong mi, mi wantem wetem ful hat blong mi, yes, wetem wan bigfala wari we i mekem mi soa, se bae yufala i lisen long ol toktok blong mi, mo sakemaot ol sin blong yufala, mo no pusem bak dei blong sakem ol sin blong yufala;

28 Be se, bae yufala i putum tingting blong yufala i stap daon long fes blong Lod, mo prea long tabu nem blong hem, mo lukaot mo prea oltaem, blong oli no save temptem yufala i bitim mak ia we yufala i save fesem, mo olsem ia nao oli lidim yufala tru long Tabu Spirit, mo bae yufala i kam blong putum

tingting blong yufala i stap daon, no stap flas, lego tingting blong yufala blong folem tingting blong narafala man, save wet, fulap long lav mo save go tru long ol hadtaem wetem longfala tingting;

29 Mo gat fet long Lod; mo gat wan hop blong yufala i save kasem laef we i no save finis; mo gat lav blong God oltaem long hat blong yufala, blong oli save leftemap yufala long las dei mo go insaed long kingdom blong hem.

30 Mo bae Lod i givim long yufala fasin ia blong sakem sin, blong yufala i no save mekem kros blong hem i kam daon long yufala, blong bae oli no fasem daon yufala wetem ol jen blong hel, blong yufala i no save harem nogud long nambatu ded.

31 Mo Alma i bin talemaot plante moa toktok long ol pipol, we oli no raetem olgeta long buk ia.

---

#### JAPTA 14

---

*Oli putum Alma mo Amulek long kalabus mo oli faetem tufala—Oli bonem olgeta we oli biliv mo oli sakem ol tabu skripja i go long faea—Olgeta ia we oli go tru long ded, Lod i kasem olgeta long glori—Ol wol blong kalabus oli brok mo oli foldaon—Oli mekem Alma mo Amulek oli go fri, mo olgeta ia we i givim hadtaem long tufala, oli kilim olgeta i ded. Raonabaot 82–81 yia bifo Kraes i bon.*

Mo i bin hapen se afta hem i bin

finis blong toktok long ol pipol, plante long olgeta i bin biliv long ol toktok blong hem, mo oli bin stat blong sakem sin, mo blong stadi gud long ol skripja.

2 Be moa bigfala pat blong olgeta i bin wantem blong oli save kilim Alma mo Amulek i ded; from oli kros long Alma, from long ol klia toktok blong hem long Siesrom; mo tu oli bin talem se Amulek i bin giaman long olgeta, mo hem i bin toktok nogud agensem loa blong olgeta, mo tu agensem ol loa blong olgeta mo ol jaj blong olgeta.

3 Mo tu oli bin kros long Alma mo Amulek; mo from oli bin toktok long wan klia fasin agensem ol fasin nogud blong olgeta, oli bin lukaotem wan wei blong kilim ded tufala long sikret.

4 Be i bin hapen se oli no bin mekem olsem; be oli bin tekem tufala mo fasem tufala wetem ol strong rop, mo oli bin tekem tufala i go stanap long fored blong jif jaj blong graon.

5 Mo ol pipol i bin go fored mo oli bin witnes agensem tufala— oli bin testifae se oli bin toktok nogud agensem loa, mo ol loa blong olgeta mo ol jaj blong graon, mo tu long evri pipol we oli stap long graon; mo tu se Alma mo Amulek i bin testifae se i gat be wan God, mo se bae hem i sendem Pikinini blong hem i kam long medel blong ol pipol, be bae hem i no sevem olgeta; mo plante samting olsem ol pipol i bin testifae agensem Alma mo Amulek. Nao oli mekem samting ia long fored blong jif jaj blong graon.

6 Mo i bin hapen se Siesrom i bin sapraes long ol toktok we oli bin talemaot; mo tu hem i bin save long saed blong ol tingting we i blaen, we hem i bin mekem long ol pipol tru long ol giaman toktok blong hem; mo sol blong hem i bin stat blong harem nogud long ol save blong ol rong blong hem; yes, ol soa blong hel i stat blong raonem hem.

7 Mo i bin hapen se hem i bin stat blong toktok strong long ol pipol, i talem: Luk, mi mi rong, mo ol man ia oli klin gud long fes blong God. Mo hem i bin stat blong toktok strong from tufala stat long taem ia i go; be oli bin toktok agensem hem, oli se: Devel tu i stap long yu? Mo oli bin spet long hem, mo oli bin sakemaot hem aot long olgeta, mo tu olgeta evriwan we oli bin biliv long ol toktok we Alma mo Amulek i bin talemaot; Mo oli bin sakemaot olgeta, mo oli bin sendem ol man blong sakem ston long olgeta.

8 Mo oli bin karem i kam tugeta ol woman mo ol pikinini blong olgeta, mo olgeta evriwan we oli bin biliv o oli bin tijim olgeta blong biliv long toktok blong God, oli bin mekem se oli sakem olgeta i go long faea; mo tu oli bin karem i kam ol histri blong olgeta we i bin gat ol tabu skripja, mo sakem olgeta i go long faea tu blong oli save bon, mo faea i smasem gud olgeta gud.

9 Mo i bin hapen se oli bin tekem Alma mo Amulek, mo oli bin tekem tufala i go long ples

blong kilim man i ded, blong oli save witnesem ded blong olgeta we faea i bin bonem olgeta.

10 Mo taem we Amulek i luk ol soa blong ol woman mo ol pikinini we faea i stap bonem olgeta, hem tu i bin harem i soa, mo hem i bin talem long Alma: Olsem wanem nao yumitu save witnesem rabis samting ia? Taswe, bae yumi stretem han blong yumi, mo yusum paoa blong God we i stap long yumi, mo sevem olgeta long ol flem.

11 Be Alma i bin talem long hem: Spirit i holem mi blong mi no mas stretem han blong mi, from luk, Lod i tekem olgeta long hem bakegen, long glori; mo hem i letem se oli save mekem samting ia, o blong ol pipol oli save mekem samting ia long olgeta, folem strong blong hat blong olgeta, se ol jajmen we bae hem i yusum long olgeta long kros blong hem i save stret; mo blad blong olgeta we oli no gat rong bae i stanap olsem wan witnes agensem olgeta, yes, mo talemaot strong agensem olgeta long las dei.

12 Nao Amulek i bin talem long Alma: Luk, maet bae oli bonem yumitu.

13 Mo Alma i bin talem: Letem i hapen folem tingting blong Lod. Be, luk, wok blong yumitu i no finis yet; taswe bae oli no bonem yumitu.

14 Nao i bin hapen se taem we ol bodi blong olgeta we oli bin sakem olgeta i go long faea i bin bon evriwan, mo tu ol histri we oli bin sakem long faea wetem olgeta, jif jaj blong

graon i bin kam mo i bin stanap long fored blong Alma mo Amulek, taem we oli stap fasem tufala; mo hem i bin slapem tufala wetem han blong hem long saed blong fes blong tufala, mo i bin talem long tufala: Afta wanem yutufala i bin luk, bae yutufala i prii bakegen long ol pipol ia, se bae Lod i sakem olgeta i go long wan lek blong faea mo salfa?

15 Luk, yutufala i luk se yutufala i no bin gat paoa blong sevem olgeta ia we oli bin sakem olgeta i go long faea; mo tu God i no bin sevem olgeta from oli blong fet blong yutufala. Mo jaj i bin slapem tufala bakegen long saed blong fes blong tufala, mo i bin askem: Yutufala i talem wanem blong sapotem yutufala?

16 Nao jaj ia i bin folem oda mo fet blong Nehor we i bin kilim ded Gidion.

17 Mo i bin hapen se Alma mo Amulek tufala i no bin ansa long hem, mo hem i bin slapem tufala bakegen, mo i bin givim tufala i go long ol ofisa blong sakem tufala i go long kalabus.

18 Mo taem we oli bin sakem tufala i go long kalabus mo oli bin stap tri dei, plante loea mo ol jaj, mo ol pris, mo ol tija, we bilif blong olgeta oli olsem Nehor i bin kam; mo oli bin kam insaed long kalabus blong luk tufala, mo oli bin askem ol kwestin long tufala long saed blong plante toktok; be tufala i no bin ansa nating long olgeta.

19 Mo i bin hapen se jaj i bin stanap long fored blong

tufala, mo i talem: From wanem yutufala i no ansa long ol toktok blong ol pipol ia? Yutufala i no save se mi gat paoa blong sakem yutufala i go long ol flem? Mo hem i bin givim oda long yutufala blong toktok; be oli no bin ansa nating.

20 Mo i bin hapen se oli bin aot mo oli bin go long wan wan rod blong olgeta, be oli bin kambak bakegen long nekis dei; mo tu jaj i bin slapem tufala bakegen long saed blong fes blong tufala. Mo plante i bin kam fored tu, mo oli bin slapem tufala, oli se: Bae yutufala i stanap bakegen mo jajem pipol ia, mo toktok agensem loa blong mifala? Sapos yutufala i gat wan bigfala paoa, from wanem yutufala i no mekem yutufala i go fri?

21 Mo oli bin talem plante samting olsem ia long tufala, oli kakae tut i go long tufala, mo oli spet long tufala, mo oli se: Bae mifala i luk olsem wanem taem we devel i kontrolem mifala?

22 Mo plante samting olsem, yes, oli bin talem evri kaen samting olsem long tufala; mo olsem ia nao oli bin jikim tufala blong plante dei. Mo oli bin holembak kakae long tufala blong tufala i save hanggri, mo wota blong mekem se tufala i save tosta; mo tu oli bin tekem aot ol klos blong tufala, mekem se tufala i bin neked; mo olsem ia nao oli bin fasem tufala wetem ol strong rop mo oli lokemap tufala long kalabus.

23 Mo i bin hapen se afta we oli

bin harem nogud olsem blong plante dei, (mo hem i long namba twelef dei long nambaten manis, long nambaten yia blong rul blong ol jaj long ol pipol blong Nifae) se jif jaj we i rulum graon blong Amonaeha mo plante long ol tija long olgeta mo ol loa blong olgeta, oli bin go long kalabus we oli bin fasem Alma mo Amulek wetem ol rop.

24 Mo jif jaj i bin stanap long fored blong tufala mo i bin slapem tufala bakegen, mo i bin talem long tufala: Sapos yutufala i gat paoa blong God, mekem yutufala i go fri long ol rop ia, mo afta bae mifala i biliv se Lod bae i kilim ol pipol ia folem ol toktok blong yutufala.

25 Mo i bin hapen se olgeta evriwan oli bin go fored mo oli slapem tufala, mo oli bin talem ol semfala toktok, go kasem laswan; mo taem we laswan i bin toktok long tufala, paoa blong God i bin kam long Alma mo Amulek, mo tufala i bin girap mo stanap long leg blong tufala.

26 Mo Alma i bin prea se: Hamas taem moa bae mitufala i harem nogud long ol bigfala hadtaem ia, O Lod? O Lod givim paoa long mitufala folem fet blong mitufala we i stap long Kraes, go kasem taem we mitufala i go fri. Mo oli bin brekem ol rop we oli bin fasem tufala wetem; mo taem we ol pipol i bin luk samting ia, oli bin stat blong ronwe, from fraet blong ded i bin kasem olgeta.

27 Mo i bin hapen se fraet blong olgeta i bigwan tumas, mekem nao oli bin foldaon long graon, mo oli no bin kasem do ia we i blong kamaot long kalabus; mo graon i bin seksek bigwan tumas, mo ol wol blong kalabus i bin brokbrok long tu, mekem se oli bin foldaon long graon; mo jif jaj, mo ol loea, mo ol pris, mo ol tija, we i bin slapem Alma mo Amulek, oli bin ded taem we ol wol blong kalabus i bin foldaon.

28 Mo Alma mo Amulek i bin kamaot long kalabus, mo oli no bin kasem wan kil; from Lod i bin givim paoa long tufala, folem fet blong tufala we i bin stap long Kraes. Mo tufala i bin kamaot kwiktaem nomo long kalabus; mo ol rop i bin kamaot long tufala, mo kalabus i bin foldaon long graon mo evri sol we i bin stap insaed long ol wol blong kalabus, oli ded be Alma mo Amulek nomo oli laef; mo tufala i kamaot kwiktaem nomo long bigtaon.

29 Nao taem we ol pipol oli bin harem wan bigfala noes oli bin ron i kam tugeta, long ol bigfala grup, blong save wanem i bin mekem samting ia; mo taem we oli bin luk Alma mo Amulek i kamaot long kalabus, mo ol wol blong kalabus i bin foldaon long graon, wan bigfala fraet i bin kasem olgeta, mo oli bin ronwe long fored blong Alma mo Amulek, olsem wan nanigot we i ronwe long tu laeon wetem yangfala blong hem; mo olsem ia nao oli bin ronwe long fored blong Alma mo Amulek.

## JAPTA 15

*Alma mo Amulek i go long Saedom mo stanemap wan jos—Alma i mekem Siesrom i kam oraet bak-egen, hem i joenem Jos—Plante oli kasem baptaes, mo Jos i kam antap gud—Alma mo Amulek oli go long Sarahemla. Raonabaot 81 yia bifo Kraes i bon.*

Mo i bin hapen se Alma mo Amulek i bin kasem oda blong aot long bigtaon ia; mo oli bin go aot, mo oli bin kam aot i go long graon blong Saedom; mo luk, oli bin faenem long ples ia evri pipol we i bin aot long graon blong Amonaeha, we oli bin sakemaot olgeta mo oli bin stonem olgeta, from oli bin biliv long ol toktok blong Alma.

2 Mo oli bin talem long olgeta evri samting we i bin hapen long ol woman mo ol pikinini blong olgeta, mo tu long saed blong tufala, mo long paoa we i bin mekem tufala i fri.

3 Mo tu Siesrom i ledaon sik long Saedom, wetem wan fiva we i hot tumas, we ol bigfala fasin we i blong kasem ol had taem, i bin stap mekem ting-ting blong hem i trabol from ol nogud fasin blong hem, from hem i bin ting se Alma mo Amulek i nomo gat; mo hem i bin ting se oli bin kilim ded tufala from ol rabis fasin blong hem. Mo bigfala sin ia, mo ol plante narafala sin blong hem, i bin givim had taem long ting-ting blong hem kasem taem we i bin kam soa bigwan, hem i no bin fri; taswe hem i bin stat



blong bon wetem wan hot we i olsem faea.

4 Nao, taem we hem i bin harem se Alma mo Amulek i stap long graon blong Saedom, hat blong hem i bin stat blong harem gud; mo hem i bin sendem wan toktok i go kwiktaem nomo long tufala, from hem i bin wantem tufala blong kam long hem.

5 Mo i bin hapen se, tufala i bin go kwiktaem nomo, folem toktok we hemi bin sendem long tufala; mo oli bin go insaed long haos blong Siesrom; mo tufala i bin faenem hem long bed blong hem, i sik, mo hem i bin stap daon wetem wan fiva we i hot olsem faea; mo tingting blong hem tu i bin soa bigwan from ol rabis fasin blong hem; mo taem hem i bin luk tufala hem i bin stretem han blong hem long tufala, mo i bin askem tufala strong blong tufala i save mekem hem i oraet bakegen.

6 Mo i bin hapen se, Alma i bin tekem han blong hem mo i bin talem: Yu biliv long paoa blong Kraes, kasem fasin blong sevem man?

7 Mo hem i bin ansa mo talem: Yes, mi biliv long evri toktok we yu bin tijim.

8 Mo Alma i bin talem: Sapos yu biliv long fasin blong pem-aot blong Kraes, yu save oraet bakegen.

9 Mo hem i bin talem: Yes, mi biliv folem ol toktok blong yu.

10 Mo afta Alma i bin prea long Lod, i talem: O Lod, God blong mifala, gat sore long man ia, mo mekem hem i oraet

bakegen folem fet blong hem we i stap long Kraes.

11 Mo taem we Alma i bin talem ol toktok ia, Siesrom i bin stanap long ol leg blong hem, mo i bin stat blong wokbaot; mo samting ia i bin mekem wan bigfala sapraes long evri pipol; mo nius blong samting ia i bin go long evri ples long graon blong Saedom.

12 Mo Alma i bin baptaesem Siesrom long Lod; mo hem i bin stat, long taem ia i go, blong prij long ol pipol.

13 Mo Alma i bin stanemap wan jos long graon blong Saedom, mo i bin konsekretem ol pris mo ol tija long graon, blong baptaes long Lod, eni man we i bin wantem blong baptaes.

14 Mo i bin hapen se, oli bin plante; from oli bin kam long ol bigfala grup, long evri ples blong Saedom mo oli bin kasem baptaes.

15 Be long saed blong ol pipol we oli bin stap long graon blong Amonaeha, oli stap yet olsem wan pipol we i gat strong hat mo we i stronghed; mo oli no bin sakem sin blong olgeta, oli talem se evri paoa blong Alma mo Amulek i kam long devel; from we bilif blong olgeta i olsem Nehor, mo oli no biliv long fasin blong sakem ol sin blong olgeta.

16 Mo i bin hapen se Alma mo Amulek; Amulek, from hem i bin livim evri gol blong hem, mo silva, mo ol gudgudfala samting blong hem, we i bin stap long graon blong Amonaeha,

blong kam talem toktok blong God, from olgeta ia we oli bin fren blong hem long bifo, mo tu papa blong hem, mo tu famle blong hem, oli bin sakemaot hem;

17 Taswe, afta Alma i bin stanemap jos long Saedom, hem i bin luk wan bigfala kontrol, yes hem i bin luk se ol pipol oli bin kontrolem ol hae tingting blong hat blong olgeta, mo oli bin stat blong putum tingting blong olgeta i stap daon long fored blong God, mo oli bin stat blong kam tugeta long ples blong wosip, blong wosipim God long fored blong olta, oli stap gohed blong lukaot gud mo prea oltaem, blong oli save go fri aot long Setan, mo long fasin blong smasem gud—

18 Nao olsem we mi bin talem, Alma i bin luk evri samting ia, taswe hem i bin tekem Amulek mo tufala i bin kam long graon blong Sarahemla, mo hem i bin tekem hem i go long haos blong hem, mo i bin givhan long hem long ol hadtaem blong hem, mo i bin mekem hem i kam strong long Lod.

19 Mo olsem ia nao, nambaten yia blong rul blong ol jaj long ol pipol blong Nifae i bin en.

---

### JAPTA 16

---

*Ol man blong Lemana i smasem ol man blong Amonaeha—Soram i lidim ol man blong Nifae blong winim ol man blong Lemana—Alma mo Amulek mo plante moa i prijim toktok—Oli tijim se afta*

*Kraes i laef bakegen, bae hem i kamaot long ol man blong Nifae. Raonabaot 81–77 yia bifo Kraes i bon.*

Mo i bin hapen se long nambaleven yia blong rul blong ol jaj ova long ol pipol blong Nifae, long nambafaef dei blong nambatu manis, afta we i bin gat plante pis long graon blong Sarahemla, afta we i no bin gat plante faet o plante rao blong plante yia, i go kasem nambafaef dei blong nambatu manis long nambaleven yia, i bin gat wan nius blong faet we ol pipol oli bin harem long evri ples long graon.

2 From luk, ol ami blong ol man blong Lemana i bin kam insaed long saed blong ples we i no gat man long hem, i go long ol boda blong graon, go kasem bigtaon blong Amonaeha, mo oli bin stat blong kilim ded ol pipol mo smasem bigtaon.

3 Mo nao i bin hapen se, bifo ol man blong Nifae i save fomem wan ami we i inaf blong ronemaot olgeta long graon, oli bin smasem ol pipol we oli bin stap long bigtaon blong Amonaeha, mo tu sam long ol boda blong Noa, mo oli bin mekem samfala oli kam prisena long ples we i no gat man long hem.

4 Nao i bin hapen se, ol man blong Nifae i bin wantem blong tekemaot olgeta ia we oli bin tekem olgeta i kam prisena long ples we i no gat man long hem.

5 Taswe, man ia we oli bin mekem hem i kam jif kaptan blong ol ami blong ol man

blong Nifae (mo nem blong hem i Soram, mo hem i bin gat tu boe, Lihae mo Aha)—nao Soram mo tufala boe blong hem, oli bin save se Alma i bin hae pris ova long jos, mo from oli bin harem se hem i gat spirit blong profesi, taswe oli bin go long hem mo oli bin askem hem weaples Lod i bin wantem olgeta blong go, long ples we i no gat man long hem, blong lukaotem ol brata blong olgeta ia we ol man blong Leman oli bin mekem olgeta i kam prisena.

6 Mo i bin hapen se Alma i bin askem Lod long saed blong samting ia. Mo Alma i bin gobak mo i bin talem long olgeta: Luk, ol man blong Leman bae oli krosem reva Saedon long saot blong ples ia we i no gat man long hem, longwe long ol boda blong graon blong Mantae. Mo luk bae yufala i mitim olgeta long ples ia, long is blong reva Saedon, mo long ples ia Lod bae i mekem ol brata blong yufala oli go fri we oli bin kam prisena blong ol man blong Leman.

7 Mo i bin hapen se Soram mo ol boe blong hem i bin krosem reva Saedon, wetem ol ami blong olgeta, mo oli bin maj longwe long ol boda blong Mantae i go long saot blong ples we i no gat man long hem, we i bin stap long is saed blong reva Saedon.

8 Mo oli bin atakem ol ami blong ol man blong Leman, mo ol man blong Leman i bin seraot i go olbaot mo oli bin ronemaot

olgeta i go long ples we i no gat man long hem; mo oli bin tekem ol brata blong olgeta we ol man blong Leman i mekem olgeta oli kam prisena blong olgeta, mo i no bin gat wan sol we i bin lus, we i bin kam prisena. Mo ol brata blong olgeta i bin tekem olgeta i kambak blong tekem ol graon blong olgeta bakegen.

9 Mo olsem ia nao nambaleven yia blong ol jaj i bin en, oli bin ronemaot ol man blong Leman long ol graon, mo ol man blong Amonaeha i bin ded; yes, evri sol blong ol man blong Amonaeha i bin ded, mo tu bigtaon blong olgeta i bin smas, we oli bin talem se God i no save smasem, from hem i bigfala tumas.

10 Be luk, long wan dei nomo, ples ia i bin emti; mo ol dog mo ol wael anamol blong ples we i no gat man long hem, i bin terem nogud ol ded bodi blong ol pipol ia.

11 Be, afta plante dei oli bin hipimap ol ded bodi blong olgeta long fes blong graon, mo oli bin kavremap olgeta wetem smol graon nomo. Mo nao smel blong olgeta i bin strong tumas, mekem se ol pipol i no bin go blong stap long graon blong Amonaeha blong plante yia. Mo oli bin singaotem ples ia Emti blong ol Nehor; from bilif blong olgeta i bin olsem Nehor, we i bin ded; mo graon blong olgeta i bin stap emti.

12 Mo ol man blong Leman i no bin kam bakegen blong faet agensem ol man blong Nifae kasem nambafotin yia blong rul blong ol jaj long ol pipol

blong Nifae. Mo olsem ia nao ol pipol blong Nifae i bin gohed blong gat pis long evri graon blong tri yia.

13 Mo Alma mo Amulek i bin go fored blong prijim fasin blong sakem sin long ol pipol long ol tempol blong olgeta, mo long ples blong wosip blong olgeta, mo tu long ol haos blong prea blong olgeta, we oli bin bildim folem fasin blong ol Jiu.

14 Mo long olgeta we oli bin lisin long toktok blong tufala, tufala i bin talemaot ol toktok blong God long olgeta, mo oli mekem semak long eni kaen man oltaem.

15 Mo olsem ia nao Alma mo Amulek i bin go fored, mo tu plante moa we oli bin jusum olgeta blong mekem wok, blong prijim toktok long evri ples long evri graon. Mo fasin ia blong stanemap jos i bin stap long evri ples long graon, long evri eria raonabaot, long ol pipol blong ol man blong Nifae.

16 Mo i no bin gat fasin ia blong no stap semak long medel blong olgeta; Lod i bin poremaot Spirit blong hem long ful fes blong graon blong mekem rere ol tingting blong ol pikinini blong ol man, o blong mekem rere hat blong olgeta blong kasem toktok we Lod bae i tijim olgeta, long taem we bae hem i kam.

17 Blong oli no mekem olgeta i strong agensem trutok, blong oli no save gat fasin blong no gat bilif, mo go long fasin blong smasem gud, be blong oli save kasem trutok wetem glad, mo

olsem wan branj we oli pusem bak i go long prapa rop, blong oli save go insaed long kingdom blong Lod, God blong olgeta.

18 Nao ol pris ia we oli bin go fored long medel blong ol pipol, i bin prij agensem evri giaman toktok, mo ol toktok blong trik-im man, mo ol tingting blong wantem samting blong narafala man, mo ol rao, mo ol tingting blong mekem nogud long wan man, mo ol toktok agensem man, mo stil, fasin blong stilim mane blong man, tekem samting blong narafala man, kilim man i ded, mekem adaltri, mo evri kaen fasin blong gat rabis tingting, oli talem strong se ol samting ia i no mas hapen—

19 Oli talemaot ol samting we bae i mas hapen, i no longtaem; yes, oli talemaot se bae Pikinini blong God bae i kam, ol harem nogud blong hem mo ded, mo tu taem we man i kam laef bakegen long ded.

20 Mo plante long ol pipol i bin askem long saed blong ples we Pikinini blong God bae i kam long hem; mo oli bin tijim olgeta se bae hem i kamaot long olgeta afta hem i laef bakegen; mo ol pipol i bin harem samting ia wetem wan bigfala hapi mo glad.

21 Mo nao afta we jos i bin stanap long evri ples long graon—afta we i bin winim devel, mo oli bin prijim toktok blong God long fasin ia we i klia gud long ful graon, mo Lod i bin poremaot ol blesing blong hem long ol pipol—olsem ia nao nambafotin yia

blong rul blong ol jaj long ol pipol blong Nifae i bin en.

Wan histri blong ol boe blong Mosaea, we oli bin sakemaot ol raet blong olgeta blong rulum kingdom from toktok blong God, mo oli bin go antap long graon blong Nifae blong prij long ol man blong Lemana; ol harem nogud blong olgeta mo fasin blong go fri—folem histri blong Alma.

*I stat long japta 17 i go kasem japta 27 nomo.*

### JAPTA 17

*Ol boe blong Mosaea oli gat spirit blong profesi mo blong revelesen—Oli go long plante defren wei blong talemaot toktok long ol man blong Lemana—Amon i go long graon blong Ismael mo i kam wokman blong King Lamona—Amon i sevem ol grup blong ol anamol blong king mo i smasem ol enemi blong hem long wota blong Sibas. Vas 1-3, raonabaot 77 yia bifo Kraes i bon; vas 4, raonabaot 91-77 yia bifo Kraes i bon; mo ol vas 5-39, raonabaot 91 yia bifo Kraes i bon.*

Mo nao i bin hapen se, taem we Alma i stap wokbaot aot long graon blong Gidion i go long saot, long graon blong Mantae, luk, long bigfala sapraes blong hem, hem i bin mitim ol boe blong Mosaea we oli stap wokbaot i go long graon blong Sarahemla.

2 Nao ol boe blong Mosaea ia i

bin stap wetem Alma long taem we enjel i bin kamaot long hem faswan; taswe Alma i bin glad tumas blong luk ol brata blong hem; mo wanem i bin ademap moa long glad blong hem, i we oli stil ol brata blong hem long Lod; yes, mo oli bin kam strong long save blong trutok; from oli ol man blong wan stret haremsave mo oli bin stadi long ol skripja strong oltaem, blong oli save andastanem toktok blong God.

3 Be i no hemia nomo; oli bin mekem plante prea, mo livim kakae; taswe oli bin gat spirit blong profesi, mo spirit blong revelesen, mo taem we oli bin tij, oli bin tij wetem paoa mo raet blong God.

4 Mo oli bin tijim toktok blong God blong wan spes blong fotin yia long ol man blong Lemana, mo oli bin gat plante sakses blong karem i kam plante long save blong trutok; yes, wetem paoa blong ol toktok blong olgeta, oli pulum plante oli kam long fored blong olta blong God, blong prea long nem blong hem mo talemaot ol sin blong olgeta long fored blong hem.

5 Nao hemia nao ol problem we i bin stap wetem olgeta long ol wokbaot blong olgeta, from oli bin gat plante hadtaem; oli bin harem nogud plante long bodi tugeta wetem tingting, olsem hanggri, tosta mo taed, mo tu plante wok long spirit.

6 Nao hemia ol wokbaot blong olgeta; from oli talem tata long papa blong olgeta, Mosaea, long

fas yia blong ol jaj; afta we oli no bin akseptem kingdom we papa blong olgeta i bin wantem blong givim i go long olgeta, mo tu hemia ol tingting blong ol pipol.

7 Be oli bin aot long graon blong Sarahemla, mo oli bin tekem ol naef blong faet blong olgeta, mo ol spia blong olgeta, mo ol bonara blong olgeta, mo ol ara blong olgeta, mo ol sling blong olgeta; mo oli bin mekem samting ia blong oli save kasem kakae blong olgeta, long taem we oli stap long ples ia we i no gat man long hem.

8 Mo olsem ia nao oli bin aot i go long ples we i no gat man long hem wetem ol namba blong olgeta we oli bin jusum-aot, blong go antap long graon blong Nifae, blong prijim toktok blong God long ol man blong Leman.

9 Mo i bin hapen se, oli bin wokbaot blong plante dei long ples we i no gat man long hem, mo oli bin livim kakae plante mo oli bin prea plante blong Lod i save givim long olgeta wan pat blong Spirit blong hem, blong go wetem olgeta, mo stap wetem olgeta, blong oli save stap wan tul long ol han blong God blong karem, sapos i save hapen, ol brata blong olgeta, ol man blong Leman, blong kasem save blong trutok, blong kasem save long ol fasin nogud blong kastom blong ol bubu blong olgeta, we oli no stret.

10 Mo i bin hapen se, Lod i bin visitim olgeta wetem Spirit blong hem, mo i bin talem long

olgeta: Leftemap tingting blong yufala. Mo oli bin leftemap tingting blong olgeta.

11 Mo tu, Lod i bin talem long olgeta: Go fored long ol man blong Leman, ol brata blong yufala, mo stanemap toktok blong mi; be yufala i mas save wet longtaem wetem fasn blong go tru long hadtaem wetem longfala tingting mo ol hadtaem, blong yufala i save soem ol gudfala eksampol long olgeta, tru long mi, mo bae mi mekem yufala i kam wan tul long ol han blong mi, blong mekem se plante sol i save sev.

12 Mo i bin hapen se, ol hat blong ol boe blong Mosaea, mo tu blong olgeta we oli bin stap wetem olgeta, oli bin harem gud blong go fored long ol man blong Leman blong talemaot long olgeta toktok blong God.

13 Mo i bin hapen se, taem we oli bin kasem ol boda blong ol graon blong ol man blong Leman, oli bin seraotem olgeta mo oli bin aot i go wanwan, oli bin trastem Lod se bae oli mit bakegen taem we oli finisim wok blong olgeta; from oli bin biliv se wok we oli bin tekem long olgeta i bigwan tumas.

14 Mo i tru se hem i bigwan tumas, from oli bin tekem wok ia long olgeta blong prijim toktok blong God long wan pipol we i wael mo oli bin mekem hat blong olgeta i kam strong mo prapa wael; wan pipol we i glad blong kilim ded ol man blong Nifae, mo stilim mane blong olgeta mo tekem samting blong olgeta; mo oli bin putum

ol hat blong olgeta long ol rij samting, o long gol mo silva, mo ol ston we praes blong olgeta i hae tumas; be stil oli lukaotem ol samting ia tru long fasin ia blong kilim ded man mo tekem samting blong man, blong oli no nid blong wok from ol samting ia wetem ol han blong olgeta.

15 Olsem ia nao oli bin wan pipol we i les, plante long olgeta i bin wosipim ol aedol, mo panis blong God i bin foldaon long olgeta from ol kastom blong ol bubu blong olgeta; i nomata ol promes blong Lod i bin go long olgeta sapos oli sakem sin.

16 Taswe, hemia stamba tingting from wanem ol boe blong Mosaea i bin tekem wok ia long olgeta, blong maet oli save tekem olgeta i kam blong sakem sin; blong maet oli save lidim olgeta blong save plan blong fasin blong pemaot man.

17 Taswe, oli bin seraotem olgeta wan wan, mo oli bin go fored long olgeta, evri man hem wan nomo, folem toktok mo paoa blong God we hem i bin kasem long hem.

18 Nao Amon i bin jif long olgeta, o long ol narafala toktok se, hem i bin helpem olgeta, mo hem i bin aot long olgeta, afta we hem i bin blesem olgeta folem ol defren wok blong olgeta, afta hem i bin talemaot toktok blong God long olgeta, o i bin givhan long olgeta bifo hem i bin aot long olgeta; mo olsem ia nao oli bin tekem plante wokbaot blong olgeta long evri ples long graon.

19 Mo Amon i bin go long graon blong Ismael, graon we oli bin singaotem afta long nem blong ol boe blong Ismael, we tu oli bin kam ol man blong Leman.

20 Mo taem we Amon i bin go long graon blong Ismael, ol man blong Leman i bin holem hem mo oli bin fasem hem, folem kastom blong olgeta we i blong fasem evri man blong Nifae, we i bin foldaon long ol han blong olgeta, mo tekem olgeta i go long king; mo olsem ia nao i bin stap long jus blong king, blong kilim ded olgeta, o blong holem taet olgeta i stap long kalabus, o blong sakemaot olgeta long graon blong hem, folem tingting mo jus blong hem.

21 Mo olsem ia nao oli bin tekem Amon i go long fored blong king we i bin rulum graon blong Ismael; mo nem blong hem i Lamona; mo hem i bin kamaot long laen blong Ismael.

22 Mo king i bin askem Amon sapos hem i wantem stap long graon wetem ol man blong Leman o wetem ol pipol blong hem.

23 Mo Amon i bin talem long hem se: Yes, mi wantem blong stap wetem pipol ia blong samfala taem; yes, mo maet kasem dei we mi ded.

24 Mo i bin hapen se, king Lamona i bin hapi tumas long Amon, mo i bin mekem olgeta tekemaot ol rop blong hem; mo hem i bin wantem Amon blong tekem wan long ol gel blong hem olsem woman blong hem.

25 Be Amon i bin talem long hem: No, be bae mi wokman blong yu. Taswe Amon i bin kam wan wokman blong king Lamona. Mo i bin hapen se, oli bin putum hem long medel blong ol narafala wokman blong wajem ol grup blong ol anamol blong Lamona, folem ol kastom blong ol man blong Leman.

26 Mo afta we hem i bin stap long wok blong king blong tri dei, taem we hem i stap wetem wokman blong laen blong Leman, oli go aot wetem ol grup blong ol anamol long ples blong wota, we oli bin singaotem wota blong Sibas, mo evri man blong Leman i bin tekem ol grup blong ol anamol long ples ia blong oli save dring wota —

27 Taswe, taem we Amon mo ol wokman blong king i bin tekem ol grup blong ol anamol i go long ples blong wota, luk, wan grup blong ol man blong Leman, we oli bin stap wetem ol grup blong anamol blong olgeta long wota, i bin girap mo ronem ol grup blong ol anamol blong Amon, mo ol wokman blong king, mo oli ronem olgeta i go olbaot inaf blong mekem se oli ronwe i go long evri ples.

28 Nao ol wokman blong king i bin stat blong komplem, oli talem se: Nao bae king i kilim yumi ded, olsem we hem i bin mekem long ol brata blong yumi from ol grup blong anamol blong olgeta i bin ron i go olbaot, from ol fasin nogud blong ol man ia. Mo oli bin

stat blong krae bigwan, oli se: Luk, ol grup blong anamol blong mifala i bin ron i go olbaot finis.

29 Nao oli bin krae from oli fraet se bae oli kilim olgeta i ded. Nao taem we Amon i bin luk samting ia, hem i bin fulap wetem glad insaed long hat blong hem; from, hem i talem se, bae mi soemaot paoa blong mi long olgeta wokman ia we mi wok wetem olgeta, o paoa ia we i stap long mi, blong karem bak ol grup blong anamol ia, i kam tugeta long king, blong mekem se mi save winim hat blong olgeta wokman ia we oli wok wetem mi, blong mi save lidim olgeta blong biliv long ol toktok blong mi.

30 Mo nao, hemia ol tingting blong Amon taem we hem i bin luk ol hadtaem blong olgeta ia we hem i bin singaotem olgeta olsem ol brata blong hem.

31 Mo i bin hapen se, hem i bin switim olgeta tru long ol toktok blong hem, i talem: Ol brata blong mi, yufala i no fraet mo bae yumi go lukaotem ol grup blong anamol, mo bae yumi karem olgeta i kam tugeta mo karem bak olgeta i go long ples blong wota; mo olsem ia nao bae yumi sevem olgeta grup blong anamol long king mo bae hem i no kilim yumi i ded.

32 Mo i bin hapen se, oli bin go lukaotem ol grup blong anamol, mo oli bin folem Amon, mo oli bin ron wetem plante spid mo oli bin go bitim ol grup blong anamol blong king, mo oli bin karem bak olgeta i kam



tugeta bakegen long ples blong wota.

33 Mo olgeta man ia i bin stanap bakegen blong mekem ol grup blong anamol blong olgeta i ronwe i go olbaot; be Amon i bin talem long ol brata blong hem: Raonem ol grup blong anamol blong mekem se oli no ronwe; mo bae mi go mo rao wetem ol man ia we oli mekem ol grup blong anamol blong yumi blong oli ronwe olbaot.

34 Taswe, oli bin mekem olsem we Amon i bin talemaot long olgeta, mo hem i bin go aot mo i bin stanap blong rao wetem olgeta we oli bin stanap long wota blong Sibas; mo namba blong olgeta i no bin smol.

35 Taswe oli no bin fraet long Amon, from oli bin ting se wan long olgeta i save kilim hem i ded folem tingting blong olgeta, from oli no bin save se Lod i bin promes long Mosaea se bae hem i mekem ol boe blong hem i go fri long han blong olgeta; mo tu oli no bin save wan samting long saed blong Lod; taswe oli bin glad long fasin ia blong smasem ol brata blong olgeta; mo from samting ia, oli bin stanap blong mekem ol grup blong anamol blong king blong i ronwe olbaot.

36 Be Amon i bin stanap mo i bin stat blong sakem ol ston long olgeta wetem sling blong hem; yes, hem i bin sakem ol ston long olgeta wetem wan bigfala paoa; mo olsem ia nao hem i bin kilim sam long olgeta i ded, mekem se oli bin stat blong sapraes long paoa blong

hem; be oli kros from hem i bin kilim ol brata blong olgeta i ded, mo oli bin gat strongfala tingting se hem bae i mas ded; taswe from oli bin luk se oli no save kasem hem wetem ol ston blong olgeta, oli bin kam long hem wetem ol nalnal blong kilim hem i ded.

37 Be luk, evri man we i bin leftemap nalnal blong hem blong kilim Amon, hemi bin katemaot ol han blong olgeta wetem naef blong faet blong hem; from hem i bin stanap strong agensem ol atak blong olgeta, tru fasin blong katemaot ol han blong olgeta wetem sap saed blong naef blong faet blong hem, inaf blong mekem se oli bin stat blong sapraes, mo oli bin stat blong ronwe long hem; yes, mo namba blong olgeta i no bin smol; mo hem i bin mekem olgeta i ronwe tru long paoa blong han blong hem.

38 Nao sikis long olgeta i bin foldaon tru long ston blong sling, be hem i no bin kilim wan i ded, i kilim ded lida blong olgeta nomo wetem naef blong faet blong hem; mo hem i bin katemaot evri han blong olgeta we oli bin leftemap agensem hem, mo namba blong olgeta i no smol.

39 Mo taem we hem i bin ronemaot olgeta i go longwe, hem i bin gobak mo oli bin wotarem ol grup blong anamol blong olgeta, mo oli bin gobak wetem olgeta long gras blong king, mo afta oli bin go long king, wetem ol han we Amon i bin katemaot wetem naef blong

faet blong hem, blong olgeta ia we oli bin traem blong kilim hem i ded; mo oli bin karem olgeta i go long king olsem wan testemoni blong ol samting we oli bin mekem.

---

JAPTA 18

---

*King Lamonaē i ting se Amon hem i Bigfala Spirit—Amon i tijim king long saed blong olsem wanem wol ia i stat, long saed blong ol wok blong God long ol man, mo long saed blong fasin blong pemaot man we i kam tru long Kraes—Lamonaē i biliv mo i foldaon long graon olsem se hem i ded. Raonabaot 90 yia bifo Kraes i bon.*

Mo i bin hapen se, king Lamonaē i bin mekem ol wokman blong hem i kam long fored blong hem mo testifae long evri samting we oli bin luk long saed blong samting ia.

2 Mo taem olgeta evriwan i bin testifae long ol samting we oli bin luk, mo taem we hem i bin lanem se Amon i yusum fet blong kipim ol grup blong anamol blong hem oli sef, mo tu long bigfala paoa taem we hem i bin faet agensem olgeta ia we oli bin wantem blong kilim hem i ded, hem i bin sapraes plante tumas, mo i bin talem: I tru tumas se man ia i moa bitim wan man. Luk, hemia i no Bigfala Spirit we i stap sendem ol bigfala panis olsem ia long pipol ia, from oli kilim ded ol man?

3 Mo oli bin ansa long king mo i bin talem: Sapos hem i Bigfala

Spirit o sapos hem i wan man mifala i no save; be hemia mifala i save, se ol enemi blong king i no save kilim hem i ded; mo oli no save mekem ol grup blong anamol blong king i ronwe olbaot taem we hem i stap wetem mifala, from waes blong hem mo bigfala paoa blong hem; taswe, mifala i save se hem i wan fren blong king. Mo nao, O king, mifala i no biliv se wan man i save gat wan bigfala paoa olsem, from mifala i save se oli no save kilim hem i ded.

4 Mo nao, taem we king i bin harem ol toktok ia, hem i bin talem long olgeta: Nao mi save se hem i Bigfala Spirit; mo hem i bin kam daon long taem ia blong sevem laef blong yufala, blong mekem se mi no save kilim ded yufala olsem we mi bin mekem long ol brata blong yufala. Nao hemia i Bigfala Spirit ia we ol bubu blong yumi i bin tokbaot.

5 Nao samting ia i bin kastom blong Lamonaē, we hem i bin kasem long papa blong hem, se i bin gat wan Bigfala Spirit. I nomata we oli bin bilif long wan Bigfala Spirit, oli bin ting se eni samting we oli bin mekem i stret; be, Lamonaē i bin stat blong fraet bigwan, wetem fraet se hem i bin mekem rong blong kilim ol wokman blong hem;

6 From hem i bin kilim plante long olgeta from ol brata blong olgeta i bin mekem ol grup blong anamol blong olgeta i ronwe olbaot, long ples blong wota; mo olsem ia nao, from se ol grup blong anamol blong

olgeta i bin ronwe olbaot oli bin kilim olgeta i ded.

7 Nao i bin fasin blong ol man blong Leman blong go stanap klosap long ol wota blong Sibas, blong mekem ol grup blong anamol blong ol pipol i ronwe olbaot, blong mekem se oli save ronem plante long olgeta blong oli ronwe i go long graon blong olgeta, from hem i wan fasin we oli yusum blong stil long olgeta.

8 Mo i bin hapen se, king Lamonaë i bin askem ol wokman blong hem, se: Wehem man ia we i gat bigfala paoa olsem?

9 Mo oli bin talem long hem: Luk, hem i stap givim kakae long ol hos blong yu. Nao king i bin talem long olgeta wokman blong hem, bifo oli go blong givim wota long ol grup blong anamol blong olgeta, bae oli mekem i rere ol hos blong hem mo ol kat blong hos blong hem, mo tekem hem i go long graon blong Nifae; from papa blong Lamonaë, we hem i bin king long evri graon, i bin talemaot wan bigfala lafet long graon blong Nifae.

10 Nao taem we king Lamonaë i bin harem se Amon i stap mekem rere ol hos blong hem mo ol kat blong hos blong hem, hem i bin kam moa sapraes, from Amon i bin gat strongfala fet, i talem se: I tru tumas se i bin no gat wan wokman long evri wokman blong mi we i bin gat strongfala fet olsem man ia; from hem i stap tingbaot evri komanmen blong mi, blong folem olgeta.

11 Nao mi save tru se hem i

Bigfala Spirit, mo mi wantem hem blong kam long mi, be mi fraet.

12 Mo i bin hapen se, taem we Amon i bin mekem i rere ol hos mo ol kat blong hos blong king mo ol wokman blong hem, hem i bin go long king, mo hem i bin luk se fes blong king i bin jenis; taswe hem i bin stap rere blong livim ples blong hem.

13 Mo wan long ol wokman blong king i bin talem long hem se, Rabana, we i minim, long lanwis ia se, strong tumas o bigfala king, from oli bin ting se ol king blong olgeta i strong tumas; mo hem i bin talem long hem olsem se: Rabana, king i wantem yu blong stap.

14 Taswe Amon i bin tanem hem i go long king mo i bin talem long hem: Yu wantem mi blong mekem wanem blong yu, O king? Mo king i no bin ansarem hem blong spes blong wan aoa, folem taem blong olgeta, from hem i no bin save wanem blong talem long hem.

15 Mo i bin hapen se, Amon i bin talem long hem bakegen: Yu wantem wanem long mi? Be king i no bin ansarem hem.

16 Mo i bin hapen se Amon, from hem i bin fulap wetem Spirit blong God, taswe hem i bin save ol tingting blong king. Mo hem i bin talem long hem: Hem i from we yu bin harem se mi bin faet blong sevem ol wokman blong yu mo ol grup blong anamol blong yu, mo mi bin kilim seven long ol brata blong olgeta i ded wetem sling mo wetem naef blong faet, mo

bin katemaot ol han blong olgeta narawan, blong save sevem ol grup blong anamol blong yu mo ol wokman blong yu; luk, hemia i samting we i stap mekem sapraes long yu?

17 Mi talem long yu, wanem samting ia, we i mekem sapraes blong yu i bigwan? Luk, mi mi wan man, mo wan wokman blong yu; taswe, eni samting we yu wantem we hem i stret, bae mi mekem.

18 Nao taem we king i bin harem ol toktok ia, hem i bin sapraes plante bakegen, from hem i bin luk se Amon i bin save faenemaot ol tingting blong hem; be i nomata long samting ia, king Lamonaes i bin openem maot blong hem, mo i bin talem long hem: Yu huia? Yu Bigfala Spirit ia, we i save evri samting?

19 Amon i bin ansa mo talem long hem: No mi mi no hem.

20 Mo king i bin talem: Olsem wanem nao yu save ol tingting blong hat blong mi? Yu save toktok mo no fraet, mo talem long mi long saed blong ol samting ia; mo tu talem long mi wetem wanem paoa yu bin kilim ded mo katemaot ol han blong ol brata blong mi we oli bin mekem ol grup blong anamol blong mi i ronwe olbaot—

21 Mo nao, sapos yu talem long mi long saed blong ol samting ia, eni samting we yu wantem bae mi givim long yu; mo sapos i gat nid, mi save putum ol ami blong mi blong oli gad long yu; be mi save se yu moa strong bitim olgeta

evriwan; be eni samting we yu wantem long mi, bae mi givim long yu.

22 Nao from Amon i bin waes, be i no man blong smasem gud man, hem i bin talem long Lamonaes se: Bae yu lisen long ol toktok blong mi, sapos mi talem long yu tru wanem paoa mi mi stap mekem ol samting ia? Mo hemia i samting we mi wantem long yu.

23 Mo king i bin ansarem hem, mo i bin se: Yes, bae mi biliv long evri toktok blong yu. Mo olsem ia nao Amon i bin kasem gud hem long ol toktok blong hem.

24 Mo Amon i bin stat blong toktok long hem mo hem i no bin fraet, mo hem i bin talem long hem se: Yu bilif se i gat wan God?

25 Mo hem i bin ansa, mo hem i bin talem long hem: Mi no save samting ia i minim wanem.

26 Mo afta Amon i bin talem: Yu biliv se i gat wan Bigfala Spirit?

27 Mo hem i bin talem: Yes.

28 Mo Amon i bin talem: Hemia i God. Mo Amon i bin talem long hem bakegen se: Yu biliv se Bigfala Spirit ia, we i God, i bin mekem evri samting we i stap long heven mo long wol?

29 Mo hem i bin talem: Yes, mi bilif se hem i bin mekem evri samting we i stap long wol; be mi no save long ol heven.

30 Mo Amon i bin talem long hem: Ol heven oli wan ples we God i stap long hem mo ol tabu enjel blong hem.

31 Mo king Lamonaē i bin talem: Ples ia i stap antap long wol?

32 Mo Amon i bin talem: Yes, mo hem i lukluk daon long ol pikinini blong ol man; mo hem i save evri tingting mo evri samting we i stap insaed long hat; from hem i bin mekem evri samting long stat wetem han blong hem.

33 Mo king Lamonaē i bin talem: Mi biliv long evri samting we yu bin talem. God i bin sendem yu?

34 Mo Amon i bin talem long hem: Mi mi wan man; mo long stat blong wol, God i bin mekem man folem pikja blong hem, mo Tabu Spirit blong hem i bin singaotem mi blong tijim ol samting ia long pipol ia, blong mi save karem olgeta i kam blong save samting we i stret mo i tru;

35 Mo wan pat blong Spirit ia i stap long mi, we i givim save long mi, mo tu paoa folem fet blong mi mo ol tingting ia blong wantem samting we i stap long God.

36 Nao taem we Amon i bin talem ol toktok ia, hem i bin stat long taem we wol i bin stat, mo tu taem we God i bin mekem Adam, mo i bin talem long hem evri samting long saed blong taem we man i bin foldaon, mo i bin talem mo soem long hem ol histri blong ol man bifo mo ol tabu skripja blong ol pipol, we ol profet i bin tokbaot, i go daon kasem taem we papa blong olgeta, Lihae, i bin lego Jerusalem.

37 Mo tu hem i bin talem long olgeta (from samting ia i bin go long king mo long ol wokman blong hem) evri wokbaot blong bubu blong olgeta long ples we i no gat man long hem, mo evri hadtaem blong olgeta wetem hanggri mo tosta, mo ol taem we oli harem nogud long bodi blong olgeta, mo i gat sam moa.

38 Mo tu hem i bin talem long olgeta long saed blong Leman mo Lemyul we tufala i bin go agensem ol narawan, mo ol boe blong Ismael, yes, hem i bin talem long olgeta evri fasin ia blong go agensem ol narawan; mo hem i bin eksplenem ol histri mo ol skripja long olgeta, stat long taem we Lihae i bin lego Jerusalem i kam kasem taem ia.

39 Be i no samting ia nomo; hem i bin eksplenem plan blong fasin blong pemaot man long olgeta, we oli bin mekem rere stat long taem we wol i bin stat; mo tu hem i bin mekem olgeta save long saed blong Kraes we bae i kam, mo ol wok blong Lod hem i bin mekem olgeta i save long olgeta.

40 Mo i bin hapen se, afta hem i bin talemaot ol samting ia, hem i bin eksplenem olgeta long king, mekem se king i bin biliv long evri toktok blong hem.

41 Mo hem i bin stat blong prea long Lod, i talem se: O Lod, gat sore; folem sore blong yu we i plante we yu bin gat long ol pipol blong Nifae, gat sore long mi, mo long ol man blong mi.

42 Mo nao, taem we hem i

bin talem samting ia, hem i bin foldaon long graon, olsem se hem i ded.

43 Mo i bin hapen se, ol wokman blong hem i bin tekem hem mo karem hem i go long woman blong hem, mo oli bin putum hem long wan bed; mo hem i stap olsem se hem i ded blong spes blong tu dei mo tu naet; mo woman blong hem, mo ol boe blong hem, mo ol gel blong hem i bin krae long hem, folem fasin blong ol man blong Leman, wetem bigfala sore from lus blong hem.

---

### JAPTA 19

---

*Lamonae i kasem laet blong laef we i no gat en mo i luk Ridima—Ewriwan long haos blong hem i luk wan spesel drim, mo plante oli luk ol enjel—Oli sevem Amon tru long wan merikel—Hemi baptaesem plante mo i stanemap wan jos long olgeta. Raonabaot 90 yia bifo Kraes i bon.*

Mo i bin hapen se, afta tu dei mo tu naet oli bin stap rere blong tekem bodi blong hem mo putum hem long wan hol blong ston, we oli bin mekem blong stamba tingting ia blong berem ol ded blong ogeta long hem.

2 Nao from kwini i bin harem oli stap tokbaot Amon, taswe hem i bin sendem mo i bin wantem hem blong kam long hem.

3 Mo i bin hapen se, Amon i bin mekem olsem we oli bin talem long hem, mo hem i bin go long kwini, mo i bin wantem

blong save wanem hem i bin wantem hem blong mekem.

4 Mo hem i bin talem long hem: Ol wokman blong man blong mi i bin talem long mi se yu wan profet blong wan tabu God mo se yu gat paoa blong mekem plante bigfala wok long nem blong hem;

5 Taswe, sapos i olsem, mi wantem yu blong go insaed mo luk man blong mi, from hem i bin stap long bed blong spes blong tu dei mo tu naet; mo i gat sam we oli se hem i no ded, be ol narafala i se hem i ded mo se hem i sting, mo oli se i moa gud blong putum hem insaed long hol blong ston; be long mi wan, hem i no sting.

6 Nao, hemia i samting we Amon i bin wantem, from hem i bin save se paoa blong God i bin stap long king Lamonae; hem i bin save se dak vel blong no bilif, God i stap sakemaot long tingting blong hem, mo laet ia we i bin laetem tingting blong hem, we i bin laet blong glori blong God, we i bin wan gudfala laet blong gud fasin blong hem—yes, laet ia i bin karem glad ia i kam long sol blong hem, ol klaod blong tudak i bin lus, mo se laet blong laef we i no gat en i bin laet long sol blong hem, yes, hem i bin save se samting ia i bin winim bodi blong hem, mo God i bin tekem hem i go long we—

7 Taswe, wanem we kwini i bin wantem long hem, i tingting blong hem nomo. Taswe, hem i bin go insaed blong luk king folem olsem we kwini i bin

wantem hem blong mekem; mo hem i bin luk king, mo hem i bin save se hem i no ded.

8 Mo hem i bin talem long kwin: Hem i no ded, be God i tekem hem i bin go longwe, mo long tumora bae hem i wekap bakegen; taswe no berem hem.

9 Mo Amon i bin talem long hem: Yu biliv long samting ia? Mo hem i bin talem long hem: Mi no gat witnes be toktok blong yu nomo, mo toktok blong ol wokman blong mitufala; be mi biliv se bae i hapen folem olsem we yu bin talem.

10 Mo Amon i bin talem long hem: God i blesem yu from fet blong yu i bigwan tumas; mi talem long yu, woman, se i no bin gat wan bigfala fet olsem long evri pipol blong ol man blong Nifae.

11 Mo i bin hapen se, hem i bin wajem gud bed blong man blong hem, stat long taem ia, go kasem taem ia long nekis dei we Amon i bin talemaot se bae hem i girap.

12 Mo i bin hapen se, hem i bin wekap, folem ol toktok blong Amon, mo taem we hem i bin wekap, hem i bin stretem han blong hem long woman, mo i bin talem se: Mi blesem nem blong God mo God i blesem yu.

13 From i tru olsem we yu stap laef, luk, mi bin luk Ridima blong mi; mo bae hem i kam fored, mo bae wan woman i bonem hem, mo bae hem i pemaot evri man we i biliv long nem blong hem. Nao, taem we hem i bin talem ol

toktok ia, hat blong hem i bin solap insaed long hem, mo hem i bin foldaon bakegen wetem glad; mo kwin tu i bin foldaon, from paoa blong Spirit i bin kavremap hem.

14 Nao Amon i bin luk Spirit blong Lod i bin poremaot folem prea blong hem, long ol man blong Leman, ol brata blong hem, olgeta ia we oli bin mekem ol man blong Nifae oli sore, o long ol pipol blong God, from ol rabis fasin blong olgeta mo ol kastom blong olgeta, hem i bin foldaon long ol ni blong hem, mo hem i bin stat blong poremaot sol blong hem long prea mo talem tangkyu long God long wanem we hem i bin mekem long ol brata blong hem; mo glad i bin kavremap hem tu; mo olsem ia nao trifala evriwan i bin foldaon long graon.

15 Nao, taem we ol wokman blong king i bin luk se oli bin foldaon long graon, olgeta tu i bin stat blong prea long God; from fasin blong respek long Lod, i bin kam kasem olgeta tu, from hem i olgeta nao we i bin stanap long fored blong king mo oli bin testifae long hem long saed blong bigfala paoa blong Amon.

16 Mo i bin hapen se, oli bin prea long nem blong Lod, long evri paoa blong olgeta, go kasem taem we olgeta evriwan i bin foldaon long graon, be i bin gat wan woman blong laen blong Leman nomo we i no bin foldaon, mo nem blong hem i Abis, we hem i bin jenisim laef blong hem i go long Lod blong

plante yia, from wan gudfala visen blong papa blong hem —

17 Olsem ia nao, hem i bin jenisim laef blong hem i go long Lod, mo from hem i neva bin talemaot samting ia, taswe, taem we hem i bin luk se evri wokman blong Lamonaē i bin foldaon long graon, mo tu woman bos blong hem, kwīn, mo king, mo Amon i bin slip flat long graon, hem i bin save se hemia i bin paoa blong God; mo from we i bin ting se hemia i wan janis blong mekem ol pipol oli save wanem i bin hapen, blong taem we oli luk samting ia, bae samting ia i save mekem olgeta blong biliv long paoa blong God, taswe hem i bin ron i go long wan wan haos, blong talem wanem we i bin hapen long ol pipol.

18 Mo oli bin stat blong kam tugeta long haos blong king. Mo i bin gat plante pipol we oli bin kam, mo long sapraes blong olgeta, oli bin luk king, mo kwīn, mo ol wokman blong olgeta we oli slip flat long graon, mo olgeta evriwan i stap long graon olsem se oli ded; mo oli bin lukim Amon tu, mo luk, hem i wan man blong Nifae.

19 Mo nao ol pipol i bin stat blong komplēn long medel blong olgeta bakegen; sam oli bin talem se hem i wan bigfala rabis samting we i bin kam long olgeta, o long king mo haos blong hem, from hem i bin letem se man blong Nifae i save stap long graon.

20 Be ol narawan i bin toktok strong agensem olgeta: King i

bin karem i kam rabis samting ia long haos blong hem, from hem i bin kilim ol wokman blong hem we ol man i bin mekem ol grup blong anamol blong olgeta i ronwe olbaot long wota blong Sibas.

21 Mo tu ol man we oli bin stap long wota blong Sibas mo oli bin mekem ol grup blong anamol blong king i ronwe olbaot, i bin toktok strong agensem olgeta, from oli bin kros long Amon from namba blong ol brata blong olgeta we hem i bin kilim olgeta i ded long wota blong Sibas, taem we hem i bin stap lukaotem gud ol grup blong anamol blong king.

22 Nao, wan long olgeta, we brata blong hem i bin ded long naef blong faet blong Amon, from hem i bin kros plante tumas long Amon, hem i bin pulumaot naef blong faet blong hem mo i bin go fored blong hem i save letem i foldaon long Amon blong kilim hem i ded; mo taem we hem i bin leftemap naef blong faet blong kilim hem i ded, luk, hem i bin foldaon i ded.

23 Nao yumi luk se Amon i no bin save ded, from Lod i bin talem long Mosaea, papa blong hem: Bae mi sevem hem, mo bae i stap long hem folem fet blong yu — taswe, Mosaea i bin trastem hem long Lod.

24 Mo i bin hapen se, taem we grup blong pipol ia i bin luk se man ia i bin foldaon i ded, we i bin leftemap naef blong faet blong kilim ded Ammon, fraet i bin kam long olgeta evriwan,



mo oli fraet blong pusum han blong olgeta blong tajem hem, o eni wan long olgeta ia we oli bin foldaon; mo oli bin stat blong sapraes bakegen long medel blong olgeta, wanem nao i bin save mekem bigfala paoo ia, o evri samting ia i save minim wanem.

25 Mo i bin hapen se, i bin gat plante long medel blong olgeta we i bin talem se Amon i Bigfala Spirit, mo ol narafala i bin talem se Bigfala Spirit i bin sendem hem;

26 Be ol narafala i bin toktok strong agensem olgeta evriwan, oli talem se hem i wan bigfala rabis anamol, we ol man blong Nifae i bin sendem hem blong mekem olgeta i harem i nogud.

27 Mo i bin gat sam we oli bin talem se Bigfala Spirit i bin sendem Amon blong givim hadtaem long olgeta from ol rabis fasin blong olgeta; mo se hem i bin Bigfala Spirit we i bin wajem ol man blong Nifae evri taem, we hem i bin mekem olgeta i go fri long ol han blong olgeta evri taem; mo oli bin talem se hem i Bigfala Spirit ia we i bin smasem plante long ol brata blong olgeta, ol man blong Leman.

28 Mo olsem ia nao rao i bin stat blong kam klia bigwan gud long olgeta. Mo taem we oli bin rao olsem ia nao, haosgel ia we i bin mekem olgeta blong kam tugeta i bin kam, mo taem we hem i bin luk rao we i bin stap long medel blong ol pipol ia, hem i bin sore plante tumas, i go kasem taem we hem i krae.

29 Mo i bin hapen se, hem i bin go mo tekem han blong kwin, blong maet hem i save mekem hem i girap long graon; mo taem we hem i bin tajem han blong hem, hem i bin girap mo stanap long leg blong hem, mo i bin singaot wetem wan laod voes, i se: O presem Jisas, we i bin sevem mi long wan rabis hel! O presem God, gat sore long pipol ia!

30 Mo taem we hem i bin talem samting ia, hem i bin joenem han blong hem tugeta, from hem i fulap long glad, mo hem i bin talem plante toktok we oli no bin save andastanem; mo taem we hem i bin mekem samting ia, hem i bin tekem han blong king Lamona, mo luk, hem i bin girap mo i bin stanap long ol leg blong hem.

31 Mo hem, kwiktaem nomo, i bin luk rao we i bin stap long ol man blong hem, i bin go fored mo i bin stat blong toktok strong agensem olgeta, mo blong tijim olgeta ol toktok we hem i bin harem long maot blong Amon; mo olgeta evriwan we i bin harem ol toktok blong hem i bin biliv, mo oli bin jenisim laef blong olgeta long Lod.

32 Be i bin gat plante long medel blong olgeta we oli no bin wantem harem ol toktok blong hem; taswe oli bin seraot wanwan.

33 Mo i bin hapen se, taem we Amon i bin girap, hem i bin tijim olgeta tu, mo tu evri wokman blong Lamona, hem i bin tijim olgeta; mo olgeta everiwan i bin talemaot long evri

pipol ol semfala samting—se ol hat blong olgeta i bin jenis; mekem se oli nomo bin gat tingting blong mekem rabis samting.

34 Mo luk, i bin gat plante we oli bin talem long ol pipol we oli bin luk ol enjel mo oli bin toktok wetem olgeta; mo olsem ia nao oli bin talem long olgeta ol samting blong God, mo blong stret fasin blong hem.

35 Mo i bin hapen se, i bin gat plante we oli bin biliv long ol toktok blong olgeta; mo olgeta evriwan we i bin biliv, i bin kasem baptaes; mo oli bin kam wan stret pipol, mo oli stanemap wan jos long medel blong olgeta.

36 Mo olsem ia nao wok blong Lod i bin stat long medel blong ol man blong Leman, Olsem ia nao Lod i bin stat blong poremaot Spirit blong hem daon long olgeta; mo yumi luk se hem i stretem han blong hem long evri pipol we i sakem sin mo biliv long nem blong hem.

---

### JAPTA 20

---

*Lod i sendem Amon long Midonae blong mekem ol brata blong hem we oli stap long kalabus i go fri—Amon mo Lamonaes tufala i mitim papa blong Lamonaes, we i king blong ful graon—Amon i fosem olfala king blong letem ol brata blong hem i go fri. Raonabaot 90 yia bifo Kraes i bon.*

Mo i bin hapen se, taem we oli bin stanemap wan jos long graon ia, se king Lamonaes i bin

wantem Amon blong go wetem hem long graon blong Nifae, blong hem i save soem hem long papa blong hem.

2 Mo voes blong Lod i bin kam long Amon, i talem: Yu no mas go antap long graon blong Nifae, from luk, bae king i traem blong tekem laef blong yu, be bae yu go long graon blong Midonae; from luk, brata blong yu Eron, mo tu Myulakae mo Ama i stap long kalabus.

3 Nao i bin hapen se, taem we Amon i bin harem samting ia, hem i bin talem long Lamonaes: Luk, brata blong mi wan, mo ol brata blong mi i stap long kalabus long Midonae, mo mi go blong mi save mekem olgeta oli fri.

4 Nao Lamonaes i bin talem long Amon: Mi save se, long paoa blong Lod, yu save mekem evri samting. Be luk, bae mi go wetem yu long graon blong Midonae; from king blong graon blong Midonae, we nem blong hem i Antiamno, hem i wan fren blong mi; taswe mi go long graon blong Midonae, blong mi save tokswitim king blong graon, mo bae hem i mekem ol brata blong yu i kamaot long kalabus. Nao Lamonaes i bin talem long hem: Huia i bin talem long yu se ol brata blong yu i stap long kalabus?

5 Mo Amon i bin talem long hem: I no gat wan man we i bin talem long mi, be God nomo; mo hem i bin talem long mi—go mo mekem ol brata blong yu oli fri, from oli stap long kalabus long graon blong Midonae.

6 Nao taem we Lamonaē i bin harem samting ia, hem i bin talem long ol wokman blong hem blong mekem rere ol hos blong hem mo ol kat blong hos.

7 Mo hem i bin talem long Amon se: Kam, bae mi go daon wetem yu long graon blong Midonaē, mo bae mi toktok strong long king from olgeta, blong mekem se hem i save mekem ol brata blong yu i kamaot long kalabus.

8 Mo i bin hapen se, taem we Amon mo Lamonaē tufala i stap go long ples ia, oli bin mitim papa blong Lamonaē, we i king blong evri graon.

9 Mo luk, papa blong Lamonaē i bin talem long hem: From wanem yu no bin kam long lafet blong bigfala dei, taem we mi bin mekem wan lafet blong ol boe blong mi, mo blong ol pipol blong mi?

10 Mo tu hem i bin talem: Yu stap go wea wetem man blong Nifae ia, we i wan long ol pikinini blong wan giaman man?

11 Mo i bin hapen se, Lamonaē i bin eksplenem long hem wanem ples hem i stap go long hem, from hem i bin fraet blong mekem hem i kros.

12 Mo tu hem i bin talem long hem stamba tingting ia we i bin holem taet hem long kingdom blong hem, we i mekem se hem i no bin go long papa blong hem long lafet we hem i bin mekem rere.

13 Mo nao taem we Lamonaē i bin eksplenem ol samting ia long hem, luk, long sapraes blong hem, papa blong hem i

bin kros long hem, mo i bin talem: Lamonaē, yu stap go blong mekem ol man blong Nifae ia i fri, we oli ol boe blong wan giaman man. Luk, hem i bin stilim ol bubu blong yumi; mo nao ol pikinini blong hem i kam tu long yumi blong oli save, tru long ol giaman fasin blong olgeta mo ol giaman blong olgeta, giaman long yumi, blong mekem se oli save stil long yumi bakegen, ol samting blong yumi.

14 Nao papa blong Lamonaē i bin givim oda long hem blong kilim Amon i ded wetem naef blong faet. Mo tu hem i bin givim oda long hem se bae hem i no go long graon blong Midonaē, be bae hem i gobak wetem hem long graon blong Ismael.

15 Be Lamonaē i bin talem long hem: Bae mi no kilim Amon i ded, mo tu bae mi no gobak long graon blong Ismael, be bae mi go long graon blong Midonaē blong mekem se mi save mekem ol brata blong Amon i go fri, from mi save se oli ol gudfala man mo ol tabu profet blong tru God.

16 Nao taem we papa blong hem i bin harem ol toktok ia, hem i bin kros long hem, mo hem i bin pulumaot naef blong faet blong hem, blong hem i save kilim hem i foldaon i go long graon.

17 Be Amon i bin go fored mo talem long hem: Luk, yu no mas kilim boe blong yu i ded; be i moa gud se hem bae i foldaon be i no yu, from luk, hem i bin sakem ol sin blong hem; be

sapos yu yu foldaon naoia, long kros blong yu, sol blong yu i no save sev.

18 Mo bakegen, i gud se yu no mekem wan samting; from sapos yu kilim boe blong yu i ded, from hem i no gat rong, blad blong hem bae i singaot long graon i go long Lod, God blong hem, blong pembak trabol i kam long yu; mo maet bae yu lusum sol blong yu.

19 Nao taem we Amon i bin talem ol toktok ia long hem, hem i bin ansa long hem, i se: Mi save se sapos mi kilim boe blong mi i ded, bae mi mekem blad blong wan man we i no gat rong, i ron; from hem i yu, we yu bin wantem blong smasem gud hem.

20 Mo hem i bin stretem han blong hem blong kilim Amon i ded. Be Amon i bin blokem ol strong atak blong hem, mo tu hem i bin katem han blong hem mekem se hem i no save yusum.

21 Nao taem we king i bin luk se Amon i save kilim hem i ded, hem i bin stat blong askem long Amon blong hem i save sevem laef blong hem.

22 Be Amon i bin leftemap naef blong faet blong hem, mo i bin talem long hem: Luk, bae mi kilim yu, hemia nomo sapos yu no letem ol brata blong mi oli save kamaot long kalabus.

23 Nao king, i bin fraet se bae hem i lusum laef blong hem, i bin talem: Sapos yu sevem laef blong mi bae mi letem long yu eni samting we bae yu askem, i go kasem haf blong kingdom.

24 Nao taem we Amon i bin

luk se hem i bin mekem olfala king i folem tingting blong hem, hem i bin talem long hem: Sapos yu letem ol brata blong mi oli kamaot long kalabus, mo tu yu letem Lamonaie i save kipim kingdom blong hem, mo se yu no harem nogud long hem, be letem hem i mekem samting olsem we hem i wantem long eni samting we hem i tingting. Ale bae mi sevem yu; sapos no, bae mi kilim yu foldaon i go long graon.

25 Nao taem we Amon i bin talem ol toktok ia, king i bin stat blong glad from laef blong hem.

26 Mo taem we hem i bin luk se Amon i no bin gat tingting ia blong kilim hem i ded, mo tu taem we hem i bin luk bigfala lav we hem i bin gat long boe blong hem Lamonaie, hem i bin sapraes plante, mo i bin talem: From hemia nomo evri samting we yu bin wantem, se mi mekem ol brata blong yu oli go fri, mo letem boe blong mi Lamonaie blong kipim kingdom blong hem, luk, bae mi letem long yu se boe blong mi i save kipim kingdom blong hem stat long taem ia kasem long oltaem; mo bae mi nomo rulum hem—

27 Mo bae mi letem long yu se ol brata blong yu oli save kamaot long kalabus, mo yu mo ol brata blong yu i save kam long mi, long kingdom blong mi; from bae mi wantem tumas blong luk yu. From king i bin sapraes bigwan long ol toktok we hem i bin talemaot, mo tu long ol toktok we boe blong

hem Lamonaē i bin talemaot, taswe hem i bin wantem blong lanem olgeta.

28 Mo i bin hapen se, Amon mo Lamonaē i bin gohed long rod blong olgeta, blong go long graon blong Midonaē. Mo Lamonaē i bin kasem wan agrimen tru long tingting blong king blong graon, taswe ol brata blong Amon i bin kamaot long kalabus.

29 Mo long taem Amon i bin mitim olgeta hem i bin sore plante tumas, from luk oli bin noked, mo ol strong rop we oli bin fasem olgeta wetem, i bin kakae skin blong olgeta. Mo oli bin harem nogud long hanggri tu, tosta, mo evri kaen hadtaem; be oli bin wet longtaem long ol hadtaem blong olgeta.

30 Mo, olsem we i bin hapen, hem i olsem we i mas hapen long olgeta we oli bin go long ol han blong wan pipol we hat blong olgeta i moa strong mo oli wan pipol we i moa stronghed; taswe oli no bin wantem blong lisin long ol toktok blong olgeta, mo oli bin sakemaot olgeta, mo oli bin kilim olgeta, mo oli bin ronemaot olgeta long wan haos i go long narafala haos, mo long wan ples i go long narafala ples, go kasem taem we oli bin kasem graon blong Midonaē; mo long ples ia oli bin tekem olgeta mo sakem olgeta i go long kalabus, mo oli bin fasem olgeta wetem ol strongfala rop, mo oli bin stap long kalabus blong plante dei, mo afta Lamonaē mo Amon i bin mekem olgeta i go fri.

Histri blong ol prijing blong Eron mo Myulakae, mo ol brata blong olgeta, long ol man blong Leman.

*I stat long japta 21 i go kasem japta 26 nomo.*

---

## JAPTA 21

---

*Eron i tijim ol man blong Amalekae long saed blong Kraes mo atonmen blong hem—Oli putum Eron mo ol brata blong hem long kalabus long Midonaē—Afta oli mekem olgeta oli go fri, oli tij long ol haos blong prea mo oli helpem plante oli jenisim laef blong olgeta—Lamonaē i givim fridom blong jus blong biliv long God o no biliv long God, long ol pipol we oli stap long graon blong Ismael. Raonabaot 90–77 yia bifo Kraes i bon.*

NAO taem we Amon mo ol brata blong hem i bin seraotem olgeta wanwan long ol boda long graon blong ol man blong Leman, luk Eron i bin tekem rod blong hem i go long graon ia we ol man blong Leman i bin singaotem, Jerusalem, oli singaotem ples ia afta long graon we ol bubu blong olgeta i bon long hem; mo hem i bin stap longwe i joenem ol boda blong Momon.

2 Nao ol man blong Leman mo ol man blong Amalekae, mo ol pipol blong Amulon, i bin mekem wan bigfala bigtaon, we oli bin singaotem Jerusalem.

3 Nao ol man blong Leman, olgeta bakegen, oli bin stronghed inaf, be ol man blong Amalekae

mo ol man blong Amulon oli stronghed moa; taswe oli bin mekem se ol man blong Leman blong mekem ol hat blong olgeta i kam strong, blong oli save kam strong long fasin nogud mo long ol rabis sin blong olgeta.

4 Mo i bin hapen se, Eron i bin kam long bigtaon blong Jerusalem, mo fas taem i bin stat blong prij long ol man blong Amalekae. Mo hem i bin stat blong prij long olgeta long ol haos blong prea blong olgeta, from oli bin mekem ol haos blong prea folem oda blong ol Nehor; from plante long ol man blong Amalekae mo ol man blong Amulon i bin folem oda blong ol Nehor.

5 Taswe, taem we Eron i bin go insaed long wan blong ol haos blong prea blong olgeta blong prij long ol pipol, mo taem we hem i stap toktok long olgeta, luk wan long ol man blong Amalekae i bin girap, mo i bin stat blong rao wetem hem, i se: Wanem ia we yu bin stap testifae? Yu bin luk wan enjel? From wanem ol enjel i no kamaot long mifala? Luk ol pipol ia oli no gud olsem ol pipol blong yu?

6 Yu talem tu se, hemia nomo sapos mifala i no sakem sin, bae mifala i ded. Hao nao yu save tingting mo ol samting we ol hat blong mifala i wantem blong mekem? Hao nao yu save se mifala i gat nid blong sakem sin? Hao nao yu save se mifala i no wan stret pipol? Luk, mifala i bin bildim ol ples blong wosip, mo mifala i kam

tugeta blong wosipim God. Mifala i biliv se God bae i sev-em evri man.

7 Nao Eron i bin talem long hem: Yu biliv se Pikinini blong God bae i kam blong pemaot evri man long ol sin blong olgeta?

8 Mo man ia i bin talem long hem: Mifala i no biliv se yu save eni samting olsem. Mifala i no biliv long ol krangke kastom ia. Mifala i no biliv se yu save ol samting we bae i kam, mo tu mifala i no biliv se ol bubu blong yu mo tu ol bubu blong mifala oli bin save long saed blong ol samting we oli bin tokbaot, long saed blong ol samting we bae i kam.

9 Nao Eron i bin stat blong openem ol skripja long olgeta long saed blong taem we Kraes bae i kam, mo tu long saed blong laef bakegen blong ded, mo se bae i no gat fasin ia blong pemaot man, sapos i no kam tru long ded mo ol hadtaem blong Kraes, mo atonmen blong blad blong hem.

10 Mo i bin hapen se, taem we hem i bin stat blong eksplenem ol samting ia long olgeta, oli bin kros long hem, mo oli bin stat blong jikim hem; mo oli no bin wantem harem ol toktok we hem i stap talemaot.

11 Taswe, taem we hem i bin luk se oli no wantem harem ol toktok blong hem, hem i bin aot long haos blong prea blong olgeta, mo i bin kam long wan vilej we oli bin singaotem Anae-Antae. Mo long ples ia hem i bin faenem Myulakae i stap

prijim ol toktok long olgeta; mo tu Ama mo ol brata blong hem. Mo oli tokbaot wetem plante long saed blong trutok.

12 Mo i bin hapen se, oli bin luk se ol pipol bae i mekem ol hat blong olgeta i kam strong, taswe, oli bin aot mo kam long graon blong Midonae. Mo oli bin prijim toktok long plante, mo smol nomo i bin biliv long ol toktok we oli bin tijim.

13 Be, Eron mo samfala brata blong hem, oli bin tekem olgeta mo sakem olgeta i go long kalabus, mo smol haf blong olgeta we i bin stap i bin ronwe long graon blong Midonae, long ol eria raonabaot.

14 Mo olgeta we oli bin sakem olgeta i go long kalabus, i bin harem nogud long plante samting, mo oli bin go fri tru long han blong Lamonaе mo Amon, mo oli bin givim kakae mo klos long olgeta.

15 Mo oli bin go aot bakegen blong talemaot trutok, mo olsem ia nao oli bin kamaot long kalabus blong fastaem; mo olsem ia nao oli bin harem nogud.

16 Mo oli bin go fored long eni ples we Spirit blong Lod i bin lidim olgeta i go long hem, prijim toktok blong God long evri haos blong prea blong ol man blong Amalekae, o long evri miting blong ol man blong Leman we oli bin save akseptem olgeta blong go insaed.

17 Mo i bin hapen se, Lod i bin stat blong blesem olgeta, inaf blong mekem se oli bin karem plante oli kam kasem save blong trutok; yes, oli bin help-

em plante blong luksave ol sin blong olgeta mo ol kastom blong ol bubu blong olgeta, we i no stret.

18 Mo i bin hapen se, Amon mo Lamonaе i bin lego graon blong Midonae mo oli bin gobak long graon blong Ismael, we i bin graon blong olgeta we i kam long ol papa.

19 Mo king Lamonaе i no bin wantem letem Amon blong wok blong hem, o kam wokman blong hem.

20 Be hem i bin mekem se oli mas bildim ol haos blong prea long graon blong Ismael; mo hem i bin mekem ol man blong hem, o ol pipol we hem i rulum olgeta, blong oli kam tugeta.

21 Mo hem i bin glad from olgeta, mo hem i bin tijim olgeta plante samting. Mo tu hem i bin talemaot long olgeta se oli wan pipol we hem i rulum olgeta, mo se oli wan fri pipol, se oli bin fri long ol bigfala hadtaem blong king, papa blong hem; from se papa blong hem i bin letem hem blong save rulum ol pipol ia we oli stap long graon blong Ismael, mo long ol graon we i stap raonabaot.

22 Mo tu hem i bin talemaot long olgeta se oli save jus blong wosipim Lod, God blong olgeta folem tingting blong olgeta, long eni ples we oli bin stap long hem, sapos i wan graon we king Lamonaе i rul long hem.

23 Mo Amon i bin prij long ol man blong king Lamonaе; mo i bin hapen se, hem i bin tijim olgeta evri samting long saed blong stret fasin. Mo

hem i bin leftemap tingting blong olgeta evri dei, wetem fasin ia blong stap strong oltaem; mo oli bin lisen gud long ol toktok blong hem, mo ol pipol i holem taet strong ol komanmen blong God.

---

JAPTA 22

---

*Eron i tijim papa blong Lamonaē long saed blong taem we wol i bin stat, taem Adam i foldaon, mo plan blong fasin blong pemaot man, tru long Kraes—King mo evri man long haos blong hem i jenisim laef blong olgeta—Olsem wanem oli seraotem graon bitwin ol man blong Nifae mo ol man blong Leman. Raonabaot 90-77 yia bifo Kraes i bon.*

NAO, taem we Amon i bin stap gohed olsem ia nao blong tijim ol man blong Lamonaē, bae yumi gobak long histri blong Eron mo ol brata blong hem; from afta hem i aot long graon blong Midonaē, Spirit i bin lidim hem i go long graon blong Nifae, i go kasem long haos blong king, we i bin rulum evri graon be graon blong Ismael nomo hem i no bin rul long hem; mo hem i bin papa blong Lamonaē.

2 Mo i bin hapen se hem i bin go luk hem insaed long haos blong king, wetem ol brata blong hem, mo hem i bin bodaon long fes blong king, mo i bin talem long hem: Luk, O king, mifala i ol brata blong Amon, we yu bin mekem mifala i kamaot long kalabus.

3 Mo nao, O king, sapos yu save sevem laef blong mifala bae mifala i kam ol wokman blong yu. Mo king i bin talem long olgeta se: Girap, from bae mi letem laef blong yufala long yufala, mo bae mi no letem se yufala i kam wokman blong mi; be bae mi askem strong se bae yufala i givhan long mi; from tingitng blong mi i stap mekem mi wari lelebet, from gladhat blong brata blong yufala mo ol bigfala toktok blong brata blong yufala, Amon; mo mi wantem blong save stamba tingting from wanem hem i no bin kamaot long Midonaē mo kam antap wetem yufala.

4 Mo Eron i bin talem long king: Luk, Spirit blong Lod i bin singaotem hem i go long nara-fala rod; hem i bin go long graon blong Ismael; blong tijim ol pipol blong Lamonaē.

5 Nao king i bin talem long olgeta se: Wanem nao samting ia we yufala i bin talem long saed blong Spirit blong Lod? Luk, hemia i samting we i stap mekem se mi wari.

6 Mo tu, wanem i samting we Amon i bin talem—Sapos yu sakem sin, bae yu sev, mo sapos yu no sakem sin, bae oli sakem-aot yu long las dei?

7 Mo Eron i bin ansa long hem mo i bin talem long hem: Yu biliv se i gat wan God? Mo king i bin talem: Mi save se ol man blong Amalekaē i talem se i gat wan God, mo mi bin letem olgeta blong mekem ol ples blong wosip, blong oli save kam tugeta blong wosipim hem. Mo



nao sapos yu talem se i gat wan God, luk bae mi biliv.

8 Mo nao taem we Eron i bin harem samting ia, hat blong hem i bin stat blong gat glad, mo hem i bin talem: Luk, i tru tumas se olsem we yu stap laef, O king, i gat wan God.

9 Mo king i bin talem: I tru se God i Bigfala Spirit ia we i bin tekemaot ol bubu blong yumi i kamaot long graon blong Jerusalem?

10 Mo Eron i bin talem long hem: Yes, hem i Bigfala Spirit ia, mo hem i bin mekem evri samting long heven mo long wol. Yu biliv long samting ia?

11 Mo hem i bin talem: Yes, mi biliv se Bigfala Spirit i bin mekem evri samting, mo mi wantem blong save, talem long mi long saed blong evri samting ia, mo bae mi biliv long ol toktok blong yu.

12 Mo i bin hapen se taem we Eron i bin luk se king bae i save bilivim ol toktok blong hem, hem i bin ridim ol skripja long king, stat long taem we God i bin mekem Adam—olsem wanem God i bin mekem man folem pikja blong hem, mo we God ia i bin givim long hem ol komanmen, mo from fasin blong brekem loa, man i bin foldaon.

13 Mo Eron i bin eksplenem long hem ol skripja stat long taem blong mekem Adam, i eksplenem long hem taem man i bin foldaon, mo laef blong olgeta blong wol, we oli stap long hem, mo tu plan blong fasin blong pemaot man, we oli

bin mekem rere stat long taem we wol i bin stat, tru long Kraes, blong eni man ia we bae oli biliv long nem blong hem.

14 Mo from we man i bin foldaon, hem i no inaf blong kasem eni samting long hemwan; be ol hadtaem mo ded blong Kraes i bin pem praes blong ol sin blong olgeta, tru long fet mo fasin blong sakem sin, mo i gat sam moa; mo we hem i brekem ol rop blong ded, blong mekem se gref bae i no save win, mo mekem se hop blong glori i winim harem nogud blong ded; Mo Eron i bin eksplenem ol samting ia long king.

15 Mo i bin hapen se afta we Eron i bin eksplenem ol samting ia long hem, king i bin talem: Wanem bae mi mekem blong mi save kasem laef ia we i no save finis we yu bin tokbaot? Yes, wanem bae mi mekem blong mi save bon long God, mo mekem rabis spirit ia i kamaot olgeta long jes blong mi, mo kasem Spirit blong hem, blong mi save fulap long glad, blong hem i no save sakemaot mi long las dei? Luk, hem i bin talem se, bae mi lego evri samting we mi gat, yes, bae mi givim kingdom blong mi, blong mekem se mi save kasem bigfala glad ia.

16 Be Eron i bin talem long hem: Sapos yu wantem samting ia, sapos yu bodaon long fored blong God, yes, sapos yu sakem evri sin blong yu, mo yu bodaon long fored blong God, mo singaotem nem blong hem long fet, bilivim strong se bae

yu kasem, ale bae yu kasem hop we yu wantem.

17 Mo i bin hapen se taem we Eron i bin talem ol toktok ia, king i bodaon long fored blong Lod, long ol ni blong hem; yes, go kasem hem i bin foldaon long graon mo i bin singaot laod, i talem:

18 O God, Eron i bin talem long mi se i gat wan God; mo sapos i gat wan God, mo sapos yu yu God, plis soemaot yu long mi, mo bae mi sakem evri sin blong mi blong save yu, mo blong mekem se mi save girap long ded, mo mi sev long las dei. Mo nao taem we king i bin talem ol toktok ia, paoa blong God i bin nokem hem olsem se hem i ded.

19 Mo i bin hapen se ol wokman blong hem i bin go mo bin talem long kwin evri samting we i bin hapen long king. Mo hem i bin kam long king; mo taem we hem i bin luk hem i stap silip olsem se hem i ded, mo tu Eron mo ol brata blong hem i stap stanap olsem se olgeta nao i bin mekem king i foldaon, mo hem i bin kros long olgeta, mo i bin talem long ol wokman blong hem, o ol wokman blong king, blong tekem olgeta mo kilim olgeta i ded.

20 Nao ol wokman i bin luk hao nao king i bin foldaon, from samting ia oli bin fraet blong putum han blong olgeta long Eron mo ol brata blong hem; mo oli bin askem long kwin, oli se: From wanem yu talem long mifala blong mifala i mas kilim ol man ia i ded,

taem, luk wan long olgeta i moa strong bitim mifala evriwan? Taswe bae mifala i foldaon long fored blong olgeta.

21 Nao taem we kwin i bin luk fraet blong ol wokman, hem tu i bin stat blong fraet tumas se bae samfala rabis samting i kam long hem. Mo hem i bin talem long ol wokman blong hem blong go singaotem ol pipol, blong oli save kilim Eron mo ol brata blong hem i ded.

22 Nao taem we Eron i bin luk se kwin i stil gohed blong gat strongfala tingting blong kilim olgeta i ded, hem, tu i bin save se ol pipol i bin mekem ol hat blong olgeta i kam strong, hem i bin fraet se bae wan grup blong pipol i kam tugeta, mo bae i gat wan bigfala rao, mo wan noes long medel blong ol pipol; taswe hem i bin pusum han blong hem mo i bin mekem king i girap long graon, mo i bin talem long hem: Stanap. Mo hem i bin stanap long leg blong hem, hem i kasem paoa blong hem.

23 Nao oli bin mekem samting ia long fes blong kwin mo plante long ol wokman. Mo taem we oli bin luk samting ia oli bin sapraes plante, mo oli bin stat blong fraet. Mo king i bin go fored, mo i bin stat blong givhan long olgeta. Mo hem i bin givhan long olgeta, mekem se evriwan long haos blong hem i bin jenisim laef blong olgeta long Lod.

24 Nao i bin gat wan bigfala grup blong pipol we oli bin kam tugeta from komanmen blong

kwin, mo oli bin stat blong gat bigfala komplem long medel blong olgeta bakegen from Eron mo ol brata blong hem.

25 Be king i bin go fored long olgeta mo i bin givhan long olgeta. Mo i bin mekem olgeta oli nomo kros long Eron mo long olgeta we oli bin stap wetem hem.

26 Mo i bin hapen se taem we king i bin luk se ol pipol oli nomo kros, hem i bin mekem Eron mo ol brata blong hem i go fored long medel blong grup blong pipol, mo mekem se oli save prijim trutok long olgeta.

27 Mo i bin hapen se king i bin sendem wan toktok i go long pablik long evri ples long graon, long evri pipol blong hem we oli stap long evri graon blong hem, we oli bin stap long evri eria raonabaot, we boda blong olgeta i bin go kasem solwota, long is mo long wes, mo we wan smolfala graon blong ples we i no gat man long hem i bin seraotem olgeta aot long graon blong Sarahemla, we i bin ron stat long solwota blong is i go long solwota blong wes, mo raonabaot long ol boda blong so blong solwota, mo ol boda blong ples we i no gat man long hem, we i bin stap long not klosap long graon blong Sarahemla, tru long ol boda blong Mantae, klosap long hed blong reva blong Saedon, we i ron stat long is i go long wes—mo olsem ia nao ol man blong Leman mo ol man blong Nifae oli bin seraot.

28 Nao, moa pat blong ol man

blong Leman we oli les i bin stap long ples we i no gat man long hem, mo oli bin stap long ol tenet; mo oli bin stap olbaot long ples we i no gat man long hem long wes long graon blong Nifae; yes, mo tu long wes blong graon blong Sarahemla, long ol boda klosap long so blong solwota, mo long wes long graon blong Nifae, long ples long ol graon we i bin kam long ol fasfala bubu blong olgeta, mo olsem ia nao boda i bin folem solwota, klosap long so blong solwota.

29 Mo tu i bin gat plante man blong Leman long is klosap long so blong solwota, long ples we ol man blong Nifae i bin pusum olgeta. Mo olsem ia nao ol man blong Leman i bin klosap raonem ol man blong Nifae; be ol man blong Nifae i bin holem taet evri pat blong not blong graon we boda i stap long ples we i no gat man long hem, long maot blong reva blong Saedon, stat long is kasem wes, raonabaot long saed blong ples we i no gat man long hem; long not, go kasem taem we oli bin kam long graon we oli bin singaotem Plante.

30 Mo boda blong hem i bin stap long graon we oli bin singaotem Emti, from hem i longwe tumas long not mekem se i bin kam insaed long graon we ol pipol i bin stap long hem mo i bin ded, we yumi bin tokbaot ol bun blong olgeta, we ol pipol blong Sarahemla i bin faenem, from hem i fasfala ples we oli bin stap long hem.

31 Mo oli bin kamaot long ples ia i go antap long saot blong ples we i no gat man long hem. Olsem ia nao oli bin singaotem graon long not Emti, mo graon we i bin stap long saot oli bin singaotem Plante, from ples ia we i no gat man long hem i fulap long wael anamol blong evri kaen, wan pat blong olgeta we i bin kam long graon long not blong faenem kakae.

32 Mo nao, hem i wan mo haf dei nomo blong wan man blong Nifae blong wokbaot long boda blong Plante mo graon blong Emti, stat long is i go long solwota blong wes; mo olsem ia nao graon blong Nifae mo graon blong Sarahemla, klosap wota i bin raonem olgeta, i bin gat wan smol pat blong graon we i bin stap bitwin graon blong not mo graon blong saot.

33 Mo i bin hapen se ol man blong Nifae i bin stap long graon Plante, stat long solwota blong is i go long solwota blong wes, mo olsem ia nao ol man blong Nifae long ol waes tingting blong olgeta, wetem ol gad blong olgeta mo ol ami blong olgeta, i bin blokem ol man blong Leman i stap long saot, blong mekem se oli nomo save stap long graon long not, blong mekem se oli no save rul-um ol graon we i stap long not.

34 Taswe, ol man blong Leman oli nomo save holem taet sam moa graon, be graon blong Nifae nomo, mo raonabaot long ples ia we i no gat man long hem. Nao samting ia i bin waes tingting blong ol man

blong Nifae—olsem ol man blong Leman i bin wan enemi long olgeta, oli no bin save letem ol hadtaem blong olgeta long evri han, mo tu blong mekem se oli save gat wan kantri we oli save ronwe i go long hem, folem ol tingting blong olgeta.

35 Mo nao mi, afta we mi bin talem samting ia, mi gobak long histri blong Amon mo Eron, mo Omna mo Himnae, mo ol brata blong olgeta.

---

### JAPTA 23

---

*Oli talemaot long pablik se oli fri blong biliv long God o no biliv long God—Ol man blong Leman long ol seven graon mo ol bigtaon oli jenisim laef blong olgeta—Oli singaotem olgeta bakegen ol man Antae-Nifae-Lihae mo oli fri long panis—Ol man blong Amalekae mo ol man blong Amulon i sakem trutok. Raonabaot 90–77 yia bifo Kraes i bon.*

LUK, nao i bin hapen se king blong ol man blong Leman i bin sendem wan toktok i go long pablik long medel blong evri pipol blong hem, blong oli no mas putum ol han blong olgeta long Amon, o Eron, o Omna, o Himnae, mo ol brata blong olgeta we bae oli go aot blong prijim toktok blong God, long eni ples we bae oli stap long hem, long eni pat blong graon blong olgeta.

2 Yes, hem i bin sendem wan toktok long olgeta, se oli no mas putum ol han blong olgeta

long olgeta blong fasem olgeta, o blong sakem olgeta long kalabus; mo tu oli no mas spet long olgeta, o faetem olgeta, o sakemaot olgeta long ol haos blong prea blong olgeta, o givim hadtaem long olgeta; mo oli no mas stonem olgeta, be blong oli mas letem olgeta blong go long ol haos blong olgeta, mo tu long ol tempol blong olgeta, mo ol ples blong wosip blong olgeta.

3 Mo olsem ia nao oli save go aot mo prijim trutok folem ol tingting blong olgeta, from king i bin jenisim laef blong hem i go long Lod, mo evri man long haos blong hem; taswe hem i bin sendem toktok blong hem i go long pablik, long evri ples long graon long ol pipol blong hem, blong mekem se toktok blong God i no save gat wan samting we i save blokem hem, be blong i save go fored truaot long evri graon, blong mekem se ol man blong hem i luksave ol nogud kastom blong ol bubu blong olgeta, mo blong oli save luksave se olgeta evriwan oli ol brata, mo se oli no mas kilim man i ded, o blong stil long taem blong faet, o blong stil, o blong mekem adaltri, o blong mekem eni kaen fasin nogud.

4 Mo nao i bin hapen se, taem we king i bin sendem toktok ia i go long pablik, se Eron mo ol brata blong hem i bin go aot long wan bigtaon i go long narafala bigtaon, mo long wan haos blong wosip i go long narafala wan, stanemap ol jos, mo konsekretem ol pris mo ol tija truaot long graon long

medel blong ol man blong Leman, blong prijim mo blong tijim toktok blong God long medel blong olgeta; mo olsem ia nao oli bin stat blong gat bigfala sakses.

5 Mo i bin gat plante taosen long olgeta we oli bin helpem olgeta blong save long saed blong Lod, yes, i bin gat plante taosen long olgeta we oli bin helpem olgeta blong biliv long ol kastom blong ol man blong Nifae; mo oli bin tijim olgeta ol histri mo profesi we oli bin pasem i kam daon kasem naoia.

6 Mo i tru se olsem we Lod i stap laef, i tru se olgeta we oli bin biliv, o olgeta we oli bin helpem olgeta blong kam save long saed blong trutok, tru long ol prijing blong Amon mo ol brata blong hem, folem spirit blong revelesen, mo blong profesi, mo paoa blong God we i stap mekem ol merikel long olgeta—yes, mi talem long yufala se, olsem we Lod i stap laef, olgeta long ol man blong Leman we oli bin biliv long ol prijing blong olgeta, mo oli bin jenisim laef blong olgeta long Lod, oli neva bin foldaon i gowe.

7 From oli bin kam wan stret pipol; oli bin putum daon ol tul blong faet blong olgeta, we oli yusum taem oli tanem olgeta agensem man, blong oli no bin faet agensem God bakegen, mo agensem eni long ol brata blong olgeta.

8 Nao, hemia i olgeta we oli bin jenisim laef blong olgeta long Lod:

9 Ol pipol blong Leman we oli bin stap long graon blong Ismael;

10 Mo tu ol pipol blong Leman we i bin stap long graon blong Midonae;

11 Mo tu ol piopl blong Leman we i bin stap long bigtaon blong Nifae;

12 Mo tu ol pipol blong Leman we oli bin stap long graon blong Saelom, mo we i bin stap long graon blong Semlon, mo long bigtaon blong Lemyul, mo long bigtaon blong Simnaelom.

13 Mo hemia i olgeta nem blong ol bigtaon blong ol man blong Leman we oli bin jenisim laef blong olgeta i go long Lod; mo hemia i olgeta ia we oli bin putum daon ol tul blong faet blong olgeta we oli bin yusum taem oli bin go agensem man, yes, evri tul blong faet blong olgeta; mo olgeta evriwan oli ol man blong Leman.

14 Mo ol man blong Amalekae i no bin jenisim laef blong olgeta, be wan nomo; mo tu i no bin gat eni long ol man blong Amulon; be oli bin mekem ol hat blong olgeta i kam strong, mo tu ol hat blong ol man blong Leman long pat blong graon ia, eni ples we oli bin stap, yes, mo evri vilej blong olgeta mo evri bigtaon blong olgeta.

15 Taswe, mifala i bin talemaot evri nem blong ol bigtaon blong ol man blong Leman we oli bin sakem sin mo oli bin kam blong save long saed blong trutok, mo oli bin jenisim laef blong olgeta.

16 Mo nao i bin hapen se king mo olgeta ia we oli bin jenisim

laef blong olgeta, i bin wantem blong kasem wan nem, blong mekem se oli save kam defren long ol brata blong olgeta; taswe king i bin askem Eron mo plante long ol pris, long saed blong wanem nem bae oli tekem long olgeta blong mekem se oli save defren long olgeta narawan.

17 Mo i bin hapen se nem we oli bin singaotem olgeta long hem, i Antae-Nifae-Lihae; mo oli bin singaotem olgeta long nem ia, mo oli nomo bin singaotem olgeta ol man blong Leman.

18 Mo oli bin stat blong kam wan pipol we i wok strong tumas wetem ol han blong olgeta; yes, mo oli bin fren gud wetem ol man blong Nifae; taswe, oli bin statem wan fasin blong gat fren wetem olgeta, mo panis blong God i nomo bin folem olgeta.

---

#### JAPTA 24

---

*Ol man blong Leman i kam agensem ol pipol blong God—Ol man Antae-Nifae-Lihae oli hapi long Kraes mo ol enjel oli visitim olgeta—Oli jus blong kasem ded long ples blong faet blong sevem laef blong olgeta—Moa man blong Leman oli jenisim laef blong olgeta. Raonabaot 90–77 yia bifo Kraes i bon.*

Mo i bin hapen se ol man blong Amalekae mo ol man blong Amulon, mo ol man blong Leman we oli bin stap long graon blong Amulon, mo tu long graon blong Helam, mo we oli bin stap long graon

blong Jerusalem, mo long en, long evri graon raonabaot, we oli no bin jenisim laef blong olgeta mo no bin tekem long olgeta, nem blong Antae-Nifae-Lihae; ol man blong Amalekae mo ol man blong Amulon oli bin stikim tingting blong olgeta, blong oli kam kros agensem ol brata blong olgeta.

2 Mo fasin ia blong no laekem olgeta nating, i bin kam strong tumas agensem olgeta, inaf blong mekem se oli bin stat blong tanem olgeta agensem king blong olgeta, mekem se oli no bin wantem hem blong stap olsem king blong olgeta; taswe, oli bin tekem ol tul blong faet agensem ol pipol blong Antae-Nifae-Lihae.

3 Nao king i bin givim kingdom long boe blong hem, mo hem i bin singaotem nem blong hem Antae-Nifae-Lihae.

4 Mo king i bin ded long semfala yia we ol man blong Leman i bin stat blong mekem rere blong go faet agensem ol pipol blong God.

5 Nao taem we Amon mo ol brata blong hem, mo olgeta evriwan we oli bin go antap wetem hem i bin luk ol man blong Leman oli stap rere blong smasem ol brata blong olgeta, oli bin kam long graon blong Midian, mo long ples ia Amon i bin mitim evri brata blong hem; mo long ples ia, oli bin go long graon blong Ismael blong oli save holem wan kaonsel wetem Lamona, mo tu wetem brata blong hem Antae-Nifae-Lihae; wanem oli mas mekem

blong lukaot gud long olgeta agensem ol man blong Leman.

6 Nao i no bin gat wan sol nating long medel blong evri pipol ia, we oli bin jenisim laef blong olgeta long Lod, we i bin wantem blong tekem ol tul blong faet agensem ol brata blong olgeta; no, oli no bin wantem tu blong mekem rere blong faet; yes, mo tu king blong olgeta i bin givim oda long olgeta blong no mekem olsem.

7 Nao, hemia ol toktok we hem i bin talem long ol pipol long saed blong samting ia: Mi talem tangkyu long God blong mi, ol pipol blong mi we mi lavem tumas, we bigfala God blong yumi, long gud fasin blong hem, i bin sendem ol brata ia blong yumi, ol man blong Nifae, long yumi blong prij long yumi, mo blong helpem yumi luksave ol kastom blong ol nogud bubu blong yumi.

8 Mo luk, mi talem tangkyu long bigfala God blong mi, we hem i bin givim long yumi wan pat blong Spirit blong hem blong mekem hat blong yumi i kam sofsof, mekem se yumi bin statem wan fasin ia blong mekem ol fren wetem ol brata ia, ol man blong Nifae.

9 Mo luk, mi talem tangkyu tu long God blong mi, from we hem i bin openem fasin ia blong mekem fren, yumi bin luksave ol sin blong yumi, mo long plante fasin ia blong kilim man i ded we yumi bin mekem.

10 Mo tu mi talem tangkyu long God blong mi, yes, bigfala God blong mi, we hem i bin

letem yumi blong yumi save sakem ol samting ia, mo tu we hem i bin fogivim yumi long ol plante sin ia blong yumi mo ol fasin ia blong kilim ded man we yumi bin stap mekem, mo hem i bin tekemaot ol rong long hat blong yumi tru long ol gudfala wok blong Pikinini blong hem.

11 Mo nao luk, ol brata blong mi, from hemia evri samting we yumi save mekem (from we yumi bin moa lus bitim evri man) blong sakem evri sin blong yumi mo plante fasin blong kilim man i ded we yumi bin mekem, mo blong mekem God blong tekemaot olgeta long ol hat blong yumi, from hemia evri samting we yumi bin save mekem blong sakem sin inaf long fored blong God blong mekem se bae hem i tekemaot ol mak blong yumi—

12 Nao, ol gudfala brata blong mi we mi lavem tumas, from God i bin tekemaot ol mak blong yumi, mo ol naef blong faet blong yumi oli bin kam saen, ale letem yumi nomo makem ol naef blong faet blong yumi wetem blad blong ol brata blong yumi.

13 Luk, mi talem long yufala, No, letem yumi holem taet ol naef blong faet blong yumi blong ol mak blong ol blad blong ol brata blong yumi i no stap long olgeta; from maet, sapos yumi mekem mak long ol naef blong faet blong yumi bakegen yumi nomo save wasem olgeta blong oli kam saen tru long blad blong Pikinini

blong bigfala God blong yumi, we bae i ron from atonmen blong ol sin blong yumi.

14 Mo bigfala God i bin gat sore long yumi, mo i bin soemaot ol samting ia long yumi, blong mekem se yumi no save ded; yes, mo hem i bin soemaot ol samting ia fastaem, from hem i lavem ol sol blong yumi olsem we hem i lavem ol pikinini blong yumi; taswe, long sore blong hem, hem i stap visitim yumi tru long ol engel blong hem, blong mekem se oli save soemaot plan blong fasin blong sevem man long yumi, mo tu long ol jeneresen blong fiuja.

15 O, hamas nao i bigfala sore blong God blong yumi! Mo nao luk, from hemia i evri samting we yumi save mekem blong tekemaot ol mak blong yumi, mo oli mekem ol naef blong faet blong yumi oli saen, bae yumi haedem olgeta blong mekem se oli save stap saen, olsem wan testemoni long God blong yumi long las dei, o long dei ia we bae oli mekem yumi stanap long fored blong hem blong hem i jajem yumi, se yumi no bin putum wan mak long ol naef blong faet blong yumi long blad blong ol brata blong yumi, stat long taem we hem i bin talemaot ol toktok blong hem long yumi, mo i bin mekem yumi klin from samting ia.

16 Mo nao, ol brata blong mi, sapos ol brata blong yumi i stap lukaot blong kilim yumi, luk, bae yumi haedem ol naef blong faet blong yumi, yes, bae yumi berem olgeta dip long



graon, blong mekem se oli save stap saen, olsem wan testimoni we yumi neva bin yusum olgeta, long las dei; mo sapos ol brata blong yumi oli smasem yumi, luk, bae yumi go long God blong yumi mo bae yumi sev.

17 Mo nao i bin hapen se, taem we king i bin endem ol toktok ia, mo evri pipol i bin kam tugeta, oli bin tekem ol naef blong faet blong olgeta, mo evri tul we oli bin yusum blong mekem blad blong man i ron, mo oli bin berem olgeta dip long graon.

18 Mo oli bin mekem samting ia from hem i, long ae blong olgeta, wan testimoni long God, mo tu long man, se bae oli nomo yusum ol tul blong faet bakegen blong mekem blad blong man i ron; mo oli bin mekem samting ia, blong soemaot tru mo mekem kavenan wetem God, se long ples blong mekem blad blong ol brata blong olgeta i ron, bae oli givim laef blong olgeta bakegen; mo long ples blong tekemaot laef blong wan brata, bae oli givim long hem; mo long ples blong stap les, bae oli wok plante wetem ol han blong olgeta.

19 Mo olsem ia nao yumi luk se, taem we ol man blong Leman i kam blong biliv mo blong save trutok, oli bin strong, mo bae oli harem nogud go kasem ded long ples blong mekem sin; mo olsem ia nao yumi luk se oli bin berem ol tul blong olgeta blong pis, o oli bin berem ol tul blong faet blong olgeta, from pis.

20 Mo i bin hapen se ol brata

blong olgeta, ol man blong Leman, i bin mekem rere blong faet, mo oli bin kam antap long graon blong Nifae from stamba tingting ia blong smasem king, mo blong putum narawan long ples blong hem, mo tu blong smasem ol pipol blong Antae-Nifae-Lihae aot long graon.

21 Nao taem we ol pipol i bin luk se oli stap kam agensem olgeta, oli bin go aot blong mitim olgeta, mo oli bin foldaon long graon long fored blong olgeta, mo oli bin stat blong prea long nem blong Lod; mo ol bodi blong olgeta i bin stap olsem ia nao, taem we ol man blong Leman i bin stat blong atakem olgeta, mo oli bin stat blong kilim olgeta i ded wetem naef blong faet.

22 Mo olsem ia nao oli no bin mitim eniwan we i bin stanap strong agensem olgeta, oli bin kilim ded wan taosen mo faef long olgeta; mo mifala i save se God i blesem olgeta, from oli bin go blong stap wetem God blong olgeta.

23 Nao taem we ol man blong Leman i bin luk se ol brata blong olgeta bae oli no ronwe long ol naef blong faet, mo tu bae oli no tanem olgeta i go long raet han o long lef, be bae oli stapdaon mo ded, mo pres-em God kasem taem we oli ded long naef blong faet—

24 Nao taem we ol man blong Leman i bin luk samting ia, oli bin stop blong kilim olgeta i ded, mo i bin gat plante we hat blong olgeta i solap insaed long olgeta from ol brata blong ol-

geta, we i bin foldaon long naef blong faet, from oli bin sakem ol samting we oli bin mekem.

25 Mo i bin hapen se oli bin sakem daon ol tul blong faet blong olgeta, mo bae oli no tekem olgeta bakegen, from oli bin filim sore tumas from ol fasin blong kilim man i ded we oli bin mekem; mo oli bin kam daon olsem ol brata blong olgeta, mo oli bin dipen long ol sore blong olgeta ia we oli bin leftemap ol han blong olgeta blong kilim olgeta i ded.

26 Mo i bin hapen se i gat plante moa we oli bin kam joenem ol man blong God, mo namba blong olgeta i bitim olgeta we oli bin kilim olgeta i ded; mo olgeta we oli bin ded, oli ol stret pipol, taswe yumi no gat wan stamba tingting blong no biliv strong be se oli bin sev.

27 Mo i no bin gat wan nogud man we oli bin kilim hem i ded long medel blong olgeta, be i bin gat moa bitim wan taosen we oli bin helpem olgeta i kam blong save trutok; olsem ia nao yumi luk we Lod i stap wok long plante wei, long fasin blong sevem man, blong ol pipol blong hem.

28 Nao bigfala namba blong ol man blong Leman we oli bin kilim ded fulap long ol brata blong olgeta, oli ol man blong Amalekae mo ol man blong Amulon, mo bigfala namba blong olgeta oli bin folem oda blong ol Nehor.

29 Nao, long medel blong olgeta we oli bin joenem ol pipol blong Lod, i no bin gat wan we

i man blong Amalekae o wan we i man blong Amulon, o we oli bin folem oda blong Nehor, be oli stret laen blong Leman mo Lemyul.

30 Mo olsem ia nao yumi save kam blong save klia, we afta wan pipol i bin luk save klia, tru long Spirit blong God, mo i bin gat bigfala save blong ol samting long saed blong stret fasin, mo afta, oli bin foldaon i go long sin mo brekem loa, oli kam moa stronghed; mo olsem ia nao fasin we oli stap long hem, i kam moa nogud, bitim sapos oli no bin save ol samting ia.

---

#### JAPTA 25

---

*Fasin blong ol man blong Leman blong atakem ol man i hapen moa olbaot—Ol pikinini blong ol pris blong Noa oli ded olsem we Abinadae i bin profesae—Plante man blong Leman oli jenisim laef blong olgeta mo joenem ol pipol blong Antae-Nifae-Lihae—Oli biliv long Kraes mo holem loa blong Moses. Raonabaot 90–77 yia bifo Kraes i bon.*

Mo luk, nao i bin hapen se, ol man blong Leman ia oli moa kros from oli bin kilim ol brata blong olgeta i ded; taswe oli bin mekem wan promes se bae oli pembak samting ia long ol man blong Nifae; mo oli nomo bin traem blong kilim ded ol pipol blong Antae-Nifae-Lihae long taem ia.

2 Be oli bin tekem ol ami blong olgeta mo oli bin go long ol boda blong graon blong Sara-

hemla, mo oli bin foldaon long ol pipol we i bin stap long graon blong Amonaeha mo oli bin smasem olgeta.

3 Mo afta long samting ia, oli bin gat plante faet wetem ol man blong Nifae, mo long ol faet ia, oli bin ronemaot olgeta mo kilim olgeta i ded.

4 Mo long medel blong ol man blong Leman we oli bin ded, klosap olgeta evriwan oli bin ol pikinini blong Amulon mo ol brata blong hem, we oli bin ol pris blong Noa, mo oli bin kilim olgeta i ded tru long ol han blong ol man blong Nifae;

5 Mo smol haf we i bin stap, oli bin ronwe i go long is blong ples we i no gat man long hem, mo afta we oli bin fosem paoa mo raet ova long ol man blong Leman, oli mekem plante long ol man blong Leman oli ded tru long faea from bilif blong olgeta —

6 From plante long olgeta, afta we oli bin kasem plante ded mo plante hadtaem, oli bin stat blong tanem olgeta blong ting-baot ol toktok we Eron mo ol brata blong hem i bin prijim long olgeta long graon blong olgeta; taswe oli bin stat blong no bilivim ol kastom blong ol bubu blong olgeta, mo blong biliv long Lod, mo we hem i bin givim bigfala paoa long ol man blong Nifae; mo olsem ia nao, i bin gat plante long olgeta we oli bin jenisim laef blong olgeta long ples we i no gat man long hem.

7 Mo i bin hapen se olgeta ia we oli bin rul, we oli smol haf

nomo blong ol pikinini blong Amulon, oli bin mekem se bae olgeta i mas ded, yes, olgeta evriwan we oli bin biliv long ol samting ia.

8 Nao ded ia i bin mekem se plante long ol brata blong olgeta i bin kam kros; mo i bin stat blong gat rao long ples we i no gat man long hem; mo ol man blong Leman i bin stat blong lukaotem ol laen blong Amulon mo ol brata blong hem, mo oli bin stat blong kilim olgeta i ded; mo oli bin ronwe i go long is long ples we i no gat man long hem.

9 Mo luk, ol man blong Leman oli stap lukaotem olgeta long dei ia. Olsem ia nao ol toktok blong Abinadae i bin kam blong hapen, we hem i bin talemaot long saed blong laen blong ol pris we oli bin mekem se bae hem i mas harem nogud blong ded tru long faea.

10 From hem i bin talem long olgeta: Wanem we bae yufala i mekem long mi bae i wan eksampol blong ol samting we bae i kam.

11 Mo nao Abinadae i bin fasfala wan we i bin harem nogud blong ded tru long faea from bilif blong hem long God; nao hemia samting we hem i bin minim, se bae plante oli harem nogud blong ded long faea, folsem olsem we hem i bin harem nogud long hem.

12 Mo hem i bin talem long ol pris blong Noa se, bae ol laen blong olgeta bae oli mekem plante oli ded, long sem fasin we i bin hapen long hem, mo se

bae oli seraot i go olbaot mo kilim olgeta i ded, olsem wan sipsip we i no gat gadman blong hem we oli ronemaot olgeta mo ol wael anamol oli kilim hem i ded; mo nao luk, ol toktok ia i bin hapen, from ol man blong Leman i bin ronemaot olgeta, mo oli bin lukaotem olgeta, mo oli bin kilim olgeta.

13 Mo i bin hapen se taem we ol man blong Leman i bin luk se oli no save winim ol man blong Nifae, oli bin gobak bak-egen long graon blong olgeta; mo plante long olgeta i bin kam blong stap long graon blong Ismael, mo long graon blong Nifae, mo oli bin go joenem ol pipol blong God, we oli ol man blong Antae-Nifae-Lihae.

14 Mo tu oli bin berem ol tul blong blong faet blong olgeta, folem olsem we ol brata blong olgeta i bin mekem, mo oli bin stat blong kam wan stret pipol; mo oli bin wokbaot long ol wei blong Lod, mo oli bin holem ol komanmen blong hem mo ol loa blong hem.

15 Yes, mo oli bin holem loa blong Moses; from i bin nid se olgeta i mas holem loa blong Moses yet, from loa ia i no bin hapen fulwan yet. Be i nomata long loa blong Moses, oli bin lukluk i go fored long taem we bae Kraes i kam, from oli bin biliv se loa blong Moses i wan eksampol blong taem we bae hem i kam, mo oli biliv se oli mas holem ol wok we oli save luk, kasem taem we bae hem i soemaot hemwan long olgeta.

16 Nao oli no bin ting se fasin

blong sevem man i bin kam tru long loa blong Moses; be loa blong Moses i bin givhan blong mekem fet blong olgeta i kam strong long Kraes; mo olsem ia nao oli bin holem taet wan hop tru long fet, i go kasem long fasin blong sevem man we i no save finis, mo oli bin dipen long spirit blong profesi, we i bin talemaot ol samting we bae i kam.

17 Mo nao luk, Amon, mo Eron, mo Omna, mo Himnae, mo ol brata blong olgeta i bin glad tumas, from sakses we oli bin gat long ol man blong Leman, from oli bin luk se Lod i bin letem long olgeta folem ol prea blong olgeta, mo tu we hem i bin pruvum toktok blong hem long olgeta long evri poen se i tru.

---

### JAPTA 26

---

*Amon i presem Lod—Ol man we oli holem taet fet, oli kam strong tru long Lod, mo hem i givim save long olgeta—Tru long fet, ol man i save tekem plante taosen sol i kam blong sakem sin—God i gat evri paoa mo i haremsave evri samting. Raonabaot 90–77 yia bifo Kraes i bon.*

Mo nao, hemia ol toktok blong Amon long ol brata blong hem, we i talem olsem ia nao: Ol brata blong mi bakegen mo ol brata blong mi, luk mi talem long yufala, hamas nao bigfala stamba tingting we yumi gat, blong glad; from yumi bin save tingitng, long taem we yumi

bin stat long graon blong Sarahemla, se bae God i givim long yumi ol bigfala blesing ia?

2 Mo nao, mi askem, wanem ol bigfala blesing we hem i bin givim long yumi? Yufala i save talem?

3 Luk, mi ansa blong yufala; from ol brata blong yumi, ol man blong Leman, i bin stap long tudak, yes, long wan dip hol we i dak gud olgeta, be luk, i gat hamas long olgeta we oli tekem olgeta i kam blong luk gudfala laet blong God! Mo hemia blesing we oli bin givim long yumi, blong God i bin mekem yumi ol tul long ol han blong hem blong mekem bigfala wok blong hem i hapen.

4 Luk, plante taosen long olgeta i stap hapi, mo oli bin tekem olgeta i kam long yad blong God.

5 Luk, fil i bin raep, mo God i blesem yufala, from yufala i bin yusum huknaef blong yufala mo bin katem wetem paoa blong yufala, yes, yufala i bin wok long fuldei; mo luk bigfala namba blong ol bandel blong wit blong yufala! Mo bae Lod i mekem olgeta oli kam tugeta long ol stoahaos, blong oli no save smasem gud.

6 Yes, bae ren wetem strongfala win mo tanda i no save mekem olgeta oli foldaon long las dei; yes, mo tu bae ol wael win i no save leftemap olgeta; be taem we ren wetem strongfala win mo tanda i kam, bae oli kam tugeta long ol ples blong olgeta, blong mekem se ren wetem strongfala win i no

save go tru long olgeta, yes, mo tu bae strongfala win i no save karem olgeta i go long ol ples we enemy i wantem blong karem olgeta i go long hem.

7 Be luk, oli stap long ol han blong Lod blong pikim ol samting long fil, mo oli blong hem; mo bae hem i mekem olgeta i kamantap long las dei.

8 Blesem nem blong God; bae yumi singsing blong presem hem, yes, bae yumi talem tangkyu long tabu nem blong hem, from hem i stap mekem stret fasin blong oltaem.

9 From sapos yumi no bin kam antap aot long graon blong Sarahemla, ol brata blong yumi ia we yumi lavem tumas, we oli bin lavem yumi tumas, bae oli stil trabol wetem tingting ia blong no laekem yumi tumas, yes, mo tu bae oli no save God.

10 Mo i bin hapen se taem we Amon i bin talem ol toktok ia, brata blong hem Eron i bin toktok strong agensem hem, i talem: Amon, mi fraet se glad blong yu i stap karem yu i gowe blong mekem flas.

11 Be Amon i bin talem long hem se: Mi no flas long paoa blong mi wan, o long waes tingting blong miwan; be luk, glad blong mi i fulap, yes, hat blong mi i fulap gud long glad, mo bae mi hapi tumas long God blong mi.

12 Yes, mi save se mi mi nating, long saed blong paoa blong mi, mi mi slak; taswe bae mi no flas long saed blong miwan, be bae mi flas long saed blong God blong mi, from

long paoa blong hem mi save mekem evri samting; yes, luk, plante bigfala merikel yumi bin mekem long graon ia, from samting ia bae yumi presem nem blong hem blong oltaem.

13 Luk, i gat hamas plante taosen long ol brata blong yumi we hem i bin tekemaot olgeta long ol soa blong hel; mo oli tekem olgeta i kam blong singim singsing blong lav blong pemaot man, mo samting ia from paoa blong toktok blong hem we i stap long yumi, taswe yumi no gat wan bigfala stamba tingting blong glad from?

14 Yes, yumi gat wan stamba tingting blong presem hem blong oltaem, from hem i God we i Hae Tumas, mo i bin mekem ol brata blong yumi i kamaot long ol jen blong hel.

15 Yes, tudak ia we i no gat en, mo ded we i no gat en, i bin raonem olgeta; be luk, hem i bin karem olgeta i kam long laet we in no gat en blong hem, yes, long wan fasin blong sevem man we i no gat en; mo lav blong hem we hem i glad blong givim we i winim ol narafala lav, i raonem olgeta; yes, mo yumi bin wan tul long ol han blong hem blong mekem bigfala mo gudfala wok ia.

16 Taswe, letem yumi presem, yes, bae yumi presem Lod, yes, bae yumi glad, from glad blong yumi i fulap; yes, bae yumi presem God blong yumi blong oltaem. Luk, huia bae i save presem tumas, Lod? Yes, huia i save talem tumas long saed blong bigfala paoa blong hem,

mo blong sore blong hem, mo long fasin blong go tru long hadtaem wetem longfala tingting blong hem we i go long ol pikinini blong ol man? Luk, mi talem long yufala, mi no save talem smolfala pat blong samting we mi mi filim.

17 Huia i bin save tingting bifo se, God blong yumi bae i sore plante blong pulumaot yumi long ol rabis, nogud, mo doti fasin blong yumi?

18 Luk, yumi bin go aot tu wetem kros, wetem strong toktok blong talemaot ol plan we yumi bin mekem blong smasem gud jos blong hem.

19 O ale, from wanem hem i no bin sendem yumi i go long wan rabis ded, yes, from wanem hem i no bin letem naef blong faet blong jastis i foldaon long yumi, mo sendem yumi i go long wan ples we i no gat hop blong laef we i no save finis?

20 O, sol blong mi klosap i ronwe, taem we mi tingbaot samting ia. Luk, hem i no bin yusum jastis blong hem long yumi, be long bigfala sore blong hem, hem i bin karem yumi long narafala saed long hol we i no gat en, blong ded mo harem nogud, we i sevem ol sol blong yumi.

21 Mo nao luk, ol brata blong mi, wanem man blong wol ia we i save ol samting ia? Mi talem long yufala, i no gat eniwan we i save ol samting ia, sapos i no olgeta we i sakem sin.

22 Yes, hem we i sakem sin mo i yusum fet, mo i karem i kam ol gudfala wok, mo i gohed

blong prea mo i no stop—long man olsem ia, God i letem hem blong save ol sikret blong hem; yes, long man olsem ia, bae God i letem hem blong soemaot ol samting we hem i neva bin soemaot bifo; yes, mo long man olsem ia, bae God i letem hem blong tekem plante taosen sol i kam blong sakem sin, olsem we God i bin letem yumi blong tekem olgeta ia, ol brata blong yumi i kam blong sakem sin.

23 Nao, yufala i tingbaot, ol brata blong mi, se yumi bin talem long ol brata blong yumi long graon blong Sarahemla, se bae yumi go antap long graon blong Nifae, blong prij long ol brata blong yumi, ol man blong Lemana, mo oli bin jikim yumi fulap?

24 From oli bin talem long yumi: Yufala i ting se yufala i save mekem ol man blong Lemana blong kam save trutok ia? Yufala i ting se yufala i save mekem ol man blong Lemana blong luksave se ol kastom blong ol bubu blong olgeta i no stret olgeta, we oli wan pipol we oli stronghed olsem, we ol hat blong olgeta i glad blong mekem blad i ron; we ol dei blong olgeta oli bin spendem long bigfala rabis fasin; we ol fasin blong olgeta i bin olsem fasin blong man blong brekem loa long stat? Nao ol brata blong mi, yufala i tingbaot se hemia toktok blong olgeta.

25 Mo tu, oli bin talem: Letem yumi tekem ol tul blong faet agensem olgeta, blong mekem se yumi smasem gud olgeta mo

ol rabis fasin blong olgeta i goaot long graon, blong oli no winim yumi mo smasem gud yumi.

26 Be luk, ol brata blong mi we mi lavem tumas, yumi bin kam long ples we i no gat man long hem, i no wetem plan blong kilim ded ol brata blong yumi, be wetem plan ia se maet yumi save sevem samfala long ol sol blong olgeta.

27 Nao taem we ol hat blong yumi i bin wari tumas mo yumi bin rere blong gobak, luk, Lod i bin leftemap tingting blong yumi, mo hem i bin talem: Go long medel blong ol brata blong yufala, ol man blong Lemana, mo stanap strong wetem fasin ia blong save wet longtaem long ol hadtaem blong yufala, mo bae mi givim long yufala saksas.

28 Mo nao luk, yumi bin kam, mo bin go aot long olgeta; mo yumi bin wet long ol harem nogud blong yumi, mo yumi bin harem nogud long evri samting we yumi wantem long laef ia; yes, yumi bin go long wan haos i go long narafala haos, mo yumi bin dipen long ol sore blong wol—no long ol sore blong wol nomo be long ol sore blong God.

29 Mo yumi bin go insaed long ol haos blong olgeta mo yumi bin tijim olgeta, mo yumi bin tijim olgeta long ol rod blong olgeta; yes, mo yumi bin tijim olgeta long ol hil blong olgeta; mo tu yumi bin go insaed long ol tempol blong olgeta mo ol haos blong prea blong olgeta mo bin tijim olgeta; mo oli bin sakemaot yumi, mo bin jikim

yumi, mo spet long yumi, mo slapem ol saed blong fes blong yumi; mo oli bin stonem yumi, mo oli bin tekem mo fasem yumi wetem ol strong rop, mo bin sakem yumi long kalabus; mo tru long paoa mo waes tingting blong God, yumi bin fri bakegen.

30 Mo yumi bin harem nogud long evri kaen hadtaem, mo evri samting ia, blong maet yumi save stap ol tul blong sevem sam sol; mo yumi bin ting se glad blong yumi bae i fulap sapos yumi save stap ol tul blong sevem sam.

31 Nao luk, yumi save lukluk i go long fored mo luk ol frut blong ol wok blong yumi; mo oli smol? Mi talem long yufala se, No, oli plante; yes, mo yumi save witnes se oli no giaman mo oli tru, from lav blong olgeta we i go long ol brata blong olgeta mo tu we i kam long yumi.

32 From luk, oli bin sakrifaesem laef blong olgeta long ples blong tekem laef blong ol enem blong olgeta; mo oli bin berem ol tul blong faet blong olgeta dip long graon, from lav blong olgeta we i go long ol brata blong olgeta.

33 Mo nao luk mi talem long yufala se, i bin gat bigfala lav olsem long evri graon? Luk, mi talem long yufala, No, i no bin gat, mo tu long ol man blong Nifae.

34 From luk, bae oli tekem ol tul blong faet blong olgeta agensem ol brata blong olgeta, bae oli no letem blong oli kilim olgeta i ded. Be luk hamas long

olgeta ia i bin givim laef blong olgeta; mo yumi save se oli bin go long God blong olgeta, from lav blong ogeta mo oli no laekem sin nating.

35 Nao yumi no gat stamba tingting blong glad? Yes, mi talem long yufala, i no bin gat ol man we i bin gat wan bigfala stamba tingting olsem blong glad olsem yumi, stat long taem we wol i bin stat; yes, mo glad blong mi i go longwe, go kasem mi presem God blong mi; from hem i gat evri paoa, evri waes tingting, mo evri save; hem i save evri samting, mo hem i wan Man blong sore, go kasem fasin blong sevem man, long olgeta we oli sakem sin mo biliv long nem blong hem.

36 Nao sapos samting ia hem i blong flas, olsem ia bae mi flas; from hemia i laef blong mi mo laet blong mi, glad blong mi mo fasin blong mi blong sevem man, mo fasin blong pemaot mi long sore tumas, we i no gat en. Yes, blesem nem blong God blong mi, we i bin tingbaot ol pipol ia we oli wan branj blong tri blong Isrel, mo i bin kamaot long stamba blong hem long wan graon we oli no save; yes, mi talem se, presem nem blong God blong mi, we i bin tingbaot yumi, we yumi stap wokbaot olbaot long wan graon we yumi no save.

37 Nao ol brata blong mi, yumi luk se God i stap tingbaot evri pipol, long eni kaen graon we maet oli stap long hem; yes, hem i kaontem ol pipol blong hem, mo ol insaed blong sore



blong hem we i stap lukaotem ful wol. Naoia hemia i glad blong mi, mo bigfala tangkyu blong mi; yes, mo bae mi talem tangkyu long God blong mi oltaem. Amen.

---

JAPTA 27

---

*Lod i givim oda long Amon blong lidim ol man blong Antae-Nifae-Lihae blong go long wan sef ples—Taem we Amon i mitim Alma, long glad blong hem i mekem paoa blong hem i taed—Ol man blong Nifae i givim long ol man blong Antae-Nifae-Lihae graon blong Jeson—Oli singaotem olgeta ol pipol blong Amon. Raonabaot 90-77 yia bifo Kraes i bon.*

NAO i bin hapen se, taem we ol man blong Leman ia we oli bin go blong faet agensem ol man blong Nifae i bin faenem se afta plante hadwok blong olgeta blong kilim olgeta i ded, hem i bin blong nating nomo blong lukaotem ded blong olgeta, oli bin gobak bakegen long graon blong Nifae.

2 Mo i bin hapen se ol man blong Amalekae, from ol ded blong olgeta, oli bin kros tumas. Mo taem we oli bin luk se oli no save pembak samting we i bin hapen long olgeta, i go bak long ol man blong Nifae, oli bin stat blong stikim tingting blong ol man blong kros agensem ol brata blong olgeta, ol pipol blong Antae-Nifae-Lihae; taswe oli bin stat bakegen blong kilim olgeta i ded.

3 Nao pipol ia i no bin wantem bakegen blong tekem ol tul blong faet blong olgeta, mo oli bin letem olgeta bakegen blong kasem ded folem tingting blong ol enemi blong olgeta.

4 Nao taem we Amon mo ol brata blong hem i bin luk fasin ia blong kilim ded man long medel blong ol pipol ia we oli bin lavem tumas, mo long medel blong olgeta we oli bin lavem tumas—from oli bin mekem long olgeta i olsem se oli ol enjel we God i bin sendem olgeta blong sevem olgeta long ded we i no gat en—taswe, taem we Amon mo ol brata blong hem i bin luk bigfala fasin ia blong kilim ded man, oli bin sore tumas, mo oli bin talem long king se:

5 Bae yumi karem i kam tugeta ol pipol ia blong Lod, mo bae yumi go daon long graon blong Sarahemla long ol brata blong yumi ol man blong Nifae, mo ronwe aot long ol han blong ol enemi blong yumi, blong mekem se oli no kilim ded yumi.

6 Be king i bin talem long olgeta: Luk, ol man blong Nifae bae oli smasem mifala from plante man we mifala i bin kilim ded mo ol sin we mifala i bin mekem agensem olgeta.

7 Mo Amon i bin talem: Bae mi go mo askem Lod, mo sapos hem i talem long yumi, go daon long ol brata blong yufala, bae yufala i go?

8 Mo king i bin talem long hem: Yes, sapos Lod i talem long mifala, go, bae mifala i go daon long ol brata blong mifala, mo

bae mifala i kam ol slef blong olgeta kasem taem we mifala i pembak long olgeta ol fasin ia blong kilim ded man mo sin we mifala i bin mekem agensem olgeta.

9 Be Amon i bin talem long hem: Hem i agensem loa blong ol brata blong mifala, we papa blong mi i bin stanemap, se bae i no gat slef long medel blong olgeta; taswe bae yumi go daon mo dipen long ol sore blong ol brata blong yumi.

10 Be king i bin talem long hem: Askem Lod, mo sapos hem i talem long mifala, go, bae mifala i go; sapos no, bae mifala i ded long graon ia.

11 Mo i bin hapen se Amon i bin go mo askem Lod, mo Lod i bin talem long hem se:

12 Tekemaot pipol ia long graon ia, blong mekem se oli no ded; from Setan i gat bigfala paoa long ol hat blong ol man blong Amalekae, we oli putum ol man blong Lemana blong kam kros long ol brata blong olgeta mo kilim olgeta i ded; taswe tekemaot pipol ia long graon ia; mo mi blesem pipol long jeneresen ia, from bae mi sevem olgeta.

13 Mo nao i bin hapen se, Amon i bin go mo bin talem long king evri toktok we Lod i bin talem long hem.

14 Mo oli bin karem i kam tugeta evri pipol blong olgeta, yes, evri pipol blong Lod, mo oli bin karem i kam tugeta evri grup blong anamol blong olgeta mo ol buluk, mo oli bin aot long graon, mo oli bin go long

ples we i no gat man long hem we i bin seraotem graon blong Nifae long graon blong Sarahemla, mo oli bin kam klosap long ol boda blong graon.

15 Mo i bin hapen se Amon i bin talem long olgeta: Luk, mi mo ol brata blong mi bae mifala i go aot long graon blong Sarahemla, mo bae yufala i stap long ples ia kasem taem we mifala i kambak; mo bae mifala i traem ol hat blong ol brata blong mifala, blong faenemaot sapos oli save letem yufala i kam long graon blong olgeta.

16 Mo i bin hapen se taem we Amon i stap go aot long graon, se hem mo ol brata blong hem i mitim Alma, long ples we hem i bin tokbaot, mo luk, hemia wan hapi miting blong olgeta.

17 Nao glad blong Amon i bin bigwan tumas mekem se hem i bin fulap; yes, glad blong God i bin kavremap hem go kasem taem we paoa blong hem i nomo strong; mo hem i bin foldaon bakegen long graon.

18 Nao hemia i no wan bigfala glad? Luk, hemia glad we no man i kasem, hemia nomo sapos man ia i wan man we i sakem sin, mo tingting i stapdaon blong lukaotem glad.

19 Nao glad blong Alma, long taem we hem i bin mitim ol brata blong hem i bigwan tumas, mo tu glad blong Eron, blong Omna, mo Himnae; be luk, glad blong olgeta i no blong mekem se i moa bitim paoa blong olgeta.

20 Mo nao i bin hapen se Alma i bin lidim ol brata blong hem

i gobak long graon blong Sarahemla; go kasem long haos blong hem. Mo oli bin go mo oli bin talem long jif jaj evri samting we i bin hapen long olgeta long graon blong Nifae, long medel blong ol brata blong olgeta, ol man blong Leman.

21 Mo i bin hapen se jif jaj i bin sendemaot wan toktok i go long pablik truaot evri ples long graon, mo i wantem voes blong pipol, long saed blong letem ol brata blong olgeta i kam insaed, we oli ol pipol blong Antae-Nifae-Lihae.

22 Mo i bin hapen se voes blong ol pipol i bin kam, i se: Luk, bae mifala i lego graon blong Jeson, we i stap long is klosap long solwota, we i joenem graon Plante, we i stap long saot blong graon Plante; mo graon ia Jeson, hem i graon we bae mifala i givim long ol brata blong mifala blong stap long hem.

23 Mo luk, bae mifala i putum ol ami blong mifala bitwin long graon blong Jeson mo graon blong Nifae, blong mekem se mifala i save lukaot long ol brata blong mifala long graon blong Jeson; mo mifala i mekem samting ia blong ol brata blong mifala, from we oli fraet blong tekem ol tul blong faet blong olgeta agensem ol brata blong olgeta, from mifala i fraet se bae oli mekem sin; mo hemia bigfala fraet blong olgeta, i bin kam from strongfala fasin blong sakem sin blong olgeta we oli bin gat, from plante fasin blong kilim man we oli

bin mekem mo fasin nogud blong ogeta we i rabis stret.

24 Mo nao luk, bae mifala i mekem samting ia long ol brata blong mifala, blong oli save stap long graon blong Jeson, mo bae mifala i gad long olgeta from ol enem i blong olgeta, wetem ol ami blong mifala, hemia nomo sapos oli givim wan pat blong ol samting blong olgeta, blong helpem mifala, blong mifala i save holem taet ol ami blong mifala.

25 Nao, i bin hapen se taem we Amon i bin harem samting ia, hem i bin gobak long ol pipol blong Antae-Nifae-Lihae, mo tu Alma wetem hem, long ples we i no gat man long hem, long ples we oli stanemap ol tenet blong olgeta, mo oli bin talemaot ol samting ia long olgeta. Mo tu Alma i bin talem bakegen long olgeta stori blong hem, olsem wanem hem i bin jenisim laef, wetem Amon mo Eron, mo ol brata blong hem.

26 Mo i bin hapen se samting ia i bin mekem bigfala glad long medel blong olgeta. Mo oli bin go daon long graon blong Jeson, mo oli bin stap long graon blong Jeson; mo ol man blong Nifae i bin singaotem olgeta ol pipol blong Amon; taswe oli bin save olgeta long nem ia stat long taem ia i go.

27 Mo oli bin stap wetem ol pipol blong Nifae, mo tu oli bin kaotem olgeta wetem olgeta pipol we oli blong jos blong God. Mo tu oli bin save olgeta from sapot blong olgeta long God, mo tu long ol man; from

oli bin stret tru oltaem mo ones long evri samting; mo oli bin strong long fet blong Kraes, go kasem en.

28 Mo oli no bin laekem nating blong mekem blad blong ol brata blong olgeta i ron; mo i no bin gat wan man we i save mekem olgeta blong tekem ol tul blong faet blong olgeta agensem ol brata blong olgeta; mo oli neva bin luk long ded wetem eni pat blong fraet, from hop blong olgeta mo ol save blong Kraes mo laef bakegen; taswe, ded i no bin gat mining long olgeta, from Kraes i winim ded.

29 Taswe, bae oli harem nogud long ded long wan fasin we i rabis olgeta mo i soa plante we ol brata blong olgeta i save mekem long olgeta, bifo oli save tekem naef blong faet o huknaef blong kilim olgeta.

30 Mo olsem ia nao oli wan pipol we oli wok strong tumas, mo wan pipol we oli lavem tumas, wan pipol blong Lod we hem i laekem olgeta plante.

---

### JAPTA 28

---

*Ol man blong Leman oli lus long wan bigfala faet—Plante ten taosen oli ded—Oli putum ol nogud man long wan ples blong sore tumas we i no gat en long hem; olgeta we i stret i kasem wan glad we i no save finis. Raonabaot 77–76 yia bifo Kraes i bon.*

Mo nao i bin hapen se afta we ol pipol blong Amon i bin stanap long graon blong Jeson, mo tu wan jos i bin stanap long

graon blong Jeson, mo ol ami blong ol man blong Nifae oli bin putum olgeta blong stap gad long graon blong Jeson, yes, long evri boda raonabaot long graon blong Sarahemla; luk ol ami blong ol man blong Leman i bin folem ol brata blong olgeta i go long ples we i no gat man long hem.

2 Mo olsem ia nao i bin gat wan bigfala faet, yes, we i wan we oli no bin save bifo long medel blong evri pipol long graon stat long taem we Lihae i bin aot long Jerusalem; yes, mo plante ten taosen long ol man blong Leman i bin ded mo oli bin seraot oli go olbaot.

3 Yes, mo tu i bin gat plante ded long medel blong ol pipol blong Nifae; be, oli bin ronemaot ol man blong Leman mo oli bin ron olbaot, mo ol man blong Nifae i bin gobak long graon blong olgeta bakegen.

4 Mo nao hemia i bin wan taem we i bin gat bigfala krae mo krae we oli harem long evri ples long graon, long medel blong evri pipol blong Nifae—

5 Yes, ol krae blong ol woman we man blong olgeta i ded, oli stap krae from ol man blong olgeta, mo tu blong ol papa we oli stap krae from ol boe blong olgeta, mo blong ol gel we oli stap krae from ol brata, yes, mo ol brata we oli stap krae from ol papa; mo olsem ia nao krae blong olgeta we i stap sore, oli bin harem long medel blong olgeta evriwan, oli krae from ol famle blong olgeta we oli bin ded.

6 Mo nao i tru tumas se dei ia i bin wan sore dei; yes, wan taem blong kwaet, mo wan taem blong livim kakae plante, mo blong prea.

7 Mo olsem ia nao namba fiftin yia blong rul blong ol jaj ova long ol pipol blong Nifae i bin en;

8 Mo hemia histri blong Amon mo ol brata blong hem, ol wokbaot blong olgeta long graon blong Nifae, ol harem nogud blong olgeta long graon, ol sore blong olgeta, mo ol had-taem blong olgeta, mo glad blong olgeta we oli no save haremsave, mo welkam mo sef blong ol brata long graon blong Jeson. Mo nao bae Lod, Ridima blong evri man, i blesem ol sol blong olgeta long oltaem.

9 Mo hemia histri blong ol faet mo ol rao long medel blong ol man blong Nifae, mo tu ol faet bitwin ol man blong Nifae mo ol man blong Leman; mo namba fiftin yia blong rul blong ol jaj i kam long en.

10 Mo stat long fashala yia i go kasem namba fiftin yia plante taosen laef oli bin lus; yes, taem ia i bin luk blad i ron nogud tumas.

11 Mo oli bin putum bodi blong plante taosen i go daon long graon, be bodi blong plante taosen i stap sting long ol hip long fes blong graon; yes, mo plante taosen i stap krae from ol famle blong olgeta we oli bin ded, from oli gat stamba tingting blong fraet, folem ol promes blong Lod, we oli bin putum olgeta bigwan

long wan ples blong sore tumas we i no gat en.

12 Mo taem we ol plante nara-fala taosen oli krae tru from ol famle blong olgeta we oli bin ded, be oli stil glad mo hapi long hop, mo tu oli save, folem ol promes blong Lod, se hem i leftemap olgeta blong stap long raet han blong God, long wan ples we i no gat en blong stap glad.

13 Mo olsem ia nao yumi luk olsem wanem nao man i no semak from sin mo fasin blong brekem loa, mo paoa blong devel, we i kam tru long ol giaman plan we hem i bin mekem blong kasem ol hat blong ol man.

14 Mo olsem ia nao yumi luk bigfala singaot long ol man blong wokhad oltaem long plantesen blong grep blong Lod, mo olsem ia nao yumi luk bigfala stamba tingting blong sore, mo tu blong glad—sore from ded mo smasgud long medel blong ol man, mo glad from laet blong Kraes i go kasem laef.

---

## JAPTA 29

---

*Alma i wantem blong talemaot strong, fasin blong sakem sin wet-em sapot olsem wan enjel—Lod i letem ol tija blong evri kantri—Alma i presem wok blong Lod mo long sakses blong Amon mo ol brata blong hem. Raonabaot 76 yia bifo Kraes i bon.*

O MI wantem kam wan enjel, mo save gat hop blong hat blong mi, blong mi save go aot

mo toktok wetem bigfala pupu blong God, wetem wan voes blong mekem wol i seksek, mo talem fasin blong sakem sin long evri pipol!

2 Yes, bae mi talemaot long evri sol wetem wan voes olsem blong tanda, fasin blong sakem sin mo plan blong fasin blong pemaot man, se oli mas sakem sin mo kam long God blong yumi, blong mekem se i nomo save gat plante sore long evri fes blong wol.

3 Be luk, mi mi wan man, mo mi mekem sin long hop blong mi; from mi sud stap glad wetem ol samting we Lod i bin givim long mi.

4 Mi no sud wari long ol tingting blong mi strong toktok blong wan stret God, from mi save se hem i givim long ol man folem ol tingting blong olgeta, sapos i go long ded o long laef; yes, mi save se hem i givim long ol man, yes, i talemaot long olgeta ol toktok we i no save jenis, folem ol wok blong olgeta, sapos oli go long fasin blong sevem man o long ded.

5 Yes, mo mi save se gud mo nogud i bin kam long fored blong evri man; hem we i no save samting we i gud aot long ol samting we i nogud, i no gat rong; be man we i save samting we i gud mo samting we i nogud, oli givim long man ia folem ol tingting blong hem, sapos hem i wantem samting we i gud o nogud, laef o ded, glad o sore blong klia tingting.

6 Nao, from mi luk se mi save ol samting ia, from wanem mi

mas gat tingting we i moa bitim tingting blong mekem wok ia we hem i bin singaotem mi blong mekem?

7 From wanem mi sud gat tingting se mi mi wan enjel, blong mi save toktok i go long evri en blong wol?

8 From luk, Lod i bin letem long evri kantri, long ol kantri blong olgeta bakegen mo lanwis, blong tijim toktok blong hem, yes, long waes tingting, evri samting we hem i luk se i stret blong olgeta i sud kasem; taswe yumi luk se Lod i givim oda wetem waes tingting, folem samting we i stret mo i tru.

9 Mi save samting ia we Lod i bin givim oda long mi, mo mi glad tumas long hem. Mi no glori long saed blong miwan, be mi glori long samting we Lod i bin givim olsem oda, long mi; yes, mo hemia glori blong mi, se maet mi save kam wan tul long ol han blong God blong tekem sam sol i kam blong sakem sin; mo hemia glad blong mi.

10 Mo luk, taem we mi luk plante long ol brata blong mi i sakem sin tru, mo oli kam long Lod, God blong olgeta, ale sol blong mi i fulap long glad; ale mi tingbaot wanem we Lod i bin mekem blong mi, yes, mo tu hem i bin harem prea blong mi; yes, ale mi tingbaot han blong hem we i blong sore, we hem i bin stretem i kam long mi.

11 Yes, mi tingbaot tu taem we ol bubu blong mi i bin stap long kalabus; from mi save tru se Lod i bin mekem olgeta i kam-

aot long slef, mo long taem ia hem i bin stanemap jos blong hem; yes, Lod God, God blong Ebrahim, God blong Aesak, mo God blong Jakob, i bin mekem olgeta i kamaot long slef.

12 Yes, mi bin tingbaot oltaem, we ol bubu blong mi i bin stap long kalabus; mo semfala God we i mekem olgeta oli go fri i kamaot long ol han blong ol man blong Ijip, i bin mekem olgeta i kamaot long slef.

13 Yes, mo semfala God ia i bin stanemap jos blong hem long medel blong olgeta; yes, mo semfala God ia i bin singaotem mi tru long wan tabu koling, blong prijim toktok long pipol ia, mo i bin givim long mi plante saksès, we glad blong mi i fulap long olgeta.

14 Be mi no glad blong saksès blong miwan nomo, be glad blong mi i moa bigwan from ol saksès blong ol brata blong mi, we oli bin go antap long graon blong Nifae.

15 Luk, oli bin wok gud tumas, mo oli bin karem fored plante frut; mo olsem wanem presen blong olgeta bae i bigwan!

16 Nao, taem we mi tingbaot saksès blong olgeta ia, ol brata blong mi, sol blong mi i go long-we, go kasem we hem i kamaot long bodi, olsem we i bin stap, olsem ia glad blong mi i bigwan.

17 Mo nao, bae God i letem long olgeta ia, ol brata blong mi, blong oli save sidaon long kingdom blong God; yes, mo tu olgeta evriwan we oli ol frut blong ol wok blong olgeta, blong oli nomo save go aot, be

blong oli save presem hem blong oltaem. Mo bae God i letem samting ia i save hapen folem ol toktok blong mi, olsem we mi bin talemaot. Amen.

---

JAPTA 30

---

*Koriho, we i wan man we i agensem Kraes, i stap jikim Kraes, Atonmen, mo spirit blong profesi—Hem i tijim se i no gat God, man i no foldaon, i no gat panis blong sin, mo i no gat Kraes—Alma i testifae se Kraes bae i kam mo se evri samting i stap soem se i gat wan God—Koriho i askem wan saen mo God i mekem hem i no save toktok—Devel i bin kam long Koriho olsem wan enjel mo i bin talem hem wanem blong talem—Oli purumbut long Koriho mo hem i kasem ded. Raonabaot 76–74 yia bifo Kraes i bon.*

LUK, nao i bin hapen se afta ol man blong Amon i bin stanap strong long graon blong Jeson, yes, mo tu afta we ol man blong ol man blong Nifae i bin ronemaot ol man blong Leman aot long graon, mo ol pipol blong graon i bin berem ol ded man blong Leman—

2 Nao oli no bin kaotem ol ded man blong olgeta from namba blong olgeta i bigwan tumas; mo oli no bin kaotem ol ded man blong Nifae—be i hapen se, afta oli bin berem ol ded man blong olgeta, mo tu afta ol dei blong livim kakae, mo krae, mo prea, (mo hem i long namba sikstin yia blong rul blong ol jaj long ol pipol

blong Nifae) i bin stat blong gat pis i gohed truaot long ful graon.

3 Yes, mo ol pipol i bin folem blong holem ol komanmen blong Lod; mo oli bin folem strong ol odinens blong God, folem loa blong Moses; from oli bin tijim olgeta blong holem loa blong Moses kasem taem we oli se loa ia bae i hapen.

4 Mo olsem ia nao ol pipol i no bin gat wan trabol nating long ful sikstin yia blong rul blong ol jaj long ol pipol blong Nifae.

5 Mo i bin hapen se long stat blong namba seventin yia blong rul blong ol jaj, i bin gat pis i gohed.

6 Be i bin hapen se, klosap long en blong namba seventin yia, i bin gat wan man we i kam long graon blong Sarahemla, mo hem i bin agensem Kraes, from hem i bin stat blong prij long ol pipol agensem ol profesi we ol profet i bin talemaot, long saed blong taem we Kraes bae i kam.

7 Nao i no bin gat wan loa we i go agensem bilif blong wan man; from hem i agensem stret ol komanmen blong God se, bae i gat wan loa we bae i lidim ol man i go long ol graon we i no semak.

8 From olsem ia nao skripja i talem: Yufala i jus long tede huia bae yufala i wok blong hem.

9 Nao sapos wan man i bin wantem blong wok blong God, hem i raet blong hem, o long narafala toktok, sapos hem i bin biliv long God hem i raet blong hem blong wok blong

hem; be sapos hem i no bin biliv long hem i no bin gat wan loa blong panisim hem.

10 Be sapos hem i bin kilim ded wan man, hem i kasem panis blong kasem ded; mo sapos hem i bin stilim man, hem tu i bin kasem panis; mo sapos hem i bin stil, hem tu i bin kasem panis; mo sapos hem i bin mekem adaltri, hem tu i bin kasem panis; yes, from ol fasin nogud ia oli bin kasem panis.

11 From i bin gat wan loa, se bae oli jajem ol man folem ol loa we oli bin brekem. Be, i no bin gat wan loa agensem bilif blong wan man; taswe, wan man i bin kasem panis nomo long loa we hem i bin brekem; taswe evri man i bin stap long graon we i semak.

12 Mo man ia we i agensem Kraes, we nem blong hem i Koriho, (mo loa i no bin save gat kontrol long hem) i bin stat blong prij long ol pipol se bae i no gat Kraes. Mo folem fasin ia hem i bin prij long olgeta, hem i talem:

13 O yufala we oli bin fasem daon yufala wetem wan krangke mo wan hop blong nating, from wanem yufala i blokem yufala bakegen wetem ol krangke samting ia? From wanem yufala i stap lukaotem wan Kraes? From i no gat wan man we i save eni samting we bae i kam.

14 Luk, ol samting ia we yufala i singaotem ol profesi, we yufala i talem se ol tabu profet i bin pasem daon, luk, oli ol



krangke kastom blong ol bubu blong yufala.

15 Olsem wanem yufala i save se oli tru? Luk, yufala i no save kasem save long ol samting we yufala i no luk; taswe yufala i no save se bae i gat wan Kraes.

16 Yufala i lukluk i go long fored mo talem se yufala i luk wan fasin blong kam klin aot long ol sin blong yufala. Be luk, hem i kam long wan krangke tingting; mo krangke ia blong ol tingting blong yufala i kam from ol kastom blong ol bubu blong yufala, we i lidim yufala i gowe long wan bilif blong ol samting we i no stap.

17 Mo plante moa samting olsem, hem i bin talem long olgeta; i talem long olgeta se, i no save gat wan atonmen i hapen from ol sin blong ol man, be evri man bae oli stap gud o nogud long laef ia, folem fasin blong hemwan; taswe evri man oli bin gru i kam antap folem bigfala waes blong hem, mo we evri man i bin kam antap gud folem paoa blong hem; mo eni samting we wan man i bin mekem, i no brekem loa.

18 Mo olsem ia nao hem i bin prij long olgeta, lidim ol hat blong plante i go longwe, mekem olgeta blong leftemap hed blong olgeta long ol fasin nogud blong olgeta, yes, i lidim plante woman i go longwe, mo tu ol man, blong mekem fasin ia blong stap slip olbaot—i talem long olgeta se taem we wan man i ded, hem i en blong hem.

19 Nao man ia i bin go long graon blong Jeson tu, blong

prijim ol samting ia long medel blong ol pipol blong Amon, we bifo oli bin ol man blong Leman.

20 Be luk oli bin moa waes bitim plante long ol man blong Nifae; from oli bin tekem hem, mo oli bin fasem hem, mo oli bin karem hem i go long fored blong Amon, we i wan hae pris blong pipol ia.

21 Mo i bin hapen se hem i bin mekem olgeta i karem hem i go aot long graon. Mo hem i bin kam long graon blong Gidion, mo i bin stat blong prij long olgeta tu; mo long ples ia hem i no bin gat plante sakses, from oli bin tekem hem mo oli bin fasem hem mo oli bin karem hem i kam long fored blong hae pris, mo tu jif jaj blong graon.

22 Mo i bin hapen se hae pris i bin talem long hem se: From wanem yu stap go olbaot blong smasem gud ol wok blong Lod? From wanem yu tijim pipol ia se bae i no gat wan Kraes, blong smasem gud glad blong olgeta? From wanem yu toktok agensem evri profesi blong ol tabu profet?

23 Nao nem blong hae pris ia i Gidona. Mo Koriho i bin talem long hem: From mi no tijim ol krangke kastom blong ol bubu blong yufala, mo from mi no tijim pipol ia blong fasem olgeta daon wetem ol krangke odinens, mo ol wok we ol pris blong bifo i bin stanemap, blong fosem paoa mo raet ova long olgeta, blong mekem se olgeta oli no save wan samting, blong mekem se bae oli no leftemap ol hed blong olgeta,

be oli putum daon olgeta folem ol toktok blong yu.

24 Yufala i talem se pipol ia i wan pipol we i fri. Luk, mi talem se oli stap long slef. Yufala i talem se ol olfala profesi ia oli tru. Luk, mi talem se yufala i no save se oli tru.

25 Yufala i talem se pipol ia i wan pipol we i rong long ol samting mo i bin foldaon, from sin blong wan papa mo mama. Luk, mi talem se wan pikinini i no rong from papa mo mama blong hem.

26 Mo tu yufala i talem se Kraes bae i kam. Be luk, mi talem se yufala i no save se bae i gat wan Kraes. Mo tu yufala i talemaot se bae oli kilim hem from ol sin blong wol—

27 Mo olsem ia nao yufala i tanem pipol ia i go folem ol krangke kastom blong ol bubu blong yufala, mo folem ol tingting blong yufala bakegen; mo yufala i holem taet olgeta daon, olsem we oli stap long slef, blong mekem se yufala bakegen i save stap flas tru ol wok blong ol han blong olgeta, blong mekem se oli fraet blong lukluk strong i go antap, mo blong mekem se oli fraet blong enjoem ol raet mo ol spesel raet blong olgeta.

28 Yes, oli fraet blong yusum samting we i blong olgeta, from oli fraet se bae oli mekem ol pris blong olgeta i kam kros, we oli putum ol hevi samting long olgeta folem ol tingting blong olgeta, mo oli bin karem olgeta blong biliv, tru long ol kastom blong olgeta mo ol drim

blong olgeta, mo ol tingting blong flas mo ol visen blong olgeta mo ol giaman sikret blong olgeta, blong bae olgeta, sapos oli no folem ol samting we oli talem, mekem wan man we oli no save, i kam kros, we oli se man ia i God—wan man we oli neva bin luk hem o save hem, we i neva bin stap mo bae i no save gat.

29 Nao taem we hae pris mo jif jaj i bin luk se hat blong hem i strong, yes, taem we oli bin luk se bae hem i toktok nogud agensem God, oli no bin ansa long ol toktok blong hem; be oli bin talem blong oli fasem hem, mo oli bin givim hem long ol han blong ol ofisa, mo oli bin sendem hem i go long graon blong Sarahemla, blong oli save tekem hem i kam stanap long fored blong Alma, mo jif jaj ia we i gavena ova long ful graon.

30 Mo i bin hapen se taem we oli bin tekem hem i kam long fored blong Alma mo jif jaj, hem i bin gohed long sem fasin ia olsem taem we hem i bin mekem long graon blong Gidon; yes, hem i bin gohed blong tok agensem God.

31 Mo hem i bin girap wetem bigfala kaen noes blong ol toktok long fored blong Alma, mo i bin toktok nogud agensem ol pris mo ol tija, hem i talem se olgeta nao oli stap lidim ol pipol ia i go long rabis rod folem ol krangke kastom blong ol bubu blong olgeta, from tingting ia blong stap laef gud tru long ol wok blong ol pipol.

32 Nao Alma i bin talem long

hem: Yu save se mifala bakegen i no stap flas long ol wok blong pipol ia; from luk mi bin wok, yes, stat long taem blong rul blong ol jaj kasem naoia, wetem ol han blong mi bakegen blong lukaotem miwan, i nomata long ol plante wokbaot blong mi we i bin go raonaot long graon blong talemaot toktok blong God long ol pipol blong mi.

33 Mo i nomata long ol plante wok we mi bin mekem long jos, mi no bin kasem plante samting olsem i go kasem wan sinaen from wok blong mi; mo i no gat wan long ol brata blong mi, be long jea blong jajmen nomo; mo afta mifala i bin kasem nomo folem loa from taem blong mifala.

34 Mo nao, sapos mifala i no kasem wan samting from ol wok blong mifala long jos, wanem nao mifala i winim blong wok long jos, sapos hem i no blong talemaot trutok nomo, blong mekem se mifala i save glad long hapi blong ol brata blong mifala?

35 Ale from wanem yu talem se mifala i prij long pipol ia blong kasem mane, taem we yu, long yuwan, yu save se mifala i no kasem mane? Mo nao, yu biliv se mifala i lidim rong pipol ia, we i mekem plante glad long ol hat blong olgeta?

36 Mo Koriho i bin ansa long hem, Yes.

37 Mo afta Alma i bin talem long hem, Yu biliv se i gat wan God i stap?

38 Mo hem i bin ansa, No.

39 Nao Alma i bin talem long

hem se: Bae yu talem bakegen se i no gat wan God i stap, mo tu talem se i no gat Kraes? From luk, mi talem long yu, mi save se i gat wan God, mo tu se Kraes bae i kam.

40 Mo nao wanem pruf nao we yu gat we i soem se i no gat God, o se Kraes bae i no kam? Mi talem long yu se yu no gat, be hem i toktok blong yu nomo.

41 Be, luk, mi gat evri samting olsem wan testemoni se ol samting ia i tru; mo tu yu gat evri samting olsem wan testemoni long yu se oli tru; mo bae yu tanem baksaed long olgeta? Yu biliv se ol samting ia oli tru?

42 Luk, mi save se yu biliv, be wan spirit blong giaman i stap long yu, mo yu bin sakemaot Spirit blong God blong hem i no save gat ples insaed long yu; be devel i gat paoa ova long yu, mo hem i stap karem yu i go olbaot, i mekem ol plan blong hem i save smasem gud ol pikinini blong God.

43 Mo nao Koriho i bin talem long Alma: Sapos yu soem wan saen long mi, blong mekem se mi save biliv se i gat wan God i stap, yes, soem long mi se hem i gat paoa, mo afta bae mi save biliv se ol toktok we yu talem long mi i tru.

44 Be Alma i bin talem long hem: Yu bin kasem inaf saen; bae yu traem God blong yu? Bae yu talem se, Soem wan saen long mi, taem we yu gat testemoni blong ol samting ia, ol brata blong yu, mo tu evri tabu profet? Ol skripja i stap

long fored blong yu, yes, mo evri samting i soem se i gat wan God; yes, wol tu, mo evri samting we i stap fes blong hem, yes, mo ol muv blong hem, yes, mo tu evri wol we oli muv long stret fom blong olgeta, oli witanes se i gat wan Krieta we Paoa blong hem i hae tumas.

45 Mo yu stil go olbaot, mo lidim ol hat blong pipol ia i gowe, testifae long olgeta se i no gat God? Mo bae yu stil tanem baksaed long ol samting ia? Mo hem i bin talem: Yes, bae mi tanem baksaed long ol samting ia, hemia nomo sapos yu soem wan saen long mi.

46 Mo nao i hapen se, Alma i bin talem long hem se: Luk, mi harem nogud from hat blong yu i strong, yes, se bae yu go agensem spirit blong trutok yet, blong mekem se sol blong yu i save lus.

47 Be luk, i moa gud se sol blong yu i lus, bitim se yu stap lidim plante sol i go daon long smasgud, tru long ol giaman toktok blong yu mo tru long ol swit toktok blong yu; taswe sapos yu tanem baksaed bak-egen, luk God bae i panisim yu blong mekem se bae yu no save toktok, blong mekem se bae yu nomo save openem maot blong yu, blong mekem se yu nomo save giaman long pipol ia bakegen.

48 Nao Koriho i bin talem long hem: Mi no talem se i no gat wan God we i stap, be mi no biliv se i gat wan God i stap; mo tu mi talem se yu no save se i gat wan God i stap; mo hemia

nomo sapos yu no soem wan saen long mi, bae mi no biliv.

49 Nao Alma i bin talem long hem se: Bae mi givim samting ia olsem wan saen long yu, se bae yu no save toktok, folem ol toktok blong mi; mo mi talem se, long nem blong God, bae yu no save toktok, mekem se bae yu nomo gat paoa blong toktok.

50 Nao taem we Alma i bin talem ol toktok ia, Koriho i nomo save toktok, mekem se hem i nomo save gat paoa blong toktok, folem ol toktok blong Alma.

51 Mo nao taem we jif jaj i bin luk samting ia, hem i bin pusum han blong hem i go long fored mo i bin raetem long Koriho se: Yu biliv nao long paoa blong God? Long huia, we yu bin wantem se Alma bae i soemaot saen blong hem? Yu bin wantem hem blong mekem trabol long ol narafala man, blong soem long yu wan saen? Luk, hem i bin soem long yu wan saen; mo nao bae yu rao moa?

52 Mo Koriho i bin pusum han blong hem i go long fored mo i bin raetem, i talem: Mi save se mi no save toktok, from mi no save toktok, mo mi save se i no gat wan samting we i save mekem samting ia i hapen long mi be paoa blong God nomo; yes, mo mi bin save evri taem se i gat wan God i stap.

53 Be luk, devel i bin giaman long mi; from hem i bin kam kamaot long mi olsem wan enjel, mo hem i bin talem long mi se: Go mo tekembak pipol ia, from olgeta evriwan i bin go

long rabis rod folem wan God we oli no save. Mo hem i bin talem long mi: I no gat God; yes, mo hem i bin tijim mi ol samting ia we mi mas talem. Mo mi bin tijim ol toktok blong hem; mo mi bin tijim olgeta from oli mekem tingting blong wol ia i hapi; mo mi bin tijim olgeta, yes kasem taem we mi bin gat plante sakses, inaf blong mekem se mi bin biliv strong se oli bin tru; mo from samting ia mi bin sakem trutok, kasem taem we mi bin putum bigfala panis ia long mi.

54 Nao taem we hem i bin talem samting ia, hem i bin askem strong long Alma se hem i mas prea long God, blong mekem se hem i tekemaot panis long hem.

55 Be Alma i bin talem long hem: Sapos panis ia i kamaot long yu bae yu lidim ol hat blong pipol ia long rabis rod bakegen; taswe, bae i stap long yu olsem we Lod i wantem.

56 Mo i bin hapen se hem i no bin tekemaot panis long Koriho; be oli bin sakemaot hem, mo hem i bin go long wan haos i go long narafala haos mo i stap askem kakae blong hem.

57 Nao save blong samting we i bin hapen long Koriho i bin go olbaot truaot evri graon kwiktaem nomo; yes, jif jaj i bin sendemaot wan toktok i go long pablik long evri pipol long graon, oli talemaot long olgeta we oli bin biliv long ol toktok blong Koriho, se oli mas sakem sin blong olgeta kwiktaem, sapos no bae semfala jajmen bae i kam long olgeta.

58 Mo i bin hapen se olgeta evriwan oli bin luksave ol fasin nogud blong Koriho; taswe, olgeta i bin jenisim laef blong olgeta i kambak long Lod; mo samting ia i bin putum wan en long ol rabis fasin folem ol wei blong Koriho. Mo Koriho i bin go long wan haos i go long narafala haos, mo i stap askem kakae blong fidim hem.

59 Mo i bin hapen se taem we hem i stap go fored long medel blong ol pipol, yes, long wan pipol we oli bin seraotem olgeta long ol man blong Nifae mo oli bin singaotem olgeta bakegen ol man blong Soram, mo man ia we i bin lidim olgeta, nem blong hem i Soram—mo taem we hem i bin go fored long medel blong olgeta, luk, oli bin ron antap long hem mo oli purumbut long hem, go kasem taem we hem i bin ded.

60 Mo olsem ia nao yumi luk en blong hem, we hem i bin smasem gud ol wei blong Lod; mo olsem ia nao yumi luk olsem we devel bae i no sapotem ol pikinini blong hem long las dei, be i pulum daon olgeta kwiktaem nomo i go daon long hel.

---

### JAPTA 31

---

*Alma i lidim wan misen blong karembak ol man blong Soram we oli nomo wantem folem jos—Olgeta man blong Soram i talem se oli no save Kraes, oli biliv long wan giaman tingting we God i jusum man, mo wosip wetem ol sem prea—Ol misinari oli bin ful-*

*ap wetem Tabu Spirit—Glad blong Kraes i kavremap ol plante hadtaem we oli gat. Raonabaot 74 yia bifo Kraes i bon.*

NAO i bin hapen se afta ded blong Koriho, Alma i bin harem se olgeta man blong Soram se smaseng gud ol wei blong Lod, mo we Soram, we hem i bin lida blong olgeta, hem i lidim ol hat blong olgeta pipol blong prea long ol aedol we oli no save toktok, hat blong Alma i bin soa plante from ol rabis fasin blong ol pipol.

2 From hemia i bin stamba tingting blong bigfala sore blong Alma, blong save ol rabis fasin long medel blong ol pipol blong hem; taswe hat blong Alma i bin sore tumas from ol man blong Soram we i bin seraot long ol man blong Nifae.

3 Nao olgeta man blong Soram i bin kam tugeta long wan graon we oli bin singaotem Antionum, we hem i is blong graon blong Sarahemla, we laen blong hem i bin stap klosap long so blong solwota, we hem i saot long graon blong Jeson, we tu laen blong hem i bin stap long ples we i no gat man long hem long saot, we ples ia we i no gat man long hem i bin fulap long ol man blong Leman.

4 Nao ol man blong Nifae i bin fraet bigwan se ol man blong Soram bae oli statem fasin blong fren wetem ol man blong Leman, mo we samting ia bae i mekem wan bigfala lus, long pat blong ol man blong Nifae.

5 Mo nao, from we trutok we

oli bin prijim, i bin lidim ol man blong mekem wanem we hem i stret—yes, hem i bin gat moa bigfala paoa long tingting blong ol pipol bitim naef blong faet, o eni narafala samting, we i bin hapen finis long olgeta—taswe Alma hem i bin ting se i bin gat nid we oli sud traem paoa blong toktok blong God.

6 Taswe hem i bin tekem Amon, mo Eron, mo Omna; mo Himnae, hem i bin livim long jos long Sarahemla; be trifala faswan, hem i bin karem olgeta wetem hem, mo tu Amulek mo Siesrom, we tufala i bin stap long Melek; mo tu hem i bin karem tu long ol pikinini boe blong hem.

7 Nao fas bon pikinini boe blong hem, hem i no bin karem hem, mo nem blong hem i Hileman; be ol nem blong olgeta we hem i bin karem olgeta wetem hem hem i Siblon mo Korianton; mo hemia olgeta nem blong olgeta we oli bin folem hem i go long ol man blong Soram, blong prijim trutok long olgeta.

8 Nao ol man blong Soram i bin pulaot long ol man blong Nifae; taswe olgeta i bin gat toktok blong God we oli bin prijim long olgeta.

9 Be ol man blong Soram i bin foldaon long ol bigfala rabis mistek, from olgeta oli no bin traem blong holem ol komanmen blong God, mo olgeta loa blong hem, folem olgeta loa blong Moses.

10 Mo i no gat wan blong olgeta we bae i folem stret fasin blong wok blong jos, blong

gohed long prea mo blong askem, wetem tingting we i stap daon, long God evri dei, blong mekem se oli no save foldaon long temtesen.

11 Yes, blong endem, oli bin smasem gud ol wei blong Lod long plante plante taem; taswe, from samting ia, Alma wetem ol brata blong hem i bin go long graon ia blong prijim trutok long olgeta ia.

12 Nao, taem we oli bin kam tru long graon ia, luk, long sapraes blong olgeta, oli bin luk se ol man blong Soram i bin bildim ol haos blong prea, mo olgeta oli stap kam tugeta wan dei long wan wik, we dei ia oli bin singaotem dei blong Lod; mo oli stap wosip folem samfala fasin we Alma mo ol brata blong hem i neva bin luk bifo;

13 From olgeta oli bin bildimap wan ples long medel blong haos blong prea blong olgeta, wan ples blong stanap long hem, we i hae bitim hed blong man; mo antap blong hem i inaf long wan man nomo.

14 Taswe, eni man man we hem i bin wantem blong wosip, hem i mas go mo stanap antap long ples ia, mo leftemap ol han blong hem i go antap long heven, mo singaot wetem wan laod voes, se:

15 Tabu, tabu God; mifala i biliv se yu yu God, mo mifala i bilif se yu yu tabu, mo we yu yu bin wan spirit, mo se yu yu wan spirit naoia, mo se bae yu yu wan spirit blong oltaem.

16 Tabu God, mifala i biliv se yu yu bin seraotem mifala long

ol brata blong mifala; mo mifala i no biliv long ol kastom blong ol brata blong mifala, we oli bin pasem i kam daon long olgeta folem ol krangke tingting blong ol bubu blong olgeta; be mifala i biliv se yu bin jusum mifala blong kam ol tabu pikinini blong yu; mo tu yu bin soem long mifala se bae i no gat wan Kraes.

17 Be yu yu semak yestedei, tede mo blong oltaem, mo yu bin jusum mifala se bae mifala i sev, long narasaed, olgeta evriwan we oli stap raonabaot long mifala, Lod i jusumaot olgeta blong sakem olgeta long kros blong hem, daon long hel; from ol tabu wok ia, O God, mifala i talem tangkyu; mo tu mifala i talem tangkyu we yu bin jusum mifala, blong mekem se oli no save lidim mifala i gowe folem ol krangke kastom blong ol brata blong mifala, we i stap fasem olgeta daon blong mekem olgeta i bilif long Kraes, we i stap lidim ol hat blong olgeta i go longwe long yu, God blong mifala.

18 Mo bakegen mifala i talem tangkyu, O God, we mifala nao yu bin jusum, mo mifala i wan tabu pipol. Amen.

19 Nao i bin hapen se afta Alma mo ol brata blong hem mo ol pikinini boe blong hem i bin harem ol prea ia, oli bin sapraes tumas.

20 From luk, evriman i bin gofored mo givim ol sem prea ia.

21 Nao ples ia oli bin singaotem Ramiamtam, we i minim, long lanwis ia, tabu taoa.

22 Nao, long taoa ia oli bin

givimaot, evri man, sem prea long God, blong talem tangkyu long God we hem i bin jusum olgeta, mo we hem i no bin lidim olgeta i gowe, folem kastom blong ol brata blong olgeta, mo we oli no bin stilim hat blong olgeta blong biliv long ol samting we bae i kam, we oli no bin save nating long samting ia.

23 Nao, afta ol pipol i bin talem tangkyu folem fasin ia, oli bin gobak long ol haos blong olgeta, oli neva tokbaot God blong olgeta bakegen kasem taem we oli bin kam tugeta bakegen long tabu taoa ia, blong givim tangkyu folem fasin blong olgeta.

24 Nao taem we Alma i bin luk samting ia, hat blong hem i bin harem nogud; from hem i bin luk se oli wan nogud mo stronghed pipol; yes, hem i bin luk se ol hat blong olgeta i bin stap long gol, mo long silva, mo long ol gudfala samting blong mekem laef i rij.

25 Yes, mo hem i bin luk tu se, ol hat blong olgeta, oli bin leftemap long bigfala flas, long hae tingting blong olgeta.

26 Mo hem i bin leftemap voes blong hem i go long heven, mo prea, i talem: O, hamas taem, o Lod, bae yu letem ol wokman blong yu, bae oli stap daon long ples ia long bodi blong mit mo bun, blong luk ol nogud fasin olsem, long ol pikinini blong ol man?

27 Luk, O God, oli prea long yu, be yet ol hae tingting blong olgeta i bin kavremap ol hat blong olgeta. Luk, O God, oli

prea long yu wetem ol maot blong olgeta, taem we oli bigwan, go kasem bigwan tumas, from ol samting blong wol we oli blong nating.

28 Luk, O God blong mi, ol sas kaliko blong olgeta, mo ol smol ring blong olgeta, mo ol samting we oli werem long ol han blong olgeta, ol flas samting blong olgeta we oli mekemaot long gol, mo evri gudgudfala samting we oli werem; mo luk, ol hat blong olgeta i stap long ol samting ia, mo yet oli prea long yu mo talem—Mifala i talem tangkyu long yu, O God, from mifala ol man blong yu we yu bin jusum, be narafala man bae oli ded.

29 Yes, mo oli talem se yu bin soem long olgeta se bae i no gat wan Kraes.

30 O Lod God, hamas taem bae yu letem se ol nogud fasin mo fasin blong no biliv olsem ia, bae i stap long medel blong ol pipol ia? O Lod, bae yu givim paoa long mi, blong mekem se mi save go tru wetem ol fasin blong mi we i no strong. From mi mi no strong, mo nogud fasin olsem ia we i stap long ol pipol ia, i mekem sol blong mi i harem nogud.

31 O Lod, hat blong mi i sore bigwan; bae yu leftemap sol blong mi long Kraes. O Lod, bae yu givim long mi blong mi save gat paoa, blong mi save holem taet wetem fasin blong wet longtaem, ol hadtaem ia we bae i kam long mi, from ol rabis fasin blong ol pipol ia.

32 O Lod, bae yu leftemap sol



blong mi, mo givim long mi saksès, mo tu ol narafala wokman long grup blong mi, we oli stap wetem mi—yes, Amon, mo Eron, mo Omna, mo tu Amulek mo Siesrom, mo tufala pikinini boe blong mi—yes, olgeta ia bae yu leftemap tingting blong olgeta, O Lod. Yes, bae yu leftemap ol sol blong olgeta long Kraes.

33 Bae yu givim long olgeta blong oli save gat paoa, blong mekem se oli save holem taet long ol hadtaem we bae i kam long olgeta from ol rabis fasin blong ol pipol ia.

34 O Lod, bae yu givim long mifala blong save gat saksès blong karem olgeta i kam bak long yu tru Kraes.

35 Luk, O Lod, ol sol blong olgeta i gudgudfala, mo plante long olgeta oli ol brata blong mifala, taswe, givim long mifala, O Lod, paoa mo waes tingting blong mifala i save karem olgeta ia, ol brata blong mifala, bakegen i kam long yu.

36 Nao i bin hapen se, taem we Alma i bin talem ol toktok ia, hem i bin putum han blong hem long olgeta we oli bin stap wetem hem. Mo luk, taem we hem i bin putum han blong hem long olgeta, oli bin fulap long Tabu Spirit.

37 Mo afta samting ia, oli bin go wan wan, oli no bin tingbaot wanem bae oli kakae, o wanem bae oli dring, o wanem bae oli werem.

38 Mo Lod ia i bin lukaotem olgeta, blong oli nomo hanggri, mo bae oli no tosta; yes, mo

hem i bin givim long olgeta paoa, se bae oli go tru long eni kaen hadtaem, hemia nomo sapos glad blong Kraes i no kavremap olgeta. Nao ol samting ia i bin hapen folem prea blong Alma; mo hem i from se hem i bin prea wetem fet.

---

## JAPTA 32

---

*Alma i tijim ol pua man we ol hadtaem blong olgeta i bin mekem tingting blong olgeta i stapdaon —Fet hem i wan hop long ol samting we yumi no luk, be hem i tru —Alma i testifae se ol enjel i stap givhan long ol man, ol woman, mo ol pikinini —Alma i skelem trutok long wan sid —Sid ia oli mas planem mo lukaotem gud —Afta hem i gru i kam wan bigfala tri, mo long tri ia man i save kasem frut blong laef we i no save finis. Raonabaot 74 yia bifo Kraes i bon.*

Mo i bin hapen se olgeta i bin go aot, mo oli bin stat blong prijim toktok blong God i go long ol pipol, oli go insaed long ol haos blong prea blong olgeta, mo oli go insaed long ol haos blong olgeta; yes, mo tu oli bin prijim trutok long ol rod blong olgeta.

2 Mo i bin hapen se afta fulap wok we oli bin mekem long medel blong olgeta, oli bin stat blong gat saksès long medel blong ol grup blong ol pua pipol; from luk, oli bin sakemaot olgeta long ol haos blong prea blong olgeta, from oli no luk naes mo klin wetem ol klos blong olgeta —

3 Taswe oli no bin letem olgeta blong go insaed long haos blong prea blong wosipim God, from oli bin tekem olgeta olsem se oli doti; taswe oli bin stap pua; yes, ol brata blong olgeta i bin tekem olgeta olsem makas; taswe oli bin pua long saed blong ol samting blong wol; mo tu oli bin pua long hat.

4 Nao, taem we Alma i stap tijim mo toktok long ol pipol antap long hil Onaeda, i bin gat bigfala grup blong pipol we i bin kam long hem, ol man ia we yumi bin tokbaot, we oli bin pua long hat, from we oli no gat fulap samting, long saed blong ol samting blong wol.

5 Mo oli bin kam long Alma; mo wan we hem i lida blong olgeta i bin talem long hem, se: Luk, wanem nao bae ol brata blong mi ia bae oli mekem, from evri man i stap lukluk nogud long olgeta from oli no gat fulap samting, yes, mo moa speseli nao long ol pris blong mifala; from oli bin sakemaot mifala long ol haos blong prea blong mifala, we mifala i bin wok had plante blong bildimap wetem ol han blong mifala; mo oli bin sakemaot mifala from mifala i no gat plante samting; mo mifala i no gat ples blong wosipim God blong mifala; mo luk, wanem nao bae mifala i mekem?

6 Nao taem we Alma i bin harem ol samting ia, hem i bin tanem hem, fes blong hem i go stret long hem, mo hem i bin luk wetem bigfala glad; from hem i bin luk we ol hadtaem blong olgeta i bin mekem ting-

ting blong olgeta i stapdaon, mo we oli rere blong harem trutok.

7 Taswe Alma i no bin talem eni samting moa long ol nara-fala grup blong ol pipol; be hem i bin stretem han blong hem, mo hem i bin singaot long olgeta we hem i bin luk, we oli bin wantem blong sakem sin tru, mo hem i bin talem long olgeta:

8 Mi luk se hat blong yufala i stap daon; mo sapos i olsem, God bae i blesem yufala.

9 Luk brata blong yufala i bin talem se, wanem nao bae mifala i mekem?—from we oli bin sakemaot mifala long ol haos blong prea blong mifala, blong mekem se mifala i no save wosipim God blong mifala.

10 Luk mi talem long yufala, yufala i ting se yufala i no save wosipim God, be insaed long ol haos blong prea blong yufala nomo?

11 Mo antap long hem, bae mi askem, yufala i ting se yufala i no mas wosipim God be wan taem nomo long wan wik?

12 Mi talem long yufala, hem i gud we oli bin sakem yufala aot long ol haos blong prea blong yufala, blong mekem se yufala i save putum tingting blong yufala i stapdaon, mo blong mekem se yufala i save lanem waes tingting; from we i nid blong yufala i mas lanem waes tingting; from, hem i from se oli bin ronemaot yufala, mekem se ol brata blong yufala i nomo wantem yufala, from we yufala i pua tumas, blong hat blong yufala i stapdaon; from ol samting ia i mas mekem yufala i

putum tingting blong yufala i stapdaon.

13 Mo nao, from we oli fosem yufala blong putum tingting blong yufala i stapdaon, yufala i kasem blesing; from samtaem wan man, sapos oli fosem hem blong putum tingting blong hem i stapdaon, hem i lukaotem fasin blong sakem sin, mo nao i tru se eni man we i sakem sin, bae hem i kasem sore; mo hem we i kasem sore mo i stap strong kasem en, sem man ia bae i sev.

14 Mo nao, olsem we mi bin talem long yufala, se from we oli bin fosem yufala blong putum tingting blong yufala i stapdaon, yufala i bin kasem blesing, be yufala i no ting se olgeta i kasem moa blesing, we oli rili putum tingting blong olgeta i stapdaon from trutok?

15 Yes, hem we i rili putum tingting blong hem i stapdaon, mo i sakem ol sin blong hem, mo stap strong gogo kasem en, semfala man ia bae i kasem blesing—yes, bae hem i kasem moa blesing bitim olgeta we oli fosem olgeta blong putum tingting blong olgeta i stapdaon from we oli pua tumas.

16 Taswe, olgeta we i putum tingting blong olgeta i stapdaon mo oli no fosem olgeta blong putum tingting blong olgeta i stapdaon, oli kasem blesing; o i moa gud, long narafala toktok, hem we i bilivim toktok blong God i kasem blesing, mo i kasem baptaes wetem hat we i no strong tumas, yes, God i no bin karem hem blong save trutok, mo tu i no bin gat samting

blong fosem hem blong save trutok, bifo oli save biliv.

17 Yes, i gat plante man we oli talem se: Sapos yu soem wan saen blong heven long mifala, ale bae mifala i save se i tru; afta bae mifala i bilivim.

18 Nao mi askem, hemia i fet? Luk, mi talem long yufala, No; from sapos wan man i save wan samting hem i no gat stamba tingting blong bilivim, from hem i save finis.

19 Mo nao, hamas moa bigfala panis blong man ia we i save wanem God i wantem mo hem i no mekem, bitim hem we i biliv nomo, o hem we i gat wan stamba tingting nomo blong biliv, mo hem i foldaon long sin?

20 Nao blong olgeta samting ia yufala i mas jajem. Luk, mi talem long yufala, se hem i long wan han olsem we i stap long narafala han; mo bae i stap long evri man folem wok blong hem.

21 Mo nao olsem we mi bin talem long saed blong fet—fet i no blong gat wan stret save long ol samting; taswe, sapos yufala i gat fet, yufala i hop long ol samting we yufala i no lukim, we oli tru.

22 Mo nao, luk, mi talem long yufala, mo mi wantem se yufala i tingbaot, we God i gat fulap sore long olgeta we oli biliv long nem blong hem; taswe, hem i wantem, long fasfala samting, blong yufala i bilif, yes, long toktok blong hem.

23 Mo nao, hem i sendem toktok blong hem long ol man tru

long ol enjel, yes, i no long ol man nomo be ol woman tu. Nao i no hemia nomo; plante taem, God i givim ol smol pikinini ol toktok, we i blokem ol waes man mo ol man we oli save plante samting.

24 Mo nao, ol brata blong mi we mi lavem tumas, olsem we yufala i bin wantem blong save long mi wanem yufala i mas mekem, from we yufala i harem nogud mo oli bin sakemaot yufala—nao mi no wantem se yufala i ting se mi wantem blong jajem yufala be folem samting we i tru nomo—

25 From mi no wantem talem se yufala evriwan i bin gat wan samting we i fosem yufala blong putum tingting blong yufala i stapdaon; from mi biliv tru se i gat sam long yufala we olgeta nomo bae oli putum tingting blong olgeta i stapdaon, i nomata wanem oli fesem long laef blong olgeta.

26 Nao, olsem we mi bin talem long saed blong fet—se i no wan stret save—sem samting wetem ol toktok blong mi. Yufala i no save gat save se oli tru fas taem, go kasem ful save, olsem we fet hem i no wan stret save.

27 Be luk, sapos yufala i girap mo leftemap tingting blong yufala, go kasem we yufala i traem ol toktok blong mi, mo yusum wan smol pis blong fet, yes go kasem sapos yufala i save wantem nomo blong biliv, letem samting ia i wok insaed long yufala, go kasem taem we yufala i kasem wan bilif we

i naf blong yufala i save akseptem wan pat blong ol toktok blong mi.

28 Nao, bae yumi i skelem toktok ia long wan sid. Nao, sapos yufala i givim ples, blong wan sid i save planem insaed long hat blong yufala, luk, sapos hem i wan tru sid, o wan gudfala sid, sapos yufala i no sakem aot from we yufala i no bilif, mekem se yufala faet agensem Spirit blong Lod, luk, bae hem i stat blong kam bigwan insaed jes blong yufala; mo taem we yufala i filim we trutok ia i stap solap, bae yufala i stat blong talem insaed long yufala—Hem i mas nid i stap se hemia i wan gudfala sid, o se trutok ia i gud, from hem i stat blong leftemap sol blong mi; yes, hem i stat blong openem save blong mi, yes, hem i stat blong kam swit long mi.

29 Nao luk, bae samting ia i no save mekem fet blong yufala i kam antap? Mi talem long yufala, Yes; be hem i no gru naf yet go kasem wan stret save.

30 Be luk, taem we sid ia i stap solap, mo i kamaot, mo i stat blong gru, ale yufala i mas talem se sid ia i gudfala, from luk, hem i stat kam bigwan, mo kamaot mo stat blong gru. Mo nao, luk, bae samting ia i no mekem fet blong yufala i kam moa strong? Yes, bae i mekem fet blong yufala i kam moa strong: from bae yufala i talem se mi save se sid ia hem i wan gudfala sid; from luk, hem i kamaot mo i stat blong gru.

31 Mo nao, luk, yufala i save

tru se hemia i wan gudfala sid? Mi talem long yufala, Yes; from evri sid i givim frut, we i semak long hem bakegen.

32 Taswe, sapos wan sid i gru hem i gud, be sapos hem i no gru, luk hem i no gud, taswe oli sakemaot hem.

33 Mo nao, luk, from we yufala i bin traem samting ia, mo bin planem sid ia, mo hem i stap solap mo i kamaot, mo i stat blong gru, yufala i mas nid blong save se sid ia i gud.

34 Mo nao, luk, save blong yufala i stret gud? Yes, save blong yufala i stret gud long samting ia, mo fet i nomo wok; mo samting ia from yufala i save, from yufala i save se trutok ia i bin mekem ol sol blong yufala i solap, mo tu yufala i save we i bin kamaot i kam antap, mo save blong yufala i stat blong kam open, mo tingting blong yufala i stat blong kam bigwan.

35 O afta, samting ia i no tru? Mi talem long yufala, Yes, from we hemia i laet; mo eni samting we i laet, hem i gud, from we oli save luk save, taswe yufala i mas save se hem i gud; mo nao luk, afta we yufala i testem laet ia, save blong yufala i stret gud?

36 Luk mi talem long yufala, No; mo yufala i no mas putum fet blong yufala long saed, from yufala i bin yusum fet blong yufala blong planem sid nomo, blong mekem se yufala i traem blong testem, blong save sapos sid ia i gud.

37 Mo luk, taem we tri i stat blong gru, bae yufala i talem:

Bae yumi givim gudfala kakae mo lukaot gud long hem, blong mekem se i save gat rus, blong mekem se i save gru i kam antap, mo givim frut long yumi. Mo nao luk, sapos yufala i givim gudfala kakae long hem mo lukaot gud long hem, bae i save gat rus, mo gru i kam antap, mo i givim frut.

38 Be sapos yufala i no lukaot gud long tri ia, mo yufala i no tingbaot blong givim gudfala kakae long hem, luk bae i no save gat eni rus; mo taem we hot blong san i kam mo bonem hem, from we hem i no gat eni rus hem i drae wantaem, mo yufala i pulumaot mo sakemaot hem.

39 Nao, hemia i no from we sid ia i no gud, o hemia i no from we frut blong hem bae oli no wantem; be hem i from se graon blong yufala i pua mo drae, mo bae yufala i no wantem givim gudfala kakae long tri ia, taswe yufala i no save kasem frut blong hem.

40 Mo olsem ia nao, sapos yufala i no wantem givim gudfala kakae long trutok ia, lukluk i go long fored wetem wan ae blong fet long frut ia, bae yufala i neva save kasem frut blong tri blong laef.

41 Be sapos yufala i givim gudfala kakae long trutok ia, yes, givim gudfala kakae long tri ia taem we hem i stat blong gru, tru long fet blong yufala, wetem fulap kea, mo wetem fasin blong save wet longtaem, lukluk i go long fored long frut ia, bae rus blong hem i gru; mo luk bae i kam wan tri we i gru i

kam antap kasem laef we i no save finis.

42 Mo from kea blong yufala mo fet blong yufala mo fasin blong yufala blong save wet longtaem wetem trutok ia blong givim gudfala kakae long hem, blong i save gat rus insaed long yufala, luk, i no longtaem bae yufala i save tekem frut blong hem, we praes blong hem i gudgudfala, we hem i moa swit bitim evri samting we i swit, mo we hem i moa waet bitim evri samting we i waet, yes, mo i moa klin bitim evri samting we i klin; mo bae yufala i kakae gud long frut ia go kasem taem we yufala i fulap, mekem se yufala i nomo hanggri, mo bae yufala i nomo tosta.

43 Afta, ol brata blong mi, bae yufala i save kasem ol pei blong fet blong yufala, mo kea blong yufala, mo fasin blong save wet longtaem blong yufala, mo go tru long hadtaem wetem longfala tingting, mo stap wet kasem taem we tri ia i givim frut long yufala.

---

### JAPTA 33

---

*Sinos i bin tijim se ol man i mas prea mo wosip long evri ples, mo se God bae i tekemaot ol jajmen from Pikinini blong Hem—Sinok i bin tijim se sore i kam from Pikinini—Moses i bin leftemap long ples we i no gat man long hem, wan eksampol blong Pikinini blong God. Raonabaot 74 yia bifo Kraes i bon.*

NAO afta we Alma i bin talem-

aot ol tok ia, oli bin sendem wan toktok i go long hem blong askem long hem sapos oli mas biliv long wan God, blong oli save kasem frut ia we hem i bin tokbaot, o olsem wanem oli mas planem sid ia, o trutok ia we hem i bin tokbaot, we hem i bin talem we oli mas planem insaed long ol hat blong olgeta; o long wanem fasin nao bae oli stat blong yusum fet blong olgeta.

2 Mo Alma i bin talem long olgeta: Luk, yufala i bin talem se yufala i no save wosipim God blong yufala from we oli bin sakemaot yufala long ol haos blong prea blong yufala. Be luk, mi talem long yufala, sapos yufala i ting se yufala i no save wosipim God, yufala i rong bigwan, mo yufala i mas lukluk gud long ol skripja; sapos yufala i ting se oli bin tijim yufala olsem, yufala i no save olgeta.

3 Yufala i tingbaot we yufala i bin ridim wanem Sinos, profet blong bifo, i bin talem long saed blong prea o wosip?

4 From hem i bin talem: Yu yu gat sore, O God, from we yu yu bin harem prea blong mi, taem we mi bin stap long ples we i no gat man long hem; yes, yu yu bin gat sore taem we mi bin prea from olgeta we oli ol enemi blong mi, mo yu yu bin mekem olgeta oli gud long mi.

5 Yes, O God, mo yu bin gat sore long mi taem we mi bin prea long yu long fil blong mi; taem we mi bin askem long yu long prea blong mi, mo yu yu bin harem mi.

6 Mo bakegen, O God, taem we mi bin go long haos blong mi, yu yu bin harem mi long prea blong mi.

7 Mo taem we mi bin go insaed long rum blong mi, O Lod, mo mi bin prea long yu, yu yu bin harem mi.

8 Yes, yu yu gat sore long ol pikinini blong yu taem we oli krae long yu, blong yu yu harem olgeta mo i no blong ol man, mo bae yu harem olgeta.

9 Yes, O God, yu yu bin gat sore long mi, mo yu yu bin harem ol prea blong mi long medel blong grup blong pipol blong yu, we oli stap wosipim yu.

10 Yes, mo tu yu yu bin harem mi taem we ol enemi blong mi oli bin sakemaot mi mo oli no laekem mi; yes, yu yu bin harem ol prea blong mi, mo yu yu bin kros long ol enemi blong mi, mo yu yu bin visitim olgeta long kros blong yu mo kwik taem nomo yu bin smasem gud olgeta.

11 Mo yu yu bin harem mi from ol hadtaem blong mi mo truhats blong mi; mo hem i from Pikinini blong yu, we yu yu bin gat sore olsem ia nao long mi, taswe, bae mi prea long yu long ol hadtaem blong mi, from long yu, glad blong mi i stap; from yu yu bin tanem ol jajmen blong yu i gowe long mi, from Pikinini blong yu.

12 Mo Alma i bin talem long olgeta: Yufala i bilivim ol skripja we ol man bifo i bin raetem?

13 Luk, sapos i olsem, yufala i mas bilivim wanem we Sinos i bin talem; from, luk hem i

bin talem: Yu yu bin tanem ol jajmen blong yu from Pikinini blong yu.

14 Nao luk, ol brata blong mi, bae mi askem yufala sapos yufala i bin ridim ol skripja? Sapos yu bin mekem, from wanem nao yufala i no biliv long Pikinini blong God?

15 From oli no bin raetem se Sinos nomo i bin tokbaot ol samting ia, be Sinok tu i bin tokbaot ol samting ia —

16 From luk, hem i bin talem: Yu yu kros, O Lod, long ol pipol ia, from bae oli no andastanem ol sore blong yu we yu yu bin givim long olgeta from Pikinini blong yu.

17 Mo nao, ol brata blong mi, yufala i luk we wan nambatu profet blong bifo i bin testifae long saed blong Pikinini blong God, mo from ol pipol oli no bin wantem andastanem ol toktok blong hem, oli bin stonem hem i ded.

18 Be luk, i no hemia nomo; i no hemia nomo we oli bin tokbaot Pikinini blong God.

19 Luk, Moses i bin tokbaot hem; yes, mo luk hem i bin leftemap wan eksampol long ples we i no gat man long hem, we eni man we bae i lukluk long hem bae i save laef. Mo i bin gat plante man we oli bin lukluk long hem mo oli bin laef.

20 Be i no plante man we oli bin andastanem mining blong ol samting ia, mo hemia from ol hat blong olgeta i strong. Be i bin gat plante we oli stronghed mekem se oli no bin lukluk, taswe oli bin ded. Nao

stamba tingting we oli no bin lukluk, hem i from we oli no bin biliv se bae hem i save mekem oli oraet.

21 O ol brata blong mi, sapos yufala i save kam oraet tru long sakem ol ae nomo, blong mekem se yufala i save kam oraet, bae yufala i no wantem lukluk kwiktaem, o bae yufala i wantem mekem ol hat blong yufala i kam strong long no bilif, mo stap les, blong mekem se yufala i no sakem ol ae, mekem se bae yufala i ded?

22 Sapos i olsem, sore tumas bae i kam long yufala; be sapos i no olsem, ale yufala i sakem ol ae mo stat blong biliv long Pikinini blong God, se bae hem i kam blong pemaot man blong hem, mo we bae hem i harem nogud mo kasem ded blong pem praes blong ol sin blong olgeta; mo se bae hem i girap bakegen long ded, we bae i mekem laef bakegen i hapen, blong mekem se ol man bae i stanap long fored blong hem, blong kasem jajmen long las mo jajmen dei, folem ol wok blong olgeta.

23 Mo nao, ol brata blong mi, mi wantem se bae yufala i planem toktok ia long ol hat blong yufala, mo taem we i stat blong solap long wei ia, givim gudfala kakae long hem wetem fet blong yufala. Mo luk, bae i kam wan tri, i gru i kam antap long yu kasem laef we i no gat en. Mo afta, God bae i mekem ol hevi samting blong yu i nomo hevi, tru long glad blong Pikinini blong hem. Mo tu ol samting

ia yufala i save mekem, sapos yufala i jusum. Amen.

---

### JAPTA 34

---

*Amulek i testifae we trutok i stap long Kraes, we i mekem fasin blong sevem man i hapen—Sapos i no gat wan atonmen i hapen, ol man i mas ded—Eври loa blong Moses i poen i go long sakrifaes blong Pikinini blong God—Plan blong fasin blong pemaot man we i no save finis, i stanap long fet mo fasin blong sakem sin—Prea from ol blessing blong wol mo blong spirit—Laef ia i taem blong ol man blong mekem rere blong mitim God—Yu mas wok had blong sevem yuwan wetem respek long God. Raonabaot 74 yia bifo Kraes i bon.*

Mo nao i bin hapen se, afta we Alma i bin talem ol toktok ia long olgeta, hem i bin sidaon long graon, mo Amulek i bin girap mo i bin stat blong tijim olgeta, i talem:

2 Ol brata blong mi, mi ting se i no gat janis blong yufala, blong no gat save long ol samting we oli bin tokbaot long saed blong Kraes, se bae i kam, we mifala i tijim se hem i Pikinini blong God; yes, mi save we ol samting ia oli bin tijim long yufala plante taem, bifo yufala i bin gowe long mifala.

3 Mo from yufala i wantem long brata blong mi we mi lavem tumas, se hem bae i talem long yufala, wanem yufala i mas mekem, from ol hadtaem blong yufala; mo hem i bin toktok lelebet long yufala blong



mekem rere tingting blong yufala; yes, mo hem i bin askem strong long yufala blong kasem fet mo blong save wet longtaem—

4 Yes, go kasem we yufala i gat inaf fet olsem blong save planem trutok ia long ol hat blong yufala, blong yufala i save traem blong testem, blong save sapos hem i gud.

5 Mo mifala i bin luk bigfala kwestin we i stap long tingting blong yufala, hemia sapos trutok i stap long Pikinini blong God, o sapos bae i no gat wan Kraes.

6 Mo tu yufala i bin luk we brata blong mi i bin pruvum long yufala, long plante defren taem, we trutok i stap long Kraes we i mekem fasin blong sevem man i hapen.

7 Brata blong mi i bin yusum ol toktok blong Sinos, se fasin blong pemaot man i kam long Pikinini blong God, mo tu hem i bin yusum ol tok blong Sinok; mo tu hem i bin yusum ol toktok blong Moses blong pruvum se ol samting ia i tru.

8 Mo nao, luk, bae mi testifae long yufala blong miwan se ol samting ia i tru. Luk, mi talem long yu, se mi save se Kraes bae i kam long ol pikinini blong ol man, blong tekem long hem ol fasin blong brekem ol loa blong pipol blong hem, mo we bae hem i pem praes blong ol sin blong wol; from Lod God i bin talem samting ia.

9 From i nid blong wan atonmen i mas hapen; from folem bigfala plan blong God we i no

save finis, i mas gat wan atonmen i hapen, sapos no, evri man bae i mas ded nomo; yes, evriwan i stronghed; yes, evriwan oli foldaon mo oli lus, mo oli mas ded sapos i no gat atonmen we bae i mas hapen.

10 From hem i nid blong bae i gat wan bigfala mo las sakrifae; yes, i no wan sakrifae blong man, o bigfala anamol, o eni kaen pijin; from bae i no wan sakrifae blong man; be i mas wan sakrifae we i no gat en mo we i no save finis.

11 Nao i no gat eni man we i save sakrifaeem blad blong hemwan we bae i pem praes blong ol sin blong wan narafala man. Nao, sapos wan man i kilim ded wan narafala man, luk bae loa blong yumi, we i stret, tekem laef blong brata blong hem? Mi talem long yufala, No.

12 Be loa i nidim laef blong man we i bin kilim ded narafala man; taswe i no save gat wan samting we i no kasem wan atonmen we i no gat en, we bae i naf blong pem praes blong ol sin blong wol.

13 Taswe, i nid blong gat wan bigfala mo las sakrifae, mo afta bae i gat, o i nid blong gat, wan stop long fasin blong mekem blad i ron; ale loa blong Moses bae i hapen; yes, bae evri samting ia i hapen, evri smol haf mo leta, mo i no gat wan we i bin pas i gowe.

14 Mo luk, hemia evri mining blong loa, evri smol pis i poen i go long bigfala mo las sakrifae; mo bigfala mo las sakrifae bae

hem i Pikinini blong God, yes, i no gat en mo i no save finis.

15 Mo olsem ia nao bae hem i tekem fasin blong sevem man, long olgeta we bae oli biliv long nem blong hem; hemia plan blong las sakrifaes ia, blong karem i kam ol stamba blong sore, we i bitim jastis, mo karem i kam ol wei long ol man blong mekem se oli save gat fet we i mekem olgeta i sakem sin.

16 Mo olsem ia nao, sore i save mekem i gat inaf long ol samting we jastis i nidim, mo i raonem olgeta long ol han blong sef, taem we hem we i no yusum fet we i mekem hem i sakem sin, hem i no sef long ful loa blong ol samting we jastis i askem; taswe long hem nomo we i gat fet we i mekem olgeta i sakem sin, bigfala plan blong fasin blong pemaot man we i no gat en i save hapen.

17 Taswe bae God i givim long yufala, ol brata blong mi, blong mekem se yufala i save stat blong yusum fet blong yufala, we i mekem yufala i sakem sin, blong mekem se yufala i stat blong prea long tabu nem blong hem, blong hem i save gat sore long yufala;

18 Yes, prea long hem from sore; from hem i gat paoa blong sev.

19 Yes, putum tingting blong yufala i stapdaon, mo gohed long prea, long hem.

20 Prea long hem taem we yufala i stap long plantesen blong yufala, yes, ova long ol grup blong anamol blong yufala.

21 Prea long hem long ol haos

blong yufala, yes, long saed blong evri famle blong yufala, long moning, medel dei, mo aftenun.

22 Yes, prea long hem agensem paoa blong ol enemi blong yufala.

23 Prea long hem agensem devel, we hem i wan enemi blong ol stret fasin.

24 Prea long hem long saed blong ol kakae blong garen blong yufala, blong mekem se yufala i save kam antap gud long olgeta.

25 Prea long saed blong ol grup blong anamol blong ol plantesen blong yufala, blong oli save kam moa plante.

26 Be i no hemia nomo; yufala i mas poremaot ol sol blong yufala insaed long rum blong yufala, mo insaed long ol sikret ples blong yufala, mo long ples blong yufala we i no gat man long hem.

27 Yes, mo taem we yufala i no prea long Lod, letem ol hat blong yufala i stap fulap, long prea oltaem long hem from gudfala laef blong yufala, mo tu from gudfala laef blong olgeta we oli stap raon long yufala.

28 Mo nao luk, ol brata blong mi we mi lavem tumas, mi talem long yufala, yufala i no mas ting se i hemia nomo; from afta we yufala i mekem ol samting ia, sapos yufala tanem baksaed blong yufala long olgeta we oli gat nid, mo olgeta we oli neked, mo no visitim olgeta we oli sik mo olgeta we oli harem nogud, mo serem ol samting blong yufala, sapos yufala i gat, long

olgeta we oli stap long nid—  
Mi talem long yufala, sapos  
yufala i no mekem wan long ol  
samting ia, luk, prea blong  
yufala i blong nating nomo, mo  
i no gat yus long yu, mo yufala  
i olsem ol man we i gat tufes we  
oli tanem baksaed long fet.

29 Taswe, sapos yufala i no  
tingbaot blong gat bigfala lav  
long olgeta man, yufala i olsem  
makas, we ol man we oli wokem  
aean i sakemaot, (from praes  
blong hem i nating nomo) mo  
ol man oli purumbut long hem  
andanit long leg.

30 Mo nao, ol brata blong mi,  
mi wantem se, afta we yufala i  
bin kasem plante witnes, mo  
afta we yufala i bin luksave we  
ol tabu skripja oli testifae long  
ol samting ia, yufala i kam fored  
mo soem frut we i mekem yu-  
fala i sakem sin.

31 Yes, mi wantem se yufala i  
kam fored mo yufala i nomo  
mekem ol hat blong yufala i  
kam strong; from luk, nao i  
taem mo dei blong fasin blong  
sevem man blong yufala; mo  
taswe, sapos yufala i sakem sin  
mo no mekem ol hat blong  
yufala i kam strong, naoia  
nomo bae bigfala plan blong  
fasin blong pemaot man i wok  
long yufala.

32 Nao luk, laef ia hem i taem  
blong ol man blong mekem  
rere blong mitim God; yes, luk  
dei blong laef ia i dei blong ol  
man blong mekem ol wok  
blong olgeta.

33 Mo nao, olsem we mi bin  
talem long yufala finis, from yu-  
fala i bin kasem plante witnes,

taswe, mi askem strong long  
yufala blong yufala i no pusum  
bak dei blong sakem sin blong  
yufala i go kasem en; from afta  
dei blong laef ia, we God i bin  
givim long yumi blong mekem  
rere from taem we i no save  
finis, luk, sapos yumi no yusum  
moa gud taem blong yumi long  
laef ia, ale naet blong tudak i  
kam, mo long taem ia yumi  
nomo save mekem wok.

34 Yufala i no save talem,  
taem we yufala i kam long wan  
rabis trabol taem, se bae mi  
sakem sin, se bae mi gobak  
long God blong mi. No, yufala i  
no save talem samting ia; from  
we sem spirit we i stap long ol  
bodi blong yufala long taem we  
yufala i livim laef ia, sem spirit  
ia bae i gat paoa blong stap  
long bodi blong yu insaed long  
wol ia we i no save finis.

35 From luk, sapos yufala i bin  
pusum bak dei blong sakem sin  
blong yufala i go kasem ded,  
luk, yufala i stap andanit long  
spirit blong devel, mo hem i  
holem taet yu blong hem; taswe,  
Spirit blong Lod i aot long yu,  
mo i nomo gat ples insaed long  
yu, mo devel i gat ol paoa ova  
long yu; mo hemia las ples  
blong ol man we oli nogud.

36 Mo hemia mi save, from  
Lod i bin talemaot se hem i no  
stap insaed long ol tempol we  
oli no tabu, be hem i stap long  
ol hat blong olgeta we i stret;  
yes, mo tu hem i bin talemaot  
we olgeta we i stret bae oli  
sidaon insaed long kingdom  
blong hem, blong nomo go aot  
bakegen; be ol klos blong ol-

geta bae i kam waet tru long blad blong Sipsip.

37 Mo nao, ol brata blong mi we mi lavem tumas, mi wantem se yufala i mas tingbaot ol samting ia, mo se yufala i mas wok had blong sevem yuwan wetem respek long fored blong God, mo se bae yufala i nomo go agensem taem we Kraes bae i kam.

38 Se yufala i nomo faet agensem Tabu Spirit, be se yufala i kasem hem, mo tekem long yufala nem blong Kraes; blong yufala i putum tingting blong yufala i stapdaon go kasem das, mo wosipim God, long eni ples we yufala i stap long hem, long spirit mo long tru; mo blong yufala i talem tangkyu wetem gladhat evri dei, from ol plante sore mo ol blesing we hem i stap givim long yufala.

39 Yes, mo tu mi askem strong long yufala, ol brata blong mi, blong yufala i stap lukaot gud blong prea oltaem, blong devel i no lidim yufala i gowe wetem ol temtesen blong hem, mekem se hem i no save winim yufala, blong mekem se yufala i no kam ol wokman blong hem long las dei; from luk, hem i no givim wan gudfala pei long yufala.

40 Mo nao ol brata blong mi we mi lavem tumas, bae mi askem strong long yufala blong gat fasin blong save wet longtaem, mo se yufala i holem taet tru evri kaen hadtaem; blong yufala i no tok agensem olgeta we oli sakemaot yufala from yufala i pua tumas, blong mek-

em se yufala i no kam ol man blong mekem sin olsem olgeta.

41 Be blong yufala i gat fasin blong save wet longtaem, mo holem taet tru ol hadtaem ia, wetem wan strong hop se bae wan dei bae yufala i save spel long ol hadtaem blong yufala.

---

### JAPTA 35

---

*Prijing blong trutok i smasem gud giaman wok blong ol man blong Soram—Oli aotem olgeta we oli bin jenisim laef, we afta oli bin joen wetem ol pipol blong Amon long Jeson—Fasin nogud blong ol pipol i mekem Alma i harem nogud. Raonabaot 74 yia bifo Kraes i bon.*

NAO i bin hapen se, afta we Amulek i bin endem ol toktok ia, oli bin kamaot long ol pipol mo oli bin go long graon blong Jeson.

2 Yes, mo ol narafala brata, olgeta tu i bin go long graon blong Jeson afta we oli prijim toktok ia long ol man blong Soram.

3 Mo i bin hapen se afta we ol bigman blong ol man blong Soram i bin kam tugeta mo tokbaot ol toktok ia we oli bin prijim long olgeta, oli bin kros from trutok ia, from hem i bin smasem gud giaman wok blong olgeta; taswe oli no wantem blong lisin long ol toktok ia.

4 Mo oli bin pasem mesej blong karem ol pipol long evri ples i kam tugeta, mo tokbaot long olgeta ol toktok ia we oli bin talemaot.

5 Nao, ol man blong olgeta we

oli rulum olgeta mo ol pris blong olgeta mo ol tija blong olgeta oli no bin letem ol pipol i save wanem oli wantem; taswe oli bin faenemaot ol tingting blong ol pipol long wan sikret fasin.

6 Mo i bin hapen se afta we oli bin faenemaot tingting blong ol pipol, oli bin sakemaot olgeta long kantri we oli sapotem ol toktok we Alma mo ol brata blong hem i bin talem; mo oli plante; mo oli bin kam tu long graon blong Jeson.

7 Mo i bin hapen se Alma mo ol brata blong hem i bin givhan long olgeta.

8 Nao ol pipol blong ol man blong Soram i bin kros long ol pipol blong Amon we i bin stap long Jeson, mo jif man blong rul blong ol man blong Soram, hem i wan nogud man, i bin sendem mesej i go long ol man blong Amon we hem i wantem blong oli sakemaot evri man blong Soram long graon blong olgeta, evriwan we oli kam insaed long graon blong olgeta.

9 Mo hem i bin talem plante nogud samting agensem olgeta. Mo nao ol man blong Amon i no bin fraet long ol toktok blong olgeta; taswe oli no bin sakemaot olgeta, be oli bin tekem olgeta pua man blong ol man blong Soram we i bin kam long olgeta; mo oli bin givim kakae long olgeta mo oli bin givim klos long olgeta, mo oli bin givim ol graon long olgeta olsem graon we i kam long ol papa; mo oli bin givhan long olgeta long ol samting we oli wantem.

10 Nao, samting ia i mekem ol man blong Soram i kam kros agensem ol man blong Amon, mo oli bin stat blong joen wetem ol man blong Leman mo blong mekem olgeta tu blong kam kros agensem olgeta.

11 Mo taswe ol man blong Soram mo ol man blong Leman i bin stat blong mekem rere blong faet agensem ol man blong Amon, mo tu agensem ol man blong Nifae.

12 Mo olsem ia nao namba seventin yia blong ol jaj ova long ol pipol blong Nifae i bin en.

13 Mo ol man blong Amon i bin aot long graon blong Jeson, mo oli bin kam insaed long graon blong Melek, mo oli bin livim spes long graon blong Jeson blong ol ami blong ol man blong Nifae, blong oli save faet wetem ol ami blong ol man blong Leman mo ol ami blong ol man blong Soram; mo olsem ia nao wan faet i bin stat bitwin ol man blong Leman mo ol man blong Nifae, long namba eitn yia blong rul blong ol jaj; mo bae wan histri blong ol faet blong olgeta i kamaot afta.

14 Mo Alma, mo Amon, mo ol brata blong tufala, mo tu tufala pikinini boe blong Alma i bin gobak long graon blong Sarahemla, afta we oli bin ol tul long ol han blong God blong tekem plante long ol man blong Soram i kam blong sakem sin; mo olgeta evriwan we i bin kam blong sakem sin oli bin ronemaot olgeta long graon blong olgeta; be oli gat ol graon we i

kam long ol papa long graon blong Jeson, mo oli bin tekem ol tul blong faet blong lukaot gud long olgeta bakegen, mo ol woman blong olgeta, mo ol pikinini blong olgeta, mo ol graon blong olgeta.

15 Nao Alma, i bin harem nogud long rabis fasin blong ol pipol blong hem, yes from ol faet, mo ol blad i ron, mo ol rao we i stap long medel blong olgeta; mo hem i bin stap blong talemaot trutok, o God i bin sendem hem blong talemaot trutok, long ol pipol long evri bigtaon; mo hem i bin luk we ol hat blong ol pipol i bin stat blong kam strong, mo we oli bin stat blong kam kros from we trutok ia i strong, hat blong hem i bin harem nogud.

16 Taswe, hem i bin mekem se ol pikinini boe blong hem i mas kam tugeta, blong hem i save givim oda blong hem long evriwan wanwan, long saed blong ol samting blong stret fasin. Mo mifala i gat wan histri blong ol komanmen blong hem, we hem i bin givim long olgeta folem we i stap long histri blong hem nomo.

---

Ol komanmen blong Alma i go long boe blong hem Hileman.

*I stat long japta 36 mo  
japta 37 nomo.*

---

### JAPTA 36

---

*Alma i testifae long Hileman long saed blong fasin blong jenisim laef*

*blong hem afta we hem i bin luk wan enjel—Hem i bin harem nogud long ol soa blong wan sol we i kasem panis, hem i bin prea long nem blong Jisas, mo afta hem i bin bon long God—Sol blong hem i bin fulap long glad we i swit—Hem i bin luk plante grup blong ol enjel i stap presem God—Plante man we oli jenisim laefoli bin testem mo lukim semak olsem we hem i bin testem mo lukim. Raonabaot 74 yia bifo Kraes i bon.*

BOE blong mi, harem ol toktok blong mi; from we mi promes long yu, se i semak olsem we bae yu holem ol komanmen blong God, bae laef blong yu i kam antap gud long graon ia.

2 Mi wantem se yu mas mekem semak olsem we mi bin mekem, blong tingbaot taem we ol bubu blong yumi i bin stap long slef; from we oli bin stap long slef, mo i no gat wan man we i save mekem olgeta i kamaot be God blong Ebrahim nomo, mo God blong Aesak, mo God blong Jakob; mo hem i tru we i bin mekem olgeta i kamaot long ol hadtaem blong olgeta.

3 Mo nao, o boe blong mi Hileman, luk, yu stap long yangfala laef blong yu, mo taswe, mi askem strong long yu blong bae yu harem ol toktok blong mi mo lanem long mi; from mi save we eni man we bae i putum tras blong hem long God bae God i sapotem olgeta long ol hadtaem blong olgeta, mo trabol blong olgeta, mo ol hadtaem blong olgeta, mo bae God i leftemap olgeta long las dei.

4 Mo mi no wantem se yu ting se mi save long save blong miwan nomo—no blong wol ia be blong spirit, no blong fasin blong wol be blong God.

5 Nao, luk, mi talem long yu, sapos we mi no bin bon long God bae mi no bin save ol samting ia; be God i bin, tru long maot blong tabu enjel blong hem, talemaot ol samting ia long mi, be i no from se mi klin inaf;

6 From we mi bin go olbaot wetem ol boe blong Mosaea, blong lukaotem blong smasem gud jos blong God; be luk, God i bin sendem tabu enjel blong hem blong stopem mifala long rod.

7 Mo luk, hem i bin toktok long mifala, olsem we hem i voes blong tanda, mo ful graon i bin seksek andanit long ol leg blong mifala; mo mifala i bin foldaon long graon, from fraet blong Lod i bin kavremap mifala.

8 Be luk, voes ia i bin talem long mi se: Girap. Mo mi bin girap mo mi bin stanap, mo mi bin luk enjel ia.

9 Mo hem i bin talem long mi: Sapos yu no wantem blong smasem gud yuwan, yu no gohed blong lukaotem blong smasem gud jos blong God.

10 Mo i bin hapen se mi bin foldaon i go long graon; mo mi no bin save openem maot blong mi kasem spes blong tri dei mo tri naet, mo mi no bin save yusum ol han mo leg blong mi.

11 Mo enjel ia i bin talemaot plante moa samting long mi, we ol brata blong mi i bin harem, be mi mi no bin harem; from taem we mi bin harem ol

toktok ia—Sapos yu no wantem blong smasem gud yuwan, yu no gohed blong lukaotem blong smasem gud jos blong God—Mi bin kasem bigfala fraet mo sapraes from maet bae samting ia i smasem gud mi, taswe mi bin foldaon long graon mo mi no bin harem eni moa samting.

12 Be mi bin harem i soa wetem trabol we i no save finis, from we sol blong mi i harem nogud go kasem we i bigwan tumas, mo i bin harem nogud from ol sin blong mi.

13 Yes, mi bin tingbaot ol sin mo ol rabis fasin blong mi, taswe mi bin harem nogud long ol soa blong hel; mi bin luk se mi bin go agensem God blong mi, mo we mi no bin holem ol tabu komanmen blong hem.

14 Yes, mo mi bin kilim ded plante long ol pikinini blong hem, o long narafala toktok se mi bin lidim olgeta i go lus; yes, mo blong endem toktok ol rabis fasin blong mi i bigwan, mekem se tingting ia blong kam stap wetem God blong mi, i bin mekem sol blong mi i soa olsem we mi no save talemaot.

15 O, mi bin ting, se mi save lus mo no stap long sol tugeta wetem bodi blong mi, blong bae mi no save stanap long fored blong God blong mi, blong hem i jajem mi long ol wok blong mi,

16 Mo nao, blong tri dei mo blong tri naet mi bin harem nogud, we i wetem ol soa blong wan sol i kasem panis.

17 Mo i bin hapen se taem we olsem ia nao mi bin harem nogud, taem we mi bin tingbaot

ol plante sin blong mi, i bin givim had taem long mi, luk, mi bin tingbaot tu we mi bin harem papa blong mi i bin profesae long ol pipol long saed blong kam blong wan Jisas Kraes, wan Pikinini blong God, blong pem praes blong ol sin blong wol.

18 Nao, taem we tingting blong mi i kasem tingting ia, mi bin prea insaed long hat blong mi: O Jisas, yu yu Boe blong God, gat sore long mi, we mi stap long bigfala rabis ples, mo ol jen we i no save finis blong ded i raonem mi.

19 Mo nao, luk, taem we mi bin tingbaot samting ia, mi nomo save tingbaot ol soa blong mi; yes, mi nomo bin tingbaot ol sin blong mi we oli bin givim hadtaem long mi.

20 Mo, o, glad ia we mi gat, mo gudfala laet ia we mi bin luk; yes, sol blong mi i bin fulap long glad, i bigfala olsem soa blong bodi blong mi!

21 Yes, mi talem long yu, boe blong mi, se i no save gat eni samting we i dip tumas mo konkon tumas olsem we ol soa blong bodi blong mi. Yes, mo bakegen mi talem long yu, boe blong mi, se long narafala saed, i no save gat eni samting we i dip mo swit olsem we glad blong mi i bin stap.

22 Yes, mi bin ting mi bin luk, olsem we papa blong yumi Lihae i bin luk, God i stap sidaon long jea blong hem, wetem ol grup blong ol enjel we i plante tumas blong kaontem, oli stap raonem God blong olgeta mo oli stap singsing mo presem

hem; Yes, mo sol blong mi i wantem tumas blong stap long ples ia.

23 Be luk, ol han mo leg blong mi i bin kasem strong blong olgeta bakegen, mo mi bin stanap long ol leg blong mi, mo mi bin soemaot long ol pipol se mi bin bon long God.

24 Yes, mo stat long taem ia go kasem naoia, mi no bin stop nating long wok, blong mi save tekem ol sol i kam blong sakem sin, blong mi save tekem olgeta blong testem bigfala glad we mi bin testem; blong olgeta tu i save bon long God, mo fulap long Tabu Spirit.

25 Yes, mo nao luk, O boe blong mi, Lod i stap givim bigfala glad long ol frut blong ol wok blong mi.

26 From trutok ia we hem i bin givim long mi, luk, plante i bin bon long God, mo oli bin testem olsem we mi bin testem, mo oli bin lukim wetem ae blong olgeta olsem we mi bin lukim; taswe oli save ol samting ia we mi bin tokbaot, olsem we mi save; mo save we mi gat i kam long God.

27 Mo mi bin kasem sapot long ol hadtaem mo ol trabol long evri kaen, yes, mo long evri kaen hadtaem; yes, God i bin tekemaot mi long kalabus, mo long olgeta samting we i fasem taet mi, mo long ded; yes, mo mi stap putum tras blong mi long hem, mo bae hem i tekemaot mi oltaem.

28 Mo mi save se hem bae i leftemap mi long las dei, blong stap wetem hem long glori; yes, mo bae mi presem hem blong



oltaem, from we hem i bin tekemaot ol bubu blong yumi long Ijip, mo hem i bin mekem ol man Ijip oli draon long Red Si; mo hem i bin lidim olgeta wetem paoa blong hem i go long promes graon; yes, mo hem i bin tekemaot olgeta long slef mo long kalabus long ol defren taem.

29 Yes, mo tu hem i bin tekemaot ol bubu blong yumi long graon blong Jerusalem; mo tu hem i bin, tru long paoa blong hem we i no gat en, tekemaot olgeta long slef mo long kalabus, long ol defren taem kam kasem dei ia; mo oltaem mi stap tingbaot kalabus blong olgeta; yes, mo tu yu nid blong holem long tingting blong yu, olsem we mi bin mekem, kalabus blong olgeta.

30 Be luk, boe blong mi, i no hemia nomo; from yu nid blong save olsem we mi save, se i semak olsem we bae yu holem ol komanmen blong God, laef blong yu bae i kam antap gud long graon ia; mo yu nid blong save tu, se i semak olsem we bae yu no holem ol komanmen blong God, bae hem i katemaot yu long fes blong hem. Nao hemia i folem toktok blong hem.

---

### JAPTA 37

---

*Ol buk we oli bin mekem wetem bras mo ol narafala skripja, oli sevem blong tekem ol sol i kam long fasin blong sevem man—Oli bin smasem gud ol man blong Jared from nogud fasin blong ol-*

*geta—Ol sikret promes mo ol kavenan blong olgeta, oli no mas soemaot long ol pipol—Toktok wetem Lod long evri samting we yu mekem—Olsem we Liahona i bin lidim ol man blong Nifae, toktok blong Kraes tu i lidim ol man long laef we i no save finis. Raonabaot 74 yia bifo Kraes i bon.*

Mo nao, boe blong mi Hileman, mi givim oda long yu blong yu tekem ol histri we oli bin putum long han blong mi;

2 Mo tu mi givim oda long yu blong yu kipim wan histri blong pipol ia, olsem we mi bin mekem, long ol buk blong Nifae, mo kipim ol samting ia i tabu we mi bin kipim, semak olsem we mi bin kipim olgeta; from hem i from wan waes stamba tingting we oli kipim gud olgeta.

3 Mo ol buk ia we oli bin mekem wetem bras, we oli gat ol raeting ia, we oli gat ol histri blong ol tabu skripja long olgeta, we oli gat ol laen blong famle blong ol fasfala bubu blong yumi, i go kasem stat—

4 Luk, ol papa blong yumi i bin profesae, se oli mas kipim olgeta mo pasem i kam daon long wan jeneresen i go long narafala wan, mo oli kipim mo sevem olgeta wetem han blong Lod go kasem taem we oli mas go aot long evri kantri, famle, lanwis, mo pipol, blong bae oli save ol samting we oli stap insaed we oli haed.

5 Mo nao luk, sapos oli kipim olgeta, saen blong olgeta i mas stap; yes, mo bae oli holem taet saen blong olgeta i stap; yes, mo

tu bae i semak long ol buk we oli gat ol tabu raeting.

6 Nao maet yu ting se hemia i wan krangeke samting blong mi mekem; be luk mi talem long yu, se tru long ol smol mo ol samting we i no strong, ol bigfala samting i kam blong hapen; mo ol smol wei, long plante defren taem, i pulum daon ol waesman.

7 Mo Lod God i stap wok long ol wei blong mekem ol bigfala mo ol stamba tingting blong hem we i no save finis i hapen; mo tru long ol wei we oli smol tumas Lod i blokem ol waes mo mekem fasin blong sevem man blong plante sol i hapen.

8 Mo nao, hem i bin waes blong God blong oli mas sevem ol samting ia; from luk, oli bin mekem fasin blong tingbaot samting blong pipol ia i kam bigwan, yes, mo i bin winim plante long olgeta long ol no-gud fasin blong olgeta, mo i bin helpem olgeta blong gat save long God blong olgeta inaf blong kasem fasin blong sevem man blong ol sol blong olgeta.

9 Yes, mi talem long yu, sapos we i no from ol samting ia we i stap long histri ia, we i stap long ol buk ia, Amon mo ol brata blong hem oli no bin save winim plante taosen long ol man blong Lemman long ol kastom blong ol bubu blong olgeta we i no stret; yes, ol histri ia mo ol toktok blong olgeta i bin tekem olgeta i kam blong sakem sin; long narafala toktok, oli bin mekem olgeta i gat save blong Lod, God blong olgeta, mo

blong glad long Jisas Kraes, Ridima blong olgeta.

10 Mo huia i save, be wanem bae oli stap ol wei blong tekem plante taosen long olgeta, yes, mo tu plante taosen long ol brata blong yumi we oli stronghed, ol man blong Nifae, we naoia oli stap mekem hat blong olgeta i kam strong long sin mo ol rabis fasin, blong oli gat save long Ridima blong olgeta?

11 Nao ol sikret ia, oli no bin soemaot fulwan long mi yet; taswe bae mi nomo tokbaot samting ia.

12 Mo hem i inaf sapos mi talem nomo se oli sevem olgeta blong wan waes stamba tingting, we stamba tingting ia God i save, from we hem i givim advaes folem waes tingting ova long ol wok blong hem, mo ol rod blong hem oli stret, mo fasin blong hem i olsem wan raon samting we i no save finis.

13 O tingbaot, tingbaot, boe blong mi Hileman, ol komanmen blong God oli stret. Mo hem i bin talem: Sapos bae yu holem ol komanmen blong mi laef blong yu bae i kam antap gud long graon ia—be sapos yu no holem ol komanmen blong hem bae hem i katemaot yu long fes blong hem.

14 Mo nao tingbaot, boe blong mi, se God i bin trastem yu wetem ol samting ia, we oli tabu, we hem i bin kipim tabu, mo tu bae hem i kipim mo sevem olgeta blong wan waes stamba tingting blong hem, blong hem i save soemaot paoa blong hem long ol fiuja jeneresen.

15 Mo nao luk, mi talem long yu tru long spirit blong profesi, se sapos yu brekem ol komanmen blong God, luk, ol samting ia we oli tabu bae oli karemaot olgeta long yu tru long paoa blong God, mo bae oli putum yu i go long han blong Setan, blong hem i sefem yu olsem doti blong wit we taem win i blu i karem i go olbaot.

16 Be sapos yu holem ol komanmen blong God, mo mekem ol samting ia we oli tabu olsem we Lod i givim oda long yu, (from we yu mas askem long Lod long ol samting, long wanem we yu mas mekem long olgeta) luk, i no gat paoa long wol o hel we i save tekemaot olgeta long yu, from we God i gat tumas paoa blong mekem ol toktok blong hem i hapen.

17 From we bae hem i mekem ol promes blong hem i hapen we bae hem i mekem long yu, from we hem i bin mekem ol promes we hem i bin mekem wetem ol bubu blong yumi i hapen.

18 From we hem i bin promes long olgeta se bae hem i sevem ol samting ia blong wan waes stamba tingting long hem, blong hem i save soemaot paoa blong hem long ol fiuja jeneresen.

19 Mo nao luk, wan stamba tingting hem i bin mekem i hapen finis, we i long kambak blong plante taosen long ol man blong Lemana long save blong trutok; mo hem i bin soemaot paoa blong hem wetem olgeta, mo tu bae hem i soemaot paoa blong hem wetem olgeta

long ol fiuja jeneresen; taswe bae oli sevem olgeta.

20 Taswe mi givim oda long yu, boe blong mi Hileman, blong yu lukaot gud blong mekem ol toktok blong mi i hapen, mo blong yu lukaot gud blong holem ol komanmen blong God olsem we oli bin raetem olgeta.

21 Mo nao, bae mi toktok long yu long saed blong ol twentifo buk, blong yu kipim olgeta, blong ol sikret mo ol wok blong tudak, mo ol sikret wok blong olgeta, o ol sikret wok blong ol pipol ia we oli bin smasem gud olgeta, blong oli save soemaot long pipol ia; yes, olgeta fasin blong kilim i ded, mo stil, mo stil long taem blong faet, mo ol nogud fasin blong olgeta mo ol rabis sin blong olgeta, oli save soemaot long pipol ia; yes, mo blong yu sevem ol samting ia blong tanem lanwis.

22 From luk, Lod i bin luk se ol pipol blong hem i bin stat blong wok long tudak, yes, wokem ol sikret fasin blong kilim man i ded mo ol nogud fasin; taswe Lod i bin talem se, sapos oli no sakem sin, bae oli mas smasem gud olgeta aot long fes blong wol.

23 Mo Lod i bin talem: bae mi mekem rere long wokman blong mi Gaselem, wan ston, we bae i saen long tudak blong i gat laet, blong mekem se mi save soemaot long ol pipol blong mi we oli wok blong mi, blong mekem se mi save soemaot long olgeta ol wok blong ol brata blong olgeta, yes, ol

sikret wok blong olgeta, ol wok blong tudak blong olgeta, mo ol rabis fasin mo nogud fasin blong olgeta.

24 Mo nao, boe blong mi, ol samting ia blong tanem lanwis oli bin mekem rere blong mekem se toktok blong God i save hapen, we hem i bin talem se:

25 Bae mi karemaot long tudak i kam long laet ol sikret wok mo nogud fasin blong olgeta; mo sapos oli no sakem sin, bae mi smasem gud olgeta aot long fes blong wol; mo bae mi karem olgeta sikret mo nogud fasin blong olgeta i kam long laet, long evri kantri we bae oli holem graon ia.

26 Mo nao, boe blong mi, yumi luk we oli no bin sakem sin; taswe oli bin smasem gud olgeta, mo kasem taem ia toktok blong God i bin hapen; yes, ol sikret nogud fasin blong olgeta i bin kamaot long tudak mo oli mekem yumi save olgeta.

27 Mo nao, boe blong mi, mi givim oda long yu blong yu holem taet olgeta tru promes, mo ol kavenan blong olgeta, mo ol agrimen long ol sikret nogud fasin blong olgeta; yes, mo ol saen blong olgeta mo ol sapraes blong olgeta bae yu haedem long ol pipol ia, blong mekem se oli no save olgeta, from maet bae oli foldaon i go long tudak tu mo oli smasem gud olgeta.

28 From luk, i gat wan panis long ful graon ia, we fasin blong smasem gud bae i kasem olgeta wokman blong tudak, folem paoa blong God, taem we oli

raep olgeta; taswe mi wantem blong ol pipol ia oli no smasem gud olgeta.

29 Taswe bae yu kipim ol sikret plan blong ol tru promes mo ol kavenan blong ol pipol ia, mo ol nogud fasin blong olgeta, mo ol fasin blong kilim man i ded blong olgeta mo ol rabis sin blong olgeta bae yu talemaot blong olgeta i save; mo bae yu tijim olgeta blong oli no laekem ol nogud fasin mo ol rabis sin mo ol fasin blong kilim man i ded olsem ia; mo tu bae yu tijim olgeta we ol pipol ia oli bin smasem gud olgeta folem nogud fasin mo ol rabis sin blong olgeta mo ol fasin blong kilim man i ded blong olgeta.

30 From luk, oli bin kilim ol profet blong Lod we i bin kam long medel blong olgeta blong talemaot long olgeta long saed blong ol rabis fasin blong olgeta; mo blad blong olgeta we oli bin kilim i ded i bin singaot long Lod, God blong olgeta from fasin blong pembak long olgeta we oli ol man we i bin kilim olgeta i ded; mo olsem ia nao ol jajmen blong God i bin kam long ol wokman blong tudak mo ol sikret grup.

31 Yes, mo graon i kasem panis blong oltaem mo oltaem, long ol wokman blong tudak mo ol sikret grup, go kasem fasin blong smasem gud, sapos oli no sakem sin bifo oli kam raep olgeta.

32 Mo naoia, boe blong mi, tingbaot ol toktok we mi bin talem long yu; yu no talemaot

ol sikret plan ia long ol pipol ia, be tijim olgeta wan fasin, we i no gat en, blong no laekem sin mo rabis fasin.

33 Prijim long olgeta fasin blong sakem sin, mo fet long Lod Jisas Kraes; tijim olgeta blong putum tingting blong olgeta i stapdaon, mo blong no stap flas mo tingting i stapdaon long hat; tijim olgeta blong winim evri temtesen blong devel, wetem fet blong olgeta long Lod Jisas Kraes.

34 Tijim olgeta blong oli neva kam slak long ol gudfala fasin, be blong no stap flas mo tingting i stapdaon long hat; from olgeta olsem ia bae oli save faenem pis long ol sol blong olgeta.

35 O, tingbaot, boe blong mi, mo lanem waes tingting long yangfala laef blong yu; yes, lanem long yangfala laef blong yu blong holem ol komanmen blong God.

36 Yes, mo askem long God blong givim ol sapot long yu; yes, letem evri wok blong yu long Lod, mo eni ples we yu go, letem i hapen wetem Lod; yes, letem evri tingting blong yu i go long Lod; yes, letem ol filing blong hat blong yu i stap long Lod oltaem.

37 Askem advaes long Lod long evri wok blong yu, mo bae hem i lidim yu blong gud; yes, taem we yu stap ledaon long naet ledaon long Lod, blong mekem se hem i save lukaot gud long yu long slip blong yu; mo taem we yu girap long moning letem hat blong yu i fulap long ol tangkyu long God; mo sapos

yu mekem ol samting ia, bae God i leftemap yu long las dei.

38 Mo nao, boe blong mi, mi gat samting blong telem long saed blong samting ia we ol bubu blong yumi i bin singaotem wan bol, o samting we i stap lidim man—o ol bubu blong yumi i bin singaotem samting ia Liahona, we i minim, long lanwis ia, wan kampas; mo Lod i bin mekem hem i rere.

39 Mo luk, i no save gat eni man we i save wokem samting we i gud tumas olsem. Mo luk, Lod i bin mekem hem i rere blong soem long ol bubu blong yumi, rod we oli mas wokbaot long ples we i no gat man long hem.

40 Mo hem i bin wok long olgeta folem fet blong olgeta long God; taswe, sapos oli bin gat fet blong bilivim se God i save mekem ol samting ia olsem ol nidel blong i mas poenem rod we oli mas folem, luk, i bin hapen; taswe oli bin gat merikel ia, mo tu plante narafala merikel i bin hapen tru long paoa blong God, evri dei.

41 Be, from we ol merikel ia i bin wok tru long ol smol wei i bin soemaot long olgeta ol gudfala wok. Oli bin les, mo oli bin fogetem blong yusum fet blong olgeta mo fasin blong lukaot gud mo afta ol gudfala wok ia i bin stop, mo oli no bin gohed long wokbaot blong olgeta;

42 Taswe, oli bin stap long ples we i no gat man long hem, o oli no bin wokbaot folem wan stret rod, mo oli bin harem nogud long hanggri mo tosta,

from ol fasin blong brekem loa blong olgeta.

43 Mo nao, boe blong mi, mi wantem we yu andastanem se ol samting ia oli gat wan sado; from olsem we ol bubu blong yumi i bin les blong folem kampas ia (nao ol samting ia oli blong wol) oli no bin kam antap gud; i semak wetem ol samting we oli blong spirit.

44 From luk, hem i isi olsem blong stap biae toktok blong Kraes, we bae i soemaot long yuwan stret rod blong kasem glad we i no save finis, olsem we i bin stap long ol bubu blong yumi blong folem kampas ia, we bae i soemaot long olgeta wan stret rod we i go long promes graon.

45 Mo nao mi talem, i no gat wan eksampol long samting ia? From olsem we samting ia we i bin lidim ol bubu blong yumi, tru long folem rod blong hem blong go long promes graon, bae ol toktok blong Kraes, sapos yumi folem rod blong olgeta, tekem yumi i go bitim vale blong sore ia i go long wan graon blong promes we i moa gud.

46 O boe blong mi, no letem yumi stap les from we rod ia i isi; from i bin semak wetem ol bubu blong yumi; from i semak we God i bin mekem rere long olgeta, blong sapos oli lukluk oli save laef; semak wetem yumi. Rod ia i rere finis, mo sapos yumi lukluk bae yumi save laef blong oltaem.

47 Mo nao, boe blong mi, meksua se yu lukaot gud long ol

tabu samting ia, yes, meksua se yu luk long God mo stap laef. Go long ol pipol ia mo talemaot trutok, mo stap tru. Boe blong mi, gudbae.

---

Ol komanmen blong Alma i go long boe blong hem Siblon.

*I stap long japta 38 nomo.*

---

### JAPTA 38

---

*Oli bin givim hadtaem long Siblon from hem i gat stret fasin—Fasin blong seven man i stap long Kraes, we hem i laef mo laet blong wol—Kontrollem ol filing blong yu. Raonabaot 74 yia bifo Kraes i bon.*

BOE blong mi, harem ol toktok blong mi, from we mi talem long yu, olsem we mi bin talem long Hileman, se i semak olsem we bae yu holem ol komanmen blong God bae yu kam antap gud long graon ia; mo i semak olsem we bae yu no holem ol komanmen blong God bae hem i katemaot yu long fes blong hem.

2 Mo naoia, boe blong mi, mi trastem se bae mi gat bigfala glad from yu, from we yu stanap strong mo fasin blong yusum fet blong yu long God; from olsem we yu bin stat long yangfala laef blong yu blong luk long Lod, God blong yu, long sem fasin mi hop se bae yu gohed blong holem ol komanmen blong hem; from we man we i stap strong kasem en i kasem blesing.

3 Mi talem long yu, boe blong

mi, we mi bin gat bigfala glad long yu finis, from fasin blong yusum fet blong yu mo fasin blong wokhad oltaem blong yu, mo fasin blong save wet longtaem blong yu mo fasin blong go tru long ol hadtaem wetem longfala tingting long medel blong ol pipol blong Soram.

4 From mi save we oli bin fasem yu; yes, mo tu mi save we oli bin stonem yu from trutok ia; mo yu bin stap strong long ol samting ia wetem fasin blong save wet longtaem from we Lod i bin stap wetem yu; mo nao yu save we Lod i bin mekem yu i kam fri.

5 Mo nao boe blong mi, Siblon, mi wantem se bae yu tingbaot, we taem bae yu putum tras blong yu long God bae hem i mekem yu i kam fri long ol hadtaem blong yu, mo ol trabol blong yu, mo ol hadtaem blong yu, mo bae God i leftemap yu long las dei.

6 Nao, boe blong mi, mi no wantem se bae yu ting se mi save ol samting ia long save blong mi nomo, be hem i Spirit blong God we i stap long mi we i soem ol samting ia long mi; from we sapos mi no bin bon long God bae mi no bin save ol samting ia.

7 Be luk, Lod long bigfala sore blong hem, i bin sendem enjel blong hem blong hem i talemaot long mi se mi mas stopem wok blong fasin blong smasem gud, long ol pipol blong hem; yes, mo mi bin luk wan enjel stret long ae blong mi, mo hem i bin toktok wetem mi, mo voes

blong hem i bin olsem tanda, mo hem i bin mekem evri graon i seksek.

8 Mo i bin hapen se mi bin stap long tri dei mo tri naet wetem bigfala soa blong bodi mo tingting we i hevi long sol blong mi; mo neva, kasem taem we mi bin prea long Lod Jisas Kraes from sore, mi bin kam klin from ol sin blong mi. Be luk, mi bin prea long hem mo mi bin faenem pis long sol blong mi.

9 Mo nao, boe blong mi, mi bin talem samting ia long yu blong yu save lanem waes tingting, blong yu save lanem long mi we i no gat narafala rod o wei we bae man i save sev, nomo long mo tru Kraes. Luk, hem i laef mo laet blong wol. Luk, hem i toktok blong trutok mo stret fasin.

10 Mo nao, olsem we yu bin stat blong tijim trutok ia, i nomata mi wantem se yu mas gohed blong tij; mo mi wantem se yu stap lukaot gud mo kontrolem yu long evri samting.

11 Meksua se yu no kam flas, yes, meksua se yu no flas long waes tingting blong yu, o long plante paoa blong yu.

12 Yusum fasin blong toktok strong, be no fasin blong fosem; mo tu meksua se yu kontrolem ol filing blong yu, blong mekem se yu save fulap wetem lav; meksua se yu no stap les.

13 Yu no prea olsem ol man blong Soram i stap prea, from we yu bin luk we oli stap prea blong mekem se ol man oli harem olgeta; mo blong mekem

se ol man oli presem olgeta from waes tingting blong olgeta.

14 Yu no talem: O God, mi tangkyu we mifala i moa gud long ol brata blong mifala; be yu talem: O Lod, fogivim laef blong mi we i no klin, mo tingbaot ol brata blong mi long sore—yes, luksave laef blong yu we i no klin long fored blong God long evri taem.

15 Mo Lod bae i blesem sol blong yu, mo tekem yu long las dei i kam long kingdom blong hem, blong sidaon long pis. Nao go, boe blong mi, mo tijim trutok long ol pipol ia. Stap tru. Boe blong mi, gudbae.

Ol komanmen blong Alma long boe blong hem Korian-ton.

*I stat long japta 39 i go kasem japta 42 nomo.*

### JAPTA 39

*Sin blong slip olbaot i wan rabis sin—Ol sin blong Korian-ton i bin blokem ol man blong Soram blong kasem trutok—Fasin blong pemaot man, blong Kraes i blong olgeta tu we oli yusum fet mo oli bin bon bifo long samting ia. Raonabaot 74 yia bifo Kraes i bon.*

Mo nao, boe blong mi, mi gat wan samting moa blong talem long yu bitim wanem we mi bin talem long brata blong yu; from luk, yu no bin luksave we brata blong yu i stap strong, ol fasin blong yusum fet blong hem, mo fasin blong lukaot gud blong hem blong holem ol

komanmen blong God? Luk, hem i no bin soemaot wan gud-fala eksampol long yu?

2 From yu no bin folem ol tok-tok blong mi olsem we brata blong yu i bin mekem, long medel blong ol pipol blong Soram. Nao hemia wanem mi gat agensem yu; yu bin gohed blong flas long paoa mo waes tingting blong yu.

3 Mo hemia i no evri samting, boe blong mi. Yu bin mekem wan samting we i givim wari long mi; from yu bin lego ministri ia, mo yu bin go long graon blong Saeron, long saed blong ol graon blong ol man blong Lemam, blong biaen long woman blong rod ia Isabel.

4 Yes, hem i bin winim ol hat blong plante man; be hemia i no wan eskius blong yu, boe blong mi. Yu sud bin lukaot gud long ministri we oli bin trastem long yu.

5 Yu no save, boe blong mi, we ol samting ia i wan rabis sin long ae blong Lod; yes, i moa rabis bitim ol narafala sin, be i no bitim sin blong mekem blad blong wan man we i no gat rong i ron o tanem baksaed long Tabu Spirit?

6 From luk, sapos yu tanem baksaed long Tabu Spirit afta we hem i bin gat ples insaed long yu, mo tu yu save se yu stap tanem baksaed, luk, hemia i wan sin we i no gat fogivnes long hem; yes, mo eni man we i kilim ded wan man agensem laet mo save blong God; i no isi blong hem i kasem fogivnes; yes, mi talem long yu, boe blong



mi, se i no isi blong hem blong kasem wan fogivnes.

7 Mo nao, boe blong mi, mi wantem tumas long fes blong God se yu no bin gat rong long wan bigfala fasin blong brekem loa olsem ia. Bae mi no gohed blong tokbaot ol sin blong yu, blong givim had taem long sol blong yu, sapos i no blong gud blong yu.

8 Be luk, yu no save haedem ol sin blong yu long God; mo sapos yu no sakem sin bae oli stap olsem wan testimoni agensem yu long las dei.

9 Nao boe blong mi, mi wantem se yu sakem sin, mo lego ol sin blong yu, mo nomo folem ol rabis samting we ae blong yu i wantem, be tanem baksaed blong yu long evri samting ia; from sapos yu no mekem olsem bae yu no save kasem kingdom blong God. O, yu mas tingbaot, mo mekem samting ia, mo tanem baksaed blong yu long ol samting ia.

10 Mo mi givim wan oda long yu blong putum long yu blong askem advaes long ol fasbon brata blong yu long olgeta samting we bae yu mekem; from luk, yu stap long yangfala laef blong yu, mo yu nidim ol brata blong yu blong oli givhan long yu. Mo folem ol advaes blong olgeta.

11 Yu no mas letem eni kaen flas o krangeke samting blong lidim yu i gowe; yu no mas letem devel i tanem hat blong yu bakegen i go long ol woman blong rod. Luk, O boe blong mi, hamas bigfala rabis fasin yu

bin putum long ol man blong Soram; from taem we oli bin luk fasin blong yu oli no wantem blong bilivim ol toktok blong mi.

12 Mo nao Spirit blong Lod i stap talem long mi: Givim oda long ol pikinini blong yu blong mekem ol gudfala fasin, from sapos no bae oli lidim ol hat blong plante man i gowe; taswe mi givim oda long yu, boe blong mi, long respek blong God, se yu holembak long ol rabis fasin blong yu;

13 Blong yu tanem i go long Lod wetem evri tingting blong yu, wetem evri strong blong yu, mo evri paoa; blong mekem se yu nomo lidim ol hat blong eni man blong mekem ol rabis samting; be yu gobak long olgeta, mo talemaot ol sin blong yu mo olgeta nogud samting we yu bin mekem.

14 Yu no mas lukaotem ol rij o ol samting blong wol ia we oli blong nating; from luk, yu no save tekem olgeta i go wetem yu.

15 Mo nao, boe blong mi, bae mi toktok long yu lelebet long saed blong taem we Kraes bae i kam. Luk, mi talem long yu, se i hem we bae hem i kam blong tekemaot ol sin blong wol; yes, hem i kam givim gud nius blong fasin blong sevem man, long ol pipol blong hem.

16 Mo nao, boe blong mi, hemia i bin wok we God i bin singaotem yu from, blong talemaot gud nius ia long pipol ia, blong mekem rere ol tingting blong olgeta; o long narafala

toktok blong fasin blong sevem man i save kam long olgeta, blong mekem se oli save mekem rere ol tingting blong ol pikinini blong olgeta blong harem trutok long taem we bae Kraes i kam.

17 Mo nao bae mi mekem tingting blong yu i kam gud smol long samting ia. Luk, yu sapraes tumas from wanem ol samting ia i mas kamaot longtaem tumas, bifo long taem blong olgeta. Luk, mi talem long yu, yu ting se praes blong wan sol tede i no sas, long fes blong God, olsem wan sol bae i stap long taem we Kraes bae i kam?

18 Yu ting se plan blong fasin blong pemaot man i no mas kam long ol pipol ia mo tu long ol pikinini blong olgeta?

19 Yu ting se i moa strong long Lod naoia, blong sendem wan enjel blong hem blong talemaot gud nius ia long yumi mo tu long ol pikinini blong yumi, o afta taem we hem i kam?

---

#### JAPTA 40

---

*Kraes i mekem laef bakegen i kam long olgeta man—Ol ded man we i stret i go long paradaes mo ol rabis man oli go long tudak blong wet long dei blong laef bakegen blong olgeta—Evri samting bae i kambak tugeta bakegen long stret fasin blong olgeta we i gudfala tumas long taem blong Laef bakegen. Raonabaot 74 yia bifo Kraes i bon.*

NAO boe blong mi, hem ia i samting moa we bae mi talem long yu; from mi luksave we

tingting blong yu i wari long saed blong laef bakegen blong ol ded man.

2 Luk, mi talem long yu, se i no gat laef bakegen—o, bae mi talem long ol narafala toktok, se bodi ia i no putum bodi we i no save ded, samting ia we i blong roten i no save kam blong no roten blong oltaem—kasem afta Kraes i kam.

3 Luk, hem i mekem ol ded man i kasem laef bakegen. Be luk boe blong mi, laef bakegen i no yet. Nao, mi soemaot long yu wan sikret, be, i gat plante sikret we oli kipim, mekem se i no gat wan man we hem i save ol samting ia be God nomo. Be mi soem long yuwan samting we mi askem stret gud long God blong mekem se bae mi save gat save—hemia long saed blong laef bakegen.

4 Luk, i gat wan taem we God i jusum we evri man bae i kam fored long ded. Mo taem we bae samting ia i kam, i no gat wan man we i save; be God i save taem we hem i bin jusum.

5 Nao, sapos bae i gat wan taem, o wan nambatu taem, o wan nambatri taem, we evri man bae i kam fored long ded, i nomata; from God i save evri samting ia; mo i naf blong mi, blong save we hem i olsem—se i gat wan taem we God i bin jusum we evri man bae oli girap long ded.

6 Nao, i mas i stap wan taem bitwin taem we man i ded mo taem blong laef bakegen.

7 Mo nao bae mi askem se wanem i hapen long ol sol

blong evri man long taem we oli ded go kasem taem we God i bin jusum blong laef bakegen?

8 Nao sapos i gat moa bitim wan taem we God i jusum blong ol man blong girap i nomata; from evri man i no ded long sem taem, mo hemia i nomata; evri samting i olsem wan dei nomo long God, mo man nomo i kaontem taem.

9 Taswe, i gat wan taem we God i bin jusum long ol man we bae oli girap long ded; mo i gat wan taem bitwin taem blong ded mo laef bakegen. Mo nao, long saed blong spes blong taem ia, wanem i hapen long ol sol blong evri man, i samting ia we mi bin askem had oltaem long Lod blong save; mo hemia samting ia we mi save.

10 Mo taem we taem i kam we evri man bae i girap, afta bae oli save se God i save ol taem we hem i bin jusum long man.

11 Nao, long saed blong ples blong ol sol bitwin ded mo laef bakegen—Luk, wan enjel i bin talem long mi, se ol spirit blong evri man, taem we oli bin aot long bodi ia blong wol, yes, ol spirit blong evri man, sapos oli gud o nogud, bae oli gobak long God we i bin givim laef long olgeta.

12 Mo afta bae i kam blong hapen se, ol spirit blong olgeta we oli stret bae oli kasem wan ples blong glad, we oli singaotem paradaes, wan ples blong spel, wan ples blong pis, long ples ia bae oli spel long ol trabol mo ol wari, mo ol harem nogud blong olgeta.

13 Mo afta bae i kam blong hapen se, ol spirit blong ol rabis man, yes, olgeta we oli nogud—from luk, olgeta i no gat wan pis o pat blong Spirit blong Lod; from luk, oli bin jusum ol nogud wok, be i no gudfala wok; taswe spirit blong devel i bin go insaed long olgeta, mo i bin kontrolem haos blong olgeta—mo bae olgeta ia bae oli sakemaot olgeta i go long tudak; bae i gat krae, mo bae oli singaot tumas mo bae oli kakae tut blong olgeta, mo samting ia from ol rabis samting we oli bin mekem, from oli bin go prisena folem tingting blong devel.

14 Nao hemia ples blong ol sol blong ol nogud man, yes, long tudak, mo bae oli stap wet mo fraet tumas gogo oli kasem bigfala faea blong kros blong God long olgeta; olsem ia nao oli stap long ples ia, semtaem olgeta we i stret oli faenem spel long paradaes, go kasem dei we oli kasem laef bakegen.

15 Nao, i gat samfala pipol we oli bin andastanem se ples ia we yu harem gud tumas mo ples we sol i stap harem nogud tumas, bifo long laef bakegen, i bin wan fassala laef bakegen. Yes, mi save talem se oli save singaotem hemia wan laef bakegen, girap blong spirit, o sol, blong go long ples blong harem gud o long ples blong harem nogud, folem ol toktok we i bin kamaot.

16 Mo luk, bakegen oli bin talem we i gat wan fassala laef bakegen, wan laef bakegen

blong olgeta we oli bin laef bifo, o blong olgeta we oli stap naoia, o blong olgeta we bae oli kam, go kasem taem blong laef bakegen blong Kraes long ded.

17 Nao, mifala i no ting se fasfala laef bakegen ia, we oli bin tokbaot long fasin ia, i save laef bakegen blong ol sol blong oli save stap long glad o harem nogud. Yu no save ting se hemia i mining blong hem.

18 Luk, mi talem long yu, No; be hem i minim se sol wetem bodi i joenem bakegen, blong olgeta we oli bin laef long dei blong Adam go kasem taem blong laef bakegen blong Kraes.

19 Nao, sapos ol sol mo ol bodi blong olgeta we oli bin tokbaot bae oli kam tugeta long wan taem, ol nogud man olsem ol stret man, mi no talem; letem hem i inaf, blong mi talem se olgeta oli kam fored; o long ol narafala toktok, laef bakegen blong olgeta ia, bae i hapen bifo long laef bakegen blong olgeta we oli ded afta long laef bakagen blong Kraes.

20 Nao, boe blong mi, mi no talem se laef bakegen blong olgeta bae i kam long stret taem blong laef bakegen blong Kraes, be luk, mi givim olsem tingting blong mi nomo, se ol sol mo ol bodi oli kam tugeta blong ol stret man, taem we bae Kraes i kasem laef bakegen, mo gobak blong hem long heven.

21 Be sapos samting ia i kam long taem blong laef bakegen blong hem o afta, mi no talem; be mi talem hemia nomo, se i

gat wan taem bitwin ded mo laef bakegen blong bodi, mo wan ples blong sol we i stap hapi o harem nogud, go kasem taem we God i bin jusum we ol ded bae oli kam aot, mo kambak bakegen, sol tugeta wetem bodi, blong kam stanap long fored blong God, mo kasem jajem folem ol wok blong olgeta.

22 Yes, hemia i mekem fasin blong putembak i hapen blong ol samting ia we ol profet i bin talem, aot long ol maot blong olgeta.

23 Sol bae i kambak wetem bodi, mo bodi tugeta wetem sol; yes, mo evri leg mo evri han mo joen bae oli kambak long bodi blong hem; yes, bae i no gat wan pis hea blong hed we bae i lus; be evri samting bae oli kambak bakegen long ol raet mo stret ples blong olgeta.

24 Mo nao, boe blong mi, hemia fasin blong putembak blong ol samting we ol profet i bin talem, aot long ol maot blong olgeta—

25 Mo afta bae olgeta we i stret i saen long kingdom blong God.

26 Be luk, wan ded we i nogud bae i kam long ol nogud man; from we oli ded long saed blong ol samting we i stret; from we oli no klin, mo i no gat wan samting we i no klin we i save kasem kingdom blong God; be bae oli sakemaot olgeta, mo God i tekem olgeta blong kasem ol frut blong wanem oli bin mekem long wol, o ol wok blong olgeta, we i bin nogud; mo oli dringim ol makas blong wan kap we i konkon.

## JAPTA 41

*Long laef bakegen ol man oli kam blong stap hapi long oltaem o blong stap harem nogud long oltaem—Fasin nogud i neva bin mekem ol man oli glad—Ol man we oli laekem ol samting blong bodi nomo, God i no stap wetem olgeta long wol—Long fasin blong putembak, evriman i kasem bakegen ol fasin mo ol samting we oli bin kasem long wol. Raonabaot 74 yia bifo Kraes i bon.*

Mo nao, boe blong mi, mi gat samting blong talem long saed blong kambak we oli bin tokbaot; from luk, samfala i bin tanem ol skripja, mo i bin go lus longwe from samting ia. Mo mi luksave we tingting blong yu i bin wari tu long saed blong samting ia. Be luk, bae mi eksplenem samting ia long yu.

2 Mi talem long yu, boe blong mi, se plan blong kambak i mas hapen folem jastis blong God; from hem i mas hapen se ol samting bae i kambak long ol raet oda blong olgeta. Luk, hem i mas hapen mo i stret, folem paoa mo laef bakegen blong Kraes, se sol blong man bae i kambak long bodi blong hem, mo se evri pat blong bodi bae i kambak long hem bakegen.

3 Mo hem i mas hapen wetem jastis blong God we ol man bae oli kasem jajmen folem ol wok blong olgeta; mo sapos ol wok blong olgeta long laef ia i bin gud, mo ol tingting blong hat blong olgeta i bin gud, we olgeta

tu, long las dei, bae i kambak long ol samting we i gud.

4 Mo sapos ol wok blong olgeta i nogud bae oli kambak long ol samting we i nogud. Taswe, evri samting bae oli kambak long prapa oda blong olgeta, evri samting bae i kambak long stret ples blong olgeta—bodi blong wol i kam wan bodi we i nomo save ded, roten i kam blong nomo save roten—i girap long glad we i no gat en blong kasem kingdom blong God, o blong harem nogud we i no gat en, blong kasem kingdom blong devel, wan long wan saed, narafala wan long narafala saed—

5 Wan i girap long glad folem ol tingting blong hem blong wantem glad, o gud folem ol tingting blong hem blong wantem gud; mo narafala wan i kasem nogud folem ol tingting blong hem blong wantem nogud; from we hem i bin wantem blong mekem nogud long fuldei i semak bae hem i kasem pei blong nogud taem we naet i kam.

6 Mo sem samting long narafala saed. Sapos hem i bin sakem ol sin blong hem, mo hem i bin wantem stret fasin kasem en blong ol dei blong hem, semak, bae hem i kasem pei blong stret fasin.

7 Olgeta ia oli olgeta we Lod i bin pemaot olgeta; yes, olgeta ia oli olgeta we oli bin tekemaot olgeta, we oli bin karemaot olgeta long naet blong tudak we i no gat en; mo olsem ia nao oli stanap o foldaon, from luk

evri man i jajem hem wan nomo blong mekem gud o blong mekem nogud.

8 Nao, ol loa blong God i no save jenis; taswe, rod i rere mekem se eni man we i wantem i save folem rod ia mo God bae i sevem hem.

9 Mo nao luk, boe blong mi, yu no mas tekem wan moa janis blong mekem rong agensem God blong yu long ol poen ia blong doktrin blong hem, we yu bin tekem janis bifo blong mekem sin.

10 Yu no mas tingting, from ol profet i bin tokbaot fasin blong kambak, se bae yu kambak aot long sin, i go long glad. Luk, mi talem long yu, fasin nogud i neva bin mekem ol man i glad.

11 Mo nao, boe blong mi, evri man we i stap long wan ples blong folem fasin blong wol, o bae mi talem se, long wan ples blong wol, oli stap long ples blong harem nogud tumas mo long ol rop blong rabis fasin; oli no gat God long wol; mo oli bin go agensem fasin blong God; taswe, oli stap long wan ples we i go agensem fasin blong glad.

12 Mo nao luk, yu ting se mining blong toktok ia kambak i minim blong tekem wan samting blong wol mo putum hem long wan fasin we i no blong wol, o blong putum hem long wan fasin we i defren long fasin blong hem?

13 O, boe blong mi, hem i no olsem; be mining blong toktok ia kambak i minim blong putumbak nogud blong nogud,

o fasin blong wol blong fasin blong wol, o samting blong devel blong samting blong devel—gud blong hemia we i gud; stret fasin blong hemia we i stret; raet blong hemia we i raet; i gat sore blong hemia we i gat sore.

14 Taswe, boe blong mi, meksua se yu soem sore long ol brata blong yu; mekem raet, jajem wetem stret fasin, mo mekem gud oltaem; mo sapos yu mekem ol samting ia bae yu kasem pei blong yu; yes, bae sore i kambak long yu bakegen; yu bae yu gat jastis i kambak long yu bakegen; bae yu gat wan stret jajmen i kambak long yu bakegen; mo bae yu kasem gudfala pei bakegen;

15 From ol samting we yu sendem bae i kambak long yu bakegen, mo kambak bakegen; taswe, toktok ia blong kambak i panisim moa bigwan ol man blong sin, mo i no talem se hem i no gat rong nating.

---

## JAPTA 42

---

*Laef long wol i wan taem blong tes blong mekem se man i save sakem sin mo wok blong God—Foldaon i bin karem ded blong bodi mo spirit long evri man—Fasin blong pemaot man i kam tru long fasin blong sakem sin—God hemwan nomo i pem praes blong ol sin blong wol—Fasin blong sore hem i blong olgeta we oli sakem sin—Evri narafala man oli mas kasem jastis blong God—Fasin blong sore i kam from*

*Atonmen—God i sevem olgeta nomo we oli sakem sin tru. Raon-abaot 74 yia bifo Kraes i bon.*

Mo nao, boe blong mi, mi luk-save se i gat sam samting moa we i mekem tingting blong yu i wari, we yu no save andastan-em—we hem i long saed blong jastis blong God long panis blong ol man blong sin; from we yu traem blong ting se hem i no raet we man blong sin i mas go long wan ples blong harem nogud.

2 Nao luk, boe blong mi, bae mi eksplenem samting ia long yu. From luk, afta we Lod God i bin sendemaot ol fas papa mo mama blong yumi aot long garen blong Iden, blong oli save wokem graon ia we oli bin kamaot long hem—yes, hem i bin karemaot man, mo hem i putum, long is en blong garen blong Iden, jerubim, mo wan naef blong faet blong faea we i stap tanem raon long olgeta blong lukaot gud long tri blong laef—

3 Nao, yumi luk se man i bin kam olsem God, hem i save gud mo nogud; mo from hem i bin fraet se bae hem i no putumaot han blong hem mo tekem frut blong tri blong laef, mo kakae mo kasem laef blong oltaem, Lod God i putum jerubim mo naef blong faet blong faea ia, blong mekem se hem i no save kakae frut ia—

4 Mo olsem ia nao yumi luk, we God i bin givim wan taem long man blong sakem sin, yes, wan taem blong tes, wan

taem blong sakem sin mo wok blong God.

5 From luk, sapos Adam i bin putum han blong hemwan long taem ia, mo i bin kakae frut blong tri blong laef mo bae hem i kasem laef blong oltaem, folem toktok blong God, hem i no bin gat wan taem blong sakem sin; yes, mo tu toktok blong God bae i no gat yus, mo bigfala plan blong fasin blong sevem man bae i kam nogud.

6 Be luk, God i bin putum long man blong hem i mas ded—taswe, olsem we oli bin katemaot olgeta long tri blong laef oli mas katemaot olgeta long fes blong graon—mo man i bin kam lus blong oltaem, yes, oli bin kam man we i bin foldaon.

7 Mo nao, yu luksave from samting ia we God i bin katemaot ol fasfala papa mo mama blong yumi long bodi mo spirit long fes blong Lod; mo olsem ia nao yumi luksave we oli kam fri blong folem tingting blong olgeta.

8 Nao luk, i no bin gat nid blong man i save sev long ded blong bodi, from samting ia bae i smasem gud bigfala plan blong glad.

9 Taswe, olsem we sol i neva bin save ded, mo foldaon i bin givim long evri man wan ded blong spirit tugeta wetem blong bodi, olsem se, oli bin katemaot olgeta long fes blong Lod, i bin gat nid we evri man bae oli fri long ded blong spirit.

10 Taswe, olsem we oli bin kam man blong wol, mo gat

rabis tingting, mo mekem ol samting olsem devel, from fasin blong wol, ples blong tes ia i bin kam wan ples blong olgeta blong mekem rere; i bin kam wan ples blong mekem rere.

11 Mo nao tingbaot, boe blong mi, sapos i no bin gat plan blong fasin blong pemaot man, (putum samting ia long saed) taem we oli bin ded, ol sol blong olgeta i bin harem nogud, from bae oli katemaot olgeta long fes blong Lod.

12 Mo nao, i no bin gat wan wei blong mekem evri man i kam fri long ples ia blong foldaon, we man i bin putum long hem wan from fasin blong hem blong no stap biae ol loa;

13 Taswe, folem jastis, plan blong fasin blong pemaot man i no bin save hapen, sapos ol man oli no sakem sin long ples ia blong tes, yes, ples ia blong mekem rere; from sapos i no gat ol samting ia, sore i no save wok from bae i mas smasem gud wok blong jastis. Nao God i no save smasem gud wok blong jastis; sapos i olsem, God i nomo God.

14 Mo olsem ia nao yumi luk-save we evri man i bin foldaon, mo jastis i bin holem taet olgeta; yes, jastis blong God, we i bin katemaot olgeta long fes blong hem blong oltaem.

15 Mo nao, plan blong sore i no save wok sapos wan atonmen i no hapen; taswe God hemwan nomo i pem praes blong ol sin blong wol, blong mekem plan blong sore i hapen, blong givim ol samting

we jastis i askem, blong mekem se God i save stap stret gud, wan stret God, mo tu wan God we i gat sore.

16 Nao, fasin blong sakem sin i no save kam long man sapos i no gat wan panis, panis ia tu i no bin save finis olsem we laef blong sol bae i no save finis, panis ia i go tugeta wetem plan blong glad, we plan ia i no save finis olsem laef blong sol.

17 Nao, olsem wanem wan man i save sakem sin sapos hem i no mekem sin? Olsem wanem hem i save mekem sin sapos i no gat loa? Bae i gat wan loa olsem wanem sapos i no gat wan panis?

18 Nao, God i bin putum wan panis i stap, mo hem i bin givim wan stret loa we i bin mekem man i save harem nogud tumas long ol save blong gud mo nogud blong hem.

19 Nao, sapos i no gat wan loa se—sapos wan man i kilim ded wan narafala man, hem i mas ded—bae hem i fraet blong ded sapos hem i kilim ded wan narafala man?

20 Mo tu, sapos i no bin gat wan loa we i agensem sin, ol man bae oli no fraet blong mekem sin.

21 Mo sapos i no bin gat wan loa i stap se, sapos ol man oli mekem sin, jastis i save mekem wanem, o sore tu, from we bae oli no gat wan kontrol long olgeta.

22 Be i gat wan loa i stap, mo wan panis i go wetem, mo God i givim wan fasin blong sakem sin; we fasin blong sakem sin



ia, sore i gat raet blong holem; sapos no, jastis i holem taet olgeta mo yusum loa, mo loa i givim panis; sapos no, ol wok blong jastis bae i smas gud, mo God bae i nomo God.

23 Be God i neva stop blong stap olsem God, mo sore i gat raet blong holem olgeta we oli sakem sin tru, mo sore i kam from atonmen; mo atonmen i mekem laef bakegen long ded i hapen; mo laef bakegen long ded i tekem ol man oli gobak long fes blong God; mo olsem ia nao, oli kambak bakegen long fes blong hem, blong kasem jajmen folem ol wok blong olgeta, folem ol loa mo jastis.

24 From luk, jastis i yusum ol samting we hem i nidim, mo tu sore i gat raet blong holem olgeta we i blong hem; mo olsem ia nao, olgeta nomo we i sakem sin tru bae oli sev.

25 Wanem, yu ting se sore i save stilim jastis? Mi talem long yu, No; i no gat wan pis. Sapos i olsem, God bae i nomo God.

26 Mo olsem ia nao God i mekem ol wok blong hem we i bigfala mo we i save finis i hapen; we i bin mekem rere stat long taem we wol i bin stat. Mo olsem ia nao fasin blong sevem man mo fasin blong pemaot man i hapen, mo tu ol fasin blong smasem gud mo harem nogud blong olgeta.

27 Taswe, O boe blong mi, eni man we i wantem kam i save kam mo dringim ol wota blong laef fri nomo; mo eni man we i no wantem kam, semfala man ia God i no fosem hem blong

kam; be long las dei, bae hem i kasem pei folem ol wok blong hem.

28 Sapos hem i bin wantem blong mekem nogud, mo hem i no bin sakem sin long ol dei blong hem, luk, nogud bae i kam long hem, folem folem fasin blong fasin blong putembak blong God.

29 Mo nao, boe blong mi, mi wantem se bae yu nomo wari from ol samting ia, mo yu wari from ol sin blong yu nomo, wetem wari ia we bae i tekem yu daon blong sakem sin.

30 O boe blong mi, mi wantem se yu nomo tanem baksaed blong yu long ol jastis blong God. Yu no traem blong mekem eskus long eni kaen wei from ol sin blong yu, tru long fasin blong tanem baksaed blong yu long jastis blong God; be yu stap letem ol jastis blong God, mo sore blong hem, mo go tru long hadtaem wetem longfala tingting blong hem, i gat ful paoa long hat blong yu; mo letem samting ia i tekem tingting blong yu i stapdaon long das blong graon.

31 Mo nao, O boe blong mi, God i bin singaotem yu blong prijim trutok long pipol ia. Mo nao boe blong mi, go long rod blong yu, talemaot trutok ia wetem tru mo fasin blong stap tru, blong mekem se yu save tekem ol sol i kam blong sakem sin, blong mekem se bigfala plan blong sore i save gat raet blong holem olgeta. Mo bae God i givim long yu olsem, folem ol toktok blong mi. Amen.

## JAPTA 43

*Alma mo ol boe blong hem i prijim trutok—Ol man blong Soram mo ol pipol we oli agensem ol man blong Nifae oli kam olsem ol man blong Leman—Ol man blong Leman oli mekem faet agensem ol man blong Nifae—Moronae i givim ol klos blong faet long ol man blong Nifae—Lod i talemaot long Alma, plan blong faet blong ol man blong Leman—Ol man blong Nifae oli lukaot gud long ol haos blong olgeta, ol fridom, ol famle, mo long saed blong bilif long God—Ol ami blong Moronae mo Lihae i raonem ol man blong Leman. Raonabaot 74 yia bifo Kraes i bon.*

Mo nao i bin hapen se, ol boe blong Alma i bin go aot long medel blong ol pipol, blong talemaot trutok long olgeta. Mo Alma, tu, hemwan i no bin save spel, mo tu hem i bin go aot.

2 Nao bae mi nomo tokbaot ol prijing blong olgeta, be we oli bin prijim trutok, mo i tru, folem spirit blong profesi mo revelesen; mo oli bin prij folem tabu oda blong God tru long hem oli bin singaotem olgeta.

3 Mo nao mi gobak long wan histri blong faet bitwin ol man blong Nifae mo ol man blong Leman, long namba eitin yia blong ol rul blong ol jaj.

4 From luk, i bin hapen se, ol man blong Soram i bin kam ol man blong Leman; taswe long stat blong namba eitin yia blong ol pipol blong ol man blong Nifae oli bin lukim ol man blong Leman i stap kam agensem

olgeta; taswe oli bin mekem rere blong faet; yes, oli bin mekem ol ami blong olgeta oli kam tugeta long graon blong Jeson.

5 Mo i bin hapen se, ol man blong Leman i bin kam wetem ol taosen blong olgeta; mo oli bin kam insaed long graon blong Antionam, we i graon blong ol man blong Soram; mo wan man we nem blong hem i Serahemna i lida blong olgeta.

6 Mo nao, from we ol man blong Amalekae i bin moa nogud mo oli bin wantem kilim i ded ol man, bitim ol man blong Leman, olgeta nomo, taswe, Serahemna i bin jusum ol jif kapten blong lidim ol man blong Leman, mo olgeta ia oli ol man blong Amalekae mo ol man blong Soram.

7 Nao samting ia hem i bin mekem blong holem taet tingting blong no laekem long ol man blong Nifae, blong hem i save putum olgeta blong folem plan blong hem.

8 From luk, ol plan blong hem i bin stap blong mekem ol man blong Leman oli kros long ol man blong Nifae; hem i bin mekem samting ia blong stilim bigfala paoa ova long olgeta, mo tu blong hem i save kasem paoa ova long ol man blong Nifae blong mekem olgeta oli kam slef.

9 Mo nao plan blong ol man blong Nifae i bin blong sapotem ol graon blong olgeta, mo ol haos blong olgeta, mo ol woman blong olgeta, mo ol pikinini blong olgeta, blong mekem se

oli save sevem olgeta samting ia long ol han blong ol enemi blong olgeta; mo tu blong oli save sevem ol raet blong olgeta mo ol janis blong olgeta, yes, mo tu ol fridom blong olgeta, blong oli save wosipim God folem ol tingting blong olgeta.

10 From oli bin save se sapos ol man blong Leman oli tekem olgeta, se eni man we i wosipim God long spirit mo tru fasin, tru God we i stap laef, ol man blong Leman bae i smasem gud olgeta.

11 Yes, mo tu oli bin save strong tingting blong no laekem blong ol man blong Leman long ol brata blong olgeta, we oli bin ol pipol blong Antae-Nifae-Lihae, we oli bin singaotem olgeta ol pipol blong Amon—mo bae oli no yusum ol tul blong faet, yes, oli bin mekem kavenan mo bae oli no brekem—taswe sapos ol man blong Leman i tekem olgeta bae oli smasem gud olgeta.

12 Mo ol man blong Nifae bae oli no letem se oli smasem gud ol pipol ia; taswe, oli bin givim ol graon long olgeta we i kam long ol papa.

13 Mo ol pipol blong Amon i bin givim long ol man blong Nifae wan bigfala pat blong ol samting we oli gat blong sapotem ol ami blong olgeta; mo olsem ia nao ol man blong Nifae i bin fosem olgeta bak-egen, blong faet agensem ol man blong Leman, we oli bin wan grup blong Leman mo Lemyul, mo ol boe blong Ismael, mo ol pipol we oli bin lego ol man blong Nifae we oli

blong ol man blong Amalekae, mo ol man blong Soram, mo ol laen blong ol pris blong Noa.

14 Mo ol laen ia oli plante, klosap semak, olsem ol man blong Nifae; mo olsem ia nao ol man blong Nifae oli mas faet agensem ol brata blong olgeta, go kasem taem we blad i ron.

15 Mo i bin hapen se, taem we ol ami blong ol man blong Leman i bin kam tugeta long graon blong Antionum, luk, ol ami blong ol man blong Nifae i bin rere blong mitim olgeta long graon blong Jeson.

16 Nao lida blong ol man blong Nifae, o man we oli bin jusum blong kam jif kapten long ol man blong Nifae—nao jif kapten i bin lidim evri ami blong ol man blong Nifae—mo nem blong hem i Moronae;

17 Mo Moronae i bin lidim, mo i bin tekem gavman blong ol faet blong olgeta. Mo hem i bin gat twenti mo faef yia nomo taem we oli bin jusum hem olsem jif kapten long ol ami blong ol man blong Nifae.

18 Mo i bin hapen se, hem i bin mitim ol man blong Leman long ol boda blong Jeson, mo ol pipol blong hem i bin gat ol naef blong faet, mo wetem ol huknaef, mo evri kaen blong ol tul blong faet.

19 Mo taem we ol ami blong ol man blong Leman i bin luk we ol pipol blong Nifae, o we Moronae, i bin mekem ol man blong hem oli rere wetem ol plet blong kavremap jes, mo wetem ol sil blong han, yes, mo tu ol sil blong blokem ol hed

blong olgeta, mo tu oli bin putum ol hevi klos—

20 Nao ami blong Serahemna i bin no rere wetem eni samting olsem; oli bin gat ol naef blong faet mo ol huknaef blong olgeta nomo, ol bonara blong olgeta mo ol ara blong olgeta, mo ol ston blong olgeta mo ol sling blong olgeta; mo oli bin neked sapos oli no bin fasem skin blong anamol raon long wes blong olgeta; yes, evriwan i bin neked, be ol man blong Soram mo ol man blong Amalekae oli no bin neked;

21 Be oli no gat ol plet blong kavremap jes, o ol sil—taswe oli bin fraet tumas long ol ami blong ol man blong Nifae from ol klos blong faet blong olgeta, nomata we namba blong olgeta i moa fulap bitim ol namba long ol man blong Nifae.

22 Luk, nao i bin hapen, se oli bin fraet blong go agensem ol man blong Nifae long ol boda blong graon blong Jeson; taswe oli bin aot long graon blong Antionum i go long ples we i no gat man long hem, mo oli bin tekem rod blong olgeta raonabaot long ples we i no gat man long hem, longwe klosap long stamba blong reva blong Saedon, blong oli save kam insaed long graon blong Mantae mo tekem kontrol blong graon ia; from we oli no bin ting se ol ami blong Moronae bae oli save se wea ples oli bin go long hem.

23 Be i bin hapen se, taem we oli bin aot i go long ples we i no gat man long hem Moronae i

bin sendem ol spae long ples we i no gat man long hem blong oli lukim ol tenet blong olgeta long bus; mo Moronae, tu, i bin save long ol profesi blong Alma, hem i bin sendem sam man long hem, blong askem Alma blong askem Lod wea ples ol ami blong ol man blong Nifae oli mas go blong lukaotem gud olgeta agensem ol man blong Leman.

24 Mo i bin hapen se trutok blong Lod i bin kam long Alma, mo Alma i bin talem long ol mesenja blong Moronae, se ol ami blong ol man blong Leman i stap maj raonabaot long ples we i no gat man long hem, blong oli save go long graon blong Mantae, blong oli save statem wan atak long ol pipol we oli no strong. Mo ol mesenja ia i bin go mo givim mesej ia long Moronae.

25 Nao Moronae, hem i bin livim wan pat blong ami blong hem long graon blong Jeson, from hem i fraet se wan pat blong ol man blong Leman bae oli kam long graon ia mo tekem kontrol long bigtaon ia, hem i bin tekem narafala pat blong ami blong hem mo bin maj i go insaed long graon blong Mantae.

26 Mo hem i bin mekem se evri pipol long eria blong graon ia bae oli kam tugeta blong faet agensem ol man blong Leman, blong lukaotem gud ol graon blong olgeta, mo kantri blong olgeta, ol raet blong olgeta, mo ol fridom blong olgeta; taswe oli bin mekem rere blong taem

we bae ol man blong Leman oli kam.

27 Mo i bin hapen se Moronae i bin mekem ol ami blong hem i haed long vale we i stap klosap long saed blong reva Saedon, we i stap long wes blong reva Saedon long ples we i no gat man long hem.

28 Mo Moronae i bin putum ol spae raonabaot, blong mekem se hem i save wanem taem ol grup blong ol man blong Leman bae oli kam.

29 Mo nao, from we Moronae i bin save tingting blong ol man blong Leman, se oli bin tingting blong smasem gud ol brata blong olgeta, o blong mekem olgeta i kam slef blong oli save stanemap wan kingdom blong olgeta ova long evri graon;

30 Mo tu hem i bin save se tingting blong ol man blong Nifae i blong sevem ol graon blong olgeta, mo fridom blong olgeta, mo jos blong olgeta nomo, taswe hem i bin ting se i no wan sin blong hem i lukaotem gud olgeta wetem plan blong faet; taswe hem i bin faenemaot tru long ol spae blong hem wanem rod ol man blong Leman bae oli tekem.

31 Taswe, hem i bin seraotem ami blong hem mo hem i bin tekem wan pat i go long vale, mo hem i bin haedem olgeta long is, mo long saot blong hil Ripla;

32 Mo ol narafala, hem i bin haedem olgeta long vale long wes, long wes blong reva Saedon, mo hem i gohed blong tekem olgeta i go kasem ol boda blong graon blong Mantae.

33 Mo olsem ia nao hem i bin putum ami blong hem folem tingting blong hem, hem i bin rere blong mitim olgeta.

34 Mo i bin hapen se ol man blong Leman i kam antap long not blong hil, we wan pat blong ami blong Moronae i bin haed.

35 Mo taem we ol man blong Leman i bin go bitim hil Ripla, mo i bin kam long vale mo i bin stat blong krosem reva Saedon, ami we i bin haed long saot blong hil, we wan man we nem blong hem i Lihae i bin lidim, mo hem i bin lidim ami blong hem i go aot mo oli bin raonem ol man blong Leman long is biaen olgeta.

36 Mo i bin hapen se ol man blong Leman, taem we oli bin lukim ol man blong Nifae i stap kam long olgeta biaen long olgeta, oli bin tanem raon mo oli bin stat blong faet agensem ami blong Lihae.

37 Mo wok blong ded i bin stat long tufala saed tugeta, be i moa nogud long saed blong ol man blong Leman, from ol neked bodi blong olgeta i bin open long ol hevi atak blong ol man blong Nifae wetem ol naef blong faet blong olgeta mo ol huknaef blong olgeta, we i bin givim ded klosap long evri atak.

38 Long sem taem, i bin gat wan long man blong ol man blong Nifae, we i bin foldaon wan wan taem, from ol naef blong faet mo blad we oli lusum, oli bin blokem olgeta long ol moa impoten pat blong bodi, o ol moa impoten pat blong bodi oli bin blokem long ol atak

blong ol man blong Leman, wetem ol plet blong kavremap jes blong olgeta, mo ol sil blong kavremap ol han blong olgeta, mo ol hat blong faet blong olgeta, mo olsem ia nao ol man blong Nifae i bin mekem wok blong kilim man i ded i go long ol man blong Leman.

39 Mo i bin hapen se ol man blong Leman i bin stat blong kam fraet, from bigfala fasin blong smasem gud long medel blong olgeta, go kasem taem we oli bin stat blong ronwe i go long reva Saedon.

40 Mo Lihae mo ol man blong hem i folem olgeta; mo Lihae i bin ronem olgeta i go daon long ol wota blong Saedon, mo oli bin krosem ol wota blong Saedon. Mo Lihae i bin holem taet ol ami blong hem long saed blong reva Saedon blong oli no krosem.

41 Mo i bin hapen se Moronae mo ami blong hem i bin mitim ol man blong Leman long vale, long narafala saed blong reva Saedon, mo hem i bin stat blong foldaon long olgeta mo kilim olgeta i ded.

42 Mo ol man blong Leman i bin stat blong ronwe long fored blong olgeta, i go long graon blong Mantae; mo oli mitim bakegen ol ami blong Moronae.

43 Mo long taem ia ol man blong Leman i bin faet moa strong; yes, oli neva bin save ol man blong Leman blong save faet wetem bigfala strong paoa olsem, mo fasin blong no fraet, no, mo tu i no long stat kasem naeia.

44 Mo ol man blong Soram mo ol man blong Amalekae i bin olsem stamba tingting biaen olgeta, we oli bin ol jif kapten mo ol lida blong olgeta, mo tru long Serahemna, we i bin jif kapten blong olgeta, o jif lida blong olgeta mo bos blong ami; yes, oli bin faet olsem ol dragen, mo oli bin kilim ded plante long ol man blong Nifae, yes, from oli bin katem long tu plante long ol hat blong faet blong olgeta, mo oli bin sperem plante long ol plet blong kavremap jes blong olgeta, mo oli bin katemaot plante long ol han blong olgeta; mo olsem ia nao ol man blong Leman i bin smasem olgeta wetem bigfala kros blong olgeta.

45 Be, ol man blong Nifae i bin gat wan stamba tingting biaen long olgeta we i moa gud, from oli no bin faet blong kam king o from paoa, be oli stap faet from ol haos blong olgeta mo ol fri-dom blong olgeta, ol woman blong olgeta mo ol pikinini blong olgeta, mo evri samting blong olgeta, yes, from ol fasin blong wosip blong olgeta mo jos blong olgeta.

46 Mo oli bin mekem wanem we oli bin filim se hem i wok blong olgeta we oli nidim blong mekem long God blong olgeta; from we Lod i bin talem long olgeta, mo tu long ol bubu blong olgeta se: I semak olsem we yufala i no rong long fasfala atak, mo long nambatu taem, bae yufala i no letem ol enemi blong yufala blong kilim yufala i ded.

47 Mo bakegen, Lod i bin talem se: Bae yufala i lukaotem gud ol famle blong yufala go kasem blad i ron. Taswe from stamba tingting ia ol man blong Nifae oli stap faet agensem ol man blong Leman, blong lukaotem gud olgeta bakegen, mo ol famle blong olgeta, mo ol graon blong olgeta, kantri blong olgeta, mo ol raet blong olgeta, mo long saed blong bilif long God blong olgeta.

48 Mo i bin hapen se taem we ol man blong Moronae i bin luk ol strongfala fasin blong no laekem mo ol kros blong ol man blong Leman, klosap bae oli muvbak mo oli ronwe long olgeta. Mo Moronae i bin luksave tingting blong olgeta, i bin sendem aot mo leftemap ol hat blong olgeta—yes, ol tingting blong ol graon blong olgeta, fridom blong olgeta, yes, fridom blong olgeta aot long slef blong olgeta.

49 Mo i bin hapen se, oli bin go agensem ol man blong Leman, mo oli bin askem wetem wan voes long Lod, God blong olgeta, from fridom blong olgeta mo fasin blong kam fri aot long slef blong olgeta.

50 Mo oli bin stat blong stanap agensem ol man blong Leman wetem paoa; mo long semfala aoa ia we oli bin askem long Lod from fridom blong olgeta, ol man blong Leman i bin stat blong ronwe long olgeta; mo oli bin ronwe i go kasem ol wota blong Saedon.

51 Nao ol man blong Leman oli bin moa plante, yes, namba

blong olgeta i moa bitim dabol long namba blong ol man blong Nifae; be, ol man blong Nifae i bin ronemaot olgeta inaf blong mekem olgeta i go long wan grup long vale, long saed klosap long reva Saedon.

52 Taswe ol ami blong Moronae i bin raonem olgeta, yes, hem i long tufala saed tugeta blong reva, from luk, long is saed i bin gat ol man blong Lihae.

53 Taswe taem we Serahemna i bin lukim ol man blong Lihae long is saed blong reva Saedon, mo ol ami blong Moronae long wes saed blong reva Saedon, mekem se ol man blong Nifae i bin raonem olgeta, oli bin fraet bigwan.

54 Nao Moronae, taem we hem i bin luk ol bigfala fraet blong olgeta, hem i bin givim oda long ol man blong hem se oli mas stop blong mekem blad blong olgeta i ron.

---

#### JAPTA 44

---

*Moronae i givim oda long ol man blong Leman blong mekem wan kavenan blong pis o bae oli smasem gud olgeta—Serahemna i no agri long tingting ia, mo faet i gohed bakegen—Ol ami blong Moronae i winim ol man blong Leman. Raonabaot 74–73 yia bifo Kraes i bon.*

Mo i bin hapen se oli bin stop mo oli bin muvaot smol long olgeta. Mo Moronae i bin talem long Serahemna: Luk, Serahemna, we mifala i no wantem

blong kam ol man blong blad. Yufala i save we yufala i stap long han blong mifala, be mifala i no wantem blong kilim ded yufala.

2 Luk, mifala i no bin kam blong faet agensem yufala blong mekem blad blong yufala i ron from paoa; mo mifala i no wantem blong tekem eni man long yok blong slef. Be hemia stret stamba tingting we i mekem yufala i kam agensem mifala; yes, mo yufala i kros long mifala from bilif long God blong mifala.

3 Be naoia, yufala i luk we Lod i stap wetem mifala; mo yufala i luk we hem i bin givim yufala i kam long ol han blong mifala. Mo nao mi wantem se bae yufala i andastanem we samting ia i hapen long mifala from bilif long God blong mifala mo fet blong mifala long Kraes. Mo nao yufala i luk we yufala i no save smasem gud hemia, fet blong mifala.

4 Nao, yufala i luk we hemia tru fet blong God; yes, yufala i luk se God bae i sapotem, mo kipim, mo sevem mifala, evri taem we mifala i holem taet fet long hem, mo long fet blong mifala, mo long saed blong bilif long God blong mifala; mo neva bae Lod i letem blong mifala i kasem smasgud sapos mifala i no brekem loa mo no tanem baksaed long fet blong mifala.

5 Mo nao, Serahemna, mi givim oda long yu, long nem blong God ia we hem i gat evri paoa, we hem i bin mekem ol

han blong mifala i kam strong blong mekem se mifala i bin winim paoa ova long yufala, tru long fet blong mifala, tru long saed blong bilif long God blong mifala, mo tru long ol fasin blong wosip, mo tru long jos blong mifala, mo tru long tabu sapot we mifala i nidim blong givim bak long ol woman blong mifala mo ol pikinini blong mifala, tru long fridom ia we i fasem mifala long ol graon blong mifala mo kantri blong mifala; yes, mo tu tru long fasin blong lukaotem tabu toktok blong God, long hemia we mifala i nidim blong givim bak ol glad blong mifala; mo tru long evri samting we i moa sas olgeta long mifala—

6 Yes, mo i no hemia nomo; mi givim oda long yu tru long evri tingting we yu gat from laef, se yufala i givim ol tul blong faet blong yufala long mifala, mo bae mifala i no lukaotem blad blong yufala, be bae mifala i no aotem ol laef blong yufala, sapos yufala i go long rod blong yufala mo yufala i nomo kambak blong faet agensem mifala.

7 Mo nao, sapos yufala i no mekem samting ia, luk, yufala i stap long ol han blong mifala, mo bae mi givim oda long ol man blong mi blong oli mas foldaon long yufala, mo mekem ol soa blong ded long ol bodi blong yufala, blong mekem se yufala i nomo gat; mo afta bae yumi luk se huia bae i gat paoa long pipol ia; yes, bae yumi luk se huia bae i kam slef.



8 Mo nao i bin hapen se, taem we Serahemna i bin harem ol toktok ia hem i bin kam fored mo i bin givim naef blong faet blong hem mo huknaef blong hem, mo bonara blong hem long ol han blong Moronae, mo hem i bin talem long hem: Luk, hemia ol tul blong faet blong mifala; bae mifala i givim olgeta long yufala, be bae mifala i no letem mifala blong mekem wan tru promes long yufala, we mifala i save se bae mifala i brekem, mo tu ol pikinini blong mifala; be tekem ol tul blong faet blong mifala, mo letem mifala i aot i go long ples we i no gat man long hem; sapos no, bae mifala i holem taet ol tul blong mifala, mo bae mifala i lus o win.

9 Luk, mifala i no blong fet blong yufala; mifala i no biliv we i God we i bin givim mifala i kam long ol han blong yufala; be mifala i biliv se hem i ol trik blong yufala we i sevem yufala long ol naef blong faet blong mifala. Luk, hem i ol plet blong kavremap jes blong yufala mo ol sil blong yufala we i bin sevem yufala.

10 Mo nao taem we Serahemna i bin endem ol toktok ia, Moronae i bin givim bak naef blong faet mo ol tul blong faet, we hem i bin kasem, i go long Serahemna, mo hem i talem: Luk, bae yumi endem faet ia.

11 Nao mi no save tingbaot ol toktok we mi bin talem, taswe olsem we Lod i stap laef, bae yufala i no aot sapos yufala i no aot wetem wan tru promes se

bae yufala i nomo kambak agensem mifala blong faet. Nao olsem we yufala i stap long ol han blong mifala bae mifala i kapsaetem blad blong yufala long graon, o bae yufala i folem ol samting we mi bin putumaot.

12 Mo nao taem we Moronae i bin talem ol toktok ia, Serahemna i bin holem taet naef blong faet blong hem, mo hem i bin kros long Moronae, mo hem i bin ron kwik i kam long fored blong kilim ded Moronae; be taem we hem i bin leftemap naef blong faet blong hem, luk, wan long ol ami blong Moronae i bin kilim aot naef ia i go long graon, mo i bin brok long handel blong hem; mo tu hem i bin kilim Serahemna mekem se hem i karemaot skin wetem hea blong hed blong hem mo i bin foldaon long graon. Mo Serahemna i kamaot long fes blong olgeta i go long medel blong ol ami blong hem.

13 Mo i bin hapen se ami ia we hem i bin stanap klosap, we i bin kilimaot skin wetem hea blong hed blong Serahemna, i bin pikimap skin wetem hea blong hed ia long graon, wetem hea mo i bin putum long en blong naef blong hem, mo hem i soemaot i go long olgeta, mo i bin singaot long olgeta wetem wan voes we i bigwan.

14 Semak olsem we skin wetem hea blong hed ia i bin foldaon long graon, we hem i skin wetem hea blong hed blong jif blong yufala, bae yufala tu i foldaon long graon sapos yufala i no givim ol tul blong

faet blong yufala mo aot wetem wan kavenan blong pis.

15 Nao i bin gat plante, taem we oli bin harem ol toktok ia mo oli bin lukim skin wetem hea blong hed we i bin stap long naef blong faet, fraet i bin kasem olgeta; mo plante i kam fored mo sakem daon ol tul blong faet blong olgeta long leg blong Moronae, mo oli bin mekem wan kavenan blong pis. Mo olgeta evriwan we oli bin mekem wan kavenan, oli bin letem olgeta i go aot long ples we i no gat man long hem.

16 Nao i bin hapen se Serahemna i bin kros bigwan, mo hem i bin mekem ol narafala ami we i bin stap blong kam kros, blong faet moa strong agensem ol man blong Nifae.

17 Mo nao Moronae i bin kros, from stronghed blong ol man blong Leman; taswe hem i bin givim oda long ol pipol blong hem blong oli foldaon long olgeta mo kilim ded olgeta. Mo i bin hapen se, oli bin stat blong kilim ded olgeta; yes, mo ol man blong Leman i bin yusum ol tul blong faet blong olgeta mo paoa blong olgeta blong faet.

18 Be luk, ol neked skin blong olgeta mo ol hed blong olgeta we i no gat samting blong blokem olgeta long ol naef blong faet blong ol man blong Nifae we oli sap; yes, luk ol man blong Nifae i bin stikim mo kilim olgeta, yes, mo oli bin foldaon kwiktaem tumas long fored long ol naef blong faet blong ol man blong Nifae; mo

namba blong olgeta i stat blong kam daon, olsem we ami blong Moronae i bin profesae.

19 Nao Serahemna, taem we hem i bin luk se klosap olgeta evriwan bae i ded, hem i bin singaot strong long Moronae, hem i promes se hem mo ol man blong hem bae oli mekem wan kavenan wetem ol man blong Nifae, sapos oli letem ol man blong Leman we oli stap yet blong oli laef, blong olgeta bae oli nomo kam blong faet agensem ol man blong Nifae bakegen.

20 Mo i bin hapen se Moronae i bin mekem se wok blong ded i mas stop bakegen long medel blong pipol ia. Mo hem i bin karemaot ol tul blong faet long ol man blong Leman; mo afta we oli bin mekem wan kavenan blong pis wetem Moronae oli bin letem olgeta i go aot long ples we i no gat man long hem.

21 Nao namba blong ol ded blong olgeta oli no kaontem from we namba ia i bigwan; yes, namba blong ded blong olgeta i bigwan tumas, tugeta long saed blong ol man blong Nifae wetem ol man blong Leman.

22 Mo i bin hapen se oli bin sakem ol ded blong olgeta insaed long ol wota blong Saedon, mo ol ded ia i bin go aot mo ol dip ples blong solwota i bin berem olgeta.

23 Mo ol ami blong ol man blong Nifae, o blong Moronae, oli bin gobak mo kam long ol kaos blong olgeta, mo ol kantri blong olgeta.

24 Mo olsem ia nao eitin yia blong ol rul blong ol jaj ova long ol pipol blong Nifae i bin en. Mo olsem ia nao histri blong Alma i bin en, we oli bin raetem long ol plet blong Nifae.

Histri blong ol pipol blong Nifae, mo ol faet mo fasin blong pulaot blong olgeta, long ol dei blong Hileman, folem histri blong Hileman, we hem i bin kipim long ol dei blong hem.

*I stat long japta 45 i go kasem japta 62 nomo.*

#### JAPTA 45

*Hileman i bilivim ol toktok blong Alma—Alma i talemaot profesia blong foldaon blong ol man blong Nifae—Hemi blesem mo panisim graon—Maet Spirit i bin tekem Alma i go antap, semak olsem Moses—Fasin blong pulaot i gru long Jos. Raonabaot 73 yia bifo Kraes i bon.*

LUK, nao i bin hapen se, ol pipol blong Nifae i bin glad tumas, from Lod i bin mekem olgeta oli kam fri long ol han blong ol enemi blong olgeta; taswe oli bin givim ol tangkyu i go long Lod, God blong olgeta; yes, mo oli bin livim kakae plante mo prea plante, mo oli bin wosipim God wetem glad we i bigfala tumas.

2 Mo i bin hapen long namba naentin yia blong rul blong ol jaj ova long ol pipol blong Nifae, se Alma i bin kam long boe blong hem Hileman mo i

bin talem long hem: Yu bilivim ol toktok we mi bin talemaot long yu long saed blong ol histri we oli bin kipim?

3 Mo Hileman i bin talem long hem: Yes, mi bilivim.

4 Mo Alma i bin talem long hem bakegen: Yu biliv long Jisas Kraes, we bae i kam?

5 Mo hem i bin talem: Yes, mi bilivim evri toktok we yu bin talem.

6 Mo Alma i bin talem long hem bakegen: Bae yu save hol-em taet ol komanmen blong mi?

7 Mo hem i bin talem: Yes, bae mi holem ol komanmen blong yu wetem ful hat blong mi.

8 Afta Alma i bin talem long hem: Mi blesem yu, mo bae Lod i mekem yu kam antap gud long graon ia.

9 Be luk, mi gat samting blong profesia long yu; be wanem we mi profesia long yu bae yu no mas talemaot; yes, wanem we mi profesia long yu bae i no kamaot, go kasem taem we profesia ia i hapen; taswe raetem daon ol toktok we bae mi talem.

10 Mo hemia ol toktok: Luk, mi luksave se pipol ia, ol man blong Nifae, folem spirit blong revelesen we i stap long mi, long fo hundred yia stat long taem we bae Jisas Kraes i soemaot hemwan long olgeta, bae olgeta i kam slak from we oli lusum bilif.

11 Yes, mo afta bae oli luk ol faet mo ol defren kaen rabis sik, yes, ol taem we i nomo gat kakae mo blad i ron, go kasem taem we ol pipol blong Nifae bae i nomo gat—

12 Yes, mo hemia from we bae oli kam slak from we oli lusum bilif mo bae oli mekem ol wok blong tudak, mo fasin blong gat rabis tingting, mo evri defren kaen rabis fasin; yes, mi talem long yu, se from bae oli sin agensem laet mo save we i bigfala tumas, yes, mi talem long yu, se stat long dei ia, i tru nambafo jeneresen bae evriwan i no pas i gowe, bifo bigfala rabis fasin ia bae i kam.

13 Mo taem we bigfala dei ia i kam, luk, taem ia klosap bae i kam we olgeta we oli stap naoia, o ol pikinini blong olgeta we oli kaontem olgeta wetem ol pipol blong Nifae naoia, bae oli nomo kaontem olgeta wetem ol pipol blong Nifae.

14 Be eni man we i stap yet, mo God i no smasem gud hem long bigfala mo nogud dei, bae oli kaontem hem wetem ol man blong Lemana, mo bae hem i kam olsem olgeta, evriwan, be smol namba nomo we bae oli singaotem olgeta ol disaepol blong Lod; mo olgeta ia bae ol man blong Lemana i folem go kasem taem we bae oli nomo gat. Mo nao, from rabis fasin, profesi ia bae i hapen.

15 Mo nao i bin hapen se afta we Alma i bin talem ol samting ia long Hilemana, hem i bin blesem hem, mo tu ol narafala boe blong hem; mo tu hem i bin blesem graon ia blong olgeta we i stret.

16 Mo hem i bin talem: Olsem ia nao Lod God i talem—Graon ia bae i panis, yes, graon ia, long evri kantri, famle, lanwis,

mo pipol, i go kasem bae mi smasem gud olgeta, we oli mekem rabis fasin, taem we oli kam raep fulwan; mo olsem we mi bin talem bae i hapen olsem; from hemia panis mo blesing blong God long graon, from we Lod i no save lukluk long sin wetem wan smol pat we hem i save akseptem.

17 Mo nao, taem we Alma i bin talem ol toktok ia hem i bin blesem jos, yes, olgeta we oli mas stanap strong long fet stat long taem ia i go.

18 Mo taem we Alma i bin mekem samting ia, hem i bin aot long graon blong Sarahemla, olsem blong go long graon blong Melek. Mo i bin hapen se i no bin gat eni man we i harem moa long hem; olsem long ded blong hem o long saed blong berem hem yumi no save long hem.

19 Luk, hemia yumi save, se hem i bin wan stret man; mo toktok i bin go raon long jos se Spirit i bin tekem hem i go antap, o Lod i bin berem hem wetem han blong hem, semak olsem Moses. Be luk, ol skripja i talem se Lod i bin tekem Moses i go long hem; mo yumi ting se Lod i bin tekem Alma tu long spirit, i go long hem; taswe, from stamba tingting ia yumi no save eni samting long saed blong ded mo long saed blong berem blong hem.

20 Mo nao i bin hapen se, long stat blong namba naentin yia blong rul blong ol jaj ova long ol pipol blong Nifae, we Hilemana i bin go fored long medel

blong ol pipol blong talemaot trutok long olgeta.

21 From luk, from ol faet blong olgeta wetem ol man blong Lemana mo ol plante smol pulaot blong olgeta, mo ol trabol we i bin stap long medel blong ol pipol, i bin gat nid we toktok blong God i go long olgeta, yes, mo se oda i mas stap truaot long jos.

22 Taswe, Hileman mo ol brata blong hem i bin go aot blong stanemap jos bakegen long evri graon, yes, long evri bigtaon truaot long ful graon we i blong ol pipol blong Nifae. Mo i bin hapen se, oli bin jusum ol pris mo ol tija truaot evri graon, long evri jos.

23 Mo nao i bin hapen se, afta we Hileman mo ol brata blong hem i bin jusum ol pris mo ol tija long ol jos, mo wan pulaot i bin girap long medel blong olgeta, mo olgeta i no bin lisin long ol toktok blong Hileman mo ol brata blong hem;

24 Be oli bin kam flas, from we oli flas insaed long ol hat blong olgeta, from ol bigfala rij blong olgeta we i tumas; taswe oli bin gru rij long ol ae blong olgeta bakegen, mo oli no bin folem gud ol toktok blong olgeta, blong wokbaot stret long fored blong God.

---

JAPTA 46

---

*Amalekaea i plan blong kam king —Moronae i leftemap taetol blong fridom—Hem i kampen long ol man blong lukaotem gud long saed*

*blong bilif long God blong olgeta —Ol tru man blong biliv ol pipol oli singaotem olgeta ol Kristin man —Wan long olgeta laen blong Josef we oli stap laef yet bae God i sevem olgeta—Amalekaea mo ol man blong pulaot oli ronwe i go long graon blong Nifae—Olgeta we oli no sapotem fridom oli kilim ded olgeta. Raonabaot 73–72 yia bifo Kraes i bon.*

Mo i bin hapen se plante long olgeta we oli no folem ol toktok blong Hileman mo ol brata blong hem, oli bin kam tugeta agensem ol brata blong olgeta.

2 Mo nao luk, oli bin kros tumas, inaf blong mekem se oli bin gat strongfala tingting blong kilim ded olgeta.

3 Nao lida blong olgeta we oli bin kros long ol brata blong olgeta, hem i wan bigfala mo wan strong man; mo nem blong hem i bin Amalekaea.

4 Mo Amalekaea i bin wantem blong kam wan king; mo olgeta we oli bin kros i bin wantem tu se hem i kam king blong olgeta; mo olgeta ia oli bin moa bigfala pat, blong olgeta we oli ol smol jaj blong graon, mo oli bin lukaotem paoa.

5 Mo ol swit toktok blong Amalekaea i bin lidim olgeta, se sapos oli sapotem hem mo stanemap hem blong kam king blong olgeta, bae hem i mekem olgeta i kam ol man blong rulum ol pipol.

6 Olsem ia nao Amalekaea i bin lidim olgeta blong pulaot, i nomata long ol prijing blong Hileman mo ol brata blong hem,

yes, i nomata long bigfala kea tumas blong olgeta long jos, from we olgeta i bin ol hae pris ova long jos.

7 Mo i bin gat plante long jos we oli bin bilivim ol swit toktok blong Amalekaea, taswe oli bin pulaot tu aot long jos; mo olsem ia nao ol bisnes blong ol pipol blong Nifae i no bin sef tumas mo i denja, i nomata long bigfala win blong olgeta we oli bin gat long ol man blong Leman, mo ol bigfala glad blong olgeta we oli bin gat from fasin blong kam fri blong olgeta we oli kasem long han blong Lod.

8 Olsem ia nao yumi luk olsem wanem we i kwik blong ol pikinini blong ol man oli fogetem Lod, God blong olgeta, yes, olsem wanem we oli kwik blong mekem rabis fasin, mo blong letem nogud wan i lidim olgeta.

9 Yes, mo tu yumi luk bigfala nogud fasin we wan nogud man i save mekem i hapen long medel blong ol pikinini blong ol man.

10 Yes, yumi luk we Amalekaea, from we hem i wan man blong trik mo wan man blong plante swit toktok, we hem i bin lidim ol hat blong plante man blong mekem nogud fasin; yes, mo blong lukaotem blong smasem gud jos blong God, mo blong smasem gud stamba blong fridom we God i bin givim long olgeta, o blesing ia we God i bin sendem i kam long fes blong graon blong olgeta we i stret.

11 Mo nao i bin hapen se, taem we Moronae, we hem i jif lida

blong ol ami blong ol man blong Nifae, i bin harem long saed blong ol pulaot ia, hem i bin kros long Amalekaea.

12 Mo i bin hapen se, hem i bin terem kot blong hem, mo hem i tekem wan pis blong hem, mo hem i raet long hem—blong tingbaot blong God blong yumi, bilif long God blong yumi, mo fridom, mo pis blong yumi, ol woman blong yumi, mo ol pikinini blong yumi—mo hem i bin fasem taet hemia long en blong wan longfala stik.

13 Mo hem i bin fasem taet long hat blong faet blong hem, mo plet blong hem blong kavremap jes blong hem, mo ol sil blong hem, mo hem i taetem klos blong faet blong hem long wes blong hem; mo hem i bin tekem longfala stik ia, we i bin gat long en blong hem pis kot blong hem we hem i bin terem, (mo hem i bin singaotem samting ia taetol blong fridom) mo hem i bin bodaon long graon, mo hem i bin prea strong long God blong hem blong ol brata blong hem bae oli kasem ol blesing blong fridom, long ol taem we wan grup blong ol Kristin i stap blong holem taet graon—

14 From olsem ia nao evri tru man blong biliv long Kraes, we oli bin blong jos blong God, olgeta we oli no blong jos i bin singaotem olgeta ia olsem.

15 Mo olgeta we oli bin blong jos oli bin holem taet fet; yes, olgeta we oli bin tru man blong biliv long Kraes i bin putum long olgeta, wetem glad, nem

blong Kraes, o ol Kristin man olsem we oli bin singaotem olgeta long hem from bilif blong olgeta long Kraes we bae hem i kam.

16 Mo taswe, long taem ia, Moronae i bin prea blong stamba tingting blong ol Kristin man, mo ol fridom blong graon bae God i mekem gud long olgeta.

17 Mo i bin hapen se, taem we hem i bin poremaot ful sol blong hem long God, hem i givim nem blong evri graon we i bin stap long saot blong graon blong Emti, yes, long en, evri graon, long not tugeta wetem long saot—Wan spesel graon, mo graon blong fridom.

18 Mo hem i bin talem: I tru we God bae i no save letem yumi, we ol pipol oli luk daon long yumi from we yumi tekem long yumi nem blong Kraes, blong bae oli winim mo smasem gud yumi, kasem taem we yumi mekem samting ia i hapen long yumi from ol fasin blong yumi blong brekem ol loa.

19 Mo taem we Moronae i bin talem ol toktok ia, hem i bin go aot long medel blong ol pipol, hem i seksekem pis kot blong hem we hem i bin terem long ea, blong mekem se evri man i save luk raeting we hem i bin raetem long pat blong kot we hem i bin terem, mo hem i singaot wetem wan voes we i bigwan, i talem:

20 Luk, eni man we i holem taet taetol ia long graon, letem olgeta i kam fored long paa blong Lod, mo mekem wan

kavenan blong bae oli holem taet ol raet blong olgeta, mo bilif long God blong olgeta, blong Lod God i save blesem olgeta.

21 Mo i bin hapen se taem we Moronae i bin talemaot ol toktok ia, luk, ol pipol i bin ron i kam tugeta wetem ol klos blong faet blong olgeta we oli bin taetem raon long wes blong olgeta, oli terem ol klos blong olgeta olsem saen, o olsem wan kavenan, blong bae oli lego Lod, God blong olgeta; o, long ol narafala toktok, sapos oli brekem ol komanmen blong God, o foldaon long fasin blong brekem loa, mo stap sem blong tekem long olgeta nem blong Kraes, Lod bae i terem olgeta semak olsem we oli bin terem ol klos blong olgeta.

22 Nao hemia kavenan we oli bin mekem, mo oli bin sakem ol klos blong olgeta long ol leg blong Moronae, oli talem: Mifala i kavenan wetem God blong mifala, se bae God i mas smasem gud mifala, semak olsem ol brata blong mifala long graon blong not, sapos bae mifala i foldaon long fasin blong brekem loa; yes, God i save sakem mifala long ol leg blong ol enemy blong mifala, semak olsem we mifala i bin sakem ol klos blong mifala long ol leg blong yu, blong oli purumbut andanit long leg, sapos bae mifala i foldaon long fasin blong brekem loa.

23 Moronae i bin talem long olgeta: Luk, yumi ol smol haf blong ol pikinini blong Jakob we

yumi stap laef yet; yes, yumi ol smol haf blong ol pikinini blong Josef we yumi stap laef yet, Josef ia we ol brata blong hem i bin terem kot blong hem long ol plante pis; yes, mo nao luk, letem yumi tingbaot blong holem ol komanmen blong God, sapos no bae ol brata blong yumi bae oli terem ol klos blong yumi, mo bae oli sakem yumi long kalabus, o bae oli salem yumi, o bae oli kilim ded yumi.

24 Yes, bae yumi sevem freedom blong yumi olsem wan laen blong Josef we yumi stap laef yet; yes, bae yumi tingbaot ol toktok blong Jakob, bifo ded blong hem, from luk, hem i bin luk se wan pat blong kot blong Josef i bin sef mo i no bin roten. Mo Jakob i bin talem—Semak olsem pis klos ia blong boe blong mi i bin sef, long sem fasin bae wan laen blong pikinini blong boe blong mi bae i sef tru long han blong God, mo bae God i tekem hem i kam long hemwan, sem taem narafala pat blong ol pikinini blong Josef bae oli lus, semak olsem narafala pat blong klos blong hem we i lus.

25 Nao luk, samting ia i mekem sol blong mi i harem nogud; be, sol blong mi i glad long boe blong mi, from pat ia blong ol pikinini blong hem we bae God i tekem i kam long hem.

26 Nao luk, hemia lanwis blong Jakob.

27 Mo nao huia i save be wanem ol pikinini blong Josef we oli, stap laef yet, we bae oli lus olsem klos blong hem,

hemia olgeta we oli bin pulaot long yumi? Yes, mo hemia i save minim se bae hem i yumi sapos yumi no stanap strong long fet long Kraes.

28 Mo nao i bin hapen se, taem we Moronae i bin talem ol toktok ia hem i go fored, mo tu hem i bin sendem wan mesej i go fored long evri pat blong graon we i bin gat ol pulaot, mo hem i tekem tugeta evri pipol we oli bin wantem blong holem taet fridom blong olgeta, blong go agensem Amalekaea mo olgeta we oli bin pulaot long olgeta, we oli bin singaotem olgeta ol man blong Amalekaea.

29 Mo i bin hapen se, taem we Amalekaea i bin luk se ol pipol blong Moronae i gat moa namba bitim ol man blong Amalekaea—mo tu hem i bin luk se ol man blong hem i bin gat kwestin long saed blong jastis blong stamba tingting we oli bin tekem long olgeta—taswe, from hem i fraet blong hem i no save kasem stamba tingting blong hem, hem i bin tekem olgeta long ol pipol blong hem we oli wantem mo oli bin go aot long graon blong Nifae.

30 Nao Moronae i bin ting se i no gat nid blong ol man blong Lemana bae i gat moa paoa; taswe hem i bin tingting blong hem i katemaot ol man Amalekaea, o blong tekem olgeta mo karem olgeta i kambak, mo kilim Amalekaea i ded; yes, from we hem i bin save se bae hem i tanem tingting blong ol man blong Lemana blong oli kam kros agensem olgeta, mo mekem



olgeta blong kam faet agensem olgeta; mo hemia hem i bin save se Amalekaea bae i mekem blong kasem ol stamba tingting blong hem.

31 Taswe Moronae i bin ting se i nid blong hem i mas tekem ol ami blong hem, we oli bin kam tugeta, mo tekem ol tul blong faet wetem olgeta, mo mekem wan kavenan blong holem taet pis—mo i bin hapen se, hem i bin tekem ami blong hem mo oli bin maj wetem ol tenet blong hem i go long ples we i no gat man long hem, blong blokem stamba tingting blong Amalekaea long ples we i no gat man long hem.

32 Mo i bin hapen se hem i bin mekem folem ol tingting blong hem, mo i bin maj fored long ples we i no gat man long hem, mo i bin go long fored blong ol ami blong Amalekaea.

33 Mo i bin hapen se Amalekaea i bin ronwe wetem wan smol namba blong ol man blong hem, mo ol narafala, oli bin go long ol han blong Moronae mo hem i bin tekem olgeta i gobak long graon blong Sarahemla.

34 Nao, Moronae from hem i wan man we ol jif jaj mo voes blong ol pipol i bin jusum hem, taswe hem i bin gat paoa folem tingting blong hem long ol ami blong ol man blong Nifae, blong stanemap mo yusum raet ova long olgeta.

35 Mo i bin hapen se eniwan long ol man blong Amalekaea we i bin no wantem mekem wan kavenan blong sapotem stamba tingting blong fridom, blong

oli save holem taet wan fri gavman, hem i bin mekem blong man ia i kasem ded; mo i bin gat be smol nomo we oli bin tanem baksaed long kavenan blong fridom.

36 Mo tu i bin hapen se, hem i bin mekem se taetol blong fridom i bin stanap long evri taoa we i bin stap long evri graon we ol man blong Nifae i bin stap long hem; mo olsem ia nao Moronae i bin stanemap flag blong fridom long medel blong ol man blong Nifae.

37 Mo oli bin stat blong gat pis bakegen long graon; mo olsem ia nao oli bin holem taet pis long graon klosap kasem en blong naentin yia blong rul blong ol jaj.

38 Mo Hileman mo ol hae pris tu i bin holem taet oda long jos; yes, long taem blong fo yia oli bin gat plante pis mo glad long jos blong olgeta.

39 Mo i bin hapen se i bin gat plante we oli bin ded, we oli stap biliv strong se ol sol blong olgeta Jisas Kraes i bin pemaot olgeta; olsem ia nao oli bin go aot long wol wetem glad.

40 Mo i bin gat samfala we oli bin ded long ol fiva, we long samfala taem blong yia oli bin hapen plante long graon—be oli no bin ded tumas long fiva, from we oli bin gat plante lif mo rus we God i bin mekem rere blong tekemaot ol sik ia, we ol man i bin save kasem folem kaen weta we oli bin gat—

41 Be i bin gat plante we oli bin ded from oli olfala; mo olgeta we oli bin ded wetem fet long

Kraes oli hapi long hem, olsem we yumi nid blong tingting.

---

JAPTA 47

---

*Amalekaea i yusum fasin blong go agens, kilim man i ded, mo sikret plan blong kam king blong ol man blong Leman—Ol man blong Nifae we oli bin pulaot oli moa nogud mo prapa wael bitim ol man blong Leman. Raonabaot 72 yia bifo Kraes i bon.*

NAO bae yumi gobak long histri blong yumi long saed blong Amalekaea mo olgeta we oli bin ronwe wetem hem i go long ples we i no gat man long hem, from, luk, hem i bin tekem olgeta we oli go wetem hem, mo i bin go long graon blong Nifae long medel blong ol man blong Leman, mo oli bin tanem ol tingting blong ol man blong Leman blong oli kros long ol man blong Nifae, inaf blong mekem se king blong ol man blong Leman i bin sendem wan toktok i go tru long evri graon blong hem, long evri pipol blong hem, blong oli mas kam tugeta bakegen blong go faet agensem ol man blong Nifae.

2 Mo i bin hapen se, taem we toktok ia i bin go fored long medel blong olgeta oli bin fraet tumas; yes, oli bin fraet blong mekem king i harem nogud, mo tu oli bin fraet blong go faet agensem ol man blong Nifae from oli fraet blong lusum laef blong olgeta. Mo i bin hapen se, bae oli no wantem mekem, o moa plante long olgeta i no

wantem, obei long ol komanmen blong king.

3 Mo nao i bin hapen se king i bin kros from fasin blong olgeta blong no obei; taswe hem i bin givim Amalekaea paoa blong pat blong ami blong hem we oli bin obei long ol oda hem, mo i bin givim oda long hem blong go aot mo fosem olgeta we oli no obei blong tekem ol tul blong faet wetem olgeta.

4 Nao luk, hemia i bin tingting blong Amalekaea; from hem i wan man we i waes tumas blong mekem trik blong mekem nogud fasin, taswe hem i bin mekem plan ia long hat blong hem blong aotem king blong ol man blong Leman long jea blong hem.

5 Mo nao hem i bin kasem paoa ova long grup blong ol man blong Leman we oli bin sapotem king; mo hem i bin lukaotem blong kasem sapot blong olgeta we oli no bin obei; taswe hem i bin go fored long ples we oli bin singaotem Onaeda, from long ples ia nao ol man blong Leman i bin ronwe i go long hem, from we oli bin faenemaot we ami ia i stap kam, mo, from we oli ting se oli stap kam blong smasem gud olgeta, taswe oli bin ronwe i go long Onaeda, long ples blong ol tul blong faet.

6 Mo oli bin jusum wan man blong kam wan king mo wan lida ova long olgeta, from we oli bin gat strong tingting long tingting blong olgeta, blong bae oli no fosem olgeta blong go agensem ol man blong Nifae.

7 Mo i bin hapen se oli bin kam tugeta antap long hil we oli bin singaotem Antipas, blong rere blong faet.

8 Nao i no bin tingting blong Amalekaea blong faetem olgeta folem ol komanmen blong king; be luk, hem i bin tingting blong hem blong kasem sapot blong ol ami blong ol man blong Leman, blong mekem se hem i save putum hem wan long lida blong olgeta mo aotem king long jea blong hem mo hem i tekem kingdom.

9 Mo luk, i bin hapen se hem i bin mekem ami blong hem blong pulum tenet blong olgeta long vale we i bin klosap long hil Antipas.

10 Mo i bin hapen se taem we i naet hem i bin sendem sikret grup i go long hil Antipas, hem i bin wantem lida blong olgeta we oli bin stap long hil, we nem blong hem Lihontae, blong hem i mas kam daon long stamba blong hil, from we hem i bin wantem toktok long hem.

11 Mo i bin hapen se, taem Lihontae i bin kasem mesej hem i bin fraet blong go daon long stamba blong hil. Mo i bin hapen se Amalekaea i bin sendem bakegen nambatu taem, hem i wantem hem blong kam daon. Mo i bin hapen se, Lihontae i no wantem kam daon; mo hem i bin sendem bakegen nambatri taem.

12 Mo i bin hapen se, taem we Amalekaea i faenemaot se hem i no save kasem Lihontae blong kam daon aot long hil, hem i bin go antap long hil, klosap long

kam blong Lihontae; mo hem i bin sendem bakegen nambafo taem mesej blong hem long Lihontae, hem i wantem blong hem i kam daon, mo blong hem i tekem ol gadman blong hem wetem hem.

13 Mo i bin hapen se taem we Lihontae i bin kam daon wetem ol gadman blong hem long Amalekaea, se Amalekaea i bin wantem hem blong kam daon wetem ami blong hem long naet, mo raonem ol man ia long kamp blong olgeta long olgeta we king i bin givim paoa long hem ova long olgeta, mo se bae hem i givim olgeta long ol han blong Lihontae, sapos bae hem i mekem hem (Amalekaea) wan nambatu lida ova long ful ami.

14 Mo i bin hapen se, Lihontae i bin kam daon wetem ol man blong hem mo oli bin raonem ol man blong Amalekaea, blong mekem se bifo oli bin wekap long taem we san i jas kam antap ol ami blong Lihontae i bin raonem olgeta finis.

15 Mo i bin hapen se taem we oli bin luk se oli bin raonem olgeta, oli bin askem long Amalekaea blong hem i letem olgeta blong joenem ol brata blong olgeta, blong mekem se oli no save smasem gud olgeta. Nao hemia stret samting we Amalekaea i bin wantem.

16 Mo i bin hapen se, hem i bin letem ol man blong hem, agensem ol oda blong king. Nao hemia tingting we Amalekaea i bin wantem, blong mekem se hem i save mekem ol plan

blong hem blong aotem king long jea blong hem.

17 Nao i bin kastom blong ol man blong Leman, sapos jif lida blong olgeta i bin ded, bae oli jusum nambatu lida blong kam jif lida blong olgeta.

18 Mo i bin hapen se, Amalekaea i bin mekem blong wan long ol wokman blong hem bae i givim smol smol posen long Lihontae; mekem se hem i bin ded.

19 Nao, taem we Lihontae i bin ded, ol man blong Leman i bin jusum Amalekaea blong kam lida blong olgeta mo jif komanda blong olgeta.

20 Mo i bin hapen se Amalekaea i bin maj wetem ol ami blong hem (from we hem i bin kasem ol tingting blong hem) long graon blong Nifae, long bigtaon blong Nifae, we hem i jif bigtaon.

21 Mo king i bin kam aot blong mitim hem wetem ol gadman blong hem, from we hem i bin ting se Amalekaea i bin wokem ol oda blong hem, mo se Amalekaea i bin mekem wan bigfala ami blong kam tugeta blong go agensem ol man blong Nifae blong faet.

22 Be luk, taem we king i bin kam aot blong mitim hem, Amalekaea i bin mekem se ol wokman blong hem i mas go fored blong mitim king. Mo oli bin go mo bodaon long fored blong king, olsem blong soem bigfala respek long hem from bigfala paoa blong hem.

23 Mo i bin hapen se king i bin putumaot han blong hem blong

leftemap olgeta, olsem we i bin kastom blong ol man blong Leman, olsem wan saen blong pis, we kastom ia oli bin tekem long ol man blong Nifae.

24 Mo i bin hapen se taem we hem i bin leftemap fasfala wokman long graon, luk hem i bin stikim king long hat blong hem; mo hem i bin foldaon long graon.

25 Nao ol wokman blong king i bin ronwe; mo ol wokman blong Amalekaea i bin singaot, se:

26 Luk, ol wokman blong king i bin stikim hem long hat, mo hem i bin foldaon mo oli bin ronwe; luk, kam mo luk.

27 Mo i bin hapen se Amalekaea i bin givim oda long ol ami blong hem se oli mas maj aot mo lukim wanem i bin hapen long king; mo taem we oli bin kam long stret ples, mo oli bin faenem king i slip long blad blong hem, Amalekaea i bin giaman blong soem se hem i kros, mo hem i bin talem se; Eni man we i bin lavem king, letem hem i go aot, mo folem ol wokman blong hem blong bae oli save ded.

28 Mo i bin hapen se olgeta we oli bin lavem king, taem we oli bin harem ol toktok ia, i bin kam aot mo oli bin go blong kasem ol wokman blong king.

29 Nao taem we ol wokman blong king i bin luk wan ami i stap kam blong kasem olgeta, oli bin fraet bakegen, mo oli bin ronwe i go long ples we i no gat man long hem, mo oli bin kam

long graon blong Sarahemla mo oli bin joenem ol pipol blong Amon.

30 Mo ami we i bin folem i bin gobak, oli bin folem olgeta blong nating nomo; mo olsem ia nao Amalekaea wetem giaman blong hem, i bin winim ol hat blong ol pipol.

31 Mo i bin hapen se, long nekis dei hem i bin go insaed long bigtaon Nifae wetem ol ami blong hem, mo hem i bin tekem bigtaon ia.

32 Mo nao i bin hapen se kwin, taem we hem i bin harem se oli bin kilim ded king—from Amalekaea i bin sendem wan mesenja i go long kwin blong letem hem i save se ol wokman blong king i bin kilim ded hem, we Amalekaea i bin folem olgeta wetem ami blong hem, be i blong nating nomo, mo ol wokman blong king i bin ronwe—

33 Taswe, taem we kwin i bin kasem mesej ia hem i bin sendem wan mesej long Amalekaea, se hem i wantem se Amalekaea i letem ol man blong bigtaon oli stap; mo tu hem i bin wantem se Amalekaea i mas kam givim ripot long hem; mo tu hem i bin wantem hem blong tekem ol witnes wetem hem blong talemaot long saed blong ded blong king.

34 Mo i bin hapen se Amalekaea i bin tekem sem wokman we hem i bin kilim ded king, mo olgeta we i bin stap wetem hem, mo oli bin go long kwin, long ples we hem i bin sidaon; mo olgeta evriwan i bin testifae long kwin se ol wokman blong

king nomo i bin kilim ded hem; mo tu oli bin talem: Oli bin ronwe; hemia i no witnes agensem olgeta? Mo olsem ia nao oli bin mekem kwin i harem se i stret long saed blong ded blong king.

35 Mo i bin hapen se, Amalekaea i bin lukaotem blong mekem kwin i laekem hem, mo hem i bin tekem kwin i kam woman blong hem; mo olsem ia nao tru long giaman blong hem, mo tru long help blong ol wokman blong hem we oli waes, hem i bin kasem kingdom; yes, oli bin luksave hem olsem king truaot long evri graon, long medel blong evri pipol blong ol man blong Leman, we oli bin kamaot long ol man blong Leman mo ol man blong Lem-yul mo ol man blong Ismael, mo olgeta we oli bin pulaot long ol man blong Nifae, stat long rul blong Nifae go kasem taem naoia.

36 Nao olgeta ia we oli bin pulaot long ol man blong Nifae, we oli bin gat sem toksave mo sem save blong ol man blong Nifae, yes, we oli bin kasem toksave long sem save blong Lod, be, hem i defren blong talem, i no long taem tumas afta we ol pulaot blong olgeta, laef blong olgeta i bin kam moa nogud mo oli no save sakem sin, mo oli moa wael, oli nogud mo wael bitim ol man blong Leman—oli akseptem ol kastom blong ol man blong Leman; mekem se olgeta oli les, mo, olgeta kaen fasin blong mekem adaltri; yes, oli bin

fogetem fulwan Lod, God blong olgeta.

---

JAPTA 48

---

*Amalekaea i mekem ol man blong Leman i go agensem ol man blong Nifae—Moronae i mekem rere ol man blong hem blong lukaot gud long stamba tingting blong ol Kristin man—Hemi glad long fasin blong kam fri mo long fridom mo hem i wan strong man blong God. Raonabaot 72 yia bifo Kraes i bon.*

Mo i bin hapen se, taem we Amalekaea i bin tekem kingdom hem i bin stat blong lidim ol hat blong ol man blong Leman i go agensem ol man blong Nifae; yes, hem i bin jusum ol man blong toktok long ol man blong Leman long ol taoa blong olgeta, agensem ol man blong Nifae.

2 Mo olsem ia nao hem i bin lidim ol hat blong olgeta agensem ol man blong Nifae, inaf blong mekem se long en blong namba naentin yia blong rul blong ol jaj, hem i bin kasem ol plan blong hem kasem taem ia, yes, from we hem i bin kam king ova long ol man blong Leman, mo tu hem i bin lukaot blong rul ova long evri graon, yes, mo evri pipol we i bin stap long graon, ol man blong Nifae wetem ol man blong Leman.

3 Taswe hem i bin mekem plan blong hem i hapen, from hem i bin mekem ol hat blong ol man blong Leman i kam strong mo mekem ol tingting

blong olgeta i kam blaen, mo i bin tanem tingting blong olgeta blong oli kros, inaf blong mekem se hem i bin tekem i kam tugeta wan bigfala namba blong ami blong go faet agensem ol man blong Nifae.

4 From hem i bin gat wan strongfala tingting, from we namba blong ol pipol blong hem i bigfala tumas, blong winim ol man blong Nifae mo mekem olgeta i kam slef.

5 Mo olsem ia nao hem i bin jusum ol jif kapten blong ol man blong Soram, from we olgeta ia oli save gud moa, paoa blong ol man blong Nifae, mo ol ples blong haed blong olgeta, mo ol pat blong ol bigtaon blong olgeta we oli moa slak; taswe hem i bin jusum olgeta blong kam ol jif kapten ova long ol ami blong hem.

6 Mo i bin hapen se, oli bin tekem kamp blong olgeta, mo oli bin mov i go fored long graon blong Sarahemla long ples we i no gat man long hem.

7 Nao i bin hapen se taem we Amalekaea i bin mekem olsem ia nao blong kasem paoa folem trik mo giaman, Moronae, long narasaed, i bin stap mekem rere ol tingting blong ol man blong holem taet fet long Lod, God blong olgeta.

8 Yes, hem i bin mekem ol ami blong ol man blong Nifae i kam strong, mo wokem ol smol kaos blong ami, o ol ples blong haed; hem i wokem ol wol long graon mo i raonem olgeta blong putum ol ami blong hem insaed, mo tu hem i wokem ol

wol blong ston blong raonem olgeta, raonem ol bigtaon blong olgeta mo ol boda blong ol graon blong olgeta; yes, we i raonabaot long graon.

9 Mo long ol wol blong olgeta we oli moa slak, hem i bin putum moa namba blong ol man blong hem, mo olsem ia nao hem i bin sapotem mo mekem i kam strong ol graon we ol man blong Nifae i bin stap long hem.

10 Mo olsem ia nao hem i bin mekem rere blong sapotem fridom blong olgeta, ol graon blong olgeta, ol woman blong olgeta, mo ol pikinini blong olgeta, mo pis blong olgeta, mo blong mekem se oli save laef blong leftemap nem blong Lod, God blong olgeta, mo blong oli save holem taet wanem we ol enemy blong olgeta i bin singaotem stamba tingting blong ol Kristin man.

11 Mo Moronae i bin wan strong man mo wan man we i gat paoa; hem i bin wan man we i gat save we i stret gud; yes, wan man we i no glad blong mekem blad i ron; wan man we sol blong hem i bin glad long fridom mo long fasin blong kam fri blong kantri blong hem, mo ol brata blong hem long fasin blong no gat fridom mo stap long slef;

12 Yes, hem i bin wan man we hat blong hem i bin solap long ol tangkyu long God blong hem, from ol plante janis mo ol blesing we God i bin givim long ol man blong hem; wan man we i bin wok tumas from

ol gudfala laef mo long fasin blong ol man blong hem i stap sef.

13 Yes, mo hem i bin wan man we i bin stanap strong long fet long Kraes, mo hem i bin promes wetem wan tru promes blong lukaotem gud ol pipol blong hem, ol raet blong hem, mo kantri blong hem, mo fasin blong wosipim God blong hem, go kasem sapos hem i mas lusum blad blong hem.

14 Nao ol lida mo ol tija blong jos blong ol man blong Nifae i bin tijim ol man blong Nifae blong lukaotem gud olgeta bakegen long ol enemy blong olgeta, mo tu mekem blad i ron, sapos i gat nid; yes, mo tu oli bin lanem blong neva faet, yes, mo neva blong leftemap naef blong faet sapos hem i no agensem wan enemy, hemia nomo sapos i no blong sevem ol laef blong olgeta.

15 Mo hem i fet blong olgeta se taem we oli mekem olsem, God bae i mekem olgeta i kam antap gud long graon, o long ol narafala toktok, sapos oli bin holem taet fet blong holem ol komanmen blong God blong bae hem i mekem olgeta i kam antap gud long graon; yes, wonem olgeta blong ronwe, o blong mekem rere blong faet, folem denja blong olgeta;

16 Mo tu, se God bae i talemaot long olgeta wea ples oli mas go blong lukaot gud long olgeta agensem ol enemy blong olgeta, mo taem we oli mekem olsem, Lod bae i mekem olgeta i kam fri; mo hemia fet blong

Moronae, mo hat blong hem i bin glad long hemia; i no long blad i ron be blong mekem gud fasin, blong lukaotem gud ol pipol blong hem, yes, blong holem ol komanmen blong God, yes, mo holembak long nogud fasin.

17 Yes, i tru, i tru mi talem long yufala, sapos evri man oli bin stap, mo oli stap, mo bae oli save kam, olsem Moronae, luk, ol paoa blong hel bae i kam lus blong oltaem; yes, bae devel i neva gat paoa ova long ol hat blong ol pikinini blong ol man.

18 Luk, hem i bin wan man olsem Amon, boe blong Mosaea, yes, mo tu ol narafala boe blong Mosaea, yes, mo tu Alma mo ol boe blong hem, from olgeta ia oli bin ol man blong God.

19 Nao luk, Hileman mo ol brata blong hem oli ol man blong wok long ol pipol semak olsem Moronae; from we oli bin prijim toktok blong God, mo oli bin mekem baptaes blong sakem sin, evriman, eni man we bae i harem ol toktok blong olgeta.

20 Mo olsem ia nao oli bin go aot, mo ol pipol i bin putum tingting blong olgeta i stap daon from ol toktok blong olgeta, inaf blong mekem se Lod i bin laekem olgeta bigwan, mo olsem ia nao oli bin fri long ol faet mo ol rao long medel blong olgeta bakegen, yes, go kasem spes blong fo yia.

21 Be, olsem we mi bin talem, long en blong naentin yia, yes, i nomata long pis blong olgeta

long medel blong olgeta bakegen, oli bin fosem olgeta blong rao wetem ol brata blong olgeta, ol man blong Leman.

22 Yes, mo blong endem, ol faet blong olgeta i neva bin stop, blong spes blong plante yia, wetem ol man blong Leman, i nomata we oli no bin wantem nating.

23 Nao, oli bin sore blong tekem ol tul blong faet agensem ol man blong Leman, from we oli no bin laekem blong mekem blad i ron; yes, mo i no hemia nomo—oli bin sore se olgeta nao oli bin mekem se plante long ol brata blong olgeta i bin aot long wol ia i go long wan wol we i no save finis, mo oli no rere blong mitim God blong olgeta.

24 Be, oli no bin save letem olgeta blong oli ded, se ol woman blong olgeta mo ol pikinini blong olgeta bae ol man blong Leman bae i kilim ded olgeta, tru long wael fasin blong no kea blong olgeta we oli bin wantaem stap olsem ol brata blong olgeta, yes, mo oli bin pulaot long jos blong olgeta, mo oli bin livim olgeta mo oli bin go blong smasem gud olgeta taem we oli joenem ol man blong Leman.

25 Yes, oli no bin save letem se ol brata blong olgeta bae oli glad long blad blong ol man blong Nifae, sapos i gat wan we i holem ol komanmen blong God, from promes blong Lod i bin olsem, sapos oli holem ol komanmen blong hem bae oli kam antap gud long graon.



## JAPTA 49

*Ol man blong Leman we oli stap kam blong mekem faet oli no save tekem ol strong bigtaon blong Amonaeha mo Noa—Amalekaea i tok agensem God mo hem i promises blong dring blad blong Moronae—Hileman mo ol brata blong hem i gohed blong mekem Jos i kam strong. Raonabaot 72 yia bifo Kraes i bon.*

Mo i bin hapen long namba leven manis blong namba naentin yia, long nambaten dei blong manis, ol man blong Nifae oli luk ol ami blong ol man blong Leman i stap kam long graon blong Amonaeha.

2 Mo luk, oli bin wokem bigtaon ia bakegen, mo Moronae i bin putum wan ami long ol boda blong bigtaon, mo oli bin hipimap graon raonabaot blong blokem ol ara mo ol ston blong ol man blong Leman; from luk, oli bin faet wetem ol ston mo ol ara.

3 Luk, mi bin talem se bigtaon blong Amonaeha oli bin wokem bakegen. Mi talem long yufala, yes, se oli bin wokem pat blong hem nomo bakegen; mo from ol man blong Leman i bin smasem gud hem wan taem from nogud fasin blong ol pipol, oli bin ting se bae i kam wan isi samting blong oli kasem bakegen.

4 Be luk, harem nogud blong olgeta i bin bigwan tumas; from luk, ol man blong Nifae i bin digim wan hip blong graon raonem olgeta, we i bin hae tumas blong mekem se ol man

blong Leman i no bin save sakem ol ston blong olgeta mo ol ara blong olgeta long olgeta blong oli save wok, mo tu oli no bin save kam long olgeta, be oli save kam insaed long get nomo.

5 Nao long taem ia ol jif kapten blong ol man blong Leman i bin sapraes tumas, from waes tingting blong ol man blong Nifae blong mekem rere ol sefles blong olgeta.

6 Nao ol lida blong ol man blong Leman i bin ting se, from bigfala namba blong olgeta, yes, oli bin ting se bae janis blong olgeta blong kam long olgeta olsem we oli bin mekem bifo; yes, mo tu oli bin mekem rere olgeta wetem ol sil, mo wetem ol plet blong blokem jes blong olgeta; mo tu oli bin mekem rere olgeta wetem ol klos we oli bin mekem wetem ol skin, yes, ol klos we oli tik tumas blong blokem nedek bodi blong olgeta.

7 Mo from we olsem ia nao oli bin mekem rere, oli bin ting se bae oli winim olgeta isi nomo mo mekem ol brata blong olgeta i go long yok blong slef, o kilim ded mo kilim ded olgeta long wan rabis fasin folem glad blong olgeta.

8 Be luk, long sapraes blong olgeta we i bigwan olgeta, oli bin rere long olgeta, long wan fasin we ol pikinini blong Lihae i no bin gat save long hem. Nao oli bin rere long ol man blong Leman, blong faet folem ol fasin blong oda blong Moronae.

9 Mo i bin hapen se ol man

blong Lemana o ol man blong Amalekaea, i bin sapraes tumas long fasin blong mekem rere blong faet blong olgeta.

10 Nao, sapos king Amalekaea i bin kam daon long graon blong Nifae, long fored blong ami blong hem, maet bae hem i bin mekem ol man blong Lemana blong atakem ol man blong Nifae long bigtaon blong Amonaeha; from luk, hem i no bin wari long blad blong ol pipol blong hem.

11 Be luk, Amalekaea i no bin kam daon hemwan blong faet. Mo luk, ol jif kapten blong hem i bin fraet blong atakem ol man blong Nifae long bigtaon blong Amonaeha, from Moronae i bin jenisim ol fasin blong wok wetem ol man blong Nifae, inaf blong mekem se ol man blong Lemana i harem nogud long ol ples blong haed blong olgeta mo oli no bin save kam agensem olgeta.

12 Taswe oli bin gobak long ples we i no gat man long hem, mo oli bin tekem kamp blong olgeta mo bin maj i go long graon blong Noa, from oli bin ting se ples ia nao i nekis ples we i gud blong oli go agensem ol man blong Nifae.

13 From we oli no bin save se Moronae i bin mekem strong, o hem i bin bildim ol strong haos blong oli sef long hem, blong evri bigtaon long evri graon raonabaot; taswe, oli bin maj i go fored long graon blong Noa wetem wan strongfala tingting; yes, ol jif kapten blong olgeta i bin kam fored mo mekem wan

promes se bae oli smasem gud ol man blong bigtaon ia.

14 Be luk, long sapraes blong olgeta, bigtaon blong Noa, we bifo i bin wan ples we i no strong, we naoia, folem ol wei blong Moronae, i bin kam strong, yes, i go bitim paoa blong bigtaon blong Amonaeha.

15 Mo nao luk, hemia i bin waes tingting long Moronae; from hem i bin ting se bae oli fraet long bigtaon blong Amonaeha; mo olsem we bigtaon blong Noa i bin long bifo pat blong graon we i no strong tumas, taswe bae oli maj i go long ples ia blong faet; mo olsem ia nao i bin folem ol tingting blong hem.

16 Mo luk, Moronae i bin jusum Lihae blong kam jif kapten ova long ol man blong bigtaon ia; mo hem i sem Lihae we i bin faet wetem ol man blong Lemana long vale long is blong reva Saedon.

17 Mo nao luk i bin hapen se, taem we ol man blong Lemana i bin faenemaot se Lihae i gat paoa blong bigtaon ia oli bin harem nogud bakegen, from oli bin fraet tumas long Lihae, be ol jif kapten blong olgeta i bin promes wetem wan tru promes blong atakem bigtaon ia; taswe, oli bin kam wetem ol ami blong olgeta.

18 Nao luk, ol man blong Lemana i no bin save kam insaed long ol strong haos blong sef, be oli mas kam insaed long get nomo, from hip graon we oli bin wokem i hae tumas, mo dip blong hol ia we oli bin

digim raonem i bin dip, be long get nomo i no olsem.

19 Mo olsem ia nao ol man blong Nifae i bin rere blong smasem gud olgeta we bae oli traem blong klaem antap blong kam insaed long haos blong ami long eni narafala rod, long fasin blong sakem ol ston mo ol ara long olgeta.

20 Olsem ia nao oli bin rere, yes, wan grup blong ol man blong olgeta we oli strong olgeta, wetem ol naef blong faet blong olgeta mo ol sling blong olgeta, blong kilim daon olgeta we bae oli traem blong kam insaed long ples we i sef tru long get; mo olsem ia nao oli bin rere blong lukaotem gud olgeta agensem ol man blong Leman.

21 Mo i bin hapen se ol kapten blong ol man blong Leman i bin tekem ol ami blong olgeta i kam long fored blong get, mo oli bin stat blong faet wetem ol man Nifae, blong go insaed long sefples; be luk, oli bin pusum olgeta i gobak plante taem, mekem se oli bin kilim ded olgeta wetem wan bigfala ded.

22 Nao taem we oli bin faenemaot se oli no save kasem paoa ova long ol man blong Nifae long rod blong get, oli bin stat blong digim ol wol blong graon blong olgeta blong mekem se oli save kasem wan rod blong go long ol ami blong olgeta, blong oli gat sem janis blong faet; be luk, long ol traem ia, oli bin smasem gud olgeta wetem ol ston mo ol ara we oli bin sakem long olgeta; mo long

ples blong fulumap ol hol blong olgeta wetem graon, oli bin fulap kasem wan mak wetem ol ded bodi blong olgeta mo ol bodi blong olgeta we i bin kasem kil.

23 Mo olsem ia nao ol man blong Nifae i bin gat evri paoa ova long ol enemi blong olgeta; mo olsem ia nao ol man blong Leman i bin traem blong smasem gud ol man blong Nifae kasem taem we oli bin kilim ded evri jif kapten blong olgeta; yes, moa bitim wan taosen long ol man blong Leman i bin kasem ded; sem taem, long narasaed, i no bin gat wan sol blong ol man blong Nifae we oli bin kasem ded.

24 I bin gat raonabaot fifti we oli bin kasem kil, we ol ara blong ol man blong Leman i bin kasem olgeta tru long rod blong get, be oli bin blokem ol bodi blong olgeta wetem ol sil blong olgeta, mo ol plet blong kavremap jes blong olgeta, mo ol hat blong faet blong olgeta, mekem se ol kil blong olgeta i bin stap long ol leg blong olgeta, plante long ol kil ia i bin nogud tumas.

25 Mo i bin hapen se, taem we ol man blong Leman i bin luk se oli bin kilim ded evri jif kapten blong olgeta, oli bin ronwe i go long ples we i no gat man long hem. Mo i bin hapen se, oli bin gobak long graon blong Nifae, blong talemaot long king blong olgeta, Amalekaea, we hem i bin bon olsem wan man blong Nifae, long saed blong bigfala lus blong olgeta.

26 Mo i bin hapen se hem i bin kros tumas long ol pipol blong hem, from hem i no bin kasem tingting blong hem long ol man blong Nifae; hem i no bin mekem olgeta i go long yok blong slef slef.

27 Yes, hem i bin kros tumas, mo hem i bin toktok nogud long God, mo tu long Moronae, hem i bin mekem wan tru promes blong dring blad blong hem; mo hemia from we Moronae i bin holem ol komanmen blong God blong mekem rere fasin blong lukaotem gud ol pipol blong hem.

28 Mo i bin hapen se long narasaed, ol pipol blong Nifae i bin talem tangkyu long Lod, God blong olgeta, from paoa blong hem we i bigwan tumas blong mekem olgeta i kam fri long ol enemy blong olgeta.

29 Mo olsem ia nao namba naentin yia blong rul blong ol jaj ova long ol pipol blong Nifae i bin en.

30 Yes, mo i bin gat pis oltaem long medel blong olgeta, mo i bin gat bigfala sakses long jos from fasin blong obei mo lukaot gud blong olgeta we oli bin gat long toktok blong God, we oli bin harem long Hileman, mo Siblon, mo Korianton, mo Amon mo ol brata blong hem, yes, mo tru long olgeta evriwan we oli bin oden wetem tabu oda blong God, we oli bin baptaes blong sakem sin, mo oli bin sendem olgeta fored blong prij long medel blong ol pipol.

## JAPTA 50

*Moronae i mekem ol graon blong ol man blong Nifae i kam strong— Oli wokem plante niu bigtaon— Ol faet mo fasin blong smasem gud i hapen long ol man blong Nifae long ol dei blong nogud fasin mo rabis sin blong olgeta— Tiankum i winim Morianton mo ol man blong hem we oli bin pulaot long ol man blong Nifae—Nifaeha i ded, mo boe blong hem, Pahoran, i tekem jea blong jajmen. Roanabaot 72–67 yia bifo Kraes i bon.*

Mo nao i bin hapen se Moronae i no bin stop blong mekem rere blong faet, o blong lukaotem gud ol pipol blong hem agensem ol man blong Leman; from we hem i bin mekem se ol ami blong hem bae i stat long stat blong namba twenti yia blong rul blong ol jaj, blong bae oli stat blong digim ol hip blong graon raonabaot ol bigtaon, truaot evri graon we i blong ol man blong Nifae.

2 Mo antap long ol hil blong graon ia hem i bin mekem se bae i gat ol timba, yes, ol wok blong timba we oli hae kasem longfala blong wan man, raonabaot ol bigtaon.

3 Mo hem i bin mekem se long ol wok blong timba ia bae i gat ol wud we i sap long en blong olgeta we i putum raonem ol wok we oli bin mekem long timba; mo oli bin strong mo hae.

4 Mo hem i bin mekem se oli bildim ol taoa, blong oli bin save lukluk daon long ol sap

wud ia, mo hem i bin mekem se i gat ol sefples antap long ol taoa ia, blong mekem se ol ston mo ol ara blong ol man blong Leman bae oli no givim kil long olgeta.

5 Mo oli bin mekem rere ol taoa ia blong oli save sakem ol ston long antap blong hem, folem we oli wantem mo paoa blong olgeta, mo kilim ded eni man we bae i traem blong kam klosap long ol wol blong bigtaon.

6 Olsem ia nao Moronae i bin mekem rere ol bigtaon blong kam strong agensem ol enemi blong olgeta we bae oli kam, raonem evri bigtaon long evri graon.

7 Mo i bin hapen se Moronae i bin mekem se ol ami blong hem bae i go fored long is blong ples we i no gat man long hem; yes, mo oli bin go fored mo oli bin ronemaot ol man blong Leman we i bin stap long is blong ples we i no gat man long hem i go long ol graon blong olgeta, we oli stap long saot blong graon blong Sarahemla.

8 Mo graon blong Nifae i bin go long wan stret rod stat long solwota blong is kasem wes.

9 Mo i bin hapen se taem we Moronae i bin ronemaot ol man blong Leman long is blong ples we i no gat man long hem, we i bin stap long not blong ol graon we oli blong ol man blong Leman, hem i bin mekem se ol pipol we i bin stap long graon blong Sarahemla mo long graon raonabaot i mas go fored long is long ples we i no gat

man long hem, go kasem ol boda we oli stap long so blong solwota, mo stap long graon blong olgeta.

10 Mo tu hem i bin putum ol ami long saot, long ol boda blong ol ples we oli blong olgeta, mo hem i bin mekem se oli wokem ol ples blong olgeta i kam strong, blong mekem se ol ami mo ol pipol blong olgeta i save sevem olgeta, long ol han blong ol enemi blong olgeta.

11 Mo olsem ia nao hem i bin katemaot ol strong ples blong ol man blong Leman long is blong ples we i no gat man long hem, yes, mo tu long wes, hem i bin mekem laen bitwin ol man blong Nifae mo ol man blong Leman i kam strong, bitwin graon blong Sarahemla mo graon blong Nifae, stat long solwota blong wes, go kasem hed blong reva Saedon—ol man blong Nifae i bin holem ol graon we i stap long not, yes, we i ol graon we i bin stap long not blong graon blong Plante, folem wanem we oli bin wantem.

12 Olsem ia nao Moronae, wetem ol ami blong hem, we i bin kam antap evri dei from tras blong fasin blong lukaotem gud we ol wok blong hem i bin mekem i kam long olgeta, oli bin lukaotem blong katemaot strong mo paoa blong ol man blong Leman aot long ol graon we i blong ol man blong Nifae, blong mekem se oli no save gat paoa long ol graon blong ol man blong Nifae.

13 Mo i bin hapen se ol man blong Nifae i bin statem fande-

sen blong wan bigtaon, mo oli bin singaotem nem blong bigtaon ia Moronae; mo i bin stap klosap long solwota blong is; mo i bin stap long saot klosap long laen blong ol graon we i blong ol man blong Leman.

14 Mo tu oli bin statem wan fandesen blong wan bigtaon bitwin bigtaon blong Moronae mo bigtaon blong Eron, we i joen wetem ol boda blong Eron mo Moronae; mo oli bin singaotem nem blong bigtaon ia, o graon ia, Nifae.

15 Mo tu oli bin stat long sem yia ia blong wokem plante bigtaon long not, wan bigtaon we oli wokem long wan defren fasin we oli bin singaotem Lihae, we i bin stap long not klosap long ol boda blong so blong solwota.

16 Mo olsem ia nao namba twenti yia i bin en.

17 Mo long ol saxes ia ol pipol blong Nifae i bin stap long stat blong namba twenti mo wan yia blong ol rul blong jaj ova long ol pipol blong Nifae.

18 Mo oli bin kam antap gud plante, mo oli bin kam rij tumas; yes, mo oli bin kam plante mo oli bin wok strong long graon.

19 Mo olsem ia nao yumi luk we ol wok blong Lod oli gat sore mo oli stret, blong hem i mekem ol toktok blong hem i hapen long ol pikinini blong ol man; yes, yumi save luk we ol toktok blong hem i hapen, long taem naoia, we hem i bin talem long Lihae, i talem:

20 Yu mo ol pikinini blong yu, yufala i kasem blesing; mo

bae oli kasem blesing, i semak olsem we bae oli holem ol komanmen blong mi bae oli kam antap gud long graon. Be tingbaot, i semak olsem we bae oli no holem ol komanmen blong mi bae oli katemaot olgeta long fes blong Lod.

21 Mo yumi luk we ol promes ia i bin hapen tru long ol pipol blong Nifae; from we i bin ol kros mo ol rao blong olgeta, yes, ol fasin blong kilim man i ded blong olgeta, mo ol fasin blong stil long taem blong faet blong olgeta, ol fasin blong wosipim aedol blong olgeta, ol fasin blong stap slip olbaot, mo ol rabis fasin blong olgeta, we i bin stap long medel blong olgeta, we i bin mekem long olgeta ol faet blong olgeta mo ol fasin blong oli smasem gud olgeta.

22 Mo olgeta we oli bin holem taet fet blong holem ol komanmen blong Lod, Lod i bin mekem olgeta i kam fri long evri taem, taem we ol taosen long ol nogud brata blong olgeta Lod i bin mekem olgeta i stap long fasin blong slef, o blong ded wetem naef blong faet, o blong kam slak from we oli lusum bilif, mo oli miks wetem ol man blong Leman.

23 Be luk i neva bin gat wan taem we i gat moa glad long medel blong ol pipol blong Nifae, stat long ol dei blong Nifae, we i bitim glad ia long ol dei blong Moronae, yes, go kasem taem ia, long namba twenti mo wan yia blong rul blong ol jaj.

24 Mo i bin hapen se, taem we

namba twenti mo tu yia blong rul blong ol jaj hem tu i bin en wetem pis; yes, mo tu namba twenti mo tri ia.

25 Mo i bin hapen se, long stat blong twenti mo fo yia blong rul blong ol jaj, i sud bin gat pis long medel blong ol pipol blong Nifae sapos i no bin gat wan rao we i bin hapen long medel blong olgeta long saed blong graon blong Lihae, mo graon blong Morianton, we i bin joen wetem ol boda blong graon blong Lihae; tufala tugeta i bin stap klosap long so blong solwota.

26 From luk, ol pipol we i bin holem long graon blong Morianton, oli bin klem from wan pis graon blong Lihae; taswe i bin gat wan strong rao bitwin olgeta, inaf blong mekem se ol man Morianton i bin tekem ol tul blong faet blong go agensem ol brata blong olgeta, mo oli bin tingting strong blong kilim ded olgeta wetem naef blong faet.

27 Be luk, ol pipol we i bin holem graon blong Lihae, i bin ronwe i go long kamp blong Moronae, mo oli bin askem hem blong helpem olgeta; from luk oli no rong.

28 Mo i bin hapen se taem we ol pipol blong Morianton, we wan man we nem blong hem i Morianton i bin lidim olgeta, oli bin faenemaot se ol pipol blong Lihae i bin ronwe i go long kamp blong Moronae, oli bin fraet tumas se ami blong Moronae bae i kam long olgeta mo smasem gud olgeta.

29 Taswe, Morianton i bin

putum long ol hat blong olgeta blong se oli mas ronwe i go long graon we i stap long not we i bin gat ol bigfala wota long hem, mo tekem graon we i stap long not.

30 Mo luk, plan ia blong olgeta i bin save hapen, (we i bin save kam wan stamba tingting blong harem sore) be luk, from we Morianton i wan man we i bin gat plante filing, taswe hem i bin kros long wan long olgeta haosgel blong hem, mo hem i bin atakem mo faetem hem plante.

31 Mo i bin hapen se, woman ia i bin ronwe, mo i bin go long kamp blong Moronae, mo hem i talemaot evri samting long saed blong samting ia, mo tu long saed blong ol tingting blong olgeta blong ronwe i go long graon blong not.

32 Nao luk, ol pipol we i bin stap long graon blong Plante, o long narafala toktok Moronae, i bin fraet se bae oli folem ol toktok blong Morianton mo kam wan wetem ol man blong hem, mo olsem ia nao bae hem i tekem ol pat blong graon, we bae i kam wan fandesen blong ol samting we oli nogud tumas bae i hapen long medel blong ol pipol blong Nifae, yes, we ol samting ia bae i kam blong smasem gud fasin blong fridom blong olgeta.

33 Taswe Moronae i bin sendem wan ami, wetem kamp blong olgeta, blong kasem ol man blong Morianton, blong stopem olgeta blong oli no go long graon blong not.

34 Mo i bin hapen se, oli no bin kasem olgeta kasem taem we oli bin kam long ol boda blong graon Emti; mo long ples ia oli bin kasem olgeta, long smolfala graon we i go long saed blong solwota i go long graon blong not, yes, long saed blong solwota, long wes mo long is.

35 Mo i bin hapen se ami we Moronae i bin sendem, we wan man we nem blong hem i Tiankum i bin lidim, oli bin mitim ol pipol blong Morianton; mo ol pipol blong Morianton i bin stronghed tumas, (from we Morianton i bin tijim olgeta wetem ol nogud fasin blong hem mo ol swit toktok blong hem) mekem se wan faet i bin stat bitwin olgeta, long faet ia Tiankum i bin kilim ded Morianton mo i bin winim ami blong hem, mo i bin tekem olgeta oli kam ol prisena, mo oli bin gobak long kamp blong Moronae. Mo olsem ia nao twenti mo fo yia blong rul blong ol jaj ova long ol pipol blong Nifae i bin en.

36 Mo olsem ia nao ol pipol blong Morianton i bin kambak. Mo afta we oli bin mekem kavenan blong olgeta blong kipim pis, oli bin putum bak olgeta long graon blong Morianton, mo wan fasin blong kam wan i bin hapen bitwin olgeta mo ol pipol blong Lihae; mo tu oli bin putum bak ol man blong Lihae long ol graon blong olgeta.

37 Mo i bin hapen se, long sem yia ia pis i bin stap bakegen

long ol pipol blong Nifae, we Nifaeaha, nambatu jif jaj, i bin ded, mo hem i bin tekem jea blong jajmen wetem fasin we i stret gud long fored blong God.

38 Be, hem i no bin letem Alma blong holem ol histri mo ol samting ia we Alma mo ol bubu blong hem i bin tekem olsem samting we i tabu tumas; taswe Alma i bin givim olgeta long boe blong hem Hileman.

39 Luk, i bin hapen se voes blong ol pipol i jusum boe blong Nifaeaha blong fulumap jea blong jajmen, long ples blong papa blong hem; yes, voes blong ol pipol i bin jusum hem blong kam jif jaj mo gavena ova long ol pipol, wetem wan tru promes mo tabu odinens blong jajem stret, mo blong kipim pis mo fridom blong ol pipol, mo blong letem long olgeta ol tabu raet blong wosipim Lod, God blong olgeta, yes, blong sapotem mo holem taet stamba tingting blong God long ol dei blong hem, mo tekem ol nogud man blong kasem jastis folem nogud fasin blong olgeta.

40 Nao luk, nem blong hem i Pahoran. Mo Pahoran i bin fulumap jea blong papa blong hem, mo hem i bin statem rul blong hem long en blong twenti mo fo yia, ova long ol pipol blong Nifae.

---

### JAPTA 51

---

*Ol king-man i lukaotem blong jenisim loa mo putumap wan king — Pahoran mo ol friman, voes*



*blong ol pipol i sapotem olgeta—  
Moronae i fosem ol king-man  
blong lukaotem gud kantri blong  
olgeta o sapos no bae oli ded—  
Almalekaea mo ol man blong  
Leman i kasem plante bigtaon we  
oli strong—Tiankum i faet agens-  
em fasin blong ol ami blong ol  
man blong Leman blong kam insaed  
mo atakem wan kantri, mo hem i  
kilim ded Amalekaea insaed long  
tenet blong hem. Raonabaot 67-66  
yia bifo Kraes i bon.*

Mo nao i bin hapen long stat  
blong twenti mo faef yia blong  
rul blong ol jaj ova long ol pipol  
blong Nifae, afta we oli bin  
stanemap pis bitwin ol pipol  
blong Lihae mo ol pipol blong  
Morianon long saed blong ol  
graon blong olgeta mo afta we  
oli bin statem twenti mo faef  
yia long pis;

2 Be, oli no bin holem taet  
longtaem pis we i stap long  
evri ples long graon, from we  
wan rao i bin stat long medel  
blong ol pipol long saed blong  
jif jaj Pahoran; from luk, i bin  
gat sam long ol pipol we oli bin  
wantem se wanwan pat blong  
loa i mas jenis.

3 Be luk, Pahoran, bae i no  
jenisim o letem se loa bae i  
jenis; taswe, hem i no bin lisen  
long olgeta ia we oli bin send-  
em ol tingting blong olgeta  
long ol leta blong olgeta we  
oli bin raetem long saed blong  
jenisim loa.

4 Taswe, olgeta we oli bin  
wantem se loa i mas jenis i bin  
kros long hem, mo oli bin want-  
em se bae hem i nomo stap

olsem jif jaj long graon; taswe  
wan strong rao i bin hapen  
long saed blong samting ia, be  
blad i no bin ron.

5 Mo i bin hapen se olgeta we  
oli bin wantem se Pahoran i  
mas aot long wok blong jea  
blong jajmen, oli bin singaotem  
olgeta ol king-man, from oli bin  
wantem se loa i mas jenis long  
wan fasin blong sakemaot fri  
gavman, mo blong stanemap  
wan king ova long graon.

6 Mo olgeta we oli bin wantem  
se Pahoran i mas stap olsem jif  
jaj ova long graon i bin putum  
long olgeta nem blong ol friman;  
mo olsem ia nao fasin blong  
split i bin hapen long medel  
blong olgeta, from we ol friman  
i bin promes o mekem kavenan  
blong holem taet ol raet mo ol  
janis blong fasin blong wosipim  
God blong olgeta tru wan fri  
gavman.

7 Mo i bin hapen se rao ia  
blong olgeta oli bin stretem  
wetem voes blong ol pipol. Mo  
i bin hapen se voes blong ol  
pipol i bin sapotem ol friman,  
mo Pahoran i bin holem taet jea  
blong jajmen, we samting ia i  
bin givim fulap glad long ol  
brata blong Pahoran, mo tu  
plante long ol pipol blong fri-  
dom, we olgeta ia tu i mekem ol  
king-man oli stap kwaet, blong  
mekem se oli no save agensem  
be i mas holem taet stamba  
tingting blong fridom.

8 Nao olgeta we oli bin sapot-  
em ol king, hemia olgeta we oli  
bon long ol haeman, mo oli bin  
lukaotem blong kam ol king;  
mo olgeta we oli bin lukaotem

blong kasem paoa mo raet ova long ol pipol i bin sapotem olgeta.

9 Be luk, hemia i bin wan taem we i nogud tumas blong ol rao olsem i hapen long medel blong ol pipol blong Nifae; from luk, Amalekaea i bin tanem bakegen ol hat blong ol man blong Leman agensem ol man blong Nifae, mo hem i bin tekem ol soldia long evri ples long graon blong hem oli kam tugeta, mo mekem olgeta oli karem ol tul blong faet wetem olgeta, mo mekem rere blong faet wetem ol fasin blong lukaot gud, from we hem i bin promes blong dring blad blong Moronae.

10 Be luk, bae yumi luk se promes blong hem we hem i bin mekem hem i bin hariap nomo long hem; be, hem i bin mekem rere hemwan mo ol ami blong hem blong kam blong faet agensem ol man blong Nifae.

11 Nao ol ami blong hem i no bin plante tumas olsem we oli bin long bifo, from we plante taosen long olgeta ol man blong Nifae i bin kilim ded olgeta; be i nomata long bigfala lus blong olgeta, Amalekaea i bin karem i kam tugeta wan gudfala mo bigfala ami, inaf we i mekem se hem i no bin fraet blong kam daon long graon blong Sarahemla.

12 Yes, tu Amalekaea, hem wan i bin kam daon, hem i bin lidim ol man blong Leman. Mo hem i long namba twenti mo faef yia blong rul blong ol jaj; mo i bin hapen long sem taem we oli bin stat blong stretem

ol samting blong ol rao blong olgeta long saed blong jif jaj blong olgeta, Pahoran.

13 Mo i bin hapen se taem we ol man we oli bin singaotem olgeta ol king-man i bin harem se ol man blong Leman i stap kam daon blong faet agensem olgeta, oli bin glad insaed long ol hat blong olgeta; mo oli no bin wantem blong tekem ol tul blong faet, from we oli bin kros tumas long jif jaj, mo tu wetem ol man fridom, mekem se bae oli no tekem ol tul blong faet blong lukaotem gud long kantri blong olgeta.

14 Mo i bin hapen se taem we Moronae i bin luk samting ia, mo tu bin luk we ol man blong Leman i stap kam long ol boda blong graon, hem i bin kros tumas from stronghed blong ol pipol ia we hem i bin wok wetem plante hadwok oltaem blong sevem olgeta; yes, hem i bin kros tumas; sol blong hem i bin fulap long kros agensem olgeta.

15 Mo i bin hapen se, hem i bin sendem wan toktok blong askem, we i gat tingting blong ol pipol long hem, i go long gavena blong graon, hem i wantem se gavena i ridim samting ia, mo givim long hem (Moronae) paoa blong fosem ol pipol ia we oli bin pulaot long ol man blong Nifae, blong oli lukaotem gud kantri blong olgeta o bae oli ded.

16 From i bin fasfala tingting blong hem blong putum wan en long ol rao mo fasin blong pulaot olsem ia long medel

blong ol pipol; from luk, hemia i bin bifo wan stamba tingting blong ol fasin blong smasem gud blong olgeta. Mo i bin hapen se gavena i bin agri fol-em tingting blong ol pipol.

17 Mo i bin hapen se Moronae i bin givim oda se ami blong hem i go agensem ol king-man ia, blong pulum daon flas blong olgeta mo fasin blong olgeta se olgeta oli moa gud long ol narafala, mo kilim ded olgeta, o bae oli mas tekem ol tul blong faet mo sapotem stamba tingting blong fridom.

18 Mo i bin hapen se ol ami i bin maj fored agensem olgeta; mo oli bin pulum daon flas blong olgeta mo fasin blong haeman blong olgeta, inaf blong mekem se oli bin leftemap ol tul blong faet agensem ol man blong Moronae, ol man blong Moronae oli kilim ded olgeta mo oli bin foldaon i go long graon.

19 Mo i bin hapen se, i bin gat fo taosen long olgeta we oli bin pulaot long ol man blong Nifae we oli bin kilim ded olgeta wetem naef blong faet; mo olgeta blong ol lida blong olgeta we oli no bin kasem ded long faet, oli bin putum olgeta long kalabus, from we i no bin gat taem blong ol kot blong olgeta long taem ia.

20 Mo olgeta we oli laef we oli bin pulaot long ol man blong Nifae, oli no bin kilim ded olgeta wetem naef blong faet, be oli mekem olgeta blong oli stap wetem flag blong fridom,

mo oli bin fosem olgeta blong leftemap taetol blong fridom long ol taoa blong olgeta, mo long ol bigtaon blong olgeta, mo blong leftemap ol tul blong faet blong lukaotem gud kantri blong olgeta.

21 Mo olsem ia nao Moronae i bin putum wan en long olgeta king-man ia, blong mekem se i no bin gat eni wan long olgeta we oli singaotem hem king-man; mo olsem ia nao hem i putum wan en long fasin blong stronghed mo flas blong ol pipol ia we oli bin klem se olgeta oli haeman; be oli bin putum daon olgeta blong mekem se tingting blong olgeta i stap daon olsem ol brata blong olgeta, mo blong faet strong from fridom blong olgeta long slef.

22 Luk, i bin hapen se, taem we Moronae i stap mekem olsem ia nao blong stopem ol faet mo ol rao long medel blong ol pipol blong hem, mo mekem olgeta blong oli gat pis mo fasin blong kamgud, mo mekem ol plan blong mekem rere blong faet agensem ol man blong Lemana, luk, ol man blong Lemana i bin kam insaed long graon blong Moronae, we i bin stap long ol boda klosap long so blong solwota.

23 Mo i bin hapen se ol man blong Nifae i no bin strong inaf long bigtaon blong Moronae; taswe Amalekaea i bin ronem olgeta, mo hem i bin kilim ded plante. Mo i bin hapen se, Amalekaea i bin tekem bigtaon, yes, hem i bin tekem ol strong bigtaon blong olgeta.

24 Mo olgeta we oli bin ronwe aot long bigtaon blong Moronae i bin kam long bigtaon blong Nifaeha; mo tu ol pipol blong bigtaon blong Lihae i bin kam tugeta, mo oli bin mekem ol wok blong kam rere mo oli bin rere blong mitim ol man blong Leman blong faet.

25 Be i bin hapen se, Amalekaea i no bin wantem letem ol man blong Leman blong go agensem bigtaon blong Nifaeha blong faet, be hem i bin holem olgeta daon klosap long so blong solwota, hem i bin livim ol man long evri bigtaon blong holem taet mo lukaotem gud blong hem.

26 Mo olsem ia nao hem i bin gohed, hem i tekem plante bigtaon, bigtaon blong Nifaeha, mo bigtaon blong Lihae, mo bigtaon blong Morianton, mo bigtaon blong Omna, mo bigtaon blong Gid, mo bigtaon blong Myulek, olgeta ia oli bin stap long ol is boda klosap long so blong solwota.

27 Mo olsem ia nao ol man blong Leman i bin kasem, tru long ol trik blong Amalekaea, plante bigtaon wetem ol ami blong olgeta we i plante tumas blong save kaontem, olgeta bigtaon ia oli bin wokem strong, folem fasin blong ol wok blong mekem ol bigtaon i kam strong blong Moronae; olgeta bigtaon ia oli bin kam ol strong sapot blong ol man blong Leman.

28 Mo i bin hapen se oli bin maj i go long ol boda blong graon Plante, oli bin ronemaot ol man blong Nifae long fored

blong olgeta mo oli bin kilim ded plante.

29 Be i hapen se, oli bin mitim Tiankum, man we i bin kilim ded Morianton mo i bin go long fored blong ol man blong hem long rod blong hem.

30 Mo i bin hapen se, hem i bin go long fored blong Amalekaea tu, taem we hem i stap maj i go fored wetem plante namba blong ami blong hem blong hem i save tekem graon Plante, mo tu graon we i stap long not.

31 Be luk hem i bin mitim wan taem blong harem nogud taem we Tiankum mo ol man blong hem oli agensem hem, from oli ol strong man blong faet; from evri man blong Tiankum i bin bitim ol man blong Leman long paoa blong olgeta mo long gudhan blong faet blong olgeta, inaf blong mekem se oli bin kasem janis ova long ol man blong Leman.

32 Mo i bin hapen se oli bin atakem olgeta, inaf blong mekem se oli bin kilim ded olgeta go kasem taem we hem i tudak. Mo i bin hapen se Tiankum mo ol man blong hem i bin pulum ol tenet blong olgeta long ol boda blong graon Plante; mo Amalekaea i bin pulum ol tenet blong hem long ol boda long sanbij klosap long so blong solwota, mo folem fasin ia oli bin ronemaot olgeta.

33 Mo i bin hapen se taem we naet i bin kam, Tiankum mo wokman blong hem i bin go antap sloslo mo tufala i bin go aot long naet, mo tufala i bin go insaed long kamp blong Ama-

lekaea; mo luk, slip i bin kilim olgeta from we oli bin taed tumas, we samting ia i bin hapen from ol wok mo hotsan blong dei.

34 Mo i bin hapen se Tiankum i bin muv sloslo i go long sikret insaed long tenet blong king, mo i bin putum wan spia long hat blong king; mo hem i bin mekem ded blong king i hapen kwik taem nomo mekem se hem i no bin wekemap ol wokman blong hem.

35 Mo hem i bin gobak bak-egen long sikret long kam blong hem, mo luk, ol man blong hem i bin stap slip, mo hem i bin wekemap olgeta mo bin talemaot long olgeta evri samting we hem i bin mekem.

36 Mo hem i bin mekem se ol ami blong hem bae oli stap rere nomo, from hem i fraet se ol man blong Leman oli bin wekap mo bae oli save kam atakem olgeta.

37 Mo olsem ia nao twenti mo faef yia blong rul blong ol jaj ova long ol pipol blong Nifae i bin en; mo olsem ia nao ol dei blong Amalekaea i bin en.

---

### JAPTA 52

---

*Amoron i tekem ples blong Amalekaea olsem king blong ol man blong Leman—Moronae, Tiankum, mo Lihae oli lidim ol man blong Nifae long wan faet we oli win agensem ol man blong Leman—Ol man blong Nifae i tekem bigtaon blong Myulek bakegen, mo ol man blong Nifae oli kilim ded Jakob we hem i*

*wan man blong Soram. Raonabaot 66–64 yia bifo Kraes i bon.*

Mo nao, i bin hapen se long twenti mo sikis yia blong rul blong ol jaj ova long ol pipol blong Nifae, luk, taem we ol man blong Leman i bin wekap long fas moning blong fas manis, luk, oli bin faenem se Amalekaea i bin ded long tenet blong hem; mo tu oli bin luk se Tiankum i rere blong mekem faet wetem olgeta long dei ia.

2 Mo nao, taem we ol man blong Leman i bin luk samting ia, oli bin fraet; mo oli bin lego plan blong olgeta blong maj i go long graon long not, mo oli bin tanem raon wetem evri ami blong olgeta i go long bigtaon blong Myulek, mo oli bin lukaotem fasin blong lukaot gud long strong bigtaon blong olgeta.

3 Mo i bin hapen se ol man blong Leman i bin jusum brata blong Amalekaea blong kam king ova long ol pipol; mo nem blong hem i Amoron; olsem ia nao king Amoron, brata blong king Amalekaea, oli bin jusum hem blong rul long ples blong brata blong hem.

4 Mo i bin hapen se hem i bin givim oda long ol pipol blong hem se oli mas holem taet ol bigtaon ia, we oli bin tekem tru long fasin blong blad i ron; from we oli no bin tekem eni bigtaon sapos oli no bin lusum plante blad.

5 Mo nao, Tiankum i bin luk se ol man blong Leman i bin tingting strong blong holem taet ol bigtaon ia we oli bin

tekem, mo ol ples blong graon we oli bin tekem blong olgeta; mo tu i bin luk bigfala namba blong olgeta, Tiankum i bin ting se i no nid blong hem i atakem olgeta long ol haos blong faet blong olgeta.

6 Be hem i bin putum ol man blong hem raonabaot, olsem we hem i stap mekem rere blong faet; yes, mo i tru we hem i stap mekem rere blong lukaotem gud hem bakegen long olgeta, hem i stanemap ol wol raonabaot mo mekem rere ol ples blong haed.

7 Mo i bin hapen se, hem i bin gohed olsem ia nao blong mekem rere blong faet kasem taem we Moronae i bin sendem wan bigfala namba blong ol man blong mekem ami blong hem i kam moa strong.

8 Mo tu Moronae i bin sendem ol oda long hem se hem i mas holem taet ol prisena we i bin foldaon long ol han blong hem; from olsem we ol man blong Leman i bin tekem plante prisena, blong hem i mas holem taet ol prisena blong ol man blong Leman olsem wan praes blong olgeta we ol man blong Leman i bin tekem.

9 Mo tu hem i bin sendem ol oda long hem blong hem i mas mekem graon Plante i kam strong, mo mekem strong smolfala graon we i bin go long graon long not, blong ol man blong Leman oli no tekem ples ia mo save gat paoa blong atakem olgeta long evri saed.

10 Mo Moronae i bin sendem long hem tu, hem i wantem

se hem i holem taet fet blong holem taet pat blong graon ia, mo se hem i lukaotem evri janis blong atakem ol man blong Leman long pat blong graon ia, wetem evri paoa we hem i gat, blong sapos i gat janis hem i save tekem bakegen, wetem trik o wetem ol narafala fasin, ol bigtaon ia we oli bin tekemaot long ol han blong olgeta; mo tu se bae hem i mekem ol bigtaon raonabaot oli kam strong mo gat paoa, we ol man blong Leman i no bin tekem olgeta.

11 Mo tu hem i bin talem long hem, bae mi kam long yu, be luk, ol man blong Leman i stap atakem mifala long ol boda blong graon klosap long solwota blong wes; mo luk, mi go agensem olgeta, taswe mi no save kam long yu.

12 Nao, king (Amoron) i bin aot long graon blong Sarahemla mo hem i bin talemaot long kwin long saed blong ded blong brata blong hem, mo hem i bin tekem wan bigfala namba blong ol man i kam tugeta, mo i bin maj fored agensem ol man blong Nifae long ol boda klosap long solwota blong wes.

13 Mo olsem ia nao hem i bin traem blong atakem ol man blong Nifae, mo blong tekemaot wan pat blong ol ami blong olgeta i go long pat blong graon ia, taem we hem i bin givim oda long olgeta we hem i bin livim blong stap long ol bigtaon we hem i bin tekem, blong oli mas atakem ol man blong Nifae tu long ol boda klosap long solwota blong is, mo blong oli mas

tekem ol graon blong olgeta wetem evri paoa we oli gat, folem paoa blong ol ami blong olgeta.

14 Mo olsem ia nao ol man blong Nifae i bin stap long ol denja laef long en blong twenti mo sikis yia blong rul blong ol jaj ova long ol pipol blong Nifae.

15 Be luk, i bin hapen long twenti mo seven yia blong rul blong ol jaj, we Tiankum, folem oda blong Moronae—we i bin stanemap ol ami blong lukaot gud ol saot mo wes boda blong graon, mo i bin statem maj blong hem blong go long graon Plante, blong hem i save helpem Tiankum wetem ol man blong hem blong tekem bakegen ol bigtaon we oli bin lusum—

16 Mo i bin hapen se Tiankum i bin kasem ol oda blong mekem wan atak long bigtaon blong Myulek, mo tekem bakegen sapos i save hapen.

17 Mo i bin hapen se Tiankum i bin mekem ol wok blong mekem rere blong mekem wan atak long bigtaon blong Myulek, mo bin maj fored wetem ami blong hem agensem ol man blong Lemana; be hem i bin luk se i no save hapen se hem i save winim olgeta, taem we oli stap long ol haos blong faet blong olgeta; taswe hem i bin lego ol plan blong hem mo hem i bin gobak bakegen long bigtaon blong Plante, blong wet long Moronae blong kam, blong hem i save kasem paoa long ami blong hem.

18 Mo i bin hapen se Moronae i bin kam wetem ami blong hem long graon blong Plante, long en blong twenti mo seven yia

blong rul blong ol jaj ova long ol pipol blong Nifae.

19 Mo long stat blong twenti mo eit yia, Moronae mo Tiankum mo plante long ol jif kapten i bin holem wan kaonsel blong faet—wanem oli mas mekem blong mekem ol man blong Lemana i kamaot agensem olgeta blong faet; o blong oli save long sam wei trikim olgeta blong kamaot long ol ples blong ol strong sapot blong olgeta, blong oli save tekem janis ova long olgeta mo tekem bakegen bigtaon blong Myulek.

20 Mo i bin hapen se oli bin sendem ol embasi long ol ami blong ol man blong Lemana, ol ami ia we i bin lukaot gud long bigtaon blong Myulek, long lida blong olgeta, we nem blong hem i Jakob, oli wantem se hem i kamaot wetem ol ami blong hem blong mitim olgeta long ol plantesen bitwin tufala bigtaon. Be luk, Jakob, we hem i wan man blong Sorama, i no bin wantem blong kamaot wetem ol ami blong hem blong mitim olgeta long ol graon we i flat.

21 Mo i bin hapen se Moronae, i no bin gat ol hop blong mitim olgeta long wan ples we ol ami blong tugeta saed, i save gat sem janis blong faet, taswe, hem i bin mekem wan narafala plan blong hem i save trikim ol man blong Lemana blong kamaot long ol ples blong strong sapot blong olgeta.

22 Taswe hem i bin mekem se Tiankum i mas tekem wan smol namba blong ol man mo maj i go daon klosap long so

blong solwota; mo Moronae mo ami blong hem, long naet, i bin maj long ples we i no gat man long hem, long wes blong bigtaon Myulek; mo olsem ia nao, long nekis dei, taem we ol gadman blong ol man blong Leman i bin faenem Tiankum, oli bin ron mo talemaot long Jakob, lida blong olgeta.

23 Mo i bin hapen se, ol ami blong ol man blong Leman i bin maj fored agensem Tiankum, long tingting se from ol namba blong olgeta bae oli winim Tiankum from smol namba blong hem. Mo taem we Tiankum i bin luk ol ami blong ol man blong Leman i stap kamaot agensem hem, hem i bin stat blong tanem raon blong go daon klosap long so blong solwota long not.

24 Mo i bin hapen se taem we ol man blong Leman i bin luk se hem i bin stat blong ronwe, oli bin harem gud mo oli bin stat blong folem olgeta wetem fulap paoa. Mo taem we Tiankum i stap olsem ia nao blong lidim ol man blong Leman we oli stap ronem olgeta blong nating nomo i go we, luk, Moronae i bin givim oda se wan pat blong ami blong hem we i bin stap wetem hem blong oli mas maj fored i go insaed long bigtaon mo tekem bigtaon ia.

25 Mo olsem ia nao oli bin mekem, mo oli bin kilim ded olgeta we i bin stap blong lukaot gud long bigtaon, yes, olgeta we oli no bin wantem blong lego ol tul blong faet blong olgeta.

26 Mo olsem ia nao Moronae i bin tekem bigtaon Myulek wetem wan pat blong ami blong hem, taem we hem i bin maj wetem ami blong hem we i bin stap go blong mitim ol man blong Leman taem we bae oli stop blong ronem Tiankum mo oli kambak bakegen.

27 Mo i bin hapen se ol man blong Leman i bin ronem Tiankum kasem taem we oli bin kam klosap long bigtaon Plante, mo afta oli bin mitim Lihae mo wan smol ami, we i bin stap blong lukaot gud long bigtaon Plante.

28 Mo nao luk, taem we ol jif kapten blong ol man blong Leman i bin luk Lihae wetem ami blong hem i stap kam agensem olgeta, oli bin ronwe wetem tingting we i fassas, oli fraet se maet oli no save kasem bigtaon Myulek bifo Lihae i save winim olgeta; from oli bin taed from maj blong olgeta, mo ol man blong Lihae oli bin fres.

29 Nao ol man blong Leman i no bin save se Moronae i bin stap biae long olgeta wetem ami blong hem; mo oli bin fraet nomo long Lihae mo ol man blong hem.

30 Nao Lihae i no bin wantem blong winim olgeta kasem taem we bae oli mitim Moronae mo ami blong hem.

31 Mo i bin hapen se bifo ol man blong Leman i bin tanem raon i gobak, ol man blong Nifae i bin raonem olgeta, ol man blong Moronae long wan saed, mo ol man blong Lihae long nara saed, olgeta evriwan



ia oli fres mo oli fulap wetem paoa; be ol man blong Leman i bin taed from longfala maj blong olgeta.

32 Mo Moronae i bin givim oda long ol man blong hem se oli mas atakem olgeta kasem taem we oli givim ol tul blong faet blong olgeta.

33 Mo i bin hapen se Jakob, from we hem i bin lida blong olgeta, hem i wan man blong Soram tu, mo from we hem i gat wan spirit blong no save lusum faet, hem i bin lidim ol man blong Leman i go fored blong faet wetem kros we i tumas agensem Moronae.

34 From we Moronae i bin stap long rod we ol man blong Leman i maj folem, taswe Jakob i bin gat strong tingting blong kilim ded olgeta, mo hem i bin katem rod blong hem blong go long bigtaon blong Myulek. Be luk, Moronae mo ol man blong hem i bin moa strong; taswe oli no bin givim janis long fored blong ol man blong Leman.

35 Mo i bin hapen se oli bin faet, long tufala saed tugeta, wetem kros we i tumas; mo i bin gat plante we oli bin kilim ded olgeta long tufala saed tugeta; yes, mo Moronae i bin kasem kil mo Jakob oli bin kilim hem i ded.

36 Mo Lihae i bin atakem olgeta long biae blong olgeta wetem plante kros wetem ol strong man blong hem, mekem se ol man blong Leman long biae i bin givim ol tul blong faet blong olgeta; mo ol nara-fala long olgeta, from we oli

bin gat tingting we i fasfas tumas, oli no bin save se bae oli go o bae oli faet.

37 Nao Moronae i bin luk we oli gat tingting we i fasfas, hem i bin talem long olgeta: Sapos yufala i karem ol tul blong faet blong yufala mo givim long mifala, luk bae mifala i stop blong mekem blad blong yufala i ron.

38 Mo i bin hapen se taem we ol man blong Leman i bin harem ol toktok ia, ol jif kapten blong olgeta, olgeta we oli no bin kilim ded olgeta, i bin kam fored mo oli bin sakem daon ol tul blong faet blong olgeta long ol leg blong Moronae, mo tu oli bin givim oda long ol man blong olgeta se oli mas mekem semak.

39 Be luk, i bin gat plante we oli no bin wantem; mo olgeta we oli no bin givim ol tul blong faet blong olgeta, oli bin tekem olgeta mo fasem olgeta, mo oli bin karemaot ol tul blong faet blong olgeta aot long olgeta, mo oli bin fosem olgeta blong maj wetem ol brata blong olgeta i go fored long graon Plante.

40 Mo nao namba blong ol prisena we oli bin tekem olgeta i bitim namba blong olgeta we oli bin kilim ded olgeta, yes, i bitim olgeta we oli bin kilim ded olgeta long tufala saed tugeta.

---

### JAPTA 53

---

*Ol man blong Nifae oli yusum ol man blong Leman prisena blong mekem bigtaon Plante i kam strong—Ol fasin blong pulaot*

*long ol man blong Nifae i givim ol win blong ol man blong Leman—Hileman i lidim ol tu taosen yang boe blong ol man blong Amon. Raonabaot 64-63 yia bifo Kraes i bon.*

Mo i bin hapen se oli bin putum ol gadman ova long ol man blong Leman we oli prisena, mo bin fosem olgeta blong go fored mo berem ol ded man blong olgeta, yes, mo tu ol ded man blong ol man blong Nifae we oli bin kilim ded; mo Moronae i putum ol man ova long olgeta blong gad long olgeta taem we bae oli mekem ol wok blong olgeta.

2 Mo Moronae i bin go long bigtaon blong Myulek wetem Lihae, mo hem i tekem wok blong lidim bigtaon mo bin givim hem long Lihae. Nao luk, Lihae ia i bin wan man we i bin stap wetem Moronae long moa pat blong ol faet blong hem; mo hem i bin wan man olsem Moronae, mo tufala i bin glad long fasin blong stap gud blong tufala; yes, tufala i bin laekem tufala, mo tu olgeta pipol blong Nifae i bin laekem tufala.

3 Mo i bin hapen se afta we ol man blong Leman i bin berem ol ded man blong olgeta mo tu ol ded man blong ol man blong Nifae, ol man blong Nifae i bin mekem olgeta i maj i gobak long graon blong Plante; mo Tiankum, folem ol oda blong Moronae, i bin mekem se oli mas stat blong mekem wok blong digim wan hol raonabaot

long graon, o long bigtaon, Plante.

4 Mo hem i bin mekem se oli mas bildim wan fanis wetem ol bigfala timba, long saed we i klosap long bigtaon long hol blong olgeta; mo oli bin sakem ol graon blong hol i go agensem fanis ia, we oli bildim wetem ol bigfala timba; mo olsem ia nao, oli bin mekem ol man blong Leman i wok kasem taem we oli bin raonem bigtaon Plante, raonabaot wetem wan strong wol blong bigfala timba mo graon, we i hae bigwan.

5 Mo bigtaon ia i bin kam wan strong sapot long oltaem afta, mo long bigtaon ia oli bin gad long ol man blong Leman we oli prisena, yes, tu insaed long wan wol we oli bin mekem olgeta blong wokem wetem ol han blong olgeta nomo. Nao taem ia Moronae i bin fosem hem blong hem mekem ol man blong Leman blong oli wok, from we i isi blong gad long olgeta taem we oli wok; mo hem i bin wantem blong mekem ol ami oli rere eni taem blong oli save atakem ol man blong Leman.

6 Mo i bin hapen se olsem ia nao Moronae i bin kasem wan win ova long wan long olgeta ami blong ol man blong Leman we i strong tumas, mo hem i bin tekem bigtaon blong Myulek, we i bin wan long ol strong sapot blong ol man blong Leman long graon blong Nifae; mo tu olsem ia nao hem i bin wokem wan strong sapot blong holem taet ol prisena blong hem.

7 Mo i bin hapen se hem i nomo bin traem blong mekem wan faet wetem ol man blong Leman long yia ia, be hem i bin mekem ol man blong hem blong mekem rere blong faet, yes, mo blong mekem ol strong ples blong gad agensem ol man blong Leman, yes, mo tu blong mekem se ol woman blong olgeta, mo ol pikinini blong olgeta bae i no kasem hadtaem blong kasem kakae mo hadtaem mo oli save gat kakae blong ol ami blong olgeta.

8 Mo nao i bin hapen se ol ami blong ol man blong Leman, long solwota blong wes, saot, taem we Moronae i no stap, from we samfala sikret plan long medel blong ol man blong Nifae, we i bin mekem olgeta oli pulaot long medel blong olgeta, ol ami ia i bin kasem samfala janis ova long ol man blong Nifae, yes, inaf blong mekem se oli bin winim plante long ol bigtaon blong ol man blong Nifae long pat blong graon.

9 Mo olsem ia nao from nogud fasin we i bin stap long medel blong olgeta nomo, yes, from ol fasin blong pulaot mo sikret plan we i stap long medel blong olgeta nomo, oli bin putum olgeta long ol problem we oli denja olgeta.

10 Mo nao luk, mi gat samting blong talem long saed blong ol pipol blong Amon, olgeta ia we, long stat, i bin ol man blong Leman; be tru Amon mo ol brata blong hem, o long ol narafala toktok tru paoa mo toktok blong God, oli bin jenisim laef blong

olgeta i kam long Lod; mo oli bin tekem olgeta i go daon long graon blong Sarahemla, mo stat long taem ia ol man blong Nifae i bin lukaotem gud olgeta oltaem.

11 Mo from tru promes blong olgeta, oli bin holem taet olgeta blong oli no karem ol tul blong faet blong olgeta agensem ol brata blong olgeta; from we oli bin mekem wan tru promes se bae oli neva mekem blad i ron bakegen; mo folem tru promes blong olgeta bae oli bin ded; yes, bae oli bin letem olgeta nomo blong foldaon long ol han blong ol brata blong olgeta, sapos we i no bin from sore mo lav we i tumas we Amon mo ol brata blong hem i bin gat long olgeta.

12 Mo from samting ia, oli bin tekem olgeta i go daon long graon blong Sarahemla; mo ol man blong Nifae oli bin lukaot gud olgeta oltaem.

13 Be i bin hapen se taem we oli bin lukim denja, mo ol plante hadtaem mo ol fasin blong kasem hadtaem, we ol man blong Nifae i bin fesem from olgeta, oli bin harem sore from olgeta mo oli bin wantem blong tekem ol tul blong faet blong lukaotem gud kantri blong olgeta.

14 Be luk, taem we oli rere blong tekem ol tul blong faet blong olgeta, ol toktok blong jenisim tingting blong Hileman mo ol brata blong hem i bin stopem olgeta, from we oli rere blong brekem tru promes we oli bin mekem.

15 Mo Hileman i bin fraet se sapos oli brekem tru promes bae oli lusum ol sol blong olgeta; taswe evriwan long olgeta we oli bin mekem kavenan ia, tru promes blong olgeta i bin fosem olgeta blong lukim ol brata blong olgeta i go tru ol hadtaem blong olgeta, long ol problem blong olgeta we oli denja long taem ia.

16 Be luk, i bin hapen se oli bin gat plante boe, we oli no bin mekem kavenan ia blong bae oli no tekem ol tul blong faet blong lukaotem gud olgeta nomo agensem ol enemi blong olgeta; taswe oli bin kam tugeta long taem ia, olgeta evriwan we i save tekem ol tul blong faet, mo oli bin singaotem olgeta bakegen ol man blong Nifae.

17 Mo oli bin mekem wan kavenan blong faet from freedom blong ol man blong Nifae, yes, blong lukaot gud long graon go kasem sapos i nid blong oli mas putum daon laef blong olgeta; yes, mo tu oli bin kavenan se bae oli neva givim aot fridom blong olgeta, be bae oli faet long evri problem blong lukaot gud long ol man blong Nifae mo olgeta bakegen aot long slef.

18 Nao luk, i bin gat tu taosen long olgeta yang man ia, we i bin mekem kavenan ia mo bin tekem ol tul blong faet blong olgeta blong lukaot gud long kantri blong olgeta.

19 Mo nao luk, from we oli neva bin mekem nogud samting long ol man blong Nifae long bifo, oli bin stat nao long

taem ia blong givim wan bigfala sapot; from we oli bin tekem ol tul blong faet blong olgeta, mo oli bin wantem se Hileman bae i kam olsem lida blong olgeta.

20 Mo olgeta evriwan ia oli ol yang man, mo oli strong long taem blong faet, mo tu long paoa mo oli no les long wanem oli mekem; be luk i no hemia nomo—oli ol man we oli bin tru long evri taem long eni samting we ol lida blong olgeta blong ami i trastem long olgeta blong mekem.

21 Yes, oli bin ol man we oli ones mo oli tru, from we ol papa mo mama blong olgeta i bin tijim olgeta blong holem ol komanmen blong God mo blong wokbaot stret long fored blong hem.

22 Mo nao i bin hapen se Hileman i bin maj long fored blong ol tu taosen yang soldia blong hem, blong sapotem ol pipol long ol boda blong graon long saot klosap long solwota blong wes.

23 Mo olsem ia nao twenti mo eit yia blong rul blong ol jaj ova long ol pipol blong Nifae i bin en.

---

#### JAPTA 54

---

*Amoron mo Moronae tufala i tok-tok blong agri blong jenisim ol prisena—Moronae i talem strong se ol man blong Leman i mas kamaot mo stopem ol atak blong olgeta blong kilim man i ded—Amoron i talem strong se ol man blong*

*Nifae i mas putum daon ol tul blong faet blong olgeta mo kam blong letem ol man blong Leman rulum olgeta. Raonabaot 63 yia bifo Kraes i bon.*

Mo nao i bin hapen long twenti mo naen yia blong ol jaj, se Amoron i bin sendem wan mesenja long Moronae mo hem i wantem se hem i jenisim ol prisena.

2 Mo i bin hapen se Moronae i bin wantem blong glad tumas long tingting ia, from we hem i wantem ol kakae we oli stap givim blong sapotem ol man blong Leman prisena i go blong sapotem man blong hem nomo; mo tu hem i bin wantem ol man blong hem blong mekem ami blong hem i kam strong.

3 Nao ol man blong Leman i bin tekem plante woman mo ol pikinini, mo i no bin gat wan woman mo wan pikinini long olgeta prisena blong Moronae, o ol prisena we Moronae i bin tekem; taswe Moronae i bin jusum wan plan blong karembak ol man blong Nifae prisena aot long ol man blong Leman we oli save karem.

4 Taswe hem i bin raetem wan leta, mo i bin sendem wetem wokman blong Amoron, semfala wokman we i bin karem wan leta i go long Moronae. Nao hemia ol toktok we hem i raetem i go long Amoron, i talem:

5 Luk, Amoron, mi bin raet long yufala smol long saed blong faet ia we yufala i lidim agensem ol man blong mi, o we

brata blong yu i bin lidim agensem olgeta, mo we yufala i wantem yet blong gohed wetem afta long ded blong hem.

6 Luk, bae mi talem long yufala long saed blong jastis blong God, mo naef blong kros blong hem we i strong olgeta, we i stap hang antap long yufala sapos yufala i no sakem sin, mo karemaot ol ami blong yufala i gobak long ol graon blong yufala, o graon we yufala i holem taet, we hem i graon blong Nifae.

7 Yes, bae mi talem ol samting ia long yu sapos yu save harem mo mekem olgeta; yes, bae mi talem long yu long saed blong nogud hel we i stap wet blong tekem ol man blong kilim man i ded olsem we yu mo brata blong yu i bin stap mekem, sapos yufala i no sakem sin mo karemaot ol plan blong yufala blong kilim man i ded, mo gobak wetem ol ami blong yufala long ol graon blong yufala.

8 Be olsem we yufala i bin sakemaot ol samting ia bifo, mo i bin faet agensem ol man blong Lod, hem i tru we mi save se bae yufala i mekem bakegen.

9 Mo nao luk, mifala i rere blong mitim yufala; yes, mo sapos yufala i no karemaot ol plan blong yufala, luk, bae yufala i pulum daon kros blong God ia we yufala i bin sakemaot long yufala, go kasem we bae i smasem gud yufala evriwan.

10 Be, olsem we Lod i stap laef, ol ami blong mifala bae i kam agensem yufala sapos yufala i no kamaot, mo bae ded i kam

long yufala i no longtaem, from we bae mifala i holem taet ol bigtaon blong mifala mo ol graon blong mifala; yes, mo bae mifala i holem taet fasin blong bilif long God blong mifala mo stamba tingting blong God blong mifala.

11 Be luk, mi ting se mi stap toktok long yu long saed blong ol samting ia blong nating nomo; o mi ting se yu yu wan pikinini blong hel; taswe bae mi finisim leta blong mi blong talem long yu se bae mi no jenisim ol prisena, mi save mekem nomo sapos yufala i givim long mi wan man mo woman blong hem mo ol pikinini blong hem, blong mi givim wan prisena; sapos samting ia nao, bae yufala i mekem, bae mi mekem jenis.

12 Mo luk, sapos yufala i no mekem samting ia, bae mi kam agensem yufala wetem ol ami blong mi; yes, bae mi mekem ol woman blong mi mo ol pikinini blong mi oli karem ol tul blong faet, mo bae mi kam agensem yufala, mo bae mi folem yufala go kasem insaed long graon blong yufala, we i faszala graon blong ol bubu blong mifala; yes, mo bae hem i blad from blad, yes, laef from laef; mo bae mi givim yufala faet kasem taem we mi smasem gud yufala aot long fes blong wol.

13 Luk, mi stap long kros blong mi, mo tu ol pipol blong mi; yufala i bin stap lukaotem blong kilim ded mifala, mo mifala i bin stap lukaotem blong lukaotem gud mifala

nomo. Be luk, sapos yufala i stap lukaotem blong smasem gud mifala bakegen bae mifala i lukaotem blong smasem gud yufala; yes, mo bae mifala i lukaotem graon blong mifala, faszala graon blong ol bubu blong mifala.

14 Nao mi finisim leta blong mi. Mi mi Moronae; mi mi wan lida blong ol pipol blong Nifae.

15 Nao i bin hapen se taem we Amoron, taem we hem i bin kasem leta ia, hem i bin kros; mo hem i bin raetem wan narafala leta i go long Moronae, mo hemia ol toktok we hem i bin raetem, hem i talem olsem:

16 Mi mi Amoron, king blong ol man blong Leman; mi mi brata blong Amalekaea we yu bin kilim hem i ded. Luk, bae mi atakem yufala from blad blong hem, yes, bae mi kam agensem yufala wetem ol ami blong mi from we mi no fraet long ol woning blong yu.

17 From luk, ol bubu blong yufala i bin mekem rong long ol brata blong olgeta, inaf we i mekem se oli bin stilim olgeta long raet blong olgeta blong kasem gavman taem we raet ia i bin blong olgeta stret.

18 Mo nao luk, sapos bae yufala i putum daon ol tul blong faet blong yufala, mo letem yufala se olgeta we gavman i blong olgeta stret blong rulum yufala, afta bae mi mekem ol pipol blong mi i putum daon ol tul blong olgeta mo bae oli no faet bakegen.

19 Luk, yu bin talemaot plante woning agensem mi

mo ol pipol blong mi; be luk, mifala i no fraet long ol woning blong yu.

20 Be, bae mi letem blong jenisim ol prisena folem olsem we yu bin askem, wetem glad hat, blong mi save sevem kakae blong mi blong ol man blong mi blong faet; mo bae mifala i mekem wan faet we bae i no gat en, kasem taem we ol man blong Nifae i stap andanit long raet blong mifala o kasem we oli nomo gat nating long taem we i no gat en.

21 Mo long saed blong God ia we yu talem se mifala i bin sakemaot, luk, mifala i no save wan man olsem; mo tu yufala i no save; be sapos we i gat wan man olsem, mifala i no save, be we hem i bin mekem mifala tugeta wetem yufala.

22 Mo sapos we i gat wan devel mo wan hel, luk bae hem i no sendem yu blong go stap long ples ia wetem brata blong mi we yu bin kilim hem i ded, we yu talem se hem i bin go long wan ples olsem? Be luk ol samting ia i nomata.

23 Mi mi Amoron, mo wan laen blong Soram, hemia we ol bubu blong yufala i bin fosem hem mo tekem hem aot long Jerusalem.

24 Mo luk nao, mi mi wan man blong Leman we mi no fraet; luk, faet ia i bin gohed blong givim bak ol rong blong olgeta, mo blong holem taet mo blong kasem ol raet blong olgeta long gavman; mo mi endem leta blong mi long Moronae.

---

 JAPTA 55
 

---

*Moronae i talem no, blong jenisim ol prisena—Ol man blong Nifae i mekem ol man blong Leman gadman i kam drong, mo oli mekem ol prisena i go fri—Ol man blong Nifae i tekem bigtaon blong Gid mo i no wetem blad i ron. Raonabaot 63–62 yia bifo Kraes i bon.*

NAO i bin hapen se taem we Moronae i bin kasem leta ia hem i bin kros moa, from we hem i bin save se Amoron i gat wan stret save blong giaman blong hem; yes, hem i bin save se Amoron i save se i no wan stret stamba tingting we i bin mekem hem blong lidim wan faet agensem ol pipol blong Nifae.

2 Mo hem i bin talem se: Luk, bae mi no jenisim ol prisena wetem Amoron sapos hem i no karemaot plan blong hem, olsem we mi bin talem long leta blong mi; from bae mi no letem long hem se bae hem i gat moa paoa bitim wanem we hem i gat.

3 Luk, mi save ples we ol man blong Leman i stap gad long ol man blong mi we oli bin tekem olsem ol prisena; mo olsem we Amoron i no bin letem long mi wanem we mi bin askem long leta blong mi, luk, bae mi givim long hem folem ol toktok blong mi; yes, bae mi lukaotem ded long olgeta kasem taem we bae oli askem pis.

4 Mo nao i bin hapen se taem we Moronae i bin talem ol toktok ia, hem i bin mekem se wan

lukluk blong faenemaot samting i bin tekem ples long ol man blong hem, blong maet bae hem i faenem wan man we hem i wan laen blong Leman long medel blong olgeta.

5 Mo i bin hapen se oli bin faenem wan, we nem blong hem i Leman; mo hem i bin wan long ol wokman blong king we Amalekaea i bin kilim hem i ded.

6 Nao Moronae i bin mekem se Leman mo wan smol namba blong ol man blong hem bae oli go aot long ol gadman we oli bin gad long ol man blong Nifae.

7 Nao ol man blong Leman i gad long ol man blong Nifae long bigtaon blong Gid; taswe Moronae i bin jusum Leman mo bin mekem se wan smol namba blong ol man bae i go wetem hem.

8 Mo taem we hem i ivining Leman i bin go long ol gadman we i bin gad long ol man blong Nifae, mo luk, oli bin lukim hem i stap kam mo oli bin sing-aot long hem; be hem i bin talem long olgeta: No fraet, luk, mi mi wan laen blong Leman. Luk, mifala i bin ronwe long ol man blong Nifae, mo oli stap slip; mo luk mifala i bin tekemaot long waen blong olgeta mo bin karem i kam wetem mifala.

9 Nao taem we ol man blong Leman i bin harem ol toktok ia, oli bin kasem hem wetem glad; mo oli bin talem long hem: Givim sam long ol waen blong yu long mifala, blong mifala i save dring; mifala i glad se

yufala i bin tekem waen wetem yufala from we mifala i taed.

10 Be Leman i bin talem long olgeta: Letem yumi holem taet long waen blong yumi kasem taem we yumi go agensem ol man blong Nifae long faet. Be toktok ia i bin mekem olgeta wantem moa blong dring long waen ia.

11 From, oli bin talem olsem: Yumi taed, taswe letem yumi tekem sam waen, mo long smol taem bae yumi kasem waen blong ol rasen blong yumi, we bae i mekem yumi kam strong blong go agensem ol man blong Nifae.

12 Mo Leman i bin talem long olgeta: Yufala i save mekem olsem we yufala i wantem.

13 Mo i bin hapen se oli bin tekem long waen olsem we oli bin wantem; mo tes blong hem i gud long olgeta, taswe oli bin tekem moa olsem we oli bin wantem; mo hem i bin strong, from we ol man blong Nifae i bin mekem i rere se bae i strong.

14 Mo i bin hapen se oli bin dring mo oli bin harem gud, mo smol taem afta olgeta evriwan i bin drong.

15 Mo nao taem we Leman mo ol man blong hem i bin luk se evriwan oli drong, mo oli bin stap long wan dip slip, oli bin gobak long Moronae mo bin talemaot evri samting we i bin hapen.

16 Mo nao hemia i bin folem plan blong Moronae. Mo Moronae i bin mekem rere ol man blong hem wetem ol tul blong faet; mo hem i bin go



long bigtaon Gid, taem we ol man blong Leman i bin stap long wan dip slip mo oli drong, mo oli bin givim ol tul blong faet long ol prisena, inaf blong mekem se olgeta evriwan i bin holem ol tul blong faet;

17 Yes, tu long ol woman blong olgeta, mo olgeta pikinini blong olgeta, olgeta we oli save yusum wan tul blong faet, taem we Moronae i bin mekem ol prisena ia blong holem ol tul blong faet; mo ol samting ia i bin hapen long wan kwaet fasin.

18 Be sapos oli bin wekemap ol man blong Leman, luk oli bin drong mo ol man blong Nifae i bin save kilim ded olgeta.

19 Be luk, hemia i no tingting we Moronae i bin wantem; hem i no bin laekem fasin blong kilim man i ded o blad i ron, be hem i bin glad long wok blong sevem ol pipol blong hem from fasin blong smasem gud olgeta; mo from stamba tingting ia bae hem i no save mekem samting we i no stret blong stap long hem, hem bae i no save foldaon long ol man blong Leman mo smasem gud olgeta long taem we oli drong.

20 Be hem i bin kasem ol tingting blong hem; from we hem i bin mekem ol man blong Nifae prisena holem ol tul blong faet we oli bin stap insaed long wol blong bigtaon, mo bin givim olgeta paoa blong kasem mo holem olgeta pat we i stap insaed long ol wol.

21 Mo afta hem i bin mekem se ol man we i bin stap wetem hem blong kamaot longwe

lelebet long olgeta, mo raonem ol ami blong ol man blong Leman.

22 Nao luk hemia i bin hapen long naetaem, blong mekem se taem we ol man blong Leman i bin wekap long moning oli bin luk se ol man blong Nifae i raonem olgeta aotsaed long ol wol, mo we ol prisena blong olgeta i bin holem ol tul blong faet insaed long ol wol.

23 Mo olsem ia nao oli bin luk se ol man blong Nifae i bin gat paoa ova long olgeta; mo long ol taem ia oli bin faenem se i no nid we bae oli faet wetem ol man blong Nifae; taswe ol jif kapten blong olgeta i talem long olgeta blong givim ol tul blong faet blong olgeta, mo oli bin tekem olgeta i kam fored mo bin sakem olgeta long ol leg blong ol man blong Nifae, mo oli askem sore long olgeta.

24 Nao luk hemia i tingting we Moronae i bin wantem. Hem i bin mekem olgeta i kam prisena blong faet, mo i bin tekem bigtaon, mo bin mekem se evri prisena i mas kam fri, we oli ol man blong Nifae; mo oli bin joenem ami blong Moronae, mo oli bin givim bigfala paoa long ami blong hem.

25 Mo i bin hapen se hem i bin mekem ol man blong Leman, we hem i bin mekem oli kam prisena, blong oli mas statem wan wok blong mekem ol haos blong faet i kam moa strong raonabaot long bigtaon blong Gid.

26 Mo i bin hapen se taem we hem i bin mekem bigtaon

blong Gid i kam strong, folem ol tingting blong hem, hem i bin mekem se ol man blong Nifae i tekem ol prisena i go long bigtaon Plante; mo tu hem i bin gad long bigtaon ia wetem wan fos we i strong tumas.

27 Mo i bin hapen se oli bin, i nomata long ol plan blong ol man blong Leman, holem taet mo lukaot gud long ol prisena we oli bin tekem, mo tu oli bin holem taet evri graon mo janis we oli bin tekem bakegen.

28 Mo i bin hapen se ol man blong Nifae i bin stat bakegen blong win, mo blong tekem bakegen ol raet mo ol janis blong olgeta.

29 Plante taem ol man blong Leman i bin traem blong raonem olgeta long naet, be long ol traem ia oli bin lusum plante prisena.

30 Mo plante taem oli bin traem blong givim sam long ol waen blong olgeta long ol man blong Nifae, blong mekem se oli save smasem gud olgeta wetem posen o wetem drong.

31 Be luk, ol man blong Nifae i no bin slo blong tingbaot Lod, God blong olgeta long hadtaem ia blong olgeta. Ol man blong Leman i no bin save trikim olgeta; yes, oli no bin save dring waen blong olgeta sapos oli no bin givim sam long ol man blong Leman prisena fas taem.

32 Mo olsem ia nao oli bin lukaot gud se i no gat eni man i save givim posen long olgeta; from sapos waen blong olgeta bae i posenem wan man blong Leman bae i posenem wan man

blong Nifae tu; mo olsem ia nao oli bin traem ol strongdring blong olgeta.

33 Mo nao i bin hapen se i bin nid blong Moronae i mekem rere blong atakem bigtaon Morianton; from luk, ol man blong Leman i bin, folem ol wok blong olgeta, mekem bigtaon Morianton i kam strong kasem taem we i bin kam wan strong sapot we i strong tumas.

34 Mo oli bin gohed blong karem ol niu fos i kam insaed long bigtaon, mo tu ol niu saplae blong ol kakae.

35 Mo olsem ia nao twenti mo naen yia blong rul blong ol jaj ova long ol pipol blong Nifae i bin en.

---

### JAPTA 56

---

*Hileman i sendem wan leta i go long Moronae, hem i talemaot fasin blong faet we oli gat wetem ol man blong Leman—Antipas mo Hileman tufala i kasem wan bigfala win ova long ol man blong Leman—Ol tu taosen yang boe blong Hileman i faet wetem paoa blong merikel, mo i no gat wan long olgeta i ded. Vas 1, raonabaot 62 yia bifo Kraes i bon; ol vas 2–19, raonabaot 66 yia bifo Kraes i bon; mo ol vas 20–57, raonabaot 65–64 yia bifo Kraes i bon.*

Mo nao i bin hapen long stat blong teti yia blong rul blong ol jaj, long nambatu dei long fas manis, Moronae i bin kasem wan leta long Hileman, we i tokbaot ol samting blong ol pipol long pat ia blong graon.

2 Mo hemia ol toktok we hem i bin raetem, i talem se: Gudfala brata blong mi we mi lavem tumas, Moronae, long Lod mo long taem blong ol trabol blong faet blong yumi; luk, brata blong mi we mi lavem tumas, mi gat samting blong talem long yu long saed blong faet blong mifala long pat blong graon ia.

3 Luk, tu taosen long ol boe blong ol man we Amon i bin tekemaot long graon blong Nifae—nao yu save we olgeta ia oli ol laen blong Lemana, we hem i fas bon blong papa blong yumi Lihae;

4 Nao mi no nidim blong talemaot long yu long saed blong ol kastom o fasin blong no gat bilif blong olgeta, from yu save long saed blong evri samting ia—

5 Taswe hem i naf long mi blong mi talem long yu se tu taosen long ol yang man ia i bin tekem ol tul blong faet blong olgeta, mo oli bin wantem se mi stap olsem lida blong olgeta; mo mifala i bin kam fored blong lukaotem gud kantri blong mifala.

6 Mo nao yu save tu long saed blong kavenan we ol papa blong olgeta i bin mekem, se bae oli no tekem ol tul blong faet blong olgeta agensem ol brata blong olgeta blong mekem blad i ron.

7 Be long twenti mo sikis yia, taem we oli bin luk ol hadtaem blong mifala mo ol trabol blong mifala from olgeta, oli bin klosap blong brekem kavenan ia

we oli bin mekem mo tekem ol tul blong faet blong olgeta blong lukaotem gud mifala.

8 Be mi no bin wantem letem olgeta blong bae oli brekem kavenan ia we oli bin mekem, from mi ting se God bae i mekem mifala i kam strong, inaf blong mekem se mifala i no mas safa moa, from we oli hol-em kavenan we oli bin mekem.

9 Be luk, hemia wan samting we yumi save gat bigfala glad long hem. From luk, long twenti mo sikis yia, mi, Hileman, bin maj long fored blong ol tu taosen yang man ia i go long bigtaon blong Judia, blong helpem Antipas, man ia we yu bin jusum hem olsem wan lida ova long ol pipol long pat blong graon.

10 Mo mi bin joenem ol tu taosen boe blong mi, (from we oli inaf blong singaotem olgeta ol boe blong mi) blong go long ami blong Antipas, long paoa ia Antipas i bin glad tumas long hem; from luk, ol man blong Lemana i bin katem namba blong ami blong hem i go daon, from ol fos blong olgeta i bin kilim ded wan big namba blong ol man blong yumi, from samting ia yumi nid blong gat wan stamba tingting blong krae.

11 Be, yumi save harem gud long poen ia, se oli bin ded from stamba tingting blong kantri blong olgeta mo blong God blong olgeta, yes, mo oli glad.

12 Mo ol man blong Lemana i bin holem taet plante prisena, olgeta ia evriwan oli ol jif kapten, from we oli no bin letem

eni narafala man blong laef. Mo mifala i ting se oli stap naoia long taem ia long graon blong Nifae; hemia i olsem sapos oli no bin kilim ded olgeta.

13 Mo nao hemia ol bigtaon we ol man blong Lemana i bin tekem folem fasin blong mekem blad blong plante long ol strong man i ron:

14 Graon blong Mantae, o bigtaon blong Mantae, mo bigtaon blong Siesrom, mo bigtaon blong Kumena, mo bigtaon blong Antipara.

15 Mo hemia ol bigtaon we oli bin tekem taem we mi bin kasem bigtaon blong Judia; mo mi bin faenem Antipas mo ol man blong hem oli wok wetem paoa blong olgeta blong mekem bigtaon ia i kam strong.

16 Yes, mo oli bin taed long bodi tugeta wetem long spirit, from we oli bin faet strong long dei mo oli bin wok long naet blong holem taet ol bigtaon blong olgeta; mo olsem ia nao oli bin safa long ol bigfala hadtaem blong evri kaen.

17 Mo nao oli bin tingting strong blong win long ples ia o blong ded; taswe yu save gat gudfala tingting se smol fos ia we mi bin tekem wetem mi, yes, olgeta boe ia blong mi, i bin givim olgeta bigfala hop mo plante glad.

18 Mo nao i bin hapen se taem we ol man blong Lemana i bin luk se Antipas i bin kasem wan bigfala paoa long ami blong hem, Amoron i bin fosem olgeta wetem ol oda blong hem blong no kam agensem bigtaon

blong Judia, o agensem mifala, blong faet.

19 Mo olsem ia nao Lod i bin givhan long mifala; from sapos oli bin kam agensem mifala long taem we mifala i no gat paoa nating, maet bae oli save smasem gud smol ami blong mifala; be olsem ia nao Lod i bin sevem mifala.

20 Amoron i bin givim oda long olgeta blong holem taet ol bigtaon ia we oli bin tekem. Mo olsem ia nao twenti mo sikis yia i bin en. Mo long stat blong twenti mo seven yia mifala i bin mekem rere bigtaon blong mifala mo mifala bakegen blong lukaotem gud mifala.

21 Nao mifala i bin wantem se ol man blong Lemana bae oli kam agensem mifala; from mifala i no bin wantem blong mekem wan atak agensem olgeta long ol ples blong strong sapot blong olgeta.

22 Mo i bin hapen se mifala i bin kipim ol spae raonabaot, blong lukluk ol muf blong ol man blong Lemana, blong mekem se bae oli no kam long mifala long naet o long dei blong mekem wan atak agensem ol narafala bigtaon blong mifala we i stap long not.

23 From mifala i bin save se long olgeta bigtaon ia oli no bin gat inaf paoa blong mitim olgeta; taswe mifala i bin wantem, sapos oli save pas klosap long mifala, blong mifala i save atakem olgeta long biae blong olgeta, mo olsem ia nao blong wokem olgeta long biae long sem taem ol narafala man blong

Nifae oli mitim olgeta long fored. Mifala i bin ting se mifala i save winim olgeta; be luk, mifala i bin harem nogud long tingting ia blong mifala.

24 Olgeta i bin fraet blong pas klosap long mifala wetem evri ami blong olgeta, o oli bin fraet blong mekem olsem wetem samfala nomo long ol ami blong olgeta, from we oli fraet se oli no strong inaf mo bae oli faldaon.

25 O oli no wantem blong maj i go daon agensem bigtaon blong Sarahemla; o oli no bin wantem blong krosem stamba blong Saedon, ova long bigtaon blong Nifaeha.

26 Mo olsem ia nao, wetem ol fos blong olgeta, oli bin tingting strong blong holem taet ol bigtaon ia we oli bin tekem.

27 Mo nao i bin hapen long seken manis blong yia ia, ol papa blong ol tu taosen boe blong mi i bin karem plante kakae i kam long mifala.

28 Mo tu oli bin sendem tu taosen man long Sarahemla i kam long mifala. Mo olsem ia nao mifala i bin rere wetem ten taosen man, mo ol kakae blong olgeta, mo tu blong ol woman blong olgeta mo blong ol pikinini blong olgeta.

29 Mo ol man blong Leman, olsem ia nao i bin luk ol fos blong mifala i kam bigwan evri dei, mo ol kakae i stap kam blong sapotem mifala, oli bin stat blong fraet, mo oli bin stat blong hariap, sapos hem i save hapen blong putum wan en blong wok blong mifala blong kasem ol kakae mo paoa.

30 Nao taem we mifala i bin luk se ol man blong Leman i bin stat blong harem nogud long fasin ia, mifala i bin wantem blong mekem wan plan i hapen long olgeta; taswe Antipas i bin givim oda se mi mas maj i go fored wetem ol smol boe blong mi long wan bigtaon we i stap klosap, olsem se mifala i stap karem ol kakae i go long wan bigtaon klosap.

31 Mo blong mifala i maj klosap long bigtaon blong Antipara, olsem se mifala i stap go long bigtaon we i bitim bigtaon ia, long ol boda klosap long so blong solwota.

32 Mo i bin hapen se mifala i bin maj i go fored, olsem se wetem ol kakae blong mifala, blong go long bigtaon ia.

33 Mo i bin hapen se Antipas i bin maj i go fored wetem wan pat long ami blong hem, hem i bin livim ol narafala blong lukaot gud long bigtaon. Be hem i no bin maj i go fored kasem taem we mi bin go fored wetem smol ami blong mi, mo i bin kam klosap long bigtaon Antipara.

34 Mo nao, long bigtaon Antipara, ami blong ol man blong Leman we i strong olgeta i bin stap; yes, namba blong ami ia i bitim ol narawan.

35 Mo i bin hapen se taem we ol spae blong olgeta i bin talemaot long olgeta, oli bin kam fored wetem ami blong olgeta mo bin maj agensem mifala.

36 Mo i bin hapen se mifala i bin ronwe long olgeta i go long

not. Mo olsem ia nao mifala i bin lidim i gowe ami blong ol man blong Leman we i strong olgeta;

37 Yes, i go kasem longwe lelebet, inaf blong mekem se oli bin lukim ami blong Antipas oli stap folem biae long olgeta wetem paoa blong olgeta, oli no bin tanem i go long raet o long lef, be oli bin gohed long maj blong olgeta long wan stret rod folem mifala; mo, olsem we mifala i bin tingting, hem i bin tingting blong olgeta blong kilim ded mifala bifo Antipas bae i kasem olgeta, mo hemia blong mekem se bae ol man blong mifala i no raonem olgeta.

38 Mo nao Antipas, i bin luk denja blong mifala, hem i bin spidim maj blong ami blong hem. Be luk, hem i bin naet; taswe oli no bin kasem mifala, o Antipas i no bin kasem olgeta, taswe mifala i bin kam blong pasem naet.

39 Mo i bin hapen se bifo dei-laet i brok, luk, ol man blong Leman i stap ronem mifala. Nao mifala i no strong inaf blong faet agensem olgeta; yes, mi no save letem se ol smol boe blong mi i foldaon long ol han blong olgeta, taswe mifala i bin gohed long maj blong mifala, mo mifala i bin tekem maj blong mifala i go long ples we i no gat man long hem.

40 Nao oli bin fraet blong tanem i go long raet o long lef, from oli fraet se bae oli raonem olgeta; mo mi tu i no bin wantem blong tanem mi go long raet o lef from mi fraet se bae

oli kasem mi, mo mifala i no bin save stanap agensem olgeta, be bae oli kilim ded mifala, mo bae oli save ronwe; mo olsem ia nao mifala i bin ronwe long ful dei ia i go long ples we i no gat man long hem, go kasem taem we hem i tudak.

41 Mo i bin hapen se bakegen, taem we laet blong moning i bin kam mifala i bin lukim ol man blong Leman i stap kam long mifala, mo mifala i bin ronwe long olgeta.

42 Be i bin hapen se oli no bin ronem mifala longwe bifo oli bin stop; mo i bin long moning blong nambatri dei blong nambaseven manis.

43 Mo nao, sapos Antipas i bin kasem olgeta mifala i no bin save, be mi bin talem long ol man blong mi: Luk, yumi i no save gud be maet oli bin stop long stamba tingting se bae yumi kam agensem olgeta, blong maet oli save kasem yumi long trik blong olgeta.

44 Taswe wanem nao yufala i talem, ol boe blong mi, bae yufala i go agensem olgeta blong faet?

45 Mo nao mi talem long yu, brata blong mi Moronae we mi lavem tumas, se neva mi bin luk wan fasin blong no save fraet we i bigfala olsem, no, mi no bin luk long medel blong ol man blong Nifae.

46 From olsem we mi bin singaotem olgeta ol boe blong mi (from olgeta evriwan oli yang tumas) olsem ia oli bin talem long mi: Papa, luk God blong yumi i stap wetem yumi,

mo hem bae i no letem se bae yumi faldaon; ale bae yumi go aot; bae yumi no kilim ded ol brata blong yumi sapos oli livim yumi nomo; taswe bae yumi go, blong mekem se oli no save winim ami blong Antipas.

47 Nao oli neva bin faet, be oli no bin fraet long ded; mo oli bin tingbaot moa long fridom blong ol papa blong olgeta bitim laef blong olgeta; yes, ol mama blong olgeta i bin tijim olgeta, se sapos tingting blong olgeta i strong fulwan, God bae i sevem olgeta.

48 Mo oli bin talemaot long mi ol toktok blong ol mama blong olgeta, oli talem: Mifala i no gat tingting we i no strong fulwan ol mama blong mifala i bin save.

49 Mo i bin hapen se mi bin gobak wetem ol tu taosen blong mi agensem ol man blong Leman ia we i bin ronem mifala. Mo nao luk, ol ami blong Antipas i bin kasem olgeta, mo wan rabis faet i bin stat.

50 Ami blong Antipas i bin taed, from longfala maj blong olgeta long sotfala spes blong taem, klosap bae oli foldaon long ol han blong ol man blong Leman; mo sapos mi no bin gobak wetem tu taosen blong mi, bae oli bin save kasem plan blong olgeta.

51 From we Antipas i bin ded wetem naef blong faet, mo plante long ol lida blong hem, from taed blong olgeta, we i bin from spid blong maj blong olgeta—taswe ol man blong Antipas, from we oli gat tingting we i fasfas from ded blong

ol lida blong olgeta, oli bin stat blong ronwe long ol man blong Leman.

52 Mo i bin hapen se ol man blong Leman i bin tekem fasin blong no save fraet, mo bin stat blong ronem olgeta; mo olsem ia nao ol man blong Leman i bin stap ronem olgeta wetem bigfala paoa taem we Hileman i bin kam long biaen blong olgeta wetem tu taosen blong hem, mo bin stat blong kilim ded olgeta tumas, inaf blong mekem se ful ami blong ol man blong Leman i bin stop mo tanem raon agensem Hileman.

53 Nao taem we ol man Antipas i bin luk se ol man blong Leman i bin tanem raon, oli bin mekem ol man blong olgeta i kam tugeta mo oli bin kam bakegen long biaen blong ol man blong Leman.

54 Mo nao i bin hapen se, mifala, ol pipol blong Nifae, ol man blong Antipas, mo mi wetem ol tu taosen blong mi, i bin raonem ol man blong Leman, mo mifala i bin kilim ded olgeta; yes, inaf blong mekem se i bin fosem olgeta blong givim aot ol tul blong faet blong olgeta mo tu olgeta bakegen olsem ol prisena blong faet.

55 Mo nao i bin hapen se taem we oli bin givim olgeta bakegen long mifala, luk, mi bin kaontem ol yang man ia we i bin faet wetem mi, from mi fraet se plante long olgeta i bin kasem ded.

56 Be luk, long bigfala glad blong mi, i no bin gat wan sol blong olgeta we i bin foldaon long graon; yes, mo oli bin faet

olsem se i wetem paoa blong God; yes, i neva bin gat ol man we oli save bifo we oli faet wetem paoa blong merikel; mo wetem strong paoa olsem oli bin foldaon long ol man blong Leman, we oli bin mekem ol man blong Leman i fraet; mo from samting ia ol man blong Leman i givim olgeta bakegen olsem ol prisena blong faet.

57 Mo from we mifala i no bin gat ples blong ol prisena blong mifala, blong mifala i save gad long olgeta blong hol-em taet olgeta from ol ami blong ol man blong Leman, taswe mifala i bin sendem olgeta i go long graon blong Sarahem-la, mo wan pat long ol man blong Antipas we oli no bin kilim ded olgeta wetem olgeta; mo ol narafala mi bin tekem olgeta mo joenem olgeta wetem ol yang man blong Amon, blong mi, mo mifala i bin tekem maj blong mifala i gobak long bigtaon blong Judia.

---

### JAPTA 57

---

*Hileman i talem stori long fasin blong tekem Antipara mo fasin blong givim aot mo afta long fasin blong lukaot gud blong Kumenaē — Ol yang man blong Amon blong hem oli faet strong; olgeta evriwan i kasem kil, be i no gat wan we oli kilim i ded — Gid i ripotem ol fasin blong kilim ded ol man mo ronwe blong Leman prisena. Raonabaot 63 yia bifo Kraes i bon.*

Mo nao i bin hapen se mi bin kasem wan leta long Amoron,

we hem i king, leta ia i talem se sapos mi givim aot ol prisena ia blong faet we mifala i bin tekem, bae hem i givim aot bigtaon blong Antipara long mifala.

2 Be mi bin sendem wan leta long king, se mifala i sua se ol soldia blong mifala oli inaf blong tekem bigtaon Antipara wetem paoa blong mifala; mo blong givim aot ol prisena from bigtaon ia bae mifala i ting se i no waes long mifala, mo se bae mifala i save givim aot ol prisena nomo blong jenisim ol man blong Nifae prisena.

3 Mo Amoron i no bin wantem tingting we mi givim long leta blong mi, from we hem i no wantem jenisim ol prisena; taswe mifala i bin stat blong mekem rere blong go agensem bigtaon Antipara.

4 Be ol pipol blong Antipara i bin aot long bigtaon ia, mo oli bin ronwe i go long ol narafala bigtaon blong olgeta, we oli bin holem taet, blong mekem olgeta bigtaon ia i stap strong; mo olsem ia nao bigtaon blong Antipara i bin foldaon long han blong mifala.

5 Mo olsem ia nao twenti mo eit yia blong rul blong ol jaj i bin en.

6 Mo i bin hapen se long stat blong twenti mo naen yia, mifala i bin kasem wan saplae blong ol kakae, mo tu wan namba blong ademap long ami blong mifala, i bin kamaot long graon blong Sarahemla, mo long graon raonabaot, kasem namba blong sikis taosen man, hemia antap long siksti blong ol boe



blong ol man blong Amon we i bin kam blong joenem ol brata blong olgeta, smol grup blong mi blong tu taoseni. Mo nao luk, mifala i bin strong, yes, mo tu mifala i bin gat plante kakae i kam long mifala.

7 Mo i bin hapen se i bin tingting blong mifala blong mekem wan faet wetem ami we i bin stap blong lukaot gud long bigtaon Kumenae.

8 Mo nao luk, bae mi soem long yu se i bin kwiktaem we mifala i bin kasem tingting blong mifala; yes, wetem strong ami blong mifala, o wetem wan pat long ol strong ami blong mifala, mifala i bin raonem, long naet, bigtaon Kumenae, smol taem bifo oli rere blong kasem wan saplae blong ol kakae.

9 Mo i bin hapen se mifala i bin kam raonabaot long bigtaon blong plante naet; be mifala i bin slip long ol naef blong faet blong mifala, mo mifala i bin putum ol gad blong mekem se ol man blong Leman i no save kam agensem mifala long naet mo kilim ded mifala, we oli bin traem plante taem; be long plante taem we oli bin traem, hemia blad blong olgeta i bin ron.

10 Sam taem afta ol kakae blong olgeta i bin kam, mo oli rere blong kam insaed long bigtaon long naet. Mo mifala, long ples blong ol man blong Leman, mifala ol man blong Nifae; taswe, mifala i bin mitim olgeta mo ol kakae blong olgeta.

11 Mo i nomata we ol man blong Leman i bin katemaot sapot blong olgeta olsem ia,

oli bin wantem blong holem taet bigtaon yet; taswe i bin gat nid se bae mifala i mas tekem ol kakae ia mo sendem olgeta i go long Judia, mo ol prisena blong mifala long graon blong Sarahemla.

12 Mo i bin hapen se i no bin gat plante dei i pas bifo ol man blong Leman i bin stat blong lusum ol hop blong win; taswe oli bin lego bigtaon i kam long ol han blong mifala; mo olsem ia nao mifala i bin kasem ol plan blong mifala blong kasem bigtaon Kumenae.

13 Be i bin hapen se ol prisena blong mifala i bin plante tumas we, nomata long bigfala namba blong mifala, mifala i bin nid blong givim wok long ol ami blong mifala blong holem taet olgeta, o blong kilim ded olgeta.

14 From luk, bigfala namba blong olgeta bae i ronwe long ples we oli sud stap long hem, mo bae oli yusum ol ston blong faet wetem, mo wetem ol nalnal, o eni samting we oli save putum long ol han blong olgeta, inaf blong mekem se mifala i bin kilim ded moa long tu taosen long olgeta, afta we oli bin givim olgeta long mifala olsem ol prisena blong faet.

15 Taswe i bin gat nid se mifala i mas kilim ded olgeta, o gad long olgeta, wetem ol naef blong faet blong mifala long han blong mifala, daon long graon blong Sarahemla; mo tu ol kakae blong mifala i nomo plante bitim hemia we inaf blong ol man blong mifala nomo, i nomata long hemia we

mifala i bin tekem long ol man blong Leman.

16 Mo nao, long ol taem ia we oli impoten tumas, i bin kam wan samting we i impoten tumas blong tingbaot wanem nao blong mekem long saed blong ol prisena ia blong faet; be, mifala i bin jusum long sendem olgeta i go daon long graon blong Sarahemla; taswe mifala i bin jusum wan pat blong ol man blong mifala, mo bin putum olgeta blong givim oda long ol prisena blong mifala blong go daon long graon blong Sarahemla.

17 Be i bin hapen se long tumora blong hem oli bin kambak. Mo nao luk, mifala i no bin askem olgeta long saed blong ol prisena; from luk, ol man blong Leman i stap atakem mifala, mo oli bin kambak long stret taem blong sevem mifala blong mifala i no foldaon i go long ol han blong olgeta. From luk, Amoron i bin sendem long sapot blong olgeta wan niu saplae blong ol kakae mo tu wan bigfala namba blong ol man blong ami.

18 Mo i bin hapen se ol man ia we mifala i bin sendem wetem ol prisena i bin kasem mifala long stret taem blong stopem olgeta, olsem we klosap bae oli winim mifala.

19 Be luk, smol grup blong tu taosen mo siksti blong mi i bin faet strong tumas; yes, oli bin stanap strong agensem ol man blong Leman, mo oli bin kilim ded olgeta evriwan ia we oli bin agensem olgeta.

20 Mo taem we klosap ol nara-fala ami blong mifala i bin ronwe long fored blong ol man blong Leman, luk, ol tu taosen mo siksti ia i bin stanap strong mo oli no bin lusum fasin blong no save fraet.

21 Yes, mo oli bin obei mo folem evri toktok blong oda mo oli bin folem stret gud; yes, mo tu i bin hapen long olgeta folem fet blong olgeta; mo mi bin tingbaot ol toktok we oli bin talem long mi se ol mama blong olgeta i bin tijim olgeta.

22 Mo nao luk, i bin olgeta ia ol boe blong mi, mo ol man ia we mifala i bin jusum blong tekem ol prisena, long olgeta ia nao mifala i mas givim bigfala win ia; from we hem i bin olgeta ia nao we oli bin winim ol man blong Leman; taswe oli bin pusumbak ol man blong Leman i go long bigtaon blong Mantae.

23 Mo mifala i bin holem taet bigtaon blong mifala Kumenae, mo oli no bin smasem gud mifala wetem naef blong faet; be, mifala i bin lusum bigfala namba blong mifala.

24 Mo i bin hapen se afta we ol man blong Leman i bin ronwe, mi bin givim ol oda kwiktaem se ol man blong mi we oli bin kasem kil bae oli mas tekemaot olgeta long ol ded bodi mo mi bin mekem se i gat bandej long ol kil blong olgeta.

25 Mo i bin hapen se i bin gat tu hundred, aot long tu taosen mo siksti blong mi, we ae blong olgeta i bin dak from we oli bin lusum blad; be, folem gud-fala fasin blong God, mo long

bigfala sapraes blong mifala, mo tu long glad blong ful ami blong mifala, i no bin gat wan sol long olgeta we i bin lus; yes, mo tu i no bin gat wan sol long olgeta we i no bin kasem plante kil.

26 Mo nao, fasin blong sevem blong olgeta i bin sapraesem ful ami blong mifala, yes, we oli no bin ded taem we i bin gat taosen long ol brata blong mifala we oli bin kilim ded olgeta. Mo mifala i luksave tru se hemia i from merikel paoa blong God, from fet blong olgeta we i bin tumas long samting ia we ol mama blong olgeta i bin tijim olgeta blong bilif—se i gat wan God we i stret, mo eni man we i gat tingting we i strong fulwan, se God bae i sevem olgeta wetem gudfala paoa blong hem.

27 Nao hemia hem i bin fet blong olgeta we mi bin tokbaot; oli yang, mo ol tingting blong olgeta i stap strong, mo oli stap putum tras blong olgeta long God oltaem.

28 Mo i bin hapen se afta we mifala i bin lukaot gud long ol man blong mifala we oli bin kasem kil, mo mifala i bin berem ol ded man blong mifala mo tu ol ded man blong ol man blong Leman, we oli bin plante, luk, mifala i bin askem long Gid long saed blong ol prisena we oli bin stat blong go daon wetem olgeta long graon blong Sarahemla.

29 Nao Gid i bin jif kapten ova long grup we oli bin jusum hem blong gad long olgeta blong go daon long graon.

30 Mo nao, hemia i ol toktok

we Gid i bin talem long mi: Luk, mifala i bin stat blong go daon long graon blong Sarahemla wetem ol prisena blong mifala. Mo i bin hapen se mifala i bin mitim ol spae blong ol ami blong yumi we ol lida i bin sendem olgeta blong waj ova long kamp blong ol man blong Leman.

31 Mo oli bin singaot long mifala, oli talem—Luk, ol ami blong ol man blong Leman i stap maj i go long bigtaon blong Kumenae; mo luk, bae oli atakem olgeta, yes, mo bae oli smasem gud ol pipol blong yumi.

32 Mo i bin hapen se ol prisena blong mifala i bin harem ol singaot blong olgeta, we i bin mekem olgeta tekem fasin blong no save fraet; mo oli bin stat blong girap blong atakem mifala.

33 Mo i bin hapen se from fasin blong olgeta blong atakem mifala, mifala i bin atakem olgeta wetem ol naef blong mifala blong faet. Mo i bin hapen se oli bin ron i kam long wan grup long ol naef blong faet blong mifala, mo long taem ia mifala i bin kilim ded bigfala namba blong olgeta, mo ol narawan oli bin kamaot long ol gadman mo oli bin ronwe long mifala.

34 Mo luk, taem we oli bin ronwe mo mifala i no bin save kasem olgeta, mifala i bin maj kwik taem i go long bigtaon Kumenae; mo luk, mifala i bin kasem long stret taem blong mekem se mifala i save helpem ol brata blong mifala blong lukaotem gud bigtaon ia.

35 Mo luk, bakegen God i mekem yumi fri aot long ol han blong ol enemi blong yumi. Mo presem nem blong God blong yumi; from luk i hem we i bin mekem yumi kam fri; yes, we i bin mekem bigfala samting ia blong yumi.

36 Nao i bin hapen se taem we mi, Hileman, mi bin harem ol toktok ia blong Gid, hat blong mi i bin fulap wetem glad we i tumas from gudfala fasin blong God blong sevem long mifala, we bae mifala i no save lus; yes, mo mi trastem se ol sol blong ol man we oli bin kilim ded olgeta, i bin go insaed long kingdom blong God.

---

#### JAPTA 58

---

*Hileman, Gid, mo Tiamna i tekem bigtaon blong Mantae tru long wan trik—Ol man blong Leman i kamaot—God i sevem ol boe blong ol man blong Amon long taem we oli stanap strong long fasin blong lukaotem gud fridom mo fet. Raonabaot 63–62 yia bifo Kraes i bon.*

Mo luk, nao i bin hapen se nekis stamba tingting i bin blong tekem bigtaon blong Mantae; be luk, i no bin gat wan rod we mifala i save lidim olgeta aot long bigtaon wetem ol smol grup blong mifala. From luk, oli bin tingbaot hemia we mifala i bin mekem bifo, taswe mifala i no bin save trikim olgeta blong aot long ol strong sapot blong olgeta.

2 Mo namba blong olgeta i moa

bitim ami blong mifala, mekem se mifala i bin fraet blong go aot mo atakem olgeta long ol strong sapot blong olgeta.

3 Yes mo i bin gat nid we bae mifala i mekem ol man blong mifala blong lukaotem gud ol pat blong graon we mifala i bin tekembak blong mifala; taswe i bin gat nid blong mifala i mas wet, blong mifala i save kasem moa paoa long graon blong Sarahemla mo tu wan niu sap-lae blong ol kakae.

4 Mo i bin hapen se olsem ia nao mi bin sendem wan mesenja i go long gavena blong graon blong mifala, blong letem hem i save long ol problem blong ol pipol blong mifala. Mo i bin hapen se mifala i bin wet blong kasem ol kakae mo paoa long graon blong Sarahemla.

5 Be luk, samting ia i bin help-em mifala smol nomo; from we ol man blong Leman tu i bin kasem bigfala paoa evri dei mo plante kakae tu; mo ol problem blong mifala i bin olsem ia nao long taem ia.

6 Mo ol man blong Leman i bin kam aot agensem mifala long ol defren taem, oli bin wantem blong smasem gud mifala wet-em ol trik; be mifala i no save kam blong faet agensem olgeta, from ol ples blong haed blong olgeta mo ol strong sapot blong olgeta.

7 Mo i bin hapen se mifala i bin wet long ol had problem ia blong spes blong plante manis, go kasem taem we klosap bae mifala i lus from we mifala i no bin gat kakae.

8 Be i bin hapen se mifala i bin kasem kakae, we wan ami blong tu taosen man i bin karem i kam blong helpem mifala; mo hemia ol help we mifala i bin kasem, blong lukaotem gud mifala mo kantri blong mifala blong mekem se i no foldaon long ol han blong ol enemi blong mifala; yes, blong agensem wan enemi we oli fulap we man i no save kaontem.

9 Mo nao stamba tingting blong ol had taem ia blong mifala, o se from wanem oli no bin sendem moa paoa long mifala, mifala i no bin save; taswe mifala i bin harem nogud mo tu fulap wetem fraet, se bae ol jajmen blong God i kam agensem graon blong mifala long eni kaen wei, blong brekem daon mo smasem gud mifala.

10 Taswe mifala i bin poremaot ol sol blong mifala long prea long God, blong hem i mekem mifala i strong mo tekemaot mifala long ol han blong ol enemi blong mifala, yes, mo tu givim paoa long mifala blong mekem se mifala i save holem taet ol bigtaon blong mifala, mo ol graon blong mifala, mo ol samting blong mifala, blong sapot blong ol man blong mifala.

11 Yes, mo i bin hapen se Lod, God blong mifala i bin soemaot long mifala se bae hem i tekemaot mifala; yes, inaf we i mekem se hem i bin toktok pis long ol sol blong mifala, mo hem i bin givim long mifala bigfala fet, mo mekem mifala blong bae mifala i hop se tru

long hem bae hem i tekemaot mifala.

12 Mo mifala i bin tekem fasin blong no save fraet wetem smol fos blong mifala we mifala i bin kasem, mo i bin gat strong tingting blong winim ol enemi blong mifala, mo blong holem taet ol graon blong mifala, mo ol samting blong mifala, mo ol woman blong mifala, mo ol pikinini blong mifala, mo stamba tingting blong fridom blong mifala.

13 Mo olsem ia nao mifala i bin go aot wetem evri paoa blong mifala agensem ol man blong Leman, we i bin stap long bigtaon blong Mantae; mo mifala i bin stanemap ol tenet blong mifala klosap long saed blong ples we i no gat man long hem, we i klosap long bigtaon.

14 Mo i bin hapen se long tumora blong hem, we taem we ol man blong Leman i bin luk se mifala i stap long ol boda klosap long ples we i no gat man long hem we i klosap long bigtaon, se oli bin sendem ol spae blong olgeta raonabaot mifala blong oli save faenemaot namba mo paoa blong ami blong mifala.

15 Mo i bin hapen se taem we oli bin luk se mifala i no strong, folem ol namba blong mifala, mo from oli bin fraet se bae mifala i stopem olgeta long sapot blong olgeta sapos oli no kam blong faet agensem mifala mo kilim ded mifala, mo tu oli bin ting se oli save smasem gud mifala isi nomo wetem plante ami blong olgeta, taswe

oli bin stat blong mekem rere blong kamaot agensem mifala blong faet.

16 Mo taem we mifala i bin luk se oli stap mekem rere blong kamaot agensem mifala, luk, mi bin mekem se Gid, wetem wan smol namba blong ol man, i mas haedem olgeta long ples we i no gat man long hem, mo tu se Tiamna mo wan smol namba blong ol man i mas haedem olgeta tu long ples we i no gat man long hem.

17 Nao Gid mo ol man blong hem i bin stap long raet saed mo ol narafala i bin stap long lef; mo taem we oli bin haedem olgeta olsem ia, luk, mi bin stap nomo, wetem ol narafala blong ami blong mi, long sem ples ia we mifala i bin stanemap ol tenet blong mifala fastaem blong mekem rere long taem we bae ol man blong Leman i kamaot blong faet.

18 Mo i bin hapen se ol man blong Leman i bin kamaot wetem plante ami blong olgeta agensem mifala. Mo taem we oli bin kam mo oli bin klosap blong atakem mifala wetem naef blong faet, mi bin mekem se ol man blong mi, olgeta we i bin stap wetem mi, oli mas ronwe i go long ples we i no gat man long hem.

19 Mo i bin hapen se ol man blong Leman i bin folem mifala wetem bigfala spid, from we oli bin wantem tumas blong kasem mifala blong mekem se oli save kilim ded mifala; taswe oli bin folem mifala i go long ples we i no gat man long hem;

mo mifala i bin pas klosap long medel blong Gid mo Tiamna, inaf blong mekem se ol man blong Leman i no bin faenemaot olgeta.

20 Mo i bin hapen se taem we ol man blong Leman i bin pas klosap, o taem we ami i bin pas klosap, Gid mo Tiamna i bin girap long ol ples blong haed blong olgeta, mo oli bin blokem ol spae blong ol man blong Leman, blong mekem se bae oli gobak long bigtaon.

21 Mo i bin hapen se taem we oli bin blokem olgeta, oli bin ron i go long bigtaon mo bin atakem ol gad we oli bin livim olgeta blong lukaot long bigtaon, inaf blong mekem se oli bin smasem gud olgeta mo oli bin tekem bigtaon.

22 Nao hemia i bin hapen from we ol man blong Leman i bin letem ful ami blong olgeta, be oli putum smol namba nomo blong ol gadman blong stap, mekem se ol man blong Nifae i lidim olgeta i go long ples we i no gat man long hem.

23 Mo i bin hapen se folem fasin olsem ia nao Gid mo Tiamna tufala i bin kasem ol strong sapot blong olgeta. Mo i bin hapen se mifala i bin tekem rod blong mifala, afta we mifala i bin wokbaot plante long ples we i no gat man long hem i go long graon blong Sarahemla.

24 Mo taem we ol man blong Leman i bin luk se oli stap maj i go long graon blong Sarahemla, oli bin fraet tumas, from oli fraet se i gat wan plan i stap blong lidim olgeta long fasin

blong smasem gud; taswe oli bin stat blong ronwe i go long ples we i no gat man long hem bakegen, yes, mo tu oli bin gobak long sem rod we oli bin kam long hem.

25 Mo luk, i bin naet mo oli bin stanemap ol tenet blong olgeta, from we ol jif kapten blong ol man blong Leman i bin ting se ol man blong Nifae i bin taed from maj blong olgeta; mo from we oli bin ting se oli bin lidim ful ami blong olgeta, taswe oli no bin tingting long saed blong bigtaon blong Mantae.

26 Nao i bin hapen se taem we i bin naet, mi bin mekem se ol man blong mi i no mas slip, be we oli mas maj i go fored long wan narafala rod i go long graon blong Mantae.

27 Mo from maj blong mifala i stap long naet taem, luk, long nekis dei mifala i bin stap long fored blong ol man blong Leman, mekem se mifala i bin kasem bigtaon blong Mantae bifo olgeta.

28 Mo olsem ia nao i bin hapen se, folem trik ia, mifala i bin tekem bigtaon blong Mantae mo i no bin gat blad i ron.

29 Mo i bin hapen se taem we ol ami blong ol man blong Leman i bin kam klosap long bigtaon, mo oli bin luk we mifala i rere blong mitim olgeta, oli bin sapraes tumas mo bigfala fraet i bin kasem olgeta, inaf blong mekem se oli bin ronwe i go long ples we i no gat man long hem.

30 Yes, mo i bin hapen se ol ami blong ol man blong Leman

i bin ronwe aot long evri pat ia blong graon. Be luk, oli bin tekem wetem olgeta plante woman mo pikinini aot long graon.

31 Mo ol bigtaon ia we ol man blong Leman i bin tekem, evriwan long olgeta long taem ia mifala i holem olgeta; mo ol papa blong mifala mo ol woman blong mifala mo ol pikinini blong mifala i stap gobak long ol haos blong olgeta, olgeta be i no olgeta ia we ol man blong Leman i bin tekem olgeta olsem ol prisena mo i bin tekem olgeta i go aot.

32 Be luk, ol ami blong mifala i smol blong holem taet wan bigfala namba blong ol bigtaon mo ol samting we oli bigfala.

33 Be luk, mifala i trastem long God blong mifala we hem i bin givim win long mifala ova long ol graon ia, inaf blong mekem se mifala i bin kasem ol bigtaon ia mo ol graon ia, we oli bin blong mifala nomo.

34 Nao mifala i no save se from wanem gavman i no givim moa paoa long mifala, mo tu ol man ia we oli bin kam long mifala oli no save from wanem we mifala i no kasem moa paoa.

35 Luk, mifala i no save be mifala i ting se yufala i gat sakses, mo yufala i bin tekemaot ol fos i go long pat blong graon longwe; sapos i olsem, mifala i no wantem blong komplem.

36 Mo sapos i no olsem, luk, mifala i fraet se i gat sam rao long gavman, mekem se oli no sendem moa long ol man blong helpem mifala; from mifala i

save se oli moa plante bitim wanem olgeta i bin sendem.

37 Be, luk, i nomata — mifala i trastem se God bae i tekemaot mifala, i nomata se ol ami blong mifala i no gat paoa, yes, mo tekemaot mifala long ol han blong ol enemi blong mifala.

38 Luk, hemia i twenti mo naen yia, long en blong hem, mo mifala i holem ol graon blong mifala, mo ol man blong Leman i bin ronwe i go long graon blong Nifae.

39 Mo ol boe ia blong ol pipol blong Amon, we mi bin talem se oli gud tumas, i stap wetem mi long bigtaon blong Mantae; mo Lod i bin sapotem olgeta, yes, mo hem i bin lukaot gud long olgeta blong mekem se oli no bin ded wetem naef blong faet, inaf blong mekem se i no gat wan sol we i bin ded.

40 Be luk, oli bin kasem plante kil; be oli stanap strong long fridom ia, tru we God i bin mekem olgeta i fri; mo oli strong blong tingbaot Lod, God blong olgeta evri dei; yes, oli stap tingbaot blong obei ol loa blong hem mo ol jajmen blong hem, mo ol komanmen blong hem oltaem; mo fet blong olgeta i strong long ol profesi long saed blong ol samting we bae i kam.

41 Mo nao, brata blong mi we mi lavem tumas, Moronae, bae Lod, God blong yumi we i bin pemaot yumi mo hem i bin mekem yumi fri, holem yu oltaem long fored blong hem; yes, mo bae hem i laekem pipol ia, go kasem we yufala i save gat saksess blong kasem evri

samting we ol man blong Leman i bin tekemaot long yumi, we i bin blong sapotem yumi. Mo nao, luk, mi endem leta blong mi. Mi mi Hileman, boe blong Alma.

---

### JAPTA 59

---

*Moronae i askem Pahoran blong mekem ol fos blong Hileman i kam strong—Ol man blong Leman i tekem bigtaon blong Nefae—Moronae i kros long gavman. Raonabaot 62 yia bifo Kraes i bon.*

NAO i bin hapen long namba teti yia blong rul blong ol jaj ova long ol pipol blong Nifae, afta we Moronae i bin kasem mo bin ridim leta blong Hileman, hem i bin glad tumas from gudfala laef, yes, bigfala saksess we Hileman i bin kasem, long saed blong tekem ol graon ia we oli bin lus.

2 Yes, mo hem i bin mekem olgeta evri man blong hem i save long hem, long evri graon raonabaot long pat ia we hem i bin stap long hem, blong oli save glad tu.

3 Mo i bin hapen se hem i bin sendem wan leta long Pahoran kwiktaem, hem i bin wantem se hem i mekem ol man i kam tugeta blong mekem Hileman i kam strong, o ol ami blong Hileman, inaf blong mekem se hem i save lukaot gud isi pat blong graon we oli kam antap gud olsem wan merikel blong karembak.

4 Mo i bin hapen se taem we Moronae i bin sendem leta ia i



go long graon blong Sarahemla, hem i bin stat bakegen blong mekem wan plan blong mekem se hem i save tekem ol narafala samting ia mo ol bigtaon we ol man blong Leman i bin tekemaot long olgeta.

5 Mo i bin hapen se taem we Moronae i bin stap mekem rere olsem ia blong go agensem ol man blong Leman blong faet, luk, ol pipol blong Nifaeaha, we oli bin kam tugeta aot long bigtaon blong Moronae, mo bigtaon blong Lihae, mo bigtaon blong Morianton, ol man blong Leman i bin atakem olgeta.

6 Yes, olgeta tu we ol man blong Nifae i bin fosem olgeta blong ronwe long graon blong Mantae, mo long graon raonabaot, oli bin kam mo joenem ol man blong Leman long pat ia blong graon.

7 Mo olsem ia nao from we oli plante tumas, yes, mo from we oli kasem paoa evri dei, tru long oda blong Amoron oli bin kam aot agensem ol pipol blong Nifaeaha, mo oli bin stat blong kilim ded olgeta, oli bin smasem gud olgeta oli ded.

8 Mo ol ami blong olgeta i bin plante tumas mekem se ol pipol blong Nifaeaha we oli laef yet oli mas ronwe long fored blong olgeta; mo oli bin kam mo joenem ami blong Moronae.

9 Mo nao from Moronae i bin ting se bae oli sendem ol man blong go long bigtaon blong Nifaeaha, blong helpem ol pipol blong holem taet bigtaon ia, mo hem i save se i moa isi blong holem taet bigtaon blong i no

foldaon long ol han blong ol man blong Leman, bitim blong tekemaot long olgeta, hem i bin ting se bae oli save holem taet bigtaon ia isi nomo.

10 Taswe hem i bin holem taet ol fos blong hem blong holem taet ol ples ia we hem i bin tekembak.

11 Mo nao, taem we Moronae i bin luk se bigtaon blong Nifaeaha i bin lus, hem i bin sore tumas, mo hem i bin stat blong gat tingting we i no strong fulwan, from ol nogud fasin blong ol pipol, sapos bae oli no mas foldaon long ol han blong ol brata blong olgeta.

12 Nao hem i sem samting wetem evri jif kapten blong hem. Oli bin gat tingting we i no strong fulwan mo oli bin sapraes tu from ol nogud fasin blong ol pipol, mo hemia from sakses blong ol man blong Leman ova long olgeta.

13 Mo i bin hapen se Moronae i bin kros long gavman, from fasin ia blong olgeta blong oli no lukaot gud long fridom blong kantri blong olgeta.

---

### JAPTA 60

---

*Moronae i komplem long Pahoran long saed blong fasin blong gavman blong i no lukaot gud long ol ami —Lod i letem ol nogud man i kilim ded olgeta we i stret—Ol man blong Nifae i mas yusum evri paoa blong olgeta mo wei blong olgeta blong sevem olgeta long ol enemi blong olgeta—Moronae i wonem gavman blong faet agensem hem*

*sapos gavman i no givim help long ol ami blong hem. Raonabaot 62 yia bifo Kraes i bon.*

Mo i bin hapen se hem i bin raet bakegen long gavena blong kantri, we hem i Pahoran, mo hemia ol toktok we hem i bin raetem, hem i talem: Luk, leta blong mi i go long Pahoran, long bigtaon blong Sarahemla, we hem i jif jaj mo gavena ova long kantri, mo tu i go long olgeta we ol pipol ia i bin jusum olgeta blong lidim mo lukaotem ol wok blong faet ia.

2 From luk, mi gat samting blong talem long olgeta tru long fasin blong no agri; from luk, yufala i save se ol pipol i bin jusum yufala blong tekem tugeta ol man, mo givim ol naef blong faet long olgeta, mo wetem ol huknaef, mo evri fasin blong ol tul blong faet blong evri kaen, mo sendem fored agensem ol man blong Lemana, long eni pat we bae oli kam insaed long graon blong yumi.

3 Mo nao luk, mi talem long yufala we mi, mo tu ol man blong mi, mo tu Hileman mo ol man blong hem, i bin safa ol bigfala hadtaem we i tumas; yes, long hanggri, tosta, mo taed, mo ol kaen fasin blong hadtaem blong evri kaen.

4 Be luk, sapos i hemia nomo we mifala i bin safa, bae mifala i no save tok agensem o komplem.

5 Be luk, fasin blong kilim ded man i bin bigwan long medel blong ol man blong yumi, yes, ol taosen i bin foldaon ded long

naef blong faet, we sapos no bae i no olsem sapos we yufala i bin givim inaf paoa mo help long ol ami blong mifala. Yes, fasin blong no wantem lukaot gud blong yufala long mifala i bin bigwan.

6 Mo nao luk, mifala i wantem save stamba tingting blong no wantem lukaot gud ia we i bigwan tumas; yes, mifala i wantem save stamba tingting blong yufala blong no gat tingting.

7 Yufala i ting se yufala i save sidaon long ol jea blong yufala mo ol tingting blong yufala i no mas wok, taem we ol enemi blong yufala i stap mekem wok blong ded i go raonabaot yufala? Yes, taem we oli stap kilim ded ol taosen long ol brata blong yufala—

8 Yes, olgeta we oli bin lukluk long yufala blong lukaot long olgeta, yes, oli bin putum yufala long wan ples we maet bae yufala i helpem olgeta, yes, maet yufala i sendem ol ami long olgeta, blong mekem olgeta i kam strong, mo bin sevem ol taosen long olgeta blong oli no foldaon long naef blong faet.

9 Be luk, i no hemia nomo—yufala i bin holem taet ol kakae blong yufala long olgeta, inaf blong mekem se plante long olgeta i bin faet mo blad blong olgeta i ron kasem taem we oli bin ded from ol bigfala tingting we oli bin gat long gudfala laef blong ol pipol ia; yes, mo hemia oli bin mekem taem we oli klosap ded long hanggri, from fasin blong no wantem

lukaot gud blong yufala long olgeta i bigwan tumas.

10 Mo nao ol brata blong mi we mi lavem tumas—from mi nid blong lavem yufala tumas; yes, mo yufala i sud mekem tingting blong yufala moa strong long gudfala laef mo fridom blong ol pipol ia; be luk, yufala i no bin wantem lukaot gud long olgeta, mekem se blad blong ol taosen bae i kam long ol hed blong yufala blong mekem se yufala i kasem panis; yes God i save ol krae blong olgeta, mo ol hadtaem blong olgeta—

11 Luk, yufala i save ting se yufala i save sidaon long ol jea blong yufala, mo from gudgudfala fasin blong God, yufala i save no mekem wan samting mo hem bae i sevem yufala? Luk sapos yufala i bin ting se i olsem ia, yufala i bin ting olsem blong nating nomo.

12 Yufala i ting se, from plante long ol brata blong yufala oli ded hem i from nogud fasin blong olgeta? Mi talem long yufala, sapos yufala i ting se hem i olsem ia tingting blong yufala i bin blong nating nomo; from mi talem long yufala, i gat plante we oli bin faldaon ded long naef blong faet; mo luk, hemia bae i givim panis long yufala.

13 From we Lod i letem olgeta i kilim ded olgeta we i stret, blong mekem se jastis mo jajmen blong hem i save kam agensem ol nogud man, taswe yufala i no mas ting se olgeta we i stret i lus from we oli bin

kilim ded olgeta; be luk, oli go insaed long kingdom blong Lod, God blong olgeta.

14 Mo nao luk, mi talem long yufala, mi fraet tumas se ol jajmen blong God bae i kam long ol pipol ia, from stronghed blong olgeta we i tumas, yes, stronghed blong gavman blong yumi, mo fasin blong oli no wantem lukaot gud long ol brata blong olgeta we i bigfala tumas, yes, long olgeta we oli bin kilim ded olgeta.

15 Sapos we i no bin from nogud fasin we i bin stat long ol lida blong yumi, bae yumi i bin save faetem ol enemi blong mifala blong mekem se oli no save winim paoa long yumi.

16 Yes, sapos i no bin from faet we i bin tekem ples wetem yumi bakegen; yes, sapos i no bin from ol king-man ia, we oli bin mekem plante blad i ron long medel blong yumi bakegen; yes, long taem ia we yumi i stap faet wetem yumi bakegen, sapos yumi i bin joenem paoa blong yumi i kam wan olsem we yumi bin mekem bifo; yes, sapos i no bin from fasin blong wantem paoa mo raet blong kontrol we ol king-man ia i bin gat ova long yumi; sapos oli bin tru long stamba tingting blong fridom blong yumi mo kam wan wetem yumi, mo bin go fored agensem ol enemi blong yumi, long ples blong tekem ol naef blong faet agensem yumi, we i bin mekem fulap blad i ron long medel blong yumi bakegen; yes, sapos yumi bin go fored agensem

olgeta long paoa blong Lod, yumi sud bin ronemaot ol enemi blong yumi, from bae hem i bin hapen, folem fasin blong toktok blong hem i hapen.

17 Be luk, naoia ol man blong Leman i stap kam agensem yumi, oli stap tekem ol graon blong yumi, mo oli stap kilim ded ol pipol blong yumi wetem naef blong faet, yes, ol woman blong yumi mo ol pikinini blong yumi, mo tu oli stap tekem olgeta i go olsem ol prisena, oli mekem olgeta blong safa long evri kaen fasin blong hadtaem, mo hemia i from bigfala nogud fasin blong olgeta ia we oli stap lukaotem blong kasem paoa mo raet blong kontrol, yes, ol king-man ia.

18 Be from wanem mi mas tokbaot samting ia tumas? From mifala i no save be maet yufala bakegen i stap lukaotem raet blong kontrol. Mifala i no save be maet yufala i ol man blong letem kantri blong yufala i go long ol han blong ol enemi.

19 O hem i se yufala i no bin wantem lukaot gud long mifala, from se yufala i stap long medel blong kantri blong yumi, mo ol ples we oli raonem yufala oli sef, mekem se yufala i no wantem blong sendem kakae long mifala, mo tu ol man blong mekem ol ami blong mifala i kam strong?

20 Yufala i bin fogetem ol loa blong Lod, God blong yufala? Yes, yufala i bin fogetem fasin blong kam prisena blong ol bubu blong yumi? Yufala i bin fogetem ol plante taem we God

blong yumi i sevem yumi long ol han blong ol enemi blong yumi?

21 O yufala i ting se bae Lod i sevem yumi yet, taem we yumi sidaon long ol jea blong yumi mo no yusum ol samting we Lod i bin givim long yumi?

22 Yes, bae yufala i sidaon long fasin blong les taem we ol taosen long olgeta ia, oli raonem yufala, yes, mo ol ten blong ol taosen we olgeta tu i sidaon long fasin blong stap les, taem we i gat ol taosen long ol olgeta raonabaot long ol boda blong graon we oli stap foldaon long naef blong faet, yes, oli kasem kil mo blad blong olgeta i ron?

23 Yufala i ting se bae God bae i lukluk long yufala olsem se yufala i no gat rong taem we yufala i sidaon kwaet mo lukluk ol samting ia? Luk mi talem long yufala, No. Nao mi wantem se yufala i tingbaot we God i bin talem se insaed blong kontena bae i kam klin fastaem, mo afta aotsaed blong kontena bae i kam klin tu.

24 Mo nao, sapos yufala i no sakem sin long wanem we yufala i bin mekem, mo stat blong stanap mo mekem, mo sendem aot kakae mo ol man i kam long mifala, mo tu long Hileman, blong mekem se hem i save sapotem ol pat blong kantri blong yumi we hem i bin tekembak, mo blong mekem se mifala tu i save tekembak ol samting blong yumi we oli stap yet long ol pat ia, luk bae i nid blong mifala se mifala i nomo faet wetem ol man blong Leman

kasem taem we mifala i bin klinim insaed long kontena blong mifala fastaem, yes, tu ol bigfala lida blong gavman blong yumi.

25 Mo sapos yufala i no mekem wanem we mi askem long leta blong mi, mo kamaot mo soem long mi wan tru spirit blong fridom, mo traе had blong mekem ol ami blong yumi i kam strong mo leftemap olgeta, mo givim kakae long olgeta blong sapot blong olgeta, luk bae mi livim wan pat blong ol friman blong mi blong holem gud long pat ia blong graon blong mifala, mo bae mi livim paoa mo ol blesing blong God long olgeta, blong mekem se i no gat wan narafala paoa i save wok agensem olgeta—

26 Mo hemia i from fet blong olgeta we i tumas, mo fasin blong save wet longtaem long ol trabol blong olgeta—

27 Mo bae mi kam long yufala, mo sapos i gat eni wan long yufala we i wantem fridom, yes, sapos i gat wan smol pat blong fridom i stap yet, luk bae mi mekem ol strong toktok agensem, long medel blong yufala, go kasem taem we olgeta we oli wantem blong kasem paoa mo raet bae oli nomo gat.

28 Yes, luk mi no fraet long paoa blong yufala o raet blong yufala, be hem i God blong mi we mi fraet long hem; mo hem i folem ol loa blong hem we mi tekem naef blong faet blong mi blong lukaotem gud stamba tingting blong kantri blong mi, mo hemia i from rabis fasin

blong yufala we mifala i bin safa long plante lus.

29 Luk hem i taem, yes, hem i taem nao, we sapos yufala i no stanap blong lukaotem gud kantri blong yufala mo ol piki-nini blong yufala, naef blong faet blong jastis stap antap long yufala; yes, mo bae i foldaon long yufala mo kam long yufala go kasem blong smasem gud yufala fulwan.

30 Luk, mi wet long help long yufala; mo, sapos yufala i no wok blong givhan long mifala, luk, mi kam long yufala, go kasem long graon blong Sarahemla, mo kilim yufala wetem naef blong faet, inaf blong mekem se yufala i no mo save gat paoa blong stopem fasin blong gohed blong ol pipol ia long stamba tingting blong fridom blong yumi.

31 From luk, Lod bae i no let-em se bae yufala i stap laef mo wok strong long ol rabis fasin blong yufala blong smasem gud, ol stret pipol blong hem.

32 Luk, yufala i save ting se bae Lod i sevem yufala mo kamaot long jajmen agensem ol man blong Leman, we hem i kastom blong ol bubu blong olgeta we i bin mekem fasin blong no laekem blong olgeta, yes, mo hem i bin kam antap plante taem wetem olgeta we oli bin pulaot long yumi, taem we rabis fasin blong yufala i from lav blong leftemap nem blong yufala mo ol samting blong wol we oli blong nating?

33 Yufala i save se yufala i brekem ol loa blong God, mo

yufala i save se yufala i purum-but long olgeta andanit long ol leg blong yufala. Luk, Lod i talem long mi: Sapos olgeta we yufala i bin jusum olsem ol gavena blong yufala, oli no sakem ol sin mo rabis fasin blong olgeta, bae yufala i go blong faet agensem olgeta.

34 Mo nao luk, mi, Moronae, mi fosem mi blong, folem kave-nan we mi bin mekem blong holem ol loa blong God blong mi; taswe mi wantem se yufala i obei long toktok blong God, mo sendem kwiktaem long mi ol kakae mo sam long ol man blong yufala, mo tu long Hileman.

35 Mo luk, sapos yufala i no mekem hemia, mi stap kam long yufala kwiktaem; from luk, God bae i no letem se mifala i mas ded from hanggri; taswe bae hem i givim long mifala sam long ol kakae blong yufala, sapos i nid blong wokem wetem naef blong faet. Nao meksua se yufala i mekem toktok blong God i hapen.

36 Luk, mi mi Moronae, jif kapten blong yufala. Mi no lukaotem paoa, be blong pulum daon hem. Mi no lukaotem ona blong wol, be mi lukaotem glori blong God blong mi, mo fridom mo gudfala laef blong kantri blong mi. Mo olsem ia nao mi klosem leta blong mi.

---

JAPTA 61

---

*Pahoran i tokbaot, fasin blong girap agensem mo tok strong*

*agensem gavman, long Moronae — Ol king-man i tekem Sarahemla mo oli joenem ol man blong Leman — Pahoran i askem help long saed blong ami blong go agensem ol man blong toktok agensem. Raonabaot 62 yia bifo Kraes i bon.*

LUK, nao i bin hapen se kwik taem afta we Moronae i bin sendem leta blong hem i go long jif gavena, hem i bin kasem wan leta long Pahoran, jif gavena. Mo hemia ol toktok we hem i bin kasem:

2 Mi, Pahoran, mi we mi jif gavena blong kantri, mi sendem ol toktok ia i go long Moronae, jif kapten ova long ami. Luk, mi talem long yu, Moronae, se mi no glad long ol bigfala hadtaem blong yufala, yes, hemia i mekem sol blong mi i harem nogud.

3 Be luk, i gat olgeta we oli glad long ol hadtaem blong yufala, yes, inaf blong mekem se oli bin girap long fasin blong go agensem, agensem mi, mo tu long ol man blong mi we oli ol friman, yes, mo olgeta ia we oli bin girap agensem oli plante tumas.

4 Mo hemia olgeta ia we oli bin lukaotem blong tekemaot jea blong jajmen long mi we oli bin mekem bigfala nogud fasin ia; from oli bin yusum bigfala swit tok, mo oli bin lidim ol hat blong plante pipol i gowe, we bae i mekem hadtaem we i soa tumas long medel blong yumi; oli bin holem taet ol kakae blong mifala, mo i bin stopem

ol friman blong yumi mekem se oli no bin kam long yufala.

5 Mo luk, oli bin ronemaot mi long fored blong olgeta, mo mi bin ronwe i go long graon blong Gidion, wetem evri man we mi save tekem olgeta.

6 Mo luk, mi bin sendem wan toktok i go truaot long pat ia blong graon; mo luk, oli stap kam long mifala evri dei blong tekem ol tul blong faet blong olgeta, blong lukaotem gud kantri mo fridom blong olgeta, mo blong pembak ol rong we i agensem mifala.

7 Mo oli bin kam long mifala, inaf blong mekem se olgeta ia we oli bin girap blong agensem mifala, mi mo ol man we oli givim sapot long mi, mifala i go agensem olgeta, yes, inaf blong mekem se oli fraet long mifala mo oli fraet blong kam agensem mifala blong faet.

8 Oli bin tekem graon, o bigtaon, blong Sarahemla; oli bin jusum wan king ova long olgeta, mo hem i bin raet i go long king blong ol man blong Lemana, mekem se hem i bin joen wetem hem; long fasin ia blong joen i kam wan hem i bin agri blong lukaot gud long bigtaon blong Sarahemla, we fasin ia blong lukaot gud hem i ting se bae i mekem ol man blong Lemana blong save winim pat blong graon we i stap yet, mo bae ol man blong Lemana i putum hem i kam king ova long ol pipol ia, taem we ol man blong Lemana i winim olgeta.

9 Mo nao, long leta blong yu, yu bin toktok agensem mi, be

i nomata; mi mi no kros, be mi glad long hat blong yu we i gud tumas. Mi, Pahoran, i no lukaotem paoa, be blong holem taet jea blong jajmen blong mi nomo blong mekem se mi save sevem ol raet mo fridom blong ol pipol blong mi. Sol blong mi i stanap strong long fridom ia we God i bin mekem mifala i fri wetem.

10 Mo nao, luk, bae yumi go agensem nogud fasin go kasem blad i ron. Bae yumi no mekem blad blong ol man blong Lemana i ron sapos oli stap long graon blong olgeta nomo.

11 Bae yumi no mekem blad blong ol brata blong yumi i ron sapos oli no girap long fasin blong go agensem, mo tekem naef blong faet agensem yumi.

12 Bae yumi letem yumi long yok blong slef, sapos hem i nid wetem jastis blong God, o sapos hem i givim oda long yumi blong mekem olsem.

13 Be luk hem i no givim oda long yumi blong yumi letem yumi long ol enemi blong yumi, be blong yumi mas putum tras blong yumi long hem, mo bae hem i sevem yumi.

14 Taswe, brata blong mi we mi lavem tumas, Moronae, letem yumi stanap strong agensem nogud fasin mo eni kaen nogud fasin we yumi no save go stanap strong agensem wetem ol toktok blong yumi, yes, olsem ol fasin blong go agensem mo pulaot, letem yumi stanap strong agensem olgeta wetem ol naef blong faet blong yumi, blong mekem se yumi save

holem taet fridom blong yumi, blong yumi save glad long bigfala janis blong jos blong yumi, mo long stamba tingting blong Ridima blong yumi mo God blong yumi.

15 Taswe, kam long mi kwiktaem wetem wan smol namba blong ol man blong yu, mo livim ol narawan long han blong Lihae mo Tiankum; givim long tufala paoa blong lidim faet long pat blong graon, folem Spirit blong God, we i spirit blong fridom tu we i stap long olgeta.

16 Luk mi bin sendem wan smol namba blong ol kakae long olgeta, blong mekem se oli no ded kasem taem we yufala i save kam long mi.

17 Karem i kam tugeta eni fos we yufala i save tekem long maj blong yufala i kam long ples ia, mo bae yumi go kwiktaem agensem ol man we oli bin pulaot, wetem paoa blong God blong yumi, folem fet we i stap long yumi.

18 Mo bae yumi tekem bigtaon blong Sarahemla, blong yumi save kasem moa kakae blong sendem i go aot long Lihae mo Tiankum; yes, bae yumi go aot agensem olgeta wetem paoa blong Lod, mo bae yumi putum wan en long bigfala nogud fasin ia.

19 Mo nao, Moronae, mi mi glad blong kasem leta blong yu, from we mi bin wari long saed blong wanem nao mifala i mas mekem, sapos i stret blong yumi go agensem ol brata blong yumi.

20 Be yu bin talem se, sapos oli no sakem sin Lod i bin givim oda long yu blong yu mas go agensem olgeta.

21 Meksua se yu mekem Lihae mo Tiankum i kam strong long Lod, talem tufala blong no fraet, from God bae i sevem tufala, yes, mo tu olgeta evriwan we oli stanap strong long fridom ia we God i bin mekem olgeta oli fri long hem. Mo nao mi klosem leta blong mi long brata blong mi we mi lavem tumas, Moronae.

---

### JAPTA 62

---

*Moronae i maj blong go helpem Pahoran long graon blong Gidion — Ol king-man we oli no wantem blong lukaotem gud kantri blong olgeta blong oli kilim ded olgeta — Pahoran mo Moronae tufala i tekembak Nifaeha — Plante man blong Leman i joenem ol man blong Amon — Tiankum i kilim ded Amoron mo hem tu ol man blong Leman i kilim hem i ded — Ol man blong Nifae oli ronemaot ol man blong Leman long graon, mo oli stanemap pis — Hileman i gobak long wok mo bildimap Jos. Raonabaot 62–57 yia bifo Kraes i bon.*

Mo nao i bin hapen se taem we Moronae i bin kasem leta ia, hem i bin harem gud, mo hem i bin fulap long glad we i bigwan tumas, from fasin blong yusum fet blong Pahoran, from se hem i no wan man blong letem fridom mo stamba tingting blong kantri blong hem i go long han blong enemi blong hem.



2 Be tu hem i bin krae tumas from nogud fasin blong olgeta we oli bin ronemaot Pahoran long jea blong jajmen, yes, blong endem, from olgeta ia we oli bin go agensem kantri blong olgeta mo tu God blong olgeta.

3 Mo i bin hapen se Moronae i bin tekem wan smol namba blong ol man, folem tingting blong Pahoran, mo hem i bin givim raet blong ami blong hem i go long han blong Lihae mo Tiankum, mo hem i bin maj i go long graon blong Gidion.

4 Mo hem i bin stanemap flag blong fridom long eni ples we hem i bin go insaed, mo hem i bin kasem eni fos we hem i save kasem long evri maj blong hem i go long graon blong Gidion.

5 Mo i bin hapen se plante taosen i bin kam tugeta long flag blong hem, mo oli bin tekem ol naef blong olgeta blong faet blong lukaotem gud fridom blong olgeta, blong oli no save kam slef.

6 Mo olsem ia nao, taem we Moronae i bin tekem i kam tugeta eni man we hem i save tekem long ful maj blong hem, hem i bin kam long graon blong Gidion; mo taem we hem i bin mekem ol fos blong hem mo blong Pahoran i kam wan oli bin kam strong tumas, go kasem we oli moa strong long ol man blong Pakas, we hem i bin king blong olgeta ia we oli pulaot we oli bin ronemaot ol friman long graon blong Sarahemla mo oli bin tekem graon.

7 Mo i bin hapen se Moronae mo Pahoran tufala i bin go daon

wetem ol ami blong tufala long graon blong Sarahemla, mo oli bin go aot agensem bigtaon ia, mo oli bin mitim ol man blong Pakas, inaf blong mekem se oli bin kam blong faet.

8 Mo luk, oli bin kilim ded Pakas mo oli bin tekem ol man blong hem olsem ol prisena, mo oli bin putum Pahoran long jea blong jajmen blong hem bakegen.

9 Mo ol man blong Pakas i bin kasem kot blong olgeta, folem loa, mo tu olgeta king-man ia we oli bin putum olgeta long prisen; mo oli bin panisim olgeta folem loa; yes, ol man ia blong Pakas mo ol king-man ia, eni man we i no bin wantem tekem ol tul blong faet blong lukaotem gud kantri blong olgeta, be i bin wantem blong faet agensem, oli bin kilim olgeta i ded.

10 Mo olsem ia nao i bin kam impoten se ol man blong Nifae oli obei strong long loa ia, from fasin blong kantri blong olgeta i stap sef; yes, mo eni man we oli bin faenem se hem i tanem baksaed long fridom blong olgeta, oli bin panisim hem kwik taem folem loa.

11 Mo olsem ia nao teti yia blong rul blong ol jaj ova long ol pipol blong Nifae i bin en; Moronae mo Pahoran tufala i bin putumbak pis long graon blong Sarahemla, wetem ol pipol blong olgeta nomo, mo oli bin kilim ded olgeta evriwan we oli no bin sapotem stamba tingting blong fridom.

12 Mo i bin hapen long stat blong teti mo wan yia blong rul

blong ol jaj ova long ol pipol blong Nifae, Moronae i bin mekem kwik taem se oli sendem ol kakae, mo tu wan ami blong sikis taosen man bae i go long Hileman, blong helpem hem blong holem taet pat blong graon blong hem.

13 Mo tu hem i bin mekem se oli sendem wan ami blong sikis taosen man, wetem kakae we inaf i go long ol ami blong Lihae mo Tiankum. Mo i bin hapen se Moronae i bin mekem olsem ia blong mekem graon i kam strong blong agensem ol man blong Leman.

14 Mo i bin hapen se Moronae mo Pahoran, tufala i bin livim wan bigfala namba blong ol man long graon blong Sarahemla, tufala i bin tekem maj blong tufala wetem wan bigfala namba blong ol man i go long graon blong Nifae, from we oli bin tingting strong blong winim ol man blong Leman long bigtaon ia.

15 Mo i bin hapen se taem we oli stap maj i go long graon, oli bin tekem wan bigfala namba blong ol man, blong ol man blong Leman, mo oli bin kilim ded plante long olgeta, mo bin tekem ol kakae blong olgeta mo ol tul blong faet blong olgeta.

16 Mo i bin hapen se afta we oli bin tekem olgeta, oli bin mekem olgeta blong mekem wan kavenan blong oli nomo tekem ol tul blong olgeta blong faet agensem ol man blong Nifae.

17 Mo taem we oli bin mekem kavenan ia, oli bin sendem

olgeta blong go stap wetem ol pipol blong Amon, mo namba blong olgeta i klosap fo taosen we oli no bin kilim ded olgeta.

18 Mo i bin hapen se taem we oli bin sendem olgeta i gowe, oli bin gohed long maj blong olgeta i go long graon blong Nifae. Mo i bin hapen se taem we oli bin kam long bigtaon blong Nifae, oli bin stanemap ol tenet blong olgeta long ol ples we i flat blong Nifae, we i klosap long bigtaon blong Nifae.

19 Nao Moronae i bin wantem se ol man blong Leman i kamaot agensem olgeta blong faet, long ol ples we i flat; be ol man blong Leman, oli save se oli gat fasin blong no save fraet we i bigwan tumas, mo oli stap luk bigfala namba blong olgeta, taswe oli bin fraet blong kamaot agensem olgeta; taswe oli no bin kam blong faet long dei ia.

20 Mo taem we naet i bin kam, Moronae i bin go aot long tudak blong naet, mo hem i bin kam long antap blong wol blong spae blong faenemaot wanem pat blong bigtaon we ol man blong Leman i bin kamp wetem ami blong olgeta.

21 Mo i bin hapen se oli bin stap long is, klosap long get; mo olgeta evriwan i stap slip. Mo nao Moronae i bin gobak long ami blong hem, mo hem i bin mekem se oli mekem rere kwiktaem ol strong rop mo ol lada, blong oli putum i go daon long antap blong wol i go daon long insaed pat blong wol.

22 Mo i bin hapen se Moronae

i bin mekem se ol man blong hem i mas maj i go aot mo kam long antap blong wol, mo letem olgeta i go daon insaed long pat ia blong bigtaon, yes, long wes, long ples we ol man blong Leman i no bin kam wetem ol ami blong olgeta.

23 Mo i bin hapen se olgeta evriwan i bin letem olgeta i go daon insaed long bigtaon long naet, oli bin yusum ol strong rop blong olgeta mo ol lada blong olgeta; olsem ia nao taem we moning i bin kam, olgeta evriwan i bin stap insaed long ol wol blong bigtaon.

24 Mo nao, taem we ol man blong Leman i bin wekap mo bin luk se ol ami blong Moronae i bin stap insaed long ol wol, oli bin fraet tumas, inaf blong mekem se oli bin ronwe i go tru long get.

25 Mo nao taem we Moronae i bin luk se oli stap ronwe long fored blong hem, hem i bin mekem se ol man blong hem i mas maj i go aot agensem olgeta, mo oli bin kilim ded plante, mo oli bin raonem plante narafala, mo oli bin tekem olgeta olsem ol prisena; mo ol narafala we i bin stap oli bin ronwe i go long graon blong Moronae, we i bin stap long ol boda klosap long so blong solwota.

26 Olsem ia nao Moronae mo Pahoran tufala i bin tekem bigtaon blong Nifaeha, mo i no bin gat wan sol blong olgeta we i lus; mo i bin gat plante long ol man blong Leman we oli bin kilim ded olgeta.

27 Nao i bin hapen se plante long ol man blong Leman we oli bin prisena i bin wantem blong joenem ol pipol blong Amon mo kam wan fri pipol.

28 Mo i bin hapen se olgeta evriwan we i bin wantem, long olgeta, Moronae mo Pahoran tufala i bin givim folem olsem we oli bin wantem.

29 Taswe, evri prisena blong ol man blong Leman i bin joenem ol pipol blong Amon, mo oli bin stat blong wok tumas, blong wok long graon, planem evri defren kaen sid, mo fidim ol buluk mo ol grup blong ol anamol blong evri kaen; mo olsem ia nao ol man blong Nifae i bin harem se wan samting we i hevi bigwan long olgeta i nomo hevi; yes, inaf blong mekem se oli harem se wan hevi samting long olgeta i nomo hevi from evri prisena blong ol man blong Leman i nomo gat.

30 Nao i bin hapen se Moronae, afta we hem i bin kasem bigtaon blong Nifaeha, hem i bin tekem plante prisena, we i bin daonem ol namba blong ol ami blong ol man blong Leman tumas, mo afta we hem i bin tekembak plante long ol man blong Nifae we oli bin tekem olsem ol prisena, we samting ia i bin mekem ami blong Moronae i kam strong tumas; taswe Moronae i bin aot long graon blong Nifaeha i go long graon blong Lihae.

31 Mo i bin hapen se taem we ol man blong Leman i bin luk se Moronae i stap kam agensem

olgeta, oli bin fraet bakegen mo oli bin ronwe long fored blong ami blong Moronae.

32 Mo i bin hapen se Moronae mo ami blong hem i bin folem olgeta long wan bigtaon i go long narafala bigtaon, kasem taem we Lihae mo Tiankum tufala i bin mitim olgeta; mo ol man blong Leman i bin ronwe long Lihae mo Tiankum, go kasem daon long ol boda klosap long so blong solwota, kasem taem we oli bin kam long graon blong Moronae.

33 Mo ol ami blong ol man blong Leman, evriwan i bin kam tugeta, inaf blong mekem se oli bin kam tugeta long wan grup long graon blong Moronae. Nao Amoron, king blong ol man blong Leman, hem tu i bin stap wetem olgeta.

34 Mo i bin hapen se Moronae mo Lihae mo Tiankum oli bin kam wetem ol ami blong olgeta raonabaot long ol boda blong graon blong Moronae, inaf blong mekem se oli raonem ol man blong Leman long ol boda klosap long ples we i no gat man long hem long saot, mo long ol boda klosap long ples we i no gat man long hem long is.

35 Mo olsem ia nao oli bin kamp blong naet. From luk, ol man blong Nifae mo ol man blong Leman tu i bin taed from bigfala maj ia; taswe oli no bin jusum blong mekem eni trik long naet taem be Tiankum nomo i bin mekem; from we hem i bin kros tumas long Amoron, inaf blong mekem se hem i bin luk se Amoron, mo

Amalekaea brata blong hem, tufala nao i bin mekem se i gat faet ia we i bigwan mo i gohed bitwin olgeta mo ol man blong Leman, we samting ia i bin mekem se i gat plante faet mo blad i ron, yes, mo plante hadtaem blong kasem kakae.

36 Mo i bin hapen se Tiankum long kros blong hem i bin go fored insaed long kamp blong ol man blong Leman, mo bin letem hem i go daon ova long ol wol blong bigtaon. Mo hem i bin go fored wetem wan rop, long wan ples i go long narafala ples, kasem taem we hem i bin faenem king; mo hem i bin sakem wan spia long hem, we i bin stikim hem klosap long hat. Be luk, king i bin wekemap ol wokman blong hem bifo hem i bin ded, inaf blong mekem se oli bin folem Tiankum mo kilim hem i ded.

37 Mo i bin hapen se taem we Lihae mo Moronae tufala i bin save se Tiankum i bin ded tufala i bin harem nogud tumas; from luk, hem i bin wan man we i bin faet strong from kantri blong hem, yes, wan tru fren long fridom; mo hem i bin safa fulap, plante hadtaem we i tumas i bitim mak. Be luk, hem i bin ded, mo bin go long rod ia blong ded blong wol.

38 Nao i bin hapen se Moronae i bin maj i go fored long nekis dei, mo i bin kam agensem ol man blong Leman, inaf blong mekem se oli bin kilim ded olgeta wetem wan bigfala fasin blong kilim ded; mo oli bin ronemaot olgeta long graon; mo

oli bin ronwe, mekem se oli no bin gobak long taem ia agensem ol man blong Nifae.

39 Mo olsem ia nao teti mo wan yia blong ol rul blong ol jaj ova long ol pipol blong Nifae i bin en; mo olsem ia nao oli bin gat ol faet, mo ol blad i ron, mo hadtaem blong kasem kakae, mo hadtaem, blong spes blong plante yia.

40 Mo i bin gat ol fasin blong kilim ded man, mo ol rao, mo ol fasin blong pulaot, mo ol kaen fasin blong nogud fasin long medel blong ol pipol blong Nifae; be from long saed blong olgeta we i stret, yes, from ol prea blong olgeta we i stret, oli bin stap laef yet.

41 Be luk, from faet we i longfala mo i tumas bitwin ol man blong Nifae mo ol man blong Leman plante i bin kam stronghed, from faet we i longfala tumas; mo plante we hat blong olgeta i bin kam sofsof from ol hadtaem blong olgeta, inaf blong mekem se oli bin putum tingting blong olgeta i stap daon long fored blong God, long fasin blong tingting i stap daon we i daon olgeta.

42 Mo i bin hapen se afta Moronae i bin mekem ol pat ia blong graon i kam strong, we oli moa open long ol man blong Leman, kasem taem we oli strong inaf, hem i bin gobak long bigtaon blong Sarahemla; mo tu Hileman i bin gobak long ples blong hem we i kam long ol papa; mo oli bin stanemap pis wan taem bakegen long medel blong ol pipol blong Nifae.

43 Mo Moronae i bin givim raet blong lidim ol ami blong hem i go long ol han blong boe blong hem we nem blong hem i Moronae; mo hem i bin gobak long haos blong hem bakegen blong hem i save spendem ol dei blong laef blong hem we i stap yet long pis.

44 Mo Pahoran i bin gobak long jea blong jajmen blong hem; mo Hileman i bin tekem long hem bakegen blong prij long ol pipol toktok blong God; from plante faet mo ol rao hem i bin mekem se i gat nid blong i gat wan oda i mas stap bakegen long jos.

45 Taswe, Hileman mo ol brata blong hem i bin go aot mo oli bin talemaot toktok blong God wetem plante paoa blong winim tingting blong plante pipol long saed blong nogud fasin blong olgeta, we i bin mekem olgeta blong sakem ol sin blong olgeta mo blong kasem baptaes long Lod, God blong olgeta.

46 Mo i bin hapen se oli bin stanemap bakegen jos blong God, truaot evri graon.

47 Yes, mo oli bin mekem ol oda long saed blong loa. Mo oli bin jusum ol jaj blong olgeta, mo ol jif jaj blong olgeta.

48 Mo ol pipol blong Nifae i bin stat blong kam antap gud bakegen long graon, mo oli bin stat blong kam plante mo blong kam strong tumas bakegen long graon. Mo oli bin stat blong kam rij tumas.

49 Be i nomata long ol rij blong olgeta, o long paoa blong olgeta, o long ol sakses blong olgeta,

oli no bin leftemap olgeta i go antap long hae tingting blong ol ae blong olgeta; mo oli no bin slo blong tingbaot Lod, God blong olgeta; be oli bin putum tingting blong olgeta i stap daon tumas long fored blong hem.

50 Yes, oli bin tingbaot ol bigfala samting we Lod i bin mekem long olgeta, we hem i bin sevem olgeta aot long ded, mo aot long ol rop, mo aot long ol prisen, mo aot long evri kaen hadtaem, mo hem i bin sevem olgeta aot long ol han blong ol enemi blong olgeta.

51 Mo oli bin prea long Lod, God blong olgeta oltaem, inaf blong mekem se Lod i bin blesem olgeta, folem ol toktok blong hem, mekem se oli bin kam strong mo oli bin kam antap gud long graon.

52 Mo i bin hapen se evri samting ia i bin hapen. Mo Hileman i bin kasem ded, long teti mo faef yia blong rul blong ol jaj ova long ol pipol blong Nifae.

---

### JAPTA 63

---

*Siblon mo afta Hileman i tekem ol tabu histri—Plante long ol man blong Nifae i go long graon long not—Hagot i bildim ol sip, we oli sel i go aot long solwota blong wes—Moronaeha i winim ol man blong Leman long faet. Raonabaot 56–52 yia bifo Kraes i bon.*

Mo i bin hapen long stat blong teti mo sikis yia blong rul blong ol jaj ova long ol pipol blong Nifae, se Siblon i bin tekem

ol tabu histri ia we Alma i bin givim long Hileman.

2 Mo hem i bin wan man we i stret, mo hem i bin wokbaot stret long fored blong God; mo hem i bin traehad blong mekem gud fasin oltaem, blong holem ol komanmen blong Lod, God blong hem, mo brata blong hem tu.

3 Mo i bin hapen se Moronae i bin ded tu. Mo olsem ia nao teti mo sikis yia blong rul blong ol jaj i bin en.

4 Mo i bin hapen se long teti mo seven yia blong rul blong ol jaj, i bin gat wan bigfala grup blong ol man, i go kasem faef taosen mo fo handred man, wetem ol woman blong olgeta mo ol pikinini blong olgeta, oli bin aot long graon blong Sarahemla i go insaed long graon we i stap long not.

5 Mo i bin hapen se Hagot, from we hem i bin wan man we i wantem faenemaot samting tumas, taswe hem i bin go aot mo i bin bildim wan sip blong hem we i bigfala tumas, long ol boda blong graon Plante, klosap long graon Emti, mo i bin putum hem long solwota blong wes, klosap long smolfala graon we i bin go long graon long not.

6 Mo luk, i bin gat plante long ol man blong Nifae we oli bin go insaed long sip ia mo oli bin sel i go aot wetem plante kakae, mo tu wetem plante woman mo ol pikinini; mo oli bin tekem rod blong olgeta i go long not. Mo olsem ia nao teti mo seven yia i bin en.

7 Mo long teti mo eit yia, man ia i bin bildim ol narafala sip. Mo fas sip i bin kambak tu, mo plante moa pipol i bin go insaed long hem; mo olgeta tu i bin tekem plante kakae, mo oli bin go aot bakegen long graon long not.

8 Mo i bin hapen se ol man blong Nifae oli neva bin harem moa nius blong olgeta ia. Mo mifala i bin ting se oli bin draon long ol dip ples blong solwota. Mo i bin hapen se wan narafala sip tu i bin sel i go aot; mo wea ples hem i bin go mifala i no save.

9 Mo i bin hapen se long yia ia i bin gat plante pipol we oli bin go aot long graon we i go long not. Mo olsem ia nao teti mo eit yia i bin en.

10 Mo i bin hapen long teti mo naen yia blong rul blong ol jaj, Siblon i bin ded tu, mo Korian-ton i bin go aot long graon we i go long not long wan sip, blong karem ol kakae i go aot long ol pipol we oli bin go aot long graon ia.

11 Taswe i bin kam impoten blong Siblon i givimaot ol tabu samting ia, bifo long ded blong hem, long boe blong hem Hileman, we oli bin singaotem hem Hileman, from oli bin singaotem hem long nem blong papa blong hem.

12 Nao luk, ol raeting ia we

Hileman i bin holem, oli bin raetem olgeta mo sendem i go aot long ol pikinini blong ol man truaot evri graon, be i no long ol pat ia we Alma i bin givim oda se bae oli no mas go.

13 Be, ol samting ia oli mas holem i tabu, mo oli pasem i kam daon stat long wan jeneresen i go long narafala wan; taswe, long yia ia, oli bin pasem i go long Hileman, bifo ded blong Siblon.

14 Mo i bin hapen tu se long yia ia we i bin gat sam long olgeta we oli pulaot we oli bin go aot long ol man blong Lemman; mo oli bin stat bakegen blong tanem tingting blong oli kros long ol man blong Nifae.

15 Mo tu long semfala yia ia oli bin kam daon wetem wan bigfala namba blong ami blong faet agensem ol pipol blong Moronaeha, o agensem ami blong Moronaeha, long faet ia ol man blong Nifae i bin winim olgeta mo oli bin ronem olgeta i gobak bakegen long ol graon blong olgeta bakegen, mo oli bin safa bigfala lus.

16 Mo olsem ia nao teti mo naen yia blong rul blong ol jaj ova long ol pipol blong Nifae i bin en.

17 Mo olsem ia nao histri blong Alma i bin en, mo Hileman boe blong hem, mo tu Siblon, we i boe blong hem.

# BUK BLONG HILEMAN

**W**an histri blong ol man blong Nifae. Ol faet blong olgeta mo ol rao, mo ol fasin blong pulaot blong olgeta. Mo tu ol profesi blong plante tabu profet, bifo Kraes i kam, folem ol histri blong Hileman, we hem i bin boe blong Hileman, mo tu folem ol histri blong ol boe blong hem, kasem taem we Kraes i kam. Mo tu plante long ol man blong Leman i jenisim laef. Wan histri blong jenisim laef blong olgeta. Wan histri blong stret fasin blong ol man blong Leman, mo ol nogud fasin mo ol rabis sin blong ol man blong Nifae, folem histri blong Hileman mo ol boe blong hem, kasem taem we Kraes i kam, we oli singaotem buk blong Hileman, mo samfala samting moa.

## JAPTA 1

*Pahoran nambatu i kam jif jaj mo Kiskumen i kilim hem i ded—Pekumenaes i tekem jea blong jajmen—Koriantuma i lidim ol ami blong ol man blong Leman, hem i tekem Sarahemla, mo kilim ded Pekumenaes—Moronaeha i winim ol man blong Leman mo i tekem bakegen Sarahemla, mo Koriantuma i ded. Raonabaot 52–50 yia bifo Kraes i bon.*

**M**O nao luk, i bin hapen se blong stat blong foti yia we ol jaj i stap rulum ol pipol blong Nifae, i bin stat blong gat wan bigfala trabol we i nogud tumas long medel blong ol pipol blong ol man blong Nifae.

2 From luk, Pahoran i bin ded, mo i bin go long rod blong wol; taswe i bin stat blong gat wan bigfala rao long saed blong huia bae i tekem jea blong jajmen long medel blong ol brata, we oli bin ol boe blong Pahoran.

3 Nao hemia i ol nem blong olgeta we oli bin rao from jea blong jajmen, we oli bin mek-

em tu ol pipol i rao: Pahoran, Peankae, mo Pekumenaes.

4 Nao hemia i no evri boe blong Pahoran (from hem i bin gat plante), be hemia i olgeta we i bin rao from jea blong jajmen; taswe, oli bin mekem tri grup long ol pipol.

5 I nomata, i bin hapen se voes blong ol pipol i jusum Pahoran blong kam jif jaj mo wan gavena ova long ol pipol blong Nifae.

6 Mo i bin hapen se Pekumenaes, taem we hem i bin luk se hem i no save kasem jea blong jajmen, hem i bin agri wetem voes blong ol pipol.

7 Be luk, Peankae, mo pat blong pipol ia we i bin wantem se hem i kam gavena blong olgeta, i bin kros tumas; taswe, hem i bin rere blong switim ol pipol ia blong girap mo go agensem ol brata blong olgeta.

8 Mo i bin hapen se taem we hem i bin rere blong mekem samting ia, luk, ol pipol i bin tekem hem, mo hem i bin kasem jajmen folem voes blong ol pipol, mo oli bin panisim hem blong i ded; from hem i bin



girap mo go agensem ol pipol mo i bin lukaotem blong smasem gud fridom blong ol pipol.

9 Nao taem we ol pipol we oli bin wantem se hem bae i kam gavena blong olgeta, i bin luk se oli bin panisim hem blong ded, taswe oli bin kros, mo luk, oli bin sendem i go aot wan Kiskumen, go kasem long jea blong jajmen blong Pahoran, mo i bin kilim ded Pahoran taem we hem i bin sidaon long jea blong jajmen.

10 Mo ol wokman blong Pahoran i bin ronem hem; be luk, ronwe blong Kiskumen i kwik we i kwik mekem se i no gat man we i save kasem hem.

11 Mo hem i bin go long olgeta we oli bin sendem hem, mo olgeta evriwan i bin mekem wan kavenan, yes, oli promes tru long nem blong Krieta blong olgeta we i no save finis, blong bae oli no talemaot long eni man we Kiskumen i bin kilim ded Pahoran.

12 Taswe, ol pipol blong Nifae i no bin save Kiskumen long medel blong olgeta, from hem i bin mekem hem i luk defren taem we hem i bin kilim ded Pahoran. Mo Kiskumen mo grup blong hem, we i bin kavenan wetem hem, oli bin miksimap olgeta long medel blong ol pipol, long wan fasin we blong oli no faenem olgeta evriwan; be olgeta we oli bin faenem oli bin panisim olgeta blong oli ded.

13 Mo nao luk, oli bin jusum Pekumenae, folem voes blong ol pipol, blong stap olsem wan jif jaj mo wan gavena ova long

ol pipol, blong rul long ples blong brata blong hem Pahoran; mo i bin folem raet blong hem. Mo evri samting ia i bin hapen long namba foti yia blong rul blong ol jaj; mo i bin gat wan en.

14 Mo i bin hapen long foti mo wan yia blong rul blong ol jaj, se ol man blong Leman i bin karem i kam tugeta, wan ami blong ol man we oli no save kaontem, mo oli bin mekem olgeta i rere blong faet wetem ol naef blong faet, mo wetem ol huknaef mo wetem ol bonara, mo wetem ol ara, mo wetem ol hat blong faet, mo wetem ol plet we i blong kavremap jes, mo wetem evri kaen sil blong evri kaen.

15 Mo oli bin kam daon bak-egen blong oli save statem faet agensem ol man blong Nifae. Mo wan man we nem blong hem i bin Koriantuma i bin lidim olgeta; mo hem i bin wan man blong laen blong Sarahemla; mo hem i bin pulaot long ol man blong Nifae; mo hem i bin wan man we i bigfala mo i strong.

16 Taswe, king blong ol man blong Leman, we nem blong hem i bin Tabalot, we i bin boe blong Amoron, hem i ting se Koriantuma, from hem i wan strong man, i bin save stanap agensem ol man blong Nifae, wetem paoa blong hem mo tu wetem bigfala waes tingting blong hem, inaf blong mekem se taem we hem i bin sendem hem i go aot bae hem i save winim paoa ova long ol man blong Nifae.

17 Taswe hem i bin mekem olgeta blong kam kros, mo hem i bin karem i kam tugeta ol ami blong hem, mo hem i bin jusum Koriantuma blong kam lida blong olgeta, mo i bin mekem se oli mas maj i go daon long graon blong Sarahemla blong faet agensem ol man blong Nifae.

18 Mo i bin hapen se from i bin gat plante rao mo plante problem long gavman, mekem se oli no bin putum inaf gadman long graon blong Sarahemla; from oli bin ting se ol man blong Leman i bin fraet blong kam long hat blong ol graon blong olgeta blong atakem bigfala bigtaon ia Sarahemla.

19 Be i bin hapen se Koriantuma i bin maj i go aot long fored blong ol soldia blong hem we oli no bin save kaontem, mo oli bin kam long ol man we i stap long bigtaon, mo maj blong olgeta i bin kwik we i kwik tumas mekem se i no bin gat taem blong ol man blong Nifae blong karem i kam tugeta ol ami blong olgeta.

20 Taswe Koriantuma i bin katem daon ol gadman klosap long get blong bigtaon, mo i bin maj i go fored wetem evri ami blong hem insaed long bigtaon, mo oli bin kilim ded evri man we i bin go agensem olgeta, mekem se oli bin tekem ful bigtaon ia.

21 Mo i bin hapen se Pekumenae, we i bin jif jaj, i bin ronwe long fored blong Koriantuma, i go kasem ol wol blong bigtaon. Mo i bin hapen se Koriantuma i

bin kilim hem agensem wol, inaf blong mekem se hem i bin ded. Mo olsem ia nao ol dei blong Pekumenae i bin en.

22 Mo nao taem we Koriantuma i bin luk se hem i bin tekem bigtaon blong Sarahemla, mo i bin luk se ol man blong Nifae i bin ronwe long fored blong olgeta, mo oli bin kilim ded olgeta, mo oli bin tekem olgeta, mo oli bin putum olgeta long prisem, mo we hem i bin kasem ples blong haed blong olgeta we i moa strong long evri graon, hat blong hem i bin harem gud mekem se hem i bin rere blong go aot long evri graon.

23 Mo nao hem i no bin stap long graon blong Sarahemla, be hem i bin maj i go aot wetem wan bigfala ami, hem i go long bigtaon blong Plante; from hemia i bin strong tingting blong hem blong go aot mo katem rod blong hem wetem naef blong faet, blong maet hem i save kasem ol not pat blong graon.

24 Mo, from hem i bin ting se bigfala paoa blong olgeta i bin stap long medel blong graon, taswe hem i bin maj i go fored, hem i no bin givim olgeta eni taem blong olgeta bakegen i kam tugeta, be long ol smol grup nomo; mo long fasin ia oli bin atakem olgeta mo oli bin katem daon olgeta i go long graon.

25 Be luk, maj ia blong Koriantuma tru long medel blong graon i bin givim Moronaeha wan bigfala janis ova long olgeta, i nomata long bigfala

namba blong ol man blong Nifae we oli bin kilim ded olgeta.

26 From luk, Moronaeha i bin ting se ol man blong Leman i bin fraet blong kam long medel blong graon, be se bae oli atakem ol bigtaon raonabaot long ol boda olsem we oli bin mekem long bifo; taswe Moronaeha i bin mekem se ol strong ami blong olgeta i mas holem taet ol pat raonabaot klosap long ol boda.

27 Be luk, ol man blong Leman i no bin fraet olsem we hem i bin wantem, be oli bin kam insaed long medel blong graon, mo oli bin tekem kapitol bigtaon we i bin bigtaon blong Sarahemla, mo oli bin stap maj i go tru long ol impoten pat blong graon, oli kilim ded ol pipol wetem wan bigfala namba, ol man tugeta wetem ol woman, mo ol pikinini, oli tekem plante bigtaon mo plante ples blong strong sapot.

28 Be taem we Moronaeha i bin faenemaot samting ia, kwiktaem hem i bin sendem Lihae i go fored wetem wan ami raonabaot blong stopem olgeta bifo oli save kam long graon blong Plante.

29 Mo olsem ia nao hem i bin mekem, mo hem i bin stopem olgeta bifo oli bin kam long graon Plante, mo i givim long olgeta wan faet, inaf blong mekem se oli bin stat blong gobak long graon blong Sarahemla.

30 Mo i bin hapen se Moronaeha i bin stopem olgeta long gobak blong olgeta, mo i bin

givim long olgeta wan faet, inaf blong mekem se i bin kam wan faet we blad i ron tumas, yes, oli bin kilim ded plante, mo long medel blong olgeta we oli bin kilim ded oli bin faenem Koriantuma.

31 Mo nao, luk, ol man blong Leman i no bin save gobak long eni rod, mo tu long not, o long saot, o long is, o long wes, from ol man blong Nifae i bin raonem olgeta long evri saed.

32 Mo olsem ia nao Koriantuma i bin pusum ol man blong Leman i go long medel blong ol man blong Nifae, inaf blong mekem se oli bin stap long paoa blong ol man blong Nifae, mo hem hemwan i bin ded, mo ol man blong Leman i givim olgeta nomo long ol han blong ol man blong Nifae.

33 Mo i bin hapen se Moronaeha i bin tekem bigtaon blong Sarahemla bakegen, mo hem i bin mekem se ol man blong Leman we oli bin tekem olgeta olsem ol prisena, i mas aot long graon wetem pis.

34 Mo olsem ia nao foti mo wan yia blong rul blong ol jaj i bin en.

---

## JAPTA 2

---

*Hileman, boe blong Hileman, i kam jif jaj—Gadianton i lidim grup blong Kiskumen—Wokman blong Hileman i kilim ded Kiskumen, mo Gadianton grup i ronwe i go long ples we i no gat man long hem. Raonabaot 50–49 yia bifo Kraes i bon.*

Mo i bin hapen se long foti mo tu yia long rul blong ol jaj, afta we Moronaeha i bin stanemap pis bakegen bitwin ol man blong Nifae mo ol man blong Leman, luk i no bin gat eni man blong tekem jea blong jajmen; taswe i bin stat blong gat wan rao bakegen long medel blong ol pipol long saed blong huia bae i tekem jea blong jajmen.

2 Mo i bin hapen se Hileman, we i bin boe blong Hileman, ol pipol i bin jusum hem blong tekem jea blong jajmen, folem voes blong ol pipol.

3 Be luk, Kiskumen, we i bin kilim ded Pahoran, i bin stap haed blong kilim ded Hileman tu; mo grup blong hem i bin sapotem hem, we i bin mekem wan kavenan blong i no gat eni man we i save nogud fasin blong hem.

4 From i bin gat wan Gadian-ton, we i bin gud long ol plante toktok, mo tu long ol fasin blong trik blong hem, blong mekem ol sikret wok blong kilim ded man mo long fasin blong stil; taswe hem i bin kam lida blong grup blong Kiskumen.

5 Taswe hem i bin tok switim olgeta, mo tu Kiskumen, se sapos oli putum hem long jea blong jajmen bae hem i givim long olgeta we oli blong grup ia blong bae oli putum olgeta long paoa mo raet long medel blong ol pipol; taswe Kiskumen i bin lukaotem blong kilim ded Hileman.

6 Mo i bin hapen se taem we hem i stap go fored long jea blong jajmen blong kilim ded

Hileman, luk wan long ol wokman blong Hileman, from hem i bin aot long naet, mo from hem i bin kasem, tru long fasin blong mekem i luk defren, wan save long ol plan ia we grup ia i bin mekem blong kilim ded Hileman—

7 Mo i bin hapen se hem i bin mitim Kiskumen, mo hem i bin givim long hem wan saen; taswe Kiskumen i bin talem long hem stamba tingting blong wanem we hem i wantem, hem i bin wantem se hem i lidim hem i go long jea blong jajmen blong hem i save kilim ded Hileman.

8 Mo taem we wokman blong Hileman i bin save ful hat blong Kiskumen, mo we hem i plan blong hem blong kilim man i ded, mo tu we i bin plan blong olgeta evriwan we oli blong grup blong hem blong kilim man i ded, mo blong stil, mo blong kasem paoa, (mo hemia i bin sikret plan blong olgeta, mo grup blong olgeta) wokman blong Hileman i bin talem long Kiskumen: Bae yumitu go fored long jea blong jajmen.

9 Nao samting ia i bin mekem Kiskumen i hapi tumas, from hem i bin ting se bae hem i finisim plan blong hem; be luk, wokman blong Hileman, taem we oli stap go fored long jea blong jajmen i bin stikim Kiskumen long hat, mekem se hem i bin foldaon ded be hem i no bin mekem wan noes. Mo tu hem i bin ron mo i bin talem long Hileman evri samting

we hem i bin lukim, mo i bin harem, mo i bin mekem.

10 Mo i bin hapen se Hileman i bin sendem i go aot blong tekem grup ia blong ol stilman mo olgeta we i kilim man i ded long sikret, blong oli save kilim ded olgeta folem loa.

11 Be luk, taem we Gadianton i bin faenemaot se Kiskumen i no bin kambak, hem i bin fraet se bae oli panisim hem; taswe hem i bin mekem se grup blong hem i mas folem hem. Mo oli bin ronwe i go aot long graon, folem wan sikret rod, i go long ples we i no gat man long hem; mo olsem ia nao taem we Hileman i bin sendem i go aot blong tekem olgeta, oli no bin save faenem olgeta long eni ples.

12 Mo moa long saed blong Gadianton bae mi tokbaot yet. Mo olsem ia nao foti mo tu yia blong rul blong ol jaj ova long ol pipol blong Nifae i bin en.

13 Mo luk, long en blong buk ia bae yufala i luk se Gadianton ia i bin kam blong winim, yes, klosap smasem gud evriwan ol pipol blong Nifae.

14 Luk mi no minim en blong buk blong Hileman, be mi minim en blong buk blong Nifae, we mi bin tekemaot evri histri long hem we mi bin raetem.

---

### JAPTA 3

---

*Plante man blong Nifae oli aot i go long graon we i long not—Oli bildim ol haos simen mo oli holem plante histri—Plante ten blong ol taosen i jenisim laef mo kasem*

*baptaes—Toktok blong God i lidim ol man blong kam long fasin blong sevem man—Nifae boe blong Hileman i tekem jea blong jajmen. Raonabaot 49-39 yia bifo Kraes i bon.*

Mo nao i bin hapen se long foti mo tri yia blong rul blong ol jaj, i no bin gat rao long medel blong ol pipol blong Nifae, be i gat wan smol fasin blong hae tingting we i bin stap long jos, we i bin mekem se i gat sam smol fasin blong pulaot long medel blong ol pipol, we ol problem ia oli bin stretem klosap long en blong foti mo tri yia.

2 Mo i no bin gat rao long medel blong ol pipol long foti mo fo yia; mo tu i no bin gat tumas rao long foti mo faef yia.

3 Mo i bin hapen long foti mo sikis, yes, i bin gat plante rao mo plante fasin blong pulaot; long ol samting ia, i bin gat wan bigfala namba we i bin aot long graon blong Sarahemla, mo i bin go aot long graon long not blong tekem graon.

4 Mo oli bin wokbaot i go longwe tumas, inaf blong mekem se oli bin kam kasem ol bigfala wota mo plante reva.

5 Yes, mo tu oli bin go long evri pat blong graon, long eni pat we oli no bin mekem se i emti mo i no gat ol tri, from ol plante pipol we i bin stap bifo long graon.

6 Mo nao i no bin gat wan pat blong graon we i bin emti, hemia nomo sapos i no long saed blong ol tri; be from bigfala smas we i bin hapen long

ol pipol we i bin stap long graon bifo, oli bin singaotem graon ia emti.

7 Mo from we i bin gat smol namba nomo blong ol tri long fes blong graon, be ol pipol we i bin go aot oli bin kam blong gat fulap save long ol wok blong simen; taswe oli bin bildim ol haos simen, oli bin stap long ol haos ia.

8 Mo i bin hapen se oli bin kam plante mo oli bin go olbaot, mo oli bin go fored aot long graon long saot i go long graon long not, mo oli bin go olbaot inaf blong mekem se oli bin stat blong kavremap fes blong ful graon, stat long solwota long saot kasem long solwota long not, stat long solwota long wes kasem long solwota long is.

9 Mo ol pipol we i bin stap long graon long not i bin stap long ol tenet, mo long ol haos simen, mo oli bin letem eni kaen tri we i bin kam antap long fes blong graon se bae i mas gru antap, blong mekem se long taem we bae i kam oli save gat ol wud blong bildim ol haos blong olgeta, yes, ol bigtaon blong olgeta, mo ol tempol blong olgeta, mo ol haos blong prea blong olgeta, mo ol ples blong wosip blong olgeta, mo evri kaen haos blong olgeta.

10 Mo i bin hapen se from we ol wud i no plante tumas long graon long not, oli bin sendem plante tru long ol sip.

11 Mo olsem ia nao oli bin mekem blong ol pipol long graon long not, blong oli save

bildim plante bigtaon, long wud tugeta wetem simen.

12 Mo i bin hapen se i bin gat plante long ol pipol blong Amon, we oli ol man blong Lemam folem laen we oli bon long hem, olgeta tu oli go aot long graon ia.

13 Mo nao i bin gat plante histri we oli bin mekem long saed blong ol fasin blong pipol ia, plante long ol pipol ia i bin mekem, we ol histri ia i gat ol smolsmol samting blong talem mo oli plante, long saed blong olgeta.

14 Be luk, wan hundred pat blong ol fasin blong pipol ia, yes, histri blong ol man blong Lemam mo ol man blong Nifae, mo ol faet blong olgeta, mo ol rao, mo ol fasin blong pulaot, mo ol prijing blong olgeta, mo ol profesi blong olgeta, mo ol wok blong sendem ol saplae long sip blong olgeta, mo ol wok blong olgeta blong bildim ol sip, mo ol wok blong olgeta blong bildim ol tempol, mo blong ol haos blong prea mo ol ples blong wosip blong olgeta, mo ol stret fasin blong olgeta, mo ol nogud fasin blong olgeta, mo ol fasin blong kilim ded man blong olgeta, mo ol fasin blong stil blong olgeta, mo ol fasin blong stil blong olgeta long taem blong faet, mo evri kaen fasin blong ol rabis sin mo ol fasin blong stap slip olbaot, i no save stap insaed long wok ia.

15 Be luk, i gat plante buk mo plante histri blong evri kaen, mo ol man blong Nifae nao i bin mekem olgeta moa.

16 Mo ol man blong Nifae i bin pasem ol samting ia i go daon long wan jeneresen i go long narafala jeneresen, go kasem taem we oli bin foldaon long fasin blong brekem loa mo ol enemy blong olgeta i bin kilim ded olgeta, oli bin stilim olgeta long taem blong faet, mo oli bin lukaotem olgeta blong kasem olgeta, mo oli bin ronem olgeta i go aot, mo oli bin kilim ded olgeta, mo oli bin seraotem olgeta long fes blong graon, mo oli bin miksim olgeta wetem ol man blong Leman kasem taem we oli nomo singaotem olgeta ol man blong Nifae, oli kam ol nogud, mo wael, mo prapa wael, yes, oli kam ol man blong Leman.

17 Mo nao mi gobak bakegen long histri blong mi; taswe, wanem we mi bin tokbaot i bin hapen afta we i bin gat ol bigfala rao, mo ol fasin blong gat trabol, mo ol faet, mo ol fasin blong pulaot, long medel blong ol pipol blong Nifae.

18 Foti mo sikis yia blong rul blong ol jaj i bin en;

19 Mo i bin hapen se i bin stil gat bigfala rao long graon, yes, hem i long foti mo seven yia, mo tu long foti mo eit yia.

20 Be Hileman i bin tekem jea blong jajmen wetem jastis mo stret jastis; yes, hem i bin holem ol loa, mo ol jajmen, mo ol komanmen blong God; mo hem i bin mekem ol samting we i stret long ae blong God oltaem; mo hem i bin wokbaot folem ol fasin blong papa blong hem,

inaf blong mekem se hem i kam antap gud long graon.

21 Mo i bin hapen se hem i bin gat tu boe. Hem i bin givim long fas bon nem blong Nifae, mo long las bon nem blong Lihae. Mo oli bin stat blong gru i kam antap, blong Lod.

22 Mo i bin hapen se ol faet mo ol rao i bin stat blong stop, smol nomo, long medel blong ol pipol blong ol pipol blong Nifae, long en blong foti mo eit yia blong rul blong ol jaj ova long ol pipol blong Nifae.

23 Mo i bin hapen long foti mo naen yia blong rul blong ol jaj, i bin gat pis oltaem i stanap long graon, evri ples, be ol sikret grup nomo we Gadianton man blong stil i bin stanemap long ol pat blong graon we moa pipol i stap long olgeta, we long taem ia olgeta we oli bin lidim gavman i no bin save olgeta; taswe oli no bin smasem gud olgeta aot long graon.

24 Mo i bin hapen se long sem yia ia i bin gat fasin blong kam antap gud long jos we i bigwan tumas, inaf blong mekem se i bin gat ol taosen we i bin joenem olgeta nomo long jos mo oli bin baptaes blong sakem sin.

25 Mo sakses blong jos i bin bigwan tumas, mo plante ol blesing we Lod i bin poremaot long ol pipol, we i mekem se ol hae pris mo ol tija olgeta bakegen i bin sapraes bitim mak.

26 Mo i bin hapen se wok blong Lod i bin kam antap gud mekem se oli bin baptaesem mo joenem long jos blong God

plante sol, yes, go kasem ol ten blong ol taosen.

27 Olsem ia nao yumi save luk se Lod i gat sore long olgeta evriwan we bae oli singaotem tabu nem blong hem wetem ol tru hat blong olgeta.

28 Yes, olsem ia nao yumi luk se get blong heven i open long evri man, long olgeta we bae oli biliv long nem blong Jisas Kraes tu, we i Pikinini blong God.

29 Yes, yumi luk se eni man we i wantem, i save holem taet toktok blong God, we i kwik mo i gat paoa, we bae i save brekem ol trik mo ol rop blong trap mo ol plan blong devel, mo lidim ol man blong Kraes long wan stret mo smol rod long narasaed long bigfala hol blong harem nogud we i no save finis, we i rere blong solemdaon ol nogud man—

30 Mo putum ol sol blong olgeta, yes, ol sol blong olgeta we oli no save ded bakegen, long raet han blong God long kingdom blong heven, blong sidaon wetem Ebrahim, mo Aesak, mo wetem Jakob, mo wetem evri tabu papa blong yumi, blong go nomo aot.

31 Mo long yia ia i bin gat glad oltaem long graon blong Sarahemla, mo long evri eria raonabaot, we i long evri graon we ol man blong Nifae i bin holem taet.

32 Mo i bin hapen se i bin gat pis mo bigfala glad we i tumas long ol narafala pat blong foti mo naen yia; yes, mo tu i bin gat pis oltaem mo bigfala glad

long fifti yia blong rul blong ol jaj.

33 Mo long fifti mo wan yia blong rul blong ol jaj i bin gat pis tu, be i bin gat hae tingting we i bin stat blong go insaed long jos—i no go insaed long jos blong God, be insaed long ol hat blong ol pipol we i bin talemaot se oli blong jos blong God—

34 Mo oli bin leftemap olgeta long hae tingting, kasem we oli bin givim hadtaem long plante long ol brata blong olgeta. Nao hemia i bin wan nogud fasin we i bigwan, we i bin mekem se ol pipol we tingting blong olgeta i stap daon moa blong safa ol bigfala hadtaem, mo blong wokbaot tru long plante hadtaem.

35 Be oli bin livim kakae mo oli bin prea plante taem, mo oli bin kam moa strong mo moa strong long fasin blong tingting i stap daon blong olgeta, mo oli bin kam moa strong mo moa strong long fet blong Kraes, mekem se oli bin fulumap ol sol blong olgeta wetem glad mo fasin blong leftemap tingting blong harem gud bakegen, hem i mekem se ol hat blong olgeta i kam klin mo tabu, we fasin blong mekem i kam tabu i kam from we oli givim ol hat blong olgeta long God.

36 Mo i bin hapen se fifti mo seken yia i bin en wetem pis tu, be ol fasin blong flas we i bigwan tumas we i bin go insaed long ol hat blong ol pipol; mo hemia i bin from ol rij blong



olgeta we i bigwan tumas mo ol fasin blong kam antap gud blong olgeta long graon; mo samting ia i bin gru long olgeta long evri dei.

37 Mo i bin hapen long fifti mo tri yia blong rul blong ol jaj, Hileman i bin ded, mo fas bon boe blong hem Nifae i bin stat blong rul long ples blong hem. Mo i bin hapen se hem i bin tekem jea blong jajmen wetem jastis mo stret jastis; yes, hem i bin holem ol komanmen blong God, mo i bin wokbaot long ol fasin blong papa blong hem.

---

#### JAPTA 4

---

*Ol man blong Nifae we oli bin pulaot mo ol man blong Leman i joenem ol fos mo oli tekem graon blong Sarahemla—Ol lus blong ol man blong Nifae i hapen from ol nogud fasin blong olgeta—Jos i kam smol, mo ol pipol i kam slak olsem ol man blong Leman. Raonabaot 38-30 yia bifo Kraes i bon.*

Mo i bin hapen long fifti mo fo yia i bin gat plante fasin blong pulaot long jos, mo i bin gat tu wan rao long medel blong ol pipol, inaf blong mekem se plante blad i ron.

2 Mo pat we oli go agens oli bin kilim ded olgeta mo oli bin ronem olgeta aot long graon, mo oli bin go long king blong ol man blong Leman.

3 Mo i bin hapen se oli bin traem blong tanem ol tingting blong ol man blong Leman blong faet agensem ol man blong Nifae; be luk, ol man

blong Leman i bin fraet tumas, inaf blong mekem se oli no bin save lisin long ol toktok blong olgeta we oli bin pulaot.

4 Be i bin hapen long fifti mo sikis yia blong rul blong ol jaj, i bin gat olgeta we i bin pulaot we i bin go long ol man blong Leman; mo oli bin gat sakses wetem ol narafala wan blong tanem tingting blong olgeta blong kam kros agensem ol man blong Nifae; mo olgeta evriwan long yia ia i stap mekem rere blong faet.

5 Mo long fifti mo seven yia oli bin kam daon agensem ol man blong Nifae blong faet, mo oli bin statem wok blong kilim man i ded; yes, inaf blong mekem se long fifti mo eit yia blong rul blong ol jaj oli bin gat sakses blong tekem graon blong Sarahemla; yes, mo tu evri graon, go kasem graon we i bin klosap long graon Plante.

6 Mo oli bin ronemaot ol man blong Nifae mo ol ami blong Moronaeha i go insaed long graon Plante;

7 Mo long ples ia oli bin mekem olgeta i kam strong agensem ol man blong Leman, stat long solwota blong wes, go kasem long is; i wan dei wokbaot nomo blong wan man blong Nifae, long laen we oli bin mekem i kam strong, mo oli bin putum ol ami blong olgeta blong lukaotem gud kantri blong olgeta long not.

8 Mo olsem ia nao olgeta ia we oli bin pulaot long ol man blong Nifae, wetem help blong wan bigfala namba blong ami

blong ol man blong Leman, i bin tekem evri samting blong ol man blong Nifae we i bin stap long graon long saot. Mo evri samting ia i bin hapen long fifti mo eit mo naen yia blong rul blong ol jaj.

9 Mo i bin hapen long siksti yia blong rul blong ol jaj, Moronaeha i bin gat sakses wetem ol ami blong hem blong tekem plante pat blong graon; yes, oli bin tekembak plante bigtaon we i bin foldaon long ol han blong ol man blong Leman.

10 Mo i bin hapen long siksti mo wan yia blong rul blong ol jaj, oli bin gat sakses blong tekembak kasem haf blong ol samting blong olgeta.

11 Nao bigfala lus ia blong ol man blong Nifae, mo bigfala fasin blong kilim man i ded we i bin stap wetem olgeta, i no bin save hapen sapos oli no bin gat ol nogud fasin mo rabis sin blong olgeta we i bin stap long medel blong olgeta; yes, mo i bin stap long olgeta tu we oli bin talemaot se oli blong jos blong God.

12 Mo i bin from ol flas blong ol hat blong olgeta, from ol rij blong olgeta we oli tumas, yes, i bin from fasin blong mekem i harem nogud, blong olgeta long ol pua man, oli holem taet ol kakae blong olgeta long ol hanggri, oli holem taet ol klos blong olgeta long ol neked, mo oli slapem ol brata blong olgeta we tingting blong olgeta i stap daon saed blong long fes blong olgeta, oli jikim samting we i tabu, oli tanem baksaed long

spirit blong profesi mo blong revelesen, oli kilim man i ded, oli mekem bigfala stil, oli giaman, oli stil, oli mekem adaltri, oli girap long ol bigfala rao, mo oli ronwe i go long graon blong Nifae, long medel blong ol man blong Leman—

13 Mo from hemia bigfala nogud fasin blong olgeta, mo ol tok flas long paoa blong olgeta nomo, God i bin livim olgeta wetem paoa blong olgeta nomo; taswe oli no bin kam antap gud, be ol man blong Leman i bin givim hadtaem long olgeta mo oli bin kilim olgeta, mo ol man blong Leman i bin ronem olgeta, kasem taem we oli bin lusum klosap evri graon blong olgeta.

14 Be luk, Moronaeha i bin prijim plante samting long ol pipol from rabis fasin blong olgeta, mo tu Nifae mo Lihae, we oli ol boe blong Hileman, oli bin prijim plante samting long ol pipol, yes, mo oli bin profesae plante samting long olgeta long saed blong ol rabis fasin blong olgeta, mo wanem bae i kam long olgeta sapos oli no sakem ol sin blong olgeta.

15 Mo i bin hapen se oli bin sakem sin, mo i semak olsem we oli bin sakem sin oli bin stat blong kam antap gud.

16 From taem we Moronaeha i bin luk se oli bin sakem sin hem i bin traem blong lidim olgeta long wan ples i go long narafala ples, mo long wan bigtaon i go long narafala bigtaon, kasem taem we oli bin tekem bak wan haf blong ol samting

blong olgeta mo wan haf blong evri graon blong olgeta.

17 Mo olsem ia nao siksti mo wan yia blong rul blong ol jaj i bin en.

18 Mo i bin hapen long siksti mo tu yia blong rul blong ol jaj, se Moronaeha i no bin save kasem moa long ol samting long ol man blong Leman.

19 Taswe oli bin lego plan blong olgeta blong kasem ol narafala graon blong olgeta, from namba blong ol man blong Leman i bin plante tumas we i mekem se i no gat janis blong ol man blong Nifae blong kasem moa paoa ova long olgeta; taswe Moronaeha i bin givim wok long evri ami blong hem blong lukaotem gud ol pat we hem i bin tekem.

20 Mo i bin hapen, from namba blong ol man blong Leman i bin bigwan tumas, ol man blong Nifae i bin fraet bigwan, oli fraet se ol man blong Leman i winim olgeta, mo oli purumbut long olgeta, mo oli kilim ded olgeta, mo oli smasem olgeta.

21 Yes, oli bin stat blong tingbaot ol profesi blong Alma, mo tu ol toktok blong Mosaea; mo oli bin luk se oli bin stap olsem wan stronghed pipol, mo we oli bin ting nating long ol komanmen blong God;

22 Mo we oli bin jenisim mo oli bin purumbut andanit long ol leg blong olgeta ol loa blong Mosaea, o hemia we Lod i bin givim oda long hem blong givim long ol pipol; mo oli bin

luk se ol loa blong olgeta i bin kam nogud, mo we oli bin kam wan nogud pipol, inaf we i mekem se oli bin stap nogud olsem ol man blong Leman.

23 Mo from ol nogud fasin blong olgeta jos i bin stat blong kam smol; mo oli bin stat blong no biliv long spirit blong profesi mo long spirit blong revelesen; mo ol jajmen blong God i bin lukluk olgeta stret long fes.

24 Mo oli bin luk se oli bin kam slak, olsem ol brata blong olgeta, ol man blong Leman, mo we Spirit blong Lod i nomo bin sevem olgeta; yes, i bin kamaot long olgeta from Spirit blong Lod i no stap long ol tempol we i no tabu —

25 Taswe Lod i bin stop blong sevem olgeta wetem paoa blong hem, we i gat merikel mo i bitim eni paoa, from oli bin foldaon long wan ples we oli no biliv mo oli nogud tumas; mo oli bin luk se ol man blong Leman i bin moa plante tumas bitim olgeta, mo sapos oli no holem taet long Lod, God blong olgeta, oli mas ded.

26 From luk, oli bin luk se paoa blong ol man blong Leman i bin bigwan semak olsem blong olgeta, hem i olsem wan man blong Leman i gat sem paoa olsem wan man blong Nifae. Mo olsem ia nao oli bin foldaon long bigfala fasin blong brekem loa; yes, olsem ia nao oli bin kam slak, from ol fasin blong brekem loa blong olgeta, long spes blong ol yia we i no plante.

## JAPTA 5

*Nifae mo Lihae i givim tufala bak-egen blong prij—Ol nem blong tufala i lidim tufala blong mekem laef blong tufala i folem eksampol blong ol bubu blong tufala—Kraes i pemaot olgeta we i sakem sin—Nifae mo Lihae tufala i mekem plante i jenisim laef mo ol man blong Lemana i putum tufala long prisem, mo faea i raonem tufala—Wan klaod blong tudak i kavremap tri handred pipol—Graon i seksek, mo wan voes i givim oda long ol man blong sakem sin—Nifae mo Lihae i toktok wetem ol enjel, mo faea i raonem grup blong ol pipol ia. Raonabaot 30 yia bifo Kraes i bon.*

Mo i bin hapen se long sem yia, luk, Nifae i bin givim jea blong jajmen long wan man we nem blong hem i Sesoram.

2 From olsem ol loa blong olgeta mo ol gavman blong olgeta i bin stanap tru long voes blong ol pipol, mo olgeta we i bin jusum nogud fasin i moa plante bitim olgeta we i bin jusum gud fasin, taswe oli bin kam raep blong kasem fasin blong panis, from ol loa i bin kam nogud.

3 Yes, mo i no hemia nomo; oli bin wan stronghed pipol, inaf we i mekem se oli no save rul-um olgeta tru long loa o jastis, hemia nomo sapos i no blong kilim ded olgeta.

4 Mo i bin hapen se Nifae i bin kam taed from ol rabis fasin blong olgeta; mo hem i bin lego jea blong jajmen, mo i bin tek-

em long hemwan blong prijim toktok blong God long ol dei blong hem we i stap, mo brata blong hem Lihae tu, long evri dei blong hem we i stap;

5 From tufala i bin tingbaot ol toktok we papa blong tufala Hileman i bin talem long tufala. Mo hemia i ol toktok we hem i bin talem:

6 Luk, ol boe blong mi, mi wantem se yutufala i mas tingbaot blong holem ol komanmen blong God; mo mi wantem se yutufala i talemaot long ol pipol ol toktok ia. Luk, mi bin givim long yutufala ol nem blong ol fasfala papa blong yumi we i bin kamaot long graon blong Jerusalem; mo samting ia mi bin mekem blong taem we yutufala i tingbaot ol nem blong tufala, yutufala i save tingbaot tufala; mo taem we yutufala i tingbaot tufala, yutufala i save tingbaot ol wok blong tufala; mo taem we yutufala i tingbaot ol wok blong tufala, yutufala i save tingbaot we oli bin talem, mo tu oli bin raetem, se oli bin gud.

7 Taswe, ol boe blong mi, mi wantem se yutufala i mekem samting we i gud, blong ol pipol i save tokbaot mo raetem long saed blong yutufala, olsem we oli bin tokbaot mo raetem long saed blong tufala tu.

8 Mo nao ol boe blong mi, luk mi gat samfala samting moa we mi wantem blong yutufala i mekem, samting ia we mi wantem, hem i blong yutufala i no mekem ol samting ia blong mekem se yutufala i save tok flas, be blong yutufala i save

mekem ol samting ia blong hipimap blong yutufala bak-egen wan gudfala samting long heven, yes, we i no save finis, mo we i no lus; yes, blong yutufala i save gat gudgudfala presen blong laef we i no save finis, we yumi gat wan stamba tingting blong ting se God i bin givim long ol bubu blong yumi.

9 O tingbaot, tingbaot, ol boe blong mi, ol toktok we king Benjamin i bin talem long ol pipol blong hem; yes, tingbaot we i no gat wan narafala rod o wei, we bae man i save sev long hem, tru long blad blong pem praes blong Jisas Kraes nomo, we bae i kam; yes, tingbaot se hem i kam blong pemaot wol.

10 Mo tingbaot tu ol toktok we Amulek i bin talem long Siesrom, long bigtaon blong Amoaeha; from hem i bin talem long hem se i tru se Lod bae i kam blong pemaot ol pipol blong hem, be we bae hem i no kam blong pemaot olgeta wetem ol sin blong olgeta, be blong pemaot olgeta aot long ol sin blong olgeta.

11 Mo hem i bin gat paoa we Papa i bin givim long hem blong pemaot olgeta aot long ol sin blong olgeta, from fasin blong sakem sin; taswe hem i bin sendem ol enjel blong hem blong talemaot ol gud nius blong ol fasin blong sakem sin, we i karem ol pipol i go long paoa blong Ridima, mekem se ol sol blong olgeta i sev.

12 Mo nao, ol boe blong mi, tingbaot, tingbaot se hem i long ston blong Ridima blong yumi,

we i Kraes, Pikinini blong God, we yutufala i mas bildim fandesen blong yutufala; blong mekem se taem we devel bae i sendem aot ol strongfala win blong hem, yes, ol spia blong hem long wael win, yes, taem we ol ston blong aes blong hem mo strong win blong hem bae i foldaon long yutufala, bae i no gat paoa ova long yutufala blong pulum yutufala i go daon long bigfala hol blong sore mo sore tumas we i no gat en, from ston; long hem we yutufala i bin bildimap yutufala, we i wan sua fandesen, wan fandesen, long hem we sapos ol man i bildimap olgeta long hem oli no save foldaon.

13 Mo i bin hapen se hemia nao i bin ol toktok we Hileman i bin tijim long tufala boe blong hem; yes, hem i bin tijim tufala plante samting we oli no raetem, mo tu plante samting we oli raetem.

14 Mo tufala i bin tingbaot ol toktok blong hem; mo taswe tufala i bin go aot, oli holem ol komanmen blong God, blong tijim toktok blong God long medel blong ol pipol blong Nifae, stat long bigtaon Plante;

15 Mo stat long ples ia i go long bigtaon blong Gid; mo long bigtaon blong Gid i go long bigtaon blong Myulek;

16 Mo tu long wan bigtaon i go long wan narafala bigtaon kasem taem we oli bin go fored long medel blong evri pipol blong Nifae we i bin stap long graon long saot; mo stat long ples ia i go long graon blong

Sarahemla, long medel blong ol man blong Leman.

17 Mo i bin hapen se oli bin prij wetem bigfala paoa, inaf we i mekem se oli bin blokem plante long olgeta we i bin pulaot we i bin go long ol man blong Nifae, inaf we i mekem se oli bin kam long fored mo talemaot ol sin blong olgeta, mo oli bin kasem baptaes blong sakem sin, mo semtaem nomo oli bin gobak long ol man blong Nifae blong traem blong fiksimap long olgeta ol rong we oli bin mekem.

18 Mo i bin hapen se Nifae mo Lihae i bin prij long ol man blong Leman wetem bigfala paoa mo raet, from tufala i bin gat paoa mo raet we God i bin givim long tufala blong tufala i save toktok, mo tu God i bin givim long tufala wanem tufala i mas talem—

19 Taswe, tufala i bin toktok we i mekem se ol man blong Leman i sapraes bigwan, mekem se tufala i bin winim tingting blong olgeta, inaf blong mekem se i bin gat eit taosen long ol man blong Leman we i bin stap long graon blong Sarahemla mo raonabaot oli bin kasem baptaes blong sakem sin mo tufala i bin mekem olgeta blong luksave nogud fasin blong ol kastom blong ol papa blong olgeta.

20 Mo i bin hapen se Nifae mo Lihae i bin gohed blong aot long ples ia blong go long graon blong Nifae.

21 Mo i bin hapen se wan ami blong ol man blong Leman i bin tekem tufala mo sakem tufala

long prisen; yes, stret long semfala prisen ia we long hem ol wokman blong Limhae i bin sakem Amon mo ol brata blong hem insaed.

22 Mo afta we oli bin sakem tufala long prisen blong plante dei wetem no gat kakae, luk, oli bin go fored insaed long prisen blong tekem tufala blong oli save kilim ded tufala.

23 Mo i bin hapen se i olsem se faea i bin raonem Nifae mo Lihae, inaf we i mekem se oli bin fraet blong putum ol han blong olgeta long tufala tu, from oli fraet se bae oli bon. Be, Nifae mo Lihae i no bin bon; mo tufala i stap olsem se tufala i stanap long medel blong faea mo tufala i no bon.

24 Mo taem we oli bin luk se wan longfala faea we i go antap i raonem tufala, mo we i no bonem tufala, ol hat blong tufala i bin harem gud.

25 From tufala i bin luk se ol man blong Leman i fraet blong putum ol han blong olgeta long tufala; mo tu oli fraet blong kam klosap long tufala, be oli bin stanap olsem se fasin blong sapraes i bin nokem olgeta blong oli no save toktok.

26 Mo i bin hapen se Nifae mo Lihae i bin stanap long fored mo tufala i bin staf blong toktok long olgeta, se: No fraet, from luk, hem i God we i bin soem long yufala gudfala samting ia, we hem i bin soem samting ia long yufala blong mekem se yufala i no save putum ol han blong yufala long mitufala blong kilim ded mitufala.

27 Mo luk, taem we tufala i bin talem ol toktok ia, graon i bin seksek tumas, mo ol wol blong prisen i bin seksek olsem se oli rere blong foldaon long graon; be luk, oli no bin foldaon. Mo luk, olgeta we i bin stap long prisen oli ol man blong Leman mo ol man blong Nifae we oli bin pulaot.

28 Mo i bin hapen se wan klaod blong tudak i bin kavremap olgeta, mo wan nogud fraet we i strong i bin kam long olgeta.

29 Mo i bin hapen se wan voes i bin kamaot olsem se i bin kamaot antap long klaod blong tudak, i talem: Yufala i sakem sin, yufala i sakem sin, mo nomo lukaotem blong panisim ol wokman blong mi we mi bin sendem long yufala blong talemaot ol gudnius long yufala.

30 Mo i bin hapen taem we oli bin harem voes ia, mo oli bin luk se i no wan voes blong tanda, mo tu i no voes blong wan bigfala nogud noes, be luk, hem i wan kwaet voes we i sofsof stret gud, olsem se i bin wan slo toktok, mo i bin go tru kasem sol—

31 Mo i nomata we voes i sofsof, luk graon i bin seksek tumas, mo ol wol blong prisen i bin seksek bakegen, olsem se hem i bin rere blong foldaon long graon; mo luk klaod blong tudak, we i bin kavremap olgeta, i no bin aot—

32 Mo luk voes i bin kamaot bakegen, i talem se: Yufala i sakem sin, yufala i sakem sin, from kingdom blong heven i klosap; mo yufala i nomo lukao-

tem blong panisim ol wokman blong mi. Mo i bin hapen se graon i bin seksek bakegen, mo ol wol i bin seksek.

33 Mo tu bakegen nambatri taem voes i bin kamaot, mo i bin talem long olgeta ol gudfala toktok we man i no save talemaot; mo ol wol i bin seksek bakegen, mo graon i bin seksek olsem se i rere blong brok long pisis.

34 Mo i bin hapen se ol man blong Leman i no bin save ronwe from klaod blong tudak we i bin kavremap olgeta; yes, mo tu oli no bin save mov from fraet we i bin kam long olgeta.

35 Nao i bin gat wan long medel blong olgeta we i wan man blong Nifae folem bon blong hem, we i bin long wan taem blong jos blong God be hem i bin pulaot long olgeta.

36 Mo i bin hapen se hem i bin tanem hem raon, mo luk, hem i bin luk tru long klaod blong tudak ol fes blong Nifae mo Lihae; mo luk, ol fes blong tufala i bin saen tumas, hem i olsem ol fes blong ol enjel. Mo hem i bin luk se tufala i bin leftemap ol ae blong tufala i lukluk i go long heven; mo oli bin stap olsem se tufala i stap toktok o tufala i toktok laod long sam man we tufala i bin luk.

37 Mo i bin hapen se man ia i bin singaot long grup blong pipol ia, blong oli save tanem olgeta mo luk. Mo luk, God i bin givim paoa long olgeta mekem se oli bin tanem olgeta mo oli bin luk; mo oli bin luk ol fes blong Nifae mo Lihae.

38 Mo oli bin talem long man ia: Luk, ol samting ia i minim wanem, mo ol man ia i stap toktok wetem huia?

39 Nao nem blong man ia i bin Aminadab. Mo Aminadab i bin talem long olgeta: Oli stap toktok wetem ol enjel blong God.

40 Mo i bin hapen se ol man blong Leman i bin talem long hem: Wanem nao bae mifala i mas mekem blong mekem se klaod blong tudak ia i save kamaot blong i nomo kavrem-ap mifala?

41 Mo Aminadab i bin talem long olgeta: Yufala i mas sakem sin, go askem long voes ia, go kasem taem we bae yufala i gat fet long Kraes, we Alma, mo Amulek, mo Siesrom, oli bin tijim yufala long hem; mo taem we bae yufala i mekem samting ia, klaod blong tudak bae i kamaot blong i nomo kavrem-ap yufala.

42 Mo i bin hapen se olgeta evriwan i bin stat blong askem long voes blong hem we i bin mekem graon i seksek; yes, oli bin askem kasem taem we klaod blong tudak i bin aot.

43 Mo i bin hapen se taem we oli bin lukluk raonabaot, mo oli bin luk se klaod blong tudak i bin aot blong i nomo kavrem-ap olgeta, luk, oli bin luk se wan longfala faea we i go antap i raonem olgeta, yes evri sol.

44 Mo Nifae mo Lihae i bin stap long medel blong olgeta; yes, longfala faea we i go antap i bin raonem olgeta; yes, i olsem se oli stap long medel blong faea ia we i stap laet, be stil i no

bin smasem gud olgeta, mo tu i no bin bonem ol wol blong prisen; mo olgeta i bin kam fulap wetem glad we toktok i no naf blong talem mo i fulap long glori.

45 Mo luk, Tabu Spirit blong God i bin kam daon long heven, mo i bin go insaed long ol hat blong olgeta, mo oli bin fulap olsem se i wetem faea, mo oli bin save talemaot ol gudfala toktok.

46 Mo i bin hapen se wan voes i bin kamaot long olgeta, yes, wan naes voes, olsem se i wan slo toktok, i talem:

47 Pis, pis i stap wetem yufala, from fet blong yufala long Boe blong mi we mi lavem Hem Tumas, we i bin stap long stat blong wol ia.

48 Mo nao, taem we oli bin harem samting ia oli bin lukluk i go antap wetem ol ae blong olgeta olsem se blong luk se long wea nao voes ia i bin kam; mo luk, oli bin luk ol heven i open; mo ol enjel i bin kam daon aot long heven mo bin givhan long olgeta.

49 Mo i bin gat raonabaot tri hundred sol we i bin luk mo bin harem ol samting ia; mo ol enjel i bin talem long olgeta blong go aot mo no sapraes, mo tu oli no mas gat tingting blong no bilif strong.

50 Mo i bin hapen se oli bin go aot, mo oli bin givhan long ol pipol, oli talemaot truaot evri eria raonabaot, evri samting we oli bin harem mo oli bin luk, inaf blong mekem se moa pat blong ol man blong Leman i bin



biliv long olgeta, from ol samting we i soemaot se i tru oli bigwan, we oli bin kasem.

51 Mo olgeta we i bin kasem bilif oli bin putum daon ol tul blong faet blong olgeta, mo tu ol fasin blong no laekem wan man, mo tu ol kastom blong ol papa blong olgeta.

52 Mo i bin hapen se oli bin lego long ol man blong Nifae ol graon we oli bin stap long hem.

---

### JAPTA 6

---

*Ol man blong Leman we i stret oli prij long ol man blong Nifae we i nogud—Tugeta saed blong ol pipol i kam antap gud long wan taem blong pis mo plante samting—Lusifa, stamba blong sin, i tan-em ol hat blong ol nogud man mo ol Gadianton man blong stil long saed blong ol fasin blong kilim man i ded mo long nogud fasin—Ol man blong stil i rulum gavman blong Nifae. Raonabaot 29–23 yia bifo Kraes i bon.*

Mo i bin hapen se taem we siksti mo tu yia blong rul blong ol jaj i bin en, evri samting ia i bin hapen mo ol man blong Leman i bin kam, bigfala pat blong olgeta, wan stret pipol, inaf blong mekem se stret fasin blong olgeta i bin bitim blong ol man blong Nifae, from fasin blong olgeta blong stanap strong mo fasin blong olgeta blong stap strong long fet.

2 From luk, i bin gat plante long ol man blong Nifae we i bin kam stronghed mo oli no wantem sakem sin mo oli

nogud bigwan, inaf blong mekem se oli bin sakemaot toktok blong God mo ol prijing mo profesi we i bin kam long medel blong olgeta.

3 Be, pipol blong jos i bin gat bigfala glad from ol man blong Leman i bin jenisim laef, yes, from jos blong God, we i bin stanap long medel blong olgeta; mo oli bin fren wan wetem narawan, mo oli bin hapi wan wetem narawan, mo oli bin gat bigfala glad.

4 Mo i bin hapen se plante long ol man blong Leman i bin kam daon long graon blong Sarahemla, mo oli bin talemaot long ol pipol blong ol man blong Nifae fasin we oli bin jenisim laef blong olgeta, mo oli bin askem strong long olgeta blong gat fet mo blong sakem sin.

5 Yes, mo plante i bin prij wetem paoa we i bigwan tumas mo raet, we i mekem tingting blong plante long olgeta i stap daon olgeta, blong stap olsem ol man we i folem God mo Sipsip wetem tingting we i stap daon.

6 Mo i bin hapen se plante long ol man blong Leman i bin go long graon long not; mo tu Nifae mo Lihae i bin go long graon long not, blong prij long ol pipol. Mo olsem ia nao siksti mo nambatri yia i bin en.

7 Mo luk, i bin gat pis long evri graon, inaf blong mekem se ol man blong Nifae i bin go long eni pat blong graon we oli bin wantem, oli go long ol man blong Nifae o long ol man blong Leman.

8 Mo i bin hapen se ol man blong Leman tu i bin go long eni ples we oli bin wantem, oli go long ol man blong Leman o long ol man blong Nifae; mo olsem ia nao oli bin fri blong wok wan wetem narawan long olgeta, blong pem mo long salem samting, mo blong winim samting, folem wanem oli wantem.

9 Mo i bin hapen se oli bin kam rij tumas, ol man blong Leman tugeta wetem ol man blong Nifae; mo oli bin gat plante long ol gol we i tumas, mo long ol silva, mo long evri defren kaen aean we i gudgudfala, long graon saot tugeta wetem long graon not.

10 Nao graon saot oli bin singaotem Lihae, mo graon not oli bin singaotem Myulek, we i bin folem boe blong Sedekia; from Lod i bin tekem Myulek i go long graon not, mo Lihae long graon saot.

11 Mo luk, i bin gat evri kaen gol long tufala graon ia, mo blong silva, mo blong ol gudgudfala ston blong aean blong evri kaen; mo i bin gat tu ol gudfala wokman, we oli bin wok long ol defren kaen ston blong aean mo oli bin wokem gud olgeta; mo olsem ia nao oli bin kam rij.

12 Oli bin resemap plante sid, long not tugeta wetem long saot; mo oli bin gru gud tumas; long not tugeta wetem long saot. Mo oli bin kam plante mo kam strong tumas long graon. Mo oli bin resemap plante grup blong anamol mo ol buluk, yes, plante anamol we i fatfat.

13 Luk ol woman blong olgeta oli bin wok mo mekem tred, mo oli bin mekem evri kaen kaliko, blong kaliko we oli soemap gud mo ol kaliko blong evri kaen, blong kavremap bodi blong olgeta we i nedek. Mo olsem ia nao siksti mo fo yia i bin pas i gowe wetem pis.

14 Mo long siksti mo faef yia oli bin gat tu bigfala glad mo pis, yes, plante prijing mo plante profesi long saed blong ol samting we bae i kam. Mo olsem ia nao siksti mo faef yia i bin pas i gowe.

15 Mo i bin hapen se long siksti mo sikis yia blong rul blong ol jaj, luk, Sesoram i bin kasem ded tru long wan han we oli no save taem we hem i bin sidaon long jea blong jajmen. Mo i bin hapen se long semfala yia, we boe blong hem, we ol pipol i bin jusum blong tekem ples blong hem, oli bin kilim hem i ded tu. Mo olsem ia nao siksti mo sikis yia i bin en.

16 Mo long stat blong siksti mo seven yia ol pipol i bin stat blong kam nogud tumas bakegen.

17 From luk, Lod i bin blesem olgeta longtaem wetem ol rij samting blong wol mekem se oli no bin mekem olgeta i kam kros, long ol faet, o long blad i ron; taswe oli bin stat blong putum ol hat blong olgeta long ol rij samting blong olgeta; yes, oli bin stat blong lukaotem blong kasem samting blong mekem se oli save leftemap, olgeta wan i moa hae long narafala wan, taswe oli bin stat

blong mekem ol fasin blong kilim man i ded long sikret, mo blong stil mo blong tekem ol samting long taem blong faet, blong oli save kasem mane.

18 Mo nao luk, olgeta man blong kilim man i ded mo olgeta blong tekem ol samting long taem blong faet, oli bin wan grup we Kiskumen mo Gadianton i bin statem. Mo nao i bin hapen se i bin gat plante, we i long medel blong ol man blong Nifae, blong grup blong Gadianton. Be luk, oli bin moa plante long medel blong ol man blong Leman we oli moa nogud. Mo oli bin singaotem olgeta ol man blong Gadianton blong stil mo kilim man i ded.

19 Mo i bin olgeta we i bin kilim ded jif jaj Sesoram, mo boe blong hem, taem we oli stap long jea blong jajmen; mo luk, oli no bin faenemaot olgeta.

20 Mo nao i bin hapen se taem we ol man blong Leman i bin faenem se i bin gat ol man blong stil long medel blong olgeta, oli bin sore tumas; mo oli bin yusum evri wei long paoa blong olgeta blong smasem gud olgeta aot long fes blong wol.

21 Be luk, Setan i bin tanem ol hat blong moa pat blong ol man blong Nifae, inaf blong mekem se oli bin joen wetem ol grup blong ol man blong stil, mo oli bin mekem ol kavenan blong olgeta mo ol tru promes blong olgeta, se bae oli lukaotem gud mo sevem wan wan long olgeta long eni kaen problem we bae oli fesem, blong mekem se oli

no mas safa from ol fasin blong olgeta blong kilim man i ded, mo ol fasin blong olgeta blong tekem ol samting long taem blong faet, mo ol fasin blong olgeta blong stil.

22 Mo i bin hapen se oli bin gat ol saen blong olgeta, yes, ol sikret saen blong olgeta, mo ol sikret toktok blong olgeta; mo hemia blong oli save luksave wan brata we i bin mekem kavenan, blong eni kaen nogud fasin we brata blong hem bae i mekem hem i no kasem trabol long brata blong hem, o olgeta we i blong grup blong hem, we i bin mekem kavenan ia.

23 Mo olsem ia nao oli save kilim man i ded, mo stil long taem blong faet, mo stil, mo mekem ol fasin blong stap slip olbaot mo evri kaen nogud fasin, agensem ol loa blong kantri blong olgeta mo tu ol loa blong God blong olgeta.

24 Mo eni man long olgeta we i blong grup blong olgeta we i talemaot long wol long ol nogud fasin blong olgeta mo ol rabis sin blong olgeta, bae hem i mas pas long kot, i no folem ol loa blong kantri blong olgeta, be folem ol loa blong nogud fasin blong olgeta, we i bin kamaot long Gadianton mo Kiskumen.

25 Nao luk, hem i ol sikret tru promes mo ol kavenan ia we Alma i bin givim oda long boe blong hem se oli no mas go aot long wol, from fraet se ol samting ia bae i wan wei blong karem daon ol pipol go kasem smasgud.

26 Nao luk, ol sikret tru promes mo ol kavenan ia i no bin kam aot long Gadianton aot long ol histri we Hileman i bin kasem; be luk, oli bin go long hat blong Gadianton tru long semfala man we i bin giaman long ol fas mama mo papa blong yumi blong kakae long frut blong no kakae—

27 Yes, semfala man ia we i bin plan wetem Ken, se sapos hem i kilim ded brata blong hem Ebel bae wol i no save. Mo hem i bin plan wetem Ken mo olgeta we i folem hem stat long taem ia i go.

28 Mo tu hem i bin semfala man we i bin putum insaed long ol hat blong ol pipol blong bildim wan taoa we i hae inaf blong oli save go long heven. Mo hem i bin semfala man we i bin lidim ol pipol we i bin kam long taoa ia oli kam insaed long graon ia; we i bin seraotem ol wok blong tudak mo ol rabis sin olbaot long ful fes blong graon kasem taem we hem i bin pulum ol pipol i go daon blong smasgud fulwan, mo long wan hel we i no gat en.

29 Yes, hem i semfala man we i bin putum insaed long hat blong Gadianton blong gohed long ol wok blong tudak, mo blong kilim man i ded long sikret; mo hem i bin karem samting ia i go fored stat long stat blong man i go kasem taem ia.

30 Mo luk, hem i hem we i stamba blong sin. Mo luk, hem i stap gohed long ol wok blong tudak blong hem mo kilim

man i ded long sikret, mo i pasem daon ol plan blong olgeta, mo ol tru promes blong olgeta, mo ol kavenan blong olgeta, mo ol plan blong olgeta we i nogud tumas, stat long wan jeneresen i go long narafala jeneresen folem olsem we hem i save kasem blong holem ol hat blong ol pikinini blong ol man.

31 Mo nao luk, hem i bin gat bigfala kontrol long ol hat blong ol man blong Nifae; yes, inaf blong mekem se oli bin kam nogud tumas; yes, bigfala pat long olgeta i bin tanem olgeta aot long rod blong stret fasin, mo oli bin purumbut andanit long ol leg blong olgeta ol komanmen blong God, mo oli bin tanem olgeta long ol rod blong olgeta nomo, mo oli bin bildimap long olgeta bakegen ol aedol long ol gol blong olgeta mo ol silva.

32 Mo i bin hapen se evri rabis fasin ia i bin kam long olgeta long spes blong no plante yia, inaf blong mekem se wan moa pat long samting ia i bin kam long olgeta long siksti mo nambaseven yia blong rul blong ol jaj ova long ol pipol blong Nifae.

33 Mo oli bin gru long ol rabis fasin blong olgeta long siksti mo nambaeit yia tu, hemia i bin mekem olgeta we i stret blong harem nogud mo krae bigwan.

34 Mo olsem ia nao yumi luk se ol man blong Nifae i bin stat blong kam slak from oli lusum bilif, mo gru long nogud fasin mo ol rabis sin, taem we ol man

blong Leman i bin stat blong gru tumas long save long saed blong God blong olgeta; yes, oli bin stat blong holem ol loa mo ol komanmen blong hem, mo blong wokbaot folem ol trutok mo stret fasin long fored blong hem.

35 Mo olsem ia nao yumi luk se Spirit blong Lod i bin stat blong kamaot long ol man blong Nifae, from ol nogud fasin mo ol strong hat blong olgeta.

36 Mo olsem ia nao yumi luk se Lod i bin stat blong poremaot Spirit blong hem long ol man blong Leman, from fasin blong olgeta we i isi mo oli wantem blong biliv long ol toktok blong hem.

37 Mo i bin hapen se ol man blong Leman i bin lukaotem grup blong ol man blong stil blong Gadianton; mo oli bin prijim toktok blong God long medel blong olgeta moa nogud man, inaf blong mekem se oli bin smasem gud fulwan grup ia blong ol man blong stil aot long medel blong ol man blong Leman.

38 Mo i bin hapen se long narafala han, we ol man blong Nifae i bin bildimap olgeta mo sapotem olgeta, stat long olgeta we i moa nogud, kasem taem we oli bin kavremap evri graon blong ol man blong Nifae, mo oli bin trikim bigfala pat long olgeta we i stret kasem taem we oli bin kam daon blong biliv long ol wok blong olgeta, mo kasem ol samting we oli bin stilim, mo blong joen wetem olgeta long ol sikret

fasin blong olgeta blong kilim man i ded mo ol grup.

39 Mo olsem ia oli bin kasem stamba paoa blong gavman, inaf blong mekem se oli bin purumbut andanit long ol leg blong olgeta, mo wipim, mo smasem gud, mo tanem ol baksaed blong olgeta long ol pua, mo olgeta we i no stap flas, mo olgeta we i stap folem God wetem tingting we i stap daon.

40 Mo olsem ia nao yumi luk se oli bin stap long wan rabis ples, mo oli kam raep blong kasem wan panis we i no get en.

41 Mo i bin hapen se olsem ia nao siksti mo nambaeit yia blong rul blong ol jaj ova long ol pipol blong Nifae i bin en.

---

PROFESI BLONG NIFAE, BOE BLONG HILEMAN—God i wonem ol pipol blong Nifae se bae hem i visitim olgeta long kros blong hem, blong panisim olgeta fulwan sapos oli no sakem ol nogud fasin blong olgeta. God i kilim ol pipol blong Nifae wetem wan sik; oli sakem sin mo tanem olgeta long hem. Samuel, wan man blong Leman, i profesae long ol man blong Nifae.

*I stat long japta 7 i go kasem japta 16 nomo.*

---

## JAPTA 7

---

*Ol pipol i sakemaot Nifae long not mo hem i gobak long Sarahemla—Hem i prea long taoa blong garen blong hem mo afta i singaotem*

*ol pipol blong sakem sin o kasem ded. Raonabaot 23-21 yia bifo Kraes i bon.*

LUK, nao i bin hapen long siksti mo naen yia blong rul blong ol jaj ova long ol pipol blong ol man blong Nifae, se Nifae, boe blong Hileman, i bin gobak long graon blong Sarahemla long graon long not.

2 From hem i bin go aot long medel blong ol pipol we i bin stap long not, mo i bin prijim toktok blong God long olgeta, mo i bin profesae plante samting long olgeta.

3 Mo oli bin sakemaot evri toktok blong hem, inaf blong mekem se hem i no save stap long medel blong olgeta, be i bin gobak bakegen long graon blong hem we hem i bin bon long hem.

4 Mo taem we hem i bin luk ol pipol long wan ples we i nogud tumas, mo olgeta Gadianton man blong stil i tekem ol jea blong jajmen—oli bin kasem paoa mo raet ova long graon long rabis fasin; oli lego ol komanmen blong God, mo oli no mekem wan gudfala fasin nating long fored blong hem; oli no mekem jastis long ol pikinini blong ol man.

5 Oli jajem olgeta we i stret from stret fasin blong olgeta; letem ol man we i rong mo ol nogud man i go mo no kasem panis from mane blong olgeta; mo antap long hem oli holem ofis long hed blong gavman, blong rul mo mekem samting folem ol tingting blong olgeta,

blong maet oli save kasem mane mo glori blong wol, mo, antap long hem, blong oli save slip olbaot moa isi, mo stil, mo kilim man i ded, mo mekem folem ol tingting blong olgeta—

6 Nao bigfala nogud fasin ia i bin kam long ol man blong Nifae, long spes blong no plante yia; mo taem we Nifae i bin luk samting ia, hat blong hem i bin solap wetem sore insaed long jes blong hem; mo hem i bin talem long harem nogud blong sol blong hem:

7 O, mi wantem we sapos mi bin save gat ol dei blong mi long ol dei we bubu blong mi Nifae i bin kam fastaem aot long graon blong Jerusalem, we mi bin save stap hapi wetem hem long graon blong promes; ale ol pipol blong hem oli bin isi blong tijim olgeta, oli strong blong holem ol komanmen blong God, mo slo blong wan man i lidim olgeta blong mekem nogud fasin; mo oli bin kwik blong lisin long ol toktok blong Lod—

8 Yes, sapos ol dei blong mi i bin save stap long ol dei ia, ale bae sol blong mi i bin gat glad from ol stret fasin blong ol brata blong mi.

9 Be luk, God hem i bin jusum mi se hemia ol dei blong mi, mo se sol blong mi bae i fulap long sore from hemia ol nogud fasin blong ol brata blong mi.

10 Mo luk, nao i bin hapen se i bin long wan taoa, we i bin stap long garen blong Nifae, we i bin klosap long bigfala rod we i bin go long bigfala maket, we i bin stap long bigtaon blong

Sarahemla; taswe, Nifae i bin bodaon hemwan long taoa we i bin stap long garen blong hem, we taoa ia i bin stap klosap tu long get blong garen we bigfala rod i bin pas long hem.

11 Mo i bin hapen se i bin gat sam man i stap pas klosap mo oli bin lukim Nifae taem we hem i poremaot sol blong hem long God long taoa; mo oli bin ron mo oli bin talem ol pipol wanem oli bin lukim, mo ol pipol i bin kam tugeta long ol grup blong pipol oli save gat save long stamba tingting blong bigfala krae from ol nogud fasin blong ol pipol.

12 Mo nao, taem we Nifae i bin girap mo i bin luk ol grup blong ol pipol we i kam tugeta.

13 Mo i bin hapen se hem i bin openem maot blong hem mo i bin talem long olgeta: Luk, from wanem yufala i bin kam tugeta? Blong mi save talem long yufala long saed blong ol nogud fasin blong yufala?

14 Yes, from mi bin kam antap long taoa blong mi blong mi save poremaot sol blong mi long God blong mi, from ol harem nogud tumas blong hat blong mi, we i from ol nogud fasin blong yufala!

15 Mo from krae blong mi mo harem nogud, yufala i bin kam tugeta, mo yufala i sapraes; yes, mo yufala i gat bigfala nid blong sapraes; yes, yufala i nid blong sapraes from yufala i letem yufala blong devel i gat bigfala kontrol long ol hat blong yufala.

16 Yes, hao nao yufala i save letem yufala i go long ol

giaman blong hem we i stap lukaotem blong sendem ol sol blong yufala i go daon long sin we i no gat en mo sore tumas we i no gat en?

17 O yufala i sakem sin, yufala i sakem sin! From wanem bae yufala i ded? Tanem yufala, tanem yufala long Lod, God blong yufala. From wanem hem i bin lego yufala?

18 Hem i from yufala i bin mekem ol hat blong yufala i kam strong; yes, yufala i no wantem lisin long voes blong gudfala man blong lukaotem ol sipsip; yes, yufala i bin mekem hem i kam kros agensem yufala.

19 Mo luk, long ples blong karem bak yufala, sapos yufala i no sakem sin, luk, bae hem i mekem yufala i seraot olbaot blong mekem se yufala bae i kam ol mit blong ol dog mo ol wael anamol.

20 O, hao nao yufala i bin save fogetem God blong yufala long sem dei we hem i bin mekem yufala i go fri?

21 Be luk, hem i blong kasem mane, blong ol man i presem yufala, yes, mo blong yufala i save kasem gol mo silva. Mo yufala i bin putum ol hat blong yufala long ol rij samting mo ol samting blong wol we i blong nating, from samting ia yufala i kilim man i ded, mo stil long taem blong faet, mo stil, mo giaman blong mekem poen agensem man we i stap raonabaot long yufala, mo mekem evri kaen nogud fasin.

22 Mo from stamba tingting ia, sore tumas bae i kam long

yufala sapos yufala i no sakem sin, from sapos bae yufala i no sakem sin, luk, bigfala bigtaon ia, mo tu evri bigfala bigtaon we i stap raonabaot, we oli long ol graon blong yumi, bae ol enemi i tekemaot olgeta blong mekem se bae yufala i no gat ples long olgeta; from luk, Lod bae i no givim long yufala paoa, olsem we hem i bin mekem bifo blong stanap strong agensem ol enemi blong yufala.

23 From luk, Lod i talem olsem ia nao: Bae mi no soem long ol man nogud ol paoa blong mi, long wan moa bitim narafala wan, hemia nomo sapos i no long olgeta we i sakem ol sin blong olgeta, mo lisin long ol toktok blong mi. Nao taswe, mi wantem se yufala i mas luk, ol brata blong mi, we bae i moa gud long ol man blong Lemana bitim yufala hemia nomo sapos yufala i no sakem sin.

24 From luk, oli moa stret bitim yufala, from oli no bin sin agensem bigfala save we yufala i bin kasem; taswe Lod bae i gat sore long olgeta; yes, bae hem i mekem ol dei blong olgeta i longfala mo mekem namba blong ol pikinini blong olgeta i kam antap, i long taem we i smasem gud yufala hemia nomo sapos yufala i no sakem sin.

25 Yes, sore tumas long yufala from bigfala rabis sin we i bin kam long medel blong yufala; mo yufala i bin mekem yufala i joen wetem hem, yes, long sikret grup we i bin stanap tru long Gadianton!

26 Yes, sore tumas bae i kam

long yufala from hae tingting we yufala i bin letem blong kam insaed long ol hat blong yufala, we i bin leftemap yufala bitim samting we i gud from ol rij samting blong yufala we i bigfala tumas!

27 Yes, sore tumas long yufala from ol nogud fasin mo ol rabis sin!

28 Mo sapos yufala i no sakem sin bae yufala i ded; yes, bae ol enemi blong yufala oli tekemaot ol graon long yufala, mo bae oli smasem yufala aot long fes blong graon ia.

29 Luk nao, mi no talem se ol samting ia bae i hapen, folem save blong mi nomo, from i no long save blong mi nomo we mi save ol samting ia; be luk, mi save se ol samting ia i tru from Lod God i bin talemaot long mi, taswe mi testifae se bae oli hapen.

---

## JAPTA 8

---

*Ol nogud jaj i lukaotem blong giaman long ol pipol blong oli agensem Nifae—Ebrahim, Moses, Sinos, Sinok, Isaeas, Aesea, Jeremaea, Lihae, mo Nifae olgeta evriwan i bin testifae long saed blong Kraes—Tru long fasin we God i toktok long man, Nifae i talemaot se oli bin kilim ded jif jaj. Raonabaot 23–21 yia bifo Kraes i bon.*

Mo nao i bin hapen se taem we Nifae i bin talem ol toktok ia, luk, i bin gat ol man we oli ol jaj, we oli blong sikret grup blong Gadianton tu, mo oli bin kros, mo oli bin singaot strong



agensem hem, oli talem long ol pipol: From wanem yufala i no holem taet man ia mo tekem hem i kam fored blong hem i save kasem panis folem trabol we hem i bin mekem?

2 From wanem yufala i stap lukim man ia, mo stap harem hem i go agensem pipol ia mo agensem loa blong yumi?

3 From luk, Nifae i bin talemaot long olgeta long saed blong fasin blong kam nogud blong loa blong olgeta; yes, plante samting Nifae i bin talemaot we oli no save raetem; mo i no gat eni samting we hem i bin talemaot we i agensem ol komanmen blong God.

4 Mo ol jaj ia i bin kros long hem from hem i bin toktok klia long olgeta long saed blong ol sikret wok blong olgeta blong tudak; be, oli bin fraet blong putum ol han blong olgeta long hem from oli bin fraet long ol pipol se bae oli singaot agensem olgeta.

5 Taswe oli bin singaot long ol pipol, se: From wanem yufala i letem man ia blong go agensem yumi? From luk hem i jajem evri pipol ia, go kasem smasgud; yes, mo tu we hemia ol bigfala bigtaon blong yumi bae ol enemi blong yumi i tekemaot long yumi, blong mekem se bae yumi no gat ples long olgeta.

6 Mo nao yumi save se hemia i no save hapen, from luk, yumi gat paoa, mo ol bigtaon blong yumi oli bigfala, taswe ol enemi blong yumi i no save gat paoa ova long yumi.

7 Mo i bin hapen se olsem ia nao oli bin tanem ol tingting blong ol pipol blong oli kros agensem Nifae, mo oli bin resemap ol rao long medel blong olgeta; from i gat sam we i bin singaot: Yufala i livim man ia, from hem i wan gud man, mo ol samting ia we hem i talemaot i tru we bae oli hapen sapos yumi no sakem sin;

8 Yes, luk, ol jajmen bae i kam long yumi we hem i bin testifae long yumi; from yumi save se hem i bin testifae stret long yumi long saed blong ol nogud fasin blong yumi. Mo luk oli plante, mo hem i save tu evri samting we bae i hapen long yumi olsem we hem i save ol nogud fasin blong yumi;

9 Yes, mo luk, sapos hem i no bin wan profet bae hem i no save testifae long saed blong ol samting ia.

10 Mo i bin hapen se ol pipol ia we i bin lukaotem blong smasem gud Nifae i bin stop from fraet blong olgeta, mekem se oli no bin putum ol han blong olgeta long hem, taswe hem i bin stat bakegen blong toktok long olgeta, from hem i bin luk se hem i winim sapot long ol ae blong samfala, inaf blong mekem se ol narafala i bin fraet.

11 Taswe hem i mas toktok moa long olgeta, se: Luk, ol brata blong mi, yufala i no bin ridim se God i bin givim paoa long wan man, we i Moses, blong kilim ol wota blong Red Si, mo oli bin seraot i go long ples ia mo long ples ia, inaf blong mekem se ol laen blong

Isrel, we oli bin ol bubu blong yumi, i bin kam tru long drae graon, mo wota i bin sareng long ol ami blong ol man Ijip mo i bin solemdaon olgeta.

12 Mo nao luk, sapos God i bin givim long man ia paoa olsem ia, ale from wanem bae yufala i rao long medel blong yufala, mo talem se hem i bin givim long mi eni paoa we tru long paoa ia mi save gat save long saed blong ol jajmen we bae i kam long yufala sapos yufala i no sakem sin?

13 Be, luk, yufala i no tanem baksaed long ol toktok blong mi nomo be yufala i tanem baksaed tu long ol toktok we ol bubu blong yumi i bin talemaot, mo tu ol toktok we man ia i bin talemaot, Moses, we i gat bigfala paoa we God i bin givim long hem, yes, ol toktok we hem i bin talemaot long saed blong taem we Mesaea bae i kam.

14 Yes, hem i no bin talemaot se Pikinini blong God bae i kam? Mo olsem we hem i bin leftemap aean snek long ples we i no gat man long hem, olsem ia nao bae oli leftemap man ia we bae i kam.

15 Mo olgeta we bae oli lukluk long snek ia bae oli laef, long fasin ia olgeta we bae oli lukluk long Pikinini blong God wetem fet, mo oli gat wan spirit we i wantem blong sakem sin, i save laef, we i long laef ia we i no save finis.

16 Mo nao luk, Moses i no bin testifae long ol samting ia nomo, be evri tabu profet tu, stat long ol dei blong hem i go daon kasem ol dei blong Ebrahim.

17 Yes, mo luk, Ebrahim i bin lukim taem we bae hem i kam, mo hem i bin fulap wetem glad mo hem i bin hapi.

18 Yes, mo luk mi talem long yufala, se Ebrahim i no bin save long ol samting ia nomo, be i bin gat plante bifo long ol dei blong Ebrahim we oli bin singaotem olgeta tru long oda blong God; yes, hem i folem oda blong Pikinini blong hem; mo samting ia blong soemaot long ol pipol wan bigfala plante taosen yia bifo hem i kam, se hem i fasin blong pemaot man we i mas kam long olgeta.

19 Mo nao mi wantem se yufala i save se hem i stat long ol dei blong Ebrahim tu i bin gat plante profet we i bin testifae long saed blong ol samting ia; yes, luk, profet Sinos i bin testifae strong; from samting ia oli bin kilim hem i ded.

20 Mo luk, Sinok tu, mo tu Isaeas, mo tu Aesea, mo Jeremaea, (Jeremaea i sem profet we i testifae long saed blong smasgud blong Jerusalem) mo nao yumi save se oli bin smasem gud Jerusalem folem ol toktok blong Jeremaea. O ale from wanem bae Pikinini blong God i no kam, folem profesi blong hem?

21 Mo nao bae yufala i rao se Jerusalem i bin smasgud? Bae yufala i talem se oli no bin kilim ded ol boe blong Sedekia, evriwan be Myulek? Yes, mo yufala i no luk se ol pikinini blong Sedekia i stap wetem yumi, mo oli bin ronem olgeta aot long graon blong

Jerusalem? Be luk, i no hemia nomo—

22 Papa blong yumi Lihae oli bin ronem hem aot long Jerusalem, from hem i bin testifae long saed blong ol samting ia. Nifae tu i bin testifae long saed blong ol samting ia, mo tu klosap evri bubu blong yumi, kasem daon long taem ia; yes, oli bin testifae long saed blong taem we Kraes bae i kam, mo oli bin wet long hem mo oli bin hapi long dei blong hem, we bae i kam.

23 Mo luk, hem i God, mo hem i stap wetem olgeta, mo hem i bin soemaot hemwan long olgeta, mekem se hem i bin pemaot olgeta; mo oli bin givim long hem glori from samting we bae i kam.

24 Mo nao, from mi luk se yufala i save ol samting ia mo yufala i no save tanem baksaed long olgeta sapos yufala i no giaman, taswe long samting ia yufala i bin sin, from yufala i sakemaot evri samting ia, i nomata long plante samting we yufala i bin kasem we oli soemaot long yufala; yes, yufala i bin kasem evri samting tu, ol samting long heven tugeta wetem evri samting we i stap long wol, olsem wan witnes se oli tru.

25 Be luk, yufala i bin sakemaot trutok, mo i bin go agensem tabu God blong yufala; mo tu long taem ia, long ples blong hipimap blong yufala bakegen ol gudfala samting long heven, we i no gat samting i save kam nogud, mo we i no gat wan

samting i save kam we i no klin; yufala i hipimap blong yufala bakegen panis blong yufala blong dei blong jajmen.

26 Yes, we i long taem ia yufala i stap kam raep, from ol fasin blong yufala blong kilim man i ded mo fasin blong slip wetem wan woman o man aot long mared mo nogud fasin blong yufala, blong kasem panis we i no gat en; yes, mo sapos yufala i no sakem sin, bae i kam long yufala i no long taem.

27 Yes, luk hem i stap naoia tu long ol do blong yufala; yes, yufala i go long jea blong jajmen, mo lukaotem; mo luk, oli bin kilim ded jaj blong yufala, mo hem i stap ledaon long blad blong hem; mo brata blong hem i bin kilim hem i ded, we i lukaotem blong sidaon long jea blong jajmen.

28 Mo luk, tufala tugeta i stap long sikret grup blong yufala, we stamba blong hem i Gadian-ton mo nogud wan we i stap lukaotem blong smasem gud ol sol blong ol man.

---

## JAPTA 9

---

*Ol mesenja i faenem jif jaj i ded long jea blong jajmen—Oli putum olgeta long prisem mo afta oli tekemaot olgeta bakegen—Tru long fasin we God i toktok long man, Nifae i talemaot se Siantum i man we i kilim ded jif jaj—Samfala long ol pipol oli tekem Nifae olsem wan profet. Raonabaot 23–21 yia bifo Kraes i bon.*

LUK, nao i bin hapen se taem we

Nifae i bin talemaot ol toktok ia, samfala man we i bin stap wetem olgeta i bin ron i go long jea blong jajmen; yes, hem i bin gat faef we i bin go, mo oli bin talem long medel blong olgeta bakegen, taem we oli stap go:

2 Luk, nao bae yumi save tru sapos man ia i wan profet mo God i bin givim oda long hem blong profesae ol gudfala samting olsem long yumi. Luk, yumi no bilivim se hem i bin mekem olsem, yumi no biliv we hem i wan profet; i nomata, sapos samting ia we hem i bin talem long saed blong jif jaj i tru, se hem i ded, ale bae yumi bilivim se ol narafala toktok we hem i bin talemaot i tru.

3 Mo i bin hapen se oli bin ron wetem strong blong olgeta, mo oli bin kam insaed i go long jea blong jajmen; mo luk, jif jaj i bin foldaon long graon, mo hem i bin ledaon long blad blong hem.

4 Mo nao luk, taem we oli bin luk samting ia oli bin sapraes tumas, inaf blong mekem se oli bin foldaon long graon; from oli no bin bilivim ol toktok we Nifae i bin talem long saed blong jif jaj.

5 Be nao, taem we oli bin luk oli bin biliv, mo fraet i bin kam long olgeta from oli fraet se evri jajmen we Nifae i bin talemaot bae i kam long ol pipol; taswe oli bin seksek, mo oli bin foldaon long graon.

6 Nao semtaem we hem i bin kilim ded jif jaj—brata blong hem i bin stikim hem wetem naef mo i bin putum klos blong oli no save luksave hem, mo

hem i bin ronwe, mo ol wokman i bin ron mo talemaot long ol pipol, oli singaot blong talemaot long ol pipol long saed blong fasin ia blong kilim man i ded; 7 Mo luk ol pipol i bin kam tugeta long ples blong jea blong jajmen—mo luk, long sapraes blong olgeta oli bin luk ol faef man ia we i bin foldaon long graon.

8 Mo nao luk, ol pipol i no bin save eni samting long saed blong grup blong pipol ia we i bin kam tugeta long garen blong Nifae; taswe oli bin talem long medel blong olgeta bakegen: Ol man ia oli olgeta we i bin kilim ded jaj, mo God i bin kilim olgeta mekem se oli no save ronwe long yumi.

9 Mo i bin hapen se oli bin holem taet olgeta, mo oli bin fasem olgeta mo oli bin sakem olgeta long prisen. Mo i bin gat wan nius i go long evri ples se oli bin kilim ded jaj, mo se olgeta we i bin kilim ded hem oli bin tekem olgeta mo sakem olgeta long prisen.

10 Mo i bin hapen se long nekis dei ol pipol i bin kam tugeta blong krae mo blong livim kakae, long taem we oli berem bigfala jif jaj we oli bin kilim hem i ded.

11 Mo olsem ia nao tu ol jaj we i bin stap long garen blong Nifae, mo oli bin harem ol toktok blong hem, olgeta tu i bin kam tugeta long taem we oli berem hem.

12 Mo i bin hapen se oli bin askem long medel blong ol pipol, se: Wehem ol faef we oli

bin sendem olgeta blong faenem jif jaj sapos hem i ded? Mo oli bin ansa mo bin talem: Long saed blong ol faef ia we yufala i se yufala bin sendem, mifala i no save; be i gat faef we oli olgeta we i bin kilim ded jif jaj we mifala i bin sakem long prisen.

13 Mo i bin hapen se ol jaj i bin wantem se oli tekem olgeta i kam; mo oli bin tekem olgeta i kam, mo luk, oli bin olgeta faef we oli bin sendem olgeta; mo luk ol jaj i bin askem long olgeta blong save long saed blong samting ia, mo oli bin talem long olgeta evri samting we oli bin mekem, se:

14 Mifala i bin ron mo kam long ples blong jea blong jajmen, mo taem we mifala i bin lukim evri samting olsem we Nifae i bin testifae, mifala i bin sapraes, inaf blong mekem se mifala i bin foldaon long graon; mo taem we mifala i bin kam gud bakegen aot long sapraes blong mifala, luk oli bin sakem mifala long prisen.

15 Nao, long saed blong fasin blong kilim man ia i ded, mifala i no save huia i bin mekem samting ia; mo hemia nomo mifala i save, mifala i bin ron mo kam folem olsem we yufala i bin wantem, mo luk hem i bin ded, folem ol toktok blong Nifae.

16 Mo nao i bin hapen se ol jaj i bin eksplenem samting ia long ol pipol, mo bin singaot agensem Nifae, se: Luk, mifala i save se Nifae ia i mas bin agri wetem wan man blong kilim ded jaj, mo afta hem i save talemaot long yumi, blong

mekem se hem i save jenisim laef blong yumi blong yumi i go long fet blong hem, blong hem i save mekem hem i kam wan bigfala man, God i jusum hem, mo wan profet.

17 Mo nao luk, bae yumi faenemaot man ia, mo bae hem i talemaot rong blong hem mo talem long yumi stret man we i bin kilim ded jaj.

18 Mo i bin hapen se olgeta faef i bin go fri long dei we oli berem jaj. Be, oli bin tok agensem ol jaj blong olgeta long ol toktok we oli bin talemaot agensem Nifae, mo oli bin rao wetem olgeta wan afta narawan, inaf blong mekem se oli bin blokem olgeta.

19 Be, oli bin mekem se oli mas tekem Nifae mo fasem hem mo tekem hem i go long fored blong grup blong ol pipol, mo oli bin stat blong askem ol kwestin long hem long defren kaen wei, blong mekem se oli save trikim hem, blong oli save blemem hem mo kilim hem i ded—

20 Oli talem long hem: Yu yu joen wetem wan narafala man; huia man ia we i bin mekem fasin ia blong kilim man i ded? Nao talem long mifala, mo luksave rong blong yu; se: Luk hemia i mane mo tu bae mifala i letem long yu laef blong yu sapos yu talem long mifala, mo luksave agrimen we yu bin mekem wetem hem.

21 Be Nifae i bin talem long olgeta: O yufala i ol krangke, yufala i gat ol strong hat, yufala i blaen, mo yufala we i stronghed, yufala i save hamas taem

Lod, God blong yufala bae i letem yufala blong bae yufala i gohed long hemia rod blong yufala blong sin?

22 O yufala i mas stat blong krae strong mo harem nogud, from bigfala panis we long taem ia i stap wet long yufala, sapos yufala i no sakem sin.

23 Luk yufala i talem se mi bin agri wetem wan man blong hem i mas kilim ded Sisoram, jif jaj blong yumi. Be luk, mi talem long yufala, se hemia i from mi bin testifae long yufala blong yufala i save gat save long saed blong samting ia; yes, hem i blong wan witnes long yufala, we mi bin save long ol nogud fasin mo ol rabis sin we i stap long medel blong yufala.

24 Mo from we mi bin mekem samting ia, yufala i talem se mi bin agri wetem wan man blong hem i mas mekem samting ia; yes, from mi bin soem long yufala saen ia yufala i kros long mi, mo lukaotem blong smasem gud laef blong mi.

25 Mo nao luk, bae mi soem long yufala wan narafala saen, mo luk sapos yufala tru long samting ia i lukaotem blong smasem gud laef blong mi.

26 Luk mi talem long yufala: Go long haos blong Siantum, we i brata blong Sisoram, mo i talem long hem—

27 Nifae, we i giaman profet, we i stap profesae plante long saed blong plante nogud fasin long saed blong ol pipol ia, i bin agri wetem yu, blong mekem se yu bin kilim ded Sisoram, we i brata blong yu?

28 Mo luk, bae hem i talem long yufala, No.

29 Mo bae yufala i talem long hem: Yu bin kilim ded brata blong yu?

30 Mo bae hem i stanap wetem fraet, mo no save wanem blong talem. Mo luk, bae hem i tanem baksaed long yufala mo bae hem i mekem olsem se hem i sapraes; be, bae hem i talemaot long yufala se hem i no mekem samting ia.

31 Be luk, bae yufala i jekem hem, mo bae yufala i faenem blad long daon blong longfala klos blong hem.

32 Mo taem we yufala i bin luk samting ia, bae yufala i talem: Blad ia i kam wea? Mifala i no save se hem i blad blong brata blong yu?

33 Mo afta bae hem i seksek, mo bae fes blong hem i kam waet, we i olsem se ded i bin kam long hem.

34 Mo afta bae yufala i talem: From fraet ia mo we fes blong yu i kam waet, luk, mifala i save se yu yu rong.

35 Mo afta bae fraet we i moa bigwan i kam long hem; mo afta bae hem i talemaot long yufala, mo nomo tanem baksaed, se hem i no bin mekem fasin ia blong kilim man i ded.

36 Mo afta bae hem i talem long yufala, se mi, Nifae, i no save eni samting long saed blong samting ia be paoa blong God nomo i bin mekem mi save. Mo afta bae yufala i save se mi mi wan man we i talem trutok, mo we God i bin sendem mi long yufala.

37 Mo i bin hapen se oli bin go mo mekem, we i folem we Nifae i bin talem long olgeta. Mo luk, ol toktok we hem i bin talemaot oli bin tru; from folem ol toktok, hem i bin tanem bak-saed; mo tu folem ol toktok, hem i bin talemaot.

38 Mo oli bin mekem hem i pruvum hem se hemwan i bin kilim ded jif jaj, inaf blong mekem se oli bin letem ol faef i go fri, mo tu Nifae.

39 Mo i bin gat sam long ol man blong Nifae we i bin bilivim ol toktok blong Nifae; mo i bin gat samfala tu, we oli bin biliv from testimoni blong ol faef, from oli bin jenisim laef taem we oli bin stap long prisen.

40 Mo nao i bin gat samfala long medel blong ol pipol, we i bin talem se Nifae i wan profet.

41 Mo i bin gat sam narafala wan we i bin talem: Luk, hem i wan god, from sapos hem i no wan god bae hem i no save gat save long evri samting ia. From luk, hem i bin talem yumi ol tingting blong ol hat blong yumi, mo tu i bin talem yumi ol samting; mo tu hem i bin mekem yumi i save tru man we i bin kilim ded jif jaj blong yumi.

---

### JAPTA 10

---

*Lod i givim Nifae paoa blong sil —  
Lod i givim paoa long hem blong  
save fasem mo letem i go fri long  
wol mo long heven — Hem i givim  
oda long ol pipol blong sakem sin o  
ded — Spirit i tekem hem i go long  
wan grup blong pipol i go long*

*narafala grup blong pipol. Raon-  
abaot 21–20 yia bifo Kraes i bon.*

Mo i bin hapen se ol pipol i bin divaedem olgeta long ol grup, inaf blong mekem se oli bin seraot i go long ples ia mo long ples ia, mo oli bin go long ol defren rod blong olgeta, i livim Nifae i stap hem wan, olsem we hem i stanap long medel blong olgeta.

2 Mo i bin hapen se Nifae i bin go long rod blong hem i go long haos blong hem, hem i tingting hevi long ol samting we Lod i bin soem long hem.

3 Mo i bin hapen se taem we hem i stap tingting hevi olsem ia nao — hem i harem nogud plante from nogud fasin blong ol pipol blong ol man blong Nifae, ol sikret wok blong olgeta blong tudak, mo ol fasin blong kilim man i ded blong olgeta, mo ol stil blong olgeta, mo evri kaen rabis fasin — mo i bin hapen se taem we hem i stap tingting hevi olsem ia noa long hat blong hem, luk, wan voes i bin kam long hem se:

4 Mi mi blesem yu, Nifae, from ol samting ia we yu bin mekem; from mi bin luk we yu no bin slak blong talemaot toktok, we mi bin givim long yu, long ol pipol ia. Mo yu no bin fraet long olgeta, mo yu no bin lukaotem laef blong yu, be yu bin lukaotem wanem we mi wantem, mo blong holem ol komanmen blong mi.

5 Mo nao, from yu no bin slak blong mekem samting ia, luk, bae mi blesem yu blong oltaem;

mo bae mi mekem yu strong long ol toktok mo long aksen, long fet mo long ol wok; yes, we i blong mekem se evri samting bae i hapen long yu folem toktok blong yu, from bae yu no askem samting we i agensem tingting blong mi.

6 Luk, yu yu Nifae, mo mi mi God. Luk, mi talemaot samting ia long yu long fes blong ol enjel blong mi, se bae yu gat paoa ova long pipol ia, mo bae yu kilim graon wetem had taem blong kasem kakae mo wetem ol siknes, mo fasin blong smasem gud, folem nogud fasin blong ol pipol ia.

7 Luk, mi givim long yu paoa, se eni samting we yu silim long wol bae i silim long heven; mo eni samting we yu letem i go fri long wol bae i go fri long heven; mo olsem ia nao bae yu gat paoa long medel blong pipol ia.

8 Mo olsem ia nao, sapos bae yu i talem long tempol ia se bae i brokbrok long tu, bae i hapen.

9 Mo sapos bae yu talem long bigfala hil ia, Yu foldaon mo kam smut, bae i hapen.

10 Mo luk, sapos bae yu talem se God bae i kilim ol pipol ia, bae i kam blong hapen.

11 Mo nao luk, mi givim oda long yu, se bae yu go mo talemaot long ol pipol ia, se olsem ia nao Lod God i talem, we i gat bigfala paoa: Hemia nomo sapos yufala i no sakem sin bae yufala i kasem panis, kasem taem we i smasem gud yufala.

12 Mo luk, nao i bin hapen se taem we Lod i bin talem ol toktok ia long Nifae, hem i bin stop

mo i no bin go long haos blong hem, be i bin gobak long ol grup blong ol pipol we i bin seraot olbaot long fes blong graon, mo i bin stat blong talemaot long olgeta toktok blong Lod we Lod i bin talem long hem, long saed blong smasud blong olgeta sapos oli no sakem sin.

13 Nao luk, i nomata long bigfala merikel ia we Nifae i bin mekem blong talem long olgeta long saed blong ded blong jif jaj, oli bin mekem ol hat blong olgeta i kam strong, mo oli no bin lisiin long ol toktok blong Lod.

14 Taswe Nifae i bin talemaot long olgeta toktok blong Lod, se: sapos yufala i no sakem sin, olsem ia nao Lod i talem, bae mi panisim yufala kasem taem we i smasem gud yufala.

15 Mo i bin hapen se taem we Nifae i bin talemaot long olgeta trutok ia, luk, oli bin mekem ol hat blong olgeta i kam strong yet mo oli no bin wantem lisiin long ol toktok blong hem; taswe oli bin go agensem hem, mo oli bin lukaotem blong putum ol han blong olgeta long hem blong oli save sakem hem i go long prisen.

16 Be luk, paoa blong God i bin stap wetem hem, mo oli no bin save tekem hem blong sakem hem i go long prisen, from Spirit i bin tekem hem mo i bin karem hem i gowe aot long medel blong olgeta.

17 Mo i bin hapen se olsem ia hem i bin go fored wetem Spirit, long wan grup blong pipol i go long narafala grup blong pipol,



hem i talemaot toktok blong God, go kasem taem we hem i bin talemaot samting ia long olgeta evriwan, o i bin sendem i go aot long medel blong evri pipol.

18 Mo i bin hapen se oli no bin wantem lisiin long ol toktok blong hem; mo i bin stat blong gat ol rao, inaf blong mekem se oli bin seraot agensem olgeta bakegen, mo oli bin stat blong kilim ded olgeta bakegen wetem naef blong faet.

19 Mo olsem ia nao seventi mo fas yia blong rul blong ol jaj ova long ol pipol blong Nifae i bin en.

---

### JAPTA 11

---

*Nifae i winim tingting blong Lod blong putum long ples blong faet blong olgeta wan hadtaem blong kasem kakae—Plante pipol i ded—Oli sakem sin, mo Nifae i askem strong long Lod from ren—Nifae mo Lihae i kasem plante revelesen—Ol Gadianton stilman i stanem-ap gud olgeta long graon. Raon-abaot 20–6 yia bifo Kraes i bon.*

Mo nao i bin hapen long seventi mo nambatu yia blong rul blong ol jaj se ol rao i bin kam moa bigwan, inaf blong mekem se i bin gat ol faet truaot evri graon long medel blong evri pipol blong Nifae.

2 Mo i bin sikret grup blong ol stilman we i bin mekem wok ia blong smasem gud samting mo nogud fasin. Mo faet ia i stap long ful yia ia; mo long seventi mo nambatri yia hem i bin stap tu.

3 Mo i bin hapen se long yia ia Nifae i bin prea long Lod, se:

4 O Lod, no letem se pipol ia i ded tru long naef blong faet; be O Lod, long ples blong samting ia, letem i gat wan hadtaem blong kasem kakae long graon, blong mekem olgeta i tingbaot Lod, God blong olgeta, mo maet bae oli sakem sin mo tanem olgeta long yu.

5 Mo olsem ia i bin hapen, folem ol toktok blong Nifae. Mo i bin gat wan bigfala hadtaem blong kasem kakae long graon, long medel blong evri pipol blong Nifae. Mo olsem ia nao long seventi mo fo yia hadtaem blong kasem kakae ia i bin gohed, mo wok blong fasin blong smasem gud i bin stop wetem naef blong faet, be i bin kam nogud tumas tru long hadtaem blong kasem kakae.

6 Mo wok blong fasin ia blong smasem gud i bin gohed tu long seventi mo faef yia. From Lod i bin kilim graon mekem se i bin drae, mo i no bin karem wit long taem blong wit; mo Lod i bin panisim ful graon, we i long medel blong ol man blong Lemana sem mak olsem long ol man blong Nifae, blong mekem se oli bin kasem panis mekem se oli bin ded long ol taosen long ol pat blong graon we i moa nogud.

7 Mo i bin hapen se ol pipol i bin luk se klosap bae oli ded from hadtaem blong kasem kakae, mo oli bin stat blong tingbaot Lod, God blong olgeta; mo oli bin stat blong tingbaot ol toktok blong Nifae.

8 Mo ol pipol i bin stat blong askem strong long ol jif jaj blong olgeta mo ol lida blong olgeta, blong olgeta bae oli talem long Nifae: Luk, mifala i save se yu yu wan man blong God, mo taswe prea long Lod, God blong yumi blong hem i tanem i gowe long mifala hadtaem ia blong kasem kakae, from mi fraet se ol toktok we yu bin talem long saed blong fasin blong mifala i panis bae i hapen.

9 Mo i bin hapen se ol jaj i bin talem long Nifae, folem ol toktok we ol pipol i bin wantem. Mo i bin hapen se taem we Nifae i bin luk se ol pipol i bin sakem sin mo oli bin putum tingting blong olgeta i stap daon long ol pua klos, hem i bin prea bakegen long Lod, se:

10 O Lod, luk ol pipol ia i sakem sin; mo oli bin aotem grup blong Gadianton aot long medel blong olgeta inaf blong mekem se oli nomo gat, mo oli bin haedem ol sikret plan blong olgeta insaed long graon.

11 Nao, O Lod, from hemia we tingting blong olgeta i stap daon, bae yu tanem i gowe kros blong yu, mo letem kros blong yu i harem gud long panis blong ol nogud man we yu bin panisim finis.

12 O Lod, bae yu tanem i gowe kros blong yu, yes, strongfala kros blong yu, mo mekem se hadtaem ia blong kasem kakae i stop long graon ia.

13 O Lod, bae yu lisin long mi, mo mekem se i save hapen folem ol toktok blong mi, mo sendem aot ren long fes blong

graon, blong hem i save karem frut blong hem, mo ol wit blong hem long taem blong wit.

14 O Lod, yu bin lisin long ol toktok blong mi taem we mi bin talem, Letem se i gat wan hadtaem blong kasem kakae blong mekem se sik blong naef blong faet i save stop; mo mi save se bae yu mekem, we i long taem ia, lisin long ol toktok blong mi, from yu bin talem se: Sapos pipol ia i sakem sin bae mi letem olgeta i stap laef.

15 Yes, O Lod, mo yu stap luk we oli bin sakem sin, from hadtaem blong kasem kakae mo sik mo panis we i bin kam long olgeta.

16 Mo nao, O Lod, bae yu tanem i gowe kros blong yu, mo traem bakegen sapos bae oli wok blong yu? Mo sapos i olsem, O Lod, yu save blesem olgeta folem ol toktok we yu bin talem.

17 Mo i bin hapen se long namba seventi mo sikis yia Lod i bin tanem i gowe kros blong hem long ol pipol, mo i bin mekem se ren i mas foldaon long graon, inaf blong mekem se hem i bin karem ol frut blong hem long taem blong frut blong hem. Mo i bin hapen se hem i bin karem wit blong hem long taem blong wit blong hem.

18 Mo luk, ol pipol i bin hapi mo presem God, mo ful fes blong graon i bin fulap wetem hapi; mo oli nomo bin lukaotem blong smasem gud Nifae, be oli bin tekem hem olsem wan bigfala profet, mo wan man blong God, we i gat

bigfala paoa mo raet we God i bin givim long hem.

19 Mo luk, Lihae, brata blong hem, i no bin semak olsem hem long saed blong ol samting blong stret fasin.

20 Mo olsem ia nao i bin kam blong hapen se ol pipol blong Nifae i bin stat blong kam antap gud bakegen long graon, mo oli bin stat blong stanemap ol emti ples blong olgeta, mo oli bin stat blong kam plante mo seraot, kasem taem we oli bin kavremap ful fes blong graon, long not tugeta wetem long saot, stat long solwota blong wes kasem solwota blong is.

21 Mo i bin hapen se namba seventi mo sikis yia i bin en wetem pis. Mo namba seventi mo seven yia i bin stat wetem pis; mo jos i bin go olbaot truaot long fes blong evri graon; mo bigfala pat long ol pipol, ol man blong Nifae tugeta wetem ol man blong Leman, oli bin stap long jos; mo oli bin gat pis we i bigwan tumas long graon; mo olsem ia nao namba seventi mo seven yia i bin en.

22 Mo tu oli bin gat pis long namba seventi mo eit yia, be sam rao long saed blong ol poen blong doktrin nomo we ol profet i bin putum.

23 Mo long seventi mo naen yia i bin stat blong gat plante rao. Be i bin hapen se Nifae mo Lihae, mo plante long ol brata blong tufala we i bin save long saed blong ol tru poen blong doktrin, from oli kasem plante revelesen evri dei, taswe oli bin prij long ol pipol, inaf blong

mekem se ol pipol oli bin stopem ol rao blong olgeta long semfala yia ia.

24 Mo i bin hapen se long namba eiti yia blong rul blong ol jaj ova long ol pipol blong Nifae, i bin gat samfala long olgeta we i bin pulaot long ol pipol blong Nifae, we oli bin long plante ia i pas finis oli go long ol man blong Leman, mo oli bin tekem long olgeta bakegen nem blong ol man blong Leman, mo tu samfala long olgeta we oli tru laen blong ol man blong Leman, from olgeta ia i bin tanem tingting blong ol pipol ia blong kros, o tru long olgeta we i bin pulaot, taswe oli bin statem wan faet wetem ol brata blong olgeta.

25 Mo oli bin kilim man i ded mo stilim ol samting long taem blong faet; mo afta bae oli gobak long ol bigfala hil, mo long ples we i no gat man long hem mo ol sikret ples, oli haedem olgeta bakegen blong mekem se oli no save faenem olgeta, evri dei oli kasem moa long ol namba blong olgeta, i semak olsem we i bin gat olgeta we i pulaot we i bin go fored long olgeta.

26 Mo olsem ia nao long taem, yes, we i long spes blong no plante yia, oli bin kam wan bigfala grup tumas blong ol stilman; mo oli bin lukaotem evri sikret plan blong Gadianton; mo olsem ia nao oli bin kam ol stilman blong Gadianton.

27 Nao luk, ol stilman ia i bin mekem bigfala trabol, yes, we i wan bigfala fasin blong smasem gud long medel blong ol pipol

blong Nifae, mo tu long medel blong pipol ol blong ol man blong Leman.

28 Mo i bin hapen se i bin gat nid se ol pipol i stopem wok ia blong fasin blong smasem gud; taswe oli bin sendem wan ami blong ol strong man i go long ples we i no gat man long hem mo long ol bigfala hil blong lukaotem grup ia blong ol stilman, mo blong smasem gud olgeta.

29 Be luk, i bin hapen se long sem yia ia ol stilman oli bin ronem olgeta i gobak long ol graon blong olgeta bakegen. Mo olsem ia nao namba eiti yia blong rul blong ol jaj ova long ol pipol blong Nifae i bin en.

30 Mo i bin hapen long stat blong namba eiti mo fas yia oli bin go aot baekegen agensem grup ia blong ol stilman, mo oli bin smasem gud plante; mo olgeta tu i bin lusum plante long olgeta.

31 Mo tu bakegen oli mas kamaot long ples we i no gat man long hem, mo aot long ol bigfala hil i gobak long ol graon blong olgeta, from bigfala namba we i tumas blong ol stilman we i bin stap long ol bigfala hil mo ples we i no gat man long hem.

32 Mo i bin hapen se olsem ia nao yia ia i bin en. Mo ol stilman i bin gohed blong kam plante mo wok strong, inaf blong mekem se oli bin stanap strong agensem ol ful ami blong ol man blong Nifae, mo tu blong ol man blong Leman; mo oli bin mekem se bigfala

fraet i kam long ol pipol long ful fes blong graon.

33 Yes, from oli bin visitim plante ples blong graon, mo oli bin smasem gud olgeta bigwan; yes, oli bin kilim ded plante, mo oli bin tekem plante narafala i go prisena long ples we i no gat man long hem, yes, mo i moa long ol woman blong olgeta mo ol pikinini blong olgeta.

34 Nao bigfala nogud fasin ia, we i bin kam long ol pipol from nogud fasin blong olgeta, i bin tanem tingting blong olgeta bakegen blong tingbaot Lod, God blong olgeta.

35 Mo olsem ia nao namba eiti mo fas yia blong rul blong ol jaj i bin en.

36 Mo long namba eiti mo seken yia oli bin stat bakegen blong fogetem Lod, God blong olgeta. Mo long eiti mo tri yia oli bin stat blong wok strong long nogud fasin. Mo long namba eiti mo fo yia oli no bin mekem gud ol fasin blong olgeta.

37 Mo i bin hapen long namba eiti mo faef yia oli bin wok moa strong mo moa strong long hae tingting blong olgeta, mo long nogud fasin blong olgeta; mo olsem ia nao oli bin kam raep bakegen blong kasem panis.

38 Mo olsem ia nao namba eiti mo faef yia i bin en.

---

## JAPTA 12

---

*Ol man oli no stap strong mo oli krangke mo kwik blong mekem nogud fasin—Lod i stretem ol pipol blong hem—Nating blong ol man*

*i skelem wetem paoa blong God—  
Long dei blong jajmen, ol man bae  
i kasem laef we i no gat en o panis  
we i no save finis. Raonabaot 6 yia  
bifo Kraes i bon.*

Mo olsem ia nao yumi save luk olsem wanem i giaman, mo tu we ol hat blong ol pikinini blong ol man i no stap strong; yes, yumi save luk we Lod long gudfala fasin blong hem we i no save finis i blesem mo mekem i kam antap gud olgeta we i putum tras blong olgeta long hem.

2 Yes, mo yumi save luk long stret taem we hem i stap mekem i kam antap gud ol pipol blong hem, yes, long saed blong ol plantesen blong olgeta i kam plante, ol grup blong ol anamol blong olgeta mo ol buluk blong olgeta, mo long gol, mo long silva, mo long evri fasin blong ol gudgudfala samting long evri kaen we i hapen; hem i letem olgeta i stap laef, mo i mekem olgeta i go fri aot long ol han blong ol enemi blong olgeta; i mekem ol hat blong ol enemi blong olgeta i kam sofsof blong oli no mekem ol faet agensem olgeta; yes, mo blong endem, i mekem evri samting from gudfala laef mo hapi blong ol pipol blong hem; yes, afta i taem we oli mekem ol hat blong olgeta i kam strong, mo fogetem Lod, God blong olgeta, mo purumbut andanit long ol leg blong olgeta Tabu Wan—yes, mo hemia i from ol gud taem blong olgeta mo

bigfala sakses blong olgeta we i tumas.

3 Mo olsem ia nao yumi luk se sapos Lod i no stretem ol pipol blong hem wetem plante hadtaem, yes, sapos hem i no visitim olgeta wetem ded mo wetem fraet, mo wetem hadtaem blong kasem kakae mo wetem evri kaen sik, bae oli no tingbaot hem.

4 O hamas nao we ol pikinini blong ol man i krangke, mo hamas nao oli mekem samting we i blong nating nomo, mo hamas nao oli mekem nogud fasin, mo olsem devel, mo hamas nao oli kwik blong mekem nogud fasin, mo hamas nao oli slo blong mekem gud fasin; yes, hamas nao oli kwik blong lisin long ol toktok blong nogud wan, mo blong putum ol hat blong olgeta long ol samting blong wol ia we i blong nating!

5 Yes, hamas nao oli leftemap olgeta long hae tingting; yes, hamas nao oli kwik blong tok flas, mo mekem evri kaen fasin blong samting we i nogud; mo hamas nao oli slo blong tingbaot Lod, God blong olgeta, mo blong givim sore long ol advaes blong hem, yes, hamas nao oli slo blong wokbaot long ol rod blong waes tingting!

6 Luk, oli no wantem se Lod, God blong olgeta, we i bin mekem olgeta, se i rulum mo i moa hae long olgeta; i nomata long gudfala fasin blong hem mo sore blong hem long olgeta, oli putum olsem nating ol ad-

vaes blong hem, mo oli no wantem se hem i lidim olgeta.

7 O hamas nao bigfala nating blong ol pikinini blong ol man; yes, i tru we oli moa daon bitim das blong graon.

8 From luk, das blong graon i mov long ples ia i go long ples ia, blong mekem se i brokbrok, long oda blong bigfala God blong yumi we i no save finis.

9 Yes, luk, long voes blong hem ol hil mo ol bigfala hil oli seksek mo seksek from fraet.

10 Mo tru long paoa blong voes blong hem oli brokbrok, mo kam smut, yes, we i olsem wan vale.

11 Yes, tru long paoa blong voes blong hem ful wol i seksek;

12 Yes, tru long paoa blong voes blong hem, ol fandesen i seksek, go kasem medel blong olgeta.

13 Yes, mo sapos hem i talem long wol—Muv—hem i mov.

14 Yes, sapos hem i talem long wol—Yu mas gobak, mekem se i mekem dei i longfala long plante aoa—hem i hapen;

15 Mo olsem ia nao, folem toktok blong hem wol i gobak, mo i luk olsem long ol man se san i no mov; yes, mo luk, hem i olsem; from i tru hem i wol we i mov mo i no san.

16 Mo luk, tu, sapos hem i talem long ol wota blong bigfala solwota—Yu yu kam drae—hem i hapen.

17 Luk, sapos hem i talem long bigfala hil ia—Yu yu girap, mo kam mo foldaon long bigtaon ia, blong berem hem—luk hem i hapen.

18 Mo luk, sapos wan man i haedem gud wan rij samting long wol, mo Lod bae i talem—Letem i kam nogud, from nogud fasin blong hem we i bin haedem samting ia—luk, bae i kam nogud.

19 Mo sapos Lod bae i talem—Yu yu kam nogud, blong i no gat man we bae i faenem yu stat long taem ia naoia mo blong oltaem—luk, no man i kasem hem long naoia mo blong oltaem.

20 Mo luk, sapos Lod bae i talem long wan man—From ol nogud fasin blong yu, bae yu kasem panis blong oltaem—bae hem i hapen.

21 Mo sapos Lod bae i talem—From ol nogud fasin blong yu bae mi katemaot yu long fes blong mi—bae hem i mekem se bae hem i olsem.

22 Mo sore tumas long hem we bae hem i talem samting ia, from samting ia bae i go long hem we bae i mekem nogud fasin, mo hem i no save sef; taswe, from stamba tingting ia se ol man oli save sef, fasin blong sakem sin Lod i bin talemaot.

23 Taswe, Lod i blesem olgeta we bae oli sakem sin mo lisen long voes blong Lod, God blong olgeta; from hemia i olgeta we bae oli sef.

24 Mo bae God i givim, wetem bigfala fulwan blong hem, se maet ol man i save kam blong sakem sin mo kam long ol gud wok, blong oli save kambak long gladhat from gladhat, follem ol wok blong olgeta.

25 Mo mi wantem se evri man bae i save sef. Be yumi bin ridim se long bigfala mo las dei i gat sam we bae Lod i katemaot olgeta, yes, we bae i katemaot olgeta aot long fes blong hem;

26 Yes, we bae i putum olgeta long wan ples blong sore we i no gat en, blong mekem i hapen ol toktok we i talem: Olgeta we i bin mekem gud fasin bae oli kasem laef we i no save finis; mo olgeta we i bin mekem nogud fasin bae oli kasem panis we i no gat en. Mo i olsem ia nao. Amen.

---

Profesi blong Samuel, man blong Leman, long ol man blong Nifae.

*I stat long japta 13 i go kasem japta 15 nomo.*

---

### JAPTA 13

---

*Samuel man blong Leman i profesae fasin blong panis blong ol man Nifae sapos oli no sakem sin—Olgeta mo ol rij samting blong olgeta i kasem panis—Oli sakemaot mo stonem ol profet, mo ol devel i raonem olgeta, mo lukaotem blong stap hapi long taem we oli mekem rabis fasin. Raonabaot 6 yia bifo Kraes i bon.*

Mo nao i bin hapen long namba eiti mo sikis yia, ol man blong Nifae i bin stap yet long nogud fasin, yes, long nogud fasin we i bigwan, taem we ol man blong Leman i bin stap holem stret gud ol komanmen blong God, folem loa blong Moses.

2 Mo i bin hapen se long yia ia i bin gat wan Samuel, wan man blong Leman, i bin kam long graon blong Sarahemla, mo i bin stat blong prij long ol pipol. Mo i bin hapen se hem i bin prij, plante dei, fasin blong sakem sin long ol pipol, mo oli bin sakem hem aot, mo hem i bin rere blong gobak long graon blong hem.

3 Be luk, voes blong Lod i bin kam long hem, se hem i mas gobak bakegen, mo profesae long ol pipol eni samting we bae i kam long hat blong hem.

4 Mo i bin hapen se oli no bin wantem se bae hem i go insaed long bigtaon; taswe hem i bin go mo go antap long wol blong bigtaon, mo i bin stretemaot han blong hem mo i bin singaot strong wetem wan laod voes, mo i bin profesae long ol pipol eni samting we Lod i bin putum long hat blong hem.

5 Mo hem i bin talem long olgeta: Luk, mi, Samuel, wan man blong Leman, mi talem ol toktok blong Lod we hem i putum long hat blong mi; mo luk hem i bin putum long hat blong mi blong talem long ol pipol ia se naef blong jastis i stap hang antap long ol pipol ia; mo fo handred yia i no save pas sapos naef blong jastis bae i no foldaon long pipol ia.

6 Yes, bigfala panis bae i kam long ol pipol ia, mo i tru bae samting ia i kam long ol pipol ia, mo i no gat eni samting we i save sevem ol pipol ia hemia nomo sapos i no fasin blong sakem sin mo fet long Lod Jisas

Kraes, we i tru we bae hem i kam long wol, mo bae i safa long plante samting mo bae oli kilim hem i ded from ol pipol blong hem.

7 Mo luk, wan enjel blong Lod i bin talem samting ia long mi, mo hem i bin karem glad nius long sol blong mi. Mo luk, Lod i bin sendem mi long yufala blong talemaot samting ia long yufala tu, blong yufala i save gat ol glad nius; be luk yufala i no bin wantem akseptem mi.

8 Taswe, olsem ia nao Lod i talem: From ol hat blong ol pipol blong ol man blong Nifae i strong, hemia nomo sapos oli no sakem sin bae mi tekemaot toktok blong mi long olgeta, mo bae mi tekemaot Spirit blong mi long olgeta, mo bae mi nomo save letem olgeta, mo bae mi tanem ol hat blong ol brata blong olgeta agensem olgeta.

9 Mo fo hundred yia bae i no pas i gowe bifo bae mi mekem se oli kilim olgeta; yes, bae mi visitim olgeta wetem naef blong faet mo wetem hadtaem blong kasem kakae mo wetem sik.

10 Yes, bae mi visitim olgeta wetem strongfala kros blong mi, mo bae i gat olgeta blong nambafo jeneresen we bae oli stap laef, aot long ol enemi blong yufala, blong lukim smasgud evriwan blong yufala; mo i tru we samting ia i mas kam sapos yufala i no sakem sin, Lod i talem; mo olgeta blong nambafo jeneresen bae oli mekem smasgud blong yufala.

11 Be sapos yufala i sakem sin mo kambak long Lod, God

blong yufala bae mi tanem i gowe kros blong mi, Lod i talem; yes, olsem ia nao Lod i talem, mi blesem olgeta we bae oli sakem sin mo kambak long mi, be sore tumas long man we i no sakem sin.

12 Yes, sore tumas long bigtaon ia blong Sarahemla; from luk, hem i from olgeta we oli stret, we bigtaon ia i sev; yes, sore tumas long bigfala bigtaon ia, from mi luk, Lod i talem, se i gat plante, yes, we i bigfala pat blong bigtaon ia we bae i mekem ol hat blong olgeta i kam strong agensem mi, Lod i talem.

13 Be mi blesem olgeta we bae oli sakem sin, from olgeta ia bae mi letem olgeta blong oli stap laef. Be luk, sapos i no bin gat olgeta we i stret we oli stap long bigfala bigtaon ia, luk, bae mi mekem se faea bae i kam daon aot long heven mo i smasem gud hem.

14 Be luk, hem i from olgeta we oli stret we bigtaon ia i stap gud. Be luk, taem i kam, Lod i talem, se taem we bae yufala i sakemaot olgeta we i stret long medel blong yufala, afta bae yufala i raep blong kasem panis; yes, sore tumas long bigfala bigtaon ia, from nogud fasin mo ol rabis sin we i stap insaed long hem.

15 Yes, mo sore tumas long bigtaon blong Gidion, from nogud fasin mo ol rabis sin we i stap insaed long hem.

16 Yes, mo sore tumas long evri bigtaon we i stap long graon raonabaot, we ol man



blong Nifae i holem, from nogud fasin mo ol rabis sin we i stap insaed long olgeta.

17 Mo luk, wan panis bae i kam long graon, Lod blong ol Host i talem, from ol pipol we i stap long graon, yes, from nogud fasin blong olgeta mo ol rabis sin blong olgeta.

18 Mo bae i kam blong hapen, Lod blong ol Host i talem, yes, bigfala mo tru God blong yumi, se huia we bae i haedem ol rij samting long graon bae i nomo faenem olgeta bakegen, from bigfala panis blong graon, sapos hem i no wan man we i stret mo bae i haedem ol samting ia wetem Lod.

19 From mi wantem, Lod i talem, se bae oli haedem ol rij samting blong olgeta wetem mi; mo panis i go long olgeta we i no haedem ol rij samting blong olgeta wetem mi; from i no gat wan we i haedem ol rij samting wetem mi, hemia nomo sapos hem i no stret; mo hem we i no haedem ol rij samting blong hem wetem mi, hem i kasem panis, mo tu rij samting ia, mo i no gat wan we i save pemaot hem, from panis blong graon.

20 Mo dei bae i kam we bae oli haedem ol rij samting blong olgeta, from oli bin putum ol hat blong olgeta long ol rij samting; mo from oli bin putum ol hat blong olgeta long ol rij samting blong olgeta, mo bae oli haedem ol rij samting blong olgeta taem we bae oli ronwe long fored blong ol enemi blong olgeta; from oli no wantem

haedem olgeta wetem mi, panis i go long olgeta mo tu ol rij samting blong olgeta; mo long dei ia bae oli kilim olgeta, Lod i talem.

21 Luk yufala, ol pipol blong bigfala bigtaon ia, mo lisen long ol toktok blong mi; yes, lisen long ol toktok we Lod i talem; From luk, hem i talem se yufala i kasem panis from ol rij samting blong yufala, mo tu ol rij samting blong yufala i kasem panis from yufala i bin putum ol hat blong yufala long olgeta, mo i no bin lisen long ol toktok blong hem we i bin givim olgeta long yufala.

22 Yufala i no tingbaot Lod, God blong yufala long ol samting we hem i bin blesem yufala wetem, be yufala i tingbaot ol rij samting blong yufala oltaem, i no blong talem tangkyu long Lod, God blong yufala; yes, ol hat blong yufala i no stap long Lod, be oli solap wetem bigfala hae tingting, we i mekem se yufala i tok flas, mo kros bigwan, ol fasin blong wantem samting blong narafala man, gat ol smol rao, tingting blong kilim narafala man, ol fasin blong givim hadtaem, mo ol fasin blong kilim man i ded, mo evri kaen nogud fasin.

23 From stamba tingting ia Lod God i bin mekem se wan panis i mas kam long graon, mo tu long ol rij samting blong yufala, mo hemia from ol nogud fasin blong yufala.

24 Yes, sore tumas long ol pipol ia, from taem ia we i bin kam, we yufala i stap sakemaot ol profet, mo stap jikim olgeta,

mo stap sakem ol ston long olgeta, mo stap kilim olgeta i ded, mo stap mekem evri kaen nogud fasin long olgeta, sem mak olsem oli bin mekem long bifo.

25 Mo nao taem we yufala i toktok, yufala i talem: Sapos ol dei blong mifala i bin stap long ol dei blong ol papa blong mifala blong bifo, bae mifala i no bin kilim ded ol profet, bae mifala i no bin stonem olgeta, mo sakemaot olgeta.

26 Luk, yufala i moa nogud bitim olgeta; from olsem we Lod i stap laef, sapos wan profet i kam long medel blong yufala mo talemaot long yufala toktok blong Lod, we i testifae long saed blong ol sin blong yufala mo ol nogud fasin, yufala i kros long hem, mo sakem hem aot mo lukaotem evri kaen wei blong smasem gud hem; yes, bae yufala i talem se hem i wan giaman profet, mo se hem i wan man blong sin, mo blong devel, from hem i testifae se ol fasin blong yufala i nogud.

27 Be luk, sapos wan man bae i kam long medel blong yufala mo bae i talem: Yufala i mekem samting ia, mo bae i no rabis; mekem samting ia mo bae yufala i no safa; yes, bae hem i talem: Wokbaot folem hae tingting blong hat blong yufala bakegen; yes, wokbaot folem hae tingting blong ol ae blong yufala, mo mekem eni samting we hat blong yufala i wantem— mo sapos wan man bae i kam long medel blong yufala mo talem samting ia, bae yufala i

tekem hem, mo talem se hem i wan profet.

28 Yes, bae yufala i leftemap hem, mo bae yufala i givim long hem long ol samting blong yufala; bae yufala i givim long hem long gol blong yufala, mo long silva blong yufala, mo bae yufala i putum long hem ol klos we i rij tumas; mo from hem i talem ol swit tok long yufala, mo hem i talem se evri samting i oraet, ale bae yufala i no faenem rong long.

29 O yufala nogud mo stronghed jeneresen; yufala i bin mekem yufala i strong mo yufala i wan stronghed pipol tumas, hamas taem moa bae yufala i ting se Lod bae i letem yufala i gohed olsem? Yes, hamas taem moa bae yufala i letem yufala bakegen blong letem ol krangke mo blaen man i lidim yufala? Yes, hamas taem moa bae yufala i jusum tudak be i no laet?

30 Yes, luk, kros blong Lod i bin girap finis agensem yufala; luk, hem i bin panisim graon ia from nogud fasin blong yufala.

31 Mo luk, taem i kam we hem i panisim ol rij samting blong yufala blong oli kam glis; blong mekem se yufala i no save holem olgeta; mo long ol dei we yufala i pua, yufala i no save holem taet olgeta.

32 Mo long ol dei we yufala i pua bae yufala i prea long Lod; mo blong nating bae yufala i prea, from smasgud blong yufala i kam long yufala finis, mo panis blong yufala i mas tru; mo long taem ia bae yufala i

i krae mo singaot strong long dei ia, Lod blong ol Host i talem. Mo long taem ia bae yufala i krae mo talem:

33 O sapos mi bin sakem sin, mo no bin kilim ded ol profet, mo bin stonem olgeta, mo bin sakemaot olgeta. Yes, long dei ia bae yufala i talem: O sapos yumi bin tingbaot Lod, God blong yumi long dei we hem i bin givim yumi ol rij samting blong yumi, mo afta oli no bin save kam glis blong bae yumi mas lusum olgeta; from luk, ol rij samting blong yumi i aot long yumi.

34 Luk, yumi putum wan tul long ples ia mo long nekis dei i lus; mo luk, ol naef blong faet blong yumi oli tekemaot long yumi long dei we yumi bin lukaotem olgeta from faet.

35 Yes, yumi i bin haedem ol rij samting blong yumi mo oli bin glis aot long yumi, from panis blong graon ia.

36 O sapos yumi bin sakem sin long dei we toktok blong Lod i bin kam long yumi; from luk graon i kasem panis, mo evri samting i kam glis, mo yumi no save holem olgeta.

37 Luk, ol devel i raonem yumi, yes, ol enjel blong hem we i bin lukaot blong smasem gud ol sol blong yumi i raonem yumi. Luk, ol nogud fasin blong yumi i bigwan. O Lod, yu no save tanem i gowe kros blong yu long mifala? Mo hemia bae i lanwis blong yufala long ol dei ia.

38 Be luk, ol dei blong tes blong yufala oli pas finis; yufala i bin

pusum bak dei blong fasin blong sevem man blong yufala kasem taem we i let tumas we i no gat en, mo panis blong yufala i mas hapen; yes, from yufala i bin lukaot, long evri dei blong laef blong yufala, long samting ia we yu no save kasem, mo yufala i bin lukaotem blong stap hapi long taem we yufala i mekem ol nogud fasin, we samting ia i agensem fasin blong stret fasin we i stap insaed long Bigfala mo Lida blong yumi we i no save Finis.

39 O yufala ol pipol blong graon, mi wantem se yufala i harem ol toktok blong mi! Mo mi prea se kros blong Lod, i tanem i gowe long yufala, mo se yufala i sakem sin mo sev.

---

#### JAPTA 14

---

*Samuel i talemaot se laet bae i saen long naet mo wan niu sta long taem Kraes i bon — Kraes i pemaot man long ded blong bodi mo ded blong spirit — Ol saen blong ded blong hem i gat tri dei blong tudak, ol brokbrok blong ol ston, mo ol bigfala seksek blong wol. Raonabaot 6 yia bifo Kraes i bon.*

Mo nao i bin hapen se Samuel, man blong Leman, i bin profesae long plante moa samting we oli no save raetem.

2 Mo luk, hem i bin talem long olgeta olsem: Luk, mi givim long yufala wan saen; from faef yia moa i kam, mo luk, afta Pikinini blong God i kam blong pemaot olgeta we bae oli biliv long nem blong hem.

3 Mo luk, hemia bae mi givim long yufala blong wan saen long taem we bae hem i kam; from luk, bae i gat ol bigfala laet long heven, inaf blong mekem se long naet bifo hem i kam bae i no gat tudak, inaf we i mekem se bae i luk olsem long man se hem i dei.

4 Taswe, bae i gat wan dei mo wan naet mo wan dei, olsem se hem i wan dei mo i no bin gat naet; mo samting ia bae i olsem wan saen long yufala; from bae yufala i save se san i girap mo tu se i go daon; taswe olgeta bae i save tru se bae i gat tu dei mo wan naet; be naet bae i no kam dak; mo bae hem i naet bifo hem i bon.

5 Mo luk, bae wan niu sta i girap, olsem wan we yufala i neva bin luk; mo samting ia tu bae i wan saen long yufala.

6 Mo luk, i no hemia nomo, bae i gat plante saen mo plante sapraes long heven.

7 Mo bae i kam blong hapen se bae yufala evriwan i sapraes, mo sapraes tumas, inaf blong mekem se bae yufala i foldaon long graon.

8 Mo bae i kam blong hapen se eni man we bae i biliv long Pikinini blong God, semfala man ia bae i kasem laef we i no save finis.

9 Mo luk, olsem ia nao Lod i bin givim oda long mi, tru long enjel blong hem, blong mi mas kam mo talemaot samting ia long yufala; yes, hem i bin givim oda se mi mas profesae ol samting ia long yufala; yes, hem i bin talem long mi: Singaot long

ol pipol ia, sakem sin mo mekem rere rod blong Lod.

10 Mo nao, from mi mi wan man blong Leman, mo mi bin talem long yufala ol toktok we Lod i bin givim oda long mi, mo from oli bin strong agensem yufala, yufala i kros long mi mo lukaotem blong smasem gud mi, mo yufala i bin sakem mi aot long yufala.

11 Mo bae yufala i mas harem ol toktok blong mi, long ol narafala toktok, from stamba tingting ia mi bin kam antap long ol wol blong bigtaon ia, blong yufala i save harem mo save long ol jajmen blong God we i stap wet long yufala from ol nogud fasin blong yufala, mo tu blong yufala i save gat save long ol fasin blong sakem sin;

12 Mo tu blong yufala i save gat save long saed blong taem we bae Jisas Kraes i kam, Piki-nini blong God, Papa blong heven mo blong wol, Krieta blong evri samting stat long stat; mo blong yufala i save gat save long saed blong ol saen blong taem we hem i kam, blong stamba tingting we bae yufala i save biliv long nem blong hem.

13 Mo sapos yufala i biliv long nem blong hem bae yufala i sakem evri sin blong yufala, blong mekem se tru long samting ia, yufala i save kam klin aot long olgeta tru long ol gudfala wok blong hem.

14 Mo luk, bakegen, wan narafala saen mi givim long yufala, yes, wan saen blong ded blong hem.

15 From luk, i tru we hem i mas ded, blong mekem se fasin blong sevem man i save kam; yes, i gat nid long hem mo i mas hapen se hem i ded, blong mekem laef bakegen blong ol ded i hapen, blong mekem se tru long samting ia, ol man oli save kambak long fes blong Lod.

16 Yes, luk, ded ia i mekem i hapen laef bakegen, mo i pemaot evri man long fas ded—ded ia blong spirit; from evri man tru long foldaon blong Adam, God i bin katemaot olgeta, oli olsem se oli ded, long saed blong ol samting blong wol ia tugeta wetem blong spirit.

17 Be luk, laef bakegen blong Kraes i pemaot man, yes, hem i evri man, mo i karem olgeta bak long fes blong Lod.

18 Yes, mo i mekem fasin blong sakem sin i hapen, mekem se eni man we i sakem sin, semfala man ia oli no katem daon hem mo sakem hem i go long faea; be eni man we i no sakem sin bae oli katem daon hem mo sakem hem i go long faea; mo i kam long olgeta bakegen wan ded blong spirit, yes, wan seken ded, from oli katemaot olgeta bakegen long saed blong ol samting blong stret fasin.

19 Taswe yufala i sakem sin, yufala i sakem sin, from fraet se, from yufala i save ol samting ia mo yufala i no mekem olgeta, bae yufala i letem yufala blong kasem panis, mo i karem yufala daon long nambatu ded.

20 Be luk, olsem we mi bin talem long yufala long saed

blong wan narafala saen, wan saen blong ded blong hem, luk, long dei ia we bae hem i harem nogud long ded san bae i kam tudak mo bae hem i no wantem blong givim laet long hem long yufala; mo tu mun mo ol sta; mo bae i no gat laet long fes blong graon ia, we i stat long taem we bae hem i harem nogud long ded, blong spes blong tri dei, kasem taem we bae hem i girap bakegen long ded.

21 Yes, long taem we bae hem i lego spirit, bae i gat ol tanda mo ol laetning blong spes blong plante aoa, mo graon bae i seksek mo seksek from fraet; mo ol ston we i stap long fes blong graon ia, we oli stap antap long graon tugeta wetem andanit, we yufala i save long taem ia oli strong, o bigfala pat blong hem i wan strong samting, bae i brokbrok;

22 Yes, olgeta bae oli brok long tu pis, mo blong oltaem we bae i kam, bae oli faenem se i brokbrok, mo i brok long plante pisis long fes blong ful graon, yes, antap long graon tugeta wetem andanit.

23 Mo luk, bae i gat ol bigfala hariken, mo bae i gat plante bigfala hil i kam daon, olsem wan vale, mo bae i gat plante ples we naoia oli singaotem ol vale we bae oli kam ol bigfala hil we hae blong olgeta i antap.

24 Mo plante bigfala rod bae i brokbrok, mo plante bigtaon bae i kam emti.

25 Mo plante gref bae i open, mo bae oli lego fri plante long ol ded blong olgeta; mo plante

sent bae i soemaot olgeta long plante.

26 Mo luk, olsem ia nao enjel i bin toktok long mi; from hem i bin talem long mi se bae i gat ol tanda mo ol laetning blong spes blong plante aoa.

27 Mo hem i bin talem long mi se taem we ol tanda mo ol laetning i gohed, mo ol hariken, se ol samting ia bae i hapen, mo se tudak bae i kavremap fes blong ful graon blong spes blong tri dei.

28 Mo enjel i bin talem long mi se plante bae i lukim ol samting we i moa bigfala bitim ol samting ia, blong stamba tingting we maet bae oli save bilivim ol saen ia mo ol sapraes ia bae i kam blong hapen long ful fes blong graon ia, blong mekem se bae i no gat eni stamba tingting blong no bilif long medel blong ol pikinini blong ol man—

29 Mo samting ia blong mekem se eni man we bae i biliv i save sev, mo se eni man we bae i no biliv, wan stret jajmen bae i kam long olgeta; mo tu sapos oli kasem panis, oli putum long olgeta bakegen panis blong olgeta.

30 Mo nao tingbaot, tingbaot, ol brata blong mi, se eni man we i ded, i ded long hem wan; mo eni man we i stap mekem nogud fasin, hem i mekem nogud fasin long hem wan; from luk, yufala i fri, God i letem yufala blong mekem ol samting blong yufala; from luk, God i bin givim long yufala wan save mo hem i bin mekem yufala i fri.

31 Hem i bin givim long yufala blong yufala i save gat save

long wanem i gud aot long wanem i nogud, mo hem i bin givim long yufala we yufala i save jusum laef o ded; mo yufala i save mekem gudfala samting mo kambak long samting we i gud, o gat samting we i gud i kambak long yufala; o yufala i save mekem nogud fasin; mo gat ol samting we i nogud i kambak long yufala.

---

### JAPTA 15

---

*Lod i bin stretem ol man blong Nifae from hem i bin lavem olgeta — Ol man blong Leman we oli bin jenisim laef blong olgeta i stap strong gud, mo oli strong long fet — Bae Lod i gat sore long ol man blong Leman long ol las dei. Raon-aboot 6 yia bifo Kraes i bon.*

Mo nao, ol brata blong mi we mi lavem tumas, luk, mi talemaot long yufala se hemia nomo sapos yufala i no sakem sin, ol haos blong yufala bae oli stap emti long yufala.

2 Yes, hemia nomo sapos yufala i no sakem sin, ol woman blong yufala bae oli gat wan bigfala stamba tingting blong krae long dei we bae oli givim titi; from bae yufala i traem blong ronwe mo bae i no gat eni ples blong haed; yes, mo sore tumas long olgeta we i gat bel, from bae oli hevi mo oli no save ronwe; taswe, bae oli purumbut long olgeta mo bae oli livim olgeta blong ded.

3 Yes, sore tumas long ol pipol ia we oli singaotem olgeta ol pipol blong Nifae, hemia nomo

sapos oli no sakem sin, taem we bae oli luk ol saen ia mo ol sapraes we Lod bae i soem long olgeta; from luk, olgeta oli bin stap wan pipol we Lod i bin jusum; yes, pipol blong Nifae hem i bin lavem, mo tu hem i bin stretem olgeta; yes, long ol dei blong ol nogud fasin blong olgeta hem i bin stretem olgeta from hem i lavem olgeta.

4 Be luk, ol brata blong mi, ol man blong Lemana hem i no bin laekem, from ol fasin blong olgeta i bin nogud oltaem, mo hemia i from nogud fasin blong kastom blong ol papa blong olgeta. Be luk, fasin blong sevem man i bin kam long olgeta tru long prijing blong ol man blong Nifae; mo blong mekem samting ia Lod i bin mekem ol dei blong olgeta i moa longfala.

5 Mo mi wantem se yufala i luk se bigfala pat blong olgeta i stap long rod blong stret wok, mo oli stap wokbaot sloslo long fes blong God, mo oli lukaot gud blong holem ol komanmen blong hem mo ol loa blong hem mo ol jajmen blong hem folem loa blong Moses.

6 Yes, mi talem long yufala se bigfala pat blong olgeta i stap mekem samting ia, mo oli trae had oltaem mo oli no kam taed, blong oli save tekem ol narafala brata blong olgeta we i stap, blong kam long save blong trutok; taswe i gat plante we i kam joen long ol namba blong olgeta evri dei.

7 Mo luk, yufala i save long yufala bakegen, from yufala i

bin witnesem samting ia, se evriwan long olgeta we oli mekem olgeta i kam blong save long trutok, mo blong save long nogud fasin mo ol rabis kastom blong ol papa blong olgeta, mo oli lidim olgeta blong bilivim ol tabu skripja, yes, ol profesi blong ol tabu profet, we oli bin raetem, we i lidim olgeta blong gat fet long Lod, mo long fasin blong sakem sin, we fet mo fasin blong sakem sin i karem i kam wan jenis blong hat long olgeta—

8 Taswe, olgeta we i bin kam long samting ia, yufala i save long yufala bakegen, olgeta ia oli strong gud mo strong long fet, mo long samting we i bin mekem olgeta i kam fri.

9 Mo yufala i save tu we oli bin berem ol tul blong faet blong olgeta, mo oli fraet blong tekembak olgeta from oli fraet se long eni wei bae oli sin; yes, yufala i save luk se oli fraet blong sin—from luk bae oli letem olgeta bakegen se ol enemi blong olgeta i purumbut long olgeta mo kilim ded olgeta, mo bae oli no leftemap ol naef blong faet blong olgeta agensem olgeta, mo hemia from fet blong olgeta long Kraes.

10 Mo nao, from we oli stap strong gud taem we oli stap biliv long samting ia we oli bilivim, from oli strong gud afta we oli bin kasem laet, luk, Lod bae i blesem olgeta mo mekem ol dei blong olgeta i kam longfala, i nomata long nogud fasin blong olgeta—

11 Yes, mo tu sapos oli kam

slak from we oli lusum bilif, Lod bae i mekem ol dei blong olgeta i kam longfala, go kasem taem we bae i kam we ol papa blong yumi i bin tokbaot, mo tu long profet Sinos, mo plante narafala profet long saed blong kambak, blong ol brata blong yumi, ol man blong Leman, bakegen long save blong trutok —

12 Yes, mi talem long yufala, se long ol las taem ol promes blong Lod i bin go aot long ol brata blong yumi ol man blong Leman; mo i nomata ol plante hadtaem we bae oli kasem, mo i nomata se bae oli ronem olgeta i go ia mo i go ia long fes blong graon, mo ol enemy blong olgeta bae oli lukaotem olgeta mo bae oli kilim olgeta mo seraotem olgeta olbaot, mo oli no gat ples blong haed blong sev, Lod bae i gat sore long olgeta.

13 Mo hemia i folem profesi, se bae oli kambak bakegen long tru save, we i save blong Ridi-ma blong olgeta, mo bigfala mo tru masta blong ol sipsip blong olgeta, mo hem i save kaotem olgeta wetem ol sipsip blong hem.

14 Taswe mi talem long yufala, bae i moa gud long olgeta bitim yufala hemia nomo sapos yufala i no sakem sin.

15 From luk, sapos oli bin soemaot ol bigfala wok long olgeta we oli bin soemaot long yufala, yes, long olgeta we i bin stap slak from oli bin lusum bilif from ol kastom blong ol papa blong olgeta, yufala i save luk blong yufala bakegen se

bae oli neva save bakegen kam slak from oli lusum bilif.

16 Taswe, Lod i talem: Bae mi no smasem gud olgeta evriwan, be bae mi mekem se long dei blong waes tingting blong mi bae oli kambak bakegen long mi, Lod i talem.

17 Mo nao luk, Lod i talem, long saed blong ol pipol blong ol man blong Nifae: Sapos oli no wantem sakem sin, mo lukaot gud blong mekem wanem mi wantem, bae mi smasem gud olgeta evriwan, Lod i talem, from oli no biliv i nomata long ol plante bigfala wok we mi bin mekem long olgeta; mo i tru olsem we Lod i stap laef bae ol samting ia i hapen, Lod i talem.

---

#### JAPTA 16

---

*Ol man blong Nifae we i bilivim Samuel i kasem baptaes tru long Nifae—Ol man blong Nifae we i no sakem sin, i no save kilim ded Samuel wetem ol ara mo ston—Samfala oli mekem ol hat blong olgeta i kam strong, mo sam narafala i luk ol enjel—Olgeta we i no biliv i talem se i no wan stret tingting blong biliv long Kraes mo taem we bae hem i kam long Jerusalem. Raonabaot 6–1 yia bifo Kraes i bon.*

Mo nao, i bin hapen se i bin gat plante we oli bin harem ol toktok blong Samuel, man blong Leman, we hem i bin talemaot antap long ol wol blong bigtaon. Mo olgeta we i bin biliv long toktok blong hem oli bin go aot mo oli bin lukaotem Nifae; mo



taem we oli bin kam aot mo oli bin faenem hem oli bin talemaot long hem ol sin blong olgeta, mo oli no bin tanem baksaed, from oli bin wantem blong kasem baptaes long Lod.

2 Be olgeta we i bin stap we oli no bin biliv long ol toktok blong Samuel oli bin kros long hem; mo oli bin sakem ol ston long hem antap long wol, mo tu plante i bin sutum ol ara long hem long taem we hem i bin stanap long wol; be Spirit blong Lod i bin stap wetem hem, inaf we i mekem se oli no bin save kasem hem wetem ol ston blong olgeta wetem ol ara blong olgeta.

3 Nao taem we oli bin luk se oli no save kasem hem, i bin gat plante moa we i bin biliv long ol toktok blong hem, inaf we i mekem se oli bin gowe i go long Nifae blong kasem baptaes.

4 From luk, Nifae i bin stap mekem baptaes, mo i stap talemaot profesi, mo i stap prij, hem i talemaot fasin blong sakem sin long ol pipol, i soemaot ol saen mo ol sapraes, i mekem ol merikel long medel blong ol pipol, blong oli save gat save se Kraes bae i kam i no longtaem —

5 Hem i stap talem long olgeta ol samting we bae i kam i no longtaem, blong oli save gat save mo tingbaot long taem we ol samting ia i kam, we oli bin talemaot long olgeta bifo long taem, blong mekem se oli save bilivim; taswe olgeta we i bin biliv long ol toktok blong Samuel i bin go fored long hem blong kasem baptaes, from

oli bin kam blong sakem mo talemaot ol sin blong olgeta.

6 Be bigfala pat blong olgeta i no bin biliv long ol toktok blong Samuel; taswe taem we oli bin luk se oli no save kasem hem wetem ol ston blong olgeta mo ol ara blong olgeta, oli bin singaot long ol kapten blong olgeta, oli talem: Holem man ia mo fasem taet hem, from luk hem i gat wan devel; mo from paoa blong devel we i stap long hem, mifala i no save kasem hem wetem ol ston blong mifala mo ol ara blong mifala; taswe tekem hem mo fasem taet hem, mo tekem hem i go.

7 Mo taem we oli bin go fored blong putum ol han blong olgeta long hem, luk, hem i bin jam i go daon long wol, mo hem i bin ronwe aot long ol graon blong olgeta, yes, hem i go kasem kantri blong hem, mo hem i bin stat blong prij mo profesae long medel blong ol pipol blong hem.

8 Mo luk, ol man blong Nifae i neva harem eni samting moa long medel blong olgeta long saed blong hem; mo olsem ia nao i bin laef blong ol pipol.

9 Mo olsem ia nao eiti mo sikis yia blong rul blong ol jaj ova long ol pipol blong Nifae i bin en.

10 Mo olsem ia nao eiti mo seven yia blong rul blong ol jaj i bin en tu, bigfala pat blong ol pipol i stap yet long ol hae tingting blong olgeta mo nogud fasin, mo smol pat i wokbaot sloslo long fored blong God.

11 Mo ol samting i bin stap

olsem ia tu, long eiti mo eit yia blong rul blong ol jaj.

12 Mo i bin gat be smol jenis nomo long ol samting blong ol pipol, be ol pipol i bin stat blong kam moa strong long rabis fasin, mo mekem moa mo moa blong ol samting we i bin angensem ol komanmen blong God, long eiti mo naen yia blong ol rul blong ol jaj.

13 Be i bin hapen se long naenti yia blong ol rul blong ol jaj, i bin gat ol bigfala saen i go long ol pipol, mo ol sapraes; mo ol toktok blong ol profet i bin stat blong hapen.

14 Mo ol enjel i bin kamaot long ol man, ol waes man, mo oli bin talemoot long olgeta ol gudnius blong bigfala glad; olsem ia nao long yia ia ol skripja i bin stat blong hapen.

15 Be, ol pipol i bin stat blong mekem ol hat blong olgeta i kam strong, olgeta evriwan i no be olgeta we oli bin biliv moa strong, long ol man blong Nifae tugeta wetem long ol man blong Leman, mo oli bin stat blong dipen long paoa blong olgeta nomo, mo long ol waes tingting blong olgeta nomo, se:

16 Samfala samting maet oli bin talem stret aot long plante olsem; be luk, mifala i save se evri bigfala mo gudfala wok ia i no save hapen, long ol samting we oli bin tokbaot.

17 Mo oli bin stat blong rao smol mo blong rao wetem wan wan long olgeta bakegen, se:

18 We i no wan stret tingting se wan man olsem wan Kraes bae i kam; sapos i olsem, mo

hem i Pikinini blong God, Papa blong heven mo blong wol, olsem we oli bin tokbaot, from wanem bae hem i soem hemwan long yumi semak olsem olgeta we bae i stap long Jerusalem?

19 Yes, from wanem bae hem i no soem hemwan long graon ia semak olsem long graon blong Jerusalem?

20 Be luk, mifala i save se hemia i wan nogud kastom, we oli pasem daon long mifala tru long ol papa blong mifala, blong mekem mifala se mifala i mas biliv long sam bigfala mo gudfala samting we bae i kam blong hapen, be i no long medel blong mifala, be long wan graon we i longwe tumas, wan graon we mifala i no save; taswe oli save holem mifala we mifala i no save wan samting nating, from mifala i no save witesem wetem ol ae blong mifala se oli tru.

21 Mo bae oli, tru long ol trik mo defren wok blong nogud wan, wokem wan bigfala sikret we mifala i no save andastanem, we bae i holem daon mifala blong stap ol wokman blong ol toktok blong olgeta, mo tu ol wokman blong olgeta, from mifala i dipen long olgeta blong oli tijim mifala trutok, mo olsem ia nao bae oli holem mifala we mifala i no save wan samting nating, sapos bae mifala i lego mifala long olgeta, evri dei blong laef blong mifala.

22 Mo plante moa samting ol pipol i bin tingbaot long ol hat blong olgeta, we i bin krangke mo samting we i blong nating; mo oli bin wari tumas from

Setan i bin tanem tingting blong olgeta blong mekem nogud fasin oltaem; yes, hem i bin go olbaot blong talem ol giaman toktok mo ol rao long ful fes blong graon, blong hem i save mekem ol hat blong ol pipol i kam strong agensem samting we i bin gud mo agensem ol samting we bae i kam.

23 Mo i nomata long ol saen mo ol sapraes we i bin hapen

long medel blong ol pipol blong Lod, mo ol plante merikel we oli bin mekem, Setan i bin kasem bigfala kontrol long ol hat blong ol pipol long ful fes blong graon.

24 Mo olsem ia nao naenti yia ia blong rul blong ol jaj ova long ol pipol blong Nifae i bin en.

25 Mo olsem ia nao buk blong Hileman i bin en, folem histri blong Hileman mo ol boe blong hem.

## NAMBATRI NIFAE BUK BLONG NIFAE

BOE BLONG NIFAE, WE HEM I BIN BOE BLONG HILEMAN

**M**o Hileman i bin boe blong Hileman, we hem i bin boe blong Alma, we hem i bin boe blong Alma, hem i kamaot long laen blong Nifae we hem i bin boe blong Lihae, we i bin kamaot long Jerusalem long fas yia blong taem we Sedekaea i rul, king blong Juda.

### JAPTA 1

*Nifae, boe blong Hileman, i aot long graon, mo boe blong hem Nifae i holem ol histri—Ol saen ia mo ol sapraes i hapen, ol nogud man oli plan blong oli kilim ded ol man we i stret—Naet we Kraes i bon i kam—Saen i kamaot, mo wan niu sta i girap—Ol giaman mo ol trik i kam moa bigwan, mo ol Gadianton man blong stil i kilim ded plante man. Raonabaot 1–4 yia afta Kraes i bon.*

**N**AO i bin hapen se naenti mo wan yia i bin pas i gowe mo hem i bin sikis handred yia i pas long taem we

Lihae i bin aot long Jerusalem, mo hem i bin long semfala yia we Lakonius i bin jif jaj mo gavena ova long graon.

2 Mo Nifae, boe blong Hileman, i bin aot long graon blong Sarahemla, hem i bin givim stret wok long boe blong hem Nifae, we i bin fasbon blong hem, long saed blong ol buk we oli bin mekem wetem bras mo evri histri we oli bin kipim, mo ol samting we oli bin holem tabu stat long taem we Lihae i bin aot long Jerusalem.

3 Afta, hem i bin aot long graon, mo long wea ples hem i bin go long hem, i no gat wan man we i save; mo boe blong

hem Nifae i bin kipim ol histri long ples blong hem, yes, histri blong pipol ia.

4 Mo i bin hapen se long stat blong naenti mo seken yia, luk, ol profesi blong ol profet i bin stat blong hapen moa strong; from i bin stat blong gat ol saen we i moa bigwan mo moa bigfala merikel i bin hapen long medel blong ol pipol.

5 Be i bin gat sam we i bin stat blong talem se taem i bin pas finis blong ol toktok i hapen, we Samuel man blong Lemana i bin talem.

6 Mo oli bin stat blong glad long saed blong ol brata blong olgeta, oli se: Luk taem i pas finis, mo ol toktok blong Samuel i no bin hapen; taswe, glad blong yufala mo fet blong yufala long saed blong samting ia i bin blong nating.

7 Mo i bin hapen se oli bin mekem wan bigfala trabol tru-aot long graon; mo ol pipol we i bin biliv i bin stat blong harem nogud tumas, from oli fraet se long eni wei ol samting we oli bin talem maet i no hapen.

8 Be luk, oli bin lukaotem oltaem long dei ia mo naet ia mo dei ia we bae i mas olsem wan dei olsem se i no bin gat naet, blong oli save gat save se fet blong olgeta i no bin blong nating.

9 Nao i bin hapen se i bin gat wan dei olgeta we i no biliv i bin jusum, se olgeta we i bin biliv long ol kastom ia oli mas kilim ded olgeta, hemia nomo sapos we saen i no hapen, we profet Samuel i bin talemaot.

10 Nao i bin hapen se taem we Nifae, boe blong Nifae, i bin luk nogud fasin ia blong ol pipol blong hem, hat blong hem i bin sore tumas.

11 Mo i bin hapen se hem i bin go aot mo hem i bin bodaon hemwan long graon, mo i bin prea strong long God blong hem from ol pipol blong hem, yes, olgeta we klosap bae oli ded from fet blong olgeta long kastom blong ol papa blong olgeta.

12 Mo i bin hapen se hem i bin prea strong long Lod long fuldei ia; mo luk, voes blong Lod i bin kam long hem, i talem:

13 Leftemap hed blong yu mo stap glad; from luk, taem i klosap, mo long naet ia bae saen i kamaot, mo long tumora mi kam long wol, blong soem long wol se bae mi mekem evri samting i hapen we mi bin mekem se oli talemaot tru long maot blong ol tabu profet blong mi.

14 Luk, mi kam long ol pipol blong mi blong mekem evri samting i hapen we mi bin soemaot long ol pikinini blong ol man, stat long taem we wol ia i bin stat, mo blong mekem tingting, blong Papa tugeta wetem blong Pikinini—blong Papa from mi, mo blong Pikinini from bodi blong mit mo bun blong mi. Mo luk, taem i klosap, mo naet ia bae saen i kamaot.

15 Mo i bin hapen se ol toktok we i bin kam long Nifae i bin hapen, folem olsem we Lod i bin talemaot, from luk, long taem we san i go daon i no bin gat tudak; mo ol pipol i bin stat

blong sapraes tumas from i no bin gat tudak taem we naet i bin kam.

16 Mo i bin gat plante, we oli no bin bilivim ol toktok blong ol profet, we i bin foldaon long graon mo oli bin kam olsem se oli ded, from oli bin save se bigfala plan blong panis, we oli bin mekem rere blong olgeta we i bin biliv long ol toktok blong ol profet i bin kam nogud; from saen we oli bin talemaot i bin stap finis.

17 Mo oli bin stat blong save se Pikinini blong God bae hem i mas kam kwiktaem; yes, blong endem, evri pipol long fes blong ful graon long wes kasem is, long graon not tugeta wetem long graon saot, oli bin sapraes tumas mekem se oli bin foldaon long graon.

18 From oli bin save se ol profet i bin testifae long saed blong ol samting ia blong plante yia, mo se saen we hem i bin tokbaot finis i bin stap finis; mo oli bin stat blong fraet from nogud fasin blong olgeta mo fasin blong no bilif.

19 Mo i bin hapen se i no bin gat tudak nating long fulnaet ia, be i bin gat laet olsem se hem i medel dei. Mo i bin hapen se san i bin girap long moning bakegen, folem prapa oda blong hem; mo oli bin save se hem i bin dei we Lod bae i bon, from saen we i bin kamaot.

20 Mo samting ia i bin kam blong hapen, yes, evri samting, evri pat, folem ol toktok blong ol profet.

21 Mo i bin hapen tu se wan

niu sta i bin kamaot folem toktok ia.

22 Mo i bin hapen se stat long taem ia i go fored i bin stat blong gat ol giaman we Seten i sendem aot long medel blong ol pipol blong mekem ol hat blong olgeta i kam strong, blong mekem se oli no save biliv long ol saen mo ol sapraes we oli bin sendem; be i nomata long ol giaman ia mo ol trik, moa bigfala pat blong ol pipol i bin biliv, mo oli bin jenisim laef i go long Lod.

23 Mo i bin hapen se Nifae i bin go aot long medel blong ol pipol, mo tu plante narafala, oli mekem baptaes blong sakem sin, tru long samting ia i bin gat wan bigfala fasin blong kam klin aot long ol sin. Mo olsem ia nao ol pipol i bin stat bakegen blong gat pis long graon.

24 Mo i no bin gat eni rao, be smol namba nomo we i bin stat blong prij, oli traem blong pruvum tru long ol skripja se i nomo gat nid blong holem loa blong Moses. Nao long samting ia oli bin mestem, from oli no bin andastanem ol skripja.

25 Be i bin hapen se oli bin jenisim laef kwiktaem, mo oli bin save long rong, we oli bin stap long hem, from oli bin talem gud long olgeta se loa ia i no hapen yet, mo we i mas hapen long evri smol pis; yes, toktok ia i bin kam long olgeta se i mas hapen; yes, se evri smol haf o leta bae i no pas kasem taem we evri samting ia i hapen; taswe long sem yia ia oli bin kam blong save long

rong blong olgeta mo oli bin talemaot ol rong blong olgeta.

26 Mo olsem ia nao naenti mo seken yia i bin pas i gowe, i karem ol glad nius long ol pipol from ol saen i bin kam blong hapen, folem ol toktok blong profesi blong evri tabu profet.

27 Mo i bin hapen se naenti mo tri yia i bin pas i gowe tu wetem pis, be ol Gadianton man blong stil nomo, we i bin stap long ol bigfala hil, we i bin stap plante long graon; from ol strongfala ples blong olgeta mo ol sikret ples blong olgeta i bin strong tumas mekem se ol pipol i no bin save winim olgeta; taswe oli bin kilim ded plante pipol, mo oli bin mekem plante fasin ia blong oli kilim ded ol pipol long medel blong ol pipol.

28 Mo i bin hapen se long naenti mo fo yia oli bin stat blong kam plante long wan bigfala namba, from i bin gat plante man we i pulaot long ol man blong Nifae we i bin ronwe long olgeta, we i bin mekem ol man blong Nifae we i bin stap long graon i harem nogud tumas.

29 Mo i bin gat tu wan stamba tingting blong plante harem nogud long medel blong ol man blong Leman; from luk, oli bin gat plante pikinini we i bin gru i kam antap mo i bin stat blong gat moa yia, mekem se oli bin stat blong mekem ol samting we oli wantem, mo ol man blong Soram i bin lidim olgeta i gowe, tru long ol swit tok blong olgeta, blong joenem Gadianton man blong stil.

30 Mo olsem ia nao ol man blong Leman i bin kasem hadtaem tu, mo i bin stat blong kam antap long saed blong fet blong olgeta mo stret fasin, from nogud fasin blong ol jeneresen we i stap kam antap.

---

## JAPTA 2

---

*Nogud fasin mo ol rabis sin i kam antap long medel blong ol pipol—Ol man blong Nifae mo ol man blong Leman i joen tugeta blong lukaotem gud olgeta agensem ol Gadianton man blong stil—Ol man blong Leman we i jenisim laef i kam waet mo oli singaotem olgeta ol man blong Nifae. Raonabaot 5–16 yia afta Kraes i bon.*

Mo i bin hapen se olsem ia nao naenti mo faef yia i bin pas i gowe, mo ol pipol i bin stat blong fogetem ol saen mo ol sapraes we oli bin harem, mo oli bin stat blong no sapraes moa mo moa long wan saen o wan sapraes long heven, inaf blong mekem se oli bin stat blong kam strong long ol hat blong olgeta, mo blaen long ol tingting blong olgeta, mo oli bin stat blong no bilif evri samting we oli bin harem mo oli bin lukim—

2 Oli stap tingbaot ol samting blong nating long ol hat blong olgeta, se i bin hapen tru long ol man mo paoa blong devel, blong lidim i gowe mo giaman long ol hat blong ol pipol; mo olsem ia nao Setan i bin kasem kontrol long ol hat blong ol pipol bakegen, inaf

blong mekem se hem i bin blaenem ol ae blong olgeta mo lidim olgeta i gowe blong bilivim se doktrin blong Kraes i bin wan krangke mo wan samting blong nating.

3 Mo i bin hapen se ol pipol i bin stat blong kam strong long nogud fasin mo ol rabis sin; mo oli no bin biliv se bae i gat eni moa saen o sapraes we i kamaot; mo Setan i bin go olbaot, hem i lidim i gowe ol hat blong ol pipol, hem i temptem olgeta mo mekem se olgeta bae i mekem bigfala fasin nogud long graon.

4 Mo olsem ia nao naenti mo sikis yia i bin pas i gowe; mo tu naenti mo seven yia; mo tu naenti mo eit yia; mo tu naenti mo naen yia;

5 Mo tu wan handred yia i bin pas i gowe stat long ol dei blong Mosaea we i bin king ova long ol pipol blong ol man blong Nifae.

6 Mo sikis handred mo naen yia i bin pas i gowe stat long taem we Lihae i bin aot long Jerusalem.

7 Mo naen yia i bin pas i gowe stat long taem we saen we Lod i bin givim, we ol profet i bin tokbaot, se Kraes bae i kam long wol.

8 Nao ol man blong Nifae i bin stat blong kaontem taem blong olgeta stat long taem ia we saen i bin kamaot, o stat long taem we Kraes i kam; taswe, naen yia i bin pas i gowe.

9 Mo Nifae we i bin papa blong Nifae, we i bin gat stret wok blong ol histri, i no bin gobak long graon blong Sarahemla,

mo oli no save faenem hem long eni ples blong ful graon.

10 Mo i bin hapen se ol pipol i bin stap yet long nogud fasin, i nomata long plante prijing mo profesi we i bin sendem long medel blong olgeta; mo olsem ia nao i bin pas i gowe ten yia tu; mo leven yia tu i pas i gowe wetem rabis sin.

11 Mo i bin hapen long tetin yia, i bin stat blong gat ol faet mo ol rao truaot ful graon; from ol Gadianton man blong stil oli bin kam plante tumas, mo oli bin kilim ded plante pipol long ol pipol, mo oli bin smasem gud plante bigtaon tumas, mo oli bin mekem plante man i ded mo fulap blad i ron truaot long graon, i mekem se i bin gat nid se evri pipol ol man blong Nifae tugeta wetem ol man blong Leman i mas pikimap ol tul blong faet agensem olgeta.

12 Taswe, olgeta man blong Leman we oli bin jenisim laef long Lod i bin joen wetem ol brata blong olgeta ol man blong Nifae, mo oli mas; from sef blong ol laef blong olgeta mo ol woman blong olgeta mo ol pikinini blong olgeta, pikimap ol tul blong faet agensem ol Gadianton man blong stil, yes, mo tu blong holem taet ol rael blong olgeta, mo ol janis blong jos blong olgeta mo blong wosip blong olgeta, mo fasin ia blong olgeta blong fri mo fri-dom blong olgeta.

13 Mo i bin hapen se bifo tetin yia ia i bin pas i go, ol man blong Nifae i bin kasem woning blong oli smasem gud olgeta

evriwan from faet ia, we i bin kam soa tumas.

14 Mo i bin hapen se ol man blong Leman we i bin joen wetem ol man blong Nifae oli bin kaontem olgeta wetem ol man blong Nifae;

15 Mo panis blong olgeta i bin tekemaot long olgeta, mo skin blong olgeta i bin kam waet olsem ol man blong Nifae;

16 Mo ol yang man blong olgeta mo ol gel blong olgeta i bin kam naes tumas, mo oli bin kaontem olgeta wetem ol man blong Nifae, mo oli bin singaotem olgeta ol man blong Nifae. Mo olsem ia nao tetin yia i bin en.

17 Mo i bin hapen long stat blong fotin yia, faet bitwin ol man blong stil mo ol pipol blong Nifae i bin gohed mo i bin kam soa tumas; be, ol pipol blong Nifae i bin winim samfala janis ova long ol man blong stil, inaf blong mekem se oli bin pusumbak olgeta aot long ol graon blong olgeta i go long ol bigfala hil mo long ol sikret ples blong olgeta.

18 Mo olsem ia nao fotin yia i bin en. Mo long fiftin yia oli bin kam fored agensem ol pipol blong Nifae; mo from nogud fasin blong ol pipol blong Nifae, mo plante rao blong olgeta mo ol pulaot long olgeta, ol Gadianton man blong stil i bin kasem plante janis ova long olgeta.

19 Mo olsem ia nao fiftin yia i bin en, mo olsem ia nao ol pipol i bin stap long wan ples blong plante hadtaem; mo naef blong

faet blong panis i bin hang ova long olgeta, inaf blong mekem se oli klosap rere blong naef ia i katem daon olgeta, mo hemia i from nogud fasin blong olgeta.

---

### JAPTA 3

---

*Gidianhae, we i Gadianton lida, hem i talem strong long Lakonius mo ol man blong Nifae se i mas lego olgeta mo ol graon blong olgeta—Lakonius i jusum Gidgidonaes olsem jif kapten blong ol ami—Ol man blong Nifae i kam tuga long Sarahemla mo Plante, blong lukaotem gud olgeta. Raonabaot 16–18 yia afta Kraes i bon.*

Mo nao i bin hapen se long sikstin yia stat long taem we Kraes i bin kam, Lakonius, gavena blong graon, i bin kasem wan leta long lida mo gavena blong grup ia blong ol man blong stil; mo hemia i bin ol toktok we i bin raetem, i talem:

2 Lakonius, we i hae olgeta mo jif gavena ova long graon, luk, mi raetem leta ia long yu, mo givim long yu bigfala pres tumas from we yu stap strong, mo tu from ol pipol blong yu i stap strong, blong holem taet wanem we yufala i ting se hem i raet mo fridom blong yufala; yes, yufala stanap gud, olsem se yu kasem sapot tru long han blong wan god blong lukaotem gud long fridom blong yufala, mo ol samting blong yufala, mo kantri blong yufala, o ol samting we yufala i singaotem olsem.

3 Mo i luk olsem wan samting blong sore from long mi, Lako-



nus we yu hae olgeta, we bae yu krangke tumas mo yu mekem samting blong nating blong ting se yu save stanap agensem plante man we i no fraet we oli stap andanit long oda blong mi, we i stap naoia long taem ia stanap rere wetem ol tul blong faet blong olgeta, mo stap wet wetem fasin blong wantem tumas blong kasem toktok ia—Go daon long ol man blong Nifae mo smasem gud olgeta.

4 Mo mi, from mi save long fasin blong olgeta we spirit blong olgeta i no fraet nating, from we mi bin testem olgeta long fil blong faet, mo from mi save we oli no laekem yufala we i no gat en, from plante rong we yufala i bin mekem long olgeta, taswe sapos bae oli kam daon agensem yufala bae oli visitim yufala mo smasem gud yufala evriwan.

5 Taswe mi bin raetem leta ia, mi klosem hem wetem han blong mi nomo, from mi stap tingbaot gudfala laef blong yufala, from yufala i stap strong long samting ia we yufala i bilivim se i raet, mo strong spirit blong yufala long fil blong faet.

6 Taswe mi raet long yu, mi wantem se yu lego long hemia ol pipol blong mi, ol bigtaon blong yu, ol graon blong yu, mo ol samting blong yu, long ples blong bae oli visitim yu wetem naef blong faet mo we bae panis i no mas kam long yu.

7 O long ol narafala toktok, lego yufala i kam long mifala,

mo joen wetem mifala mo kam blong save ol sikret wok blong mifala, mo kam ol brata blong mifala blong mekem se yufala i save stap olsem mifala—i no ol slef blong mifala, be ol brata blong mifala mo ol fren blong mifala blong save yusum ol samting blong mifala.

8 Mo luk, mi promes long yu, sapos yufala i mekem samting ia, wetem wan tru promes, bae yufala i no smas gud, be sapos yufala i no mekem samting ia, mi promes long yu wetem wan tru promes, se long nekis manis bae mi givim oda long ol ami blong mi se oli mas kam agensem yu, mo bae oli no stopem han blong olgeta mo bae oli no letem yufala i stap laef, be bae oli kilim yu ded, mo bae oli letem naef blong faet i foldaon long yu kasem taem we bae yufala i nomo gat.

9 Mo luk, mi mi Gidianhae; mo mi mi gavena blong hemia, sikret grup blong Gadianton; we grup mo ol wok blong hem mi save se oli gud; mo oli blong ol dei blong bifo mo oli bin pasem daon olgeta long mifala.

10 Mo mi raetem leta ia long yu, Lakonius, mo mi hop se bae yufala i lego ol graon blong yufala mo ol samting blong yufala, mo bae blad i no ron from, blong mekem se hemia ol pipol blong mi i save tekembak ol raet mo gavman blong olgeta, we i bin pulaot long yu from nogud fasin blong yu blong holem taet long olgeta ol raet blong olgeta blong gavman, mo sapos yufala i no

mekem samting ia, bae mi pembak ol rong blong olgeta. Mi mi Gidianhae.

11 Mo nao i bin hapen taem we Lakonius i bin kasem leta ia, hem i bin sapraes tumas, from Gidianhae i no fraet blong toktok, i talem strong se hem i mas tekem graon blong ol man blong Nifae, mo tu blong wonem ol pipol mo blong pembak ol rong blong olgeta we i no bin kasem eni rong, hemia nomo be olgeta nomo i bin mekem rong long olgeta bak-egen taem we oli pulaot i gowe long ol nogud mo rabis man blong stil.

12 Nao luk, Lakonius ia, gavena, i bin wan stret man, mo i no save fraet long strong toktok mo ol woning blong wan man blong stil; taswe hem i no bin lisin long leta blong Gidianhae, gavena blong ol man blong stil, be hem i bin mekem se ol pipol blong hem i mas prea long Lod blong kasem paoa agensem taem we ol man blong stil bae i kam daon agensem olgeta.

13 Yes, hem i bin sendem wan mesej long medel blong evri pipol, blong oli mas karem i kam tugeta ol woman blong olgeta, mo ol pikinini blong olgeta, ol grup blong anamol blong olgeta mo ol buluk blong olgeta, mo evri samting blong olgeta, be i no graon blong olgeta we i kam long wan ples.

14 Mo hem i bin mekem se ol strongfala wol oli mas bildim raonem olgeta, mo paoa blong ol wol ia i mas strong gud. Mo hem i bin mekem se ol

ami, blong ol man blong Nifae tugeta wetem blong ol man blong Leman, o blong olgeta we oli bin kaontem olgeta wetem ol man blong Nifae, bae oli mas putum olgeta olsem ol gad raonabaot blong lukaotem olgeta, mo blong lukaotem gud olgeta long ol man blong stil dei mo naet.

15 Yes, hem i bin talem long olgeta: Olsem we Lod i stap laef, hemia nomo sapos yufala i no sakem sin blong ol rabis fasin blong yufala, mo prea long Lod, bae hem i no save tekem yufala long eni wei aot long ol han blong ol Gadianon man blong stil.

16 Mo ol toktok mo ol profesi blong Lakonius i bin bigfala mo gudfala tumas, oli bin mekem se fraet i kam long evri pipol; mo oli bin traehad wetem paoa blong olgeta blong mekem folem ol toktok blong Lakonius.

17 Mo i bin hapen se Lakonius i bin jusum ol jif kapten ova evri ami blong ol man blong Nifae, blong givim oda long olgeta long taem we ol man blong stil bae oli kamaot long ples we i no gat man long hem agensem olgeta.

18 Nao hae jif kapten long medel blong evri jif kapten mo bigfala komanda blong evri ami blong ol man blong Nifae oli bin jusum hem, mo nem blong hem i bin Gidgidonae.

19 Nao i bin kastom wetem evri man blong Nifae blong jusum olsem ol jif kapten blong olgeta (be i no long ol taem

blong nogud fasin blong olgeta) wan man we i gat spirit blong revelesen mo tu profesi; taswe, Gidgidonae ia i bin wan hae profet long medel blong olgeta olsem tu we jif jaj i bin stap.

20 Nao ol pipol i bin talem long Gidgidonae: Prea long Lod, mo bae yumi go antap long ol bigfala hil mo long ples we i no gat man long hem blong mekem se yumi save atakem ol man blong stil mo smasem gud olgeta long ol graon blong olgeta.

21 Be Gidgidonae i talem long olgeta: Lod i no letem; from sapos yumi go antap agensem olgeta Lod bae i letem yumi long ol han blong olgeta; taswe bae yumi mekem rere yumi long medel blong ol graon blong yumi, mo bae yumi tekem ol ami blong yumi i kam tugeta, mo bae yumi no go agensem olgeta, be bae yumi wet kasem taem we oli kam agensem yumi; taswe olsem we Lod i stap laef, sapos yumi mekem samting ia bae hem i letem olgeta i kam long ol han blong yumi.

22 Mo i bin hapen long seven-tin yia, long las pat blong yia, mesej blong Lakonius i bin go aot truaot long ful fes blong graon mo oli bin tekem ol hos blong olgeta, mo ol kat blong hos blong olgeta, mo ol buluk blong olgeta, mo evri grup blong sipsip blong olgeta, mo ol grup blong ol anamol blong olgeta, mo ol sid blong olgeta, mo evri samting blong olgeta, mo oli bin maj i go fored long grup blong ol taosen mo ol ten

blong ol taosen, kasem taem we olgeta evriwan i bin go aot long ples we oli bin jusum blong oli mas kam tugeta long hem, blong lukaotem gud olgeta agensem ol enemi blong olgeta.

23 Mo graon we oli bin jusum i bin graon blong Sarahemla, mo graon we hem i bin bitwin graon blong Sarahemla mo graon blong Plante, yes, kasem boda we i bin bitwin graon Plante mo graon Emti.

24 Mo i bin gat wan bigfala plante taosen pipol we oli bin singaotem olgeta ol man blong Nifae, we i bin kam tugeta long graon ia. Nao Lakonius i bin mekem se oli mas kam tugeta long graon long saot, from bigfala panis we i bin stap long graon long not.

25 Mo oli bin mekem strong olgeta bakegen agensem ol enemi blong olgeta; mo oli bin stap long wan graon, mo long wan grup, mo oli bin fraet long ol toktok we Lakonius i bin talemaot, inaf blong mekem se oli bin sakem evri sin blong olgeta; mo oli bin givimaot ol prea blong olgeta long Lod, God blong olgeta, blong hem i sevem olgeta long taem we bae ol enemi blong olgeta bae i kam daon agensem olgeta blong faet.

26 Mo oli bin harem nogud tumas from ol enemi blong olgeta. Mo Gidgidonae i bin mekem se oli mas mekem ol tul blong faet blong evri kaen, mo oli mas stap strong wetem ol klos blong faet, mo wetem ol sil, mo smol sil we i raon, folem ol toktok blong hem.

## JAPTA 4

*Ol ami blong ol man blong Nifae i winim ol Gadianton man blong stil—Oli kilim ded Gidianhae, mo man we i folem hem, Semnaraeha, oli hangem hem—Ol man blong Nifae i presem Lod blong olgeta from ol win blong olgeta. Raon-abaot 19-22 yia afta Kraes i bon.*

Mo i bin hapen se long las pat blong eitini yia ol ami ia blong ol man blong stil i bin mekem rere blong faet, mo oli bin stat blong kam daon mo kwiktaem aot long ol hil, mo aot long ol bigfala hil, mo ples we i no gat man long hem, mo ol ples blong ol strong sapot blong olgeta, mo ol sikret ples blong olgeta, mo oli bin stat blong tekem ol graon, we i bin stap long graon saot tugeta wetem long graon blong not, mo oli bin stat blong tekem mo holem evri graon we ol man blong Nifae i bin lego, mo ol bigtaon we oli bin livim i emti.

2 Be luk, i no bin gat ol wael anamol o ol anamol blong kakae long ol graon ia we ol man blong Nifae i bin lego, mo i no bin gat ol anamol blong kakae blong ol man blong stil be i long ples we i no gat man long hem nomo.

3 Mo ol man blong stil i no bin save stap laef sapos i no long ples we i no gat man long hem, from nid blong kakae; from ol man blong Nifae i bin livim ol graon blong olgeta i emti, mo oli bin tekem tugeta ol grup blong anamol blong olgeta mo ol buluk blong olgeta, mo evri

samting blong olgeta, mo oli bin stap long wan grup.

4 Taswe, i no bin gat eni janis blong ol man blong stil blong stil long taem blong faet o blong kasem kakae, hemia nomo sapos i no blong kamaot long open ples blong faet agensem ol man blong Nifae; mo from ol man blong Nifae i stap long wan grup, mo oli gat wan bigfala namba tumas, mo oli bin holem taet blong olgeta bakegen ol samting, mo ol hos mo ol buluk, mo ol grup blong evri kaen, blong oli save laef blong spes blong seven yia, long taem ia oli bin hop blong smasem gud ol man blong stil aot long fes blong graon; mo olsem ia nao eitini yia i bin pas i gowe.

5 Mo i bin hapen se long naentini yia Gidianhae i bin faenem se i gat nid se hem i mas go antap blong faet agensem ol man blong Nifae, from i no bin gat eni wei we oli bin save laef sapos oli no tekem ol samting wetem fos, blong stil mo kilim man i ded.

6 Mo oli bin fraet blong seraotem olgeta long fes blong graon inaf blong mekem se oli save planem ol sid, from oli fraet se ol man blong Nifae bae i kam long olgeta mo kilim ded olgeta; taswe Gidianhae i bin givim oda long ol ami blong hem se long yia ia oli mas go antap blong faet agensem ol man blong Nifae.

7 Mo i bin hapen se oli bin kam antap blong faet; mo hemia i bin long nambasikis manis; mo

luk, i bin wan bigfala mo strong dei we oli bin kam antap blong faet; mo oli bin putum klos folem fasin blong ol man blong stil; mo oli bin gat wan skin blong yang sipsip we i stap raon long wes blong olgeta, mo oli bin pentem olgeta wetem blad, mo oli bin sevem ol hed blong olgeta, mo oli bin putum ol hat blong faet long olgeta; i soemaot we ol ami blong Gidianhae oli bigfala mo oli strong, from ol klos blong faet blong olgeta, mo from we oli bin pentem olgeta wetem blad.

8 Mo i bin hapen se ol ami blong ol man blong Nifae, taem we oli bin lukim dresap blong ami blong Gidianhae, olgeta evriwan i bin foldaon long graon mo oli bin leftemap ol prea blong olgeta long Lod, God blong olgeta, blong hem i letem olgeta i stap laef mo tekem olgeta aot long ol han blong ol enemi blong olgeta.

9 Mo i bin hapen se taem we ol ami blong Gidianhae i bin luk samting ia oli bin stat blong singaot wetem wan strong voes, from glad blong olgeta, from oli bin ting se ol man blong Nifae i bin foldaon wetem fraet from bigfala fraet blong ol ami blong olgeta.

10 Be long samting ia oli bin harem nogud, from ol man blong Nifae i no bin fraet long olgeta; be oli bin respektem God blong olgeta mo oli bin askem hem blong lukaotem gud olgeta; taswe, taem we ol ami blong Gidianhae i bin ron long olgeta, oli bin rere blong

mitim olgeta; yes, wetem paoa blong Lod oli bin kasem olgeta.

11 Mo faet i bin stat long hemia namba sikis manis; mo faet ia i bin bigfala mo strong, yes, fasin blong kilim man i ded i bin bigfala mo strong, inaf we i mekem se i neva bin gat wan fasin blong kilim man i ded long medel blong evri pipol blong Lihae stat long taem we hem i bin aot long Jerusalem.

12 Mo i nomata long ol woning mo ol tru promes we Gidianhae i bin mekem, luk, ol man blong Nifae i bin winim olgeta, inaf blong mekem se oli bin ronwe long fored blong olgeta.

13 Mo i bin hapen se Gidgidonae i bin givim oda se ol ami blong hem i mas folem olgeta kasem ol boda blong ples we i no gat man long hem, mo se oli no mas letem i stap laef eni we i kam long ol han blong olgeta long rod; mo olsem ia nao oli bin folem olgeta mo oli bin kilim olgeta i ded, kasem ol boda blong ples we i no gat man long hem, go kasem taem we oli bin mekem oda blong Gidgidonae i hapen.

14 Mo i bin hapen se Gidianhae, we i bin stanap mo faet wetem i no bin fraet, oli bin ronem hem long taem we hem i stap ronwe; mo from hem i bin taed from we hem i bin faet tumas, oli bin kasem hem mo kilim hem hem i ded. Mo olsem ia nao i en blong Gidianhae man blong stil.

15 Mo i bin hapen se ol ami blong ol man blong Nifae i bin gobak bakegen long sefples

blong sef blong olgeta. Mo i bin hapen se naentin yia ia i bin pas i gowe, mo ol man blong stil i no bin kam bakegen blong faet; mo tu oli no bin kam bakegen long twenti yia.

16 Mo long twenti mo wan yia oli no bin kam antap blong faet, be oli bin kam antap long evri saed blong hipimap graon raonabaot long ol pipol blong Nifae; from oli bin ting se sapos oli blokem ol pipol blong Nifae long ol graon blong olgeta, mo mas holem gud olgeta insaed, long evri saed, mo sapos oli blokem olgeta long ol janis blong olgeta aotsaed, blong mekem se oli save mekem olgeta blong lego olgeta bakegen folem wanem we oli wantem.

17 Nao oli bin jusum long olgeta bakegen wan narafala lida we nem blong hem i bin Semnaraeha; taswe i bin Semnaraeha we i bin mekem se wok ia blong raonem i mas tekem ples.

18 Be luk, samting ia i wan gudfala janis long ol man blong Nifae; from hem i no bin posibol blong ol man blong stil blong raonem longtaem inaf blong afektem ol man blong Nifae, from plante samting blong olgeta we oli bin hipimap mo sevem.

19 Mo from oli sot long ol samting long medel blong ol man blong stil; from luk, oli no bin gat eni samting be mit nomo blong stap laef long hem, we mit ia oli bin kasem long ples we i no gat man long hem;

20 Mo i bin hapen se ol wael anamol blong kakae i bin kam

sot long ples we i no gat man long hem, inaf we i mekem se ol man blong stil oli rere blong ded from hanggri.

21 Mo ol man blong Nifae i bin gohed blong maj i go aot long dei mo long naet, mo oli atakem ol ami blong olgeta, mo oli kilim ded olgeta long ol taosen mo long ol ten blong ol taosen.

22 Mo olsem ia nao i bin kam tingting blong ol pipol blong Semnaraeha blong stopem plan blong olgeta, from bigfala panis we i bin kam long olgeta long naet mo long dei.

23 Mo i bin hapen se Semnaraeha i bin givim oda long ol pipol blong hem se oli mas stop long wok blong raonem, mo maj i go long ol pat blong graon long not we oli stap moa longwe bitim ol narafala ples.

24 Mo nao, Gidgidonae from hem i save plan blong olgeta, mo from hem i save se oli slak from oli nidim kakae, mo fasin blong kilim ded we i bin hapen long medel blong olgeta i bigwan, taswe hem i bin sendem aot ol ami blong hem long naetaem, mo bin blokem rod blong olgeta blong ronwe long hem.

25 Mo samting ia oli bin mekem long naetaem, mo oli bin maj i go bitim ol man blong stil, blong mekem se long nekis dei, taem we ol man blong stil i bin statem maj blong olgeta, oli mitim ol ami blong ol man blong Nifae long fored blong olgeta tugeta wetem long biae blong olgeta.

26 Mo ol man blong stil we i

bin stap long saot olgeta tu oli blokem ol ples blong olgeta blong ronwe long hem. Mo evri samting ia i bin hapen folem oda blong Gidgidonae.

27 Mo i bin gat plante taosen we i bin lego olgeta bakegen blong kam ol prisena long ol man blong Nifae, mo olgeta narawan long olgeta we i bin stap oli bin kilim ded.

28 Mo lida blong olgeta, Semnaraeha, oli bin tekem hem mo hangem hem long wan tri, yes, we i long antap blong tri ia kasem taem we hem i bin ded. Mo taem we oli bin hangem hem kasem taem we hem i bin ded, oli bin mekem tri ia i foldaon long graon, mo oli bin singaot wetem wan voes we i bigwan, oli talem:

29 Bae Lod i sevem ol pipol blong hem long stret fasin mo long tabu fasin blong hat, blong olgeta i save foldaon long graon, olgeta we bae oli lukaotem blong kilim ded hem from paoa mo ol sikret grup, we i olsem man ia i bin foldaon long graon.

30 Mo oli bin hapi mo singaot bakegen wetem wan voes, se: Bae God blong Ebrahim, mo God blong Aesak, mo God blong Jakob, lukaotem gud pipol ia long stret fasin, long taem we bae oli prea long nem blong God blong olgeta blong hem i lukaotem gud long olgeta.

31 Mo i bin hapen se oli bin stat, olgeta evriwan olsem wan, blong singsing, mo presem God blong olgeta from bigfala samting we hem i bin mekem long olgeta, blong sevem olgeta

blong oli no foldaon long ol han blong ol enemi blong olgeta.

32 Yes, oli bin singaot: Hosana long God we i Hae Olgeta. Mo oli bin singaot: Blesem nem blong Lod God we i gat Olgeta Paoa, God we i Hae Olgeta.

33 Mo ol hat blong olgeta i bin solap long glad mekem se plante wota blong ae i bin kamaot, from bigfala gudfala fasin blong God blong tekem olgeta aot long ol han blong ol enemi blong olgeta; mo oli bin save se hem i bin from fasin blong sakem sin blong olgeta mo fasin blong putum tingting i stap daon blong olgeta we oli bin kamaot long panis we i no gat en.

---

#### JAPTA 5

---

*Ol man blong Nifae i sakem sin mo lego ol sin blong olgeta— Momon i raetem histri blong ol pipol blong hem mo i talemaot toktok we i no gat en, long olgeta— Isrel bae i kam tugeta long longfala taem blong seraot blong hem. Raonabaot 22–26 yia afta Kraes i bon.*

Mo nao luk, i no bin gat wan sol we i stap laef long medel blong evri pipol blong ol man blong Nifae we i no bin biliv strong long smol pat blong ol toktok blong ol tabu profet we oli bin talem; from oli bin save se i mas nid i stap olsem se ol toktok ia i mas hapen.

2 Mo oli bin save se i mas gat nid we Kraes i bin kam, from ol plante saen we Lod i bin givim,

folem ol toktok blong ol profet; mo from ol samting we i bin kam blong hapen finis oli bin save se i mas nid i stap olsem se evri samting bae i kam blong hapen folem wanem oli bin talemaot.

3 Taswe oli bin lego evri sin blong olgeta, mo ol rabis sin blong olgeta, mo ol fasin blong olgeta blong slip olbaot, mo oli bin wok blong God wetem evri had wok oltaem dei mo naet.

4 Mo nao i bin hapen se taem we oli bin tekem evri man blong stil olsem ol prisena, inaf we i mekem se i no gat wan long olgeta i ronwe we oli no bin kilim ded, oli bin sakem ol prisena blong olgeta long prisem, mo oli bin mekem se oli prijim toktok blong God long olgeta; mo olgeta we bae oli sakem ol sin blong olgeta mo mekem wan kavenan se bae oli no kilim man i ded eni moa oli bin letem olgeta i go fri.

5 Be olgeta we i bin gat we i no bin mekem wan kavenan, mo we i bin gohed yet blong gat ol sikret plan blong kilim man i ded insaed long hat blong olgeta, yes, olgeta we oli bin faenem se oli talemaot ol woning long ol brata blong olgeta, oli bin jajem olgeta mo panisim olgeta folem loa.

6 Mo olsem ia nao oli bin mekem wan en long ol nogud, mo sikret, mo rabis grup, tru long samting ia i no bin gat plante nogud fasin, mo plante fasin blong kilim man i ded i hapen.

7 Mo olsem ia nao twenti mo tu yia i bin pas i gowe, mo

twenti mo tri yia tu, mo twenti mo fo, mo twenti mo faef; mo olsem ia nao twenti mo faef yia i bin pas i gowe.

8 Mo i bin gat plante samting we i bin hapen we, long ol ae blong samfala, bae oli bigfala mo oli gudfala; be, olgeta evriwan oli no save raetem insaed long buk ia; yes, buk ia i no save holem kasem wan hundred pat long wanem we i bin hapen long plante pipol tumas long spes blong twenti mo faef yia;

9 Be luk, i gat ol histri we i holem evri samting we pipol ia i bin mekem, mo wan histri we i moa sot be i tru Nifae i bin givim.

10 Taswe mi bin mekem histri blong mi long ol samting ia fol-em histri blong Nifae, we i bin raetem long ol buk we oli bin singaotem ol buk long Nifae.

11 Mo luk, mi mekem ol histri ia long ol buk we mi bin mekem wetem ol han blong mi nomo.

12 Mo luk, oli singaotem mi Momon, oli singaotem mi folem nem blong graon blong Momon, graon ia we Alma i bin stanemap jos wetem ol pipol, yes, fassala jos we i bin stanap wetem olgeta afta we oli bin brekem loa.

13 Luk, mi mi wan disaepol blong Jisas Kraes, Pikinini blong God. Hem i bin singaotem mi blong talemaot toktok blong hem long medel blong ol pipol blong hem, blong oli save gat laef we i no gat en.

14 Mo i bin gat nid se mi, folem olsem we God i wantem, se ol prea blong olgeta we i bin



go finis, we oli bin ol tabu wan, i mas hapen folem fet blong olgeta, mi mas mekem wan histri blong ol samting ia we oli bin hapen—

15 Yes, wan smol histri blong samting we i bin hapen stat long taem we Lihae i bin aot long Jerusalem, we i daon kasem taem naoia.

16 Taswe mi mekem histri blong mi, aot long ol histri we i bin kamaot tru long olgeta we i bin stap bifo long mi, kasem stat blong dei blong mi;

17 Mo afta mi mi mekem wan histri blong ol samting we mi bin lukim wetem ol ae blong mi nomo.

18 Mo mi save se histri we mi mekem i wan stret mo wan tru histri; be, i gat plante samting we, folem lanwis blong mifala, mifala i no save raetem.

19 Mo nao mi mekem wan en blong ol toktok blong mi, we i long saed blong mi, mo mi gohed blong raetem histri blong mi long saed blong ol samting we i bin hapen bifo long mi.

20 Mi mi Momon, mo wan stret laen blong Lihae. Mi gat stamba tingting blong presem God blong mi mo Sevyia blong mi Jisas Kraes, from hem i bin tekem ol bubu blong mifala aot long graon blong Jerusalem, (mo i no gat eni man we i bin save sapos i no hemwan mo olgeta we hem i bin tekemaot long graon ia) mo we hem i bin givim mi mo ol pipol blong mi plante save kasem blong sevem ol sol blong mifala.

21 I tru we hem i bin blesem

laen blong Jakob, mo i bin gat sore long ol pikinini blong Josef.

22 Mo i semak olsem we ol pikinini blong Lihae i bin holem ol komanmen blong hem, hem i bin blesem olgeta mo mekem olgeta i kam antap gud folem toktok blong hem.

23 Yes, mo i tru we bae hem i karem bakegen wan smol haf we oli stap yet blong laen blong Josef, long save long saed blong Lod, God blong olgeta.

24 Mo i tru olsem we Lod i stap laef, bae hem i karem i kam tugeta long ol fo pat blong wol evri smol haf we oli stap yet blong laen blong Jakob, we oli bin seraot olbaot long fes blong wol ia.

25 Mo olsem we hem i bin kavenan wetem ful laen blong Jakob, we i olsem kavenan ia we hem i bin kavenan wetem laen blong Jakob bae i hapen long taem we hem i jusum, blong karem i kambak tugeta ful laen blong Jakob long save blong kavenan we hem i bin kavenan wetem olgeta.

26 Mo afta bae oli save Ridima blong olgeta, we i Jisas Kraes, Pikinini blong God; mo afta bae oli karem i kam tugeta aot long ol fo pat blong wol long ol graon blong olgeta nomo, long ples we oli bin kamaot long hem; yes, olsem we Lod i stap laef bae samting ia i hapen. Amen.

---

## JAPTA 6

---

*Ol man blong Nifae i kam antap*

*gud—Hae tingting, ol rij samting, mo fasin blong gat ol defren grup blong pipol i girap—Jos i split wetem ol fasin blong pulaot—Setan i lidim ol pipol long fasin blong go agensem stret—Plante profet i prijim fasin blong sakem sin mo oli kilim ded olgeta—Olgeta we i bin kilim ded olgeta i plan blong tekem ova gavman. Raonabaot 26-30 yia afta Kraes i bon.*

Mo nao i bin hapen se ol pipol blong ol man blong Nifae i bin gobak, olgeta evriwan long ol graon blong olgeta long twenti mo sikis yia, evri man, wetem famle blong hem, ol grup blong anamol blong hem mo ol grup blong buluk blong hem, ol hos blong hem mo ol buluk blong hem, mo evri samting we i bin stap blong olgeta.

2 Mo i bin hapen se oli no bin kakae flatem evri kakae blong olgeta; taswe oli bin tekem wetem olgeta evri samting we oli no bin kakae flatem, blong evri sid blong olgeta blong evri kaen, mo ol gol blong olgeta, mo ol silva blong olgeta, mo evri gudgudfala samting blong olgeta, mo oli bin gobak long ol graon blong olgeta mo ol samting blong olgeta, long not tugeta wetem long saot, long graon long not tugeta wetem long graon long saot.

3 Mo oli bin letem long ol man blong stil we i bin mekem kavenan blong holem taet pis blong graon, we oli bin wantem blong stap olsem ol man blong Leman, ol graon, folem ol namba blong olgeta, blong

maet oli save gat, wetem ol wok blong olgeta, wanem we oli bin nidim blong stap laef long hem; mo olsem ia nao oli stanemap pis long medel blong ful graon.

4 Mo oli bin stat bakegen blong kam antap gud mo blong kam strong; mo twenti mo sikis mo seven yia i bin pas i gowe, mo i bin gat strong oda long graon, mo oli bin mekem ol loa blong olgeta folem fasin we i stret mo jastis.

5 Mo nao i no bin gat eni samting long ful graon blong blokem ol pipol blong kam antap gud oltaem, hemia nomo sapos oli no foldaon long sin.

6 Mo nao hem i bin Gidgido-nae, mo jaj, Lakonius, mo olgeta we oli bin jusum olgeta olsem ol lida, we i bin stanemap bigfala pis ia long graon.

7 Mo i bin hapen se i bin gat plante bigtaon we oli bin bildim i niu, mo i bin gat plante olfala bigtaon we oli bin mekem gud.

8 Mo i bin gat plante bigfala rod we ol pipol i bin mekem, mo plante rod oli bin mekem we i bin go long wan bigtaon i go long narafala bigtaon, mo long wan graon i go long narafala graon, mo long ples i go long narafala ples.

9 Mo olsem ia nao twenti mo eit yia i bin pas i gowe, mo ol pipol i bin gat pis oltaem.

10 Be i bin hapen long twenti mo naen yia i bin stat blong gat sam rao long medel blong ol pipol; mo sam i bin kam antap wetem hae tingting mo ol flas toktok from ol bigfala rij sam-

ting blong olgeta we i tumas, yes, i go kasem ol bigfala fasin blong givim hadtaem;

11 From i bin gat plante bisnesman long graon, mo tu plante loea, mo plante ofisa.

12 Mo ol pipol i bin stat blong seraot long ol defren grup, fol-em ol rij samting blong olgeta mo ol janis blong olgeta blong lanem samting; yes, sam i no bin save eni samting from oli pua, mo sam narafala i bin kasem fasin blong lanem samting we i bigfala from ol rij samting blong olgeta.

13 Sam oli bin kam antap long hae tingting, mo sam narafala oli bin putum tingting blong olgeta i stap daon tumas; sam i bin givim nogud toktok blong nogud toktok, taem we sam narafala i kasem ol nogud toktok, mo fasin blong givim hadtaem mo evri kaen hadtaem, mo oli no save tanem bakegen mo go agensem, be oli bin putum tingting blong olgeta i stap daon mo wantem sakem sin long fored long God.

14 Mo olsem ia nao i bin gat wan bigfala fasin blong ol pipol i no stap semak long ful graon, inaf blong mekem se jos i bin stat blong brokbrok; yes, inaf blong mekem se long teti yia jos i bin brokbrok long ful graon be long medel blong wan smol namba nomo i no bin brokbrok blong ol man blong Lemana we i bin jenisim laef long tru fet; mo oli no bin save kamaot long hem, from oli no bin strong, mo oli stanap strong, mo oli no save muvmuv, oli glad

wetem had wok oltaem blong holem ol komanmen blong Lod.

15 Nao stamba tingting blong nogud fasin blong ol pipol ia i bin hemia—Setan i bin gat bigfala paoa, blong tanem tingting blong ol pipol blong mekem evri kaen fasin we i nogud, mo blong mekem olgeta oli solap wetem hae tingting, hem i temptem olgeta blong lukaotem paoa, mo raet, mo ol rij samting, mo ol samting blong wol we oli blong nating.

16 Mo olsem ia nao Setan i bin lidim i gowe ol hat blong ol pipol blong mekem evri kaen fasin we i nogud; taswe oli bin harem gud long pis be long smol namba blong ol yia nomo.

17 Mo olsem ia nao, long stat blong teti yia—ol pipol from we oli bin letem olgeta blong spes blong wan longtaem blong ol temtesen blong devel i karem olgeta long eni ples we hem i bin wantem blong tekem olgeta, mo blong mekem eni nogud fasin hem i bin wantem se oli mas mekem—mo olsem ia nao long stat blong hemia, teti yia ia, oli bin stap long wan ples blong fasin nogud tumas.

18 Nao oli no bin sin from se oli no save, from oli bin save wanem tingting blong God long saed blong olgeta, from oli bin tijim samting ia long olgeta; taswe oli bin minim blong go agensem God.

19 Mo nao i bin long ol dei blong Lakonius, from Lakonius i bin tekem jea blong papa blong hem mo hem i bin rulum ol pipol long yia ia.

20 Mo i bin stat blong gat ol man we God i toktok long olgeta aot long heven mo i bin sendem aot olgeta, oli stanap long medel blong ol pipol long ful graon, blong prij mo testifae strong long saed blong ol sin mo ol rabis fasin blong ol pipol, mo testifae long olgeta long saed blong fasin blong pemaot we Lod bae i mekem blong ol pipol blong hem, o long ol narafala toktok, laef bakegen blong Kraes; mo oli bin testifae strong long saed blong ded blong hem mo ol fasin blong harem nogud.

21 Nao i bin gat plante long ol pipol we i bin kros tumas from olgeta we i bin testifae long saed blong ol samting ia; mo olgeta we i bin kros plante long olgeta oli ol jif jaj, mo olgeta we i bin stap olsem ol hae pris mo ol loea; yes, olgeta evriwan we i bin loea oli bin kros long olgeta we i bin testifae long saed blong ol samting ia.

22 Nao i no bin gat wan loea o jaj o hae pris we i save gat paoa blong panisim eni wan blong ded sapos jajmen blong olgeta i no kasem saen blong gavena blong graon.

23 Nao i bin gat plante long olgeta we i testifae long ol samting long saed blong Kraes, we i bin testifae strong, we oli bin tekem olgeta mo kilim ded olgeta tru long ol jaj long sikret, blong mekem se nius blong ded blong olgeta i no bin kam long gavena blong graon kasem afta long ded blong olgeta.

24 Nao luk, samting ia i bin

agensem ol loa blong graon, se eni man ol jaj i no save kilim ded sapos oli no bin kasem paoa long gavena blong graon—

25 Taswe wan komplek i bin go antap long graon blong Sarahemla, long gavena blong graon, agensem ol jaj ia we i bin panisim ol profet blong Lod blong kasem ded, oli no bin folem loa.

26 Nao i bin hapen se oli bin tekem olgeta mo putum olgeta long fored blong jaj, blong kasem jajmen folem ol nogud fasin we oli bin mekem, folem loa we ol pipol i bin putum.

27 Nao i bin hapen se ol jaj ia i bin gat plante fren mo famle; mo olgeta we i stap yet, yes, we i klosap evri loea mo ol hae pris, i bin kam tugeta, mo joen tugeta wetem ol famle blong ol jaj ia we bae oli jajem olgeta folem loa.

28 Mo oli bin mekem wan kavenan wan wetem narawan, yes, we i long kavenan we oli bin kasem long olgeta blong bifo, we kavenan ia we devel i bin givim mo yusum, blong joen tugeta agensem evri stret fasin.

29 Taswe oli bin joen tugeta agensem ol pipol blong Lod, mo mekem wan kavenan blong smasem gud olgeta, mo blong mekem olgeta we oli bin rong long fasin blong kilim man i ded i go fri long jastis i no holem taet olgeta, we loa i rere blong putum long olgeta folem loa.

30 Mo oli no bin wantem fol-em loa mo ol raet blong kantri blong olgeta; mo oli bin mekem kavenan wan wetem narawan

blong smasem gud gavena, mo blong stanemap wan king ova long graon, blong mekem se graon bae i nomo stap long fridom be i mas stap andanit kontrol blong ol king.

---

JAPTA 7

---

*Oli kilim ded jif jaj, oli smasem gud gavman, mo ol pipol i seraot i go long ol traeb—Jekob, wan man we i agensen Kraes, i kam king blong wan sikret grup—Nifae i prijim fasin blong sakem sin mo fet long Kraes—Ol enjel i givhan long hem evri dei, mo hem i resem-ap brata blong hem long ded—Plante i sakem sin mo kasem baptaes. Raonabaot 30–33 yia afta Kraes i bon.*

NAO luk, bae mi soem long yu we oli no bin stanemap wan king ova long graon; be long semfala yia ia, yes, namba teti yia, oli bin smasem gud long jea blong jajmen, yes, oli bin kilim ded jif jaj blong graon.

2 Mo ol pipol i bin seraot wan agensem narawan; mo oli bin seraot wan aot long narawan i go long ol traeb, evri man folem famle blong hem, mo ol famle blong hem mo ol fren; mo olsem ia nao oli bin smasem gud gavman blong graon.

3 Mo evri traeb i bin jusum wan jif o wan lida ova long olgeta; mo olsem ia nao oli bin kam ol traeb mo ol lida blong ol traeb.

4 Nao luk, i no bin gat eni man long medel blong olgeta sapos hem i no bin gat plante famle

mo plante famle mo ol fren; taswe ol traeb blong olgeta i bin kam bigwan tumas.

5 Nao evri samting ia i bin hapen, mo i no bin gat eni faet yet long medel blong olgeta; mo evri nogud fasin ia i bin kam long ol pipol from oli bin letem olgeta long paoa blong Setan.

6 Mo oli bin smasem gud ol loa blong gavman, from sikret grup blong ol fren mo ol famle blong olgeta we i bin kilim ded ol profet.

7 Mo oli bin mekem wan bigfala rao long graon, inaf blong mekem se moa stret pat blong ol pipol klosap evriwan i bin kam nogud; yes, i bin gat be smol namba nomo blong ol man we i stret long medel blong olgeta.

8 Mo olsem ia nao sikis yia i no bin pas i gowe stat long taem we bigfala pat long ol pipol i bin tanem olgeta i gowe long stret fasin blong olgeta, olsem wan dog we i gobak long traot blong hem, o olsem pig we i go slip long sofmad.

9 Nao sikret grup ia, we i bin karem bigfala nogud fasin long ol pipol, i bin mekem olgeta i kam tugeta, mo oli bin putum long hed blong olgeta wan man we oli bin singaotem hem Jekob;

10 Mo oli bin singaotem hem king blong olgeta; taswe hem i bin kam king ova long nogud grup ia; mo hem i bin wan long olgeta we i bin givim voes blong hem agensem ol profet we oli bin testifae long saed blong Jisas.

11 Mo i bin hapen se oli no bin strong long namba olsem ol traeb blong ol pipol, we i bin joen tugeta be ol lida blong olgeta nomo i bin stanemap ol loa blong olgeta, evriwan folem traeb blong hem; be oli ol enemi, i nomata oli no bin wan pipol we i stret, yet oli bin wan long fasin blong no laekem olgeta we i bin mekem kavenan blong smasem gud gavman.

12 Taswe, Jakob from hem i luk se ol enemi blong olgeta i moa plante bitim olgeta, from hem i king blong grup, taswe hem i bin givim oda long ol pipol blong hem se oli mas ronwe i go long pat blong graon we i long not olgeta, mo long ples ia oli bildimap long olgeta bak-egen wan kingdom, kasem taem we olgeta we i bin pulaot i joenem olgeta, (from hem i bin switim olgeta se bae i gat plante man we i pulaot) mo oli bin kam strong inaf blong rao wetem ol traeb blong ol pipol; mo oli bin mekem olsem.

13 Mo maj blong olgeta i bin kwik tumas we i no bin gat wan samting we i save stopem hem kasem taem we oli bin go fored aot long ples we ol pipol i save kasem olgeta. Mo olsem ia nao teti yia i bin en; mo olsem ia nao i bin ol laef blong ol pipol blong Nifae.

14 Mo i bin hapen long teti mo wan yia we oli bin seraot i go long ol traeb, evri man folem famle blong hem, famle mo ol fren; be oli bin kam long wan agrimen se bae oli no go long faet wan wetem narawan; be

oli no bin kam wan long saed blong ol loa blong olgeta, mo fasin blong olgeta blong gavman, from oli bin stanap folem ol tingting blong olgeta we oli bin ol jif blong olgeta mo ol lida blong olgeta. Be oli bin stanemap ol loa we i strong mekem se wan traeb bae i no mas mekem rong agensem narawan, inaf blong mekem se long sam pat oli bin gat pis long graon; be, ol hat blong olgeta oli bin tanem longwe long Lod, God blong olgeta, mo oli bin stonem ol profet mo oli bin sakem olgeta aot long olgeta.

15 Mo i bin hapen se Nifae— from ol enjel i bin visitim hem mo tu voes blong Lod, taswe from hem i bin luk ol enjel, mo from hem i witnes wetem ae blong hem, mo from we hem i bin kasem paoa long hem blong hem i save gat save long saed blong ministri blong Kraes, mo tu from we hem i witnes wetem ae blong hem long fasin blong olgeta blong aot kwiktaem long stret fasin i go long ol nogud fasin blong olgeta mo ol rabis sin;

16 Taswe, from we hem i bin harem nogud from ol hat blong olgeta i strong mo ol tingting blong olgeta i blaen—hem i bin go aot long medel blong olgeta long semfala yia, mo i bin stat blong testifae, strong, fasin blong sakem sin mo kam klin aot long ol sin tru long fet long Lod Jisas Kraes.

17 Mo hem i bin tijim plante samting long olgeta; mo evriwan long olgeta i no save raet-

em, mo wan pat blong olgeta bae i no naf, taswe mi no raetem olgeta long buk ia. Mo Nifae i bin wok wetem paoa mo wetem bigfala raet.

18 Mo i bin hapen se oli bin kros long hem, we i from hem i bin gat moa bigfala paoa bitim olgeta, from i no bin save hapen se oli no save bilivim ol toktok blong hem, from fet blong hem long Lod Jisas Kraes i bigwan tumas mekem se ol enjel i bin givhan long hem evri dei.

19 Mo long nem blong Jisas hem i bin sakemaot ol devel mo ol spirit we i no klin; mo tu brata blong hem, hem i bin resemap hem long ded, afta we ol pipol i bin stonem hem mo hem i bin harem nogud long ded.

20 Mo ol pipol i bin lukim samting ia, mo bin witnes long samting ia, mo oli bin kros long hem from paoa blong hem; mo tu hem i bin mekem plante moa merikel, long ae blong ol pipol, long nem blong Jisas.

21 Mo i bin hapen se teti mo wan yia i bin pas i gowe, mo i bin gat be smol namba nomo we i bin jenisim laef long Lod; be olgeta we i bin jenisim laef oli bin soemaot tru long ol pipol se paoa mo Spirit blong God i bin visitim olgeta, we i bin stap long Jisas Kraes, long hem we oli bin biliv.

22 Mo olgeta evriwan we Nifae i bin sakemaot ol devel aot long olgeta, mo i bin kam oraet long ol siknes blong olgeta mo ol samting we i slak long olgeta, i bin soemaot tru long ol pipol se

Spirit blong God i wok long olgeta, mo oli bin kam oraet; mo oli bin soemaot ol saen tu mo oli bin mekem sam merikel long medel blong ol pipol.

23 Olsem ia nao teti mo tu yia i bin pas i gowe tu. Mo Nifae i bin prij long ol pipol long stat blong teti mo tri yia; mo hem i bin prij long olgeta, fasin blong sakem sin mo fasin blong kam klin aot long ol sin long olgeta.

24 Nao mi wantem yu blong tingbaot tu, se i no bin gat eniwan we i bin kam blong sakem sin we i no bin kasem baptaes wetem wota.

25 Taswe, Nifae i bin odenem ol man long ministri ia, blong olgeta olsem we bae i kam long olgeta i mas kasem baptaes wetem wota, mo hemia olsem wan witnes mo wan testimoni long fored blong God, mo long ol pipol, se oli bin sakem sin mo oli bin kasem fasin blong kam klin aot long ol sin blong olgeta.

26 Mo i bin gat plante long stat blong yia ia we i bin kasem baptaes blong sakem sin; mo olsem ia nao bigfala pat blong yia ia i bin pas i gowe.

---

## JAPTA 8

---

*Ol hariken, ol graon i seksek, ol faea, ol waelwin, mo plante nara-fala samting long graon i witnessem taem we oli krusifaem Kraes—Plante pipol i ded—Tudak i kavre-map graon blong tri dei—Olgeta we i stap, oli krae from ol samting we i bin hapen, olsem we i mas*

*hapen long olgeta. Raonabaot 33-34 yia afta Kraes i bon.*

Mo nao i bin hapen se folem histri blong mifala, mo mifala i save se histri blong mifala i tru, from luk, hem i bin wan stret man we i bin kipim histri— from i tru we hem i bin mekem plante merikel long nem blong Jisas; mo i no bin gat eni man we i save mekem wan merikel long nem blong Jisas sapos hem i no klin fulwan long ol rabis fasin blong hem—

2 Mo nao i bin hapen se, sapos i no bin gat mistek we man ia i bin mekem long taem we hem i talemaot taem blong mifala, teti mo tri yia i bin pas i gowe;

3 Mo ol pipol i bin stat blong lukaotem strong tumas long saen we profet Samuel, man blong Leman i bin talemaot, yes, from taem we bae i gat tudak blong spes blong tri dei ova long fes blong graon.

4 Mo i bin stat blong gat ol fasin blong no bilif strong mo ol rao long medel blong ol pipol, i nomata long ol plante saen we Lod i bin soemaot long olgeta.

5 Mo i bin hapen long teti mo fo yia, fASFALA manis, long nambafo dei blong manis, i bin gat wan ren mo strong win mo tanda we i bigwan i bin girap, wan we oli neva bin save olsem long ful graon.

6 Mo i bin gat tu wan bigfala mo rabis ren wetem strongfala win; mo i bin gat tanda we i faerap strong tumas inaf blong

mekem se hem i bin sekem ful graon olsem se i rere blong brok.

7 Mo i bin gat ol laetning we i strong tumas, olsem we oli neva bin save long ful graon.

8 Mo bigtaon blong Sarahemla i bin kasem faea.

9 Mo bigtaon blong Moronae i bin draon long ol dip ples blong solwota, mo ol pipol we i stap long hem i bin draon.

10 Mo graon i bin kavremap bigtaon blong Moronaeha, mekem se long ples blong bigtaon ia i bin gat wan bigfala hil.

11 Mo i bin gat wan bigfala mo nogud smasgud long graon long saot.

12 Be luk, i bin gat wan moa bigfala mo nogud smasgud long graon long not; from luk, ful fes blong graon i bin jenis, from ol hariken mo ol wael win, mo ol tanda mo ol laetning, mo ful graon i bin seksek strong tumas;

13 Mo ol bigfala rod i bin brokbrok, mo ol flat rod i bin kam nogud, mo plante smut ples i bin kam raf.

14 Mo plante bigfala mo impoten bigtaon i bin draon, mo plante i bin bon, mo plante i bin seksek kasem taem we ol haos blong hem i bin foldaon long graon, mo ol pipol we i stap long hem i bin ded, mo ol ples i bin stap emti.

15 Mo i bin gat sam bigtaon we i bin stap yet; be smas blong hem i bin bigwan tumas, mo i bin gat plante long olgeta we i bin ded.

16 Mo i bin gat samfala we wael win i bin karem olgeta i gowe; mo long wea ples we oli



bin go i no gat man i save, hemia nomo oli save se hem i bin karem olgeta i gowe.

17 Mo olsem ia nao fes blong ful graon i bin kam nogud, from ol hariken, mo ol tanda, mo ol laetning, mo seksek blong graon.

18 Mo luk, ol ston i bin brok long tu pis; oli bin brokbrok long fes blong ful graon, inaf blong mekem se oli bin faenem long ol pisis we i brokbrok, mo oli brok long medel mo long plante pisis, long ful fes blong graon.

19 Mo i bin hapen se taem we ol tanda, mo ol laetning, mo ren, mo hariken mo ol seksek blong graon i bin stop—from luk, oli bin gohed klosap blong spes blong tri aoa; mo sam pipol i bin talem se taem i bin moa longfala; be, evri bigfala mo nogud samting ia i bin hapen klosap long spes blong tri aoa—mo afta luk, i bin gat tudak long fes blong graon.

20 Mo i bin hapen se i bin gat tik tudak long ful fes blong graon, inaf blong mekem se ol pipol we i stap long hem we i no bin foldaon i save filim smok blong tudak;

21 Mo i no save gat laet, from tudak ia, mo tu ol kandel, mo tu ol toj; mo tu i no bin save gat faea i laet wetem ol gudfala wud blong olgeta we i drae gud, mekem se i no save gat eni laet nating;

22 Mo i no bin gat eni laet we oli bin luk, o faea, o wan pis laet, o san, o mun, o ol sta, from ol smok blong tudak i bin big-

wan tumas we i bin stap long fes blong graon.

23 Mo i bin hapen se hem i bin stap blong spes blong tri dei we oli no bin luk laet; mo i bin gat ol bigfala krae mo ol singaot we i strong, mo ol krae long medel blong ol pipol oltaem; yes, ol noes blong ol pipol i bin strong, from tudak mo bigfala smasgud we i bin kam long olgeta.

24 Mo long wan ples oli bin harem ol pipol i krae, se: O sapos we mifala i bin sakem sin bifo long bigfala mo nogud dei ia, mo afta bae ol brata blong mifala i bin laef yet, mo bae oli no bin bon long bigfala bigtaon Sarahemla.

25 Mo long wan narafala ples oli bin harem ol pipol i krae mo singaot strong, se: O sapos mifala i bin sakem sin bifo long bigfala mo nogud dei ia, mo mifala i no bin kilim ded mo stonem ol profet, mo bin sakem olgeta aot; afta bae ol mama blong mifala mo ol naes gel blong mifala, mo ol pikinini blong mifala i bin save laef yet, mo bigfala bigtaon Moronaeha i no bin save berem olgeta. Mo olsem ia nao ol noes blong ol pipol i bin bigwan mo nogud.

---

### JAPTA 9

---

*Long tudak, voes blong Kraes i talemaot fasin blong smasem gud plante pipol mo ol bigtaon from fasin nogud blong olgeta—Mo tu hem i talemaot we hem i Pikinini blong God, i talemaot se loa blong Moses i hapen, mo i askem evri*

*man blong kam long hem mo sev.  
Raonabaot 34 yia afta Kraes i bon.*

Mo i bin hapen se i bin gat wan voes we evri pipol long graon i bin harem, long ful fes blong graon ia, i talem se:

2 Sore tumas, sore tumas, sore tumas long ol pipol ia; sore tumas long olgeta we i stap long ful graon ia sapos oli no sakem sin; from devel i stap laf, mo ol enjel blong hem i stap glad, from ol ded blong ol naes boe mo ol gel blong ol pipol blong mi; mo hem i from ol nogud fasin mo ol rabis sin blong mekem se oli bin foldaon!

3 Luk, bigfala bigtaon ia Sarahemla mi bin bonem wetem faea, mo ol pipol we i stap long hem.

4 Mo luk, bigfala bigtaon ia Moronae mi bin mekem se i go andanit long ol dip ples blong solwota, mo ol pipol we i stap long hem blong draon.

5 Mo luk, bigfala bigtaon ia Moronaeha mi bin kavremap wetem graon, mo ol pipol we i stap long hem, blong haedem ol nogud fasin blong olgeta mo ol rabis sin blong olgeta long fored blong fes blong mi, blong mekem se blad blong ol profet mo ol sent bae i nomo kam long mi agensem olgeta.

6 Mo luk, bigtaon blong Gilgal mi bin mekem se i go andanit long graon, mo ol pipol we i stap long hem blong berem olgeta long ol dip ples blong graon;

7 Yes, mo bigtaon blong Onaeha mo olgeta we i stap long

hem, mo bigtaon blong Mokam mo olgeta we i stap long hem, mo bigtaon blong Jerusalem mo olgeta we i stap long hem; mo ol wota mi bin mekem se oli kam antap long ples blong olgeta, blong haedem ol nogud fasin blong olgeta mo ol rabis sin blong olgeta long fored blong fes blong mi, blong mekem se blad blong ol profet mo ol sent bae i nomo kam antap long mi agensem olgeta.

8 Mo luk, bigtaon blong Gadiandae mo bigtaon blong Gadiomna, mo bigtaon blong Jekob, mo bigtaon blong Gimgimno, olgeta ia mi bin mekem se oli go andanit long graon, mo mi bin mekem ol hil mo ol vale long ol ples blong olgeta; mo olgeta we i stap long olgeta mi bin berem andanit long ol dip ples blong graon, blong haedem ol nogud fasin blong olgeta mo ol rabis sin long fored blong fes blong mi, blong mekem se blad blong ol profet mo ol sent bae i nomo kam antap long mi agensem olgeta.

9 Mo luk, bigtaon ia Jekobugat, we ol pipol blong king Jekob i bin stap long hem, mi bin mekem i bon long faea from ol sin blong olgeta mo ol nogud fasin blong olgeta, we i bin antap moa bitim evri nogud fasin blong ful graon ia, from ol sikret fasin blong olgeta blong kilim man i ded mo ol grup; from i bin olgeta ia nao we i bin smasem gud pis blong ol pipol blong mi mo gavman blong graon; taswe mi bin mekem se oli bin bon, blong kilim ded olgeta long

fored blong fes blong mi, blong mekem se blad blong ol profet mo ol sent bae i nomo kam antap long mi agensem olgeta.

10 Mo luk, bigtaon blong Leman, mo bigtaon blong Jos, mo bigtaon blong Gad, mo bigtaon blong Kiskumen, mi bin mekem se oli bon long faea, mo olgeta we i stap long olgeta, from ol nogud fasin blong olgeta blong sakemaot ol profet, mo stonem olgeta we mi bin sendem blong talemaot long olgeta long saed blong ol nogud fasin blong olgeta mo ol rabis sin.

11 Mo from oli bin sakem evriwan aot, mekem se i no bin gat wan we i stret long medel blong olgeta, mi bin sendem daon faea mo mi bin kilim ded olgeta, blong mekem se ol nogud fasin blong olgeta mo ol rabis sin i save haed long fored blong fes blong mi, blong mekem se blad blong ol profet mo ol sent we mi bin sendem long medel blong olgeta bae i no save krae long mi aot long graon agensem olgeta.

12 Mo plante bigfala fasin blong smasem gud mi bin mekem se i kam long graonia, mo long pipol ia, from ol nogud fasin blong olgeta mo ol rabis sin blong olgeta.

13 O yufala evriwan we i stap laef from we yufala i moa stret bitim olgeta, bae yufala i no kambak naoia long mi, mo sakem ol sin blong yufala, mo jenisim laef blong yufala blong mekem se mi save mekem yufala i kam oraet?

14 Yes, i tru mi talem long yufala, sapos yufala i kam long mi bae yufala i gat laef we i no save finis. Luk, mi stap stretem han blong sore blong mi i go long yufala, mo eni man we bae i kam, hem bae mi akseptem; mo olgeta we i kam long mi i kasem blesing.

15 Luk, mi mi Jisas Kraes Piki-nini blong God. Mi bin mekem ol heaven mo wol, mo evri samting we i stap long olgeta. Mi bin stap wetem Papa stat long stat. Mi mi stap long Papa mo Papa i stap long mi, mo tru long mi Papa i leftemap nem blong hem.

16 Mi bin kam long olgeta blong mi, mo olgeta blong mi i no bin akseptem mi. Mo ol skripja long saed blong taem we bae mi kam i bin hapen finis.

17 Mo olgeta we oli bin akseptem mi, long olgeta mi bin givim long olgeta blong kam ol pikinini blong God; mo olsem ia bae mi mekem long olgeta evriwan we bae i biliv long nem blong mi, from luk, tru long mi fasin blong pemaot i kam, mo tru long mi loa blong Moses i hapen.

18 Mi mi laet mo laef blong wol. Mi mi Alfa mo Omega, mi mi stat mo mi mi en.

19 Mo bae yufala i nomo givim long mi fasin blong mekem blad i ron; yes, ol sakrifaes blong yufala mo ol ofring we yufala i bonem bae i mas stop, from bae mi no akseptem eni long ol sakrifaes blong yufala mo ol ofring we yufala i bonem.

20 Mo bae yufala i mekem

olsem wan sakrifaes long mi, wan hat we i fulap wetem sore mo wan spirit we i wantem blong sakem sin. Mo olgeta we bae i kam long mi wetem wan hat we i fulap wetem sore mo wan spirit we i wantem blong sakem sin, hem bae mi baptaesem wetem faea mo wetem Tabu Spirit, i semak olsem ol man blong Leman, from fet blong olgeta long mi long taem we oli bin jenisim laef, oli bin baptaes wetem faea mo wetem Tabu Spirit, mo oli no bin save.

21 Luk, mi bin kam long wol blong tekem fasin blong pemaot i kam long wol, blong sevem wol long sin.

22 Taswe, eni man we i sakem sin mo kam long mi olsem wan smol pikinini, hem bae mi akseptem, from olgeta ia i gat raet long kingdom blong God. Luk, from olgeta olsem, mi bin givim laef blong mi mo mi bin tekem bakegen; taswe sakem sin, mo kam long mi yufala evriwan long evri en blong wol, mo stap sev.

---

### JAPTA 10

---

*I no gat noes long graon blong plante aoa—Voes blong Kraes i promes blong karem ol pipol blong hem i kam olsem wan faol i karem ol pikinini blong hem i kam long hem—Bigfala stret pat blong ol pipol i bin sevem. Raonabaot 34–35 yia afta Kraes i bon.*

Mo nao luk, i bin hapen se evri pipol blong graon i bin harem ol toktok ia, mo oli bin witnes

long hem. Mo afta ol toktok ia, i no bin gat noes long graon blong spes blong plante aoa;

2 From ol sapraes blong ol pipol i bin bigwan tumas, mekem se oli bin stop blong krae mo blong krae strong from oli bin lusum ol famle blong olgeta we i bin ded; taswe i bin gat kwaet long ful graon blong spes blong plante aoa.

3 Mo i bin hapen se i bin gat wan voes bakegen we i bin kam long ol pipol, mo evri pipol i bin harem, mo oli bin witnes long hem, se:

4 O yufala ol pipol blong ol bigfala bigtaon ia we i bin foldaon, we i ol laen blong Jakob, yes, we i blong laen blong Isrel, hamas taem nao mi bin karem yufala i kam olsem wan faol i karem ol pikinini blong hem i kam andanit long ol wing blong hem, mo bin givim gudfala kakae long yufala.

5 Mo bakegen, hamas taem bae mi bin karem yufala i kam olsem wan faol i karem ol pikinini blong hem i kam andanit long ol wing blong hem, yes, O yufala ol pipol blong laen blong Isrel, we i bin foldaon; yes, O yufala ol pipol blong laen blong Isrel, yufala we i stap long Jerusalem, olsem we yufala i bin foldaon; yes, hamas taem bae mi bin karem yufala i kam olsem wan faol i karem ol pikinini blong hem, mo yufala i no wantem.

6 O yufala laen blong Isrel we mi bin letem yufala i stap laef, hamas taem bae mi karem yufala i kam olsem wan faol i

karem ol pikinini blong hem andanit long ol wing blong hem, sapos yufala i sakem sin mo kambak long mi wetem ful stamba tingting blong hat.

7 Be sapos yufala i no mekem, O laen blong Isrel, ol ples blong yufala we yufala i stap long hem bae oli kam emti kasem taem we kavenan we i go long ol papa blong yufala i hapen.

8 Mo i bin hapen se afta we ol pipol i bin harem ol toktok ia, luk, oli bin stat blong krae mo singaot strong bakegen from oli bin lusum ol famle blong olgeta mo ol fren.

9 Mo i bin hapen se olsem ia nao tri dei ia i bin pas i gowe. Mo i bin long moning, mo tudak i bin kamaot long fes blong graon, mo graon i bin stop blong seksek, mo ol ston i bin stop blong brokbrok, mo ol nogud noes blong fraet i bin stop, mo evri bigfala noes i bin pas i gowe.

10 Mo graon i bin joen tugeta bakegen, mekem se i bin stap, mo ol harem nogud, mo ol krae, mo ol strong krae blong ol pipol we Kraes i letem olgeta i stap laef i bin stop; mo ol harem nogud blong olgeta i bin kam glad, mo ol krae blong olgeta i kam pres mo oli stap talem tangkyu long Lod Jisas Kraes, Ridima blong olgeta.

11 Mo olsem ia nao we ol skripja i bin hapen we ol profet i bin tokbaot.

12 Mo hem i bin bigfala stret pat blong ol pipol we i bin sev, mo hem i bin olgeta we i bin akseptem ol profet mo oli no

bin stonem olgeta; mo i bin olgeta we i no bin mekem blad blong ol sent i ron, we Kraes i bin letem olgeta i laef—

13 Mo Kraes i bin letem olgeta oli laef mo oli no bin go daon andanit mo graon i no berem olgeta; mo oli no bin draon long ol dip ples blong solwota, mo oli no bin bon long faea, mo tu i no gat wan samting i fol-daon long olgeta mo smasem olgeta i ded; mo wael win i no bin karem olgeta i gowe; mo tu stim blong smok mo tudak i no bin kavremap olgeta.

14 Mo nao, eni man we i ridim, letem hem i andastanem; hem we i gat ol skripja, letem hem i stadi gud long olgeta, mo lukim mo luk sapos ol ded ia mo ol fasin blong smasem gud tru long faea, mo tru long smok, mo tru long ol bigfala hariken, mo tru long ol wael win, mo tru long graon i open blong tekem olgeta, mo evri samting ia i no soemaot se ol profesi blong ol tabu profet i hapen.

15 Luk, mi talem long yu, Yes, plante i bin testifae long saed blong ol samting ia long taem we Kraes i kam, mo oli bin kilim ded olgeta from oli bin testifae long saed blong ol samting ia.

16 Yes, profet Sinos i bin testifae long saed blong ol samting ia, mo tu Sinok i bin toktok long saed blong ol samting ia, from oli bin testifae moa long saed blong mifala we i smol haf blong laen blong olgeta we i stap yet.

17 Luk, bubu blong yumi

Jekob tu i bin testifae long saed blong smol haf blong Josef we i stap yet. Mo luk, yumi i no smol haf blong Josef we i laef yet? Mo ol samting ia we i testifae long saed blong yumi, oli no bin raetem olgeta long ol buk we oli bin mekem wetem bras we bubu blong yumi Lihae i bin karemaot long Jerusalem?

18 Mo i bin hapen se long en blong teti mo fo yia, luk, bae mi soemaot long yufala se ol pipol blong Nifae we Kraes i bin letem olgeta i laef, mo tu olgeta we oli bin singaotem olgeta ol man blong Leman, we Kraes i bin letem olgeta i laef, Kraes i bin soem ol gudfala fasin long olgeta, mo i bin poremaot ol bigfala blesing long ol hed blong olgeta, inaf blong mekem se i no long taem afta we Kraes i bin go antap long heven i tru we hem i bin soemaot hemwan long olgeta—

19 Hem i soemaot bodi blong hem long olgeta, mo i givhan long olgeta, mo wan histri blong ministri blong hem bae mi talemaot afta long taem ia. Taswe blong taem ia mi mekem wan en blong ol toktok blong mi.

---

Jisas Kraes i bin soemaot hemwan long ol pipol blong Nifae, taem we ol grup blong pipol i bin stap tugeta long graon Plante, mo i bin givhan long olgeta; mo long fasin ia hem i bin soemaot hemwan long olgeta.

*I stat long japta 11 i go kasem japta 26 nomo.*

---

## JAPTA 11

---

*Papa i testifae long saed blong Pikinini blong hem we hem i Lavem Tumas—Kraes i kamaot mo i talemaot atonmen blong hem —Ol pipol i tajem ol mak blong ol soa long ol han blong hem mo ol leg mo saed—Oli singaot Hosana —Hem i soemaot wei mo fasin blong baptaes—Spirit blong rao i blong devel—Doktrin blong Kraes i se evri man i mas biliv mo kasem baptaes mo kasem Tabu Spirit. Raonabaot 34 yia afta Kraes i bon.*

Mo nao i bin hapen se i bin gat wan bigfala grup blong pipol we i bin kam tugeta, blong ol pipol blong Nifae, raonabaot long tempol we i bin stap long graon Plante; mo oli stap sapraes mo stap tingting strong mo tokbaot wan long narafala wan, mo oli stap soem wan long narafala wan ol bigfala mo gudfala jenis we i bin hapen.

2 Mo tu oli stap tokbaot Jisas Kraes ia, we saen blong hem i bin kamaot long saed blong ded blong hem.

3 Mo i bin hapen se taem we oli stap toktok olsem ia nao wan wetem narafala wan, oli bin harem wan voes olsem se i bin kamaot long heven; mo oli bin sakem ol ae blong olgeta raonabaot, from oli no bin andastanem voes ia we oli bin harem; mo i no bin wan strong voes, mo tu i no bin wan laod voes; be, mo i nomata se i wan smol voes, i bin stikim olgeta

we i bin harem stret long medel, inaf blong mekem se i no bin gat wan pat blong bodi blong olgeta we i no bin mekem i seksek; yes, i bin stikim olgeta long stret sol, mo i bin mekem se ol hat blong olgeta i bon.

4 Mo i bin hapen se bakegen oli bin harem voes ia, mo oli no bin andastanem.

5 Mo bakegen nambatri taem oli bin harem voes ia, mo oli bin openem ol sorae blong olgeta blong harem hem; mo oli bin tanem ol ae blong olgeta blong lukluk i go long ples we saon i stap kam; mo oli bin lukluk gud i go long heven long ples we saon i bin kam.

6 Mo luk, long nambatri taem oli bin andastanem voes we oli bin harem; mo i bin talem long olgeta:

7 Luk, Pikinini blong mi we mi Lavem Tumas, long hem mi mi glad tumas, long hem mi bin leftemap nem blong mi—yufala i harem hem.

8 Mo i bin hapen, se taem we oli bin andastanem oli bin sakem ol ae blong olgeta bakegen i go antap long heven; mo luk, oli bin luk wan Man i stap kamdaon aot long heven; mo hem i bin werem wan waet longfala klos; mo hem i bin kamdaon mo hem i bin stanap long medel blong olgeta; mo ol ae blong ful grup blong pipol oli bin tanem i go long hem, mo oli bin fraet blong openem ol maot blong olgeta, wan long narafala wan tu, mo oli no bin save se hem i minim wanem, from oli bin ting se hem i wan

enjel we i bin kamaot long olgeta.

9 Mo i bin hapen se hem i bin stretem han blong hem mo i bin toktok long ol pipol, i talem:

10 Luk, mi mi Jisas Kraes, we ol profet i bin testifae se bae mi mas kam long wol.

11 Mo luk, mi mi laet mo laef blong wol; mo mi bin dring aot long kap we i konkon we Papa i bin givim long mi, mo mi bin leftemap nem blong Papa taem we mi putum long mi ol sin blong wol, long samting ia mi bin letem mi blong mekem wanem Papa i wantem long evri samting stat long stat.

12 Mo i bin hapen se taem we Jisas i bin talemaot ol toktok ia ful grup blong pipol ia i bin foldaon long graon; from oli bin tingbaot we oli bin profesae long medel blong olgeta se Kraes bae i soem hemwan long olgeta afta we hem i bin go antap long heven.

13 Mo i bin hapen se Lod i bin toktok long olgeta se:

14 Girap mo kam fored long mi, blong mekem se yufala i save putum ol han blong yufala long saed blong mi, mo tu blong mekem se yufala i save filim ol mak blong ol nil long ol han blong mi mo long ol leg blong mi, blong yufala i save gat save se mi mi God blong Isrel, mo God blong ful wol, mo oli bin kilim ded mi from ol sin blong wol.

15 Mo i bin hapen se grup blong ol pipol ia i bin go fored, mo oli bin putum ol han blong olgeta long saed blong hem, mo

oli bin filim ol mak blong ol nil long ol han blong hem mo long ol leg blong hem; mo samting ia oli bin mekem, oli go fored wan afta narafala wan kasem taem we evriwan i bin go fored, mo oli bin lukim wetem ol ae blong olgeta mo oli bin filim wetem ol han blong olgeta, mo oli bin save gud mo oli bin talemaot se i bin hem we ol profet i bin raetem, we bae i kam.

16 Mo taem we evriwan i bin go fored mo oli bin wites blong olgeta bakegen, oli bin singaot long sem taem, se:

17 Hosana! Blesem nem blong God we i Hae Olgeta! Mo oli bin foldaon long ol leg blong Jisas, mo oli bin wosipim hem.

18 Mo i bin hapen se hem i bin toktok long Nifae (from Nifae i bin stap wetem grup blong pipol ia) mo hem i bin givim oda long hem se hem i mas kam fored.

19 Mo Nifae i bin girap mo i bin go fored, mo i bin bodaon hemwan long fored blong Lod mo i bin kisim ol leg blong hem.

20 Mo Lod i bin givim oda long hem se hem i mas girap. Mo hem i bin girap mo i bin stanap long fored blong hem.

21 Mo Lod i bin talem long hem: Mi givim long yu paoa blong bae yu baptaesem ol pipol ia afta we mi gobak antap long heven.

22 Mo bakegen Lod i bin singaotem ol narafala wan, mo i bin talem long olgeta sem samting; mo hem i bin givim long olgeta paoa blong baptaes. Mo hem i bin talem long olgeta:

Long fasin ia bae yufala i mekem baptaes; mo bae i no gat eni rao long medel blong yufala.

23 I tru mi talem long yufala, se eni man we i sakem ol sin blong olgeta tru long ol toktok blong yufala, mo i wantem blong kasem baptaes long nem blong mi, long fasin ia bae yufala i baptaesem olgeta—Luk, bae yufala i go daon mo stanap long wota, mo long nem blong mi bae yufala i baptaesem olgeta.

24 Mo nao luk, hemia i ol toktok we bae yufala i talem, singaotem olgeta wetem nem blong olgeta, talem:

25 From mi gat raet we Jisas Kraes i bin givim long mi, mi baptaesem yu long nem blong Papa, mo long Pikinini, mo long Tabu Spirit. Amen.

26 Mo afta bae yufala i draonem olgeta i go andanit long wota, mo kam antap bakegen aot long wota.

27 Mo long fasin ia bae yufala i mekem baptaes long nem blong mi; from luk, i tru mi talem long yufala, se Papa, mo Pikinini, mo Tabu Spirit oli wan; mo mi mi stap long Papa, mo Papa long mi, mo Papa mo mi i wan.

28 Mo folem olsem we mi bin givim oda long yufala, olsem ia nao bae yufala i mekem baptaes. Mo bae i no gat eni rao long medel blong yufala, olsem we i bin gat bifo; mo tu bae i no gat ol smol rao long medel blong yufala long saed blong ol poen blong doktrin blong mi, olsem we i bin gat bifo.



29 From i tru, i tru mi talem long yufala, hem we i gat spirit blong rao i no blong mi, be hem i blong devel, we i papa blong rao, mo hem i tanem ol hat blong ol man blong rao wetem kros, wan wetem narawan.

30 Luk, hemia i no doktrin blong mi, blong tanem ol hat blong ol man wetem kros, wan agensem narawan; be hemia i doktrin blong mi, se ol samting olsem i mas stop.

31 Luk, i tru, i tru, mi talem long yufala, bae mi talemaot long yufala doktrin blong mi.

32 Mo hemia i doktrin blong mi, mo hem i doktrin we Papa i bin givim long mi; mo mi talemaot Papa, mo Papa i talemaot mi, mo Tabu Spirit i talemaot Papa mo mi; mo mi talemaot se Papa i givim oda long evri man, long evri ples, blong sakem sin mo biliv long mi.

33 Mo olgeta we i biliv long mi, mo i kasem baptaes, semfala man ia bae i sev; mo oli olgeta we bae oli kasem kingdom blong God.

34 Mo olgeta we i no biliv long mi, mo i no kasem baptaes, bae i kasem panis.

35 I tru, i tru, mi talem long yufala, se hemia i doktrin blong mi, mo mi talemaot we doktrin ia i blong Papa, mo olgeta we i biliv long mi hem i biliv long Papa tu; mo long hem bae Papa i talemaot mi, from bae hem i visitim hem wetem faea mo wetem Tabu Spirit.

36 Mo olsem ia nao bae Papa i talemaot mi, mo Tabu Spirit bae i talemaot long hem long

saed blong Papa mo mi, from we Papa, mo mi, mo Tabu Spirit i wan.

37 Mo bakegen mi talem long yufala, yufala i mas sakem sin, mo kam olsem wan smol pikinini, mo kasem baptaes long nem blong mi, o yufala, long eni wei, i no save kasem ol samting ia.

38 Mo bakegen mi talem long yufala, yufala i mas sakem sin, mo kasem baptaes long nem blong mi, mo kam olsem wan smol pikinini, o yufala, long eni wei, i no save kasem kingdom blong God.

39 I tru, i tru, mi talem long yufala, se hemia i doktrin blong mi, mo eni man we i bildimap long hemia, hem i bildimap long ston blong mi, mo ol get blong hel i no save winim agensem hem.

40 Mo eni man we bae i talemaot moa o smol bitim hemia, mo i stanemap samting ia olsem doktrin blong mi, semfala man ia i kam long nogud fasin, mo hem i no bildimap long ston blong mi, be hem i bildim long wan fandesen blong sanbij, mo ol get blong hel i stap open blong tekem olgeta olsem, long taem we ol wota i kam antap bigwan mo ol win i blu agensem olgeta.

41 Taswe go aot long ol pipol ia, mo talemaot ol toktok we mi bin talemaot, go kasem ol en blong wol.

---

## JAPTA 12

---

*Jisas i singaot mo i givim raet long*

*ol Twelef—Hem i givim long ol man blong Nifae wan toktok we i klosap semak olsem Toktok long Hil—Hem i tokbaot ol Blesing—Ol tijing blong hem i kam fastaem mo i moa impoten ova long loa blong Moses—Ol man i kasem oda blong stap stret gud olsem we hem mo Papa blong hem i stret gud—Luk long Matiu 5. Raonabaot 34 yia afta Kraes i bon.*

Mo i bin hapen se taem we Jisas i bin talem ol toktok ia long Nifae, mo long olgeta we hem i bin singaotem olgeta, (nao namba blong olgeta we hem i bin singaotem, mo oli bin kasem paoa mo raet blong mekem baptaes, i bin twelef) mo luk, hem i bin stretem han blong hem i go long grup blong pipol ia, mo i bin talem long olgeta, se: Bae yufala i kasem blesing sapos yufala i folem gud long ol toktok blong ol twelef we mi bin jusum aot long yufala blong givhan long yufala, mo blong kam ol wokman blong yufala; mo long olgeta mi bin givim paoa blong oli save baptaesem yufala wetem wota; mo afta we yufala i kasem baptaes wetem wota, luk, bae mi baptaesem yufala wetem faea mo wetem Tabu Spirit; taswe bae yufala i kasem blesing sapos yufala i biliv long mi mo kasem baptaes, afta we yufala i bin lukim mi mo save se mi stap.

2 Mo bakegen, bae olgeta we oli biliv long ol toktok blong yufala, bae oli kasem moa blesing from we bae yufala i

testifae se yufala i bin lukim mi, mo we yufala i save se mi stap. Yes, olgeta we bae oli biliv long ol toktok blong yufala bae oli kasem blesing, mo kam daon long sore go kasem daon olgeta mo kasem baptaes, from bae i visitim olgeta wetem faea mo wetem Tabu Spirit, mo bae mi fogivim ol sin blong olgeta.

3 Yes, olgeta we i pua long spirit we i kam long mi, bae oli kasem blesing, from kingdom blong heven i blong olgeta.

4 Mo bakegen, olgeta evriwan we i krae bae i kasem blesing from Lod bae i leftemap tingting blong olgeta.

5 Mo olgeta we i no stap flas bae i kasem blesing from bae oli kasem wol ia.

6 Mo olgeta evriwan we i hanggri mo tosta from stret fasin bae oli kasem blesing from we bae oli fulap long Tabu Spirit.

7 Mo olgeta we i gat sore long man bae i kasem blesing from bae oli kasem sore.

8 Mo olgeta evriwan we hat blong olgeta i klin bae i kasem blesing, from bae oli luk God.

9 Mo olgeta evriwan we i mekem pis bae i kasem blesing, from bae oli singaotem olgeta ol pikinini blong God.

10 Mo olgeta evriwan we i kasem hadtaem from nem blong mi bae oli kasem blesing, from kingdom blong heven i blong olgeta.

11 Mo yufala i kasem blesing long taem we bae ol man i talem ol rabis samting long yufala mo givim hadtaem, mo

bae oli talem evri kaen nogud samting agensem yufala we i no tru, from nem blong mi;

12 From bae yufala i gat big-fala hapi mo stap glad tumas, from presen blong yufala long heven bae i bigwan; from long sem fasin oli bin givim hadtaem long ol profet we i bin stap bifo long yufala.

13 I tru, i tru, mi talem long yufala, mi givim long yufala blong kam sol blong wol; be sapos sol bae i lusum tes blong hem olsem wanem nao bae wol i gat sol? Sol bae i blong nating stat long taem ia, be blong sakem hem aot mo blong ol leg blong ol man i purumbut long hem.

14 I tru, i tru, mi talem long yufala, mi givim long yufala blong stap olsem laet blong ol pipol ia. Wan bigtaon we i stap long wan hil i no save haed.

15 Luk, ol man oli stap laetem wan kandel mo putum andanit long wan basket? No, be long wan ples blong kandel, mo i givim laet long evriwan we i stap insaed long haos;

16 Taswe letem laet blong yufala i saen olsem ia long fored blong ol pipol ia, blong oli save lukim ol gudfala wok blong yufala mo leftemap nem blong Papa blong yufala we i stap long heven.

17 No ting se mi bin kam blong smasem gud loa o ol profet. Mi no bin kam blong smasem gud be blong mekem i hapen;

18 From i tru mi talem long yufala, wan smol haf o wan leta i no bin pas i gowe aot long

loa, be long mi loa i bin hapen fulwan.

19 Mo luk, mi bin givim yufala loa mo ol komanmen blong Papa blong mi, se yufala i mas biliv long mi, mo se yufala i mas sakem ol sin blong yufala, mo kam long mi wetem wan hat we i fulap wetem sore mo wan spirit we i wantem blong sakem sin. Luk, yufala i gat ol komanmen long fored blong yufala mo loa i hapen.

20 Taswe kam long mi mo stap sev; from i tru mi talem long yufala, se sapos yufala i no holem ol komanmen blong mi, we mi bin givim long yufala long taem ia, bae yufala long eni wei i no save go insaed long kingdom blong heven.

21 Yufala i bin harem we ol olfala blong bifo i bin talem, mo tu oli bin raetem ol samting ia long fored blong yufala, se yu no mas kilim man i ded, mo eni man we bae i kilim man i ded bae hem i stap long denja blong jajmen blong God;

22 Be mi talem long yufala, se eni man we i kros long brata blong hem bae hem i stap long denja blong jajmen blong hem. Mo eni man we bae i talem long brata blong hem Raka, bae hem i stap long denja blong kaonsel; mo eni man we bae i talem, Yu krangke, bae i stap long denja blong faea blong hel.

23 Taswe, sapos bae yu kam long mi, o bae yu wantem blong kam long mi, mo tingbaot se brata blong yu i bin gat samting agensem yu—

24 Go long brata blong yu, mo

fastaem yu mas mekem pis wetem brata blong yu, mo afta kam long mi wetem ful tingting blong hat, mo bae mi akseptem yu.

25 Agri wetem enemi blong yu kwiktaem taem we yu stap long rod wetem hem, from fraet se long eni taem bae hem i tekem yu, mo i sakem yu i go insaed long Prisen.

26 I tru, i tru, mi talem long yu, bae yu long eni wei i no kamaot long ples ia kasem taem we yu bin pem ful sinaen. Mo taem we yu stap long prisem yu save pem wan sinaen? I tru, i tru, mi talem long yu, No.

27 Luk, ol olfala blong bifo i bin raetem samting ia, se yu no mas mekem adaltri;

28 Be mi talem long yu, se eni man we i stap lukluk long wan woman, blong wantem hem tumas, i bin mekem adaltri finis long hat blong hem.

29 Luk, mi givim long yu wan komanmen, se yu no mas letem eni long ol samting ia blong go insaed long hat blong yu;

30 From i moa gud se yu tanem baksaed blong yu bakegen long ol samting ia, tru long samting ia bae yu tekem kros blong yu, bitim se bae oli sakem yu i go insaed long hel.

31 Oli bin raetem, se eni man we i sakemaot woman blong hem, bae hem i mas givim long hem wan leta blong divos.

32 I tru, i tru, mi talem long yufala, se eni man we i sakemaot woman blong hem, sapos i no from fasin blong slip wetem man o woman aot long

mared, i mekem hem blong mekem adaltri; mo eni man we bae i maredem hemia we i divos, hem i mekem adaltri.

33 Mo bakegen oli bin raetem samting ia, yu no mas mekem giaman promes, be yu mas holem long Lod ol promes blong yu.

34 Be i tru, i tru, mi talem long yu, no singaotem nem blong eni samting blong mekem promes; o blong heven from hem i jea blong God;

35 O blong wol, from i ples blong hem we i putum leg blong hem;

36 Mo tu yu no mas singaotem hed blong yu blong mekem promes, from we yu no save mekem wan hea i kam blak o waet;

37 Be letem toktok blong yu i stap olsem Yes, yes; No, no; from eni samting we i kam we i moa long hemia i nogud.

38 Mo luk, oli bin raetem samting ia, wan ae blong wan ae, mo wan tut blong wan tut;

39 Be mi talem long yufala, se bae yufala i no mas faet bak agensem nogud fasin, be eni man we i slapem saed blong fes blong yu long raet saed, tanem i go long hem narasaed tu;

40 Mo sapos eni man bae i tekem yu i go long kot mo i tekemaot klos blong yu, letem longfala klos blong yu long hem tu;

41 Mo eni man we bae i fosem yu blong wokbaot wan mael, go wetem hem tu taem.

42 Givim long hem we i askem long yu, mo yu no mas tanem

yu long hem we bae i wantem yu blong letem wan samting long hem.

43 Mo luk oli bin raetem samting ia tu se, yu mas lavem ol man we i stap raonabaot long yu mo no laekem enemi blong yu.

44 Be luk mi talem long yu, lavem ol enemi blong yu, blessem olgeta we i stap panisim yu, mekem gudfala fasin long olgeta we i no laekem yu, mo prea from olgeta we i stap mekem nogud long yu mo i givim hadtaem long yu.

45 Blong mekem se yu i save stap olsem ol pikinini blong Papa blong yu we i stap long heven; from hem i mekem san blong hem i kam antap long olgeta we i nogud mo long olgeta we i gud.

46 Taswe ol samting ia blong ol taem blong bifo, we i bin stap andanit long loa, long mi oli hapen evriwan.

47 Ol olfala samting i stop nao, mo evri samting i kam niu.

48 Taswe mi wantem se yufala i kam stretgud semak olsem mi, o Papa blong yufala we i stap long heven we i stretgud.

---

### JAPTA 13

---

*Jisas i tijim ol man blong Nifae Prea blong Lod—Oli mas putum ol rij samting long heven—Ol Twelef long ministri blong olgeta, oli kasem oda blong no tingbaot ol samting blong wol—Luk long Matiu 6. Raonabaot 34 yia afta Kraes i bon.*

I TRU, i tru, mi talem se mi wantem se yufala i mas givhan long ol puaman, be lukaot se yu no givhan long fored blong ol man blong mekem se oli lukim yu; sapos no bae yu gat no eni pei long Papa blong yu we i stap long heven.

2 Taswe, taem we yufala i givhan no blu long wan bubu long fored blong yufala, olsem we ol man we oli gat tufes i mekem long ol haos blong prea mo long ol big rod, blong mekem se oli save gat ol ona blong ol man. I tru mi talem long yufala, oli gat pei blong olgeta.

3 Be taem we yufala i stap givhan no letem lef han blong yufala i save wanem raet han blong yufala i stap mekem;

4 Blong mekem se samting we yufala i givim i save stap long sikret; mo Papa blong yufala we i luk long sikret, hemwan bae i givim pei long yufala long fes blong ol man.

5 Mo taem we yu prea yu no mas mekem olsem ol man we i gat tufes, from oli laekem blong prea, taem we oli stanap long haos blong prea mo long ol kona blong ol big rod, blong mekem se ol man i save luk olgeta. I tru mi talem long yu, oli gat pei blong olgeta.

6 Be yu, taem we yu prea, go insaed long rum blong yu, mo afta we yu bin sareme do blong yu, prea long Papa blong yu we i stap long sikret, mo Papa blong yu we i luk long sikret, bae i givim pei blong yu long fes blong ol man.

7 Be taem we yufala i prea,

no talem sem samting oltaem blong nating, olsem olgeta we i no gat respek long tru God, from oli ting se bae God blong olgeta i save harem olgeta from ol plante toktok blong olgeta.

8 Yufala i no mas stap olsem olgeta, from Papa blong yufala i save ol samting we yufala i nidim bifo yufala i askem hem.

9 Taswe yufala i mas prea long fasin ia: Papa blong mifala we i stap long heven, nem blong yu i tabu.

10 Ol samting we yu yu wantem i mas hapen long wol olsem we i hapen long heven.

11 Mo fogivim mifala long ol sin blong mifala, olsem we mifala i stap fogivim ol man we i mekem i nogud long mifala.

12 Mo no lidim mifala i go long temtesen, be mekem mifala i go fri long nogud samting.

13 From kingdom, mo paoa, mo glori, i blong yu blong oltaem. Amen.

14 From, sapos yufala i fogivim ol man long ol rong blong olgeta Papa blong yufala long heven bae i fogivim yufala tu.

15 Be sapos yufala i no fogivim ol man long ol rong blong olgeta, bae Papa blong yufala bae i no fogivim ol rong blong yufala.

16 Antap long samting ia, taem we yufala i livim kakae no stap olsem ol man we i gat tufes, we fes blong olgeta i kam nogud, from oli stap mekem ol fes blong olgeta i kam nogud bong mekem se ol man i save luk se oli stap livim kakae. I tru mi talem long yufala, oli gat pei blong olgeta.

17 Be yu, taem we yu livim kakae, putum oel long hed blong yu, mo wasem fes blong yu;

18 Blong mekem se ol man i no luk se yu stap livim kakae, be long Papa blong yu, we i stap long sikret; mo Papa blong yu, we i luk long sikret, bae i save givim pei blong yu long fes blong ol man.

19 No hipimap blong yufala bakegen ol rij samting long graon ia, ples we ol bataflae mo rosta i smasem gud, mo ol man blong stil i brekem haos blong go insaed mo stil;

20 Be hipimap blong yufala bakegen ol rij samting long heven, ples we bataflae mo rosta i no smasem gud, mo ples we ol stil man i no brekem haos blong go insaed o stil.

21 From ples we rij samting blong yufala i stap long hem, long ples ia hat blong yufala bae i stap tu.

22 Laet blong bodi hem i ae; sapos, taswe, ae blong yu i stap wan, ful bodi blong yu bae i fulap wetem laet.

23 Be sapos ae blong yu i nogud, ful bodi blong yu bae i fulap wetem tudak. Sapos, taswe, laet we i stap long yu i stap tudak, hamas nao bigfala tudak ia!

24 No man i save wok blong tu masta; from bae hem i no laekem wan mo laekem narawan, o bae hem i holem taet long wan mo lukluk nogud long narawan. Yufala i no save wok blong God mo blong Mammon.

25 Mo nao i bin hapen se taem we Jisas i bin talemaot ol toktok

ia, hem i bin lukluk long ol twelef we hem i bin jusum, mo i bin talem long olgeta: Tingbaot ol toktok we mi bin talemaot. From luk, yufala i olgeta we mi bin jusum blong givhan long pipol ia. Taswe mi talem long yufala, no tingbaot laef blong yufala, wanem bae yufala i kakae, o wanem bae yufala i dring; mo tu blong bodi blong yufala, wanem we bae yufala i putum. Laef i nomo bitim mit, mo bodi bitim klos?

26 Luk ol pijin blong skae, from oli no planem sid, mo tu oli no go karem kakae i kam, o putum gud kakae i stap long haos, be Papa blong yufala long heven i fidim olgeta. Yufala i no gud moa bitim olgeta?

27 Huia long yufala i save gru i kam moa antap wetem wan tingting?

28 Mo from wanem yufala i tingting from ol klos? Tingbaot ol lili flaoa blong fil olsem wanem we oli stap gru; oli no wok, mo tu oli no somap ol klos blong olgeta;

29 Be stil mi talem long yufala, se king Solomon tu, long ful ona blong hem, i no bin gat klos we i naes olsem wan long olgeta ia.

30 From samting ia, sapos God i flasem gras blong fil, we tede i stap mo tumora oli sakem long oven, olsem ia bae hem i givim klos long yufala, sapos yufala i no blong smol fet.

31 Taswe no tingbaot, se: Bae yumi kakae wanem? o, Bae yumi dring wanem? o, Wetem wanem klos bae yumi dresap?

32 From Papa blong yufala

long heven i save se yufala i nidim evri samting ia.

33 Be lukaotem fastaem kingdom blong God mo stret fasin blong hem, mo evri samting ia bae oli ademap long yufala.

34 Taswe no tingbaot tumora, from tumora bae i tingbaot ol samting blong hemwan. Ol trabol blong wan dei hem i naf finis blong dei ia.

---

### JAPTA 14

---

*Jisas i givim oda: No jajem narafala man; askem long God; lukaot long ol giaman profet—Hem i promesem fasin blong sevem man long olgeta we i mekem tingting blong Papa—Luk long Matiu 7. Raonabaot 34 yia afta Kraes i bon.*

Mo nao i bin hapen se taem we Jisas i bin talemaot ol toktok ia hem i bin tanem hem bakegen i go long grup blong pipol ia, mo i bin openem maot blong hem long olgeta bakegen, se: I tru, i tru, mi talem long yufala, No jajem narafala man, blong mekem se Lod i no jajem yufala.

2 From wetem sem jajmen we yufala i jajem man, bae Lod i jajem yufala; mo wetem mak we yufala i givim, hemia i mak we Lod bae i givim long yufala bakegen.

3 Mo from wanem yu stap luk smol doti we i stap long ae blong brata blong yu, be yu no tingbaot bigfala wud we i stap long ae blong yu?

4 O hao nao bae yu talem long brata blong yu: Letem mi pulumaot smol doti we i stap

long ae blong yu—mo luk, i gat wan bigfala wud i stap long ae blong yu?

5 Yu yu man blong tufes, faetaem sakem bigfala wud aot long ae blong yu; mo afta bae yu lukluk klia blong sakem smol doti aot long ae blong brata blong yu.

6 No givim samting we i tabu long ol dog, mo tu no sakem ol perel blong yu long fored blong ol pig, from fraet se bae oli purumbut olgeta andanit long ol leg blong olgeta, mo oli tanemraon bakegen mo smasem gud yu.

7 Askem, mo Lod bae i givim long yu; lukaotem, mo bae yu faenem; noknok, mo bae i open long yu.

8 From evriwan we i askem, i kasem; mo hem we i lukaotem, i faenem; mo long hem we i kil-kilim doa, bae i mas open.

9 O i gat wanem man long yufala, we, sapos pikinini blong hem i askem bred, bae i givim hem wan ston?

10 O sapos hem i askem wan fis, bae hem i givim hem wan snek?

11 We sapos yufala, we i no-gud, save olsem wanem blong givim ol gudfala presen long ol pikinini blong yufala, hamas moa bae Papa blong yufala we i stap long heven, i givim ol gudfala samting long olgeta we i askem hem?

12 Taswe, evri samting we yufala i wantem ol man blong mekem long yufala, mekem semak olsem long olgeta, from hemia i loa mo ol profet.

13 Yufala i go insaed long stret get; from get ia i bigwan, mo rod ia i bigwan tumas, we i lidim i go blong lus, mo plante bae i gat we i go insaed long ples ia;

14 Be stret i get mo rod i smol, we i lidim i go long laef, mo smol nomo i gat we i faenem ples ia.

15 Lukaot gud long ol giaman profet, we i kam long yufala long ol klos blong sipsip, be long insaed oli ol wael dog stret.

16 Bae yufala i save olgeta tru long ol fruit blong olgeta. Ol man i tekem ol fruit we i swit long rabis rop we i gat ol nil blong plan, o ol gudfala fruit aot long ol nilplan?

17 Long sem wei evri gudfala tri i karem ol gudfala fruit; be wan rabis tri i karem ol rabis fruit.

18 Wan gudfala tri i no save karem ol rabis fruit, mo tu wan rabis tri i no save karem ol gudfala fruit.

19 Evri tri we i no karem gudfala fruit, oli katem daon, mo i sakem i go long faea.

20 From samting ia, bae ol fruit blong olgeta bae yufala i save olgeta.

21 I no evriwan we i talem long mi, Lod, Lod, bae i go insaed long kingdom blong heven; be hem we i mekem samting we Papa blong mi we i stap long heven i wantem.

22 Plante bae i talem long mi long dei ia: Lod, Lod, mifala i no bin profesae long nem blong yu, mo long nem blong yu mifala i bin sakemaot ol devel,



mo long nem blong yu mifala i bin mekem ol gudfala wok?

23 Mo afta bae mi talem long olgeta: Mi neva bin save yufala; go aot long mi, yufala we i mekem ol rabis fasin.

24 Taswe nao, eni man we i harem ol toktok ia blong mi mo i mekem olgeta, bae mi skelem hem olsem wan waes man we i bin bildim haos blong hem antap long wan ston—

25 Mo ren i bin foldaon, mo ol wota i bin ron bigwan, mo ol win i bin blu, mo i bin kilim haos ia; mo i no bin foldaon, from i bin stanap antap long wan ston.

26 Mo evriwan we i harem ol toktok ia blong mi mo i no mekem olgeta bae mi skelem olsem wan man we i krangeke we i bin bildim haos blong hem antap long sanbij—

27 Mo ol ren i bin foldaon, mo ol wota i bin ron bigwan, mo ol win i blu, mo i bin kilim haos ia; mo hem i bin foldaon, mo foldaon blong hem i bin bigwan.

---

### JAPTA 15

---

*Jisas i talem se loa blong Moses i hapen tru long hem—Ol man blong Nifae oli ol narafala sipsip we hem i bin tokbaot long Jerusalem—From nogud fasin, ol pipol blong Lod long Jerusalem i no save long saed blong ol sipsip blong Isrel we i bin seraot olbaot. Raonabaot 34 yia afta Kraes i bon.*

Mo nao i bin hapen se taem we Jisas i bin endem ol toktok ia,

hem i bin sakem ol ae blong hem raonabaot long grup blong pipol ia, mo i bin talem long olgeta: Luk, yufala i bin harem ol samting we mi bin tijim bifo mi bin go antap long Papa blong mi; taswe, eni man we i tingbaot ol toktok ia blong mi mo mekem olgeta, hem bae mi leftemap long las dei.

2 Mo i bin hapen se taem we Jisas i bin talem ol toktok ia, hem i bin luk se i bin gat samfala long olgeta we i bin sapraes tumas, mo oli bin tingbaot wanem hem i wantem talem long saed blong loa blong Moses; from oli no bin andastanem toktok ia se evri olfala samting i bin pas i gowe, mo se evri samting i bin kam niu.

3 Mo hem i bin talem long olgeta: No sapraes we mi bin talem long yufala se ol olfala samting i bin pas i gowe, mo se evri samting i bin kam niu.

4 Luk, mi talem long yufala se loa i hapen we i bin givim long Moses.

5 Luk, mi mi hem we i bin givim loa ia, mo mi mi hem we i bin mekem kavenan wetem pipol blong mi Isrel; taswe, loa long mi i hapen, from mi bin kam blong mekem loa ia i hapen; taswe hem i gat wan en.

6 Luk, mi no smasem gud ol profet, from olgeta we oli no bin hapen long mi, i tru mi talem long yufala, bae evriwan i hapen.

7 Mo from mi bin talem long yufala se ol olfala samting i bin pas i gowe, mi no smasem gud ol samting we oli bin talem

long saed blong ol samting we bae i kam.

8 From luk, kavenan we mi bin mekem wetem ol pipol blong mi i no hapen evriwan; be loa we mi bin givim long Moses i gat wan en long mi.

9 Luk, mi mi loa, mo laet. Luk-luk long mi, mo stap strong kasem en, mo bae yufala i laef, from long hem we i stap strong kasem en bae mi givim laef we i no save finis.

10 Luk, mi bin givim long yufala ol komanmen; taswe holem ol komanmen blong mi. Mo hemia i loa mo ol profet, from i tru we oli bin testifae long saed blong mi.

11 Mo nao i bin hapen se taem we Jisas i bin talem ol toktok ia, hem i bin talem long ol twelef we hem i bin jusum:

12 Yufala i ol disaepol blong mi; mo yufala i wan laet long pipol ia, we i wan smol haf blong laen blong Josef.

13 Mo luk, hemia i graon we i blong yufala we i kam long ol papa, mo Papa i bin givim graon ia long yufala.

14 Mo no long eni taem Papa i bin givim oda long mi se mi mas talem samting ia long ol brata blong yufala long Jerusalem.

15 Mo tu no long eni taem Papa i bin givim oda long mi se mi mas talem long olgeta long saed blong ol narafala traeb blong laen blong Isrel we Papa i bin lidim i gowe aot long graon.

16 Hemia Papa i bin givim oda long mi, se mi mas talem long olgeta:

17 Se ol narafala sipsip mi mi gat we oli no blong yad ia; olgeta tu mi mas karem i kam, mo bae oli harem voes blong mi; mo bae i gat wan yad, mo wan man blong lukaotem ol sipsip.

18 Mo nao, from ol stronghed mo no bilif, oli no bin andastanem toktok blong mi; taswe Papa i bin givim oda long mi se mi no mas talem wan samting moa long saed blong samting ia long olgeta.

19 Be, i tru, mi talem long yufala, se Papa i bin givim oda long mi, mo mi talem samting ia long yufala, we yufala i bin seraot aot long olgeta from nogud fasin blong olgeta; taswe hem i from nogud fasin blong olgeta, mekem se oli no save long saed blong yufala.

20 Mo i tru, mi talem long yufala bakegen se ol narafala traeb Papa i bin seraotem aot long olgeta; mo hemia i from nogud fasin blong olgeta mekem se oli no save long saed blong olgeta.

21 Mo i tru mi talem long yufala, se yufala i olgeta we mi bin talem: Ol narafala sipsip mi mi gat we oli no blong yad ia; olgeta tu mi mas karem i kam, mo bae oli harem voes blong mi; mo bae i gat wan yad, mo wan man blong lukaotem ol sipsip.

22 Mo oli no bin andastanem mi, from oli bin ting se i bin ol Jentael; from oli no andastanem se ol Jentael bae i jenisim laef tru long ol prijing blong olgeta.

23 Mo oli no bin andastanem

mi se mi bin talem se bae oli harem voes blong mi; mo oli no bin andstanem mi se ol Jentael bae i no long eni taem harem voes blong mi—we bae mi no soemaot miwan long olgeta sapos i no tru long Tabu Spirit.

24 Be luk, yufala i bin tugeta harem voes blong mi, mo i bin lukim mi; mo yufala i ol sipsip blong mi, mo mi kaontem yufala wetem olgeta we Papa i bin givim long mi.

---

### JAPTA 16

---

*Jisas bae i visitim ol narafala, long ol sipsip blong Isrel we i bin lus—Long ol las dei gospel bae i go long ol Jentael mo afta long laen blong Isrel—Ol pipol blong Lod bae i luk wetem ae blong olgeta taem we hem i karembak Saeon. Raonabaot 34 yia afta Kraes i bon.*

Mo i tru, i tru, mi talem long yufala se mi mi gat ol narafala sipsip, we oli no blong graon ia, o no blong graon blong Jerusalem, o long eni pat long graon ia we i stap raonabaot, we mi bin go long hem blong givhan.

2 From olgeta we mi stap tokbaot, oli olgeta we long taem ia i no bin harem voes blong mi; o mi no bin soemaot miwan long olgeta long eni taem.

3 Be mi bin kasem wan oda long Papa se mi mas go long olgeta, mo se bae oli harem voes blong mi, mo bae mi kaontem olgeta wetem ol sipsip blong mi, blong mekem se oli save stap long wan yad mo wan

man blong lukaotem ol sipsip; taswe mi mi go blong soemaot miwan long olgeta.

4 Mo mi givim oda long yufala se yufala i mas raetem ol toktok ia afta we mi go, blong mekem se sapos ol pipol blong mi long Jerusalem, olgeta we i bin lukim mi mo i bin stap wetem mi long ministri blong mi, i no askem Papa long nem blong mi, blong oli save kasem wan save long saed blong yufala tru long Tabu Spirit, mo tu long saed blong ol narafala traeb we oli no save long saed blong olgeta, blong mekem se ol toktok ia we bae yufala i raetem bae oli stap gud mo bae oli kamaot long ol Jentael, blong mekem se tru long fulwan blong ol Jentael, ol man blong ol laen blong olgeta, we bae oli seraot olbaot long fes blong wol from oli no gat bilif, i save kam insaed, o blong oli save kam blong save long saed blong mi Ridima blong olgeta.

5 Mo afta bae mi karem olgeta i kam long ol fo pat blong wol; mo afta bae mi mekem kavenan ia we Papa i bin mekem wetem evri pipol blong laen blong Isrel i hapen.

6 Mo ol Jentael i kasem blesing from bilif blong olgeta long mi, tru mo long Tabu Spirit, we i witnesem long olgeta long saed blong mi mo long saed blong Papa.

7 Luk, from bilif blong olgeta long mi, Papa i talem, mo from we yufala i no biliv, O laen blong Isrel, long ol lata dei bae trutok i go long ol Jentael, blong

mekem se fulwan blong ol samting ia bae i go long olgeta.

8 Be sore tumas, Papa i talem, long ol Jentael we i no biliv — from i nomata se oli bin kam long fes blong graon ia, mo oli bin seraotem ol pipol blong mi we oli blong laen blong Isrel; mo ol pipol blong mi we oli blong laen blong Isrel oli bin sakem olgeta aot long olgeta, mo oli bin purumbut long olgeta andanit long ol leg blong olgeta;

9 Mo from ol sore blong Papa long ol Jentael, mo tu ol jajmen blong Papa long ol pipol blong mi we oli blong laen blong Isrel, i tru, i tru, mi talem long yufala, se afta evri samting ia, mo mi bin mekem se ol pipol blong mi, we oli blong laen blong Isrel, blong oli harem nogud, mo blong gat ol hadtaem, mo ol Jentael i kilim ded olgeta, mo oli sakem olgeta aot long olgeta, mo blong oli no laekem olgeta, mo blong kam olsem wan wesil mo wan toktok we plante man i save long medel blong olgeta—

10 Mo olsem ia nao Papa i givim oda se mi mas talem long yufala: Long dei ia taem we ol Jentael bae i sin agensem gospel blong mi, mo bae i sakemaot fulwan blong gospel blong mi, mo bae oli leftemap olgeta long ol hae tingting blong ol hat blong olgeta antap long evri kantri, mo antap long evri pipol blong ful wol, mo bae i kam fulap wetem evri kaen giaman, mo blong ol trik, mo blong ol fasin blong smasem gud man,

mo evri kaen fasin blong tufes, mo ol fasin blong kilim ded man, mo ol fasin blong giaman pris, mo blong ol fasin blong slip olbaot, mo blong ol sikret rabis fasin; mo sapos oli mekem ol samting ia, mo bae oli sakemaot fulwan blong gospel blong mi, luk, Papa i talem, Bae mi tekemaot fulwan blong gospel blong mi aot long olgeta.

11 Mo afta bae mi tingbaot kavenan blong mi we mi bin mekem long ol pipol blong mi, O laen blong Isrel, mo bae mi karem gospel blong mi i go long olgeta.

12 Mo bae mi soem long yu, O laen blong Isrel, se ol Jentael bae oli no gat paoa ova long yu, be bae mi tingbaot kavenan blong mi long yu, O laen blong Isrel, mo bae yu kam blong save long saed blong gospel blong mi we i fulwan.

13 Be sapos ol Jentael bae i sakem sin mo kambak long mi, Papa i talem, Luk bae oli kaotem olgeta wetem ol pipol blong mi, O laen blong Isrel.

14 Mo bae mi no letem ol pipol blong mi, we oli blong laen blong Isrel, blong go tru long medel blong olgeta mo purumbut antap long olgeta, Papa i talem.

15 Be sapos oli no tanem olgeta i kam long mi, mo lisen long voes blong mi, bae mi letem olgeta, yes, bae mi letem ol pipol blong mi, O laen blong Isrel, blong bae oli go tru long medel blong olgeta, mo bae oli purumbut long olgeta, mo bae oli stap olsem sol we i bin

lusum tes blong hem, we stat long taem ia i gud blong nating be blong sakemaot, mo blong ol pipol blong mi i purumbut antap long hem, O laen blong Isrel.

16 I tru, i tru, mi talem long yufala, olsem ia nao Papa i bin givim oda long mi—se mi mas givim long ol pipol ia graon ia blong graon blong olgeta we i kam long ol papa.

17 Mo afta ol toktok blong profet Aesea bae i hapen, we i talem:

18 Ol wajman bae i leftemap voes blong olgeta; long wan voes bae oli singsing, from bae oli luk wetem ae blong olgeta taem we Lod i karembak Saeon.

19 Girap wetem glad, singsing tugeta, yufala ol emti ples blong Jerusalem; from Lod i bin leftemap tingting blong ol pipol blong hem, hem i bin pemaot Jerusalem.

20 Lod i bin soemaot tabu han blong hem long ol ae blong evri kantri; mo evri en blong wol bae i luk fasin blong sevem man blong God.

---

### JAPTA 17

---

*Jisas i talem long ol pipol blong tingting hevi long ol toktok blong hem mo prea blong andastanem—Hem i mekem ol sik blong olgeta i kam oraet—Hem i prea from ol pipol, hem i yusum lanwis we oli no save raetem—Ol enjel i givhan long, mo faea i raonem, ol smol wan blong olgeta. Raonabaot 34 yia afta Kraes i bon.*

LUK, nao i bin hapen se taem we Jisas i bin talem ol toktok ia hem i bin lukluk raonabaot bakegen long grup blong pipol ia, mo hem i bin talem long olgeta: Luk, taem blong mi i kam klosap.

2 Mi luk se yufala i slak, i mekem se yufala i no save andastanem evri toktok blong mi we Papa i bin givim oda long mi blong talemaot long yufala long taem ia.

3 Taswe, yufala i gobak long haos blong yufala, mo tingting hevi long ol samting we mi bin talem, mo askem long Papa, long nem blong mi, blong yufala i save andastanem, mo mekem rere ol tingting blong yufala blong tumora, mo mi kam long yufala bakegen.

4 Be nao mi go long Papa, mo tu blong soemaot miwan long ol traeb blong Isrel we i lus, from oli no lus long Papa, from hem i save long wea ples hem i bin tekem olgeta.

5 Mo i bin hapen se taem we Jisas i bin toktok olsem ia nao, hem i bin sakem ol ae blong hem raonabaot long grup blong pipol ia, mo i bin luk we oli stap krae, mo i bin luk stret long hem olsem se bae oli askem hem blong stap wetem olgeta smol taem moa.

6 Mo hem i bin talem long olgeta: Luk, ol insaed blong mi i fulap wetem sore long yufala.

7 Yufala i gat eniwan we i sik long medel blong yufala? Karem olgeta i kam long ples ia. Yufala i gat eniwan we bodi blong olgeta i nogud, o oli blaen,

o we leg blong olgeta i nogud, o we i handikap, o we i gat leprosi, o we haf bodi blong olgeta i ded, o we sorae blong olgeta i fas, o we oli gat hadtaem long eni fasin? Karem olgeta i kam long ples ia mo bae mi mekem olgeta i oraet, from mi mi gat sore long yufala; ol insaed blong mi i fulap wetem sore.

8 From mi luk se yufala i wantem se bae mi soemaot long yufala wanem mi bin mekem long ol brata blong yufala long Jerusalem, from mi luk se fet blong yufala i inaf blong mi mas mekem yufala i oraet.

9 Mo i bin hapen se taem we hem i bin toktok olsem ia nao, evri grup blong pipol ia long semtaem i bin go fored wetem ol sik blong olgeta mo olgeta we i gat hadtaem, mo blong olgeta we bodi i nogud, mo blong olgeta we i blaen, mo wetem blong olgeta we oli no save toktok, mo wetem evriwan we i bin gat hadtaem long eni fasin; mo hem i bin mekem olgeta evriwan i kam oraet taem we oli bin karem olgeta i go fored long hem.

10 Mo olgeta evriwan, olgeta we i bin kam oraet tugeta wetem olgeta we i bin stap gud nomo, i bin bodaon long ol leg blong hem, mo oli bin wosipim hem; mo olgeta evriwan we i save kam i nomata long grup blong pipol ia oli bin kisim ol leg blong hem, inaf blong mekem se oli bin wasem ol leg blong hem wetem ol wota blong ae blong olgeta.

11 Mo i bin hapen se hem i

bin givim oda se oli mas karem ol smol pikinini blong olgeta i kam.

12 Mekem se oli bin karem ol smol pikinini blong olgeta mo oli bin putum olgeta i go daon long graon raonabaot long hem, mo Jisas i bin stanap long medel blong olgeta; mo grup blong pipol ia i bin muv bak kasem taem we oli bin karem olgeta evriwan i kam long hem.

13 Mo i bin hapen se taem we oli bin karem evriwan i kam, mo Jisas i bin stanap long medel blong olgeta, hem i bin givim oda long grup blong pipol ia se oli mas nildaon long graon.

14 Mo i bin hapen se taem we oli bin nildaon long graon, Jisas i bin harem nogud long hemwan, mo i bin talem: Papa, mi mi harem nogud from ol nogud fasin blong ol pipol blong laen blong Isrel.

15 Mo taem we hem i bin talem ol toktok ia, hem hemwan i bin nildaon tu long graon, mo luk hem i bin prea long Papa, mo ol samting we hem i bin prea oli no save raetem, mo grup blong pipol ia i bin witnes we oli bin harem hem.

16 Mo long fasin ia oli witnes: Ae i neva bin luk, o neva sorae i bin harem, bifo, ol samting we i bigfala mo gudfala olsem we mifala i bin lukim mo i bin harem Jisas i talemaot long Papa;

17 Mo i no gat wan tang i save talem, mo tu i no gat eni man i save raetem, mo tu ol hat blong ol man i no save tingbaot ol bigfala mo gudfala samting

olsem we mifala i bin lukim mo bin harem Jisas i talemaot; mo i no gat man i save tingbaot glad we i bin fulumap ol sol blong mifala long taem we mifala i bin harem hem i prea from mifala long Papa.

18 Mo i bin hapen se taem we Jisas i bin mekem wan en blong prea long Papa, hem i bin girap; be glad blong grup blong pipol ia i bin bigwan tumas i mekem se oli no bin gat paoa nating.

19 Mo i bin hapen se Jisas i bin toktok long olgeta, mo i bin talem olgeta blong stanap.

20 Mo oli bin girap long graon, mo hem i bin talem long olgeta: Yufala i kasem blesing from fet blong yufala. Mo nao luk, glad blong mi i fulap.

21 Mo taem we hem i bin talem ol toktok ia, hem i bin krae, mo grup blong pipol ia i witnes long samting ia, mo hem i bin tekem ol smol pikinini blong olgeta wan afta narawan, mo i bin blesem olgeta, mo i bin prea long Papa from olgeta.

22 Mo taem we hem i bin mekem samting ia, hem i bin krae bakegen.

23 Mo hem i bin toktok long grup blong pipol ia, mo i bin talem long olgeta: Luk ol smol wan blong yufala.

24 Mo taem we oli stap lukluk blong lukim oli bin sakem ol ae blong olgeta i go long heven, mo oli bin lukim ol heven i open, mo oli bin luk ol enjel i stap kamdaon aot long heven olsem we i stap long medel blong faea; mo oli bin kam daon mo oli bin raonem ol smol

wan ia, mo faea i bin raonem olgeta; mo ol enjel i bin givhan long olgeta.

25 Mo grup blong pipol ia i bin luk mo i bin harem mo witnes; mo oli save we witnes blong olgeta i tru, from olgeta evriwan long olgeta i bin luk mo harem, evri man blong hemwan; mo namba blong olgeta i bin klosap tu taosen mo faef hundred sol; mo hemia i ol man, ol woman, mo ol pikinini.

---

### JAPTA 18

---

*Jisas i statem sakramen long medel blong ol man blong Nifae— Hem i talem long olgeta blong prea oltaem long nem blong hem —Olgeta we i kakae bodi blong mit mo bun blong hem mo dringim blad blong hem taem we oli no stret oli kasem panis—Jisas i givim paoa long ol disaepol blong givim Tabu Spirit. Raonabaot 34 yia afta Kraes i bon.*

Mo i bin hapen se Jisas i bin givim oda long ol disaepol blong hem se oli mas karem sam bred mo waen i kam long hem.

2 Mo taem we oli bin go blong karem bred mo waen, hem i bin givim oda long grup blong pipol ia se oli mas sidaon long graon.

3 Mo taem we ol disaepol i bin kam wetem bred mo waen, hem i bin tekem long bred mo i bin brekem mo i bin blesem; mo hem i bin givim long ol disaepol mo i bin givim oda se oli mas kakae.

4 Mo taem we oli bin kakae mo oli bin fulap, hem i bin givim oda se oli mas givim long grup blong pipol ia.

5 Mo taem we grup blong pipol ia i bin kakae mo oli bin fulap, hem i bin talem long ol disaepol: Luk bae mi odenem wan long medel blong yufala, mo long hem bae mi givim paoa blong bae hem i brekem bred mo blesem hem mo givim hem long ol pipol blong jos blong mi, long olgeta evriwan we bae i biliv mo kasem baptaes long nem blong mi.

6 Mo samting ia bae yufala i lukaot gud blong mekem oltaem, hem i olsem we mi bin mekem, hem i olsem we mi bin brekem bred mo blesem hem mo givim hem long yufala.

7 Mo samting ia bae yufala i mekem blong tingbaot bodi blong mi, we mi bin soem long yufala. Mo samting ia bae i wan testimoni long Papa se yufala i stap tingbaot mi oltaem. Mo sapos yufala i tingbaot mi oltaem, bae yufala i gat Spirit blong mi i stap wetem yufala.

8 Mo i bin hapen se taem we hem i bin talem ol toktok ia, hem i bin givim oda long ol disaepol blong hem se oli mas tekem long waen blong kap mo dring long hem, mo se oli mas givim tu long grup blong pipol ia blong oli save dring long hem.

9 Mo i bin hapen se oli bin mekem olsem, mo oli bin dring long hem mo oli bin kam fulap; mo oli bin givim long grup

blong pipol ia, mo oli bin dring, mo oli bin kam fulap.

10 Mo taem we ol disaepol i bin mekem samting ia, Jisas i bin talem long olgeta: Mi blessem yufala from samting ia we yufala i bin mekem, from samting ia i mekem ol komanmen blong mi i hapen, mo samting ia i stap witnes long Papa se yufala i glad blong mekem ol samting we mi bin talem long yufala.

11 Mo samting ia bae yufala i mekem oltaem long olgeta we i sakem sin mo kasem baptaes long nem blong mi, mo bae yufala i mekem samting ia blong tingbaot blad blong mi, we mi bin mekem i ron from yufala, blong mekem se yufala i save witnes long Papa se yufala i stap tingbaot mi oltaem. Mo sapos yufala i stap tingbaot mi oltaem, bae yufala i gat Spirit blong mi blong stap wetem yufala.

12 Mo mi givim long yufala wan komanmen se yufala i mas mekem ol samting ia. Mo sapos yufala i mekem ol samting ia oltaem bae mi blesem yufala, from yufala i bildim long ston blong mi.

13 Be eni man long yufala we bae i mekem moa o smol bitim samting ia, oli no bildim long ston blong mi, be oli bildim long wan fandesen blong sanbij; mo taem we ren i foldaon, mo ol wota i kam antap, mo ol win i blu, mo kilim olgeta, bae oli foldaon, mo ol get blong hel i rere open blong tekem olgeta.

14 Taswe bae yufala i kasem



blesing sapos yufala i holem ol komanmen blong mi we Papa i bin givim oda long mi se mi mas givim long yufala.

15 I tru, i tru, mi talem long yufala, yufala i mas lukaot gud mo prea oltaem, from fraet se devel i temptem yufala, mo hem i lidim yufala i gowe prisena.

16 Mo olsem we mi bin prea long medel blong yufala, i semak bae yufala i prea long jos blong mi, wetem ol pipol blong mi we i sakem sin mo i kasem baptaes long nem blong mi. Luk mi mi laet; mi bin mekem wan eksampol blong yufala.

17 Mo i bin hapen se taem we Jisas i bin talem ol toktok ia long ol disaepol blong hem, hem i bin tanem hem bakegen i go long grup blong pipol ia mo i bin talem long olgeta:

18 Luk, i tru, i tru, mi talem long yufala, yufala i mas lukaot gud mo prea oltaem from fraet se yufala i stat blong foldaon long temtesen; from Setan i wantem blong holem taet yufala, blong mekem se hem i save sefem yufala olsem wit.

19 Taswe nao, yufala i mas prea oltaem long Papa long nem blong mi;

20 Mo eni samting we bae yufala i askem long Papa long nem blong mi we i raet, mo bilivim se bae yufala i kasem, luk bae i givim long yufala.

21 Prea long ol famle blong yufala long Papa, evritaem long nem blong mi, se ol woman mo ol pikinini blong yufala i save kasem blesing.

22 Mo luk, yufala i mas kam tugeta plante; mo yufala i no mas blokem eni man blong kam long yufala, taem we yufala i kam tugeta, be letem olgeta blong oli save kam long yufala mo no blokem olgeta;

23 Be yufala i mas prea from olgeta, mo no mas sakem olgeta aot; mo sapos i olsem se oli kam long yufala plante, yufala i mas prea from olgeta long Papa long nem blong mi.

24 Taswe, leftemap laet blong yufala blong mekem se i save saen long wol. Luk mi mi laet we yufala i mas leftemap—ol samting we yufala i bin lukim mi mi mekem. Luk yufala i luk se mi bin prea long Papa, mo yufala evriwan i bin witnes.

25 Mo yufala i luk se mi bin givim oda se i no gat wan long yufala i mas gowe, be we mi bin givim oda se yufala i mas kam long mi, blong mekem se yufala i save tajem mo lukim; we i semak we bae yufala i mekem long wol; mo eni man we i brekem komanmen ia i letem hemwan blong Setan i lidim hem i go long temtesen.

26 Mo nao i bin hapen se taem we Jisas i bin talem ol toktok ia, hem i bin tanem ol ae blong hem bakegen i go long ol disaepol we hem i bin jusum, mo i bin talem long olgeta:

27 Luk i tru, i tru, mi talem long yufala, mi givim long yufala wan narafala komanmen, mo afta mi mas go long Papa blong mi blong mi save mekem ol narafala komanmen i hapen we hem i bin givim long mi.

28 Mo nao luk, hemia i komanmen we mi givim long yufala, se yufala i no mas letem eniwan i tekem mit mo blad blong mi we yufala i save gud se hem i no stret, taem we bae yufala i givim samting ia;

29 From eni man we i kakae mo dringim mit mo blad blong mi taem hem i no stret, hem i stap kakae mo dringim panis long sol blong hem wan; taswe sapos yufala i save we wan man i no stret blong kakae mo dring long mit mo bald blong mi, yufala i mas stopem hem.

30 Be, bae yufala i no mas sakem hem aot long medel blong yufala, be yufala i mas givhan long hem mo yufala i mas prea from hem long Papa, long nem blong mi; mo sapos i olsem se hem i sakem sin mo i kasem baptaes long nem blong mi, afta bae yufala i tekem hem mo givim long hem long mit mo blad blong mi.

31 Be sapos hem i no sakem sin bae yufala i no mas kaontem hem wetem ol pipol blong mi, blong hem i no save smasem gud ol pipol blong mi, from luk, mi save ol sipsip blong mi, mo mi kaontem olgeta.

32 Be, yufala i no mas sakem hem aot long ol haos blong prea blong yufala, o long ol ples blong wosip blong yufala, from long olgeta olsem bae yufala i gohed blong givhan; from yufala i no save tru long wanem bae oli kambak mo sakem sin, mo kam long mi wetem evri tingting blong hat mo bae mi mekem olgeta i kam

oraet, mo bae yufala i ol wei blong karem fasin blong sevem man long olgeta.

33 Taswe, holem ol komanmen ia we mi bin talem long yufala blong mekem se yufala i no kasem panis; from sore tumas long hem we Papa i panisim.

34 Mo mi givim yufala ol komanmen ia from ol rao we i bin stap long medel blong yufala. Mo bae yufala i kasem blesing sapos yufala i no gat ol rao long medel blong yufala.

35 Mo nao mi go long Papa, from i gat nid se mi go long Papa from yufala.

36 Mo i bin hapen se taem we Jisas i bin mekem wan en blong ol toktok ia, hem i tajem wetem han blong hem ol disaepol we hem i bin jusum, wan afta naranwan, kasem taem we hem i tajem olgeta evriwan, mo hem i toktok long olgeta long taem we hem i bin tajem olgeta.

37 Mo grup blong ol pipol ia i no bin harem ol toktok we hem i bin talem, taswe oli no bin witnes; be ol disaepol i bin witnes se hem i bin givim long olgeta paoa blong givim Tabu Spirit. Mo bae mi soem long yufala afta long taem ia we histri ia i tru.

38 Mo i bin hapen se, taem we Jisas i tajem olgeta evriwan, wan klaod i bin kam mo i bin kavremap grup blong pipol ia, blong mekem se oli no bin save luk Jisas.

39 Mo long taem we klaod i bin kavremap olgeta hem i bin aot long olgeta mo i bin go antap long heven. Mo ol disae-

pol i bin luk mo oli bin witnes we hem i bin go antap bakegen long heven.

---

JAPTA 19

---

*Ol twelef disaepol i givhan long ol pipol mo oli prea from Tabu Spirit —Ol disaepol i kasem baptaes mo kasem Tabu Spirit mo ol enjel i givhan long olgeta—Jisas i prea mo i yusum ol toktok we oli no save raetem—Hem i witnes long bigfala fet long ol man blong Nifae ia. Raonabaot 34 yia afta Kraes i bon.*

Mo nao i bin hapen se taem we Jisas i bin go antap long heven, grup blong pipol ia i bin seraot, mo evri man i bin tekem woman blong hem mo ol pikinini blong hem mo i bin gobak long haos blong hem.

2 Toktok i bin go raon long medel blong ol pipol kwiktaem, bifo tudak i bin kam, se grup blong pipol ia i bin luk Jisas, mo we hem i bin givhan long olgeta, mo tu we bae hem i mas soemaot hemwan long tumora long grup blong pipol ia.

3 Yes, mo tu ful naet toktok long saed blong Jisas i bin go raon long ol pipol; mo oli sendem nius ia long ol pipol inaf blong mekem se i bin gat plante, yes, wan bigfala namba tumas, i bin wok had tumas long ful naet ia, blong oli save stap long tumora long ples we Jisas bae i soemaot hemwan long grup blong pipol ia.

4 Mo i bin hapen se long tumora, taem we grup blong

pipol ia i bin stap tugeta, luk, Nifae mo brata blong hem we hem i bin resemap hem aot long ded, we nem blong hem i Timoti, mo tu boe blong hem, we nem blong hem i Jonas, mo tu Matonae, mo Matonaeha, brata blong hem, mo Kumen, mo Kumenonhae, mo Jeremae, mo Semnon, mo Jonas, mo Sedekae, mo Aesea—nao hemia i bin ol nem blong ol disaepol we Jisas i bin jusum—mo i bin hapen se oli bin kam fored mo oli bin stanap long medel blong grup blong pipol ia.

5 Mo luk, grup blong pipol ia i bin plante tumas mekem se oli bin mekem se oli mas seraotem olgeta i go long twelef grup.

6 Mo ol twelef i bin tijim grup blong pipol ia; mo luk, oli bin mekem se grup blong pipol ia i mas nildaon long fes blong graon, mo oli mas prea long Papa long nem blong Jisas.

7 Mo ol disaepol i bin prea long Papa tu long nem blong Jisas. Mo i bin hapen se oli bin girap mo oli bin givhan long ol pipol.

8 Mo taem we oli bin tijim ol semfala toktok we Jisas i bin talemaot—oli no bin jenisim ol toktok we Jisas i bin talemaot—luk, oli bin nildaon bakegen mo oli bin prea long Papa long nem blong Jisas.

9 Mo oli bin prea from samting we oli bin wantem tumas; mo oli bin wantem se oli kasem Tabu Spirit.

10 Mo afta we oli bin prea olsem ia nao, oli bin go daon klosap long saed blong wota,

mo grup blong pipol ia i bin folem olgeta.

11 Mo i bin hapen se Nifae i bin go daon long wota mo hem i bin kasem baptaes.

12 Mo hem i bin kam antap aot long wota mo i bin stat blong mekem baptaes. Mo hem i bin baptaesem olgeta evriwan we Jisas i bin jusum.

13 Mo i bin hapen se taem we olgeta evriwan i bin kasem baptaes, mo i bin kam antap aot long wota, Tabu Spirit i bin kam daon long olgeta, mo oli bin kam fulap wetem Tabu Spirit mo wetem faea.

14 Mo luk, wan samting olsem faea i bin raonem olgeta; mo i bin kam daon aot long heaven, mo grup blong pipol ia i bin witnes long samting ia mo oli bin talem testimoni; mo ol enjel i bin kam daon aot long heaven mo oli bin givhan long olgeta.

15 Mo i bin hapen se taem we ol enjel i stap givhan long ol disaepol, luk, Jisas i bin kam mo i bin stanap long medel mo i bin givhan long olgeta.

16 Mo i bin hapen se hem i bin toktok long grup blong pipol ia, mo i bin givim oda long olgeta se oli mas nildaon bak-egen long graon, mo tu se ol disaepol blong hem i mas nildaon long graon.

17 Mo i bin hapen se taem we olgeta evriwan i bin nildaon long graon, hem i bin givim oda long ol disaepol blong hem se oli mas prea.

18 Mo luk, oli bin stat blong prea; mo oli bin prea long Jisas,

oli singaotem hem Lod blong olgeta mo God blong olgeta.

19 Mo i bin hapen se Jisas i bin go aot long medel blong olgeta, mo i bin gowe lelebet aot long olgeta, mo i bin bodaon hemwan long graon, mo hem i bin talem:

20 Papa, mi talem tangkyu from yu bin givim Tabu Spirit long olgeta ia we mi bin jusum; mo hem i from bilif blong olgeta long mi we mi bin jusum olgeta aot long wol.

21 Papa, mi prea long yu blong yu givim Tabu Spirit long olgeta evriwan we bae i biliv long ol toktok blong olgeta.

22 Papa, yu bin givim olgeta Tabu Spirit from oli biliv long mi; mo yu luk we oli biliv long mi from yu harem olgeta, mo oli prea long mi; mo oli prea long mi from mi stap wetem olgeta.

23 Mo nao Papa, mi prea long yu from olgeta, mo tu from olgeta we bae i bilivim ol toktok blong olgeta, blong oli save biliv long mi, blong mi save stap long olgeta olsem yu, Papa, i stap long mi, blong mekem se mifala i save stap wan.

24 Mo i bin hapen se taem we Jisas i bin prea olsem ia nao long Papa, hem i bin kam long ol disaepol blong hem, mo luk, oli bin stap yet, mo oli no stop blong prea long hem; mo oli no bin talem plante toktok, from Tabu Spirit i bin givim long olgeta wanem oli mas prea mo oli bin kam fulap wetem strong tingting.

25 Mo i bin hapen se Jisas i bin blesem olgeta taem we oli stap

prea long hem; mo fes blong hem i bin smael long olgeta, mo laet blong fes blong hem i bin saen long olgeta, mo luk oli bin stap waet olsem fes mo tu ol klos blong Jisas; mo luk waet ia i bin bitim evri waet, yes, mo i no save gat eni samting long wol ia i waet olsem waet blong hem.

26 Mo Jisas i bin talem long olgeta: Gohed blong prea, be oli no bin stop blong prea.

27 Mo hem i bin tanem hem bakegen aot long olgeta bakegen, mo i bin gowe lelebet mo i bin bodaon long graon; mo i bin prea bakegen long Papa, se:

28 Papa, mi talem tangkyu from yu bin mekem olgeta we mi bin jusum i kam klin, from fet blong olgeta, mo mi prea from olgeta, mo tu from olgeta we bae i biliv long ol toktok blong olgeta, blong oli save kam klin long mi, tru long fet long ol toktok blong olgeta, i semak olsem we oli kam klin long mi.

29 Papa, mi no prea from wol, be from olgeta we yu bin givim long mi aot long wol, from fet blong olgeta, blong oli save kam klin long mi, blong mi save stap long olgeta semak olsem yu, Papa, i stap long mi, blong mekem se mifala i save stap wan, blong mi save kasem glori long olgeta.

30 Mo taem we Jisas i bin talem ol toktok ia hem i bin kambak bakegen long ol disaepol blong hem; mo luk oli bin gohed blong prea mo oli no stop, long hem; mo hem i bin smael long

olgeta bakegen; mo luk oli bin waet, we i olsem Jisas.

31 Mo i bin hapen se hem i bin gowe bakegen lelebet aot mo i bin prea long Papa;

32 Mo tang i no save talem ol toktok we hem i bin prea, mo tu i no gat man i save raetem ol toktok we hem i bin prea.

33 Mo grup blong pipol ia i bin harem mo oli witnes; mo ol hat blong olgeta i bin open mo oli bin andastanem long ol hat blong olgeta ol toktok we hem i bin prea.

34 Be, ol toktok we hem i bin prea i bin bigfala mo gudfala tumas mekem se man i no save raetem olgeta, mo tu man i no save talemaot.

35 Mo i bin hapen se taem we Jisas i bin mekem wan en blong prea, hem i bin kambak bakegen long ol disaepol, mo i bin talem long olgeta: Bigfala fet olsem ia mi neva bin luk long medel blong evri Jiu; from samting ia mi no bin save soemaot long olgeta ol bigfala merikel olsem, from oli no gat bilif.

36 I tru mi talem long yufala, i no gat wan long olgeta we i bin luk ol bigfala samting olsem we yufala i bin luk; mo tu oli no bin harem ol bigfala samting olsem we yufala i bin harem.

---

## JAPTA 20

---

*Jisas i givim bred mo waen tru long wan merikel mo bakegen hem i givim sakramen long ol pipol— Smol haf blong Jakob we i stap yet bae i kasem save long saed blong*

*Lod, God blong olgeta mo bae oli kasem ol graon blong Amerika—Jisas hem i wan profet olsem Moses, mo ol man blong Nifae oli ol pikinini blong ol profet—Ol narafala man blong ol pipol blong Lod bae oli karem i kam tugeta long Jerusalem. Raonabaot 34 yia afta Kraes i bon.*

Mo i bin hapen se hem i bin givim oda long grup blong pipol ia se oli mas stop blong prea, mo tu ol disaepol blong hem. Mo hem i bin givim oda long olgeta se oli no mas stop blong prea insaed long ol hat blong olgeta.

2 Mo hem i bin givim oda long olgeta se oli mas girap mo stanap long ol leg blong olgeta. Mo oli bin girap mo oli bin stanap long ol leg blong olgeta.

3 Mo i bin hapen se hem i bin brekem bred bakegen mo bin blesem hem, mo i bin givim long ol disaepol blong kakae.

4 Mo taem we oli bin kakae, hem i bin givim oda long olgeta se oli mas brekem bred, mo givim long grup blong pipol ia.

5 Mo taem we oli bin givim long grup blong pipol ia, hem i bin givim waen tu long olgeta blong dring, mo i bin givim oda long olgeta se oli mas givim long grup blong pipol ia.

6 Nao, i no bin gat eni bred, o waen, we ol disaepol i bin karem i kam, o long grup blong pipol ia;

7 Be i tru we hem i bin givim long olgeta bred blong kakae, mo tu waen blong dring.

8 Mo hem i bin talem long

olgeta: Hem we i kakae bred ia, i kakae long bodi blong mi from sol blong hem; mo hem we i dring long waen ia, i dring long blad blong mi from sol blong hem; mo sol blong hem bae i neva hanggri o tosta, be bae i kam fulap.

9 Nao, taem we evriwan long grup blong pipol ia i bin kakae mo i bin dring, luk, oli bin kam fulap wetem Tabu Spirit; mo oli bin singaot wetem wan voes, mo oli bin givim glori long Jisas, we oli bin luk mo oli bin harem.

10 Mo i bin hapen se taem we olgeta evriwan i bin givim glori long Jisas, hem i bin talem long olgeta: Luk naoia mi finisim komanmen we Papa i bin givim long mi long saed blong ol pipol ia, we oli wan smol haf blong laen blong Isrel.

11 Yufala i tingbaot se mi bin toktok long yufala, mo mi bin talem se taem we ol toktok blong Aesea bae i hapen—luk oli bin raetem olgeta, yufala i holem olgeta long forod blong yufala, taswe stadi long olgeta—

12 Mo i tru, i tru, mi talem long yufala, taem we bae oli hapen afta hem i taem we kavenan i hapen we Papa i bin mekem wetem ol pipol blong hem, O laen blong Isrel.

13 Mo afta bae ol smol haf, we bae oli go seraot olbaot long fes blong wol, bae oli karem olgeta i kam tugeta aot long is mo long wes, mo aot long saot mo aot long not; mo bae oli kam blong kasem save long saed

blong Lod, God blong olgeta, we i bin pemaot olgeta.

14 Mo Papa i bin givim oda long mi se mi mas givim long yufala graon ia, olsem graon we i kam long ol papa.

15 Mo mi talem long yufala, se sapos ol Jentael i no sakem sin afta long blesing we bae oli kasem, afta we oli bin seraotem ol pipol blong mi—

16 Long taem ia bae yufala, we i wan smol haf blong laen blong Jakob we i stap yet, i go aot long medel blong olgeta; mo bae yufala i stap long medel blong olgeta we bae oli plante; mo bae yufala i stap long medel blong olgeta olsem wan laeon long medel blong ol anamol blong bus; mo olsem wan yang laeon long medel blong ol grup blong ol sipsip, we, sapos hem i go tru tugeta i purumbut long olgeta mo terem olgeta long ol pisis, mo i no gat wan we i save mekem olgeta i go fri.

17 Bae yu leftemap han blong yu agensem ol enemy blong yu, mo evri enemy blong yu bae oli mas katemaot.

18 Mo bae mi karem ol pipol blong mi i kam tugeta, olsem wan man i karem ol bandel wit blong hem i go insaed long haos.

19 From bae mi mekem ol pipol blong mi wetem olgeta we Papa i bin mekem kavenan wetem olgeta, yes, bae mi mekem hon blong yu i kam aean, mo bae mi mekem ol leg blong yu i kam bras. Mo bae yu brekem long pisis plante pipol; mo bae mi konsekretem mane blong olgeta i go long Lod, mo

ol samting blong olgeta long Lod blong ful wol. Mo luk, mi mi hem we i mekem samting ia.

20 Mo bae i kam blong hapen, Papa i talem, se naef blong faet blong jastis blong mi bae i hang ova long olgeta long dei ia; mo sapos oli no sakem sin bae i foldaon long olgeta, Papa i talem, yes, hem i long evri kantri blong ol Jentael.

21 Mo bae i kam blong hapen se bae mi stanemap ol pipol blong mi, O laen blong Isrel.

22 Mo luk, ol pipol ia bae mi stanemap long graon ia, go kasem taem we kavenan i hapen we mi bin mekem wetem papa blong yufala Jakob; mo bae i stap olsem wan Niu Jerusalem. Mo ol paoa blong heven bae i stap long medel blong ol pipol ia; yes, mo tu bae mi stap long medel blong yufala.

23 Luk, mi mi hem we Moses i bin tokbaot, se: Wan profet bae Lod, God blong yufala i resem-ap long yufala blong ol brata blong yufala, we i olsem mi; hem bae yufala i harem long evri samting long eni samting we bae hem i talem long yufala. Mo bae i kam blong hapen se evri sol we bae i no harem profet ia, bae oli katemaot hem aot long medel blong ol pipol.

24 I tru mi talem long yufala, yes, mo evri profet stat long Samuel mo olgeta we bae i kam afta, olgeta we i bin toktok, i bin testifae long saed blong mi.

25 Mo luk, yufala i ol pikinini blong ol profet; mo yufala i blong laen blong Isrel; mo yufala i blong kavenan we Papa i

bin mekem wetem ol bubu blong yufala, hem i talem long Ebrahim: Mo long ol laen blong yu bae evri famle blong wol i kasem blesing.

26 Papa i bin resemap mi long yufala fastaem, mo i bin sendem mi long blesem yufala blong mi tanem i gowe evriwan long yufala long ol rabis fasin blong hem; mo samting ia from yufala i ol pikinini blong kavenan—

27 Mo afta we yufala i bin kasem blesing, ale Papa i mekem i hapen kavenan we hem i bin mekem wetem Ebrahim, se: Long laen blong yu bae evri famle blong wol i kasem blesing—i mekem se hem i poremaot Tabu Spirit tru long mi long ol Jentael, we blesing ia long ol Jentael bae i mekem olgeta i moa strong bitim evriwan, mekem se bae oli seraotem ol pipol blong mi olbaot, O laen blong Isrel.

28 Mo bae oli stap olsem wan wip long ol pipol blong graon ia. Be, taem we bae oli kasem gospel we i fulwan blong mi, afta sapos bae oli mekem ol hat long olgeta i kam strong agensem mi, bae mi putumbak ol rabis fasin blong olgeta i go antap long hed blong olgeta bakegen, Papa i talem.

29 Mo bae mi tingbaot kavenan we mi bin mekem wetem ol pipol blong mi; mo mi bin kavenan wetem olgeta se bae mi karem olgeta i kam tugeta long taem we mi jusum, blong bae mi givim long olgeta bakegen graon blong ol bubu blong olgeta olsem graon blong olgeta

we i kam long ol papa, we i graon blong Jerusalem, we i promes graon long olgeta blong oltaem, Papa i talem.

30 Mo bae i kam blong hapen se taem i stap kam, we fulwan blong gospel blong mi bae oli prijim long olgeta;

31 Mo bae oli biliv long mi, se mi mi Jisas Kraes, Pikinini blong God, mo bae oli prea long Papa long nem blong mi.

32 Afta bae ol wajman blong olgeta i leftemap ol voes blong olgeta, mo wetem voes tugeta bae oli singsing; from bae oli luk wetem ae blong olgeta.

33 Afta bae Papa i karem olgeta i kam tugeta bakegen, mo i givim long olgeta Jerusalem blong kam graon olsem we i kam long ol papa.

34 Afta bae oli singaot strong wetem glad—Singsing tugeta, yufala ol empti ples blong Jerusalem; from we Papa i bin leftemap tingting blong ol pipol blong hem, hem i bin pemaot Jerusalem.

35 Papa i bin soemaot tabuhan blong hem long ol ae blong evri kantri; mo evri en blong wol bae i luk fasin blong sevem man blong Papa; mo Papa mo mi i wan nomo.

36 Mo afta bae i kam blong hapen ol toktok we profet Aesea i bin raetem: Wekap, wekap bakegen, mo putum paoa blong yu, O Saeon; putum ol naes klos blong yu, O Jerusalem, tabu bigtaon, from stat long taem ia bae i no gat wan we i kam long yu olgeta we i no sakomsaes mo i no klin.



37 Sekemaot yuwan long das; girap, sidaon, O Jerusalem; tekemaot yuwan long ol rop blong nek blong yu, O prisena gel blong Saeon.

38 From olsem ia nao Lod i talem: Yufala i bin salem yufala bakegen blong nating, mo bae mi pemaot yufala i no wetem mane.

39 I Tru, i tru, mi talem long yufala, se ol pipol blong mi bae i save nem blong mi; yes, long dei ia bae oli save se mi mi hem we i stap toktok.

40 Mo long taem ia bae oli talem se: Hamas naes nao long ol bigfala hil, ol leg blong hem we i karem ol gud nius i kam long olgeta blong gud, we i stap talemaot fasin blong sevem man; we i stap talem long Saeon; God blong yu i rul!

41 Mo long taem ia bae wan krae i go aot: Yufala i go aot, yufala i go aot, yufala i go aot long ples ia, no tajem hemia we i no klin; yufala i go aot long medel blong hem; yufala i mas stap klin we i karem ol kontena blong Lod.

42 From bae yufala i no go aot kwiktaem o ronwe long trabol; from Lod bae i go long fored blong yufala, mo God blong Isrel bae i biae nem yufala.

43 Luk, wokman blong mi bae i wok wetem waes; bae ol pipol i leftemap, mo onarem hem mo bae hem i hae tumas.

44 Olsem olgeta we i bin sap-raes long yu—fes blong hem i bin nogud tumas, moa bitim eni man, mo bodi blong hem i moa bitim ol boe blong ol man—

45 Olsem ia bae hem i dropem olbaot plante kantri; ol king bae oli sarem ol maot blong olgeta long hem, from ol samting we man i no bin talem long olgeta bae oli luk; mo ol samting we oli no bin harem bae oli tingbaot.

46 I tru, i tru, mi talem long yufala, evri samting ia bae oli mas kam olsem we Papa i bin givim oda long mi. Afta bae kavenan ia we Papa i bin kavenan wetem ol pipol blong hem, i hapen; mo afta bae ol pipol blong mi i stap bakegen long Jerusalem, mo bae hem i graon blong olgeta we i kam long ol papa blong olgeta.

---

## JAPTA 21

---

*Isrel bae Lod i karembak taem we Buk blong Momon i kamaot—Bae Lod i stanemap ol Jentael olsem wan fri pipol long Amerika—Bae oli sev sapos oli biliv mo obei; sapos no, bae Lod i katemaot olgeta mo smasem gud olgeta—Isrel bae i bildimap Niu Jerusalem, mo ol traeb we i lus bae i kambak. Raonabaot 34 yia afta Kraes i bon.*

Mo i tru mi talem long yufala, mi givim long yufala wan saen, blong mekem se yufala i save gat save se taem we ol samting ia bae i rere blong hapen—se bae mi karem i kam tugeta aot long taem we oli bin seraot olbaot, ol pipol blong mi, O laen blong Isrel, mo bae mi stanemap bakegen long medel blong olgeta Saeon blong mi;

2 Mo luk, samting ia i samting

we bae mi givim long yufala blong wan saen— from i tru mi talem long yufala se taem we ol samting ia we mi stap talem long yufala, mo we bae mi talem long yufala, afta long taem ia blong miwan, mo tru long paoa blong Tabu Spirit we bae Papa i givim long yufala, bae ol Jentael i save long hem, blong mekem se oli save gat save long saed blong ol pipol ia we i wan smol haf blong laen blong Jakob we i stap yet, mo long saed blong olgeta ia ol pipol ia blong mi we bae oli seraotem olgeta olbaot;

3 I tru, i tru, mi talem long yufala, taem we Papa bae i soemaot long olgeta ol samting ia, mo bae i kamaot tru long Papa aot long olgeta i go long yufala;

4 From hem i waes tingting long Papa se oli mas stanap long graon ia, mo oli stanap olsem wan fri pipol tru long paoa blong Papa, blong mekem se ol samting ia i save kamaot long olgeta long wan smol haf blong laen blong yufala, blong mekem se kavenan blong Papa i save hapen we hem i bin kavenan wetem ol pipol blong hem, O laen blong Isrel;

5 Taswe, taem we ol wok ia mo ol wok we bae i hapen long medel blong yufala afta long taem ia bae i kamaot tru long ol Jentael, long ol laen blong yufala we bae i slak from oli bin lusum bilif from nogud fasin;

6 From olsem ia nao i gat nid long Papa se samting ia i mas kamaot long ol Jentael, blong hem i save soemaot paoa

blong hem long ol Jentael, from stamba tingting ia se ol Jentael, sapos oli no mekem ol hat blong olgeta i kam strong, blong oli save sakem sin mo kam long mi, mo kasem baptaes long nem blong mi, mo save long saed blong ol tru poen blong doktrin blong mi, blong oli save kaontem olgeta wetem ol pipol blong mi, O laen blong Isrel;

7 Mo taem we ol samting ia i kam blong hapen we laen blong yufala bae i stat blong save ol samting ia—bae i wan saen long olgeta, blong oli save gat save se wok blong Papa i bin stat finis blong mekem kavenan i hapen we hem i bin mekem wetem ol pipol we i blong laen blong Isrel.

8 Mo taem we dei ia bae i kam, bae i hapen se ol king bae i sareme ol maot blong olgeta; from ol samting we oli no bin talemaot long olgeta bae oli lukim; mo ol samting we oli no bin harem bae oli tingbaot.

9 From long dei ia, from mi bae Papa i wokem wan wok, we bae i wan bigfala mo wan gudfala wok long medel blong olgeta; mo bae i gat long medel blong olgeta, olgeta we bae oli no bilivim samting ia, i nomata we wan man i bin talem samting ia long olgeta.

10 Be luk, laef blong wokman blong mi bae i stap long han blong mi; taswe bae oli no smasem gud hem, i nomata we bae hem i luk nogud from olgeta. Be stil bae mi mekem hem i kam oraet, from bae mi soem long olgeta se waes tingting

blong mi i moa strong bitim ol trik blong devel.

11 Taswe, bae i kam blong hapen se eni man we bae i no biliv long ol toktok blong mi, we mi Jisas Kraes, we Papa bae i mekem se hem i karem i kam-aot long ol Jentael, mo bae i givim long hem paoa blong bae hem i tekem olgeta i go aot long ol Jentael, (bae i hapen olsem we Moses i bin talem) bae mi katem olgeta aot long medel blong ol pipol blong mi we oli blong kavenan.

12 Mo ol pipol blong mi we oli wan smol haf blong Jakob bae oli stap long medel blong ol Jentael, yes, long medel blong olgeta olsem wan laeon long medel blong ol anamol blong bus, olsem wan yang laeon long medel blong ol grup blong sipsip, we, sapos hem i go tru i purumbut long olgeta mo i terem olgeta long pisis, mo i no gat wan man i save mekem olgeta i go fri.

13 Bae oli leftemap han blong olgeta agensem ol enemi blong olgeta, mo evri enemi blong olgeta bae hem i katemaot.

14 Yes, sore tumas long ol Jentael sapos oli no sakem sin; from bae i kam blong hapen long dei ia, Papa i talem, se bae mi katemaot ol hos blong yu aot long medel blong yu, mo bae mi smasem gud ol kat blong hos blong yu;

15 Mo bae mi katemaot ol big-taon blong graon blong yu, mo brekemdaon evri strong ples blong haed blong yu;

16 Mo bae mi katemaot ol

fasin blong posen aot long graon blong yu, mo bae yu nomo gat ol man blong talem-aot ol samting long fiuja;

17 Ol pikja blong yu bae mi katemaot tu, mo ol pikja blong yu we i stanap aot long medel blong yu, mo bae yu nomo wosipim ol wok blong ol han blong yu;

18 Mo bae mi pikimap ol grup blong ol smol tri blong yu aot long medel blong yu; i semak bae mi smasem gud ol bigtaon blong yu.

19 Mo bae i kam blong hapen se evri giaman, mo ol trik, mo ol tingting blong wantem samting blong narafala man, mo ol rao, mo ol fasin blong giaman pris, mo ol fasin blong stap slip olbaot, bae oli stop.

20 From bae i kam blong hapen, Papa i talem, se long dei ia eni man we i no sakem sin mo kam long Pikinini blong mi we mi Lavem Tumas, olgeta bae mi katemaot long ol pipol blong mi, O laen blong Isrel;

21 Mo bae mi mekem fasin blong pembak mo kros i go long olgeta, semak olsem long man we i no gat respek long God, semak olsem we oli no bin harem.

22 Be sapos bae oli sakem sin mo lisin long ol toktok blong mi, mo no mekem ol hat blong olgeta i kam strong, bae mi stanemap jos blong mi long medel blong olgeta, mo bae oli mekem kavenan mo bae oli kaontem olgeta wetem olgeta ia, smol haf blong Jakob we i stap laef yet, long olgeta we mi

bin givim graon ia olsem graon blong olgeta we i kam long ol papa;

23 Mo bae oli helpem ol pipol blong mi, smol haf blong Jakob we i stap yet, mo tu olgeta evriwan blong laen blong Isrel we bae i kam, blong oli save bildimap wan bigtaon, we bae oli singaotem, Niu Jerusalem.

24 Mo afta bae oli helpem ol pipol blong mi blong oli save karem i kam tugeta, olgeta we oli bin seraot olbaot long ful fes blong graon, i kam insaed long Niu Jerusalem.

25 Mo long taem ia bae paoa blong heven i kamdaon long olgeta; mo mi tu bae mi stap long medel blong olgeta.

26 Mo afta bae wok blong Papa i stat long dei ia, we i long taem we bae oli prijim gospel ia long smol haf blong pipol ia. I tru mi talem long yufala, long dei ia bae wok blong Papa i stat long medel blong evri pipol blong mi we i bin seraot olbaot, yes, hem i ol traeb we i bin lus, we Papa i bin lidim i gowe aot long Jerusalem.

27 Yes, wok ia bae i stat long medel blong evri pipol blong mi we i bin seraot olbaot, wetem Papa blong mekem rere rod we tru long hem oli save kam long mi, blong oli save prea long Papa tru long nem blong mi.

28 Yes, mo long taem ia bae wok ia i stat wetem Papa long medel blong evri kantri blong mekem rere rod we tru long hem ol pipol blong hem oli save karem i kam tugeta long

haos, long graon blong olgeta we i kam long ol papa.

29 Mo bae oli go aot long evri kantri; mo bae oli no go aot kwiktaem o ronwe long trabol, from bae mi go long fored blong olgeta, Papa i talem, mo bae mi bihaenem olgeta.

---

### JAPTA 22

---

*Long ol las dei, Saeon mo ol stek blong hem bae i stanap, mo Isrel bae i karem i kam tugeta wetem sore mo lav—Bae oli win—Luk long Aesea 54. Raonabaot 34 yia afta Kraes i bon.*

Mo long taem ia ol samting we oli bin raetem bae i hapen: Singsing, O emti, yu we yu no bin bonem pikinini; kamaot kwik blong singsing, mo singaot strong, yu we i no bin go tru long hadtaem wetem pikinini; from ol pikinini blong wan woman we i no gat pikinini i moa bitim ol pikinini blong mared woman, Lod i talem.

2 Mekem i kam bigwan ples blong tenet blong yu, mo letem olgeta i pulum ol kaliko blong windo blong ol ples blong yu we yu stap long hem; no holem bak, pulum ol rop blong tenet blong yu i kam moa longfala mo mekem ol stek blong yu i kam moa strong;

3 From bae yu brekem i gowe long raet han mo long lef, mo ol pikinini blong yu bae i kasem ol Jentael mo mekem ol emti bigtaon blong gat man i stap long olgeta.

4 No fraet, from bae yu no

sem; mo tu tingting blong yu i no save fasfas, from bae oli no mekem yu yu sem; from bae yu fogetem sem blong taem we yu yu yangfala, mo bae yu no tingbaot sem blong taem we yu yu yangfala, mo bae yu no tingbaot sem blong taem we man blong yu i ded bakegen.

5 From man we i bin mekem yu, man blong yu, Lod blong ol Host i nem blong hem; mo Ridima blong yu, Tabu wan blong Isrel—God blong ful wol bae oli singaotem hem.

6 From Lod i bin singaotem yu olsem wan woman we oli lego hem, mo i stap harem nogud long spirit, mo wan yangfala woman blong wan man, long taem we oli bin sakemaot yu, God blong yu i bin talem.

7 Blong wan smol taem mi bin lego yu, be wetem bigfala lav bae mi karem yu i kam.

8 Long wan smol kros mi bin haedem fes blong mi long yu blong wan smol taem, be wetem fasin blong kaen we i no gat en, bae mi gat sore long yu, Lod, Ridima blong yu i talem.

9 From samting ia, ol wota blong Noa long mi, from olsem we mi bin mekem tru promes se ol wota blong Noa bae i nomo go ova long wol, mo tu mi mekem tru promes se bae mi no kros long yu.

10 From ol bigfala hil bae oli aot mo ol smol hil bae oli tekemaot, be fasin blong kaen blong mi bae i no aot long yu, mo tu kavenan blong pis blong mi bae mi no tekemaot, Lod we i gat sore long yu i talem.

11 O yu we yu gat hadtaem, we ol hariken i kilim yu, mo i no gat wan man i kam blong leftemap tingting blong yu! Luk, bae mi leim ol ston blong yu wetem ol naes kala, mo leim ol fandesen blong yu wetem ol kala ston.

12 Mo bae mi mekem ol windo blong yu wetem ol kalkala ston, mo ol get blong yu wetem ol gudgudfala red ston, mo ol boda blong yu wetem ol naes ston.

13 Mo evri pikinini blong yu bae Lod i tijim olgeta; mo pis blong ol pikinini blong yu bae i bigwan.

14 Long stret fasin bae yu stanap; bae yu stap longwe long harem nogud from bae yu no fraet, mo long bigfala fraet from bae i no kam klosap long yu.

15 Luk, olgeta bae i mas kam tugeta agensem yu, no tru long mi; eni man we bae i kam tugeta agensem yu bae oli fol-daon from gud blong yu.

16 Luk, mi bin mekem man blong mekem ol samting long aean, we i stap blu long ol jakol long faea, mo we i karem i kam fored wan tul blong wok blong hem; mo mi bin mekem wan man blong smasem gud ol samting.

17 I no gat wan tul blong faet we oli mekem agensem yu bae i kam antap gud; mo evri tang we bae i toktok strong agensem yu long jajmen, bae yu panisim. Hemia i ol raet blong ol wok-man blong Lod, mo stret fasin blong olgeta i kam long mi, Lod i talem.

## JAPTA 23

*Jisas i talem se ol toktok blong Aesea i tru—Hem i givim oda long ol pipol blong stadi ol profet—Ol toktok blong Samuel man blong Leman long saed blong laef bakegen, Nifae i joenem wetem ol histri blong olgeta. Raonabaot 34 yia afta Kraes i bon.*

Mo nao, luk, mi talem long yufala, se yufala i mas stadi ol samting ia. Yes, wan komanmen mi givim long yufala se yufala i mas stadi ol samting ia oltaem; from ol toktok blong Aesea i bigwan tumas.

2 From i tru we hem i bin toktok olsem se i tokbaot evri samting long saed blong ol pipol blong mi, we i blong laen blong Isrel; taswe i mas nid olsem se hem i mas toktok tu long ol Jentael.

3 Mo evri samting we hem i bin talemaot oli bin hapen mo bae i hapen, hem i folem ol toktok we hem i bin talemaot.

4 Taswe lisin long ol toktok blong mi; raetem ol samting we mi bin talem long yufala; mo folem taem mo tingting blong Papa bae oli go aot long ol Jentael.

5 Mo eni man we bae i lisin long ol toktok blong mi mo sakem sin mo i kasem baptaes, semfala man ia bae i sev. Stadi ol profet, from plante i gat we i testifae long ol samting ia.

6 Mo nao i bin hapen se taem we Jisas i bin talemaot ol toktok ia hem i bin talem long olgeta bakegen, afta hem i bin eksplen-

em evri skripja long olgeta we oli bin kasem, hem i bin talem long olgeta: Luk, ol narafala skripja mi wantem se yufala i mas raetem, we yufala i no bin mekem.

7 Mo i bin hapen se hem i bin talem long Nifae: Karem i kam histri we yufala i bin kipim.

8 Mo taem we Nifae i bin karemaot ol histri, mo i bin leim olgeta long fored blong hem, hem i bin sakem ol ae blong hem long olgeta mo i bin talem:

9 I tru mi talem long yufala, mi bin givim oda long wokman blong mi Samuel, man blong Leman, se hem i mas testifae long ol pipol ia, se long dei ia we Papa bae i leftemap nem blong hem long mi, se i bin gat plante sent we bae oli girap long ded, mo bae i kamaot long plante, mo oli sud givhan long olgeta. Mo hem i bin talem long olgeta: Hem i no bin olsem?

10 Mo ol disaepol blong hem i bin ansa long hem mo oli bin talem: Yes, Lod, Samuel i bin profesae folem ol toktok blong yu, mo olgeta evriwan i bin hapen.

11 Mo Jisas i bin talem long olgeta: Hao nao i olsem se yufala i no bin raetem samting ia, se plante sent i bin girap mo oli bin kamaot long plante mo oli bin givhan long olgeta?

12 Mo i bin hapen se Nifae i bin tingbaot se samting ia oli no bin raetem.

13 Mo i bin hapen se Jisas i bin givim oda se oli mas raetem samting ia; taswe oli bin raetem

samting ia folem we hem i bin talem.

14 Mo nao i bin hapen se taem we Jisas i bin eksplenem evri skripja long wan, we oli bin raetem, hem i bin givim oda long olgeta se oli mas tijim ol samting we hem i bin eksplenem long olgeta.

---

### JAPTA 24

---

*Mesenja blong Lod bae i mekem rere rod blong Jisas i kambak Nambatu Taem—Kraes bae i sidaon long jajmen—Isrel i kasem oda blong pem ol taeting mo ol ofring—Oli kipim wan buk blong histri—Luk long Malakae 3. Raonabaot 34 yia afta Kraes i bon.*

Mo i bin hapen se hem i bin givim oda long olgeta blong oli mas raetem ol toktok we Papa i bin givim long Malakae, we hem i mas talem long olgeta. Mo i bin hapen se afta we oli bin raetem olgeta, hem i bin eksplenem olgeta. Mo hemia i ol toktok we hem i bin talem long olgeta, se: Olsem ia nao Papa i talem long Malakae—Luk, bae mi sendem mesenja blong mi, mo bae hem i mekem rere rod long fored blong mi, mo Lod we yufala i stap lukaotem bae i kam kwiktaem long tempol blong hem, hem i mesenja blong kavenan, we yufala i glad long hem; luk, bae hem i kam, Lod blong ol Host i talem.

2 Be huia bae i stap strong long dei we hem i kam, mo huia bae i stanap taem we hem i kam? From hem i olsem wan

faea blong man blong mekem aean, mo olsem sop blong man blong wasem klos.

3 Mo bae hem i sidaon olsem wan man blong mekem aean mo blong klinim silva; mo bae hem i klinim ol boe blong Livae, mo klinim olgeta olsem gol mo silva, blong oli save givim long Lod wan ofring long stret fasin.

4 Afta bae ofring blong Juda mo Jerusalem, i naes long Lod semak olsem ol dei blong bifo, mo olsem long ol yia long bifo.

5 Mo bae mi kam klosap long yufala blong jajmen; mo bae mi stap wan kwik witnes agensem ol man blong wokem majik, mo agensem olgeta we i mekem adaltri, mo agensem olgeta we i mekem ol giaman promes, mo agensem olgeta we i jajem long ol man ia we i stap wok blong olgeta long ol pei blong olgeta, olgeta we man blong olgeta i ded mo olgeta we i no gat papa, mo we i tanem i gowe man we oli no save, mo i no respektem mi, Lod blong ol Host i talem.

6 From we mi mi Lod, mi no jenis; taswe yufala ol boe blong Jakob i no bon long faea.

7 Hem i stat long ol dei blong ol bubu blong yufala, yufala i bin gowe long ol odinens blong mi, mo i no bin holem olgeta. Kambak long mi mo bae mi kambak long yufala, Lod blong ol Host i talem. Be yufala i talem: Hao nao bae mifala i kambak?

8 Bae wan man i stilim God? Be yufala i bin stilim mi. Be yufala i talem: Hao nao mifala i bin stilim yu? Long ol taeting mo ol ofring.

9 Yufala i kasem panis wetem wan panis, from yufala i bin stilim mi, i tru, ful kantri ia.

10 Yufala i karem i kam evri taeting long ples blong putum gud ol samting, blong i save gat mit long haos blong mi, mo pruvum mi naeia wetem samting ia, Lod blong ol Host i talem, sapos bae mi no openem long yufala ol windo blong heven, mo porem yufala aot wan blesing we bae i no gat inaf rum blong tekem hem.

11 Mo bae mi tok strong long samting we i smasem gud ol kakae blong yufala, mo hem bae i no smasem gud ol frut blong graon blong yufala; mo tu bae ol rop blong yufala i karem frut blong olgeta bifo long taem, long ol garen, Lod blong ol Host i talem.

12 Mo evri kantri bae oli talem se mi blesem yufala, from bae yufala i stap wan naes graon, Lod blong ol Host i talem.

13 Ol toktok blong yufala i bin strong agensem mi, Lod i talem. Be stil yufala i talem: Wanem nao mifala i bin talem agensem yu?

14 Yufala i bin talem: I blong nating blong wok blong God, mo wanem nao i helpem we yumi bin holem ol odinens blong hem mo we yumi bin wokbaot wetem sore long fored blong Lod blong ol Host?

15 Mo nao yumi singaotem olgeta we i flas se oli hapi; yes, olgeta we i wokem nogud fasin i stanap; yes, olgeta we i traem God i kam fri tu.

16 Ale olgeta we i bin respek-

tem Lod, i bin toktok plante wan long narawan, mo Lod i bin lisin mo bin harem; mo buk blong histri oli bin raetem long fored blong hem blong olgeta we i bin respektem Lod, mo we i bin tingbaot nem blong hem.

17 Mo olgeta bae oli blong mi, Lod blong ol Host i talem, long dei ia we mi mekem ol flas samting blong mi, mo bae mi sevem olgeta olsem wan man i sevem boe blong hemwan we i wok blong hem.

18 Afta bae yufala i kambak mo luksave olgeta we i stret mo olgeta we i nogud, long hem we i wok blong God mo hem we i no wok blong hem.

---

### JAPTA 25

---

*Long Nambatu Taem we Jisas i kam, olgeta we i gat hae tingting mo olgeta we i nogud bae oli bon olsem doti blong wit—Elaeja bae i kambak bifo long bigfala mo nogud dei—Luk long Malakae 4. Raonabaot 34 yia afta Kraes i bon.*

FROM luk, dei i kam we bae i bon olsem wan oven; mo evri man we i gat hae tingting, yes, mo evri man we i mekem nogud fasin, bae i olsem doti blong wit; mo dei we i kam bae i bonem olgeta evriwan, Lod blong ol Host i talem, se bae i no livim olgeta rus o branj.

2 Be long yufala we i respektem nem blong mi, bae Pikinini blong Stret Fasin i girap wetem paoa blong hilim man long ol wing blong hem; mo bae yufala i go aot mo gru i kam antap



olsem ol smol buluk long haos blong ol anamol.

3 Mo bae yufala i purumbut long olgeta we i nogud; from olgeta bae i kam asis andanit long ol leg blong yufala long dei we bae mi mekem samting ia, Lod blong ol Host i talem.

4 Yufala i tingbaot loa blong Moses, wokman blong mi, we mi bin givim long hem long Sinae blong ful Isrel, wetem ol loa mo ol jajmen.

5 Luk, bae mi sendem yufala Elaeja we i profet, bifo long bigfala mo nogud dei blong Lod;

6 Mo bae hem i tanem hat blong ol papa i go long ol piki-nini, mo hat blong o pikinini i go long ol papa blong olgeta, from fraet se bae mi kam mo kilim wol wetem wan panis.

---

### JAPTA 26

---

*Jisas i eksplenem evri samting stat long stat go kasem en—Ol bebi mo ol pikinini i talemaot ol gudfala samting we i no save raetem—Olgeta long Jos blong Kraes i serem evri samting long medel blong olgeta. Raonabaot 34 yia afta Kraes i bon.*

Mo nao i bin hapen se taem we Jisas i bin talemaot ol samting ia, hem i bin eksplenem ol samting ia long grup blong pipol ia mo hem i bin eksplenem evri samting long olgeta, bigfala tugeta wetem smolfala.

2 Mo hem i bin talem: Ol Skripja ia, we yufala i no bin gat wetem yufala, Papa i bin givim oda se mi mas givim

long yufala, from hem i bin waes tingting blong hem se ol samting ia i mas kasem ol jeneresen blong fiuja.

3 Mo hem i bin eksplenem evri samting, long stat kasem taem we bae hem i kam long glori blong hem—yes, mo tu evri samting we bae i kam long fes blong wol, mo tu go kasem taem we bigfala faea i bonem ol samting mo oli ronaot, mo wol ia bae i kam tugeta olsem wan skrol, mo ol heven mo wol bae i pas i gowe;

4 Mo go kasem bigfala mo las dei, taem we evri pipol, mo evri famle, mo evri kantri mo lanwis bae i stanap long fored blong God, blong kasem jajmen long ol wok blong olgeta, sapos oli gud o sapos oli nogud—

5 Sapos oli gud, blong kasem laef bakegen blong laef we i no gat en, mo sapos oli nogud, blong kasem laef bakegen blong panis: from tufala samting ia i wok semak, wan long wan han mo narafala wan narafala han, folem sore, mo jastis, mo tabu fasin we i stap long Kraes, we i bin stap bifo wol ia i bin stat.

6 Mo nao mi no save raetem long buk ia kasem wan handred pat long ol samting we Jisas i bin tijim tru long ol pipol;

7 Be luk ol buk blong Nifae i holem bigfala pat blong ol samting we hem i bin tijim ol pipol.

8 Mo ol samting ia mi bin raetem, we i wan smol pat bitim ol samting we hem i bin tijim ol pipol, mo mi bin raetem olgeta long plan se oli save go karem olgeta bakegen long ol pipol

ia, aot long ol Jentael, folem ol toktok we Jisas i bin talemaot.

9 Mo taem we bae oli bin kasem samting ia, we i nid se oli mas kasem fastaem, blong pruvum fet blong olgeta, mo sapos i olsem ia se bae oli bilivim ol samting ia, afta bae oli soemaot ol samting we i moa bigfala.

10 Mo sapos i olsem se bae oli no bilivim ol samting ia, afta bae oli holem bak long olgeta ol samting we i moa bigfala, kasem panis blong olgeta.

11 Luk, mi mi bin rere blong raetem ol samting ia, evri samting we oli bin raetem long ol buk blong Nifae, be Lod i bin blokem samting ia, i talem: Bae mi pruvum fet blong ol pipol blong mi.

12 Taswe mi, Momon, i raetem ol samting we Lod i bin givim oda long mi. Mo nao mi, Momon, i mekem wan en blong ol toktok blong mi, mo gohed blong raetem ol samting we Lod i bin givim oda long mi.

13 Taswe, mi wantem se yufala i mas luk se i tru we Lod i bin tijim ol pipol ia, blong spes blong tri dei; mo afta samting ia, hem i bin soem hemwan long olgeta plante taem, mo i bin brekem bred plante taem, mo blesem hem, mo givim hemia long olgeta.

14 Mo i bin hapen se hem i bin tijim mo givhan long ol pikinini blong grup blong pipol ia we mi bin tokbaot, mo hem i bin mekem se oli toktok plante, mo oli bin talem long ol papa blong olgeta ol bigfala mo gudfala

samting, mo tu oli moa bigfala bitim wanem hem i bin talem— aot long ol pipol; mo hem i bin mekem ol tang blong olgeta, blong oli save toktok.

15 Mo i bin hapen se afta we hem i bin go antap long heven—long nambatu taem we hem i bin soem hemwan long olgeta, mo hem i bin go long Papa, afta i bin mekem evri sikan blong olgeta i kam oraet, mo blong olgeta we oli no save wokbaot, mo i bin openem ol ae blong ol blaen man blong olgeta mo i bin openem ol sora blong olgeta we ol sorae blong olgeta i fas; mo i tru we hem i bin mekem evri kaen sik i kam oraet long medel blong olgeta, mo i bin resemap wan man aot long ded, mo i bin soemaot paoa blong hem long olgeta, mo i bin go antap long Papa—

16 Luk, i bin hapen long nekis dei se grup blong pipol ia i bin kam tugeta long wan ples, mo oli bin lukim mo oli bin harem ol pikinini ia; yes, ol bebi tu i bin openem ol maot blong olgeta mo talemaot ol gudfala samting; mo ol samting we oli bin talemaot, oli bin blokem se i no mas gat eni man we i raetem olgeta.

17 Mo i bin hapen se ol disae-pol we Jisas i bin jusum i bin stat long taem ia i go aot blong baptaes mo tijim evriwan we bae i kam long olgeta; mo evriwan we i bin kasem baptaes long nem blong Jisas oli bin kam fulap wetem Tabu Spirit.

18 Mo plante long olgeta i bin luk mo i bin harem ol samting

we oli no save talemaot, we i angensem loa blong raetem.

19 Mo oli bin tij, mo oli bin givhan wan long narawan; mo oli bin serem evri samting long medel blong olgeta, evri man i mekem gudfala fasin, wan wetem narawan.

20 Mo i bin hapen se oli bin mekem evri samting semak olsem we Jisas i bin givim oda long olgeta.

21 Mo olgeta we i bin kasem baptaes long nem blong Jisas, oli bin singaotem olgeta jos blong Kraes.

---

### JAPTA 27

---

*Jisas i givim oda long olgeta blong singaotem Jos long nem blong hem — Misen blong hem mo sakrifaes blong pemaot i mekem gospel blong hem — Ol man i kasem oda blong sakem sin mo kasem baptaes blong oli save kam klin tru long Tabu Spirit — Oli mas stap olsem we Jisas i stap. Raonabaot 34–35 yia afta Kraes i bon.*

Mo i bin hapen se taem we ol disaepol blong Jisas i bin stap wokbaot mo i stap prijim ol samting we oli bin harem mo oli bin lukim, mo oli stap baptaes long nem blong Jisas, i bin hapen se ol disaepol i bin kam tugeta mo oli bin joen tugeta long strong prea mo livim kakae.

2 Mo Jisas bakegen i bin soem hemwan long olgeta, from oli bin stap prea long Papa long nem blong hem; mo Jisas i bin kam mo i bin stanap long me-

del blong olgeta, mo i bin talem long olgeta: Yufala i wantem se bae mi givim wanem long yufala?

3 Mo oli bin talem long hem: Lod, mifala i wantem se bae yu talemaot long mifala nem we bae mifala i mas singaotem jos ia; from i gat ol rao long medel blong ol pipol long saed blong samting ia.

4 Mo Lod i bin talem long olgeta: I tru, i tru, mi talem long yufala, from wanem i olsem se ol pipol i mas komplem mo rao from samting ia?

5 Oli no bin ridim ol skripja, we i talem se yufala i mas tekem long yufala nem blong Kraes, we i nem blong mi? From tru long nem ia bae oli singaotem yufala long las dei;

6 Mo eni man we i tekem long hem nem blong mi, mo stap strong kasem en, semfala man ia bae i sev long las dei.

7 Taswe, eni samting we bae yufala i mekem, bae yufala i mekem samting ia long nem blong mi; taswe bae yufala i singaotem jos ia long nem blong mi; mo bae yufala i prea long Papa long nem blong mi, blong bae hem i blesem jos ia from mi.

8 Mo hao nao hem i jos blong mi sapos oli no singaotem hem long nem blong mi? From sapos oli singaotem wan jos long nem blong Moses, ale, hem i jos blong Moses; o sapos oli singaotem hem long nem blong wan man, ale, hem i wan jos blong wan man; be sapos oli singaotem hem long nem blong mi, ale, hem i jos blong mi, sa-

pos i olsem se oli bildim long gospel blong mi.

9 I tru mi talem long yufala, se yufala i bildim long gospel blong mi; taswe bae yufala i singaotem eni samting we yufala i singaotem, long nem blong mi; taswe sapos yufala i prea long Papa, from jos, sapos hem i long nem blong mi, Papa bae i harem yufala;

10 Mo sapos i olsem se jos i bildim long gospel blong mi, ale, bae Papa i soemaot ol wok blong hemwan tru long hem.

11 Be sapos hemia oli no bildim long gospel blong mi, mo i bildim long ol wok blong ol man, o long ol wok blong ol devel, i tru mi talem long yufala, oli gat glad long ol wok blong olgeta blong wan taem, mo i no longtaem en i kam, mo oli katemdaon olgeta mo sakem olgeta i go long faea, long ples ia we i no save aot bakegen.

12 From ol wok blong olgeta i folem olgeta, from hem i from ol wok blong olgeta we oli katemdaon olgeta; taswe tingbaot ol samting we mi bin talem long yufala.

13 Luk, mi bin givim long yufala gospel blong mi, mo hem i gospel we mi bin givim long yufala—se mi bin kam long wol blong mekem wanem we Papa blong mi i wantem, from Papa blong mi i bin sendem mi.

14 Mo Papa blong mi i bin sendem mi blong oli save leftemap mi long kros; mo afta we oli bin leftemap mi long kros, blong mi save pulum evri

man i kam long mi, se olsem we ol man i bin leftemap mi, long sem fasin bae Papa i leftemap ol man, blong stanap long fored blong mi, blong kasem jajmen blong ol wok blong olgeta, sapos oli gud o sapos oli nogud—

15 Mo from stamba tingting ia, oli bin leftemap mi; taswe, folem paoa blong Papa, bae mi pulum evri man i kam long mi, blong oli save kasem jajmen folem ol wok blong olgeta.

16 Mo bae i kam blong hapen, se eni man we i sakem sin mo i kasem baptaes long nem blong mi bae i kam fulap; mo sapos hem i stap strong kasem en, luk, hem bae mi talem se hem i no gat rong long fored blong Papa blong mi long dei we bae mi stanap blong jajem wol.

17 Mo hem we i no stap strong kasem en, semfala man ia i hem we bae oli katemdaon tu mo sakem hem i go long faea, long ples we oli nomo save aot bakegen, from jastis blong Papa.

18 Mo hemia i toktok we hem i bin givim long ol pikinini blong ol man. Mo from stamba tingting ia hem i mekem ol toktok we hem i bin givim i hapen, mo hem i no giaman, be i mekem evri toktok blong hem i hapen.

19 Mo i no gat wan samting we i no klin i save go insaed long kingdom blong hem; taswe i no gat eni samting we i go insaed long spel blong hem, be olgeta ia nomo we i bin wasem ol klos blong olgeta long blad blong mi, from long fet blong olgeta mo oli sakem evri sin

blong olgeta, mo oli holem taet fet blong olgeta kasem en.

20 Nao hemia i komanmen: Sakem sin, yufala evriwan long evri en blong wol, mo kam long mi mo kasem baptaes long nem blong mi, blong yufala i save kam klin taem we yufala i kasem Tabu Spirit, blong yufala i save stanap mo no gat mak long fored blong mi long las dei.

21 I tru, i tru, mi talem long yufala, hemia i gospel blong mi; mo yufala i save ol samting we yufala i mas mekem long jos blong mi; from ol wok we yufala i bin lukim mi mi mekem, samting ia bae yufala i mas mekem tu; from ol samting we yufala i bin lukim mi mi mekem, samting ia bae yufala i mas mekem;

22 Taswe, sapos yufala i mekem ol samting ia, bae yufala i kasem blesing, from bae mi leftemap yufala long las dei.

23 Raetem ol samting we yufala i bin lukim mo i bin harem, be i no ol samting we yufala i no mas raetem.

24 Raetem ol wok blong pipol ia, we bae i hapen, olsem we oli bin raetem, blong ol samting we i bin hapen.

25 From luk, aot long ol buk we oli bin raetem, mo we bae oli raetem, bae pipol ia i kasem jajmen, from tru long ol buk ia bae ol man i save ol wok blong olgeta.

26 Mo luk, oli raetem evri samting tru long Papa; taswe aot long ol buk we bae oli raetem bae wol i kasem jajmen.

27 Mo yufala i save se yufala i mas kam ol jaj blong ol pipol ia,

folem jajmen we bae mi givim long yufala, we bae i stret. Taswe, yufala i mas kam ol wanem kaen man? I tru mi talem long yufala, i olsem mi stap.

28 Mo nao mi go long Papa. Mo i tru mi talem long yufala, eni samting we bae yufala i askem Papa long nem blong mi, bae i givim long yufala.

29 Taswe, askem, mo bae yufala i kasem; noknok, mo bae i open long yufala; from hem we i askem, i kasem, mo long hem we i noknok, bae i open.

30 Mo nao, luk, glad blong mi i bigwan, go kasem we i fulap evriwan, from yufala, mo tu jeneresen ia; yes, mo tu Papa i glad, mo tu evri tabu enjel, from yufala mo jeneresen ia; from we i no gat wan long olgeta i lus.

31 Luk, mi wantem se yufala i andstanem; from mi minim olgeta we i stap laef naoia blong jeneresen ia; mo i no gat wan long olgeta i lus; mo long olgeta mi mi gat glad we i fulwan.

32 Be luk, i mekem mi harem nogud from nambafo jeneresen afta long jeneresen ia, from devel i lidim olgeta i go long kalabus semak olsem we i bin lidim boe blong pedisen; from bae oli salem mi blong silva mo blong gol, mo blong ol samting we bataflae i smasem gud mo we ol man blong stil i save brekem haos blong go insaed mo stil. Mo long dei ia bae mi visitim olgeta, we i blong tanem ol wok blong olgeta i kambak long ol hed blong olgeta bakegen.

33 Mo i bin hapen se taem we

Jisas i bin endem ol toktok ia hem i bin talem long ol disaepol blong hem: Yufala i go insaed long get we i stret; from get ia i stret, mo rod ia i smol we i lidim i go long laef, mo smol namba nomo i gat we i faenem hem; be get ia we i bigwan, mo rod ia i gat bigfala spes we i lidim i go long ded, mo plante i gat we i wokbaot long hem, kasem taem we naet i kam, long taem ia i no gat man i save wok.

---

### JAPTA 28

---

*Naen aot long ol Twelef i wantem mo i kasem promes se bae oli kasem wan ples long kingdom blong Kraes taem oli ded—Trifala man blong Nifae i wantem mo i kasem paoa ova long ded olsem ia blong save stap long wol kasem taem we Jisas i kambak bakegen—Oli bin translet mo lukim ol samting we i agensem loa blong talemaot, mo oli stap givhan naoia long medel blong ol man. Raonabaot 34-35 yia afta Kraes i bon.*

Mo i bin hapen se taem we Jisas i bin talem ol toktok ia, hem i bin toktok long ol disaepol blong hem, wan afta long naranwan, i talem long olgeta: Yufala i wantem se mi givim wanem long yufala, afta we mi mi go long Papa?

2 Mo olgeta evriwan i bin toktok, be tri nomo i no bin toktok, oli talem: Mifala i wantem se afta we mifala i bin laef kasem yia blong man, se ministri blong mifala, we yu bin singaotem mifala long

hem, i save gat wan en, blong mifala i save kam long yu kwiktaem insaed long kingdom blong yu.

3 Mo hem i bin talem long olgeta: Yufala i kasem blesing from we yufala i bin wantem samting ia long mi; taswe, afta we yufala i kasem seventi mo tu yia bae yufala i kam long mi long kingdom blong mi; mo wetem mi, bae yufala i faenem pis.

4 Mo taem we hem i bin toktok long olgeta, hem i tanem hemwan i go long tri ia, mo i bin talem long olgeta: Yufala i wantem se bae mi mekem wanem long yufala afta we mi mi go long Papa?

5 Mo oli bin harem sore long ol hat blong olgeta, from oli fraet blong talem long hem samting we oli bin wantem.

6 Mo hem i bin talem long olgeta: Luk, mi save ol tingting blong yufala, mo yufala i bin wantem samting ia we Jon, we mi lavem tumas, we i bin stap wetem mi long ministri blong mi, bifo we ol Jiu i bin leftemap mi, i bin wantem long mi.

7 Taswe, yufala i kasem moa blesing, from bae yufala i neva testem ded; be bae yufala i stap laef blong lukim evri wok blong Papa long ol pikinini blong ol man, go kasem taem we evri samting bae i hapen folem tingting blong God, taem we bae mi kam long glori blong mi wetem ol paoa blong heven.

8 Mo bae yufala i neva go tru long ol soa blong ded; be taem we bae mi kam long glori blong

mi bae yufala i jenis kwiktaem, aot long save ded i go long no save ded; mo afta bae yufala i kasem blesing long kingdom blong Papa blong mi.

9 Mo bakegen, bae yufala i no gat eni soa blong bodi taem we yufala i stap long bodi blong mit mo bun, o sore hemia nomo sapos i no from ol sin blong wol; mo evri samting ia bae mi mekem from samting ia we yufala i bin wantem long mi, from yufala i bin wantem se bae yufala i save karem ol sol blong ol man i kam long mi, long taem we wol i stanap.

10 Mo from stamba tingting ia bae yufala i kasem glad we i fulwan; mo bae yufala i sidaon long kingdom blong Papa blong mi; yes, glad blong yufala bae i kam fulap gud, i semak olsem we Papa i bin givim long mi glad we i fulap gud; mo bae yufala i kam olsem mi mi stap, mo mi mi semak olsem Papa; mo Papa mo mi i wan;

11 Mo Tabu Spirit i stap witnes long saed blong Papa mo mi; mo Papa i givim Tabu Spirit long ol pikinini blong ol man, from mi.

12 Mo i bin hapen se afta we Jisas i bin talem ol toktok ia, hem i bin tajem evriwan long olgeta wetem fingga blong hem, be i no ol trifala we bae i stap laef, mo afta hem i bin aot.

13 Mo luk, ol heven i bin open, mo oli bin go antap long heven, mo oli bin lukim mo oli bin harem ol samting we oli no save talemaot.

14 Mo oli bin blokem olgeta blong talemaot ol samting ia;

mo tu oli no bin givim long olgeta paoa blong oli save talemaot ol samting we oli bin lukim mo oli bin harem;

15 Mo sapos oli bin stap long bodi o aot long bodi, oli no bin save luksave; from i bin luk olsem long olgeta olsem se oli bin jenis, se oli bin jenis aot long bodi ia blong mit mo bun i go long wan bodi we i no save ded, blong oli save luk ol samting blong God.

16 Be i bin hapen se oli bin bakegen givhan long fes blong graon; be oli no bin givhan long ol samting we oli bin harem mo oli bin lukim, from komanmen we oli bin givim olgeta long saed blong heven.

17 Mo nao, sapos oli bin save ded o oli no bin save ded, stat long dei we oli bin jenis, mi mi no save;

18 Be hemia mi save, folem histri we oli bin givim—oli bin go aot long fes blong graon, mo bin givhan long evri pipol, oli joenem olgeta long jos we i bin biliv long prijing blong olgeta; oli baptaesem olgeta, mo olgeta we i bin kasem baptaes i bin kasem Tabu Spirit.

19 Mo olgeta we i no blong jos i bin sakem olgeta ia long kalabus. Mo ol kalabus i no bin save holem taet olgeta, from oli bin brokbrok long tu.

20 Mo oli bin sakem olgeta daon insaed long graon; be oli bin kilim graon wetem toktok blong God, inaf blong mekem se tru long paoa blong hem, oli bin kamaot long ol dip ples blong graon; mo taswe oli no

bin save digim ol hol we i naf blong holem taet olgeta.

21 Mo tri taem oli bin sakem olgeta insaed long oven blong faea mo oli no bin kasem wan kil.

22 Mo tu taem oli bin sakem olgeta insaed long wan hol blong ol wael anamol; mo luk oli bin pleplei wetem ol anamol ia olsem wan pikinini wetem wan smol sipsip we hem i stap titi yet, mo i no bin kasem kil.

23 Mo i bin hapen se olsem ia nao oli bin go aot long medel blong evri pipol blong Nifae, mo oli bin prijim gospel blong Kraes long evri pipol long fes blong graon; mo oli bin jenisim laef i go long Lod, mo oli bin kam tugeta long jos blong Kraes, mo olsem ia nao ol pipol blong jeneresen ia i bin kasem blesing, folem toktok blong Jisas.

24 Mo nao mi, Momon, i mekem wan en blong toktok long saed blong ol samting ia blong wan taem.

25 Luk, mi mi bin rere blong raetem ol nem blong olgeta we bae oli neva testem ded, be Lod i bin blokem; taswe mi mi no raetem olgeta, from oli haed aot long wol.

26 Be luk, mi bin luk olgeta, mo oli bin givhan long mi.

27 Mo luk bae oli stap long medel blong ol Jentael, mo ol Jentael bae oli no save olgeta.

28 Bae oli stap tu long medel blong ol Jiu, mo ol Jiu bae oli no save olgeta.

29 Mo bae i kam blong hapen, taem we Lod i luk se i gud long waes tingting blong hem, se

bae oli givhan long evri traeb blong Isrel we i bin seraot olbaot, mo long evri kantri, famle, lanwis mo pipol, mo bae i karem i kam, aot long olgeta, i go long Jisas, plante sol, blong mekem se samting we oli wantem i save hapen, mo tu from paoa blong God blong winim tingting, we i stap long olgeta.

30 Mo oli olsem ol enjel blong God, mo sapos bae oli prea long Papa long nem blong Jisas, oli save soemaot olgeta long eni man we oli luk se i gud.

31 Taswe, ol bigfala mo gudfala wok bae i hapen tru long olgeta, bifo long bigfala dei we i stap kam, taem we evri pipol, i tru we oli mas stanap long fored blong jea blong jajmen blong Kraes;

32 Yes mo tu long medel blong ol Jentael bae i gat wan bigfala mo gudfala wok we i hapen tru long olgeta, bifo long dei blong jajmen.

33 Mo sapos yufala i bin gat evri skripja we i givim wan histri blong evri gudfala wok blong Kraes, bae yufala, folem ol toktok blong Kraes, i save se ol samting ia i mas hapen tru.

34 Mo sore tumas long hem we bae i no lisen long ol toktok blong Jisas, mo tu long olgeta we hem i bin jusum mo i bin sendem i go long medel blong olgeta; from eni man we i no kasem ol toktok blong Jisas mo ol toktok blong olgeta we hem i bin sendem, i no kasem hem; mo taswe bae hem i no kasem olgeta long las dei.

35 Mo bae i moa gud long



olgeta sapos oli no bin bon. From yufala i ting se yufala i save ronwe long jastis blong wan God we i kros, we ol pipol i bin purumbut long hem andanit long ol leg blong olgeta, blong mekem se tru long samting ia fasin blong sevem man i save kam?

36 Mo nao luk, olsem we mi bin toktok long saed blong olgeta we Lod i bin jusum, yes, mo tu tri we i bin go antap long ol heven, we mi no bin save sapos oli bin kam klin aot long ded i go long no save ded—

37 Be luk, afta we mi bin raetem, mi bin askem long Lod, mo hem i bin soemaot long mi we i mas nid gat wan jenis i hapen long ol bodi blong olgeta, o sapos no oli mas nid olsem se oli mas testem ded;

38 Taswe, blong mekem se maet oli no testem ded, i bin gat wan jenis i bin hapen long ol bodi blong olgeta, blong oli no save harem i soa long bodi o sore, hemia nomo sapos i no from ol sin blong wol.

39 Nao jenis ia i no bin semak long hemia we bae i hapen long las dei; be i bin gat wan jenis i bin hapen long olgeta, inaf blong mekem se Setan i no save gat paoa ova long olgeta, blong hem i no save temptem olgeta; mo oli bin kam klin long bodi blong mit mo bun, mekem se oli bin tabu, mo se ol paoa blong wol i no bin save holem taet olgeta.

40 Mo long ples ia bae oli stap kasem jajmen dei blong Kraes; mo long dei ia, oli mas kasem

wan jenis we i moa bigwan, mo blong oli kasem olgeta insaed long kingdom blong Papa blong oli nomo go aot, be blong stap wetem Papa long taem we i no save finis long ol heven.

---

## JAPTA 29

---

*Taem we Buk blong Momon i kam-aot, i wan saen se Lod i bin statem blong karem Isrel i kam tugeta mo mekem ol kavenan blong hem i hapen—Olgeta we i sakemaot ol revelesen blong hem blong las dei mo ol presen bae oli kasem panis. Raonabaot 34–35 yia afta Kraes i bon.*

Mo nao luk, mi talem long yufala se taem we Lod bae i luk se i stret, long waes tingting blong hem, blong ol toktok ia bae i kam long ol Jentael folem toktok blong hem, long taem ia yufala i save gat save se kavenan we Papa i bin mekem wetem ol pikinini blong Isrel, long saed blong kambak blong olgeta long ol graon blong olgeta we i kam long ol papa, i stat finis blong hapen.

2 Mo yufala i save gat save se ol toktok blong Lod, we ol tabu profet i bin tokbaot, bae evriwan i hapen; mo yufala i no nid blong talem se Lod i pusum bak taem we hem i kam long ol pikinini blong Isrel.

3 Mo yufala i no nid blong tingting long ol hat blong yufala se ol toktok we oli bin talemaot i blong nating, from luk, Lod bae i tingbaot kavenan blong hem we hem i bin mekem

wetem ol pipol blong hem blong laen blong Isrel.

4 Mo taem we bae yufala i luk ol toktok ia i stap kamaot long medel blong yufala, ale yufala i no nid blong tok agensem ol wok blong Lod, from naef blong faet blong jastis blong hem i stap long raet han blong hem; mo luk, long dei ia, sapos bae yufala i tok agensem ol wok blong hem, bae hem i mekem se hem i winim yufala i no long taem.

5 Sore tumas long hem we i tok agensem ol wok blong Lod; yes, sore tumas long hem we bae i tanem baksaed long Kraes mo ol wok blong hem!

6 Yes, sore tumas long hem we bae i tanem baksaed long ol revelesen blong Lod, mo we bae i talem se Lod i nomo wok tru long revelesen, o tru long profesi, o tru long ol presen, o tru long ol fasin blong toktok long ol lanwis, o tru long ol fasin blong mekem ol sikman i oraet, o tru long paoa blong Tabu Spirit!

7 Yes, mo sore tumas long hem we bae i talem long dei ia, blong kasem ol rij samting, se i no save gat wan merikel we i hapen tru long Jisas Kraes; from hem we i mekem samting ia bae i kam olsem boe blong pedisen, from hem i no bin gat sore, folem toktok blong Kraes!

8 Yes, mo yufala i no nid blong wesil eni moa, o tok agensem, o jikim ol Jiu, o eni long smol haf blong laen blong Isrel we i stap laef yet; from luk, Lod i stap tingbaot kavenan blong hem

wetem olgeta, mo bae hem i mekem long olgeta folem olsem samting we hem i bin promes.

9 Taswe yufala i no nid blong ting se yufala i save tanem raet han blong Lod i go long lef, blong hem i no save mekem jajmen blong mekem kavenan we hem i bin mekem wetem laen blong Isrel i hapen.

---

### JAPTA 30

---

*Ol Jentael blong lata-dei i kasem oda blong sakem sin, kam long Kraes, mo oli kaontem olgeta wetem laen blong Isrel. Raonabaot 34–35 yia afta Kraes i bon.*

LISIN, O yufala ol Jentael, mo harem ol toktok blong Jisas Kraes, Pikinini blong God we i stap laef, we hem i bin givim oda long mi se mi mas talemaot long saed blong yufala, from, luk hem i givim oda long mi se mi mas raetem, i talem:

2 Tanem, yufala evri Jentael, aot long ol nogud fasin blong yufala; mo sakem sin blong ol nogud fasin blong yufala, long ol giaman fasin blong yufala mo ol trik, mo long ol fasin blong yufala blong slip olbaot, mo long ol sikret rabis fasin blong yufala, mo ol fasin blong yufala blong wosipim aedol, mo long ol fasin blong yufala blong kilim man i ded, mo ol fasin blong yufala blong giaman pris, mo ol tingting blong yufala blong wantem samting blong narafala man, mo ol fasin blong yufala blong rao, mo long evri nogud fasin

blong yufala mo ol rabis sin, mo kam long mi, mo kasem baptaes long nem blong mi, mo yufala i save kam klin aot long ol sin blong yufala, mo kam

fulap wetem Tabu Spirit, blong oli save kaontem yufala wetem ol pipol blong mi we oli blong laen blong Isrel.

## NAMBAFO NIFAE BUK BLONG NIFAE

WE I BOE BLONG NIFAE—WAN LONG OL DISAEPOL BLONG JISAS KRAES

Wan histri blong ol pipol blong Nifae, folem histri blong hem.

*Ol man blong Nifae mo ol man blong Leman, olgeta evriwan i Jenisim laef i go long Lod—Oli serem evri samting long olgeta, mekem ol merikel, mo kam antap gud long graon—Afta tu hundred yia i pas, ol fasin blong seraot, ol nogud fasin, ol giaman jos, mo ol fasin blong givim hadtaem i girap—Afta tri hundred yia i pas, ol man blong Nifae tugeta wetem ol man blong Leman i stap nogud—Amaron i haedem ol tabu histri. Raonabaot 35–321 yia afta Kraes i bon.*

**M**O i bin hapen se teti mo fo Myia i bin pas i gowe, mo tu teti mo faef, mo luk ol disaepol blong Jisas i bin mekem wan jos blong Kraes long evri graon we i stap raonabaot. Mo olgeta evriwan we i bin kam long olgeta, mo i bin sakem ol sin blong olgeta tru, i bin kasem baptaes long nem blong Jisas; mo oli bin kasem Tabu Spirit tu.

2 Mo i bin hapen long teti mo sikis yia, evri pipol i bin jenisim laef i go long Lod, long ful

fes blong graon, ol man blong Nifae tugeta wetem ol man blong Leman, mo i no bin gat ol faet mo ol rao long medel blong olgeta, mo evri man i bin mekem gudfala fasin, wan wetem narawan.

3 Mo oli bin serem evri samting long medel blong olgeta; taswe i no bin gat ol rij mo pua, slef mo man we i fri, be oli bin mekem evriwan i kam fri, mo tekem pat long presen blong heven.

4 Mo i bin hapen se teti mo seven yia i bin pas i gowe tu, mo pis i bin gohed blong stap long graon.

5 Mo i bin gat ol bigfala mo gudfala wok we i bin hapen tru long ol disaepol blong Jisas, inaf blong mekem se oli bin mekem ol sikman i kam oraet, mo leftemap ol ded, mo oli bin mekem olgeta we oli no save wokbaot blong wokbaot, mo olgeta we i blaen blong save lukluk, mo olgeta we sorae blong olgeta i fas blong save harem samting, mo evri kaen merikel oli bin mekem long

medel blong ol pikinini blong ol man; mo tru long nem blong Jisas nomo oli bin mekem ol merikel.

6 Mo olsem ia nao teti mo eit yia i bin pas i gowe, mo tu namba teti mo naen, mo foti mo wan, mo foti mo tu, yes, go kasem foti mo naen yia i bin pas i gowe, mo tu fifti mo wan, mo fifti mo tu; yes, mo tu go kasem fifti mo naen yia i bin pas i gowe.

7 Mo Lod i bin mekem olgeta i kam antap gud tumas long graon; yes, inaf blong mekem se oli bin bildim ol bigtaon bakegen long ol ples we ol bigtaon i bin bon.

8 Yes, mo tu bigfala bigtaon Sarahemla, oli bin mekem se oli bildim bakegen.

9 Be i bin gat plante bigtaon we i bin draon, mo ol wota i bin kam antap long ples blong olgeta; taswe ol bigtaon ia oli no bin save mekem gud.

10 Mo nao, luk, i bin hapen se ol pipol blong Nifae i bin kam strong, mo oli bin kam plante kwiktaem tumas, mo oli bin kam wan pipol we i naes tumas mo gudfala.

11 Mo oli bin kasem mared, mo oli letem olgeta blong kasem mared, mo oli bin kasem blesing folem plante promes we Lod i bin mekem long olgeta.

12 Mo oli no bin wokbaot bakegen folem ol wok mo ol odinens blong loa blong Moses; be oli bin wokbaot folem ol komanmen we oli bin kasem long Lod blong olgeta mo God blong olgeta, oli gehed blong

livim kakae mo prea, mo blong kam tugeta plante blong prea tugeta wetem blong harem toktok blong Lod.

13 Mo i bin hapen se i no bin gat eni rao long medel blong evri pipol, long ful graon; be i bin gat ol bigfala merikel we i bin hapen long medel blong ol disaepol blong Jisas.

14 Mo i bin hapen se seventi mo wan yia i bin pas i gowe, mo tu seventi mo tu yia, yes, mo blong endem, go kasem seventi mo naen yia i bin pas i gowe; yes, mo tu wan handred yia i bin pas i gowe, mo ol disaepol blong Jisas, we hem i bin jusum, olgeta evriwan i bin go long paradaes blong God, be trifala ia we bae i stap nomo; mo i bin gat ol narafala disaepol we oli bin odenem olgeta long ples blong olgeta; mo tu plante long jeneresen ia i bin pas i gowe.

15 Mo i bin hapen se i no bin gat eni rao long graon, from lav blong God we i bin stap insaed long ol hat blong ol pipol.

16 Mo i no bin gat ol tingting blong wantem samting blong narafala man, o ol rao, o ol faet, o ol fasin blong slip olbaot, o ol giaman, o ol fasin blong kilim man i ded, o eni kaen fasin blong gat rabis tingting; mo i tru we i no save gat wan pipol we i moa hapi long medel blong evri pipol we han blong God i bin mekem olgeta.

17 I no bin gat ol man blong stil, o ol man blong kilim man i ded, mo tu i no bin gat ol man blong Leman, o eni kaen pipol

we oli singaotem long nem blong eni man; be oli bin stap long wan, ol pikinini blong Kraes, mo oli kasem kingdom blong God.

18 Mo hamas nao oli bin kasem blessing! From Lod i bin blesem olgeta long evri wok blong olgeta; yes, mo tu Lod i bin blesem olgeta mo mekem olgeta i kam antap gud kasem wan hundred mo ten yia i bin pas i gowe; mo fasfala jeneresen afta Kraes i bin pas i gowe, mo i no bin gat eni rao long ful graon.

19 Mo i bin hapen se Nifae, hem we i bin kipim lasfala histria, (mo hem i bin kipim hemia long ol buk blong Nifae) i bin ded, mo boe blong hem Amos i bin kipim hemia long ples blong hem; mo hem i bin kipim hemia long ol buk blong Nifae tu.

20 Mo hem i bin kipim hemia blong eiti mo fo yia, mo i bin gat pis i stap yet long graon, be wan smol pat blong ol pipol nomo we i bin go agensem jos, mo oli bin tekem long olgeta nem blong ol man blong Leman; taswe i bin stat blong gat ol man blong Leman bakegen long graon.

21 Mo i bin hapen se Amos i bin ded tu, (mo samting ia i bin wan hundred mo naenti mo fo yia afta we Kraes i bin kam) mo boe blong hem Amos i bin kipim histria long ples blong hem; mo hem tu i bin kipim hemia long ol buk blong Nifae; mo oli bin raetem hemia tu insaed long buk blong Nifae, we i buk ia.

22 Mo i bin hapen se tu han-

dred yia i bin pas i gowe; mo nambatu jeneresen i bin pas i gowe evriwan be wan smol namba nomo.

23 Mo nao mi, Momon, i wantem se yufala i mas save se ol pipol oli bin kam plante, inaf blong mekem se oli bin seraot long fes blong ful graon, mo se oli bin kam rij tumas, from oli bin kam antap gud tru long Kraes.

24 Mo nao, long hemia tu hundred mo wan yia, i bin stat blong gat long medel blong olgeta, olgeta we oli bin leftemap olgeta long hae tingting, olsem we oli stap putum ol klos we i sas tumas, mo evri kaen naes perel, mo long ol naes samting blong wol ia.

25 Mo stat long taem ia i go, oli no bin serem ol samting blong olgeta mo ol kakae blong olgeta long medel blong olgeta.

26 Mo oli bin stat blong seraot long ol grup; mo oli bin stat blong bildimap ol jos blong olgeta bakegen blong kasem mane, mo oli bin stat blong tanem baksaed long tru jos blong Kraes.

27 Mo i bin hapen se taem we tu hundred mo ten yia i bin pas i gowe, i bin gat plante jos long graon; yes, i bin gat plante jos we i bin talemaot se oli save Kraes, be stil oli bin tanem baksaed long bigfala pat blong gospel blong hem, inaf blong mekem se oli bin akseptem evri kaen nogud fasin, mo oli bin givim ol samting we i tabu long hem we oli bin blokem olgeta from we oli no stret.

28 Mo jos ia i bin kam bigwan tumas from nogud fasin, mo from paoa blong Setan we i bin kasem kontrol long ol hat blong olgeta.

29 Mo bakegen, i bin gat wan narafala jos we i bin tanem baksaed long Kraes; mo oli bin givim hadtaem long tru jos blong Kraes, from tingting blong olgeta i stap daon mo bilif blong olgeta long Kraes; mo oli bin luk daon long olgeta ia from ol plante merikel we i bin hapen long medel blong olgeta.

30 Taswe oli bin yusum paoa mo raet ova long ol disaepol blong Jisas we i bin stap wetem olgeta, mo oli bin sakem olgeta i go long prisen; be tru long paoa blong toktok blong God, we i bin stap long olgeta ol prisen i bin brokbrok long tu, mo oli bin go aot mo mekem ol bigfala merikel long medel blong olgeta.

31 Be, mo i nomata long evri merikel ia, ol pipol i bin mekem ol hat blong olgeta i kam strong, mo oli bin lukaotem blong kilim olgeta i ded, we i semak olsem we ol Jiu long Jerusalem i bin lukaotem blong kilim Jisas i ded, folem toktok blong hem.

32 Mo oli bin sakem olgeta insaed long ol oven blong faea, mo oli bin kam aot mo i no bin kasem wan kil.

33 Mo olgeta tu i bin sakem olgeta long ol hol blong ol wael anamol, mo oli bin pleiplei wetem ol wael anamol olsem wan pikinini wetem wan yang sipsip; mo oli bin kam fored aot

long medel blong olgeta, oli no kasem wan kil.

34 Be, ol pipol i bin mekem ol hat blong olgeta i kam strong, from plante pris mo ol giaman profet i bin lidim olgeta, blong bildimap plante jos, mo blong mekem evri kaen fasin blong nogud fasin. Mo oli bin kilim ol pipol blong Jisas; be ol pipol blong Jisas i no bin kilim bakegen. Mo olsem ia nao oli bin kam slak from we oli bin lusum bilif mo nogud fasin, long wan yia i go long narafala yia, we i go kasem taem we tu handred mo teti yia i bin pas i gowe.

35 Mo nao i bin hapen se long yia ia, yes, long tu handred mo teti mo wan yia, i bin gat wan bigfala seraot long medel blong ol pipol.

36 Mo i bin hapen se long yia ia, wan grup blong pipol i bin girap, we oli bin singaotem olgeta ol man blong Nifae, mo olgeta i bin ol tru man blong biliv long Kraes; mo long medel blong olgeta i bin gat olgeta we ol man blong Leman i bin singaotem — ol man blong Jakob, mo ol man blong Josef, mo ol man blong Soram;

37 Taswe ol tru man blong biliv long Kraes, mo ol tru man blong wosip blong Kraes, (long medel blong olgeta i bin gat ol trifala disaepol blong Jisas we bae i stap) oli bin singaotem olgeta ol man blong Nifae, mo ol man blong Jakob, mo ol man blong Josef, mo ol man blong Soram.

38 Mo i bin hapen se olgeta we i bin sakemaot gospel, oli bin

singaotem olgeta ol man blong Leman, mo ol man blong Lem-yul, mo ol man blong Ismael; mo oli no bin kam slak from oli bin lusum bilif, be olsem we oli bin wantem oli bin go agensem gospel blong Kraes; mo oli bin tijim ol pikinini blong olgeta se oli no mas biliv, semak olsem ol bubu blong olgeta, stat long stat, oli bin kam slak from oli bin lusum bilif.

39 Mo i bin from nogud fasin mo rabis sin blong ol papa blong olgeta, semak olsem we i bin stap long stat. Mo oli bin tijim olgeta blong no laekem ol piki-nini blong God, semak olsem oli bin tijim ol man blong Leman blong no laekem ol pikinini blong Nifae stat long stat.

40 Mo i bin hapen se tu hundred mo foti mo fo yia i bin pas i gowe, mo olsem ia nao i bin ol laef blong ol pipol. Mo moa nogud pat blong pipol ia i bin kam strong, mo i bin kam plante moa tumas bitim we ol pipol blong God i bin stap.

41 Mo oli bin gohed yet blong bildimap ol jos long olgeta bakegen, mo flasem olgeta wetem evri kaen gudgudfala samting. Mo olsem ia nao tu hundred mo fifti yia i bin pas i gowe, mo tu, tu hundred mo siksti yia.

42 Mo i bin hapen se ol nogud pat blong pipol ia i bin stat bakegen blong bildimap ol sikret promes mo ol grup blong Gadianton.

43 Mo tu ol pipol we oli bin singaotem olgeta ol pipol blong Nifae i bin stat blong gat hae tingting insaed long ol hat

blong olgeta, from ol rij samting blong olgeta we i tumas, mo kam blong ting hae olsem ol brata blong olgeta, ol man blong Leman.

44 Mo stat long taem ia ol disaepol i bin stat blong harem nogud from ol sin blong wol.

45 Mo i bin hapen se taem we tri hundred yia i bin pas i gowe, ol pipol blong Nifae tugeta wetem ol man blong Leman i bin kam nogud, wan olsem narawan.

46 Mo i bin hapen se ol man blong stil blong Gadianton i bin go seraot long fes blong ful graon; mo i no bin gat wan we i stret hemia nomo sapos i no bin ol disaepol blong Jisas. Mo gol mo silva oli bin hipimap plante long saed, mo oli bin mekem bisnes long evri kaen bisnes.

47 Mo i bin hapen se afta we tri hundred mo faef yia i bin pas i gowe, (mo ol pipol i bin gohed yet blong stap long nogud fasin) Amos i bin ded; mo brata blong hem, Amaron, i bin kipim histri long ples blong hem.

48 Mo i bin hapen se taem we tri hundred mo twenti yia i bin pas i gowe, Amaron, from Tabu Spirit i bin lidim hem, i bin haedem ol histri we i tabu—yes, we i evri tabu histri, we oli bin pasem i go daon long wan jeneresen i go long narafala jeneresen, we oli tabu—go kasem tri hundred mo twenti yia afta we Kraes i bin kam.

49 Mo hem i bin haedem olgeta wetem Lod, blong mekem se oli save kam bakegen long smol haf blong laen blong

Jekob we oli laef yet, folem ol profesi mo ol promes blong

Lod. Mo olsem ia nao i en blong histri blong Amaron.

## BUK BLONG MOMON

### JAPTA 1

*Amaron i talem long Momon long saed blong ol tabu histri—Faet i stat bitwin ol man blong Nifae mo ol man blong Leman—Lod i tekemaot trifala man blong Nifae—Nogud fasin, fasin blong no biliv, ol fasin blong mekem majik, mo fasin blong mekem posen i stap strong. Raonabaot 321-326 yia afta Kraes i bon.*

**M**O nao mi, Momon, i mekem wan histri blong ol samting we mi bin lukim tugeta wetem we mi bin harem, mo mi singaotem hem Buk blong Momon.

2 Mo klosap sem taem we Amaron i bin haedem ol histri wetem Lod, hem i bin kam long mi, (long taem ia mi mi klosap ten yia, mo mi bin stat blong lanem samting folem fasin blong lanem blong ol pipol blong mi) mo Amaron i bin talem long mi: mi luk se yu yu wan tru pikinini, mo yu yu lanem samting kwiktaem nomo.

3 Taswe, taem we yu yu klosap twenti mo fo yia, mi wantem se yu mas tingbaot ol samting we yu bin lukim long saed blong ol pipol ia; mo taem we yu yu kasem yia ia, go long graon Antum, long wan hil we bae oli singaotem, Sim; mo long

ples ia mi bin putum wetem Lod, evri tabu toktok long saed blong pipol ia.

4 Mo luk, bae yu tekem ol buk blong Nifae long yu bakegen, mo ol narafala buk yu mas livim long ples we oli stap; mo yu mas raetem long ol buk blong Nifae, evri samting we yu bin lukim long saed blong ol pipol ia.

5 Mo mi, Momon, from mi wan laen blong Nifae, (mo nem blong papa blong mi i bin Momon) mi bin tingbaot ol samting we Amaron i bin givim oda long mi.

6 Mo i bin hapen, se mi, from mi gat leven yia, papa blong mi i bin tekem mi i go long graon long saot, go kasem graon blong Sarahemla.

7 Ful fes blong graon i bin gat plante haos we i bin kavremap, mo namba blong ol pipol i bin plante olsem klosap, olsem se hem i bin ol sanbij blong solwota.

8 Mo i bin hapen long yia ia i bin stat blong gat wan faet bitwin ol man blong Nifae, we i bin gat ol laen blong Nifae mo ol laen blong Jakob mo ol laen blong Josef mo ol laen blong Soram; mo faet ia i bin bitwin ol man blong Nifae, mo ol laen blong Leman mo ol laen blong Lemyul mo ol laen blong Ismael.



9 Nao ol laen blong Leman mo ol laen blong Lemual mo ol laen blong Ismael oli bin singaotem olgeta ol man blong Leman, mo tufala grup ia i bin ol man blong Nifae mo ol man blong Leman.

10 Mo i bin hapen se faet ia i bin stat blong stap long medel blong olgeta long ol boda blong Sarahemla, klosap long ol wota blong Saedon.

11 Mo i bin hapen se ol man blong Nifae i bin karem i kam tugeta, wan bigfala namba blong ol man, namba ia i bitim teti taosen. Mo i bin hapen se oli bin gat long semfala yia ia, wan namba blong ol faet, long ol faet ia ol man blong Nifae i bin winim ol man blong Leman mo oli bin kilim ded plante long olgeta.

12 Mo i bin hapen se ol man blong Leman i bin stopem plan blong olgeta, mo i bin gat pis i stap long graon; mo pis i bin stap blong spes blong klosap fo yia, mekem se i no bin gat blad i ron.

13 Be nogud fasin i bin stap strong long fes blong ful graon, inaf blong mekem se Lod i bin tekemaot ol disaepol blong hem we hem i lavem tumas, mo wok blong ol merikel mo blong mekem sikman i kam oraet i bin stop from rabis fasin blong ol pipol.

14 Mo i no bin gat eni presen we i kam long Lod, mo Tabu Spirit i no bin kam long eniwan, from nogud fasin blong olgeta mo fasin blong no gat bilif.

15 Mo mi, from mi bin gat fiftin yia mo from we tingting

blong mi i tru, taswe Lod i bin visitim mi, mo mi bin testem mo mi bin save long gudfala samting we i kam long Jisas.

16 Mo mi bin traem blong prij long ol pipol ia, be maot blong mi i bin sat, mo Lod i no bin letem mi blong mi save prij long olgeta; from luk, olsem we oli bin wantem oli bin go agensem God blong olgeta; mo Lod i bin tekem i gowe ol disaepol blong hem we hem i lavem tumas aot long graon, from rabis fasin blong olgeta.

17 Be mi bin stap long medel blong olgeta, be Lod i no bin letem mi blong mi prij long olgeta, from ol hat blong olgeta i strong tumas; mo from ol hat blong olgeta i strong tumas, Lod i bin panisim graon from olgeta.

18 Mo ol Gadianton man blong stil, we i bin stap long medel blong ol man blong Leman, i bin stap plante tumas long graon, inaf blong mekem se ol pipol we i stap long hem i bin stat blong haedem ol rij samting blong olgeta long graon; mo oli bin kam glis, from Lod i bin panisim graon ia, blong mekem se oli no save holem taet olgeta, o karembak olgeta bakegen.

19 Mo i bin hapen se i bin gat ol fasin blong karem nakaemas, mo ol fasin blong mekem posen, mo ol fasin blong mekem majik; mo paoa blong nogud wan i bin hapen long ful fes blong graon, go kasem we evri toktok blong Abinadae i bin hapen, mo tu Samuel man blong Leman.

## JAPTA 2

*Momon i lidim ol ami blong ol man blong Nifae—Blad mo fasin blong kilim man i ded i kavremap kantri—Ol man blong Nifae i krae bigwan mo oli sore wetem sore blong olgeta we oli panis—Dei blong gladhat i pas—Momon i kasem ol buk blong Nifae—Ol faet i gohed. Raonabaot 327-350 yia afta Kraes i bon.*

Mo i bin hapen long semfala yia ia, i bin stat blong gat wan faet bakegen bitwin ol man blong Nifae mo ol man blong Leman. Mo i nomata we mi mi yangfala, bodi blong mi i bin bigwan; taswe ol pipol blong Nifae i bin jusum mi se mi mi mas kam lida blong olgeta, o lida blong ol ami blong olgeta.

2 Taswe i bin hapen se long sikstin yia blong mi, mi bin go aot long fored blong wan ami blong ol man blong Nifae, agensem ol man blong Leman; taswe tri handred mo twenti mo sikis yia i bin pas i gowe.

3 Mo i bin hapen se long namba tri handred mo twenti mo seven yia ol man blong Leman i bin kam agensem mifala wetem bigfala paoa we i tumas, inaf blong mekem se oli bin mekem ol ami blong mi i fraet; taswe oli no bin wantem faet, mo oli bin stat blong ronwe i go long ol kantri long not.

4 Mo i bin hapen se mifala i bin kam long bigtaon blong Angola, mo mifala i bin tekem bigtaon ia, mo mifala i bin mekem rere blong lukaotem

gud mifala agensem ol man blong Leman. Mo i bin hapen se mifala i bin mekem bigtaon ia i kam strong wetem paoa blong mifala; be i nomata long ol wol blong mifala, ol man blong Leman i bin kam agensem mifala mo oli bin ronem mifala aot long bigtaon ia.

5 Mo tu oli bin ronem mifala fored aot long graon blong Daved.

6 Mo mifala i bin maj i go aot mo i bin kam long graon blong Josua, we i bin stap long ol boda wes klosap long so blong solwota.

7 Mo i bin hapen se mifala i bin karem i kam tugeta ol pipol blong mifala kwik olsem we i save hapen, blong mekem se mifala i save karem olgeta i kam tugeta long wan grup.

8 Be luk, graon i bin fulap wetem ol stilman mo wetem ol man blong Leman; mo i nomata long bigfala fasin blong smasem gud we i bin stap ova long ol pipol blong mi, oli no bin sakem ol rabis fasin blong olgeta; taswe i bin gat blad mo fasin blong kilim man i ded i seraot truaot long ful fes blong graon, tugeta long pat blong ol man blong Nifae mo tu ol man blong Leman, evri pipol long kantri ia i bin go agens we i bin go truaot long ful fes blong graon.

9 Mo nao, ol man blong Leman i bin gat wan king, mo nem blong hem i Eron, mo hem i bin kam agensem mifala wetem wan ami blong foti mo fo taosen. Mo luk, mi bin stanap agensem hem wetem foti mo tu

taosen. Mo i bin hapen se mi bin winim hem wetem ami blong mi mekem se hem i bin ronwe long fored blong mi. Mo luk, evri samting ia i bin hapen, mo tri handred mo teti yia i bin pas i gowe.

10 Mo i bin hapen se ol man blong Nifae i bin stat blong sakem rabis fasin blong olgeta, mo i bin stat blong singaot olsem we profet Samuel i bin profesae; from luk i no gat eni man we i bin save holem taet samting we i blong hem, from ol stilman, mo ol man blong stil, mo ol man blong kilim man i ded, mo wok blong mekem majik, mo fasin blong mekem posen we i bin stap long graon.

11 Olsem ia nao i bin stat blong gat wan sore, mo wan krae long ful graon from ol samting ia, mo i hapen moa long medel blong ol pipol blong Nifae.

12 Mo i bin hapen se taem we mi, Momon, mi bin luk krae blong olgeta mo sore blong olgeta mo harem nogud blong olgeta long fored blong Lod, hat blong mi i bin stat blong glad insaed long mi, from mi save ol sore mo fasin blong save go tru long ol hadtaem wetem longfala tingting blong Lod, taswe from mi bin ting se bae hem i gat sore long olgeta blong mekem se bae oli kam bakegen wan stret pipol.

13 Be luk hemia, glad blong mi i bin blong nating, from sore blong olgeta i no bin mekem i sakem sin, from gudfala fasin blong God; be hem i sore blong olgeta we i kasem panis, from

Lod i no bin letem olgeta oltaem blong harem glad long sin.

14 Mo oli no bin kam long Jisas wetem ol hat we i fulap wetem sore mo ol spirit we i wantem blong sakem sin, be oli bin tok nogud agensem God, mo oli bin wantem blong ded. Be bae oli traehad wetem naef blong faet from ol laef blong olgeta.

15 Mo i bin hapen se sore blong mi i bin kambak long mi bakegen, mo mi bin luk se dei blong sore i bin pas wetem olgeta, long saed blong wol mo blong spirit; from mi bin luk plante taosen long olgeta we oli bin katemdaon olgeta taem we oli bin go agensem God blong olgeta long fes blong ol man, mo oli bin hipimap olgeta olsem sitsit blong anamol long fes blong graon. Mo olsem ia nao tri handred mo foti mo fo yia i bin pas i gowe.

16 Mo i bin hapen se long namba tri handred mo foti mo faef yia ol man blong Nifae i bin stat blong ronwe aot long fored blong ol man blong Lemana; mo oli bin folem olgeta kasem taem we oli bin kam kasem long graon blong Jeson, bifo oli save stopem olgeta long ronwe blong olgeta.

17 Mo nao, bigtaon blong Jeson i bin stap klosap long graon we Amaron i bin putum ol histri wetem Lod, blong oli no save smasem gud olgeta. Mo luk mi bin go folem toktok blong Amaron, mo bin tekem ol buk blong Nifae, mo bin mekem wan histri folem ol toktok blong Amaron.

18 Mo long ol buk blong Nifae, mi bin mekem wan ful histri blong evri nogud fasin mo ol rabis fasin; be long ol buk ia mi bin lego blong mekem wan ful histri blong ol nogud fasin blong olgeta mo ol rabis sin, from luk, mi bin gohed blong stap luk nogud fasin mo ol rabis sin stat long taem ia we mi mi save luk ol fasin blong man.

19 Mo sore tumas i stap long mi from nogud fasin blong olgeta; from hat blong mi i bin kam fulap wetem sore from nogud fasin blong olgeta, evri dei blong mi; be, mi save se bae Lod i lefemap mi long las dei.

20 Mo i bin hapen se long yia ia, ol pipol blong Nifae, bakegen, oli bin lukaotem mo ronemaot olgeta. Mo i bin hapen se oli bin ronemaot mifala kasem taem we mifala i kasem long graon long not long graon we oli bin singaotem Sem.

21 Mo i bin hapen se mifala i bin mekem bigtaon blong Sem i kam strong, mo mifala i bin karem i kam tugeta ol pipol blong mifala olsem we i save hapen, blong mekem se maet mifala i save sevem olgeta blong oli no smasem gud olgeta.

22 Mo i bin hapen long tri hundred mo foti mo sikis yia, oli bin stat blong kam long mifala bakegen.

23 Mo i bin hapen se mi bin toktok long ol pipol blong mi, mi bin askem olgeta wetem bigfala paoa, blong oli stanap strong bifo long ol man blong Leman mo faet from ol woman blong olgeta, mo ol pikinini

blong olgeta, mo ol haos blong olgeta, mo ol ples blong slip blong olgeta.

24 Mo ol toktok blong mi i bin givim smol paoa long olgeta, inaf blong mekem se oli no bin ronwe aot long fored blong ol man blong Leman, be i bin stanap strong agensem olgeta.

25 Mo i bin hapen se mifala i bin faet wetem wan ami blong teti taosen agensem wan ami blong fifti taosen. Mo i bin hapen se mifala i bin stanap long fored blong olgeta strong we i mekem se oli bin ronwe aot long fored blong mifala.

26 Mo i bin hapen se taem oli bin ronwe, mifala i bin folem olgeta wetem ol ami blong mifala, mo mifala i bin mitim olgeta bakegen, mo mifala i bin kilim olgeta; be paoa blong Lod i no bin stap wetem mifala; yes, mifala i bin stap wetem mifala bakegen, mekem se Spirit blong Lod i no bin stap wetem mifala; taswe mifala i bin kam slak olsem ol brata blong mifala.

27 Mo hat blong mi i bin sore from hemia, bigfala trabol blong ol pipol blong mi, from ol nogud fasin blong olgeta mo ol rabis sin blong olgeta. Be luk, mifala i bin go aot agensem ol man blong Leman mo ol stilman blong Gadianon, kasem taem we bakegen mifala i bin tekem ol graon we i kam long ol papa blong mifala.

28 Mo tri hundred mo foti mo naen yia i bin pas i gowe. Mo long tri hundred mo fifti yia, mifala i bin mekem wan agrimen wetem ol man blong

Leman mo ol stilman blong Gadianton, long samting ia mifala i bin mekem se ol graon blong mifala we i kam long ol papa i bin seraot.

29 Mo ol man blong Leman i bin givim long mifala graon long not, yes, i go kasem smolfala graon we i bin lidim i go long graon long saot. Mo mifala i bin givim long ol man blong Leman evri graon long saot.

---

### JAPTA 3

---

*Momon i prijim fasin blong sakem sin long ol man blong Nifae—Oli winim wan bigfala win mo oli tok flas from paoa blong olgeta bakegen—Momon i no wantem blong lidim olgeta, mo ol prea blong hem from olgeta i no gat fet—Buk blong Momon i askem ol twelef traeb blong Isrel blong bilivim gospel. Raonabaot 360–362 yia afta Kraes i bon.*

Mo i bin hapen se ol man blong Leman i no bin kam blong faet bakegen kasem we ten yia moa i bin pas i gowe. Mo luk, mi bin yusum ol pipol blong mi, ol man blong Nifae, blong mekem rere ol graon blong olgeta mo ol tul blong faet blong olgeta agensem taem blong faet.

2 Mo i bin hapen se Lod i bin talem long mi: Prij long ol pipol ia—Yufala i sakem sin, mo kam long mi, mo yufala i kasem baptaes, mo bildimap bakegen jos blong mi, mo bae yufala i sev.

3 Mo mi bin prij long ol pipol ia, be i blong nating; mo oli

no bin luksave se i bin Lod we i bin sevem olgeta, mo i bin givim long olgeta wan janis blong sakem sin. Mo luk oli bin mekem ol hat blong olgeta i kam strong agensem Lod, God blong olgeta.

4 Mo i bin hapen se afta ten yia ia i bin pas i gowe, i mekem, wetem evriwan, tri handred mo siksti yia stat long taem we Kraes i bin kam, king blong ol man blong Leman i bin sendem wan leta long mi, we i bin givim long mi blong save se oli stap mekem rere blong kam bakegen blong faet bakegen agensem mifala.

5 Mo i bin hapen se mi bin mekem ol pipol blong mi blong oli mas kam tugeta long graon Emti, long wan bigtaon we i bin stap insaed long ol boda, klosap long smolfala graon we i bin lidim i go long graon long saot.

6 Mo long ples ia mifala i bin putum ol ami blong mifala, blong mifala i save stopem ol ami blong ol man blong Leman, blong oli no save tekem eni long ol graon blong mifala; taswe mifala i bin mekem mifala i strong agensem olgeta wetem evri ami blong mifala.

7 Mo i bin hapen se, long namba tri handred mo siksti mo wan yia ol man blong Leman i bin kam daon long bigtaon blong Emti blong faet agensem mifala; mo i bin hapen se long yia ia, mifala i bin winim olgeta, inaf blong mekem se oli bin gobak long ol graon blong olgeta bakegen.

8 Mo long namba tri handred mo siksti mo tu yia oli bin kam daon bakegen blong faet. Mo mifala i bin winim olgeta bakegen, mo mifala i bin kilim ded wan bigfala namba blong olgeta, mo mifala i bin sakem ol ded blong olgeta long solwota.

9 Mo nao, from bigfala samting ia we ol pipol blong mi, ol man blong Nifae, i bin mekem, oli bin stat blong tok flas long paoa blong olgeta bakegen, mo oli bin stat blong mekem strong promes long fored blong ol heven se olgeta nomo bae i pembak ol blad blong ol brata blong olgeta we ol enemi blong olgeta i bin kilim ded.

10 Mo oli bin yusum nem blong ol heven mo tu tru long jea blong God blong mekem strong promes, se bae oli go antap blong faet agensem ol enemi blong olgeta, mo bae oli katem olgeta aot long fes blong graon.

11 Mo i bin hapen se mi, Momon, i no bin wantem fulwan stat long taem ia i go, blong stap wan lida blong ami mo wan lida blong ol pipol ia, from ol nogud fasin blong olgeta mo rabis sin.

12 Luk, mi bin lidim olgeta, i nomata long nogud fasin blong olgeta, mi bin lidim olgeta plante taem blong faet, mo mi bin lavem olgeta, folem lav blong God we i bin stap long mi, wetem ful hat blong mi; mo mi bin poremaot sol blong mi long prea long God blong mi, blong ful dei from olgeta; be, mi no bin gat fet long samting

ia, from ol hat blong olgeta i strong.

13 Mo tri taem mi bin mekem olgeta i go fri aot long ol han blong ol enemi blong olgeta, mo oli no bin sakem ol sin blong olgeta.

14 Mo afta we oli bin mekem strong promes wetem nem blong evri samting we Lod blong mifala mo Sevyia, Jisas Kraes, i bin talem olgeta se oli no mas yusum, se bae oli go antap agensem ol enemi blong olgeta blong faet, mo olgeta nomo bae i pembak ol blad blong ol brata blong olgeta, luk voes blong Lod i bin kam long mi, i talem:

15 Fasin ia blong pembak i blong mi, mo bae mi pembak; mo from ol pipol ia i no bin sakem sin afta we mi bin mekem olgeta i go fri, luk, bae oli katemaot olgeta aot long fes blong wol.

16 Mo i bin hapen se mi no bin wantem fulwan blong go antap agensem ol enemi blong mi; mo mi bin mekem olsem we Lod i bin givim oda long mi, mo mi bin stanap olsem wan witnes we i stap blong soemaot long wol, ol samting we mi bin lukim mo mi bin harem, folem ol fasin ia we Spirit i bin soemaot, we i bin testifae long saed blong ol samting we bae i kam.

17 Taswe mi raetem long yufala, ol Jentael, mo tu long yufala, laen blong Isrel, taem we wok bae i stat, se bae yufala i klosap blong rere blong gobak long graon blong yufala we i kam long ol papa;

18 Yes, luk, mi raet long evri en blong wol; yes, long yufala, ol twelef traeb blong Isrel, we bae i kasem jajmen folem ol wok blong yufala tru long ol twelef we Jisas i bin jusum olgeta blong kam ol disaepol blong hem long graon blong Jerusalem.

19 Mo mi raetem tu long ol smol haf blong pipol ia we i stap laef yet, we bae i kasem jajmen tu tru long ol twelef we Jisas i bin jusum long graon ia; mo bae oli kasem jajmen tru long narafala twelef we Jisas i bin jusum long graon blong Jerusalem.

20 Mo ol samting ia Spirit i stap soemaot long mi; taswe mi raetem long yufala evriwan. Mo from stamba tingting ia mi raetem long yufala, blong mekem se yufala i save gat save se bae evriwan i mas stanap long fored blong jea blong jajmen blong Kraes, yes, evri sol we i blong evri man blong famle blong Adam; mo yufala i mas stanap blong kasem jajmen from ol wok blong yufala, sapos oli gud o nogud.

21 Mo tu blong yufala i save bilivim gospel blong Jisas Kraes, we bae yufala i gat long medel blong yufala; mo tu blong ol Jiu, ol kavenan pipol blong Lod, bae oli gat ol narafala witness antap long hem, we oli bin lukim mo oli bin harem, se Jisas, we oli i bin kilim ded, i bin stret Kraes mo stret God.

22 Mo mi wantem se mi save winim tingting blong yufala evri en blong wol blong sakem sin mo mekem rere blong stanap

long fored blong jea blong jajmen blong Kraes.

---

#### JAPTA 4

---

*Faet mo fasin blong kilim man i ded i gohed—Ol nogud i panisim ol nogud—Nogud fasin we i moa strong bitim eni taem bifo long ful Isrel—Oli sakrifasem ol woman mo ol pikinini long aedol—Ol man blong Leman i stat blong brum ol man blong Nifae aot long fored blong olgeta. Raonabaot 363–375 yia afta Kraes i bon.*

Mo nao i bin hapen se long tri hundred mo siksti mo tri yia, ol man blong Nifae i bin go antap wetem ol ami blong olgeta blong faet agensem ol man blong Leman, aot long graon Emti.

2 Mo i bin hapen se oli bin pusum bakegen ol ami blong ol man blong Nifae i go long graon blong Emti. Mo taem we oli taed yet, wan ami blong ol man blong Leman we i strong gud i bin kam long olgeta; mo oli bin gat wan strong faet, inaf blong mekem se ol man blong Leman i bin tekem bigtaon blong Emti, mo oli bin kilim ded plante long ol man blong Nifae, mo oli bin tekem plante prisena.

3 Mo ol narafala we i bin stap i bin ronwe mo oli bin joenem ol man we i stap long bigtaon blong Tiankum. Nao bigtaon Tiankum i stap long ol boda klosap long so blong solwota; mo i bin stap klosap tu long bigtaon Emti.

4 Mo i bin from we ol ami blong ol man blong Nifae i bin go antap long ol man blong Leman mekem se oli bin stat blong kilim olgeta; from sapos i no bin from samting ia, ol man blong Leman i no bin save gat eni paoa ova long olgeta.

5 Be, luk, ol jajmen blong God bae i winim olgeta we i nogud; mo hem i tru long ol nogud we ol nogud i kasem panis; from i olgeta we i nogud we i tanem ol hat blong ol pikinini blong ol man kasem blad i ron.

6 Mo i bin hapen se ol man blong Leman i bin mekem rere blong kam angensem bigtaon Tiankum.

7 Mo i bin hapen long tri hundred mo siksti mo fo yia ol man blong Leman i bin kam agensem bigtaon Tiankum, blong oli save tekem bigtaon Tiankum tu.

8 Mo i bin hapen se ol man blong Nifae i bin pusum bak olgeta mo oli bin ronemaot olgeta. Mo taem we ol man blong Nifae i bin luk se oli bin ronem ol man blong Leman, oli bin, bakegen tok flas long paoa blong olgeta bakegen; mo oli bin go fored long paoa blong olgeta bakegen mo oli bin tekem bakegen bigtaon Emti.

9 Mo nao evri samting ia oli bin mekem, mo i bin gat plante taosen i ded long tufala saed tugeta, ol man blong Nifae tugeta wetem ol man blong Leman.

10 Mo i bin hapen se tri hundred mo siksti mo sikis yia i bin pas i gowe, mo ol man blong Leman i bin kam bakegen

long ol man blong Nifae blong faet; mo stil ol man blong Nifae i no bin sakem sin blong nogud fasin we oli bin mekem, be oli bin stap gohed long ol nogud fasin blong olgeta oltaem.

11 Mo i no save hapen blong tang i ekspelenem, o blong man i raetem wan ful histri blong nogud samting we oli bin lukim we i blad mo fasin blong kilim man i ded we i bin stap long medel blong ol pipol, blong ol man blong Nifae tugeta wetem ol man blong Leman; mo evri hat i bin kam strong, mekem se oli bin glad blong mekem blad i ron oltaem.

12 Mo i neva bin gat bigfala nogud fasin olsem long medel blong evri pikinini blong Lihae, mo tu long ful laen blong Isrel, folem ol toktok blong Lod, olsem we i bin stap long medel blong pipol ia.

13 Mo i bin hapen se ol man blong Leman i bin tekem bigtaon Emti, mo hemia from namba blong olgeta i bin bitim namba blong ol man blong Nifae.

14 Mo tu oli bin maj i go fored agensem bigtaon Tiankum, mo oli bin ronemaot olgeta we i stap, i go fored aot long hem, mo oli bin tekem plante prisena, ol woman tugeta wetem ol pikinini, mo oli bin givim olgeta olsem ol sakrifaes long ol aedol god blong olgeta.

15 Mo i bin hapen se long tri hundred mo siksti mo seven yia, ol man blong Nifae from oli kros from ol man blong Leman i bin sakrifaesem ol woman



blong olgeta mo ol pikinini blong olgeta, mekem se oli bin go agensem ol man blong Leman wetem kros we i bigwan tumas, inaf blong mekem se oli bin winim bakegen ol man blong Leman, mo oli bin ronem olgeta aot long ol graon blong olgeta.

16 Mo ol man blong Leman i no bin kam bakegen agensem ol man blong Nifae kasem tri hundred mo seventi mo faef yia.

17 Mo long yia ia oli bin kam daon agensem ol man blong Nifae wetem evri paoa blong olgeta; mo oli no bin kaontem olgeta from namba blong olgeta i bigwan.

18 Mo stat long taem ia i go ol man blong Nifae i no bin kasem paoa ova long ol man blong Leman, be ol man blong Leman i bin stat blong kilim ded olgeta, semak olsem wota blong naet long fored blong san.

19 Mo i bin hapen se ol man blong Leman i bin kam daon agensem bigtaon Emti; mo i bin gat wan faet we i strong tumas we oli bin faet long graon Emti, long faet ia oli bin winim ol man blong Nifae.

20 Mo oli bin ronwe bakegen aot long fored blong olgeta, mo oli bin kam long bigtaon Boas; mo long ples ia oli bin stanap agensem ol man blong Leman wetem fasin blong no fraet we i bigwan tumas, inaf blong mekem se ol man blong Leman i no bin winim olgeta kasem taem we oli bin kam bakegen long nambatu taem.

21 Mo taem we oli bin kam

long nambatu taem, oli bin ronem mo kilim ded ol man blong Nifae wetem wan fasin blong kilim man i ded we i bigwan tumas; ol woman blong olgeta mo ol pikinini blong olgeta oli bin sakrifaesem bakegen long ol aedol.

22 Mo i bin hapen se ol man blong Nifae i bin bakegen ronwe aot long fored blong olgeta, oli tekem evri pipol we i stap wetem olgeta, aot long ol bigtaon tugeta wetem ol vilej.

23 Mo nao mi, Momon, from mi luk se ol man blong Leman i rere blong tekem graon ia, taswe mi bin go long hil Sim, mo mi bin tekemaot evri histri we Amaron i bin haedem wetem Lod.

---

## JAPTA 5

---

*Momon bakegen i lidim ol ami blong ol man blong Nifae long ol faet blong blad mo fasin blong kilim man i ded—Buk blong Momon bae i kamaot blong winim tingting blong ful Isrel se Jisas hem i Kraes—From oli no gat bilif, bae ol man blong Leman i seraot olbaot, mo Spirit bae i nomo wok wetem olgeta—Bae oli kasem gospel long ol Jentael long ol las dei. Raonabaot 375–384 yia afta Kraes i bon.*

Mo i bin hapen se mi bin go aot long medel blong ol man blong Nifae, mo mi bin sakem strong promes ia we mi bin mekem se bae mi no helpem olgeta bakegen; mo oli bin givim mi raet bakegen blong ol ami blong olgeta, from oli bin luk long mi

olsem we mi save mekem olgeta i kamaot long ol hadtaem blong olgeta.

2 Be luk, mi no bin gat hop, from mi bin save se ol jajmen blong Lod we bae i kam long olgeta; from oli no bin sakem ol rabis fasin blong olgeta, be oli bin traehad from ol laef blong olgeta, oli no prea long God we i bin mekem olgeta.

3 Mo i bin hapen se ol man blong Lemana i bin kam agensem mifala long taem ia we mifala i bin ronwe i go long bigtaon blong Jodan; be luk, oli bin pusum bak olgeta mekem se oli no bin tekem bigtaon long taem ia.

4 Mo i bin hapen se oli bin kam agensem mifala bakegen, mo mifala i bin holem taet bigtaon ia. Mo tu i bin gat ol narafala bigtaon we ol man blong Nifae i bin holem olgeta, we ol strong ples blong haed ia, i bin stopem olgeta mekem se oli no bin save go insaed long kantri we i stap long fored blong mifala, blong smasem gud olgeta we i stap long graon blong mifala.

5 Be i bin hapen se eni graon we mifala i bin pas long olgeta, mo olgeta we i stap long olgeta i no bin kam tugeta, ol man blong Lemana i bin kilim ded olgeta, mo ol taon blong olgeta, mo ol vilej, mo ol bigtaon i bin bon wetem faea; mo olsem ia nao tri hundred mo seventi mo naen yia i bin pas i gowe.

6 Mo i bin hapen se long tri hundred mo eiti yia, ol man blong Lemana i bin kam bakegen

agensem mifala blong faet, mo mifala i bin stanap agensem olgeta wetem no gat fraet; be evri samting i bin blong nating, from namba blong olgeta i bin bigwan tumas, mekem se oli bin purumbut long ol pipol blong ol man blong Nifae aninit long ol leg blong olgeta.

7 Mo i bin hapen se mifala i bin bakegen ronwe, mo olgeta we ronwe blong olgeta i bin moa spid bitim ol man blong Lemana i bin fri, mo olgeta we ronwe blong olgeta i no bin bitim ol man blong Lemana, oli bin katem daon olgeta mo kilim ded olgeta.

8 Mo nao luk, mi, Momon, i no wantem blong givim hadtaem long ol sol blong ol man, blong talemaot long fored blong olgeta samting we i blad mo fasin blong kilim man i ded, olsem we i bin stap long fored blong ol ae blong mi; be mi, from mi save se ol samting ia we i tru Lod i mas soemaot, mo we evri samting we i haed oli mas talemaot long antap long ol haos—

9 Mo tu se wan save long saed blong ol samting ia i mas kam long smol haf blong ol pipol ia we i laef yet, mo tu long ol Jentael, we Lod i bin talem se bae i mas seraotem ol pipol ia olbaot, mo ol pipol ia bae oli kaontem olsem nating long medel blong olgeta—taswe mi raetem wan smol pat nomo, from mi fraet blong givim wan ful histri blong ol samting we mi bin luk, from komanmen we mi bin kasem, mo tu blong

mekem se yufala i no save gat sore we i tumas from nogud fasin blong ol pipol ia.

10 Mo nao luk, hemia mi talem long ol pikinini blong olgeta, mo tu long ol Jentael we oli gat wok blong lukaotem laen blong Isrel, we i luksave mo save long wea ples ol blesing blong olgeta i stap kam.

11 From mi save se olgeta olsem bae i harem nogud from trabol blong laen blong Isrel; yes, bae oli harem nogud from smasgud blong ol pipol ia; bae oli harem nogud se ol pipol ia i no bin sakem sin, blong mekem se maet Jisas i bin save holem olgeta long han blong hem.

12 Nao ol samting ia oli raetem i go long smol haf blong laen blong Jakob we i laef yet; mo oli raetem olgeta long fasin ia, from God i save se nogud fasin bae i no karem olgeta aot long ol samting ia; mo oli mas haedem ol samting ia wetem Lod blong oli save kamaot long taem we hem i jusum.

13 Mo hemia i komanmen we mi bin kasem; mo luk, olgeta bae oli kamaot folem komanmen blong Lod, taem we bae hem i luk se i stret, long waes tingting blong hem.

14 Mo luk, olgeta bae i go long ol Jiu we i no biliv; mo from plan ia bae oli go—blong oli save winim tingting blong olgeta se Jisas i Kraes, Pikinini blong God we i stap laef; se Papa bae i mekem i hapen, tru long Pikinini we hem i lavem tumas, bigfala plan blong hem we i no save finis, blong karem-

bak ol Jiu, o ful laen blong Isrel, long graon blong olgeta we i kam long ol papa, we Lod, God blong olgeta i bin givim long olgeta, blong mekem kavenan blong hem i hapen;

15 Mo tu blong ol pikinini blong ol pipol ia i save bilivim moa gospel blong hem, we bae i go aot long olgeta aot long ol Jentael; from ol pipol ia bae oli seraot olbaot, mo bae i kam wan dak, wan doti, mo wan pipol we oli no laekem olgeta, bitim we oli save talem long saed blong olgeta we i bin stap long medel blong mifala bifo, yes, mo tu bitim olgeta we i bin stap long medel blong ol man blong Leman, mo hemia from fasin ia blong olgeta blong no gat biliv mo wosipim aedol.

16 From luk, Spirit blong Lod i bin stop finis blong wok wetem ol bubu blong olgeta; mo oli no gat Kraes mo God long wol; mo go olbaot olsem doti blong wit long fored blong win.

17 Oli bin wan gudfala pipol long wan taem, mo oli bin gat Kraes olsem man blong lukaotem sipsip blong olgeta; yes, God we i Papa i bin lidim olgeta tu.

18 Be nao, luk, Setan i stap lidim olgeta olbaot, semak olsem doti blong wit i go olbaot long fored blong win, o olsem wan sip we ol wef i stap sakem olbaot, we i no gat sel o angka, o i no gat eni samting blong stiarem hem; mo i semak olsem hem i stap, olgeta i olsem tu.

19 Mo luk, Lod i bin holem taet ol blesing blong olgeta, we

maet oli bin save kasem long graon, from ol Jentael we bae i tekem graon.

20 Be luk, bae i kam blong hapen se ol Jentael bae i ronem olgeta mo seraotem olgeta olbaot; mo afta we ol Jentael i bin ronem olgeta mo seraotem olgeta olbaot, luk, afta bae Lod i tingbaot kavenan we hem i bin mekem wetem Ebrahim, mo wetem ful laen blong Isrel.

21 Mo tu Lod bae i tingbaot ol prea blong olgeta we i stret, we oli bin putum antap long hem from olgeta.

22 Mo afta, O yufala ol Jentael, hao nao yufala i save stanap long fored blong paoa blong God, sapos yufala i no sakem sin mo tanem yufala aot long ol nogud fasin blong yufala?

23 Yufala i no save se yufala i stap long ol han blong God? Yufala i no save se hem i gat evri paoa, mo long bigfala oda blong hem, wol bae i rol tugeta olsem wan skrol?

24 Taswe, yufala i sakem sin, mo mekem tingting blong yufala i stap daon long fored blong hem, from fraet se bae hem i kamaot long jastis agensem yufala—from fraet se wan smol haf blong ol pikinini blong Jakob we i laef yet bae i go aot long medel blong yufala olsem wan laeon, mo terem yufala long pisis, mo i no gat wan we i save mekem i go fri.

---

JAPTA 6

---

*Ol man blong Nifae i kam tugeta*

*long graon blong Kumora blong ol lasfala faet— Momon i haedem ol tabu histri long hil Kumora— Ol man blong Leman i win, mo kantri blong ol man blong Nifae i smas gud— Oli kilim ded plante hundred blong ol taosen wetem naef blong faet. Raonabaot 385 yia afta Kraes i bon.*

Mo nao mi finisim histri blong mi long saed blong smasgud blong ol pipol blong mi, ol man blong Nifae. Mo i bin hapen se mifala i bin maj aot long fored blong ol man blong Leman.

2 Mo mi, Momon, i bin raetem wan leta long king blong ol man blong Leman, mo mi bin wantem long hem se hem i save letem long mifala se mifala i save karem ol pipol blong mifala i kam tugeta long graon blong Kumora, klosap wan hil we oli bin singaotem hem Kumora, mo long ples ia bae mifala i save givim long olgeta faet.

3 Mo i bin hapen se king blong ol man blong Leman i bin letem long mi, samting ia we mi bin wantem.

4 Mo i bin hapen se mifala i bin maj i go fored long graon blong Kumora, mo mifala i bin stanemap ol tenet blong mifala raonabaot long hil Kumora; mo i bin stap long wan graon blong plante wota, ol reva, mo ol springwota; mo long ples ia mifala i bin hop blong kasem janis ova long ol man blong Leman.

5 Mo taem we tri hundred mo eiti mo fo yia i bin pas i gowe, mifala i bin karem i kam tugeta

evri pipol blong mifala we i stap yet, long graon blong Kumora.

6 Mo i bin hapen se taem we mifala i bin karem i kam tugeta evri pipol blong mifala long wan i go long graon blong Kumora, luk mi, Momon, mi bin stat blong kam olfala; mo from mi save se hemia bae i lasfala faet blong ol pipol blong mi, mo from Lod i bin givim oda long mi se mi no mas letem ol tabu histri ia we ol bubu blong mifala i bin pasem i kam daon, we oli tabu, blong go long ol han blong ol man blong Lemana, (from ol man blong Lemana bae i smasem gud olgeta) taswe mi bin mekem histri ia aot long ol buk blong Nifae, mo mi bin haedemap long hil Kumora evri histri we han blong Lod i bin trastem long mi, be smol namba blong ol buk ia nomo we mi bin givim long boe blong mi, Moronae.

7 Mo i bin hapen se ol pipol blong mi, wetem ol woman blong olgeta mo ol pikinini blong olgeta, i bin, nao lukim ol ami blong ol man blong Lemana i stap maj long olgeta; mo wetem nogud fraet blong ded we i fulumap jes blong evri nogud man, oli bin wet blong kasem olgeta.

8 Mo i bin hapen se oli bin kam blong faet agensem mifala, mo evri sol i bin kam fulap wetem bigfala fraet from namba blong olgeta i bigwan tumas.

9 Mo i bin hapen se oli bin faet agensem ol pipol blong mi wetem naef blong faet, mo wetem bonara, mo wetem ara, mo

wetem akis, mo wetem evri kaen fasin blong tul blong faet.

10 Mo i bin hapen se oli bin katemdaon ol man blong mi, yes, mo tu ol ten taosen blong mi we i bin stap wetem mi, mo mi bin foldaon wetem kil long medel; mo oli bin pas klosap long mi be oli no bin putum wan en long laef blong mi.

11 Mo taem we oli bin pas tru mo oli bin katemdaon evri pipol blong mi, be twenti mo fo blong mifala, (long medel blong mifala i bin gat boe blong mi Moronae) mo mifala i bin stap laef afta long ded blong ol pipol blong mifala, i bin luk long nekis dei, taem we ol man blong Lemana i bin gobak long ol kamp blong olgeta, long antap blong hil Kumora, ol ten taosen blong ol pipol blong mi we oli bin katemdaon, mi bin stap long fored blong olgeta blong lidim olgeta.

12 Mo tu mifala i bin luk ten taosen blong ol pipol blong mi we boe blong mi Moronae i bin lidim.

13 Mo luk, ten taosen blong Gidgidona i bin foldaon, mo hem tu long medel.

14 Mo Lama i bin foldaon wetem ten taosen blong hem; mo Gilgal i bin foldaon wetem ten taosen blong hem; mo Limha i bin foldaon wetem ten taosen blong hem; mo Jeneum i bin foldaon wetem ten taosen blong hem, mo Kumenaeha, mo Moronaeha, mo Antionum, mo Siblom, mo Sem, mo Jos, i bin foldaon wetem ol ten taosen blong olgeta tu.

15 Mo i bin hapen se i bin gat

ten moa we i bin foldaon tru long naef blong faet, wetem ol ten taosen blong olgeta tu; yes, mo tu evri pipol blong mi, be twenti mo fo ia nomo we i bin stap wetem mi, mo tu wan smol namba we i bin ronwe long ol kantri long saot, mo wan smol namba we i bin lego blong joenem ol man blong Lemman, i bin foldaon; mo ol mit blong olgeta, mo ol bun, mo blad, i ledaon long fes blong graon, from ol han blong olgeta we i kilim ded olgeta i bin livim olgeta blong roten long graon, mo blong roten mo gobak long mama graon blong olgeta.

16 Mo sol blong mi i bin trabol tumas from mi harem nogud tumas, from ol ded blong ol pipol blong mi, mo mi bin singaot:

17 O yufala ol naes wan, hao nao yufala i bin save aot long ol fasin blong Lod! O yufala ol naes wan, hao nao yufala i bin save sakemaot Jisas ia, we i bin stanap wetem ol han blong hem we oli open rere blong akseptem yufala!

18 Luk, sapos yufala i no bin mekem samting ia, bae yufala i no bin foldaon. Be luk, yufala i bin foldaon, mo mi krae from lus blong yufala.

19 O yufala ol naes boe mo ol gel, yufala ol papa mo ol mama, yufala ol man mo ol woman, yufala ol naes wan, hao nao i olsem se yufala i bin save foldaon!

20 Be luk, yufala i aot, mo ol harem nogud blong mi i no save mekem yufala i kambak.

21 Mo dei i kam i no longtaem,

we bodi blong yufala we i save ded, i mas putum bodi we i no save ded, mo ol bodi ia we i stap roten naoia, i mas no longtaem kam ol bodi we i no save roten; mo long taem ia yufala i mas stanap long fored blong jea blong jajmen blong Kraes, blong kasem jajmen folem ol wok blong yufala; mo sapos i olsem se yufala i stret, afta bae yufala i kasem blesing wetem ol bubu blong yufala we i bin go bifo long yufala.

22 O sapos yufala i bin sakem sin bifo bigfala smasgud ia i bin kam long yufala. Be luk, yufala i aot, mo Papa, yes, Papa we i No Save Finis long heven, i save ples blong yufala; mo hem i mekem wetem yufala folem jastis blong hem mo sore.

---

### JAPTA 7

---

*Momon i askem long ol man blong Lemman blong ol las dei blong biliv long Kraes, akseptem gospel blong hem, mo kam sev—Olgeta we i bilivim Baebol bae oli bilivim tu Buk blong Momon. Raonabaot 385 yia afta Kraes i bon.*

Mo nao, luk, mi wantem toktok lelebet long smol haf blong ol pipol ia we i stap laef yet, sapos i olsem se God i save givim long olgeta ol toktok blong mi, blong oli save gat save long saed blong ol samting blong ol bubu blong olgeta; yes, mi toktok long yufala, yufala smol haf blong laen blong Isrel we i laef yet; mo hemia i ol toktok we mi stap talem:

2 Yufala i save se yufala i blong laen blong Isrel.

3 Yufala i save se yufala i mas kam blong sakem sin, o yufala i no save sev.

4 Yufala i save se yufala i mas putum daon ol tul blong faet blong yufala, mo nomo glad blong mekem blad i ron, mo no tekem olgeta bakegen, hemia nomo sapos God i givim oda long yufala.

5 Yufala i save se yufala i mas kam blong gat save long saed blong ol bubu blong yufala, mo sakem evri sin blong yufala mo ol rabis fasin, mo biliv long Jisas Kraes, se hem i Pikinini blong God, mo we ol Jiu i bin kilim hem i ded, mo tru long paoa blong Papa, hem i bin girap bakegen, tru long samting ia hem i bin kasem win ova long gref; mo tu tru long hem, hem i kavremap harem nogud blong ded mi no save.

6 Mo hem i mekem i hapen laef bakegen blong ol ded, tru long samting ia ol man i mas girap blong stanap long fored blong jea blong jajmen blong hem.

7 Mo hem i bin mekem i hapen pemaot blong wol, tru long samting ia hem we oli faenem se hem i no gat rong long fored blong hem long dei blong jajmen, hem i bin givim long hem blong stap long fes blong God long kingdom blong hem, blong singsing ol pres we i no gat en wetem ol kwaea antap, long Papa, mo long Pikinini, mo long Tabu Spirit, we oli wan God, long wan ples blong glad we i no gat en.

8 Taswe sakem sin, mo kasem baptaes long nem blong Jisas, mo tekem blong holem gospel blong Kraes, we bae i stap long fored blong yufala, i no long histri ia nomo, be tu long histri we bae i kam long ol Jentael aot long ol Jiu, we histri ia bae i kam aot long ol Jentael i kam long yufala.

9 From luk, mi mi raetem samting ia from plan se yufala i save bilivim ol narafala histri ia; mo sapos yufala i bilivim ol narafala histri ia, bae yufala i bilivim histri ia tu; mo sapos yufala i bilivim histri ia, bae yufala i save long saed blong ol bubu blong yufala, mo tu ol gudfala wok we i bin hapen tru long paoa blong God long medel blong olgeta.

10 Mo tu bae yufala i save se yufala i wan smol haf blong ol pikinini blong Jakob we i laef yet; taswe oli kaontem yufala wetem ol pipol blong fasfala kavenan; mo sapos i olsem se yufala i biliv long Kraes, mo i kasem baptaes, fastaem wetem wota, afta wetem faea mo wetem Tabu Spirit, folem eksampol blong Sevya blong yumi, folem hemia we hem i bin givim oda long yumi, bae i gud wetem yufala long dei blong jajmen. Amen.

---

## JAPTA 8

---

*Ol man blong Leman i lukaotem mo kilim ded ol man blong Nifae — Buk blong Momon bae i kamaot tru long paoa blong God — Oli*

*talemaot ol sore tumas long olgeta we bae i toktok wetem kros mo givim hadtaem agensem wok blong Lod—Histri blong ol man blong Nifae bae i kamaot long wan dei blong ol nogud fasin, fasin blong man i kam moa nogud, mo Apostas. Raonabaot 400–421 yia afta Kraes i bon.*

LUK mi, Moronae, i finisim histri blong papa blong mi, Momon. Luk, mi mi gat be ol smol samting blong raetem, we ol smol samting ia papa blong mi i bin givim oda long mi.

2 Mo nao i bin hapen se afta long bigfala mo strong faet long Kumora, luk, ol man blong Nifae we i bin ronwe i go long kantri long saot, ol man blong Lemana i bin lukaotem olgeta kasem taem we oli bin kilim ded evriwan.

3 Mo papa blong mi tu i bin ded tru long olgeta, mo mi tu mi stap wan nomo blong raetem sad stori ia long saed blong ded blong ol pipol blong mi. Be luk, oli aot, mo mi mekem i hapen komanmen blong papa blong mi. Mo sapos bae oli kilim ded mi, mi no save.

4 Taswe bae mi raetem mo haedem ol histri ia long graon; mo wea ples mi go i nomata.

5 Luk, papa blong mi i bin mekem histri ia, mo hem i bin raetem plan blong samting ia. Mo luk, bae mi raetem samting ia tu sapos mi bin gat rum long ol buk, be mi mi no gat, mo ol ston blong aean mi mi no gat nating, from mi stap wan nomo. Oli bin kilim ded papa blong

mi long faet mo evri famle blong mi, mo mi mi no gat ol fren o eni ples blong go; mo hamas taem bae Lod i letem se mi save stap laef.

6 Luk, fo handred yia i bin pas i gowe afta we Lod mo Sevyablong yumi i bin kam.

7 Mo luk, ol man blong Lemana i bin lukaotem ol pipol blong mi, ol man blong Nifae, daon long wan bigtaon i go long narafala bigtaon, mo long wan ples i go long narafala ples, kasem taem we oli nomo gat; mo foldaon blong olgeta i bin bigwan; yes, bigfala mo wan sapraes ded blong ol pipol blong mi, ol man blong Nifae.

8 Mo luk, i han blong Lod we i bin mekem samting ia. Mo luk tu, ol man blong Lemana i stap faet wan wetem narawan; mo ful fes blong graon ia i wan raon samting we i gohed blong fasin blong kilim man i ded mo blad i ron; mo i no gat wan we i save en blong faet.

9 Mo nao, luk, mi no talem moa long saed blong olgeta, from i no gat wan sapos i no ol man blong Lemana mo ol man blong stil we i stap laef long fes blong graon.

10 Mo i no gat eniwan we i save tru God, be ol disaepol blong Jisas nomo, we i bin stap long graon kasem taem we nogud fasin blong ol pipol i bin bigwan tumas, blong mekem se Lod bae i no letem olgeta blong stap wetem ol pipol; mo sapos oli stap long fes blong graon i no gat wan man we i save.

11 Be luk, papa blong mi mo



mi, i bin luk olgeta, mo oli bin givhan long mitufala.

12 Mo eni man we bae i kasem histri ia, mo bae i no toktok agensem samting ia from ol samting we i no klia gud insaed long hem, semfala man ia bae i save long saed blong ol bigfala samting we i moa bitim hemia. Luk, mi mi Moronae, mo sapos i save hapen, bae mi talem aot blong yufala i save evri samting.

13 Luk, mi mi mekem wan en blong toktok long saed blong ol pipol ia. Mi mi boe blong Momon, mo papa blong mi i bin wan laen blong Nifae.

14 Mo mi mi semfala man ia we i stap haedem histri ia wetem Lod; ol buk blong hem i no gat praes blong olgeta, from komanmen blong Lod. From i tru we hem i talem se i no gat wan we bae i holem olgeta blong kasem mane; be histri blong olgeta, praes blong hem i hae tumas; mo man we bae i tekem hemia i kam long laet, hem bae Lod i blesem.

15 From i no gat wan we i save gat paoa blong tekem hem i kam long laet, sapos God i no givim paoa ia long hem; from God i wantem se samting ia i mas hapen wetem wan ae we i lukluk long glori blong hem, o gudfala laef blong ol olfala mo kavenan pipol blong Lod we i bin seraot olbaot longtaem.

16 Mo hem we i tekem samting ia i kam long laet bae i kasem blesing; from bae i tekemaot long tudak i kam long laet, folem toktok blong God; yes, bae i tekemaot long graon, mo

bae i saen fored aot long tudak, mo kam long save blong ol pipol; mo samting ia bae i hapen tru long paoa blong God.

17 Mo sapos i gat ol mistek, oli ol mistek blong wan man. Be luk, mifala i no save wan mistek; be God i save evri samting; taswe, hem we i tok agensem, letem hem i lukaot from fraet se bae hem i stap long denja blong faea blong hel.

18 Mo hem we i talem: Soem long mi, o bae yufala i kasem panis—letem hem i lukaot from fraet se hem i givim oda long samting we Lod i blokem.

19 From luk, semfala man we i jajem wetem spid bae i kasem jajmen wetem spid bakegen, from folem ol wok blong hem bae i kasem pei; taswe, hem we i stap kilim, bae hem i kasem kil bakegen tru long Lod.

20 Luk wanem skripja i talem—man i no mas kilim, o i no mas jaj; from jajmen i blong mi, Lod i talem, mo fasin blong pembak i blong mi tu, mo bae mi pembak.

21 Mo hem we bae i tok agensem long kros mo givim hadtaem agensem ol wok blong Lod, mo agensem kavenan pipol blong Lod we i laen blong Isrel, mo bae i talem: Bae yumi smasem gud wok blong Lod, mo bae Lod bae i no tingbaot kavenan blong hem we hem i bin mekem wetem laen blong Isrel—semfala man ia i stap long denja blong oli katemdaon hem mo sakem hem i go long faea;

22 From ol stamba tingting we i no save finis blong Lod bae i

gohed, kasem taem we evri promes blong hem i mas hapen.

23 Stadi ol profesi blong Aesea. Luk, mi no save raetem olgeta. Yes, luk mi talem long yufala, se ol sent ia we i bin go bifo long mi, we i bin holem graon ia, bae i singaot, yes, we i aot long das bae oli singaot long Lod, mo olsem we Lod i stap laef, bae hem i tingbaot kavenan we hem i bin mekem wetem olgeta.

24 Mo hem i save ol prea blong olgeta, we oli bin blong helpem ol brata blong olgeta. Mo hem i save fet blong olgeta, from long nem blong hem, oli save muvumaot ol bigfala hil, mo long nem blong hem, oli save mekem graon i seksek; mo tru long paoa blong toktok blong hem, oli mekem ol kalabus blong foldaon long graon; yes, mo tu oven faea i no bin save smasem gud olgeta, mo tu ol wael anamol o ol posen snek, from paoa blong toktok blong hem.

25 Mo luk, ol prea blong olgeta i bin from hem we Lod bae i letem blong karem ol samting ia i kamaot.

26 Mo i no gat wan we i mas talem se ol samting ia bae i no kam, from i tru we bae ol samting ia oli mas kam, from Lod i bin talem samting ia; from aot long graon bae oli kamaot tru long han blong Lod, mo i no gat wan we i save stopem samting ia; mo bae i kam long wan dei we bae oli talem se ol merikel i nomo gat; mo bae samting ia i kam olsem se wan bae i stap toktok aot long ol ded.

27 Mo bae i kam long wan dei we ol blad blong ol sent bae i singaot long Lod, from ol sikret grup mo ol wok blong tudak.

28 Yes, bae i kam long wan dei we paoa blong God bae ol pipol i tanem baksaed long hem, mo ol jos i kam nogud, mo i kam hae long ol hae tingting blong ol hat blong olgeta; yes, hem i long wan dei we ol lida blong ol jos mo ol tija bae i girap long hae tingting blong hat blong olgeta, go kasem we oli jalus long olgeta we i blong ol jos blong olgeta.

29 Yes, bae i kam long wan dei we bae ol pipol i harem long saed blong ol faea, mo ol hariken, mo ol stim blong smok long ol narafala graon;

30 Mo bae i gat tu ol pipol we i harem long saed blong ol faet, ol toktok blong faet, mo ol graon i seksek long ol ples olbaot.

31 Yes, bae i kam long wan dei we bae i gat plante doti samting long fes blong wol; bae i gat ol fasin blong kilim man i ded, mo stil, mo giaman, mo ol trik, mo ol fasin blong slip olbaot, mo evri kaen fasin blong rabis sin; taem we bae i gat plante we bae oli talem, Mekem samting ia, o mekem narafala samting ia mo i nomata, from Lod bae i sapotem olgeta olsem long las dei. Be sore tumas long olgeta olsem, from oli stap long ples blong harem nogud tumas mo long ol rop blong rabis fasin.

32 Yes, bae i kam long wan dei we bae i gat ol jos we oli bildimap we bae i talem: Kam long

mi mo from mane blong yufala bae God i fogivim ol sin blong yufala.

33 O yufala ol nogud mo rabis mo stronghed pipol, from wanem yufala i bin bildimap ol jos long yufala bakegen blong kasem mane? From wanem yufala i bin jenisim tabu toktok blong God, blong mekem se yufala i save putum panis long ol sol blong yufala? Luk, yufala i lukluk long ol revelesen blong God; from luk, taem i kam long dei ia taem we evri samting ia i mas hapen.

34 Luk, Lod i bin soem long mi, ol bigfala mo gudfala samting long saed blong samting we i mas kam klosap, long dei ia, taem we ol samting ia bae i kam aot long medel blong yufala.

35 Luk, mi toktok long yufala olsem se yufala i stap long ples ia, be yufala i no stap. Be luk, Jisas Kraes i bin soem yufala long mi, mo mi save ol wok blong yufala.

36 Mo mi save se yufala i stap wokbaot long hae tingting blong ol hat blong yufala; mo i no gat wan be wan smol namba nomo we i no leftemap olgeta antap long hae tingting blong ol hat blong olgeta, go kasem we oli werem ol klos we i naes tumas, go kasem jalus, mo ol rao, mo oli wantem blong smasem gud narafala man, mo fasin blong givim hadtaem, mo evri kaen rabis fasin; mo ol jos blong yufala, yes, we i evriwan, i bin kam doti from hae tingting blong ol hat blong yufala.

37 From luk, yufala i lavem mane, mo ol samting blong yufala, mo ol naes klos blong yufala, mo blong flasem ol jos blong yufala, bitim we yufala i lavem olgeta we i pua, mo we i nidim samting, olgeta we oli sik mo olgeta we i gat hadtaem.

38 O yufala ol doti, yufala ol man we i gat tufes, yufala ol tija, we i stap salem yufala bakegen blong ol samting we bae i roten, from wanem yufala i bin mekem tabu jos blong God i doti? From wanem yufala i sem blong tekem long yufala nem blong Kraes? From wanem yufala i no ting se praes blong glad we i no gat en i moa bigwan bitim harem nogud we i neva ded — from ona blong wol?

39 From wanem yufala i flasem yufala bakegen wetem samting we i no gat laef, mo stil letem olgeta we i hanggri, mo olgeta we i nidim samting, mo olgeta we i neked, mo olgeta we i sik, mo olgeta we i gat hadtaem blong pas klosap long yufala, mo yufala i no lukluk long olgeta.

40 Yes, from wanem yufala i bildimap ol sikret grup blong yufala, blong kasem mane, mo mekem se ol woman we man blong olgeta i ded i mas krae long fored blong Lod, mo tu ol pikinini we i no gat papa o mama blong i krae long fored blong Lod, mo tu blad blong ol papa blong olgeta mo ol man blong olgeta blong krae long Lod aot long graon, blong pembak yufala wetem panis antap long hed blong yufala?

41 Luk, naef blong pembak i stap hang ova long yufala; mo taem i kam klosap we hem i pembak blad blong ol sent long yufala, from bae hem i no letem ol krae blong olgeta eni moa.

---

### JAPTA 9

---

*Moronae i singaotem olgeta we i no biliv long Kraes blong sakem sin — Hem i talemaot wan God blong ol merikel, we i givim ol revelesen mo i poremaot ol presen mo ol saen long olgeta we i holem taet fet — Ol merikel i stop from fasin blong no gat bilif — Ol saen i folem olgeta we i biliv — Oli askem strong long ol man blong oli mas waes, mo holem ol komanmen. Raonabaot 401–421 yia afta Kraes i bon.*

Mo nao, mi toktok tu long saed blong olgeta we i no biliv long Kraes.

2 Luk, bae yufala i biliv long dei blong panis blong yufala — luk, taem we Lod bae i kam, yes, we i bigfala dei ia taem we wol bae i kam tugeta olsem wan skrol, mo ol samting blong wol bae i ronaot wetem hot we i hot tumas, yes, long bigfala dei ia we bae oli karem yufala blong stanap long fored blong Smol Sipsip blong God — long taem ia bae yufala i talem se i no gat wan God?

3 Long taem ia bae yufala i gohed blong tanem baksaed long Kraes, o yufala i save luk Smol Sipsip blong God? Yufala i ting se bae yufala i stap wetem hem, long taem we yufala i save ol rong blong yufala? Yufala i

ting se bae yufala i save stap glad blong stap wetem tabu Man ia, taem we ol sol blong yufala i fulap wetem wan save blong ol rong we from we yufala i bin brekem ol loa blong hem long eni taem?

4 Luk, mi talem long yufala se bae yufala i harem moa nogud blong stap wetem wan tabu mo stret God, long wan save blong ol doti blong yufala long fored blong hem, bitim we bae yufala i harem blong stap wetem ol sol we i kasem panis long hel.

5 From luk, taem we bae yufala i kam blong luk noked blong yufala long fored blong God, mo tu glori blong God, mo tabu fasin blong Jisas Kraes, bae i laetem wan flem blong wan faea we i no save ded long yufala.

6 O long taem ia yufala we i no biliv, tanem yufala i go long Lod, askem strong long Papa long nem blong Jisas, blong maet bae oli save faenem se yufala i no gat mak long yufala, klin, naes, mo waet, from yufala i bin kam klin tru long blad blong Smol Sipsip, long bigfala mo las dei.

7 Mo bakegen mi toktok long yufala we i tanem bakesaed long ol revelesen blong God, mo talem se oli stop finis, se i no gat eni revelesen, o ol profesu, o ol presen, o fasin blong mekem sikman i kam oraet, o fasin blong toktok long plante lanwis, mo fasin blong talem mining blong ol lanwis.

8 Luk mi talem long yufala,

hem we i tanem baksaed long ol samting ia, i no save gospel blong Kraes; yes, hem i no bin ridim ol skripja, sapos hem i bin ridim, hem i no save andastanem olgeta.

9 From yumi no ridim se God i semak long yestedei, tede, mo blong oltaem, mo long hem i no gat jenis mo i no save mekem wan smol jenis?

10 Mo nao, sapos yufala i bin tingting long yufala wan God we i stap jenis, mo long hem i save mekem wan smol jenis, ale yufala i bin tingting long yufala bakegen wan god we i no wan God blong ol merikel.

11 Be luk, bae mi soem long yufala wan God blong ol merikel, we i God blong Ebrahim, mo God blong Aesak, mo God blong Jakob; mo i semfala God we i bin mekem ol heven mo wol, mo evri samting we long olgeta i stap.

12 Luk, hem i bin mekem Adam, mo tru long Adam i bin kam foldaon blong man. Mo from foldaon blong man, Jisas Kraes i bin kam, hem i Papa mo Pikinini; mo from Jisas Kraes, fasin blong pemaot man i bin kam.

13 Mo from fasin blong pemaot man, we i bin kam tru long Jisas Kraes, oli stap karem olgeta i kambak long fes blong Lod; yes, hemia i samting we tru long hem Lod i pemaot evri man, from ded blong Kraes, i mekem i hapen laef bakegen, we i mekem i hapen wan fasin blong pemaot man aot long wan slip we i no gat en, long

slip ia evri man bae i wekap tru long paoa blong God, taem we pupu bae i blu; mo bae oli kam fored, ol smolfala tugeta wetem bigfala, mo evriwan bae i stanap long fored blong kot blong hem, oli bin pemaot olgeta finis mo oli bin kam lus long rop blong ded we i no save finis, we ded ia i wan ded blong bodi.

14 Mo long taem ia jajmen i kam blong Tabu Wan long olgeta; mo afta i kam taem we hem we i doti bae i stap doti yet; mo hem we i stret bae i stap stret yet; hem we i glad bae i stap glad yet; mo hem we i no glad bae i stap no glad yet.

15 Mo nao, O yufala olgeta we i bin tingting long yufala bakegen wan god we i no save mekem ol merikel, mi wantem askem long yufala, evri samting ia i bin pas, long wanem we mi bin tokabot? En i bin kam finis? Luk mi talem long yufala, No; mo God i no bin stop blong stap wan God blong ol merikel.

16 Luk, ol samting we God i bin mekem i gudfala long ol ae blong yumi? Yes, mo huia i save andastanem ol gudfala wok blong God?

17 Huia bae i talem se i no bin wan merikel, we tru long toktok blong hem, heven mo wol bae i stap; mo tru long paoa blong toktok blong hem, i bin mekem man long das blong graon; mo tru long paoa blong toktok blong hem, ol merikel i bin hapen?

18 Mo huia bae i talem se Jisas

Kraes i no bin mekem plante bigfala merikel? Mo i bin gat plante bigfala merikel we i bin hapen tru long ol han blong ol aposol?

19 Mo sapos ol merikel i bin hapen long taem ia, from wanem God i bin stop blong stap wan God blong ol merikel mo long sem taem stap wan Man we i no save jenis? Mo luk, mi talem long yufala, hem i no jenis; sapos hem i jenis, bae hem i stop blong stap God; mo hem i no stop blong stap God, mo i wan God blong ol merikel.

20 Mo stamba tingting from wanem hem i stop blong mekem ol merikel long medel blong ol pikinini blong ol man, i from oli slak from oli bin lusum bilif, mo oli aot long stret fasin, mo oli no save God we oli mas trastem.

21 Luk, mi talem long yufala se eni man we i biliv long Kraes, mo i no gat tingting nating blong no biliv strong; eni samting we bae hem i askem long Papa long nem blong Kraes, bae i givim long hem; mo promes ia i go long evriwan, hem i long ol en blong wol.

22 From luk, olsem ia nao Jisas Kraes i bin talem, Pikinini blong God, long ol disaepol blong hem we bae i stap, yes, mo tu long evri disaepol blong hem, long fasin we grup blong pipol i harem hem: Yufala i go long ful wol, mo prijim gospel long evri man;

23 Mo hem we i biliv mo i kasem baptaes bae i sev, be hem we i no biliv bae i kasem panis;

24 Mo ol saen ia bae i folem olgeta we i biliv—long nem blong mi bae oli sakemaot ol devel; bae oli toktok wetem ol niu lanwis; bae oli holem ol snek; mo sapos oli dring eni posen we i save kilim man i ded bae i no smasem gud olgeta; bae oli putum ol han long olgeta we i sik mo bae oli kam oraet;

25 Mo eni man we bae i biliv long nem blong mi mo i no tingting blong no biliv strong, long hem bae mi talemaot se ol toktok blong mi i tru go kasem evri en blong wol ia.

26 Mo nao, luk, huia i save stanap agensem ol wok blong Lod? Huia i save tanem bak-saed long ol toktok blong hem? Huia bae i girap agensem paoa blong Lod we i strong tumas? Huia bae i luk daon long ol wok blong Lod? Huia bae i luk daon long ol pikinini blong Kraes? Luk, yufala evriwan we i luk daon long ol wok blong Lod, from bae yufala i sapraes mo ded.

27 O ale no luk daon, mo no sapraes, be lisin mo obei long ol toktok blong Lod, mo askem Papa long nem blong Jisas, from eni samting we bae yufala i nidim. No gat tingting blong no biliv strong, be biliv, mo stat olsem long ol taem blong bifo, mo kam long Lod wetem ful hat blong yufala, mo wokem fasin blong sevem yufala wetem respek mo seksek from fraet long fored blong hem.

28 Stap waes long ol dei blong tes blong yufala; tekemaot long

yufala bakegen evri kaen doti; no askem, we i blong mekem yufala nomo i harem gud, be askem samting wetem wan strong tingting we i no save muvmuv, blong bae yufala i no foldaon long eni temtesen, be se bae yufala i wok blong God we i tru mo i stap laef.

29 Meksua se yufala i no kasem baptaes taem we yufala i no stret; meksua se yufala i no tekem sakramen blong Kraes taem we yufala i no stret; be meksua se yufala i mekem evri samting long taem we yufala i stret, mo mekem samting ia long nem blong Jisas Kraes, Pikinini blong God we i stap laef; mo sapos yufala i mekem samting ia, mo stap strong kasem en, bae God i no sakem-aot yufala long eni wei.

30 Luk, mi toktok long yufala olsem se mi toktok aot long ol ded; from mi save se bae yufala i gat ol toktok blong mi.

31 No tok agensem mi from mi no stret gud, mo tu papa blong mi from hem i no stret gud; mo tu olgeta we i bin raet bifo long hem; be i moa gud se yufala i talem tangkyu long God we hem i bin soemaot long yufala, samting blong mifala we i no stret gud, blong mekem se yufala i save lanem blong stap moa waes bitim we mifala i bin stap.

32 Mo nao, luk, mifala i bin raetem histri ia folem save blong mifala, long ol leta we oli singaotem long medel blong mifala niufala lanwis blong Ijip, oli bin pasem daon long

mifala mo mifala i bin jenisim, folem fasin blong toktok blong mifala.

33 Mo sapos we ol buk blong mifala i bin bigwan inaf, mifala i bin raetem long lanwis blong Hibru; be mifala i bin jenisim lanwis blong Hibru tu; mo sapos we mifala i bin save raet long lanwis blong Hibru, luk, bae yufala i no bin gat eni samting we i no stret gud long histri blong mifala.

34 Be Lod i save ol samting we mifala i bin raetem, mo tu se i no gat wan narafala pipol we i save lanwis blong mifala; mo from we i no gat wan narafala pipol i save lanwis blong mifala, taswe hem i bin mekem rere ol wei blong talem mining blong olgeta.

35 Mo oli bin raetem ol samting ia blong mekem se mifala i save aotem long ol klos blong mifala ol blad blong ol brata blong mifala we i bin kam slak from oli bin lusum bilif.

36 Mo luk, ol samting ia we mifala i bin wantem long saed blong ol brata blong mifala, yes, mo tu kambak blong olgeta blong save Kraes, oli folem ol prea blong evri sent we i bin stap long graon.

37 Mo bae Lod Jisas Kraes i letem se ol prea blong olgeta i kasem ansa folem fet blong olgeta; mo bae God Papa i tingbaot kavenan we hem i bin mekem wetem laen blong Isrel; mo bae hem i blesem olgeta blong oltaem, tru long fet long nem blong Jisas Kraes. Amen.

# BUK BLONG ITA

*Histri blong ol laen blong Jared, we oli bin tekem aot long ol twenti fo buk we ol pipol blong Limhae i bin faenem long ol dei blong king Mosaea.*

## JAPTA 1

*Moronae i mekem i kam smol ol toktok blong Ita we hem i bin raetem—Oli soemaot laen blong famle blong Ita—Lanwis blong ol laen blong Jared i no bin jenis long Taea blong Babel—Lod i promes blong lidim olgeta i go long wan graon we i gud tumas mo mekem olgeta i kam wan gud-fala kantri.*

**M**O nao mi, Moronae, mi gohed blong raetem wan histri blong olgeta we i bin stap bifo we ol han blong Lod i bin smasem gud olgeta long fes blong kantri ia long not.

2 Mo mi tekem histri blong mi aot long ol twenti mo fo buk we ol pipol blong Limhae i bin faenem, we oli singaotem Buk blong Ita.

3 Mo from mi ting se fasfala pat blong histri ia, we i tokbaot wok blong mekem wol ia, mo tu long saed blong Adam, mo wan histri stat long taem ia i go kasem bigfala taea, mo eni samting we i bin hapen long medel blong ol pikinini blong ol man kasem taem ia, i stap long medel blong ol Jiu—

4 Taswe mi no raetem ol samting ia we i bin hapen stat long ol dei blong Adam kasem taem ia; be oli stap long ol buk; o eni man we i faenem olgeta, semfala man ia bae i gat paoa

blong hem i save kasem ful histri.

5 Be luk, mi no givim ful histri, be wan pat blong histri mi givim, stat long taea go kasem taem we oli bin smasgud.

6 Mo long fasin ia mi givim histri ia. Hem we hem i bin raetem histri ia i bin Ita, mo hem i bin wan laen blong Korianta.

7 Korianta i bin boe blong Moron.

8 Mo Moron i bin boe blong Item.

9 Mo Item i bin boe blong Aha.

10 Mo Aha i bin boe blong Set.

11 Mo Set i bin boe blong Siblon.

12 Mo Siblon i bin boe blong Kom.

13 Mo Kom i bin boe blong Koriantum.

14 Mo Koriantum i bin boe blong Amnigada.

15 Mo Amnigada i bin boe blong Eron.

16 Mo Eron i bin wan laen blong Het, we i bin boe blong Hiatom.

17 Mo Hiatom i bin boe blong Lib.

18 Mo Lib i bin boe blong Kis.

19 Mo Kis i bin boe blong Korom.

20 Mo Korom i bin boe blong Livae.

21 Mo Livae i bin boe blong Kim.

22 Mo Kim i bin boe blong Morianton.



23 Mo Morianton i bin wan laen blong Riplakis.

24 Mo Riplakis i bin boe blong Ses.

25 Mo Ses i bin boe blong Het.

26 Mo Het i bin boe blong Kom.

27 Mo Kom i bin boe blong Koriantum.

28 Mo Koriantum i bin boe blong Ima.

29 Mo Ima i bin boe blong Oma.

30 Mo Oma i bin boe blong Sul.

31 Mo Sul i bin boe blong Kib.

32 Mo Kib i bin boe blong Oraeha, we i bin boe blong Jared;

33 We Jared ia i bin kam fored wetem brata blong hem mo ol famle blong tufala, wetem sam narafala mo ol famle blong olgeta, aot long bigfala taoa, long taem we Lod i bin jenisim lanwis blong ol pipol, mo i bin promes long kros blong hem se oli mas seraot olbaot long ful fes blong wol; mo folem toktok blong Lod, ol pipol i bin seraot olbaot.

34 Mo brata blong Jared from hem i wan bigfala mo strongfala man, mo wan man we Lod i laekem hem tumas, Jared, brata blong hem, i bin talem long hem: Prea long Lod, blong bae hem i no jenisim lanwis blong yumi blong yumi no save ol toktok blong yumi.

35 Mo i bin hapen se brata blong Jared i bin prea long Lod, mo Lod i bin gat sore long Jared; taswe hem i no bin jenisim lanwis blong Jared; mo Jared

mo brata blong hem, Lod i no bin jenisim lanwis blong tufala.

36 Afta, Jared i bin talem long brata blong hem: Prea bakegen long Lod, mo bae i save olsem se hem i tanem kros blong hem i gowe long olgeta we oli ol fren blong yumi, blong hem i no jenisim lanwis blong olgeta.

37 Mo i bin hapen se brata blong Jared i bin prea long Lod, mo Lod i bin gat sore long ol fren blong olgeta mo ol famle blong olgeta tu, mekem se hem i no bin jenisim lanwis blong olgeta.

38 Mo i bin hapen se Jared i bin toktok bakegen long brata blong hem, i talem: Go mo askem long Lod sapos hem bae i pusum yumi aot long graon, mo sapos hem bae i pusum yumi aot long graon, askem long hem wea ples bae yumi go. Be huia i save be bae Lod i tekem yumi go long wan graon we i moa gud bitim evri graon long wol? Mo sapos bae i olsem, bae yumi holem taet fet long Lod, blong mekem se yumi save kasem hem blong yumi olsem se i kam long ol papa.

39 Mo i bin hapen se brata blong Jared i bin prea long Lod folem toktok we i bin kamaot long maot blong Jared.

40 Mo i bin hapen se Lod i bin harem brata blong Jared, mo i bin gat sore long hem, mo i bin talem long hem:

41 Go wok mo karem i kam tugeta ol grup blong ol anamol blong yu, ol man tugeta wetem woman, blong evri kaen; mo tu long ol sid blong graon blong

evri kaen; mo ol famle blong yu; mo tu Jared brata blong yu mo famle blong hem; mo tu ol fren blong yu mo ol famle blong olgeta, mo ol fren blong Jared mo ol famle blong olgeta.

42 Mo taem we yu bin mekem samting ia bae yu go long fored blong olgeta daon long vale we i stap long not. Mo long ples ia bae mi mitim yu, mo bae mi go long fored blong yu long wan graon we i moa gud bitim evri graon blong wol.

43 Mo long ples ia bae mi blesem yu mo ol pikinini blong yu, mo resemap long mi aot long ol pikinini blong yu mo ol pikinini blong brata blong yu, mo olgeta we bae oli go wetem yu, wan strong kantri. Mo bae i no gat wan we i moa strong bitim kantri we bae mi resemap long mi blong ol pikinini blong yu, long ful fes blong wol. Mo olsem ia nao bae mi mekem long yu from longfala taem ia we yu bin prea long mi.

---

## JAPTA 2

---

*Ol laen blong Jared i mekem rere blong wokbaot blong olgeta blong go long wan promises graon—Hem i wan graon we i gud tumas we long hem ol man i mas wok blong Kraes o bae oli sakemaot olgeta—Lod i toktok long brata blong Jared blong tri aoa—Ol laen blong Jared i bildim ol sip—Lod i askem brata blong Jared blong givim wan plan, hao nao bae oli putum laet long ol sip ia.*

Mo i bin hapen se Jared mo bra-

ta blong hem, mo ol famle blong olgeta, mo tu ol fren blong Jared, mo brata blong hem mo ol famle blong olgeta, i bin go daon long vale we i bin stap long not, (mo nem blong vale i bin Nimrod, we oli bin singaotem afta strong man blong lukaotem anamol long bus) wetem ol anamol blong olgeta we oli bin karem i kam tugeta man mo woman blong evri kaen.

2 Mo tu oli bin putum ol rop blong holem anamol mo kasem ol pigin blong skae; mo tu oli bin mekem rere wan kontena we long hem oli bin karem wetem olgeta ol fis blong wota.

3 Mo tu oli bin karem wetem olgeta deseret, we, long lanwis ia, i wan sugabag; mo olsem ia nao oli bin karem wetem olgeta ol grup blong ol sugabag, mo evri kaen samting we i bin stap long fes blong graon, ol sid blong evri kaen.

4 Mo i bin hapen se taem we oli bin kam daon insaed long vale blong Nimrod, Lod i bin kam daon mo bin toktok wetem brata blong Jared; mo hem i bin stap insaed long wan klaod, mo brata blong Jared i no bin luk hem.

5 Mo i bin hapen se Lod i bin givim oda long olgeta se oli mas go fored insaed long ples we i no gat man long hem, yes, insaed long ples ia we i neva bin gat man i bin go bifo. Mo i bin hapen se Lod i bin go long fored blong olgeta, mo i bin toktok wetem olgeta long taem we hem i bin stanap insaed long wan klaod, mo i talemaot

long olgeta wea ples oli mas wokbaot.

6 Mo i bin hapen se oli bin wokbaot long ples we i no gat man long hem, mo oli bin bildim ol sip, long ol sip ia oli bin krossem ol plante wota, mo han blong Lod i bin lidim olgeta oltaem.

7 Mo Lod i no bin wantem letem se oli mas stop bitim solwota long ples we i no gat man long hem, be hem i bin wantem se oli mas kam fored kasem graon blong promes, we i bin moa gud tumas bitim evri narafala graon, we Lod God i bin sevem blong wan pipol we i stret.

8 Mo hem i bin mekem strong promes long kros blong hem long brata blong Jared, se eni man we bae i stap long graon blong promes, stat long taem ia i go mo blong oltaem, i mas wok blong hem, hem nomo hem i God we i tru, o bae oli mas sakemaot olgeta long taem we kros blong hem we i fulwan bae i kam long olgeta.

9 Mo nao, mifala i save luk ol loa blong God long saed blong graon ia, se hem i wan graon blong promes; mo eni kantri we bae i stap long hem, i mas wok blong God, o bae God i sakemaot olgeta long taem we kros blong hem we i fulwan bae i kam long olgeta. Mo kros blong hem we i fulwan i kam long olgeta long taem we oli raep long rabis fasin.

10 From luk, hemia i wan graon we i gud tumas bitim evri narafala graon; from samting

ia hem we i stap long hem, bae i wok blong God, o bae God i sakemaot olgeta; from hemia i loa blong God we i no gat en. Mo i no kasem taem we rabis fasin long medel blong ol pikinini blong graon ia i fulwan, we God i sakemaot olgeta.

11 Mo hemia i kam long yufala, O yufala ol Jentael, blong yufala i save gat save long saed blong ol loa blong God—blong yufala i save sakem sin, mo no gohed long rabis fasin blong yufala kasem taem we fulwan i kam, blong yufala i no mekem kros blong God we i fulwan i kam daon long yufala, olsem olgeta we i stap long graon ia i bin mekem bifo long taem ia.

12 Luk, hemia i wan gudfala graon tumas, mo eni kantri we bae i stap long hem, bae i fri aot long slef, mo long stap andanit narafala paoa, mo long evri narafala kantri andanit long heven, sapos bae oli wok nomo blong God blong graon ia, we i Jisas Kraes, we i bin soemaot hem tru long ol samting we mifala i bin raetem.

13 Mo nao mi gohed wetem histri blong mi; from luk, i bin hapen se Lod i bin tekem Jared mo ol brata blong hem i kam aot kasem bigfala solwota ia we i seraotem ol kantri. Mo taem we oli bin kam long solwota oli bin stanemap ol tenet blong olgeta; mo oli bin singaotem nem blong ples ia, Moriankama; mo oli bin stap long ol tenet, mo i stap long ol tenet long so blong solwota blong spes blong fo yia.

14 Mo i bin hapen se long en blong fo yia, Lod i bin kam bakegen long brata blong Jared, mo i bin stanap insaed long wan klaod mo i bin toktok wetem hem. Mo blong spes blong tri aoa Lod i bin toktok wetem brata blong Jared, mo i bin stretem hem from hem i no bin tingbaot blong singaotem nem blong Lod.

15 Mo brata blong Jared i bin sakem sin, blong nogud fasin we hem i bin mekem, mo i bin singaotem nem blong Lod from ol brata blong hem we i bin stap wetem hem. Mo Lod i bin talem long hem: Bae mi fogivim yu mo ol brata blong yu long ol sin blong olgeta, be yufala i no mas mekem sin bakegen, from yufala i mas tingbaot se Spirit blong mi bae i no wok oltaem wetem man; from samting ia, sapos bae yufala i mekem sin kasem taem we yufala i raep fulwan, bae Lod i katem yufala aot long fored blong hem. Mo hemia i ol tingting blong mi long saed blong graon we bae mi givim long yufala blong graon we i kam long ol papa; from bae i wan graon we i gud-fala tumas bitim evri narafala graon.

16 Mo Lod i bin talem: Go blong wok mo bildim ol sip, folem semfala fasin we yufala i bin bildim bifo. Mo i bin hapen se brata blong Jared i bin go wok, mo tu ol brata blong hem, mo oi bin bildim ol sip long samfala fasin we oli bin bildim bifo, folem ol toktok blong Lod. Mo oli bin smol, mo oli no bin

hevi long solwota, semak olsem wan pijin blong skae we i no hevi long wota.

17 Mo oli bin bildim olgeta long wan fasin we oli taet tumas, kasem se bae oli holem wota olsem wan dis; mo botom blong olgeta i bin taet olsem wan dis; mo ol saed blong olgeta i bin taet olsem wan dis; mo ol en blong olgeta i bin sap; mo ol ples antap blong olgeta i bin taet olsem wan dis; mo longfala blong olgeta i bin olsem longfala blong wan tri; mo doa blong olgeta, taem we i bin sat, i bin taet olsem wan dis.

18 Mo i bin hapen se brata blong Jared i bin prea long Lod, i talem: O Lod mi bin mekem wok ia we yu bin talem long mi, mo mi bin mekem ol sip ia folem olsem we yu bin talem long mi.

19 Mo luk, O Lod, long olgeta i no gat eni laet; wea ples bae mifala i stia? Mo tu mifala bae i ded, from insaed long olgeta mifala i no save pulum win, be ol win we i stap insaed long olgeta nomo, taswe bae mifala i ded.

20 Mo Lod i bin talem long brata blong Jared: Luk, bae yufala i mekem wan hol long ples antap, mo tu long botom; mo taem we bae yufala i sot long win, bae yufala i openem hol mo kasem win. Mo sapos i olsem se wota i kam insaed long yufala, luk, bae yufala i satem hol, blong mekem se yufala i no save ded long wota we i kam insaed.

21 Mo i bin hapen se brata

blong Jared i bin mekem olsem, folem olsem we Lod i bin talem.

22 Mo hem i bin prea bakegen long Lod, i talem: O Lod, luk mi bin mekem olsem we yu bin givim oda long mi; mo mi bin mekem rere ol sip blong ol pipol blong mi, mo luk i no gat eni laet insaed long olgeta. Luk, O Lod, bae yu letem se bae mifala i krosem bigfala wota ia long tudak?

23 Mo Lod i bin talem long brata blong Jared: Wanem nao yu wantem se mi mas mekem blong yufala i save gat laet insaed long ol sip blong yufala? From luk, yufala i no save gat ol windo, from bae oli brokbrok long pisis; mo tu bae yufala i no tekem faea wetem yufala, from bae yufala i no mas go wetem laet blong faea.

24 From luk, bae yufala i stap olsem wan wel fis long medel blong solwota; from ol bigfala hil blong ol wef bae i foldaon long yufala. Be bae mi karem yufala i kam antap bakegen aot long ol dip ples blong solwota; from ol win i bin go fored aot long maot blong mi, mo tu ol ren mo ol wota mi bin sendem aot.

25 Mo luk, mi mekem rere yufala agensem samting ia; from yu no save krosem bigfala dip solwota ia sapos mi no mekem rere yufala agensem ol wef blong solwota, mo ol win we i bin go aot, mo ol wota we i bin kam antap bigwan. Taswe wanem nao yu wantem se mi mas mekem blong yu blong mekem se yufala i save gat laet

long taem we ol dip ples blong solwota i kavremap yufala?

---

### JAPTA 3

---

*Brata blong Jared i lukim fingga blong Lod taem we hem i tajem ol sikstin ston—Kraes i soem spirit bodi blong hem long brata blong Jared—Olgeta we i gat wan save we i stret gud oli no save holem bak olgeta blong lukluk insaed long vel—Lod i givim ol samting blong tanem lanwis blong mekem histri blong ol laen blong Jared i kam long laet.*

Mo i bin hapen se brata blong Jared, (nao namba blong ol sip we oli bin mekem i rere i bin eit) i bin go aot long bigfala hil, we oli bin singaotem bigfala hil Selem, from hem i hae tumas, mo hem i bin meltem wan ston, blong mekem sikstin smol ston; mo oli bin waet mo klia, hem i olsem glas we oli save lukluk tru long hem; mo hem i bin karem olgeta long ol han blong hem, long ples antap blong bigfala hil, mo i bin prea bakegen long Lod, i talem:

2 O Lod yu bin talem se bambae ol wota we bae i kam antap bigwan, i mas raonem mifala. Nao luk, O Lod, mo yu no stap kros long wokman blong yu from hem i no strong long fored blong yu; from mifala i save se yu yu tabu mo stap long ol heven, mo we mifala i no stret long fored blong yu; from foldaon, fasin blong mifala i bin kam nogud oltaem; be, O Lod, yu yu bin givim long mifala

wan komanmen se mifala i mas singaotem yu, blong mekem se long yu mifala i save kasem folem wanem mifala i wantem.

3 Luk, O Lod, yu bin panisim mifala from nogud fasin blong mifala, mo bin pusem mifala aot, mo blong plante yia ia mi fala i bin stap long wan ples we i no gat man long hem; be, yu bin gat sore long mifala. O Lod, lukluk long mi wetem sore, mo tanem i gowe kros blong yu long ol pipol ia blong yu, mo no letem se bae oli go aot blong krosem bigfala dip solwota ia long tudak; be luk ol samting ia we mi bin meltem aot long ston.

4 Mo mi save, O Lod, se yu yu gat evri paoa, mo save mekem eni samting yu wantem, blong helpem man; taswe tajem ol ston ia, O Lod, wetem fingga blong yu, mo mekem rere olgeta blong oli save saen aot long tudak; mo bae oli saen aot long mifala insaed long ol sip we mifala i bin mekem rere, blong mifala i save gat laet taem we bae mifala i krosem solwota.

5 Luk, O Lod, yu save mekem samting ia. Mifala i save se yu yu save soemaot bigfala paoa, we i luk smol long save blong ol man.

6 Mo i bin hapen se taem we brata blong Jared i bin talem ol toktok ia, luk, Lod i bin strettem han blong hem mo i bin tajem ol ston ia wan afta narawan wetem fingga blong hem. Mo vel i bin kamaot long ol ae blong brata blong Jared, mo hem i bin lukim fingga blong

Lod; mo i bin olsem fingga blong wan man, olsem bodi blong mit mo bun mo blad; mo brata blong Jared i bin foldaon long fored blong Lod, from fraet i bin winim hem.

7 Mo Lod i bin luk se brata blong Jared i bin foldaon long graon; mo Lod i bin talem long hem: Girap, from wanem yu bin foldaon?

8 Mo hem i bin talem long Lod: Mi bin lukim fingga blong Lod, mo mi bin fraet se bae hem i kilim mi; from mi no bin save se Lod i gat bodi blong mit mo bun, mo blad.

9 Mo Lod i bin talem long hem: From fet blong yu, yu bin lukim we bae mi tekem long mi bodi blong mit mo bun, mo blad; mo i neva bin gat man we i kam long fored blong mi wetem fet we i bigwan tumas semak olsem yu bin kam; from sapos i no bin olsem yu no bin save lukim fingga blong mi. Yu bin lukim moa bitim hemia?

10 Mo hem i bin ansa: No; Lod, soemaot yuwan long mi.

11 Mo Lod i bin talem long hem: Yu bilivim ol toktok we bae mi talem?

12 Mo hem i bin ansa: Yes, Lod, mi save se yu stap talem trutok, from yu yu wan God blong trutok, mo yu no save giaman.

13 Mo taem we hem i bin talem ol toktok ia, luk, Lod i bin soemaot hemwan long hem, mo i bin talem: From yu save long saed blong ol samting ia, Lod i pemaot yu long foldaon; taswe mi karem yu i kambak

long fes blong mi; taswe mi soemaot miwan long yu.

14 Luk, mi mi hem we God i bin mekem rere stat long stat blong wol, blong pemaot ol pipol blong mi. Luk, Mi mi Jisas Kraes. Mi mi Papa mo Pikinini. Long mi bae evri man i gat laef, mo hemia we i no save finis, mo tu olgeta we bae oli biliv long nem blong mi; mo bae oli kam ol boe blong mi mo ol gel blong mi.

15 Mo mi neva bin soemaot miwan long man we mi bin mekem, from i neva bin gat wan man we i bin biliv long mi semak olsem yu bin biliv. Yu luk se mi bin mekem yu long pikja blong mi? Yes, mo tu mi bin mekem evri man long stat, long pikja blong mi.

16 Luk, bodi ia, we yu stap luk naoia, i bodi blong spirit blong mi; mo man, mi bin mekem folem bodi blong spirit blong mi; mo i semak olsem we mi soemaot long yu we mi stap long spirit, bae mi soemaot mi long ol pipol blong mi long bodi blong mit mo bun.

17 Mo nao, olsem mi, Moronae, i bin talem se mi no save mekem ful histri blong ol samting we oli bin raetem, taswe i naf long mi blong talem se Jisas i bin soemaot hemwan long man ia long spirit, hem i folem fasin mo long pikja blong semfala bodi ia, olsem we hem bin soemaot hemwan long ol man blong Nifae.

18 Mo hem i bin givhan long hem olsem we hem i bin givhan long ol man blong Nifae; mo evri samting ia, blong mekem

se man ia i save gat save se hem i God, from plante bigfala wok we Lod i bin soem long hem.

19 Mo from save blong man ia, i no save holem bak hem blong lukluk insaed long vel; mo hem i bin lukim fingga blong Jisas, we, taem we hem i bin lukim, hem i bin foldaon wetem fraet; from hem i bin save se hemia i fingga blong Lod; mo hem i nomo bin gat fet, from hem i bin save, hem i no bin gat wan tingting blong no bilif strong.

20 From samting ia, from hem i gat save we i stret gud long saed blong God, i no save holem bak hem blong lukluk insaed long vel; taswe hem i bin luk Jisas; mo hem i bin givhan long hem.

21 Mo i bin hapen se Lod i bin talem long brata blong Jared: Luk, yu no mas letem ol samting ia we yu bin lukim mo yu bin harem blong go aot long wol, kasem taem i kam we bae mi leftemap nem blong mi long bodi blong mit mo bun; from samting ia, bae yu holem taet gud ol samting ia we yu bin lukim mo bin harem, mo no soem samting ia long eni man.

22 Mo luk, taem we bae yu kam long mi, bae yu raetem ol samting ia mo silim olgeta, blong i no gat wan man we i save tanem olgeta i go long narafala lanwis; from bae yu raetem olgeta long wan lanwis we oli no save ridim olgeta.

23 Mo luk, tufala ston ia bae mi givim long yu, mo bae yu silim tufala tu wetem ol samting we bae yu raetem.

24 From luk, lanwis we bae yu raetem mi bin jenisim; from samting ia bae mi mekem long taem we mi jusum se bae ol ston ia bae mekem i kam klia long ol ae blong ol man ol samting we bae yu raetem.

25 Mo afta we Lod i bin talem ol toktok ia, hem i bin soem long brata blong Jared, evri pipol blong wol we i bin stap bifo, mo tu olgeta we bae i kam; mo hem i no bin holem bak olgeta long lukluk blong hem, kasem we i soem ol en blong wol.

26 From hem i bin talem long hem long ol taem bifo, se sapos hem i biliv long hem se hem i save soem long hem evri samting—bae hem i soemaot long hem, taswe Lod i no bin save holem taet eni samting long hem, from hem i bin save se Lod i save soem long hem evri samting.

27 Mo Lod i bin talem long hem: Raetem ol samting ia mo silim olgeta; mo bae mi soem olgeta long taem we mi jusum long ol pikinini blong ol man.

28 Mo i bin hapen se Lod i bin givim oda long hem se hem i mas silim tufala ston ia we hem i bin kasem, mo no soem tufala, kasem taem we Lod bae i soemaot olgeta long ol pikinini blong ol man.

---

#### JAPTA 4

---

*Lod i givim oda long Moronae blong silim ol samting we brata blong Jared i bin raetem—Bae oli*

*no kamaot kasem taem we ol man i gat fet semak olsem brata blong Jared—Kraes i givim oda long ol man blong bilivim ol toktok blong hem mo olgeta blong ol disaepol blong hem—Lod i givim oda long ol man blong sakem sin, bilivim gospel, mo sev.*

Mo Lod i bin givim oda long brata blong Jared blong go daon aot long bigfala hil, aot long fes blong Lod, mo raetem ol samting we hem i bin lukim, mo oli bin blokem se oli no kamaot long medel blong ol pikinini blong ol man kasem afta we bae oli leftemap hem antap long kros; mo from stamba tingting ia king Mosaea i bin holem taet olgeta, blong oli no mas kam long wol kasem afta we Kraes bae i soemaot hemwan long ol pipol blong hem.

2 Mo afta Kraes i bin soemaot hemwan tru long ol pipol blong hem, hem i bin givim oda se oli mas soemaot ol samting ia.

3 Mo nao, afta long samting ia, olgeta evriwan i bin kam slak from oli bin lusum bilif; mo i no gat wan sapos i no ol man blong Leman, mo oli bin sakemaot gospel blong Kraes; taswe mi mi kasem oda se mi mas haedem olgeta bakegen andanit long graon.

4 Luk, mi bin raetem long ol buk ia ol stret samting we brata blong Jared i bin lukim; mo i neva bin gat eni samting we i moa bigfala we i soemaot bitim ol samting we i bin soemaot long brata blong Jared.

5 From samting ia Lod i bin



givism oda long mi blong raetem olgeta; mo mi bin raetem olgeta. Mo hem i bin givism oda long mi se mi mas silim olgeta; mo tu hem i bin givism oda se mi mas silim ol mining blong olgeta; from samting ia mi bin silim ol samting blong tanem lanwis folem komanmen blong Lod.

6 From Lod i bin talem long mi: Bae oli no mas go aot long ol Jentael kasem dei we bae oli sakem rabis fasin blong olgeta, mo kam klin long fored blong Lod.

7 Mo long dei ia we bae oli yusum fet long mi, Lod i talem, olsem we brata blong Jared i bin mekem, blong oli save kam tabu long mi, afta bae mi soemaot long olgeta ol samting we brata blong Jared i bin lukim, go kasem we mi eksplenem long olgeta evri revelesen blong mi, Jisas Kraes i talem, Pikinini blong God, Papa blong ol heven mo blong wol, mo evri samting we i stap long olgeta.

8 Mo hem we bae i faet agensem toktok blong Lod, bae hem i kasem panis; mo hem we i tanem baksaed long ol samting ia, bae hem i kasem panis; from long olgeta ia bae mi no soemaot ol samting we i moa bigwan, Jisas Kraes i talem; from mi mi hem we i stap toktok.

9 Mo long oda blong mi, ol heven i open mo i sat; mo long toktok blong mi wol bae i seksek; mo long oda blong mi olgeta we i stap long hem bae i ded, we i olsem tru long long faea.

10 Mo hem we i no bilivim

ol toktok blong mi, hem i no bilivim ol disaepol blong mi; mo sapos i olsem se mi no toktok, yufala i jajem, from bae yufala i save se hem i mi we i toktok, long las dei.

11 Be hem we i bilivim ol samting ia we mi bin talemaot, hem bae mi visitim tru long ol samting we Spirit blong mi i soemaot, mo bae hem i save mo witnesem. From, from Spirit blong mi, bae hem i save se ol samting ia i tru; from i lidim ol man blong mekem gud fasin.

12 Mo eni samting we i lidim ol man blong mekem gud fasin, i kamaot long mi; from gud samting i no kamaot long eni man sapos i no tru long mi. Mi mi semfala man ia we i lidim ol man blong mekem evri gud fasin; hem we bae i no bilivim ol toktok blong mi, bae i no bilivim mi—se mi mi stap; mo hem we bae i no bilivim mi bae i no bilivim Papa we i bin sendem mi. From luk, mi mi Papa, mi mi laet, mo laef, mo trutok blong wol.

13 Kam long mi, O yufala ol jentael, mo bae mi soem long yufala ol samting we i moa bigfala, save ia we mi bin haedem from fasin blong no gat bilif.

14 Kam long mi, O yufala laen blong Isrel, mo bae mi soemaot long yufala hamas nao ol bigfala samting we Papa i bin mekem rere blong yufala, stat long stat blong wol; mo i no bin kam long yufala, from fasin blong no gat bilif.

15 Luk, taem we bae yufala i teremaot vel ia blong no gat

bilif, we i stap mekem yufala i stap long nogud ples blong yufala blong fasin nogud, mo hat we i strong, mo maen we i blaen, afta bae ol bigfala mo gudfala samting we i bin haed long stat blong stat blong wol long yufala — yes, taem we bae yufala i prea long Papa long nem blong mi, wetem wan hat we i sore mo wan spirit we i wantem blong sakem sin, afta bae yufala i save se Papa i bin tingbaot kavenan we hem i bin mekem wetem ol papa blong yufala, O laen blong Isrel.

16 Mo afta bae ol revelesen blong mi we mi bin mekem se wokman blong mi Jon i bin raetem, mi save eksplenem long ol ae blong evri pipol. Tingbaot, taem we yufala i luk ol samting ia, bae yufala i save se taem i klosap we bae mi soemaot tru long ol samting we mi mekem.

17 Taswe, taem we bae yufala i kasem histri ia, yufala i save gat save se wok blong Papa i bin stat long ful fes blong graon.

18 Taswe, sakem sin yufala evriwan long ol en blong wol, mo kam long mi, mo biliv long gospel blong mi, mo kasem baptaes long nem blong mi; from hem we i bilivim mo i kasem baptaes, bae i sev; be hem we i no bilivim bae i kasem panis; mo ol saen bae i folem olgeta we i biliv long nem blong mi.

19 Mo hem we oli faenem se hem i holem taet fet long nem blong mi long las dei bae i kasem blesing, from bae i leftemap hem blong stap long

kingdom we i bin mekem rere blong hem, stat long stat blong wol. Mo luk, hem i mi we mi bin talem samting ia. Amen.

---

## JAPTA 5

---

*Ol trifala witnes mo wok hemwan bae i stanap olsem wan testemoni we Buk blong Momon i tru.*

Mo nao mi, Moronae, i bin raetem ol toktok we Lod i bin givim oda long mi, folem memori blong mi; mo mi bin talem long yufala ol samting we mi bin silim; taswe no tajem olgeta, blong yu save transletem; from samting ia i blokem yu, hemia nomo sapos i no long taem olsem, bae i stap long waes tingting blong God.

2 Mo Luk, yu save gat janis blong save soem ol buk ia long olgeta we bae i helpem blong karem wok ia i kam;

3 Mo long tri bae oli soemaot olgeta tru long paoa blong God; from samting ia bae oli save tru se ol samting ia i tru.

4 Mo long maot blong tri witnes bae ol samting ia i stanap; mo testemoni blong tri, mo wok ia, long samting ia bae oli soemaot paoa blong God mo tu toktok blong hem, long we Papa, mo Pikinini, mo Tabu Spirit i witnesem — mo evri samting ia bae i stap olsem wan testemoni agensem wol long las dei.

5 Mo sapos i olsem se oli sakem sin mo kam long Papa long nem blong Jisas, bae oli akseptem olgeta long kingdom blong God.

6 Mo nao, sapos mi no gat eni raet long ol samting ia, yufala i jajem, from bae yufala i save se mi mi gat raet taem we bae yufala i luk mi, mo bae yumi stanap long fored blong God long las dei. Amen.

---

JAPTA 6

---

*Win i pusum ol sip blong ol laen blong Jared, i go long graon blong promes—Ol pipol i presem Lod from gudfala fasin blong hem—Oli jusum Oraeha blong kam king ova long olgeta—Jared mo brata blong hem oli ded.*

Mo nao mi, Moronae, i gohed blong givim histri blong Jared mo brata blong hem.

2 From i bin hapen se afta we Lod i bin mekem rere ol ston we brata blong Jared i bin karem i go long bigfala hil, brata blong Jared i bin kam daon aot long bigfala hil, mo hem i bin putum aot ol ston insaed long ol sip we oli bin mekem rere, wan long evri en blong olgeta; mo luk, oli bin givim laet long ol sip.

3 Mo olsem ia nao Lod i bin mekem ol ston blong saen long tudak, blong givim laet long ol man, ol woman, mo ol pikinini, blong mekem se oli no save krosem ol bigfala solwota long tudak.

4 Mo i bin hapen se afta we oli bin mekem rere evri kaen kakae, we tru long hem oli save laef long solwota, mo tu ol kakae blong ol grup blong ol anamol blong olgeta mo ol buluk, mo eni kaen bigfala anamol, o

anamol, o pijin we bae oli karem wetem olgeta—mo oli bin hapen se taem we oli bin mekem evri samting ia, oli bin go insaed long ol sip blong olgeta o ol baj, mo i bin go aot long solwota, oli putum tras blong olgeta long Lod, God blong olgeta.

5 Mo i bin hapen se Lod God i bin mekem se i mas gat wan strong win i blu long fes blong ol wota, i go long promes graon; mo olsem ia nao ol wef blong solwota i bin pusum olgeta long fored blong win.

6 Mo i bin hapen se oli bin draon plante taem long ol dip ples blong solwota, from ol bigfala hil blong ol wef we i bin brok long olgeta, mo tu ol bigfala mo nogud hariken we i bin hapen tru long strong paoa blong win.

7 Mo i bin hapen se taem we oli bin draon long ol dip ples, i no bin gat eni wota we i save smasem gud olgeta, from ol sip blong olgeta i taet gud olsem wan dis, mo tu oli bin taet gud olsem sip blong Noa; taswe taem we plante wota i bin raonem olgeta, oli bin prea long Lod, mo hem i bin karem olgeta bakegen i kam antap long ol wota.

8 Mo i bin hapen se win i neva bin stop blong blu i go long promes graon taem we oli bin stap long wota; mo olsem ia nao win i bin pusum olgeta i go fored.

9 Mo oli bin singim ol singsing blong pres long Lod; yes, brata blong Jared i bin singim ol singsing blong pres long Lod,

mo hem i bin talem tangkyu mo presem Lod long ful dei; mo taem we naet i bin kam, oli mo bin stop blong presem Lod.

10 Mo olsem ia nao win i bin pusum olgeta i go fored; mo no gat bigfala anamol blong solwota i bin save brekem olgeta, o wel fis we i save smasem gud olgeta; mo oli bin gat laet oltaem, sapos i bin antap long wota o andanit long wota.

11 Mo olsem ia nao win i bin pusum olgeta i go fored, tri hundred mo foti mo fo dei long wota.

12 Mo oli bin kam stop long so blong promes graon. Mo taem we oli bin putum ol leg blong olgeta long ol so blong promes graon, oli bodaon olgeta bak-egen long fes blong graon, mo oli bin putum tingting blong olgeta i stap daon long fored blong Lod, mo wota blong ae blong olgeta i bin ron from glad long fored blong Lod, from plante sore mo lav blong hem ova long olgeta.

13 Mo i bin hapen se oli bin go aot long fes blong graon, mo oli bin stat blong wok long graon.

14 Mo Jared oli bin gat fo boe; mo oli bin singaotem olgeta, Jakom, mo Gilga, mo Maha, mo Oraeha.

15 Mo brata blong jared tu i bin gat ol boe mo ol gel.

16 Mo ol fren blong Jared mo brata blong hem, namba blong olgeta i bin klosap twenti mo tu sol; mo olgeta tu i bin gat ol boe mo ol gel bifo oli bin kam long graon blong promes; mo taswe oli bin stat blong kam plante.

17 Mo oli bin tijim olgeta blong wokbaot wetem tingting we i no hae long fored blong Lod; mo tu oli bin kasem tijing aot long heven.

18 Mo i bin hapen se oli bin stat blong go olbaot long fes blong graon, mo blong kam plante mo blong wok long graon; mo oli bin kam strong long graon.

19 Mo brata blong Jared i bin stat blong kam olfala, mo i bin luk se i no longtaem we hem i mas go daon long gref; from samting ia hem i bin talem long Jared: Bae yumi karem i kam tugeta ol pipol blong yumi blong yumi save kaontem olgeta, blong yumi save long olgeta, wanem bae oli wantem long yumi, bifo yumi go daon long ol gref blong yumi.

20 Mo folem olsem oli bin karem ol pipol i kam tugeta. Nao namba blong ol boe mo ol gel blong brata blong Jared i bin twenti mo tu sol; mo namba blong ol boe mo ol gel blong Jared hem i bin twelef, from hem i bin gat fo boe.

21 Mo i bin hapen se oli bin kaontem ol pipol blong tufala; mo afta we oli bin kaontem olgeta, oli bin wantem olgeta blong talemaot ol samting we bae oli wantem se tufala i mas mekem bifo tufala i go daon long ol gref blong tufala.

22 Mo i bin hapen se ol pipol i bin wantem long tufala se tufala i mas anoentem wan long ol boe blong tufala blong kam wan king ova long olgeta.

23 Mo nao luk, samting ia i bin mekem tufala i harem no gud.

Mo brata blong Jared i bin talem long olgeta: I tru we bae samting ia i lidim i go long fasin blong kam slef.

24 Be Jared i bin talem long brata blong hem: Letem olgeta blong oli save gat wan king. Mo taswe hem i bin talem long olgeta: Yufala i jusum aot long ol boe blong mitufala wan king, eniwan we yufala i wantem.

25 Mo i bin hapen se oli bin jusum fasbon blong brata blong Jared; mo nem blong hem i bin Pegag. Mo i bin hapen se hem i no bin wantem, mo hem i no save kam king blong olgeta. Mo ol i bin wantem se papa blong hem i mas fosem hem, be papa blong hem i no bin wantem; mo hem i bin givim oda long olgeta se oli no mas fosem eni man blong kam king blong olgeta.

26 Mo i bin hapen se oli bin jusum evri brata blong Pegag, mo oli no bin wantem.

27 Mo i bin hapen se, i semak ol boe blong Jared i no bin wantem, hem i evriwan be wan nomo i wantem, mo Oraeha oli bin anoentem hem blong kam king ova long ol pipol.

28 Mo hem i bin stat blong rul, mo ol pipol i bin stat blong kam antap gud; mo oli bin kam rij tumas.

29 Mo i bin hapen se Jared i bin ded, mo brata blong hem tu.

30 Mo i bin hapen se Oraeha i bin wokbaot wetem tingting we i no hae long fored blong Lod, mo i bin tingbaot hamas nao ol bigfala samting we Lod i bin mekem blong papa blong hem,

mo tu i bin tijim ol pipol blong hem, hamas nao ol bigfala samting we Lod i bin mekem blong ol papa blong olgeta.

---

## JAPTA 7

---

*Oraeha i rul long stret fasin— Long medel blong fasin blong kasem paoa blong rul mo ol trabol, oli putumap ol kingdom we i stap faet blong Sul mo Kohor— Ol profet i tok agensem nogud fasin mo fasin blong wosipim aedol blong ol pipol, we afta oli sakem sin.*

Mo i bin hapen se Oraeha, i bin mekem jajmen long graon, long stret fasin, long evri dei blong hem, we ol dei ia blong hem oli bin plante tumas.

2 Mo hem i bin gat ol boe mo ol gel; yes, hem i bin gat teti mo wan, long medel blong olgeta i bin gat twenti mo tri boe.

3 Mo i bin hapen se hem i bin gat Kib tu long taem we hem i olfala. Mo i bin hapen se Kib i bin rul long ples blong hem; mo Kib i bin gat Korihor.

4 Mo taem we Korihor i bin kasem teti mo tu yia, hem i bin go agensem papa blong hem, mo i bin go mo i bin stap long graon blong Nihor; mo hem i bin gat ol boe mo ol gel, mo oli bin kam naes tumas; from samting ia Korihor i bin pulum plante pipol blong folem hem.

5 Mo taem we hem i bin karem i kam tugeta wan ami, hem i bin kam antap long graon blong Moron, ples we king i bin stap, mo i tekem hem olsem prisena, we i bin mekem i ha-

pen toktok blong brata blong Jared, se bae oli tekem olgeta olsem prisena.

6 Nao graon blong Moron, ples we king i bin stap, i bin klosap long graon we ol man blong Nifae i singaotem Emti.

7 Mo i bin hapen se Kib i bin stap long kalabus, mo ol pipol blong hem andanit long Korihor boe blong hem, kasem taem we hem i bin kam olfala tumas; be Kib i bin gat Sul long taem we hem i olfala, taem we hem i bin stap yet long kalabus.

8 Mo i bin hapen se Sul i bin kros long brata blong hem; mo Sul i bin kam strong, mo i bin kam strong olsem paoa blong wan man; mo tu hem i bin strong long jajmen.

9 From samting ia hem i bin kam long hil Efrem, mo hem i bin meltem aot long hil ia, mo bin mekem ol naef blong faet aot long aean, blong olgeta we hem i bin pulum olgeta i go wetem hem, mo afta we hem i bin mekem olgeta i rere blong faet wetem ol naef blong faet, hem i bin gobak long bigtaon Nihor, mo hem i bin givim faet long brata blong hem Korihor, tru long ol wei ia hem i bin kasem kingdom mo i bin putumbak hem long papa blong hem Kib.

10 Mo nao from samting we Sul i bin mekem, papa blong hem i bin givim long hem kingdom long hem; taswe hem i bin stat blong rul long ples blong papa blong hem.

11 Mo i bin hapen se hem i bin mekem jajmen long stret fasin;

mo hem i bin mekem kingdom blong hem i gru long ful fes blong graon, from namba blong ol pipol i bin kam plante tumas.

12 Mo i bin hapen se Sul tu i bin gat plante boe mo gel.

13 Mo Korihor i bin sakem sin blong ol plante nogud fasin we hem i bin mekem; from samting ia Sul i bin givim long hem paoa long kingdom blong hem.

14 Mo i bin hapen se Korihor i bin gat plante boe mo gel. Mo long medel blong ol boe blong Korihor, i bin gat wan we nem blong hem i bin Noa.

15 Mo i bin hapen se Noa i bin go agensem Sul, we i king, mo tu papa blong hem Korihor, mo i bin pulum i gowe brata blong hem Kohor, mo tu evri brata blong hem mo plante long ol pipol.

16 Mo hem i bin givim faet long Sul, we i king, tru long faet ia hem i bin kasem graon we i bin kam long ol fasfala papa blong olgeta; mo hem i bin kam wan king ova long pat ia blong graon.

17 Mo i bin hapen se hem i bin givim faet bakegen long Sul, we i king; mo hem i bin tekem Sul, we i king, mo i bin karem hem i gowe olsem prisena long Moron.

18 Mo i bin hapen se taem we hem i bin rere blong kilim hem i ded, ol boe blong Sul i bin wokbaot slo slo i go insaed long haos blong Noa long naet, mo i bin kilim hem i ded, mo oli bin brekem daon doa blong prisen mo oli bin tekemaot papa blong olgeta, mo oli bin

putum hem long jea hem long kingdom blong hem.

19 From samting ia, boe blong Noa i bin bildimap kingdom blong hem long ples blong hem. Be oli no bin kasem paoa bakegen ova Sul we i king, mo ol pipol we i bin stap andanit long rul blong Sul we i king, i bin kam antap gud tumas mo oli bin kam strong.

20 Mo kantri i bin split; mo i bin gat tu kingdom, kingdom blong Sul, mo kingdom blong Kohor, boe blong Noa.

21 Mo Kohor, boe blong Noa, i bin mekem se ol pipol blong hem i mas givim faet long Sul, long faet ia Sul i bin winim olgeta mo i bin kilim Kohor i ded.

22 Mo nao Kohor i bin gat wan boe we oli bin singaotem Nimrod; mo Nimrod i bin lego kingdom blong Kohor long Sul, mo hem i bin kasem wan agrimen tru long tingting blong Sul; from samting ia Sul i bin givim ol gudfala samting we i bigwan long hem, mo hem i bin mekem long kingdom blong Sul olsem we hem i bin wantem.

23 Mo tu long taem blong rul blong Sul, ol profet i bin kam long medel blong ol pipol, we Lod i bin sendem olgeta, oli profesae se nogud fasin mo fasin blong wosipim aedol blong ol pipol i bin putum wan panis i kam long graon, mo bae Lod i smasem gud olgeta sapos oli no sakem sin.

24 Mo i bin hapen se ol pipol i bin tok agensem ol profet, mo bin jikim olgeta. Mo i bin hapen

se king Sul i bin mekem jajmen agensem olgeta evriwan we i bin tok agensem ol profet.

25 Mo hem i bin mekem wan loa truaot long ful graon, we i bin givim paoa long ol profet blong oli sud go long eni ples we oli wantem; mo tru long stamba tingting ia oli bin karem ol pipol i kam blong sakem sin.

26 Mo from ol pipol i bin sakem ol rabis fasin blong olgeta mo ol fasin blong wosipim ol aedol, Lod i bin letem olgeta i stap laef, mo oli bin stat blong kam antap gud bakegen long graon. Mo i bin hapen se Sul i bin gat ol boe mo ol gel long taem we hem i olfala.

27 Mo i nomo bin gat ol faet long ol dei blong Sul; mo hem i bin tingbaot ol bigfala samting we Lod i bin mekem from ol bubu blong hem, blong tekem olgeta i krosem bigfala solwota i go long promes graon; from samting ia hem i bin mekem jajmen long stret fasin blong evri dei blong hem.

---

## JAPTA 8

---

*I gat trabol mo rao ova long kingdom—Akis i mekem wan sikret grup wetem wan tru promes blong mekem grup i wan blong kilim king i ded—Ol sikret grup i blong devel mo i mekem ol kantri i foldaon—Ol niu Jentael i kasem woning agensem sikret grup we bae i lukaotem blong sakemaot fridom blong evri graon, nesen, mo kantri.*

Mo i bin hapen se hem i bin gat Oma, mo Oma i bin rul long

ples blong hem. Mo Oma i bin gat Jared; mo Jared i bin gat ol boe mo ol gel.

2 Mo Jared i bin go agensem papa blong hem, mo i bin kam mo bin stap long graon blong Het. Mo i bin hapen se hem i bin switim plante pipol, from ol toktok blong hem blong trik, kasem taem we hem i winim haf blong kingdom.

3 Mo taem we hem i bin winim haf ia blong kingdom, hem i bin givim faet long papa blong hem, mo hem i bin karem i gowe papa blong hem olsem wan prisena, mo i bin mekem hem i wok blong hem long taem we hem i prisena.

4 Mo nao, long ol dei blong rul blong Oma, hem i bin stap long kalabus haf blong ol dei blong hem. Mo i bin hapen se hem i bin gat ol boe mo ol gel, long medel blong olgeta i bin gat Esrom mo Koriantuma;

5 Mo oli bin kros tumas from ol fasin blong Jared brata blong olgeta, inaf blong mekem se oli bin resemap wan ami mo oli bin givim faet long Jared. Mo i bin hapen se oli bin givim faet long hem long naet.

6 Mo i bin hapen se taem we oli bin kilim ded ami blong Jared, oli bin rere blong kilim hem i ded tu; mo hem i bin askem strong long olgeta se bae oli no kilim hem i ded, mo bae hem i lego kingdom long papa blong hem. Mo i bin hapen se oli bin letem long hem laef blong hem.

7 Mo nao Jared i bin kam blong harem nogud tumas from

hem i bin lusum kingdom, from hem i bin putum hat blong hem long kingdom mo long ona blong wol.

8 Nao gel blong Jared from hem i gat gudfala save tumas, mo hem i luk ol harem nogud blong papa blong hem, i bin tingbaot blong mekem wan plan we tru long plan ia hem i save tekembak kingdom i go long papa blong hem.

9 Nao gel blong Jared i bin naes tumas. Mo i bin hapen se hem i bin toktok wetem papa blong hem, mo i bin talem long hem: From wanem papa blong mi i gat tumas sore olsem? Hem i no bin ridim histri we ol bubu blong yumi i bin karem i kam krosem bigfala dip ples? Luk, i no gat wan histri long saed blong olgeta blong bifo, we olgeta tru long ol sikret plan blong olgeta, i bin kasem ol kingdom mo bigfala ona?

10 Mo nao, taswe, bae papa blong mi i askem from Akis, boe blong Kimnor; mo luk, mi mi naes, mo bae mi danis long fored blong hem, mo bae mi mekem hem i glad, mekem se bae hem i wantem mi olsem woman blong hem; from samting ia sapos bae hem i wantem long yu se yu mas givim long hem mi olsem woman blong hem, afta bae yu talem: Bae mi givim hem sapos yu karem i kam long mi hed blong papa blong mi, we i king.

11 Mo nao Oma i bin fren long Akis; from samting ia, taem we Jared i bin sendem aot Akis, gel blong Jared i bin danis long



fored blong hem, mekem se hem i bin mekem hem i glad, inaf blong mekem se hem i bin wantem hem olsem woman blong hem. Mo i bin hapen se hem i bin talem long Jared: Givim hem long mi olsem woman blong mi.

12 Mo Jared i bin talem long hem: Bae mi givim hem long yu, sapos yu karem i kam long mi hed blong papa blong mi, we i king.

13 Mo i bin hapen se Akis i bin karem i kam tugeta long haos blong Jared ol famle blong hem, mo i bin talem long olgeta: Bae yufala i mekem wan strong promes long mi se bae yufala sapotem mi long samting we bae mi askem blong yufala?

14 Mo i bin hapen se olgeta evriwan i bin mekem strong promes long hem, tru long God blong heven, mo tu tru long ol heven, mo tu tru long wol, mo tru long ol hed blong olgeta, se eni man we bae i mekem eni samting we i defren long help we Akis i bin wantem, i mas lusum hed blong hem; mo eni man we bae i talemaot eni samting we Akis i bin talemaot long olgeta, semfala man ia i mas lusum laef blong hem.

15 Mo i bin hapen se olsem ia nao oli bin agri wetem Akis, mo Akis i bin givhan long olgeta wetem ol promes we olgeta blong bifo i bin givim, we olgeta tu i bin lukaotem paoa, we oli bin pasem daon olgeta, hem i bin stat long Ken, we i bin wan man blong kilim man i ded stat long stat.

16 Mo paoa blong devel i bin sevem olgeta blong givim ol promes ia long ol pipol, blong holem taet olgeta long tudak, blong helpem olgeta we i bin lukaotem blong kasem paoa, mo blong kilim man i ded, mo blong stil long taem blong faet, mo blong giaman, mo blong mekem evri kaen nogud fasin mo ol fasin blong slip olbaot.

17 Mo i bin gel blong Jared we i bin putum samting ia long hat blong hem blong lukaotem ol samting ia blong bifo; mo Jared i bin putum long hat blong Akis; from samting ia, Akis i bin givim samting ia long ol famle blong hem mo ol fren, hem i lidim olgeta i gowe tru long ol naes promes blong mekem eni samting we hem i bin wantem.

18 Mo i bin hapen se oli bin mekem wan sikret grup, i semak olsem olgeta blong bifo; we grup ia, i moa rabis mo nogud bitim evrisamting, long ae blong God;

19 From Lod i no wok long ol sikret grup, mo tu hem i no wantem se man i mas mekem blad i ron, be long evri samting i bin blokem samting ia, stat long stat blong man.

20 Mo nao mi, Moronae, i no raetem fasin blong ol promes blong olgeta mo ol grup, from oli bin soem long mi se ol samting ia i gat long medel blong evri pipol, mo oli gat long medel blong ol man blong Leman.

21 Mo oli bin mekem se pipol ia i ded we mi stap tokbaot naoia, mo tu smasgud blong ol pipol blong Nifae.

22 Mo eni kantri we bae i sapotem ol sikret grup olsem, blong kasem paoa mo kasem mane, kasem taem we bae oli go olbaot ova long kantri, luk, bae oli foldaon; from Lod bae i no letem se blad blong ol sent blong hem, we bae olgeta i mekem i ron, bae i mas singaot oltaem long hem aot long graon from pembak long olgeta, mo stil hem i no pembak olgeta.

23 From samting ia, O yufala ol jentael, hem i waes tingting long God se oli soemaot ol samting ia long yufala, blong mekem se tru long samting ia yufala i save sakem ol sin blong yufala, mo no letem se ol grup ia blong kilim man i ded bae i kam ova long yufala, we oli bildimap blong kasem paoa mo kasem mane—mo wok ia, yes, hem i wok blong smasem gud i kam long yufala, yes, mo tu naef blong faet blong jastis blong God we i no save finis, bae i foldaon long yufala, blong sakemaot yufala mo smasem gud yufala, sapos bae yufala i letem ol samting ia blong stap.

24 From samting ia, Lod i givim oda long yufala, taem we bae yufala i lukim ol samting ia kam long medel blong yufala, mekem se bae yufala i wekap blong luksave nogud laef we yufala i stap long hem, from sikret grup ia we bae i stap long medel blong yufala; o sore tumas long samting ia, from blad blong olgeta we oli bin kilim i ded; from oli singaot aot long das blong pembak long

hem, mo tu long olgeta we i bin bildimap samting ia.

25 From i kam blong hapen se eni man we i bildimap samting ia, i lukaotem blong sakemaot fridom blong evri graon, ol nesen, mo ol kantri; mo samting ia i mekem i hapen fasin ia blong smasem gud evri pipol, from devel i bin bildimap samting ia, we i papa blong evri giaman; mo tu i semfala man blong giaman we i bin trikim fas papa mo mama blong yumi, yes, hem i semfala man blong giaman we i bin mekem se man i kilim man i ded stat long stat; we i bin mekem ol hat blong ol man i kam strong mekem se oli bin kilim ded ol profet, mo oli bin stonem olgeta, mo oli bin sakem olgeta aot stat long stat.

26 From samting ia, mi, Moronae, Lod i bin givim oda long mi blong raetem ol samting ia blong mekem se nogud fasin i save lus, mo blong mekem se taem i save kam we Setan bae i no gat eni paoa long ol hat blong ol pikinini blong ol man, be blong oli save winim tingting blong olgeta blong mekem gud fasin oltaem, blong mekem se oli save kam long springwota blong evri stret fasin mo stap sev.

---

## JAPTA 9

---

*Kingdom i pas long wan i go long narawan tru long raet blong papa i go long boe, sikret plan, mo fasin blong kilim man i ded—Ima i bin*

*lukim Pikinini blong Stret Fasin—  
Plante profet i talemaot fasin blong  
sakem sin—Wan hadtaem blong  
kasem kakae mo ol posen snek i  
smasem gud ol pipol.*

Mo nao mi, Moronae, i gohed wetem histri blong mi. Taswe, luk, i bin hapen se from ol sikret grup blong Akis mo ol fren blong hem, luk, oli bin sakemaot kingdom blong Oma.

2 Be, Lod i bin gat sore long Oma, mo tu long ol boe blong hem mo long ol gel blong hem we i no bin lukaotem ded blong hem.

3 Mo Lod i bin wonem Oma long wan drim se hem i mas aot long graon; from samting ia Oma i bin aot long graon wetem famle blong hem, mo i bin wokbaot blong plante dei, mo oli bin kam mo bin pas klosap long hil blong Sim, mo i bin kam klosap long ples we oli bin kilim ded ol man blong Nifae, mo stat long ples ia i go long is, mo i bin kam long wan ples we oli bin singaotem Ablom, klosap long so blong solwota, mo long ples ia hem i bin stanemap tenet blong hem, mo tu ol boe blong hem mo ol gel blong hem, mo evri memba blong haos blong hem, sapos i no Jared mo famle blong hem.

4 Mo i bin hapen se oli bin anoentem Jared blong kam king ova long ol pipol, tru long han blong nogud fasin; mo hem i bin givim long Akis gel blong kam woman blong hem.

5 Mo i bin hapen se Akis i bin lukaotem laef blong papa blong woman blong hem; mo hem i

bin askem long olgeta we hem i bin mekem strong promes tru long tru promes blong olgeta blong bifo, mo oli bin kasem hed blong papa blong woman blong hem, taem we hem i bin sidaon long jea blong hem, hem i stap givim janis long ol pipol blong hem blong toktok long fored blong hem.

6 From nogud mo sikret grup ia i bin go olbaot tumas, mekem se i bin smasem gud ol hat blong evri pipol; taswe oli bin kilim ded Jared long jea blong hem, mo Akis i bin rul long ples blong hem.

7 Mo i bin hapen se Akis i bin stat blong stap jalus long boe blong hem, taswe hem i bin satem hem long prisem, mo i bin kipim hem long smol o no kakae kasem taem we hem i bin harem nogud long ded.

8 Mo nao brata blong hem we i bin harem nogud long ded, (mo nem blong hem i bin Nimraha) i bin kros long papa blong hem from samting ia we papa blong hem i bin mekem long brata blong hem.

9 Mo i bin hapen se Nimraha i bin karem i kam tugeta wan smol namba blong ol man, mo i ronwe aot long graon, mo i bin kam mo bin stap wetem Oma.

10 Mo i bin hapen se Akis i bin gat ol narafala boe, mo oli bin winim ol hat blong ol pipol, i nomata we oli bin promes strong long hem blong mekem evri kaen rabis fasin folem wanem we hem i bin wantem.

11 Nao ol pipol blong Akis i bin wantem blong kasem mane,

semak olsem we Akis i bin wantem paoa, from samting ia, ol boe blong Akis i bin givim mane long olgeta, tru long ol wei ia oli bin winim tingting blong bigfala pat blong pipol blong folem olgeta.

12 Mo i bin stat blong gat wan faet bitwin ol boe blong Akis mo Akis, we i bin gohed blong spes blong plante yia, yes, kasese oli bin kilim ded klosap evri pipol blong kingdom, yes, we i evriwan, be teti sol, mo olgeta we oli bin ronwe wetem haos blong Oma.

13 From samting ia, Oma i bin kambak bakegen long graon blong hem we i bin kam long ol papa.

14 Mo i bin hapen se Oma i bin stat blong kam olfala; be, long olfala yia blong hem, hem i bin gat Ima; mo hem i bin anoentem Ima blong kam king blong rul long ples blong hem.

15 Mo afta we hem i bin anoentem Ima blong kam king, hem i bin lukim pis long graon blong spes blong tu yia, mo hem i bin ded, hem i bin lukim plante dei tumas, we i bin fulap long sore. Mo i bin hapen se Ima i bin rul long ples blong hem, mo i bin folem ol wokbaot blong papa blong hem.

16 Mo Lod i bin stat bakegen blong tekem panis aot long graon, mo haos blong Ima i bin kam antap gud tumas andanit long rul blong Ima; mo long spes blong siksti mo tu yia oli bin kam strong tumas, inaf blong mekem se oli bin kam rij tumas—

17 Oli bin gat evri kaen frut, mo blong sid, mo blong ol kaliko blong silik, mo blong ol naes kaliko, mo blong gol, mo blong silva, mo blong ol gudgudfala samting;

18 Mo tu evri kaen buluk, blong ol buluk, mo blong ol kao, mo blong ol sipsip, mo blong ol pig, mo blong ol nanigot, mo tu plante narafala kaen anamol we i bin gud blong yusum blong kakae blong man.

19 Mo tu oli bin gat ol hos, mo ol dongki, mo i bin gat ol elefen, mo ol kurilom mo ol kumom; evriwan long olgeta man i save yusum, mo moa speseli ol elefen, mo ol kurilom mo ol kumom.

20 Mo olsem ia nao Lod i bin poremaot ol blesing blong hem long graon ia, we i bin moa gud bitim evri narafala graon; mo hem i bin givim oda se eni man we bae i stap long graon, bae i stap long hem wetem Lod, o bae Lod i smasem gud olgeta taem we oli kam raep long rabis fasin; from long olgeta olsem, Lod i talem: Bae mi poremaot kros blong mi we i fulwan.

21 Mo Ima i bin mekem jajmen long stret fasin long evri dei blong hem, mo hem i bin gat plante boe mo gel; mo hem i bin gat Koriantum, mo hem i bin anoentem Koriantum blong rul long ples blong hem.

22 Mo afta we hem i bin anoentem Koriantum blong rul long ples blong hem, hem i bin stap laef fo yia, mo hem i bin lukim pis long graon; yes, mo

tu hem i bin lukim Pikinini blong Stret Fasin, mo i bin glad mo glori long dei blong hem; mo hem i bin ded wetem pis.

23 Mo i bin hapen se Koriantum i bin wokbaot folem wokbaot blong papa blong hem, mo i bin bildim plante strong bigtaon, mo i bin givim samting we i bin gud long ol pipol blong hem long evri dei blong hem. Mo i bin hapen se hem i no bin gat eni pikinini kasem taem tu we hem i bin olfala tumas.

24 Mo i bin hapen se woman blong hem i bin ded, taem we hem gat wan hundred mo tu yia. Mo i bin hapen se Koriantum i bin tekem olsem woman blong hem, long taem we hem i olfala, wan yangfala woman we i no mared yet, mo i bin gat ol boe mo ol gel; from samting ia hem i bin stap laef kasem taem we hem i bin gat wan hundred mo foti mo tu yia.

25 Mo i bin hapen se hem i bin gat Kom, mo Kom i bin rul long ples blong hem; mo hem i bin rul foti mo naen yia, mo hem i bin gat Het; mo tu hem i bin gat ol narafala boe mo ol gel.

26 Mo ol pipol i bin go olbaot bakegen ova long ful fes blong graon, mo i bin stat bakegen blong gat wan bigfala nogud fasin we i tumas long fes blong graon, mo Het i bin stat blong holem taet ol sikret plan bakegen blong bifo, blong kilim ded papa blong hem.

27 Mo i bin hapen se hem i bin aotem papa blong hem long jea blong hem, from hem i bin kilim ded hem wetem naef

blong faet blong hem; mo hem i bin rul long ples blong hem.

28 Mo ol profet i bin kam long graon bakegen, oli talemaot fasin blong sakem sin long olgeta—se oli mas mekem rere rod blong Lod, o bae i gat wan panis i kam long fes blong graon; yes, mo tu bae i gat wan bigfala hadtaem blong kasem kakae, tru long samting ia bae oli ded sapos oli no sakem sin.

29 Be ol pipol i no bin bilivim ol toktok blong ol profet, be oli bin sakem olgeta aot; mo sam long olgeta, mo sam long olgeta oli bin sakem olgeta long ol hol mo oli bin livim olgeta blong ded. Mo i bin hapen se oli bin mekem evri samting folem komanmen blong king, Het.

30 Mo i bin hapen se i bin stat blong gat wan bigfala hadtaem blong kasem ol samting long graon, mo olgeta we i stap i bin stat blong ded tumas kwiktaem from hadtaem blong kasem ol samting, from i no bin gat eni ren long fes blong graon.

31 Mo i bin kam fored ol posen snek tu long fes blong graon, mo oli bin posenem plante pipol. Mo i bin hapen se grup blong ol anamol blong olgeta i bin stat blong ronwe long fored blong ol posen snek, i go long graon long saot, we ol man blong Nifae i bin singaotem Sarahemla.

32 Mo i bin hapen se i bin gat plante long olgeta we i bin ded long rod; be, i bin gat samfala we i bin ronwe long graon long saot.

33 Mo i bin hapen se Lod i bin mekem ol snek blong oli no

mas ronem olgeta moa, be se oli mas blokem rod, blong mekem se ol pipol i no bin save pas, blong mekem se eni man we i traem blong pas, maet bae oli foldaon tru long ol posen snek.

34 Mo i bin hapen se ol pipol i bin folem rod blong ol anamol, mo bin kakae ol ded bodi blong olgeta we i bin foldaon long rod, kasem taem we oli bin kakae olgeta evriwan. Nao taem we ol pipol i bin luk se oli mas ded, oli bin stat blong sakem ol rabis fasin blong olgeta mo prea long Lod.

35 Mo i bin hapen se taem we oli bin putum tingting blong olgeta i stap daon inaf long fored blong Lod, hem i bin sendem ren long fes blong graon; mo ol pipol i bin stat blong laef bakegen, mo i bin stat blong gat frut long ol kantri blong not, mo long ol kantri raonabaot. Mo Lod i bin soemaot paoa blong hem long olgeta taem we hem i sevem olgeta aot long hadtaem blong kasem kakae.

---

### JAPTA 10

---

*Wan king i tekem ples blong narawan—Sam long ol king i stret; ol narafala oli nogud—Taem we stret fasin we i stap strong, Lod i blesem mo i mekem ol pipol i kam antap gud.*

Mo i bin hapen se Ses, we i bin wan laen blong Het— from Het i bin ded tru long hadtaem blong kasem kakae, mo evri famle blong hem, be Ses nomo—

from samting ia, Ses i bin stat blong bildimap bakegen wan pipol we i brok.

2 Mo i bin hapen se Ses i bin tingbaot fasin ia blong smasem gud blong papa blong hem, mo hem i bin bildimap wan kingdom we i stret; from hem i bin tingbaot wanem we Lod i bin mekem blong tekem Jared mo brata blong hem blong krosem solwota; mo hem i bin wokbaot folem ol rod blong Lod; mo hem i bin gat ol boe mo ol gel.

3 Mo fasbon boe blong hem, we nem blong hem i bin Ses, i bin go agensem hem, be, han blong wan stilman i bin kilim Ses, from ol rij samting blong hem we i tumas, we i bin tekem pis i kambak bakegen long papa blong hem.

4 Mo i bin hapen se papa blong hem i bin bildimap plante bigtaon long fes blong graon, mo ol pipol i bin stat bakegen blong go olbaot long ful fes blong graon. Mo Ses i bin stap laef kasem taem we hem i olfala tumas, mo hem i bin gat Riplakis. Mo hem i bin ded, mo Riplakis i bin rul long ples blong hem.

5 Mo i bin hapen se riplakis i no bin mekem samting we i bin stret long lukluk blong Lod, from hem i bin gat plante woman mo ol narafala woman, mo i bin putum ol samting long ol solda blong ol man we i bin had blong karem; yes, hem i bin mekem olgeta i pem taks wetem ol taks we i bigwan; mo wetem ol taks hem i bin bildimap

plante bigfala haos we i gat plante spes.

6 Mo hem i bin stanemap blong hem wan jea blong hem we i naes tumas; mo hem i bin bildimap plante prisen, mo eni man we bae i no wantem pem ol taks hem i bin sakem long prisen; mo eni man we i no save pem ol takis hem i bin sakem long prisen; mo hem i bin mekem se olgeta i mas wok oltaem from sapot blong olgeta; mo eni man we i no wantem blong wok, hem i bin mekem blong oli kilim hem i ded.

7 From samting ia hem i bin kasem evri naes wok blong hem, yes, mo tu naes gol blong hem, hem i bin mekem olgeta i wokem long prisen; mo evri kaen naes fasin blong wok hem i mekem se oli wokem long prisen. Mo i bin hapen se hem i bin givim hadtaem long ol pipol wetem ol fasin blong hem blong slip olbaot mo ol rabis sin.

8 Mo taem we hem i bin rul blong spes blong foti mo tu yia ol pipol i bin girap long fasin blong go agensem long hem; mo i bin stat blong gat faet bakegen long graon, inaf blong mekem se oli bin kilim ded Riplakis, mo oli bin ronem ol laen blong hem aot long graon.

9 Mo i bin hapen se afta spes blong plante yia, Morianton, (hem i wan laen blong Riplakis) i bin karem i kam tugeta wan ami blong ol pipol we oli bin sakemaot finis, mo i bin go aot mo bin givim faet long ol pipol; mo hem i bin winim paoa ova plante bigtaon; mo faet i bin

kam nogud tumas, mo i bin gohed blong spes blong plante yia; mo hem i bin winim paoa ova long ful graon, mo i bin stanemap hemwan i kam king ova long ful graon.

10 Mo afta we hem i bin stanemap hemwan i kam king, hem i bin mekem wok blong ol pipol i nomo hevi, tru long samting ia hem i bin winim sapot long tingting blong ol pipol, mo oli bin anoentem hem blong kam king blong olgeta.

11 Mo hem i bin mekem jastis long ol pipol, be i no long hemwan from plante fasin blong hem blong slip olbaot; from samting ia oli bin katem hem aot long fes blong Lod.

12 Mo i bin hapen se Morianton i bin bildimap plante bigtaon, mo ol pipol i bin kam rij tumas andanit long rul blong hem, long ol haos, mo long gol mo silva, mo blong resemap ol sid, mo long ol grup blong anamol, mo ol buluk, mo ol samting olsem we i bin kambak bakegen long olgeta.

13 Mo Morianton i bin stap laef kasem taem we yia blong hem i bigwan tumas, mo afta hem i bin gat Kim; mo Kim i bin rul long ples blong papa blong hem; mo hem i bin rul eit yia, mo papa blong hem i bin ded. Mo i bin hapen se Kim i no bin rul long stret fasin, from samting ia Lod i no bin laekem hem.

14 Mo brata blong hem i bin girap long fasin blong go agensem long hem, tru long samting ia hem i bin mekem hem i kam

olsem prisena; mo hem i bin stap long slef evri dei blong hem; mo hem i bin gat ol boe mo ol gel long slef, mo long taem we hem i olfala hem i bin gat Livae; mo hem i bin ded.

15 Mo i bin hapen se Livae i bin wok long slef afta long ded blong papa blong hem, blong spes blong foti mo tu yia. Mo hem i bin mekem faet agensem king blong graon, tru long samting ia hem i bin kasem kingdom blong hemwan.

16 Mo afta we hem i bin kasem long hemwan kingdom, hem i bin mekem samting we i bin stret long lukluk blong Lod; mo ol pipol i bin kam antap gud long graon; mo hem i bin stap laef kasem taem we hem i olfala gud, mo i bin gat ol boe mo ol gel; mo tu hem i bin gat Korom, we hem i bin anoentem blong kam king long ples blong hem.

17 Mo i bin hapen se Korom i bin mekem samting we i bin stret long lukluk blong Lod long evri dei blong hem; mo hem i bin gat plante boe mo ol gel; mo afta hem i bin lukim plante dei, hem i bin pas i gowe, semak olsem ol narafala blong wol; mo Kis i bin rul long ples blong hem.

18 Mo i bin hapen se Kis i bin pas i gowe tu, mo Lib i bin rul long ples blong hem.

19 Mo i bin hapen se Lib tu i bin mekem samting we i bin gud long lukluk blong Lod. Mo long ol dei blong Lib oli bin kilim ol posen snek i ded. From samting ia oli bin go long

graon long saot, blong lukaotem kakae blong ol pipol blong graon, from kantri i bin fulap long ol anamol blong bus. Mo Lib tu hemwan i bin kam wan gudfala man blong lukaotem ol anamol.

20 Mo oli bin bildimap wan strong bigtaon klosap long eria blong smolfala graon, klosap long ples we solwota i seraotem graon.

21 Mo oli bin sevem graon long saot blong wan ples we i no gat man long hem, blong oli kasem ol wael anamol blong kakae. Mo ful fes blong graon long not i bin fulap long ol pipol we i stap long hem.

22 Mo oli bin wokhad tumas, mo oli bin pem mo salem mo mekem bisnis wan wetem narawan, blong mekem se oli save kasem mane.

23 Mo oli bin wok wetem evri kaen ston blong aean, mo oli bin mekem gol, mo silva, mo aean, mo bras, mo evri kaen aean; mo oli bin digim samting ia aot long graon; from samting ia, oli bin sakem i go antap ol bigfala hip blong graon blong kasem ston blong aean, blong gol, mo blong silva, mo blong aean, mo blong kopa. Mo oli bin wokem evri kaen naes wok.

24 Mo oli bin gat ol silik, mo naes kaliko; mo oli bin wokem evri kaen kaliko, blong mekem se oli save kavremap olgeta bakegen long neked bodi blong olgeta.

25 Mo oli bin mekem evri kaen tul blong wok long graon, blong brekem graon tugeta wetem



blong planem, blong tekem kaka long garen mo blong klinim graon, mo tu blong karemaot ol sid.

26 Mo oli bin mekem evri kaen tul we tru long olgeta oli bin yusum long ol anamol blong olgeta.

27 Mo oli bin mekem evri kaen tul blong faet. Mo oli bin wokem evri kaen wok long fasin blong wok we i defren tumas.

28 Mo i neva bin gat wan pipol we i kasem moa blesing bitim we olgeta i bin kasem, mo kam antap gud moa tru long han blong Lod. Mo oli bin stap long wan graon we i gud tumas bitim evri graon, from Lod i bin talemaot samting ia.

29 Mo i bin hapen se Lib i bin stap laef plante yia, mo i bin gat ol boe mo ol gel; mo tu hem i bin gat Hiatom.

30 Mo i bin hapen se Hiatom i bin rul long ples blong papa blong hem. Mo long taem we Hiatom i bin rul twenti mo fo yia, luk, oli bin tekem kingdom aot long hem. Mo hem i bin wok plante yia long slef, yes, we i evri dei blong hem we i stap.

31 Mo hem i bin gat Het, mo Het i bin stap laef long slef long evri dei blong hem. Mo Het i bin gat Eron, mo Eron i bin stap long slef long evri dei blong hem; mo hem i bin gat Amnigada, mo Amnigada tu i bin stap long slef long evri dei blong hem; mo hem i bin gat Koriantum, mo Koriantum i bin stap long slef long evri dei blong hem; mo hem i bin gat Kom.

32 Mo i bin hapen se Kom i bin

sakemaot haf blong kingdom. Mo hem i bin rul ova long haf blong kingdom foti mo tu yia; mo hem i bin go blong faet agensem king, Amgid, mo oli bin faet blong spes blong plante yia, long taem ia Kom i bin kasem paoa ova long Amgid, mo i bin kasem paoa ova long narafala pat blong kingdom we i stap.

33 Mo long ol dei blong Kom i bin stat blong gat ol stilman long graon; mo oli bin tekem ol olfala plan, mo i bin givim ol tru promes folem fasin blong olgeta blong bifo, mo i bin lukaotem bakegen blong smasem gud kingdom.

34 Nao Kom i bin faet agensem olgeta plante; be, hem i no bin win agensem olgeta.

---

## JAPTA 11

---

*Ol faet, ol fasin blong pulaot, mo nogud fasin i rulum laef blong laen blong Jared—Ol profet i talemaot se fasin blong smasem gud fulwan blong ol laen blong Jared bae i kam sapos oli no sakem sin—Ol pipol i sakemaot ol toktok blong ol profet.*

Mo i bin gat tu long ol dei blong Kom plante profet, mo oli bin profesae long fasin blong smasem gud blong ol strong pipol ia sapos oli no sakem sin, mo tanem olgeta i go long Lod, mo lego ol fasin blong olgeta blong kilim man i ded mo ol nogud fasin.

2 Mo i bin hapen se ol pipol i bin sakemaot ol profet, mo oli

bin ronwe i go long Kom blong hem i lukaotem gud olgeta, from ol pipol i bin lukaotem blong smasem gud olgeta.

3 Mo oli bin profesae long Kom plante samting; mo hem i bin kasem blesing long evri dei blong hem we i stap.

4 Mo hem i bin stap laef kasem taem we hem i olfala gud; mo i bin gat Siblom; mo Siblom i bin rul long ples blong hem. Mo brata blong Siblom i bin go agensem hem, mo i bin stat blong gat wan bigfala faet we i tumas long ful graon.

5 Mo i bin hapen se brata blong Siblom i bin mekem se evri profet we i bin profesae long saed blong fasin blong smasem gud blong ol pipol, oli mas kilim ded olgeta;

6 Mo i bin gat wan bigfala trabol long ful graon, from oli bin testifae se wan bigfala panis bae i kam long graon, mo tu long ol pipol, mo se bae i gat wan bigfala fasin blong smasem gud long medel blong olgeta, wan olsem we i neva bin gat long fes blong graon, mo ol bun blong olgeta bae i kam olsem ol hip blong graon long fes blong graon, sapos oli no sakem nogud fasin blong olgeta.

7 Mo oli no bin lisen long voes blong Lod, from ol nogud grup blong olgeta; from samting ia, i bin stat blong gat ol faet mo ol rao long ful graon, mo tu plante hadtaem blong kasem kakae, mo ol defren kaen sik, inaf blong mekem se i bin gat wan bigfala fasin blong smasem gud, olsem wan we oli neva bin

save long fes blong graon; mo evri samting ia i bin hapen long ol dei blong Siblom.

8 Mo ol pipol i bin stat blong sakem rabis fasin blong olgeta; mo i semak olsem we oli bin mekem, Lod i bin gat sore long olgeta.

9 Mo i bin hapen se oli bin kilim ded Siblom, mo oli bin tekem Seth i kam long slef, mo i bin stap long slef long evri dei blong hem.

10 Mo i bin hapen se Aha, boe blong hem, i bin kasem kingdom; mo hem i bin rul ova long ol pipol long evri dei blong hem. Mo hem i bin mekem evri kaen rabis fasin long ol dei blong hem, tru long samting ia hem i bin mekem se plante blad i ron; mo ol dei blong hem i no bin plante.

11 Mo Itam, from hem i wan laen blong Aha, i bin kasem kingdom; mo hem tu i bin mekem samting we i bin nogud long ol dei blong hem.

12 Mo i bin hapen se long ol dei blong Itam plante profet i bin kam, mo oli bin profesae bakegen long ol pipol; yes, oli bin profesae se Lod bae i smasem gud olgeta evriwan aot long fes blong graon sapos oli no sakem ol rabis fasin blong olgeta.

13 Mo i bin hapen se ol pipol i bin mekem ol hat blong olgeta i kam strong, mo oli no bin wantem lisen long ol toktok blong olgeta; mo ol profet i bin harem nogud mo i bin kam aot long medel blong ol pipol.

14 Mo i bin hapen se Itam i bin mekem jajmen long nogud fasin

long evri dei blong hem; mo hem i bin gat Moron. Mo i bin hapen se Moron i bin rul long ples blong hem; mo Moron i bin mekem samting we i bin nogud long fored blong Lod.

15 Mo i bin hapen se i bin gat wan fasin blong go agens we i bin girap long medel blong ol pipol, from sikret grup ia we oli bin bildimap blong kasem paoa mo kasem mane; mo i bin gat wan strong man we i bin girap long medel blong olgeta long rabis fasin, mo i bin givim faet long Moron; tru long samting ia hem i bin winim haf blong kingdom; mo hem i bin holem taet haf blong kingdom blong plante yia.

16 Mo i bin hapen se Moron i bin winim hem, mo i bin kasem kingdom bakegen.

17 Mo i bin hapen se i bin gat wan narafala strong man we i bin girap; mo hem i bin wan laen blong brata blong Jared.

18 Mo i bin hapen se hem i bin winim Moron mo i bin kasem kingdom; from samting ia, Moron i bin stap long slef long evri dei blong hem we i stap; mo hem i bin gat Koriantor.

19 Mo i bin hapen se Koriantor i bin stap long slef long evri dei blong hem.

20 Mo long ol dei blong Koriantor i bin gat tu plante profet we i bin kam, mo oli bin profesae long saed blong ol bigfala mo gudfala samting, mo oli bin talemaot fasin blong sakem sin long ol pipol, mo hemia nomo sapos oli no sakem sin, Lod God bae i mekem jajmen agen-

sem olgeta blong smasem gud olgeta evriwan;

21 Mo we Lod God bae i sendem o i karem i kam aot wan narafala pipol blong stap long graon tru long paoa blong hem, folem fasin we hem i bin karem ol papa blong olgeta.

22 Mo oli bin sakemaot evri toktok blong ol profet, from sikret grup blong olgeta mo ol nogud rabis sin.

23 Mo i bin hapen se Koriantor i bin gat Ita, mo hem i bin ded, afta we hem i bin stap long slef long evri dei blong hem.

---

## JAPTA 12

---

*Profet Ita i askem strong long ol pipol blong biliv long God—Moronae i talemaot bakegen ol merikel mo ol sapraes we i bin hapen tru long fet—Fet i bin mekem se brata blong Jared i save lukim Kraes—Lod i givim ol samting we i no strong long ol man blong mekem se oli putum tingting blong olgeta i stap daon—Brata blong Jared i bin muvum bigfala Hil Serin tru long fet—Fet, hop, mo bigfala lav i mas gat long fasin blong sevem man—Moronae i bin lukim Jisas stret long fes blong hem.*

Mo i bin hapen se ol dei blong Ita i bin stap long ol dei blong Koriantuma, mo Koriantuma i bin king ova long ful graon.

2 Mo Ita i bin wan profet blong Lod; from samting ia Ita i bin kamaot long ol dei blong Koriantuma, mo i bin stat blong profesae long ol pipol, from hem i no save holem taet hem

from Spirit blong Lod we i bin stap long hem.

3 From hem i bin prij stat long moning, go kasem taem we san i go daon, hem i askem strong long ol pipol blong biliv long God blong mekem se oli sakem sin, from fraet se bae oli smasem gud olgeta, hem i talem long olgeta se tru long fet, evri samting i hapen—

4 From samting ia, eni man we i biliv long God i save gat tru hop blong kasem wan wol we i moa gud, yes, mo tu kasem wan ples long raet han blong God, we hop ia i kam tru long fet, i mekem wan anka long ol sol blong ol man, we bae i mekem olgeta i strong mo oli no muvmuv, oltaem oli mekem ol gudfala wok, mo i lidim olgeta blong leftemap nem blong God.

5 Mo i bin hapen se Ita i bin profesae long saed blong ol bigfala mo gudfala samting long ol pipol, we oli no bin bilivim, from oli no bin lukim ol samting ia.

6 Mo nao, mi, Moronae, mi wantem tokbaot smol long saed blong ol samting ia; mi wantem soem long wol se fet i ol samting we i gat hop long olgeta mo i no lukim; from samting ia, no rao from se yufala i no lukim, from yufala i no kasem eni witnes kasem afta long tes blong fet blong yufala.

7 From i bin tru long fet we Kraes i bin soemaot hemwan long ol papa blong yumi, afta we hem i bin girap aot long ded; mo hem i no bin soemaot

hemwan long olgeta kasem afta we oli bin gat fet long hem; from samting ia, i mas nid i stap olsem se samfala i bin gat fet long hem, from hem i no bin soemaot hemwan long wol.

8 Be from fet blong ol man, hem i bin soemaot hemwan long wol, mo i bin leftemap nem blong Papa, mo i bin mekem rere wan rod blong mekem se tru long hem ol narafala i save tek pat long presen blong heven, blong mekem se oli save hop long ol samting we oli no bin lukim.

9 From samting ia, yufala tu i save gat hop, mo tek pat long presen ia, sapos be yufala i gat fet.

10 Luk, i bin tru long fet we olgeta blong bifo, Lod i bin singaotem olgeta folem tabu oda blong God.

11 From samting ia, tru fet, God i bin givim loa blong Moses. Be tru long presen blong Pikinini blong hem, God i bin mekem rere wan rod we i moa gud tumas; mo i tru fet we i bin hapen.

12 From sapos i no gat fet long medel blong ol pikinini blong ol man, God i no save mekem eni merikel long medel blong olgeta; from samting ia, hem i no bin soemaot hemwan kasem taem afta fet blong olgeta.

13 Luk, i bin fet blong Alma mo Amulek we i bin mekem se prisen haos i foldaon long graon.

14 Luk, i bin fet blong Nifae mo Lihae we i bin mekem jenis i hapen long ol man blong

Leman, mekem se oli bin bap-taes wetem faea mo wetem Tabu Spirit.

15 Luk, i bin fet blong Amon mo ol brata blong hem we i bin mekem wan merikel we i big-wan tumas i hapen long medel blong ol man blong Leman.

16 Yes, mo hem i olgeta evriwan we oli bin mekem ol merikel i bin hapen, oli bin mekem tru long fet, hem i olgeta we i bin stap bifo long Kraes mo tu olgeta we i bin stap afta.

17 Mo i bin tru long fet we ol tri disaepol i bin kasem wan promes se bae oli no test-em ded; mo oli no bin kasem promes ia kasem taem afta fet blong olgeta.

18 Mo tu long eni taem i bin gat eni we i bin mekem ol merikel kasem taem afta fet blong olgeta; from samting ia fastaem oli bin bilif long Pikinini blong God.

19 Mo i bin gat plante we fet blong olgeta i bin strong tumas, mo tu bifo we Kraes i bin kam, we oli no save holem bak olgeta aot long vel, be i tru we oli bin luk wetem ol ae blong olgeta, ol samting we oli bin luk wetem wan ae blong fet, mo oli bin glad.

20 Mo luk, mifala i bin luk long histri ia se wan long olgeta ia i bin brata blong Jared; from fet blong hem long God i bin big-wan tumas, mekem se taem we God i bin putum aot fingga blong hem, hem i no bin save haedem hem aot long lukluk blong brata blong Jared, from toktok blong hem we hem i bin

talemaot long hem, we toktok ia hem i bin kasem tru long fet.

21 Mo afta we brata blong Jared i bin lukim fingga blong Lod, from promes we brata blong Jared i bin kasem tru long fet, Lod i no bin save holem taet eni samting aot long lukluk blong hem; from samting ia, hem i bin soem long hem evri samting, from oli nomo save holem bak aot long vel.

22 Mo i tru long fet we ol papa blong mi i bin kasem promes se ol samting ia bae i kam long ol brata blong olgeta tru long ol Jentael; taswe Lod i bin givim oda long mi, yes, we i Jisas Kraes.

23 Mo mi bin talem long hem: Lod, ol Jentael bae oli jikim ol samting ia, from ol samting we i no strong blong mifala long saed blong raeting, from Lod yu bin mekem mifala i strong long toktok tru long fet, be yu no bin mekem mifala i strong long raeting; from yu bin mekem evri pipol ia blong mekem se oli save toktok plante, from Tabu Spirit we yu bin givim long olgeta.

24 Mo yu bin mekem mifala blong mekem se mifala i save raet be smol nomo, from i had wok blong yusum gud ol han blong mifala. Luk, yu no bin mekem mifala i strong long saed blong raeting olsem long brata blong Jared, from yu bin mekem hem blong mekem se ol samting we hem i bin raetem i strong semak olsem yu yu stap, blong winim man blong ridim olgeta.

25 Yu bin mekem tu ol toktok blong mifala i gat paoa mo i strong, kasem we mifala i no save raetem olgeta; from samting ia, taem we mifala i raetem, mifala i lukim samting we i no strong blong mifala, mo mifala i mekem mistek from fasin we mifala i putum ol toktok blong mifala; mo mi fraet se ol Jentael bae oli jikim ol toktok blong mifala.

26 Mo taem we mi bin talem samting ia, Lod i bin toktok long mi, i talem: Ol krangeke i stap jik, be bae oli harem nogud; mo gladhat blong mi i naf blong olgeta we i no stap flas, mekem se bae oli no tekem eni janis from samting we i no strong blong yufala;

27 Mo sapos ol man i kam long mi bae mi soem long olgeta, samting we i no strong blong olgeta. Mi givim long ol man samting we i no strong blong mekem se oli save putum tingting blong olgeta i stap daon; mo gladhat blong mi i naf blong evri man we i putum tingting blong olgeta i stap daon long fored blong mi; from sapos oli putum tingting blong olgeta i stap daon long fored blong mi, mo gat fet long mi, afta bae mi mekem ol samting we i no strong i kam strong long olgeta.

28 Luk, bae mi soem long ol Jentael, samting we i no strong blong olgeta, mo bae mi soem long olgeta se fet, hop mo bigfala lav i karem i kam long mi—springwota blong evri stret fasin.

29 Mo mi, Moronae, afta mi bin harem ol toktok ia, mi bin harem gud, mo mi bin talem: O Lod, stret tingting blong yu bae i hapen, from mi save se yu yu wok long ol pikinini blong ol man folem fet blong olgeta;

30 From brata blong Jared i bin talem long bigfala hil Serin, Muvaot—mo hem i bin muvaot. Mo sapos hem i no bin gat fet bae i no bin muv; from samting ia yu yu wok afta we ol man i gat fet.

31 From olsem ia nao yu bin soemaot yuwan long ol disaepol blong yu; from afta oli bin gat fet, mo oli bin toktok long nem blong yu, yu bin soemaot yuwan long olgeta wetem bigfala paoa.

32 Mo mi tu i tingbaot se yu bin talem se yu bin mekem rere wan haos blong man, yes, hem i long medel blong haos wetem plante rum, blong Papa blong yu, tru long samting ia, man i save gat wan hop we i tumas moa; from samting ia man i mas hop, o hem i no save kasem wan ples blong hem we i kam long papa long ples we yu bin mekem rere.

33 Mo bakegen, mi tingbaot se yu bin talem se yu bin lavem wol ia, kasem we yu leimdaon laef blong yu from wol, blong yu save tekem hem bakagen blong mekem rere wan ples blong ol pikinini blong ol man.

34 Mo nao mi save se lav ia we yu bin gat from ol pikinini blong man, i bigfala lav; from samting ia, sapos ol man i no gat bigfala lav, oli no save

kasem ples ia we yu bin mekem rere long haos wetem plante rum, blong Papa blong yu.

35 From samting ia, mi save tru long samting ia we yu bin talem, se sapos ol Jentael i no gat bigfala lav from samting we i no strong blong mifala, we bae yu pruvum olgeta, mo tekemaot talen blong olgeta, yes, hem i hemia we oli bin kasem, mo givim long olgeta we bae i gat moa plante.

36 Mo i bin hapen se mi bin prea long Lod blong hem i save givim long ol jentael gladhat, blong oli save gat bigfala lav.

37 Mo i bin hapen se Lod i bin talem long mi: Sapos oli no gat bigfala lav i nomata long yu, yu bin holem taet fet; from samting ia, ol klos blong yu bae oli kam klin. Mo from yu bin lukim samting we i no strong blong yu, bae yu kam strong, kasem we yu sidaon long ples we mi bin mekem rere long haos wetem plante rum, blong Papa blong mi.

38 Mo nao mi, Moronae, i talem gudbae long ol Jentael, yes, mo tu long ol brata blong mi we mi lavem, kasem taem we bae yumi mit long fored blong jea blong jajmen blong Kraes, ples ia we evri man bae i save se ol klos blong mi i no gat ol mak wetem blad blong yufala.

39 Mo afta bae yufala i save se mi bin lukim Jisas, mo we hem i bin toktok wetem mi stret long fes blong mi, mo we hem i bin talem long mi long fasin blong tingting we i stap daon we i klia, semak olsem wan man i

talem long narawan long lanwis blong mi, long saed blong ol samting ia;

40 Mo smol nomo mi bin raetem, from mi no strong long saed blong raeting.

41 Mo nao, bae mi askem strong long yufala blong lukaotem Jisas ia we ol profet mo ol aposol i bin raetem long saed blong hem, blong mekem se gladhat blong God Papa, mo tu Lod Jisas Kraes, mo Tabu Spirit, we i talemaot ol samting ia, i save stap long yufala blong oltaem. Amen.

---

### JAPTA 13

---

*Ita i tokbaot wan Niu Jerusalem we bae laen blong Josef i bildimap long Amerika—Hem i profesae, oli sakem hem aot, i raetem histri blong laen blong Jared, mo i talem-aot fasin blong smasem gud blong ol laen blong Jared—Faet i strong ova long ful graon.*

Mo nao mi, Moronae, i gohed blong finisim histri blong mi long saed blong fasin blong smasem gud blong ol pipol we mi bin tokbaot tru long raeting blong mi.

2 From luk, oli bin sakemaot evri toktok blong Ita; from i tru we hem i bin talem long olgeta long saed blong evri samting, stat long stat blong man; mo se afta we ol wota i bin kamaot aot long fes blong graon ia, i bin kam wan gudfala graon antap long evri narafala graon, wan graon we Lod i bin jusum; from samting ia Lod bae i wantem se

evri man i wok blong hem we i stap long fes blong graon ia;

3 Mo se i bin ples blong Niu Jerusalem, we i mas kam daon aot long heven, mo tabu ples blong wosip blong Lod.

4 Luk, Ita i bin lukim ol dei blong Kraes, mo hem i bin toktok long saed blong wan Niu Jerusalem long graon ia.

5 Mo hem i bin toktok tu long saed blong laen blong Isrel, mo Jerusalem ia we bae Lihae i kamaot long hem — afta bae oli smasem gud bae oli bildimap bakegen, wan tabu bigtaon long Lod; from samting ia, i no bin save stap olsem wan niu Jerusalem from i bin stap long wan taem blong bifo; be bae oli bildimap hem bakegen, mo i kam wan tabu bigtaon blong Lod; mo bae oli bildimap hem long laen blong Isrel.

6 Mo se bae oli bildimap wan Niu Jerusalem long graon ia, long smol haf long laen blong Josef we i stap laef yet, from we ol samting ia i bin gat wan eksampol.

7 From olsem we Josef i bin tekem papa blong hem i go daon long graon blong Ijip, semak olsem hem i bin ded long ples ia; from samting ia, Lod i bin tekem wan smol haf blong laen blong Josef we i laef yet aot long graon blong Jerusalem, blong hem i save gat sore long laen blong Josef blong mekem se oli no mas ded, semak olsem we hem i bin gat sore long papa blong Josef blong mekem se hem i no mas ded.

8 From samting ia, smol haf

blong laen blong Josef we i stap laef yet bae Lod i bildimap olgeta long graon ia; mo bae i kam wan graon blong olgeta we i kam long ol papa; mo bae oli bildimap wan tabu bigtaon long Lod, olsem Jerusalem blong bifo; mo bae oli nomo save miksim olgeta wetem ol nara-fala pipol, kasem taem we en i kam we wol bae i pas i gowe.

9 Mo bae i gat wan niu heven mo wan niu wol; mo bae tufala i olsem tufala blong bifo be tufala blong bifo i bin pas i gowe, mo evri samting i bin kam niu.

10 Mo afta Niu Jerusalem i kam; mo olgeta we i stap long hem i kasem blesing, from oli olgeta we ol klos blong olgeta i waet tru long blad blong smol sipsip; mo oli olgeta we oli kaontem olgeta wetem smol haf blong laen blong Josef we i laef yet, we oli bin blong laen blong Isrel.

11 Mo tu afta Jerusalem blong bifo i kam; mo olgeta we i stap long hem, olgeta bae i kasem blesing, from oli bin wasem olgeta long blad blong smol sipsip; mo oli olgeta we i bin seraot olbaot mo oli bin karem olgeta i kam tugeta aot long ol fo pat blong wol, mo aot long ol kantri blong not, mo oli tekem pat blong mekem kavenan i hapen we God i bin mekem wetem papa blong olgeta, Ebrahim.

12 Mo taem we ol samting ia i kam, skripja ia i hapen we i talem, i gat olgeta we oli faswan we bae oli kam laswan, mo i gat olgeta we i bin laswan we bae oli kam faswan.



13 Mo mi bin rere blong raetem moa, be Lod i blokem mi; be ol profesi blong Ita i bin bigfala mo gudfala; be oli bin tekem hem olsem nating, mo oli bin sakem hem aot; mo hem i bin haedem hemwan long hol blong ston long dei, mo long naet hem i bin go aot mo lukim ol samting we bae i kam long ol pipol.

14 Mo taem we hem i bin stap long hol blong ston, hem i bin mekem narafala pat blong histri ia, hem i lukim ol fasin blong smasem gud we i bin kam long ol pipol, long naet.

15 Mo i bin hapen se long semfala yia ia we oli bin sakem hem aot long medel blong ol pipol, i bin stat blong gat wan bigfala faet long medel blong ol pipol, from i bin gat plante we i bin girap, we oli bin ol strong man, mo oli bin lukaotem blong kilim ded Koriantuma, tru long ol sikret plan blong nogud fasin blong olgeta, we oli bin tokbaot.

16 Mo nao Koriantuma, from hem i bin stadi, hemwan, long evri fasin blong faet mo evri trik blong wol, from samting ia hem i bin givim faet long olgeta we i bin lukaotem blong kilim hem i ded.

17 Be hem i no bin sakem sin, mo tu ol naes boe blong hem o gel; mo tu ol naes boe mo ol gel blong Kohor; mo tu ol naes boe mo gel blong Korihor; mo blong endem, i no bin gat eni long ol naes boe mo gel long fes blong ful graon we i bin sakem ol sin blong olgeta.

18 From samting ia, i bin hapen se long nambawan yia we Ita i bin stap long hol blong wan ston, i bin gat plante pipol we oli bin kilim i ded wetem naef blong faet blong ol sikret grup, oli faet agensem Koriantuma blong mekem se oli save tekem kingdom.

19 Mo i bin hapen se ol boe blong Koriantuma i bin faet plante mo blad blong olgeta i bin ron plante.

20 Mo long nambatu yia toktok blong Lod i bin kam long Ita, se hem i mas go mo profesae long Koriantuma se, sapos hem i sakem sin, mo evri famle blong hem, Lod bae i givim long hem kingdom blong hem mo sevem ol pipol—

21 Sapos no bae oli smasem gud olgeta, mo evri famle blong hem be i no hemwan. Mo bae hem i stap laef nomo blong lukim ol profesi i hapen, we oli bin tokbaot long saed blong wan narafala pipol i kasem graon blong olgeta we i kam long ol papa; mo bae olgeta i berem Koriantuma; mo bae oli kilim ded evri sol, be Koriantuma nomo bae i stap.

22 Mo i bin hapen se Koriantuma i no bin sakem sin, mo tu famle blong hem, mo tu ol pipol; mo ol faet i no bin stop; mo oli bin lukaotem blong kilim Ita i ded, be hem i bin ronwe aot long fored blong olgeta mo i bin haed bakegen long hol blong ston.

23 Mo i bin hapen se Sared i bin girap mo hem tu i bin givim faet long Koriantuma; mo hem i bin winim hem, inaf blong

mekem se long nambatri yia hem i bin tekem hem i kam prisena.

24 Mo ol boe blong Koriantuma, long nambafo yia, i bin winim Sared, mo oli bin tekem kingdom bakegen i go long papa blong olgeta.

25 Nao i bin stat blong gat wan faet long ful fes blong graon, evri man wetem grup blong hem i faet from samting we hem i bin wantem.

26 Mo i bin gat ol stilman, mo blong endem, evri kaen nogud fasin long ful fes blong graon.

27 Mo i bin hapen se Koriantuma i bin kros tumas long Sared, mo hem i bin go agensem hem wetem ol ami blong hem blong faet; mo oli bin mitim olgeta wetem bigfala kros, mo oli bin mit long vale blong Gilgal; mo faet ia i bin kam rabis tumas.

28 Mo i bin hapen se Sared i bin faet agensem hem blong spes blong tri dei. Mo i bin hapen se Koriantuma i bin winim hem, mo i bin folem hem kasem taem we hem i bin kam long ol flat ples blong Heslon.

29 Mo i bin hapen se Sared i bin givim faet long hem bakegen long ol flat ples; mo luk, hem i bin winim Koriantuma, mo i bin pusum hem i gobak bakegen long vale blong Gilgal.

30 Mo Koriantuma i bin givim faet long Sared bakegen long vale blong Gilgal, long taem ia we hem i bin winim Sared mo i bin kilim hem i ded.

31 Mo Sared i bin givim kil

long Koriantuma long leg blong hem, mekem se hem i no bin go blong faet bakegen blong spes blong tu yia, long taem ia we evri pipol long fes blong graon i bin mekem blad i ron, mo i no bin gat wan blong holem bak olgeta.

---

### JAPTA 14

---

*Rabis fasin blong ol pipol i mekem panis i kam long graon—Koriantuma i go long faet agensem Giliad, afta Lib, mo afta Sis—Blad mo fasin blong kilim man i ded i kavremap graon.*

Mo nao i bin stat blong gat wan bigfala panis long ful graon from rabis fasin blong ol pipol, long samting ia, sapos wan man bae i putum tul blong hem o naef blong faet blong hem long selef blong hem, o long ples we hem i wantem putum, luk, long nekis dei, hem i no bin save faenem samting ia, panis long graon i bin bigwan tumas olsem ia.

2 From samting ia evri man i bin holem taet strong samting we i blong hem, wetem ol han blong hem, mo i no wantem letem o bae hem i givim; mo evri man i bin holem taet handel blong naef blong faet blong hem long raet han blong hem, blong lukaotem gud ol samting blong hem mo laef blong hemwan mo long ol woman blong hem mo ol pikinini.

3 Mo nao, afta spes blong tu yia, mo afta ded blong Sared,

luk, brata blong Sared i bin girap, mo hem i bin givim faet long Koriantuma, long faet ia Koriantuma i bin winim hem mo i bin folem hem i go long ples we i no gat man long hem blong Akis.

4 Mo i bin hapen se brata blong Sared i bin givim faet long hem long ples we i no gat man long hem blong Akis; mo faet ia i bin kam strong tumas, mo plante taosen i bin foldaon tru long naef blong faet.

5 Mo i bin hapen se Koriantuma i bin raonem ples we i no gat man long hem; mo brata blong Sared i bin maj i go fored aot long ples we i no gat man long hem long naet, mo i bin kilim ded wan pat blong ami blong Koriantuma, taem we oli drong.

6 Mo hem i bin kam fored long graon blong Moron, mo i bin putum hemwan long jea blong Koriantuma.

7 Mo i bin hapen se Koriantuma i bin stap wetem ami blong hem long ples we i no gat man long hem blong spes blong tu yia, long taem ia hem i bin kasem bigfala paoa long ami blong hem.

8 Nao brata blong Sared, we nem blong hem i bin Gilead, tu i bin kasem bigfala paoa long ami blong hem, from ol sikret grup.

9 Mo i bin hapen se hae pris blong hem i bin kilim ded hem long taem we hem i stap sidaon long jea blong hem.

10 Mo i bin hapen se wan long ol sikret grup i bin kilim ded hem long wan sikret rod, mo i bin tekem long hemwan

kingdom ia, mo nem blong hem i bin Lib; mo Lib i bin wan man we i bigfala, moa bitim eni narafala man long medel blong evri pipol.

11 Mo i bin hapen se long fas yia blong Lib, Koriantuma i bin kam antap long graon blong Moron, mo i bin givim faet long Lib.

12 Mo i bin hapen se hem i bin faet wetem Lib, long faet ia Lib i bin kilim han blong hem mekem se hem i bin kasem kil, be, ami blong Koriantuma i bin gohed strong long Lib, mekem se hem i bin ronwe i go long ol boda long so blong solwota.

13 Mo i bin hapen se Koriantuma i bin folem hem; mo Lib i bin givim faet long hem long so blong solwota.

14 Mo i bin hapen se Lib i bin kilim ami blong Koriantuma, mekem se oli bin ronwe bak-egen i go long ples we i no gat man long hem blong Akis.

15 Mo i bin hapen se Lib i bin folem hem kasem taem we hem i bin kam long ol flat ples blong Agos. Mo Koriantuma i bin tekem evri pipol wetem hem taem we hem i stap ronwe long fored blong Lib long pat blong graon we hem i bin ronwe i go long hem.

16 Mo taem we hem i bin kam long ol flat ples blong Agos, hem i bin givim faet long Lib, mo hem i bin kilim hem kasem taem we hem i bin ded; be, brata blong Lib i bin kam agensem Koriantuma long ples blong hem, mo faet i bin kam strong tumas, long samting

ia Koriantuma i bin ronwe bakegen long fored blong ami blong brata blong Lib.

17 Nao nem blong brata blong Lib oli bin singaotem Sis. Mo i bin hapen se Sis i bin folem Koriantuma, mo hem i bin winim plante bigtaon, mo hem i bin kilim ded ol woman tugeta wetem ol pikinini, mo hem i bin bonem ol bigtaon.

18 Mo wan fraet long Sis i bin go raon truaot long ful graon; yes, wan krae i bin go aot truaot long graon—Huia i save stanap long fored blong ami blong Sis? Luk, hem i brum graon long fored blong hem!

19 Mo i bin hapen se ol pipol i bin stat blong kam tugeta long ol grup blong ol ami, truaot long fes blong ful graon.

20 Mo oli bin seraot; mo wan pat blong olgeta i bin ronwe i go long ami blong Sis, mo wan pat blong olgeta i bin ronwe i go long ami blong Koriantuma.

21 Mo faet i bin bigwan mo longwan tumas, mo fasin blong lukim blad i ron mo kilim man i ded i bin stap long taem, mekem se, ful fes blong graon, ol bodi blong ol ded i bin kavremap.

22 Mo faet ia i bin kwik mo i spid mekem se i no bin gat wan we i stap blong berem olgeta we i ded, be oli bin maj i go fored aot long fasin blong mekem blad i ron i go long fasin blong mekem blad i ron, oli livim ol bodi blong ol man tugeta wetem ol woman, mo ol pikinini i ledaon olbaot long fes blong graon, blong kam wan kakae blong ol wom blong mit.

23 Mo smel blong olgeta i bin go aot long fes blong graon, kasem we i go long fes blong ful graon; from samting ia, ol pipol i bin stat blong kasem trabol long dei mo long naet, from smel blong olgeta.

24 Be, Sis i no bin stop blong folem Koriantuma; from hem i bin promes tru blong pembak hemwan long Koriantuma from blad blong brata blong hem, we oli bin kilim ded, mo toktok blong Lod we i bin kam long Ita se Koriantuma bae i no foldaon tru long naef blong faet.

25 Mo olsem ia nao yumi lukim se Lod i bin visitim olgeta long kros blong hem we i fulwan, mo nogud fasin blong olgeta mo rabis sin i bin mekem rere wan rod blong smasem gud olgeta long taem we i no gat en.

26 Mo i bin hapen se Sis i bin folem Koriantuma i go long is, i go kasem long ol boda klosap long so blong solwota, mo long ples ia hem i bin givim faet long Sis blong spes blong tri dei.

27 Mo fasin blong smasem gud long medel blong ol ami blong Sis i bin nogud tumas, mekem se ol pipol i bin stat blong kam fraet, mo i bin stat blong ronwe aot long fored blong ol ami blong Koriantuma; mo oli bin ronwe i go long graon blong Korihor, mo i bin brum aot olgeta we i stap aot long fored blong olgeta, olgeta evriwan we oli no bin wantem joenem olgeta.

28 Mo oli bin stanemap ol tenet blong olgeta long vale

blong Korihor; mo Koriantuma i bin stanemap ol tenet blong hem long vale blong Sur. Nao vale blong Sur i bin stap klosap long hil blong Komnor; from samting ia, Koriantuma i bin tekem ol ami blong hem i kam tugeta long hil blong Komnor, mo i bin blu long wan pupu long ol ami blong Sis blong askem olgeta blong kam aot blong faet.

29 Mo i bin hapen se oli bin kam aot, be oli bin pusum olgeta i gobak bakegen; mo oli bin kam nambatu taem, mo oli bin pusumbak olgeta bakegen nambatu taem. Mo i bin hapen se oli bin kam bakegen nambatri taem, mo faet i bin kam strong tumas.

30 Mo i bin hapen se Sis i bin kilim Koriantuma mekem se hem i bin givim long hem plante kil we i dip; mo Koriantuma, from hem i bin lusum blad blong hem, ae blong hem i bin dak, mo oli bin karem hem i gowe olsem se hem i ded.

31 Nao lus blong ol man, ol woman, mo ol pikinini long tufala saed tugeta i bin bigwan tumas tu mekem se Sis i bin givim oda long ol pipol blong hem se oli no mas folem ol ami blong Koriantuma; from samting ia oli bin gobak long kamp blong olgeta.

---

JAPTA 15

---

*Plante milian blong ol laen blong Jared oli kilim ded olgeta long faet — Sis mo Koriantuma i tekem evri*

*pipol i kam tugeta long faet blong ded — Spirit blong Lod i stop blong wok wetem olgeta — Oli smasem gud fulwan, kantri blong laen blong Jared — Koriantuma nomo i stap.*

Mo i bin hapen se taem we Koriantuma i bin kam oraet bakegen long ol kil blong hem, hem i bin stat blong tingbaot ol toktok we Ita i bin talem long hem.

2 Hem i bin luk se klosap tu milian finis long ol pipol blong hem, oli bin kilim ded olgeta wetem naef blong faet; mo hem i stat blong harem nogud insaed long hat blong hem; yes, i bin gat tu milian long ol strong man blong hem i ded, mo tu ol woman blong olgeta mo ol pikinini.

3 Hem i bin stat blong sakem nogud fasin we hem i bin mekem; hem i bin stat blong tingbaot ol toktok we maot blong evri profet i bin talem, mo hem i bin luk ol samting ia se oli bin hapen kasem taem ia, evri smol pis; mo sol blong hem i bin harem nogud, mo hem i no bin wantem blong leftemap tingting blong hem.

4 Mo i bin hapen se hem i bin raetem wan leta long Sis, we i wantem se hem i letem ol pipol blong oli stap laef, se bae hem i mas lego kingdom from gud blong ol laef blong ol pipol.

5 Mo i bin hapen se taem we Sis i bin kasem leta blong hem, hem i bin raetem wan leta long Koriantuma, se sapos bae hem i lego hemwan, blong hem i save kilim ded hem wetem naef

blong faet blong hem, se bae hem i letem ol pipol blong hem oli stap laef.

6 Mo i bin hapen se ol pipol i no bin sakem rabis fasin blong olgeta; mo ol pipol blong Koriantuma i bin kam blong kros agensem ol pipol blong Sis; mo ol pipol blong Sis i bin kam blong kros agensem ol pipol blong Koriantuma; from samting ia, ol pipol blong Sis i bin givim faet long ol pipol blong Koriantuma.

7 Mo taem we Koriantuma i bin luk se klosap bae hem i foldaon hem i bin ronwe bakegen aot long fored blong ol pipol blong Sis.

8 Mo i bin hapen se hem i bin kam long ol wota blong Ripliankum, we, long lanwis ia, i bigwan, o i bitim evriwan; from samting ia, taem we oli bin kam long ol wota ia oli bin stanemap ol tenet blong olgeta; mo Sis tu i bin stanemap ol tenet blong hem klosap long olgeta; mo taswe long nekis dei oli bin kam blong faet.

9 Mo i bin hapen se oli bin faet wan faet we i strong tumas, long faet ia Koriantuma i bin kasem kil bakegen, mo ae blong hem i bin kam dak from hem i bin lusum blad.

10 Mo i bin hapen se ol ami blong Koriantuma i bin faet strong agensem ol ami blong Sis mekem se oli bin winim olgeta, mekem se oli bin mekem olgeta i ronwe aot long fored blong olgeta; mo oli bin ronwe i go long saot, mo oli bin stanemap ol tenet blong olgeta

long wan ples we oli bin singaotem Ogat.

11 Mo i bin hapen se ami blong Koriantuma i bin stanemap ol tenet blong olgeta klosap long hil Rama; mo i bin semfala hil we papa blong mi Momon i bin haedem ol histri wetem Lod, we oli bin tabu.

12 Mo i bin hapen se oli bin karem i kam tugeta evri pipol long ful fes blong graon, we oli no bin kilin ded olgeta, be Ita nomo.

13 Mo i bin hapen se Ita i bin lukim evri fasin blong ol pipol; mo hem i bin luk se ol pipol we oli bin sapotem Koriantuma, oli bin kam tugeta wetem ami blong Koriantuma; mo ol pipol we oli bin sapotem Sis, oli bin kam tugeta wetem ami blong Sis.

14 From samting ia, oli bin tekem spes blong fo yia blong karem ol pipol i kam tugeta, blong mekem se oli save tekem evriwan we i stap long fes blong graon, mo mekem se oli save kasem evri paoa we i save hapen blong oli save kasem.

15 Mo i bin hapen se taem we olgeta evriwan i bin kam tugeta, evriwan long ami we hem i wantem sapotem, wetem ol woman blong olgeta mo ol pikinini blong olgeta—ol man, ol woman tugeta wetem ol pikinini oli bin rere wetem ol tul blong faet, oli bin gat ol sil, mo ol plet blong kavremap jes, mo ol hat blong faet, mo oli werem klos folem fasin blong faet—oli bin maj i go aot wan agensem narawan blong faet;

mo oli bin faet long ful dei ia, mo oli no bin win.

16 Mo i bin hapen se taem we hem i bin naet oli bin taed, mo oli bin gobak long ol kamp blong olgeta; mo afta we oli bin gobak long ol kamp blong olgeta, oli bin stat blong singaot mo oli krae from lus blong ol pipol blong olgeta we oli bin kilim ded olgeta; mo ol krae blong olgeta i bin bigwan tumas, ol singaot blong olgeta, mo ol krae blong olgeta i bigwan tumas, we oli bin mekem tumas noes long ea oltaem.

17 Mo i bin hapen se long nekis dei oli bin go bakegen blong faet, mo dei ia i bin bigwan mo i nogud tumas; be, oli no bin win, mo taem we naet i bin kam bakegen, oli bin mekem noes long ea wetem ol krae blong olgeta, mo ol singaot blong olgeta, mo ol krae blong olgeta, from lus blong ol pipol blong olgeta we oli bin kilim ded olgeta.

18 Mo i bin hapen se Koriantuma i bin raetem bakegen wan leta long Sis, hem i wantem se hem i no kam bakegen blong faet, be se bae hem i tekem kingdom, mo letem ol laef blong ol pipol.

19 Be luk, Spirit blong Lod i bin stop blong wok wetem olgeta, mo Setan i bin gat ful paoa ova long ol hat blong ol pipol; from oli lego olgeta bakegen long ol hat blong olgeta we i strong, mo ol tingting blong olgeta we i blaen, mekem se oli save smasem gud olgeta; from samting ia oli bin go bakegen blong faet.

20 Mo i bin hapen se, oli bin faet long ful dei ia, mo taem we naet i bin kam, oli bin slip long ol naef blong faet blong olgeta.

21 Mo long nekis dei, oli bin faet kasem taem we naet i bin kam.

22 Mo taem we naet i bin kam oli bin drong long kros, semak olsem wan man we i drong long waen; mo oli bin slip bakegen long ol naef blong faet blong olgeta.

23 Mo long nekis dei oli bin faet bakegen; mo taem we naet i bin kam olgeta evriwan i bin foldaon tru long naef blong faet be fifti mo tu long ol pipol blong Koriantuma, mo siksti mo naen nomo long ol pipol blong Sis.

24 Mo i bin hapen se oli bin slip long ol naef blong faet blong olgeta long naet ia, mo long nekis dei, oli bin faet bakegen, mo oli bin faet long evri paoa blong olgeta wetem ol naef blong faet bong olgeta, mo wetem ol sil blong olgeta, long ful dei ia.

25 Mo taem we naet i bin kam, i bin gat teti mo tu long ol pipol blong Sis, mo twenti mo seven long ol pipol blong Koriantuma.

26 Mo i bin hapen se, oli bin kakae mo oli bin slip, mo oli bin mekem rere blong ded long nekis dei. Mo olgeta, oli ol bigfala mo ol strong man olsem long paoa blong ol man.

27 Mo i bin hapen se oli bin faet blong spes blong tri aoa, mo ol ae blong olgeta i bin kam dak from oli bin lusum blad.

28 Mo i bin hapen se taem we ol man blong Koriantuma i bin

kasem inaf paoa blong mekem se oli save wokbaot, oli bin rere blong ronwe from ol laef blong olgeta; be luk, Sis i bin girap, mo tu ol man blong hem, mo hem i bin promes long kros blong hem se bae hem i kilim ded Koriantuma o bae hem i ded tru long naef blong faet.

29 From samting ia, hem i bin folem olgeta, mo long nekis dei hem i bin kasem olgeta; mo oli bin faet bakegen wetem naef blong faet. Mo i bin hapen se taem we olgeta evriwan i bin foldaon tru long naef blong faet, be i no Koriantuma mo Sis, luk ae blong Sis i bin kam dak from hem i bin lusum blad.

30 Mo i bin hapen se taem we Koriantuma i bin lei long naef blong faet blong hem, mekem se hem i bin spel smol, hem i bin katem aot hed blong Sis.

31 Mo i bin hapen se afta we hem i bin katem aot hed blong Sis, se Sis i bin girap long ol han blong hem mo i bin foldaon;

mo afta we hem i bin traem had blong pulum win, hem i bin ded.

32 Mo i bin hapen se Koriantuma i bin foldaon long graon, mo i bin kam olsem se hem i no bin gat eni laef.

33 Mo Lod i bin toktok long Ita, mo i bin talem long hem: Go aot. Mo hem i bin go aot, mo hem i bin lukim se ol toktok blong Lod i bin hapen; mo hem i bin finisim histri blong hem; (mo wan hundred pat mi no bin raetem) mo hem i bin haedem olgeta long wan fasin we ol pipol blong Limhae i bin faenem olgeta.

34 Nao ol las toktok we Ita i bin raetem oli olgeta ia: Sapos we Lod bae i wantem blong tekemaot mi, taem mi stap laef yet, o we bae mi harem nogud long wanem we Lod i wantem long bodi blong mit mo bun, i nomata, sapos i olsem se mi mi sev long kingdom blong God. Amen.

## BUK BLONG MORONAE

### JAPTA 1

*Moronae i raetem blong helpem ol man blong Leman—Ol man blong Nifae we bae oli no tanem baksaed long Kraes, oli kilim ded olgeta. Raonabaot 401–421 yia afta Kraes i bon.*

**N**AO mi, Moronae, afta we mi bin mekem wan en blong mekem histri blong ol

pipol blong Jared i kam smol, mi no bin ting se bae mi raetem moa, be mi no ded yet olsem taem ia; mo mi no soem miwan long ol man blong Leman, from mi fraet se bae oli kilim ded mi.

2 From luk, ol faet blong olgeta i strong tumas long medel blong olgeta; mo from fasin blong olgeta blong no laekem, oli kilim ded evri man blong



Nifae we bae i no tanem bak-saed long Kraes.

3 Mo mi, Moronae, bae mi no tanem baksaed long Kraes; from samting ia mi wokbaot olbaot long eni ples we mi save go long hem blong mi save sevem laef blong miwan.

4 From samting ia, mi raetem smol samting moa, agensem tingting we mi bin tingting; from mi bin ting se bae mi no raetem eni moa; be mi raetem smol samting moa, blong maet bae oli save gat yus long ol brata blong mi, ol man blong Leman, long samfala dei long fiuja, folem wanem we Lod i wantem.

---

### JAPTA 2

---

*Jisas i bin givim long ol twelef man blong Nifae we oli ol disaepol, paoa blong givim presen we i Tabu Spirit. Raonabaot 401–421 yia afta Kraes i bon.*

OL toktok blong Kraes, we hem i bin talem long ol disaepol blong hem, ol twelef we hem i bin jusum, taem we hem i bin putum ol han blong hem antap long olgeta—

2 Mo hem i bin singaotem olgeta long nem blong olgeta, i talem: Yu mas askem long Papa long nem blong mi, long strongfala prea; mo afta we yu bin mekem samting ia bae yu gat paoa we, long hem we yu putum ol han blong yu long hem, bae yu givim Tabu Spirit; mo long nem blong mi bae yu givim samting ia, from olsem ia

nao ol aposol blong mi i stap mekem.

3 Nao Kraes i bin talem ol toktok ia long olgeta long taem we hem i bin kamaot fastaem; mo grup blong pipol i no bin harem samting ia; be ol disaepol i bin harem samting ia; mo long olgeta evriwan we oli bin putum ol han blong olgeta antap long olgeta, Tabu Spirit i bin kam long olgeta.

---

### JAPTA 3

---

*Ol elda i odenem ol pris mo ol tija tru long fasin blong putum ol han antap long olgeta. Raonabaot 401–421 yia afta Kraes i bon.*

FASIN we ol disaepol, we oli bin singaotem olgeta ol elda blong jos, i bin odenem ol pris mo ol tija—

2 Afta we oli bin prea long Papa long nem blong Kraes, oli bin putum ol han blong olgeta antap long olgeta, mo oli bin talem:

3 Long nem blong Jisas Kraes, mi odenem yu blong kam wan pris (o sapos we hem i kam wan tija, mi odenem yu blong kam wan tija) blong prijim fasin blong sakem sin mo fasin blong kam klin aot long ol sin tru long Jisas Kraes, tru long fasin blong stap strong long fet, long nem blong hem kasem en. Amen.

4 Mo long fasin ia oli bin odenem ol pris mo ol tija, folem ol presen mo ol koling blong God long ol man; mo oli bin odenem olgeta tru long paoa

blong Tabu Spirit, we i bin stap long olgeta.

---

#### JAPTA 4

---

*Hao nao ol elda mo ol pris i givim bred blong sakramen, Moronae i eksplenem. Raonabaot 401–421 yia afta Kraes i bon.*

FASIN blong ol elda blong olgeta mo ol pris oli stap givim mit mo blad blong Kraes long jos; mo oli bin givim samting ia folem ol komanmen blong Kraes; from samting ia mifala i save se fasin ia i stret; mo elda o pris i bin givim samting ia —

2 Mo oli bin nildaon wetem jos, mo prea long Papa long nem blong Kraes, oli talem:

3 O God, yu yu Papa we i No Save Finis, mifala i askem yu long nem blong Pikinini blong yu, Jisas Kraes, blong blesem mo mekem tabu hemia bred, long ol sol blong olgeta evriwan we i kakae long hem; blong oli save kakae blong tingbaot bodi blong Pikinini blong yu, mo witnes long yu, O God, yu yu Papa we i No Save Finis, we oli wantem blong tekem long olgeta, nem blong Pikinini blong yu, mo oltaem tingbaot hem, mo holem ol komanmen blong hem we hem i bin givim long olgeta, mekem se oltaem oli save gat Spirit blong hem i stap wetem olgeta. Amen.

---

#### JAPTA 5

---

*Fasin blong givim waen blong*

*sakramen, Moronae i eksplenem. Raonabaot 401–421 yia afta Kraes i bon.*

FASIN blong givim waen—Luk, oli bin tekem kap, mo oli bin talem:

2 O God, yu yu Papa we i No Save Finis, mifala i askem yu, long nem blong Pikinini blong yu, Jisas Kraes, blong blesem mo mekem tabu hemia waen, long ol sol blong olgeta evriwan we i dring long hem, blong oli save mekem samting ia blong tingbaot blad blong Pikinini blong yu, we i bin ron from olgeta; blong oli save witnes long yu, O God, yu yu Papa we i No Save Finis, mekem se oltaem oli tingbaot hem, blong oli save gat Spirit blong hem i stap wetem olgeta. Amen.

---

#### JAPTA 6

---

*Olgeta we i wantem sakem sin i kasem baptaes, mo ol memba blong Jos i kam ol fren blong olgeta—Ol memba blong Jos we i sakem sin, oli fogivim olgeta—Oli lidim ol miting tru long paoa blong Tabu Spirit. Raonabaot 401–421 yia afta Kraes i bon.*

Mo nao mi toktok long saed blong baptaes. Luk, ol elda, ol pris, mo ol tija i bin kasem baptaes; mo oli no bin kasem baptaes sapos oli no bin karem i kam ol frut we i soem se oli stret blong samting ia.

2 Mo tu oli no bin tekem eni man blong kasem baptaes sapos oli no bin kam fored wetem wan

hat we i fulap wetem sore mo wan spirit we i wantem blong sakem sin, mo i bin witnes long jos se i tru we oli bin sakem evri sin blong olgeta.

3 Mo oli no bin tekem wan blong kasem baptaes sapos oli no bin putum long olgeta nem blong Kraes, mo oli bin gat wan strong tingting blong wok blong hem kasem en.

4 Mo afta oli bin tekem olgeta blong kasem baptaes, mo Tabu Spirit i bin lidim olgeta mo oli bin kam klin tru long paoa blong hem, oli bin kaontem olgeta wetem ol pipol blong jos blong Kraes; mo oli bin tekem ol nem blong olgeta, blong oli save tingbaot olgeta mo fidim olgeta wetem gudfala toktok blong God, blong holem taet olgeta i stap long stret rod, blong holem taet olgeta blong oli lukaot gud oltaem long prea, oli dipen nomo long ol gudfala wok blong Kraes, we i bin man we i bin statem mo finisim fet.

5 Mo jos i bin mit tugeta fulap, blong livim kakae mo blong prea, mo blong toktok wan wetem narawan long saed blong gudfala laef blong ol sol blong olgeta.

6 Mo oli bin mit tugeta fulap blong kakae bred mo dring waen, blong tingbaot Lod Jisas.

7 Mo oli bin lukaot gud blong luk se i no mas gat eni rabis fasin long medel blong olgeta; mo eni man we oli bin faenem se hem i bin mekem rabis fasin, mo tri witnes blong jos i bin jajem olgeta long fored blong ol elda, mo sapos oli no bin sakem

sin, mo oli no bin talemaot, oli bin tekem ol nem blong olgeta aot long medel blong ol pipol blong Kraes.

8 Be evri taem we oli bin sakem sin mo bin lukaotem blong kasem fogivnes, wetem tru tingting, oli bin fogivim olgeta.

9 Mo ol miting blong olgeta, jos i bin lidim long fasin blong ol wok blong Spirit, mo tru long paoa blong Tabu Spirit; from olsem we paoa blong Tabu Spirit i lidim olgeta blong prii, o blong askem strong, o blong prea, o blong askem wetem tingting i stap daon, o blong singsing, semak olsem oli bin mekem.

---

## JAPTA 7

---

*Moronae i askem blong go insaed long ples blong spel blong Lod—Prea wetem tru tingting—Spirit blong Kraes i mekem se ol man i save gud mo nogud—Setan i winim tingting blong ol man blong tanem baksaed long Kraes mo mekem nogud samtig—Ol profet i soemaot taem we Kraes bae i kam—Tru long fet, ol merikel i hapen mo ol enjel i givhan—Ol man i mas hop long laef we i no save finis mo holem taet gud long bigfala lav. Raonabaot 401–421 yia afta Kraes i bon.*

Mo nao mi, Moronae, mi raetem sam long ol toktok blong papa blong mi, Momon, we hem i bin talem long saed blong fet, hop, mo bigfala lav; from folem fasin ia hem i bin toktok long ol pipol, taem we hem i bin tijim

olgeta long haos blong prea we oli bin bildimap blong ples blong wosip.

2 Mo nao mi, Momon, i toktok long yufala, ol brata blong mi we mi lavem tumas; mo i tru long gladhat blong God Papa, mo Lod blong yumi Jisas Kraes, mo tabu tingting blong hem, from presen blong hem i singaotem mi, mekem se mi save toktok long yufala long taem ia.

3 From samting ia, mi wantem toktok long yufala we i blong jos, we i folem Kraes wetem pis, mo we i bin kasem wan hop we i naf tru long hemia yufala i save go insaed long ples blong spel blong Lod, stat long taem ia go kasem taem we bae yufala i spel wetem hem long heven.

4 Mo nao ol brata blong mi, mi jajem ol samting ia long yufala, from wokbaot blong yufala we i gat pis long medel blong ol pikinini blong ol man.

5 From mi tingbaot toktok blong God we i talem se tru long ol wok blong olgeta bae yufala i save olgeta; from sapos ol wok blong olgeta i stap gud, ale oli gud tu.

6 From luk, God i bin talem se wan man we i nogud i no save mekem samting we i gud; from sapos hem i givim wan presen, o i prea long God, sapos hem i no mekem samting ia wetem tru tingting i no helpem hem nating.

7 From luk, oli no luk se i gud long hem olsem stret fasin.

8 From luk, sapos wan man we i nogud i givim wan presen,

hem i mekem samting ia be hem i no wantem; from samting ia oli luk se long hem i semak olsem se hem i bin holem taet presen ia; from samting ia oli kaontem hem olsem se hem i nogud long fored blong God.

9 Mo olsem ia tu oli luk se hem i nogud long wan man sapos bae hem i prea be i no wetem tru tingting blong hat; yes, mo hem i no helpem hem nating, from God i no akseptem eniwan olsem ia.

10 From samting ia, wan man we i nogud i no save mekem samting we i gud; mo tu bae hem i no givim wan gudfala presen.

11 From luk, wan springwota we i konkon i no save givim gudfala wota; mo tu wan gudfala springwota i no save givim wota we i konkon; from samting ia, wan man we i wan wokman blong devel i no save folem Kraes; mo sapos hem i folem Kraes, hem i no save stap olsem wan wokman blong devel.

12 From samting ia, evri samting we i gud i kam long God; mo samting we i nogud i kam long devel; from devel i wan enemi blong God, mo i faet agensem hem oltaem, mo i stap askem mo switim ol man blong mekem sin, mo blong mekem samting we i nogud oltaem.

13 Be luk, samting we i blong God, i stap askem mo i switim blong mekem samting we i gud oltaem; from samting ia, evri samting we i stap askem mo switim blong mekem samting we i gud, mo blong lavem God,

mo blong wok blong hem, i kamaot long God.

14 From samting ia, lukaot gud, ol brata blong mi we mi lavem yufala tumas, blong yufala i no jajem se samting we i nogud i blong God, o se samting we i gud mo i blong God, i blong devel.

15 From luk, ol brata blong mi, God i givim long yufala blong jaj; blong yufala i save gat save long samting we i gud aot long samting we i nogud; mo fasin blong jaj i klia, blong yufala i save gat save wetem wan save we i stret gud, olsem deilaet i defren long dak naet.

16 From luk, Spirit blong Kraes, God i givim long evri man, blong hem i save gat save long samting we i gud aot long samting we i nogud; from samting ia, mi soemaot long yufala fasin blong jaj; from evri samting we i askem blong mekem samting we i gud mo blong winim tingting blong biliv long Kraes, i kamaot tru long paoa mo presen blong Kraes; from samting ia yufala i save gat save wetem wan save we i stret gud se samting ia i blong God.

17 Be eni samting we i winim tingting blong ol man blong mekem samting we i nogud, mo no biliv long Kraes, mo tanem baksaed long hem, mo no wok blong God, ale yufala i save gat save wetem wan save we i stret gud se samting ia i blong devel; from long fasin ia devel i stap wok, from hem i no winim tingting blong eni man blong mekem samting we i gud, no, i

no gat wan; mo tu ol enjel blong hem; mo tu olgeta we i letem olgeta bakegen long hem.

18 Mo nao, ol brata blong mi, from yufala i save laet ia we bae yufala i save yusum blong jaj, we laet ia i laet blong Kraes, from yufala i no jaj rong; from wetem semfala jajmen we yufala i jaj long hem bae Lod i yusum blong jajem yufala tu.

19 From samting ia, mi askem strong long yufala, ol brata, blong yufala i mas stadi oltaem long laet blong Kraes, blong yufala i save gat save long samting we i gud aot long samting we i nogud; mo sapos bae yufala i holem taet long evri gud samting, mo no jajem hem, i tru we bae yufala i kam wan pikinini blong Kraes.

20 Mo nao, ol brata blong mi, hao nao i save hapen se yufala i save holem taet long evri gud samting?

21 Mo nao mi kam long fet ia, we mi bin talem se bae mi tokbaot; mo bae mi talem long yufala fasin we tru long hem, yufala i save holem taet long evri gud samting.

22 From luk, God i save evri samting, from we hem i stap oltaem go kasem oltaem, luk, hem i bin sendem ol enjel blong givhan long ol pikinini blong ol man, blong soemaot ol samting long saed blong taem we Kraes bae i kam; mo long Kraes bae i kam evri gud samting.

23 Mo God tu i bin talemaot long ol profet, tru long maot blong hemwan, se Kraes bae i kam.

24 Mo luk, i bin gat ol defren kaen wei, we hem i bin soem-aot ol samting long ol pikinini blong ol man, we i bin gud; mo evri samting we i gud i kamaot long Kraes; sapos no ol man i bin foldaon, mo i no bin save gat wan gudfala samting i kam long olgeta.

25 From samting ia, tru long ol fasin blong givhan blong ol enjel, mo tru long evri toktok we i bin kam fored aot long maot blong God, ol man i bin stat blong yusum fet long Kraes; mo olsem ia nao tru long fet, oli bin holem taet long evri gudfala samting; mo olsem ia nao i bin stap kasem taem we Kraes i bin kam.

26 Mo afta we hem i bin kam ol man tu i bin sev tru long fet long nem blong hem; mo tru long fet, oli kam ol boe blong God. Mo i olsem we i tru se Lod i stap laef, hem i bin talemaot ol toktok ia long ol papa blong mifala, i talem: eni samting we bae yufala i askem Papa God long nem blong mi, we i gud, long fet we yufala i biliv se bae yufala i kasem, luk, bae Papa i mekem long yufala.

27 From samting ia, ol brata blong mi we mi lavem tumas, ol merikel i bin stop from we Kraes i bin go antap long heven, mo i bin sidaon long raet han blong God, blong askem long Papa ol raet blong sore blong hem, we hem i gat long ol pikinini blong ol man?

28 From hem i bin mekem i hapen ol en blong loa, mo hem i wantem olgeta evriwan we i

gat fet long hem; mo olgeta we i gat fet long hem bae oli holem taet long evri gudfala samting; from samting ia hem i toktok from stamba tingting blong ol pikinini blong ol man; mo hem i stap long taem we i no save finis long ol heven.

29 Mo from hem i bin mekem samting ia, ol brata blong mi we mi lavem tumas, ol merikel i bin stop? Luk mi talem long yufala, No; mo tu ol enjel i no bin stop blong givhan long ol pikinini blong ol man.

30 From luk, oli stap andanit long paoa blong hem, blong givhan folem toktok blong oda blong hem, oli stap soem olgeta bakegen long olgeta blong strongfala fet mo wan strong tingting long evri kaen fasin olsem blong God.

31 Mo wok blong ministri blong olgeta i blong singaotem ol man blong sakem sin, mo blong mekem i hapen mo blong mekem wok blong ol kavenan blong Papa, we hem i bin mekem long ol pikinini blong ol man, blong mekem rere rod long medel blong ol pikinini blong ol man, tru long fasin blong talemaot toktok blong Kraes long ol kontena blong Lod we hem i bin jusum, blong oli save talemaot testimoni long saed blong hem.

32 Mo taem we oli mekem olsem, Lod God i stap mekem rere rod blong mekem se ol narafala man i save gat fet long Kraes, blong mekem se Tabu Spirit i save gat wan ples insaed long ol hat blong olgeta, folem

long paoa blong hem; mo long fasin ia, Papa i mekem i hapen, ol kavenan we hem i bin mekem wetem ol pikinini blong ol man.

33 Mo Kraes i bin talem: Sapos bae yufala i gat fet long mi, bae yufala i gat paoa blong mekem eni samting we i gat nid long plan blong mi.

34 Mo hem i bin talem: Sakem sin yufala ol en blong wol, mo kam long mi, mo kasem baptaes long nem blong mi, mo gat fet long mi, blong mekem se yufala i save stap sev.

35 Mo nao, ol brata blong mi we mi lavem tumas, sapos i olsem ia se ol samting ia i tru we mi bin talem long yufala, mo God bae i soem long yufala, wetem paoa mo bigfala glori long las dei, se oli tru, mo sapos oli tru, dei blong ol merikel oli bin stop?

36 O ol enjel i bin stop blong kamaot long ol pikinini blong ol man? O hem i bin holembak paoa blong Tabu Spirit aot long medel blong olgeta? O bae hem i mekem, olsem we taem bae i stap, o wol bae i stanap, o bae i gat wan man long fes blong wol blong God i sevem?

37 Luk mi talem long yufala, No; from i tru long fet we ol merikel i hapen; mo i tru long fet we ol enjel i kamaot mo givhan long ol man; from samting ia, sapos ol samting ia i bin stop, sore tumas long ol pikinini blong ol man, from, i from oli no gat bilif, mo evri samting i blong nating.

38 From i no gat eni man we i save sev, folem ol toktok blong

Kraes, sapos oli no gat fet long nem blong hem; from samting ia, sapos ol samting ia i bin stop, ale fet tu i bin stop; mo ples blong man i stap no gud tumas, from oli stap olsem se i no bin gat wan fasin blong pemaot man i bin hapen.

39 Be luk, ol brata blong mi we mi lavem tumas, mi jajem ol samting we i moa gud long yufala, from mi jajem se yufala i gat fet long Kraes from fasin blong yufala blong no stap flas; from sapos yufala i no gat fet long hem, ale yufala i no naf blong oli kaontem yufala wetem ol pipol blong jos blong hem.

40 Mo bakegen, ol brata blong mi we mi lavem tumas, mi wantem toktok long yufala long saed blong hop. Hao nao hem i olsem se yufala i save kasem fet, sapos yufala i no gat hop?

41 Mo hem i wantem we bae yufala i gat hop from? Luk mi talem long yufala se bae yufala i gat hop tru long atonmen blong Kraes mo paoa blong laef bakegen blong hem, blong girap long laef we i no save finis, mo hemia i from fet blong yufala long hem, folem promes.

42 From samting ia, sapos wan man i gat fet, hem i mas nid gat hop; from sapos i no gat fet, i no save gat eni hop.

43 Mo bakegen, luk mi talem long yufala se hem i no save gat fet mo hop, hemia nomo sapos i hem i no gat fasin blong no stap flas mo tingting blong hat blong hem i stap daon.

44 Sapos i olsem, fet blong hem mo hop i blong nating, from i

no gat wan we God i akseptem long fored blong hem, sapos i no olgeta we i no stap flas mo tingting blong hat blong olgeta i stap daon, mo sapos wan man i no stap flas mo tingting blong hat blong hem i stap daon, mo i talemaot tru long paoa blong Tabu Spirit se Jisas i Kraes, hem i mas nid gat bigfala lav; from sapos hem i no gat bigfala lav hem i nating; from samting ia hem i mas nid gat bigfala lav.

45 Mo bigfala lav i save wet longtaem, mo i kaen, mo i no jalus, mo i no kam bigwan, i no lukaotem samting blong hem nomo, i no save kros kwiktaem, i no tingting eni nogud samting, mo i no glad long rabis fasin be i glad long trutok, i stanap strong long evri samting, i bilivim evri samting, i gat hop long evri samting, i stap strong long evri samting.

46 From samting ia, ol brata blong mi we mi lavem tumas, sapos yufala i no gat bigfala lav, yufala i nating, from bigfala lav bae i neva sot. From samting ia, holem taet long bigfala lav, we i moa hae bitim evri samting, from evri samting i mas sot—

47 Be bigfala lav i stret lav blong Kraes, mo i stap strong oltaem; mo eni man we oli faenem se hem i gat samting ia long las dei, bae i gud long hem.

48 From samting ia, ol brata blong mi we mi lavem tumas, prea long Papa wetem evri paoa blong hat, blong yufala i save fulap metem lav ia, we hem i bin givimm long olgeta we oli ol tru man blong folem

Pikinini blong hem, Jisas Kraes; blong yufala i save kam ol boe blong God; blong taem we bae hem i kamaot bae yumi stap olsem hem, from bae yumi lukim hem olsem we hem i stap; blong yumi save gat hop ia; blong yumi save kam klin olsem we hem i klin. Amen.

---

## JAPTA 8

---

*Baptaes blong ol smol pikinini i wan nogud rabis sin—Ol smol pikinini i stap laeflong Kraes from atonmen—Fet, fasin blong sakem sin, fasin blong no stap flas mo tingting blong hat i stap daon, kasem Tabu Spirit, mo stap strong kasem en, i lidim i go long fasin blong sevem man. Raonabaot 401–421 yia afta Kraes i bon.*

WAN leta blong papa blong mi, Momon, we i bin raetem long mi, Moronae; mo hem i bin raetem hemia long mi i no long taem afta long koling blong mi long ministri. Mo long fasin ia hem i bin raet long mi, i talem:

2 Boe blong mi we mi lavem tumas, Moronae, mi glad tumas se Lod blong yu Jisas Kraes i bin stap tingbaot yu, mo i bin singaotem yu long ministri blong hem, mo long tabu wok blong hem.

3 Mi mi stap tingbaot yu oltaem long ol prea blong mi, mi stap prea oltaem long God Papa, long nem blong Tabu Pikinini blong hem, Jisas, blong hem, tru long gudfala fasin blong hem we i no save finis mo gladhat, i holem yu tru long



fasin blong stap strong blong fet long nem blong hem kasem en.

4 Mo nao, boe blong mi, mi toktok long yu long saed blong samting we i mekem mi harem nogud tumas; from i mekem mi harem nogud se bae i gat ol rao i girap long medel blong yufala.

5 From, sapos mi bin lanem trutok, i bin gat ol rao long medel blong yufala long saed blong baptaes blong ol smol pikinini blong yufala.

6 Mo nao, boe blong mi, mi wantem se yu mas wok strong oltaem, blong bigfala rong ia i mas aot long medel blong yufala; long ol narafala toktok, from plan ia mi bin raetem leta ia.

7 From kwiktaem afta we mi bin lanem ol samting ia long saed blong yufala, mi bin askem long Lod long saed blong samting ia. Mo toktok blong Lod i bin kam long mi tru long paoa blong Tabu Spirit, i talem:

8 Lisin long ol toktok blong Kraes, Ridima blong yu, Lod blong yu mo God blong yu. Luk, mi bin kam long wol i no blong singaotem olgeta we i stret be olgeta we i sin blong sakem sin; olgeta we i no sik i no nidim dokta, be olgeta we i sik; from samting ia, ol smol pikinini i klin, from oli no save mekem sin; from samting ia, panis blong Adam i kamaot long olgeta tru long mi, mekem se i no gat eni paoa ova long olgeta; mo loa blong sakomsaes i finis tru long mi.

9 Mo long fasin ia Tabu Spirit i bin soemaot toktok blong God

long mi; from samting ia, boe blong mi we mi lavem tumas, mi save se i wan tru fasin blong jik long fored blong God, blong yufala i mas baptaesem ol smol pikinini.

10 Luk mi talem long yu se samting ia yu mas tijim—fasin blong sakem sin mo baptaes long olgeta we oli save gud wanem oli stap mekem mo i save mekem sin; yes, tijim ol papa mo mama se oli mas sakem sin mo kasem baptaes, mo mekem tingting blong olgeta i stap daon olsem ol smol pikinini blong olgeta, mo olgeta evriwan bae i sev wetem ol smol pikinini blong olgeta.

11 Mo ol smol pikinini blong olgeta i no nidim blong sakem sin, o baptaes. Luk, baptaes i blong sakem sin blong mekem i hapen ol komanmen blong kam klin aot long ol sin.

12 Be ol smol pikinini i stap laef long Kraes, we i stat long stat blong wol; sapos i no olsem, God i wan God we i no stret, mo tu wan God we i stap jenis, mo wan God we i no mekem semak long evri man; from hamas smol pikinini i bin ded be oli no bin kasem baptaes!

13 From samting ia, sapos ol smol pikinini i no save sev sapos oli no kasem baptaes, olgeta ia i mas bin go long wan hel we i no gat en.

14 Luk mi talem long yu, se hem we i ting se ol smol pikinini i nidim baptaes, i stap long prapa rabis ples blong harem nogud mo long ol rop blong rabis fasin; from hem i no gat

fet, hop, o bigfala lav; from samting ia, sapos oli katemaot hem taem we i stap long tingting ia, hem i mas go daon long hel.

15 From nogud fasin ia i rabis tumas blong ting se God i sevem wan pikinini from baptaes, mo narafala wan i mas lus from hem i no gat wan baptaes.

16 Sore tumas long olgeta we bae i smasem gud ol wei blong Lod long fasin ia, from bae oli ded sapos oli no sakem sin. Luk, mi stap toktok wetem no fraet, from mi bin kasem raet long God; mo mi no gat fraet long wanem we man i save mekem; from lav we i stret gud i sakemaot evri fraet.

17 Mo mi mi fulap wetem bigfala lav we i lav we i no gat en; from samting ia, evri pikinini i semak long mi; from samting ia, mi lavem ol smol pikinini wetem wan lav we i stret gud; mo olgeta evriwan i semak mo oli tekem pat long fasin blong sevem man.

18 From mi save se God i no wan God we i no stret, mo tu i no wan man we i stap jenis; be hem i no save jenis stat long evri taem we i no save finis kasem evri taem we i no save finis.

19 Ol smol pikinini i no save sakem sin; from samting ia, hem i nogud fasin tumas blong tanem baksaed long ol stret sore blong God long olgeta, from olgeta evriwan i stap laef long hem from sore blong hem.

20 Mo hem we i talem se ol smol pikinini i nidim baptaes i tanem baksaed long ol sore blong Kraes, mo i putum olsem

nating atonmen blong hem mo paoa blong fasin blong hem blong pemaot man.

21 Sore tumas long olgeta olsem, from oli stap long denja blong ded, hel, mo wan harem nogud we i no gat en. Mi stap talemaot samting ia wetem no gat fraet; God i bin givim oda long mi. Lisin long ol samting ia mo obei, o oli stanap agensem yu long jea blong jajmen blong Kraes.

22 From luk we evri smol pikinini i stap laef long Kraes, mo tu olgeta evriwan we i no gat loa. From paoa blong fasin blong pemaot man i kam long evriwan long olgeta we i no gat loa; from samting ia, hem we i no bin kasem panis, o hem we i no stap andanit long wan panis, i no save sakem sin; mo long olgeta olsem baptaes i no help nating—

23 Be hem i wan fasin blong jik long fored blong God, i tanem baksaed long ol sore blong Kraes, mo paoa blong Tabu Spirit blong hem, mo i putum tras long ol wok we i ded.

24 Luk, boe blong mi, samting ia i no sud hapen; from fasin blong sakem sin i blong olgeta we i andanit long panis mo andanit long panis blong wan loa we i brok.

25 Mo ol fasfala frut blong fasin blong sakem sin i baptaes; mo baptaes i kam tru long fet we i mekem i hapen ol komanmen; mo taem we ol komanmen i hapen, i karem i kam fasin blong kam klin aot long ol sin;

26 Mo fasin blong kam klin aot long ol sin i karem i kam fasin blong no stap flas, mo tingting blong hat we i stap daon; mo from fasin blong no stap flas mo tingting blong hat we i stap daon, i mekem i kam, visit blong Tabu Spirit, we Man blong Leftemap Tingting i fulumap long hop mo lav we i stret gud, we lav ia i stap strong tru long had wok oltaem long saed blong prea, go kasem taem we en bae i kam, taem we evri sent bae i stap wetem God.

27 Luk, boe blong mi, bae mi raet long yu bakegen sapos mi no go aot kwiktaem agensem ol man blong Leman. Luk, hae tingting blong kantri ia, o ol pipol blong ol man blong Nifae, i bin pruvum smasgud blong olgeta sapos oli no sakem sin.

28 Prea from olgeta, boe blong mi, blong fasin blong sakem sin i save kam long olgeta. Be luk, mi fraet se Spirit i bin stop blong wok wetem olgeta; mo long pat blong graon ia, oli stap lukaotem tu blong putum daon evri paoa mo raet we i kam long God; mo oli stap tanem baksaed long Tabu Spirit.

29 Mo afta we oli bin sakem-aot wan bigfala save olsem, boe blong mi, oli mas ded kwiktaem, blong mekem se ol profesi i hapen we ol profet i bin talemaot, mo tu wetem ol toktok blong Sevyia blong yumi, hemwan.

30 Gudbae, boe blong mi, kasem taem we bae mi raet long yu, o bae mi mitim yu bakegen. Amen.

Nambatu leta blong Momon long boe blong hem Moronae.

*I stap long japta 9 nomo.*

---

## JAPTA 9

---

*Ol man blong Nifae tugeta wetem ol man blong Leman i mekem ol rabis fasin mo oli kam nogud— Oli panisim mo kilim ded olgeta— Momon i prea blong lav mo gud i save stap long Moronae blong oltaem. Raonabaot 401–421 yia afta Kraes i bon.*

BOE blong mi we mi lavem tumas, mi raet long yu bakegen blong yu save gat save se mi mi stap laef yet; be mi raetem smol long saed blong samting we i sore tumas.

2 From luk, mi bin gat wan strong faet wetem ol man blong Leman, long faet ia mifala i no bin win; mo Akiantas i bin foldaon tru long naef blong faet, mo tu Luram mo Emron; yes, mo mifala i bin lusum wan bigfala namba blong ol gudfala man blong mifala.

3 Mo nao luk, boe blong mi, mi fraet se ol man blong Leman bae oli kilim ded pipol ia; from oli no sakem sin, mo Setan i stap tanem tingting blong olgeta oltaem blong kros, wan wetem narawan.

4 Luk, mi mi stap wok wetem olgeta oltaem; mo taem we mi talemaot toktok blong God strong, oli seksek from fraet mo oli kros agensem mi, mo taem mi no strong, oli mekem ol hat

blong olgeta i strong agensem samting ia; from samting ia, mi fraet se Spirit blong Lod i bin stop blong wok wetem olgeta.

5 From oli stap kros tumas mekem se mi luk se oli no gat eni fraet blong ded; mo oli bin lusum lav blong olgeta, wan i go long narawan; mo oli tosta from blad mo fasin blong pembak oltaem.

6 Mo nao, boe blong mi we mi lavem tumas, i nomata long stronghed blong olgeta, bae yumi wok had oltaem, from sapos yumi stop blong wok, bae yumi mas kasem panis, from yumi gat wan wok blong mekem, taem we yumi stap long bodi blong mit mo bun, blong yumi save winim enemi blong evri stret fasin, mo putum ol sol blong yumi i go long kingdom blong God.

7 Mo nao mi raetem smol long saed blong ol harem nogud blong ol pipol ia. From folem save we mi bin kasem long Amoron, luk, ol man blong Lemana i gat plante prisena, we oli bin tekemaot long taoa blong Serisa; mo i bin gat ol man, ol woman, mo ol pikinini.

8 Mo ol man mo ol papa blong ol woman ia mo ol pikinini oli bin kilim ded; mo oli fidim ol woman wetem ol mit blong ol man blong olgeta, mo ol pikinini long mit blong ol papa blong olgeta; mo no wota, be smol nomo, oli givim long olgeta.

9 Mo i nomata long rabis sin ia blong ol man blong Lemana, i no bitim hemia blong ol pipol bong yumi long Moriantum.

From Luk, plante long ol gel blong ol man blong Lemana oli bin tekem olsem ol prisena; mo afta oli bin tekemaot long olgeta ol samting ia we oli bin lavem moa mo we i gudgudfala bitim evri samting, we i blong stap klin mo klin fasin—

10 Mo afta oli bin mekem samting ia, oli bin kilim ded olgeta long wan fasin we i rabis olgeta, oli panisim ol bodi blong olgeta go kasem ded; mo afta we oli bin mekem samting ia, oli kakae mit blong olgeta olsem ol wael anamol, from ol hat blong olgeta i strong; mo oli mekem samting ia olsem wan saen se oli no fraet.

11 O boe blong mi we mi lavem tumas, olsem wanem wan pipol olsem ia, we i no gat fasin blong laef—

12 (Mo no plante yia i bin pas i gowe, oli bin stap long wan fasin blong laef we i gud mo oli wan hapi pipol)

13 Be o boe blong mi, olsem wanem wan pipol olsem ia, we glad blong hem i stap tumas long rabis sin—

14 Olsem wanem nao yumi save ting se God bae i no holem bak han blong hem long jajmen agensem yumi?

15 Luk, hat blong mi i stap krae: Sore tumas long ol pipol ia. Kamaot long jajmen, O God, mo haedem ol sin blong olgeta, mo nogud fasin, mo ol rabis sin aot long fored blong fes blong yu!

16 Mo bakegen, boe blong mi, i gat plante woman we ol man blong olgeta i ded mo ol gel

blong olgeta we i stap yet long Serisa; mo pat blong ol kakae we ol man blong Leman i no bin karem i gowe, luk, ami blong Senefae i bin karem i gowe, mo oli bin livim olgeta blong wok-baot olbaot long eni ples we oli save go blong faenem kakae; mo plante olfala woman, ae blong olgeta i kam dak long rod mo oli ded.

17 Mo ami we i stap wetem mi i slak; mo ol ami blong ol man blong Leman i stap long medel blong Serisa mo mi; o olgeta evriwan we i bin ronwe i go long ami blong Eron, oli bin kilim ded olgeta long fasin we i rabis tumas.

18 O rabis fasin blong ol pipol blong mi! Oli no gat oda mo oli no gat sore. Luk, mi mi be wan man, mo mi gat be paoa blong wan man, mo mi nomo save mekem olgeta i obei long ol oda blong mi.

19 Mo oli bin kam strong long rabis fasin blong olgeta; mo oli rabis semak, oli no livim wan, olfala o yangfala; mo oli glad long evri samting be i no long samting we i gud; mo harem nogud blong ol woman blong yumi mo blong ol pikinini blong yumi long ful fes blong graon ia i bitim evri samting, yes, tang i no save talem, mo tu oli no save raetem samting ia.

20 Mo nao, boe blong mi, mi nomo tokbaot samting ia we i rabis tumas. Luk, yu save nogud fasin blong ol pipol ia; yu save se oli no gat gudfala tingting blong lidim olgeta, mo oli bitim we oli save filim; mo nogud fa-

sin blong olgeta i bitim blong ol man blong Leman.

21 Luk, boe blong mi, mi no save talem se oli oraet long God from mi fraet se bae hem i kilim mi.

22 Be luk, boe blong mi, mi talem se yu oraet long God, mo mi stap trastem long Kraes se bae yu stap sev; mo mi prea long God se bae hem i letem laef blong yu, blong witesem kambak blong ol pipol long hem, o ded blong olgeta evriwan; from mi save se oli mas ded sapos oli no sakem sin mo kambak long hem.

23 Mo sapos oli ded bae i semak olsem ol laen blong Jared, from strong tingting blong ol hat blong olgeta, oli stap lukaotem blad mo blong pembak.

24 Mo sapos i olsem se bae oli ded, yumi save se plante long ol brata blong yumi i bin lego blong joenem ol man blong Leman, mo plante moa tu bae oli lego blong joenem olgeta; from samting ia, raetem smol long ol smol samting, sapos yu yu laef yet mo mi bae mi ded mo mi no luk yu; be mi stap trastem se mi save lukim yu klosap; from mi gat ol tabu histri we mi wantem blong givim long yu.

25 Boe blong mi, holem taet fet long Kraes; mo maet ol samting we mi bin raetem i no mekem yu harem nogud, go kasem we yu ded; be bae Kraes i leftemap yu, mo bae ol harem nogud blong hem mo ded, mo taem we hem i bin soemaot bodi blong hem long ol bubu

blong yumi, mo sore blong hem, mo fasin blong gotru long had-taem wetem longfala tingting, mo hop blong glori blong hem, mo blong laef we i no save finis, i stap long maen blong yu blong oltaem.

26 Mo bae gladhat blong God Papa, we jea blong hem i stap hae long ol heven, mo Lod blong yumi Jisas Kraes, we i stap sidaon long raet han blong paoa blong hem, go kasem taem we evri samting bae i kam long kontrol blong hem, i hapen, mo stap wetem yu blong oltaem. Amen.

---

#### JAPTA 10

---

*Wan testimoni blong Buk blong Momon i kam tru long paoa blong Tabu Spirit—Ol presen blong Spirit, God i givim long olgeta we i holem taet fet—Ol presen blong spirit oltaem i go wetem fet—Ol toktok blong Moronae i toktok aot long das—Kam long Kraes, kam stret gud long hem, mo mekem ol sol blong yufala i tabu. Raonabaot 421 yia afta Kraes i bon.*

NAO mi, Moronae, mi raetem smol olsem we mi ting se i gud; mo mi raetem long ol brata blong mi, ol man blong Leman; mo mi wantem se oli mas save se moa bitim fo hundred mo twenti yia i bin pas i gowe, stat long taem we saen i bin kamaot blong taem we Kraes i bin kam.

2 Mo mi silim ol histri ia, afta we mi bin talem ol smol toktok tru long fasin blong askem strong long yufala.

3 Luk, mi wantem askem strong long yufala se taem we bae yufala i ridim ol samting ia, sapos hem i waes tingting long God se bae yufala i ridim olgeta, se bae yufala i save tingbaot hamas sore Lod i bin gat long ol pikinini blong ol man, stat long taem we hem i mekem Adam we i kam daon kasem taem we bae yufala i kasem ol samting ia, mo tingting hevi long hem insaed long ol hat blong yufala.

4 Mo taem we bae yufala i kasem ol samting ia, mi wantem askem strong long yufala se bae yufala i askem God, Papa we i no Save Finis, long nem blong Kraes, sapos ol samting ia i no tru; mo sapos bae yufala i askem wetem wan tru hat, wetem tingting we i tru blong wantem save, wetem fet long Kraes, bae hem i soemaot trutok blong ol samting ia long yufala, tru long paoa blong Tabu Spirit.

5 Mo tru long paoa blong Tabu Spirit, yufala i save gat save long saed blong trutok blong evri samting.

6 Mo eni samting we i gud, i stret mo tru; from samting ia, i no gat wan samting we i gud we i tanem baksaed long Kraes, be i talem se hem i stap.

7 Mo yufala i save gat save se hem i stap, tru long paoa blong Tabu Spirit; from samting ia mi wantem askem strong long yufala se yufala i no tanem baksaed long paoa blong God; from hem i stap wok tru long paoa, folem fet blong ol pikinini blong ol man, semak tede, mo tumoro, mo blong oltaem.

8 Mo bakegen, mi askem strong long yufala, ol brata blong mi, se yufala i no tanem baksaed long ol presen blong God, from oli plante; mo oli kamaot long semfala God. Mo i gat ol defren fasin we God i givim ol presen ia; be i semfala God we i stap wok long evri ples mo long evri samting; mo God i givim ol samting ia tru long fasin blong soemaot blong Spirit blong hem long ol man, blong helpem olgeta.

9 From luk, long wan Spirit blong God i givim se hem i save tijim toktok blong waes tingting;

10 Mo long narafala wan, blong hem i save tijim toktok blong save tru long semfala Spirit;

11 Mo long narafala wan, fet we i bigwan tumas; mo long narafala wan, ol presen blong mekem ol sikman i kam oraet tru long semfala Spirit;

12 Mo bakegen, long narafala wan, blong hem i save mekem ol bigfala merikel;

13 Mo bakegen, long narafala wan, blong hem i save profesae long saed blong evri samting;

14 Mo bakegen, long narafala wan, blong lukim ol enjel mo ol spirit we i stap givhan;

15 Mo bakegen, long narafala wan, evri kaen lanwis;

16 Mo bakegen, long narafala wan, blong tanem ol lanwis mo long ol defren kaen lanwis.

17 Mo evri presen ia i kam tru long Spirit blong Kraes; mo oli kam long evri man wan wan, olsem we hem i wantem.

18 Mo mi wantem askem

strong long yufala, ol brata blong mi we mi lavem tumas, se yufala i tingbaot se evri gud-fala presen i kam long Kraes.

19 Mo mi wantem askem strong long yufala, ol brata blong mi we mi lavem tumas, se yufala i mas tingbaot se hem i semak yestedei, tede, mo blong oltaem, mo se evri presen ia we mi bin tokbaot, we oli blong spirit, bae oli neva gowe, mo tu semak olsem taem we wol bae i stanap, hemia nomo folem fasin blong no bilif blong ol pikinini blong ol man.

20 From samting ia, i mas gat fet; mo sapos i mas gat fet i mas gat hop tu; mo sapos i mas gat hop i mas gat tu, bigfala lav.

21 Mo sapos yufala i no gat bigfala lav, yufala i no save sev long eni wei long kingdom blong God; mo tu yufala i no save sev long kingdom blong God sapos yufala i no gat fet; mo tu yufala i no save, sapos yufala i no gat hop.

22 Mo sapos yufala i no gat hop, yufala i mas nid i stap long fasin blong lusum hop; mo fasin blong lusum hop i kam from rabis fasin.

23 Mo Kraes i bin talem tru long ol papa blong yumi: Sapos yufala i gat fet, yufala i save mekem evri samting we mi luk se i gat nid.

24 Mo nao mi toktok long evri en blong wol—se sapos dei ia i kam we paoa mo ol presen blong God bae i gowe aot long medel blong yufala, bae hem i from i no gat bilif.

25 Mo sore tumas long ol

pikinini blong ol man, sapos samting ia i wanem we i hapen; from bae i no gat wan we i mekem gudfala fasin long medel blong yufala, no i no gat wan. From sapos i gat wan long medel blong yufala we i mekem gudfala fasin, hem bae i wok tru long paoa mo ol presen blong God.

26 Mo sore tumas long olgeta we bae i mekem ol samting ia i gowe mo ded, from oli ded wetem ol sin blong olgeta, mo oli no save sev long kingdom blong God; mo mi talemaot samting ia folem ol toktok blong Kraes; mo mi no giaman.

27 Mo mi askem strong long yufala blong tingbaot ol samting ia; from taem i stap kam kwik tumas we bae yufala i save se mi no giaman, from bae yufala i lukim mi long kot blong God; mo Lod God bae i talem long yufala: Mi no bin talemaot ol toktok blong mi long yufala, we man ia i bin raetem, olsem wan we i stap singaot aot long olgeta we i ded, yes, hem i olsem wan we i stap toktok aot long das?

28 Mi talemaot ol samting ia blong mekem ol profesi i hapen. Mo luk, bae oli kam fored aot long maot blong God we i no gat en; mo toktok blong hem bae i wesil i go aot long wan jeneresen i go long narafala jeneresen.

29 Mo God bae i soem long yufala, se samting we mi bin raetem i tru.

30 Mo bakegen mi wantem askem strong long yufala se

bae yufala i kam long Kraes, mo holem taet long evri gudfala presen, mo no tajem nogud presen, o samting we i no klin.

31 Mo wekap, mo girap aot long das, O Jerusalem; yes, mo putum ol naes klos blong yu, O gel blong Saeon; mo mekem ol stek blong yu i kam strong mo mekem ol boda blong yu i kam bigwan blong oltaem, blong mekem se oli no save winim yu bakegen, mo ol kavenan blong Papa we i no save finis, we hem i bin mekem wetem yu, O laen blong Isrel, i save hapen.

32 Yes, kam long Kraes, mo stap stret gud long hem, mo tanem baksaed blong yufala long evri fasin we i no olsem blong god; mo sapos bae yufala i tanem baksaed blong yufala bakegen long evri fasin we i no olsem blong god, mo lavem God wetem evri strong blong yufala, tingting mo paoa, afta gladhat blong hem i naf blong yufala, blong tru long gladhat blong hem, yufala i save stap stret gud long Kraes; mo sapos tru long gladhat blong God yufala i stret gud long Kraes, yufala i no save tanem baksaed long paoa blong God long eni wei.

33 Mo bakegen, sapos yufala tru long gladhat blong God, i stret gud long Kraes, mo no tanem baksaed long paoa blong hem, ale yufala i tabu long Kraes tru long gladhat blong God, tru long blad blong Kraes we i ron, we i stap long kavenan blong Papa blong kam klin aot long ol sin blong yufala,



blong mekem se yufala i kam tabu, no gat mak.

34 Mo nao, mi talem long evriwan, gudbae. I no longtaem bae mi go spel long paradaes blong God, kasem taem we spirit blong mi mo bodi bae i kam tugeta bakegen, mo hae

Jehova i tekem mi tru long skae, blong mitim yufala long fored blong gudfala kot blong hae Jehova, Jaj we i No Save Finis blong olgeta we i stap laef tugeta wetem olgeta we i ded. Amen.

EN

---

## GAED BLONG LUKAOTEM OL SAMTING LONG BUK BLONG MOMON

---

Buk blong Momon, bitim evri narafala samting insaed long buk ia, i talemaot se Jisas Kraes hem i God, mo i gat ol doktrin blong gospel blong Jisas Kraes. Ol topik mo ol skripja ia oli talem moa samting long saed blong ol pipol, mo ol ples, mo ol doktrin, mo ol samting we oli bin hapen insaed long Buk blong Momon.

---

### JISAS KRAES

---

**Kraes i bin Kam mo Tijim ol Pipol blong Not mo Saot Amerika:** 3 Nifae 11–27. *Hem i talemaot we hem i God:* 9:1, 12–15; *hem i tijim Nifae long saed blong baptaes:* 11:18–30; *hem i tijim doktrin blong Kraes:* 11:31–41; *hem i singaotem ol twelef disaepol:* 12:1–2; *hem i tijim ol blessing:* 12:3–12; *hem i givim eksampol blong prea:* 13:9–13; *hem i wonem ol pipol agensem ol giaman profet:* 14:15–20; *hem i tijim long saed blong ol narafala sipsip:* 15:11–24; *hem i mekem ol sikman oli kam oraet bakegen:* 17:5–10; *hem i prea from ol pipol:* 17:13–20; *hem i blesem ol pikinini:* 17:10–12, 21–25; *hem i statem sakramen:* 18:1–14; *hem i givim paoa long ol twelef blong oli save givim Tabu Spirit:* 18:26–39; *hem i prea long Papa:* 19:16–34; *hem i blesem sakramen:* 20:1–9; *hem i tijim ol toktok blong Aesea:* 22:1–23:3; *hem i tijim se ol skripja oli impoten:* 23:1–6, 14; *hem i tijim ol tweleflong saed long nem blong Jos:* 27:1–12; *hem i tijim long saed blong misen mo atonmen blong hem:* 27:13–22.

---

**Atonmen:** 1 Nifae 11:32–33; 2 Nifae 2:3–10, 25–27; 9:5–27;

Jekob 4:11–12; Mosaea 3:11–18; 4:6–8; 13:27–35; Alma 34:8–16; 42:11–30; 3 Nifae 11:14.

**Bon mo Ded:** Hileman 14:2–6, 20–27; 3 Nifae 1:15–21; 8:5–23.

**Doktrin blong Kraes:** 2 Nifae 31:10–32:6; 3 Nifae 11:31–41.

**Jajmen:** 2 Nifae 2:10; Alma 5:15; 12:12–15; 33:22; 3 Nifae 27:14–16; Momon 3:20; 7:6; Ita 12:38.

**Jehova:** Mosaea 3:4–11; 15:1; 3 Nifae 15:1–5; Ita 3:13–15; Moronae 10:27–34.

**Jisas Kraes:** 1 Nifae 11:14–33; 22:24; 2 Nifae 9:5; 11:2–8; Mosaea 3:5–13; 5:6–12; Alma 5:50; 7:7–13; 46:15; Hileman 3:28; 14; 3 Nifae 1:12–21; 9; 11–26; 27:3–21, 27; Momon 1:15; Ita 3:14–17; Moronae 7:48.

**Jos:** Mosaea 25:18–22; 27:13; 3 Nifae 27:1–12; Moronae 6:4–9.

**Kambak Bakegen blong Kraes:** 3 Nifae 24:1–2.

**Krusifiksen:** 1 Nifae 11:32–33; 19:9–14; 2 Nifae 6:9; Mosaea 15:1–7; 3 Nifae 27:14–15.

**Laef Bakegen long Ded:** 2 Nifae 2:8; 9:6–13, 22; Mosaea 15:21–26; Alma 11:41–45; 40:1–6, 11–24; 3 Nifae 23:9–11.

**Lod:** 1 Nifae 3:7; 17:13–15; Alma 29:11; Hileman 13:6.

**Medel Man:** 2 Nifae 2:9, 27–28.

**Mesaea:** 1 Nifae 10:4, 17; 2 Nifae 2:6, 26; 25:14.

**Profesi, Ol Profesi long Saed blong Kraes:** 1 Nifae 10:4–11; 11:1–3, 12–33; 19:8–17; 2 Nifae 10:3; 25:19; Mosaea 3:5–12; 13:33–35; Alma 7:9–13; Hileman 8:22; 14:1–8, 14–27; Ita 3:13–20.

**Ridima:** 2 Nifae 2:6–7, 26; Mosaea 15:6–27; Alma 9:26–27; 11:40–41; 42:13–26; Hileman 5:9–12; 14:12–17; 3 Nifae 9:17; Ita 3:13–14.

**Sevya:** 1 Nifae 10:4; 13:40; 2 Nifae 25:20; Mosaea 3:17–20; 5:7–15; Hileman 14:15–17.

**Smol Sipsip blong God:** 1 Nifae 13:40; Alma 7:14; Momon 9:6.

**Stret Gud:** *Luk long Ol DOK-TRIN*—Stret Gud.

**Taem God i Mekem Wol ia:** Mosaea 3:8; Alma 30:43–44; 3 Nifae 9:15; Ita 3:15.

**Testemoni long Saed blong Kraes:** 2 Nifae 25:26; 26:12; Jakob 7:11, 19; Alma 6:8; Ita 12:41; Moronae 7:31.

**Toktok blong God:** 1 Nifae 11:25; 15:23–25; 17:45–46; 2 Nifae 27:14; 31:20; Mosaea 26:3; Alma 17:2; 31:5; 32:28–43.

---

## OL PIPOL

---

**Abinadae:** Mosaea 11–17.

**Adam:** 2 Nifae 2:14–29; Alma 12:21–26.

**Alma, Boe blong Alma:** Mosaea 27:8–27; Alma 4:11–20; 36:6–27.

**Alma, Olfala Alma:** Mosaea 17–18; 25–26.

**Amon, Boe blong Mosaea:** Mosaea 27:8–28:8; Alma 17–20; 26–27.

**Amulek:** Alma 8:21–27; 10:1–32; 11:20–46; 14:9–29; 34.

**Antae-Nifae-Lihae, Ol Antae-Nifae-Lihae:** Alma 23–24; 27:20–27; 53:16–19; 56–58.

**Benjamin:** Mosaea 2–6.

**Ebrahim:** Jakob 4:5; Alma 13:15; Hileman 8:16–19.

**Gidion:** Mosaea 19:4–8; 20:17–22; 22:3–9; Alma 1:8–10.

**Hagot:** Alma 63:5–8.

**Hileman, Boe blong Alma:** Alma 45:22–23; 53:19, 22; 57:19–27.

**Hileman, ol Boe blong (Ol Yang Boe blong Faet):** Alma 53:16–22; 56:10, 47, 52–56; 57:26.

**Inos:** Inos 1.

**Ismael:** 1 Nifae 7:2–5; 16:7, 34.

**Ita:** Ita 12:1–5; 13:2–14.

**Iv:** 2 Nifae 2:15–20.

**Jared:** Ita 1:33–2:1; 2:13.

**Jared, Brata blong Jared:** Ita 1:34–43; 2–3; 4:4; 12:20–21, 24, 30.

**Jared, Ol Man blong Jared:** Ita 1:33–43; 2–3; 6:1–18; 14–15.

**Jakob, Boe blong Lihae:** 2 Nifae 6–11; Jakob 1–7.

**Jisas Kraes:** *Luk long seksen JISAS KRAES.*

**Lamonae:** Alma 17–19.

**Leban:** 1 Nifae 3:1–27; 4:1–26.

**Leman:** 1 Nifae 2:5, 11–12; 3:9–31; 7:6; 8:34–38.

**Leman, Ol Man blong Leman:** 2 Nifae 5:14; Jakob 1:13–14; Mosaea 10:11–17; Hileman 6:34–37.

**Lemyul:** 1 Nifae 2:10; 3:28; Jakob 1:13–14.

**Lihae, Papa blong Nifae:** 1 Nifae 2:1–4; 5:14; 8:2–38; 16–18; 2 Nifae 1–3; 4:1–12.

**Meri, Mama blong Jisas:** 1 Nifae 11:13–20; Mosaea 3:8; Alma 7:10.

**Momon:** Momon 1:1–6; 2:1–2, 17–18; 3:8–12; 5:1–2; 6:5–6; 8:2–3.

**Moronae, Boe blong Momon:** Toktok blong Momon 1:1; Momon 8:1–3, 14; Ita 1:1–2; Moronae 1:1–4; 10:1–2.

**Moronae, Kaptan:** Alma 43:16–17, 47–50; 46:12–13; 48:11–18.

**Mosaea, Boe blong Benjamin:** Mosaea 6:4–7; 28:17; 29.

**Mosaea, Ol Boe blong:** Mosaea 27:8–20, 34; 28:1–7; Alma 17–26.

**Nifae, Boe blong Hileman:** Hileman 3:37; 5:18–52; 7–9; 10:3–11; 11:3–18.

**Nifae, Boe blong Lihae:** 1 Nifae 1:1–4; 3–4; 7; 10:17–22; 15:21–36; 16:18–32; 17–18; 2 Nifae 33.

**Nifae, Boe blong Nifae, Boe blong Hileman:** 3 Nifae 1:2–3; 7:15–19; 19:4.

**Nifae, Ol Man blong Nifae:** 2 Nifae 5:5–17; Alma 50:23; Hileman 6:34–35; 3 Nifae 11–28; 4 Nifae 1:2–3, 15–16; Momon 3:9–11; Moronae 1:2.

**Sam:** 1 Nifae 2:5, 17; 2 Nifae 5:5–6; Alma 3:6.

**Samuel, Man blong Leman:** Hileman 13–16.

**Sinok:** 1 Nifae 19:10; Alma 33:15, 17; Hileman 8:20.

**Sinos:** 1 Nifae 19:10, 12, 16; Jakob 5; Alma 33:3–11; 34:7; Hileman 8:19; 3 Nifae 10:15–16.

---

## OL DOKTRIN

---

**Adaltri mo Fasin blong Slip Wetem Man o Woman Aot long Mare:** Jakob 3:12; Alma 39:3–5; Hileman 8:26.

**Akaontebol:** Alma 12:14; 41:3–7; Hileman 14:29–31; Moronae 8:10.

**Aposol:** 1 Nifae 1:10; 11:34; Momon 3:18.

**Apostasi:** *Apostasi long Jos blong Kraes long bifo:* 1 Nifae 13:26; 2 Nifae 26:20. *Apostasi blong Wanwan Man:* 1 Nifae 8:23, 28; 12:17; Alma 4:6–12; Hileman 3:33–34; 4:11–13; 5:2–3; 12:2; 13:38; 3 Nifae 2:1–3; Momon 8:28–41.

**Askem:** 1 Nifae 15:11; 2 Nifae 32:4; Mosaea 4:10, 21; Moronae 10:4.

**Baebol:** 1 Nifae 13:38–41; 2 Nifae 3:12; 29:3–14; Momon 7:8–10.

**Baptaes:** 2 Nifae 9:23–24; Mosaea 18:8–16; 21:33–35; Alma 7:14; 3 Nifae 11:19–40; 12:1–2; Moronae 8:4–25.

**Bilif:** 2 Nifae 6:14; Mosaea 4:10; Alma 11:40; Hileman 14:13; 3 Nifae 11:35.

**Bilif, No Gat Bilif:** 1 Nifae 4:13; Mosaea 26:1–5; 3 Nifae 19:35.

**Blesing:** 1 Nifae 15:18; 17:35; 2 Nifae 1:28; 4:9; Mosaea 2:24; Hileman 12:1; 3 Nifae 12:1–12; 24:10.

**Bon Bakegen:** Mosaea 5:2–15; 27:23–30.

**Buk blong Momon:** 2 Nifae 3:12–21; Momon 7:9; Ita 5:1–4; Moronae 10:4.

**Ded:** *Long Bodi:* 2 Nifae 2:22; 9:6, 11; Alma 12:24; 40:11. *Long Spirit:* 2 Nifae 2:27; 9:4–9; Jakob 3:11; Alma 13:30; 42:9; Hileman 14:16–19.

**Devel:** 2 Nifae 2:17–18, 27; 28:19–23; Omnae 1:25; Alma 30:60; 34:39; Hileman 5:12; 3 Nifae 18:15, 18.

**Doktrin:** *Luk long* JISAS KRAES—Doktrin blong Kraes

**Enjel:** Mosaea 27:11–16; Alma 36:22; 3 Nifae 17:24; Moronae 7:25–32.

**Famle:** 1 Nifae 8:37; 2 Nifae 2:20; 25:26; Jakob 3:7; Mosaea 4:14–15; 3 Nifae 18:21.

**Fasin blong No Stap Flas:** Mosaea 3:19; 3 Nifae 12:5; Moronae 7:44; 8:26.

**Fasin blong Stap Klin:** 2 Nifae 9:36; Jakob 2:28; Alma 39:1–13; 3 Nifae 12:27–28; Moronae 9:9.

**Fet:** 1 Nifae 3:7; 7:12; 2 Nifae 9:23; 26:13; Enos 1:3–8; Mosaea 3:12; 5:7; Alma 14:26; 22:16; 32; 57:25–27; Hileman 8:15; 3 Nifae 17:8; Ita 12:6–31; Moronae 7:1, 20–48; 10:4.

**Fogiv:** 1 Nifae 7:21; Mosaea 4:2; 26:29–31; Alma 39:6; 3 Nifae 13:11.

**Foldaon blong Adam mo Iv (Foldaon blong Man):** 1 Nifae 10:6; 2 Nifae 2; Alma 22:12–14; 34:9; 42:2–15.

**Fridom blong Jusum:** 2 Nifae 2:15–16, 27; Hileman 14:30–31.

**Giaman:** 2 Nifae 2:18; 9:34; 28:8–9; Alma 5:17; 12:3; Ita 3:12.

**Givim Samting long ol Pua-man:** Mosaea 4:26; 18:27; 3 Nifae 13:1–4.

**Glad:** 1 Nifae 8:12; 2 Nifae 2:22–25; 9:18; Alma 22:15; 36:20.

**Gladhat:** 2 Nifae 2:8; 10:24; 25:23; Jakob 4:7; Ita 12:26–27.

**God, Ol Pikinini blong God:** Mosaea 5:7; 27:25; 3 Nifae 9:17; Ita 3:14; Moronae 7:19.

**Godhed:** 2 Nifae 31:21; Mosaea 15:1–4; 3 Nifae 11:3–7, 27, 36.

**Gospel:** 3 Nifae 27:13–22.

**Hadtaem:** 2 Nifae 2:11.

**Hae Tingting:** 1 Nifae 11:36; Jakob 2:13, 16; Alma 5:28; Hileman 3:33–36; Moronae 8:27.

**Harem Soa:** 2 Nifae 9:21; Jakob 3:11; Mosaea 2:36–38; 3:5–8; 25:11; 27:28–29; Alma 7:10–11; 36:16–21.

**Hel:** 1 Nifae 15:35; 2 Nifae 9:10–12; 28:21; Jakob 3:11; Momon 9:4.

**Hom:** 3 Nifae 17:2–3; Momon 2:23.

**Hop:** 2 Nifae 31:20; Alma 7:24; 13:27–29; Ita 12:4; Moronae 7:1, 40–43.

**Isrel:** *Kam Tugeta:* 1 Nifae 15:12–17; 22:3–12; 2 Nifae 10:3–9; Jakob 5–6; 3 Nifae 16:4; 17:4.

*Seraot*: 1 Nifae 22:3–9; 2 Nifae 10:3–9; Jakob 5–6; 3 Nifae 21:26–29. *Ol Ten Traeb we oli bin Lus*: 1 Nifae 22:3–4; 2 Nifae 29:12–14; 3 Nifae 17:4; 21:26–29.

**Jajmen**: 1 Nifae 12:9; 2 Nifae 9:15, 46; 28:23; Alma 41:3, 14; 3 Nifae 27:16, 23–26; Momon 3:18–20.

**Jastis**: 1 Nifae 15:30; 2 Nifae 9:26; Alma 34:16; 42:13–25; 54:6.

**Jenisim Bilif**: Mosaea 5:2, 12–14; 27:33–35; Alma 22:15–18; Hileman 15:7; 3 Nifae 7:21.

**Jos**: 1 Nifae 14:8–17; Alma 6:1–6; Momon 8:32–33; Moronae 6:5.

**Kavenan**: 1 Nifae 15:18; 2 Nifae 31:13, 16; Mosaea 5:5; 18:8–16; 3 Nifae 20:25–26; Moronae 7:31; 10:32–33.

**Komanmen**: 1 Nifae 2:10; 3:7; Jerom 1:9; Alma 37:35.

**Konsekresen**: 4 Nifae 1:3.

**Kraes, Man we i Agensem Kraes**: Jakob 7; Alma 1; 30.

**Kros**: 2 Nifae 4:28–29; 28:19–20, 28; 33:4–5; 3 Nifae 11:30; Moronae 9:3–4.

**Laef Bakegen blong Man**: Alma 40.

**Laef bifo Laef ia**: Alma 13:3; Ita 3:16.

**Laef long Wol**: 2 Nifae 2:21, 25; Alma 12:24; 34:32; 42:10.

**Laef we i No Save Finis**: 2 Nifae 2:27; 9:39; 31:17–20; 33:4; 3 Nifae 15:9.

**Lav**: 1 Nifae 19:9; 2 Nifae 31:20; Mosaea 4:15; Alma 5:26; 13:28; 38:12; Moronae 7:47–48; 8:16.

**Lav, Bigfala Lav**: 2 Nifae 26:30; Alma 7:24; Ita 12:33–34; Moronae 7.

**Lav mo Sore**: Mosaea 15:9; 3 Nifae 17:6.

**Livim Kakae**: Mosaea 27:22–23; Alma 5:46; 6:6; 17:3, 9; 45:1.

**Mama**: Alma 56:47; 57:21.

**Man**: 2 Nifae 2:25; Mosaea 7:27; 3 Nifae 12:48; 27:27; Moronae 7:48.

**Man blong Wol**: Mosaea 3:19; 16:5; Alma 26:19–22; 41:11; 42:7–24.

**Mane**: *Luk long Rij*.

**Mared**: 1 Nifae 7:1; 16:7; 4 Nifae 1:11.

**Merikel**: 2 Nifae 27:23; Alma 23:6; Momon 9:10–20; Ita 12:12–21.

**Milenium**: 1 Nifae 22:26; 2 Nifae 12:4; 30:18.

**Nomo Save Ded**: 2 Nifae 9:13; Alma 11:45.

**Obei**: 1 Nifae 3:7; 17:3; Mosaea 2:37; Alma 3:26–27; 3 Nifae 14:21.

**Odenem**: Mosaea 18:18; 3 Nifae 12:1; Moronae 3:1–4.

**Odinens**: Mosaea 13:30; Alma 30:3.

**Papa**: *Blong Heven*: Mosaea 2:34; 3 Nifae 13:14, 26–33; Ita 12:8. *Blong Wol*: 1 Nifae 1:1; Enos 1:1; Mosaea 27:14; Alma 36–42; Hileman 5:5–12.

**Papa mo Mama**: 1 Nifae 1:1; 5:11; 8:37; Mosaea 4:14–15; Moronae 8:10.

**Paradaes:** Alma 40:11–12;  
4 Nifae 1:14.

**Pemaot:** *Luk long Plan blong*  
Pemaot

**Pikinini:** 2 Nifae 2:22–23;  
Mosaea 4:14–15; 3 Nifae 17:21–  
24; Moronae 8:8–24.

**Pis:** Mosaea 4:3; Alma 38:8;  
40:12.

**Plan blong Glad:** *Luk long Plan*  
blong Pemaot.

**Plan blong Pemaot:** 2 Nifae 2;  
9; Alma 12:25–34; 22:12–14;  
34:8–16; 42:5–26, 31.

**Prea:** 2 Nifae 32:8–9; Enos 1:4;  
Alma 5:45–46; 17:3; 26:22;  
34:17–28; 37:37; 3 Nifae 18:16,  
19–21; 19:31–34; 20:1; Moronae  
7:6–9; 10:4.

**Presen, Ol Presen blong Spirit:**  
3 Nifae 29:6; Momon 9:7;  
Moronae 10:8–18.

**Presen we i Tabu Spirit:**  
2 Nifae 31:17; Moronae 2.

**Prishud:** Alma 6:1; 13:1–12; 17:3;  
3 Nifae 11:21–22; Moronae 2:2.

**Profesi:** Jakob 4:6, 13; Mosaea  
5:3; Alma 12:7; 3 Nifae 29:6;  
Momon 8:23.

**Profet:** 1 Nifae 3:17–18; 22:1–2;  
Jakob 7:11; Mosaea 8:16; 3 Nifae  
1:13.

**Pua:** 2 Nifae 9:30; Mosaea 4:26;  
Alma 1:27; 34:28; 4 Nifae 1:3.

**Putum ol Han Antap long Hed:**  
Alma 6:1; 3 Nifae 18:36–37;  
Moronae 2:2.

**Rabis o Nogud:** 2 Nifae 32:8;  
Omnae 1:25; Mosaea 2:32; Alma  
19:33; Moronae 7:8–17.

**Raet:** Hileman 5:18; 11:18;  
3 Nifae 7:17; 12:1–2.

**Rao:** 2 Nifae 26:32; Mosaea 4:14;  
3 Nifae 11:29.

**Revelesen:** 2 Nifae 28:30; 30:17;  
32:5; Jakob 4:8; Alma 5:46;  
26:22; Momon 9:7–8; Ita 12:6;  
Moronae 10:4–5.

**Rij:** 2 Nifae 9:30, 50–51; 26:31;  
Jakob 2:18–19; Alma 1:30–31;  
4:6–8; 3 Nifae 6:12.

**Rong:** 1 Nifae 16:2; 2 Nifae 9:14;  
Enos 1:6; Alma 42:18, 29.

**Sabat Dei:** Jerom 1:5; Mosaea  
13:16–19; 18:23–25.

**Saen:** Mosaea 3:15; Alma 30:48–  
60; Hileman 14; 3 Nifae 1:13–  
16; Momon 9:24; Ita 4:18.

**Sakem Sin:** Mosaea 5:2;  
26:29; Alma 14:1; 34:33–36; 36;  
42:16, 29; 3 Nifae 9:20–22; 27:20;  
Moronae 6:8.

**Sakramen:** 3 Nifae 18:1–11,  
28–29; Moronae 4–5.

**Sakrifaes:** 2 Nifae 2:6–7; Alma  
34:8–14; 3 Nifae 9:19–20.

**Sastenem ol Lida blong Jos:**  
3 Nifae 10:12–13; 12:1.

**Save:** 2 Nifae 9:14; Alma 18:35;  
32:34; Hileman 15:13; Moronae  
7:15–17.

**Sevem Man:** 2 Nifae 2:3–6;  
Mosaea 15:24–28; Moronae  
8:8–24.

**Sik:** Mosaea 3:5; Alma 7:10–12;  
3 Nifae 26:15.

**Sin:** 2 Nifae 4:31; 9:38; Alma  
13:12; 41:9–10; 45:16; Moronae  
8:8.

**Skripja:** 1 Nifae 19:23; 2 Nifae 25:21–23; 29:10–14; 32:3; Jakob 7:23; Mosaea 1:2–7; Alma 17:2; 37:1–19; Hileman 15:7–8; Momon 7:8–9.

**Slak:** 1 Nifae 19:6; Jakob 4:6–7; Ita 12:27–28, 37.

**Sore:** Alma 32:22; 42:13–25; Moronae 8:19–20.

**Stap Daon, Tingting we i Stap Daon:** 2 Nifae 9:42; Mosaea 4:11; Alma 5:27–28; Hileman 3:33–35; 3 Nifae 12:2; Ita 12:27.

**Stap Strong:** 1 Nifae 22:31; 2 Nifae 31:16, 20; 3 Nifae 27:6.

**Stret:** 1 Nifae 17:35; 2 Nifae 2:13; 9:18, 40; Alma 5:58; Hileman 13:38.

**Stret Gud:** Alma 42:15; 3 Nifae 12:48; Moronae 10:32.

**Tabu, Mekem Tabu:** Alma 13:10–12; Hileman 3:33–35; 3 Nifae 27:20.

**Tabu Spirit:** 1 Nifae 10:17–19; 2 Nifae 32:5; 3 Nifae 27:20; 28:11; Moronae 10:5.

**Taem we Gospel i Kambak:** 1 Nifae 15:13–18; 2 Nifae 3:6–15; 27:6–26; 3 Nifae 16:7.

**Taeting:** Alma 13:15; 3 Nifae 24:8–11.

**Talem se i No Gat Rong:** 2 Nifae 2:5; Mosaea 14:11.

**Talemaot:** 2 Nifae 33:1; Jakob 7:10–11; Alma 5:45–48.

**Tangkyu, Talem Tangkyu:** Mosaea 2:19–21; Alma 34:38; 37:37.

**Temtesen:** 1 Nifae 15:24; 2 Nifae

2:11–16; Alma 13:28; 37:33; 3 Nifae 18:15, 18.

**Testemoni:** Mosaea 18:9; Alma 4:19–20; 5:45–48; 30:41–44.

**Tingbaot:** 1 Nifae 14:8; 17:45; Mosaea 1:2–7; Hileman 12:3; 3 Nifae 18:7, 11; Momon 5:21; Moronae 4:3; 5:2; 10:27.

**Tingting:** Mosaea 4:3; Alma 29:5; Moronae 7:16.

**Tri blong Laef:** 1 Nifae 8; 11:8–9, 21–22, 25; 15:36; Alma 5:34, 62; 32:40.

**Tru:** 1 Nifae 16:2; 2 Nifae 9:40; Jakob 4:13; Moronae 10:5.

**Waes Tingting:** 2 Nifae 9:28; 27:26; Mosaea 2:17; Alma 37:35.

**Wantem Tumas:** Alma 39:3–4, 9; 3 Nifae 12:28.

**Witnes blong God:** Mosaea 18:8–9; 3 Nifae 18:10–11; Moronae 4, 5.

**Wok:** 2 Nifae 2:3; Mosaea 2:17; Ita 2:8–12.

**Wok blong Misinari:** Jakob 1:19; Alma 17–26; 29:8; Momon 9:22.

**Wok Had Oltaem:** Jakob 1:19; Alma 17:2; 3 Nifae 6:14; Moronae 9:6.

**Woman:** Jakob 2:28; Alma 32:23; 56:47–48.

**Wosip:** 2 Nifae 25:29; Jakob 4:5; Alma 34:38; 3 Nifae 11:17.

---

OL SAMTING WE I HAPEN  
MO OL PLES

---

**Ami blong Hileman:** Alma 53:10–23; 56–57.



**Amonaeha:** Alma 8–14; 16:1–3, 9, 11; 49:1–4.

**Buk blong Nifae:** 1 Nifae 9; 19:1–6.

**Buk blong Ol Man Jared:** Mosaea 8:9–12; 21:25–28; Ita 1:1–4; 15:33.

**Buk we oli bin Mekem Wetem Bras:** 1 Nifae 3–4; 5:10–16; 19:21–24; Omnae 1:14; Mosaea 1:1–14; Alma 37:1–7; 3 Nifae 1:2.

**Ded blong Ol Man blong Nifae:** Momon 1–6.

**Emti, Graon blong Emti:** Alma 22:30–32; Momon 3:5; Ita 7:6.

**Jerusalem:** 1 Nifae 1:4, 13, 18; 3 Nifae 20:46; Ita 13:5.

**Jeson, Graon blong Jeson:** Alma 27:22–23; 28:1; 30:19–21; 35:1–2, 13; 43:4.

**Kumora:** Momon 6:2, 6–11; 8:2; Ita 15:11.

**Lanwis, Samting blong Tanem Lanwis:** Mosaea 8:13–18.

**Liahona, o Kampas:** 1 Nifae 16:10, 28–29; Alma 37:38, 43–45.

**Misen, Ol Misen blong Misinari blong ol Boe blong Mosaea:** Alma 17–27.

**Momon mo Moronae i Yusem Fasin blong Lukaot Gud long ol Buk:** Toktok blong Momon 1; Momon 1:1–5; 2:17–18; 8:1–17.

**Nifae, Graon blong Nifae:** 2 Nifae 5:6–9; Omnae 1:12–13; Toktok blong Momon 1:13; Mosaea 28:1; Alma 22:32.

**Not, Graon blong Not:** Alma 22:30–33; 46:22; 50:11, 29–34;

63:4–10; Hileman 3:3, 8–11; Momon 2:20, 29.

**Pis afta Kraes i bin Kam:** 4 Nifae 1:1–20.

**Plante, Graon blong Plante:** Alma 22:29–33; 52:9; 63:5; 3 Nifae 11:1.

**Promes Graon:** 1 Nifae 2:20; 2 Nifae 1:5–9; Ita 2:9–12.

**Reva Saedon:** Alma 3:3; 22:29.

**Sarahemla:** Omnae 1:12–13; Mosaea 1:18; Alma 5:2; Hileman 13:12; 3 Nifae 8:8, 24.

**Sip blong Nifae:** 1 Nifae 17–18.

**Smolfala Graon:** Alma 23:32; 63:5; Momon 2:29; 3:5; Ita 10:20.

**Stori blong Jenisim Laef:** Mosaea 17–18 (Olfala Alma); Mosaea 27, Alma 36 (Alma, Boe blong Alma); Mosaea 27–28 (Ol Boe blong Mosaea); Alma 8:18–32 (Amulek); Alma 17 (King Lamona); Alma 19:16–17 (Abis); Alma 22 (Papa blong King Lamona); Alma 23–24 (Ol Pipol blong Amon).

**Visen blong Brata blong Jared:** Ita 3.

**Visen blong Tri blong Laef:** 1 Nifae 8, 11, 15.

**Wok blong Kraes long Not mo Saot Amerika:** *Luk long* JISAS KRAES—Kraes i bin Kam mo Tijim ol Pipol long Not mo Saot Amerika.

**Wokbaot blong Lihae i Go long Promes Graon:** 1 Nifae 2–18.

**Wota, Ol Wota blong Momon:** Mosaea 18:7–8; 25:18; Alma 5:3.



BISLAMA



4 02356 07852 6

35607 852